



Diospan Tsain

Sharanahua New Testament

Contents

Mateo Jesushuunoa Cununi	1
Marcos Jesushuunoa Cununi	69
Lucas Jesushuunoa Cununi	108
Juan Jesushuunoa Cununi	178
Jesús Fu Rafuafoan Apaonifo Cuscan	226
Pablonun Roma Anoafo Cunu Fomani	284
Pablonun Corinto Anoafo Cunu Fomani	313
Pablonun Corinto Anoafo Afanan Cunu Fomani	347
Pablonun Galacia Anoafo Cunu Fomani	368
Pablonun Efeso Anoafo Cunu Fomani	380
Pablonun Filipos Anoafo Cunu Fomani	392
Pablonun Colosas Anoafo Cunu Fomani	400
Pablonun Tesalónica Anoafo Cunu Fomani	408
Pablonun Tesalónica Anoafo Afanan Cunu Fomani	414
Pablonun Timoteo Cunu Fomani	418
Pablonun Timoteo Afanan Cunu Fomani	427
Pablonun Tito Cunu Fomani	434
Pablonun Filemón Cunu Fomani	438
Jesushuunoa Futsan Hebreofo Cunushoni	440
Santiago Icoinra Huafo Cunushoni	467
Pedronun Icoinra Huafo Cunushoni	476
Pedronun Afanan Icoinra Huafo Cunushoni	486
Juanpan Icoinra Huafo Cunushoni	492
Juanpan Afanan Icoinra Huafo Cunushoni	499
Juanpan Gayo Cunushoni	500
Judaspan Icoinra Huafo Cunushoni	501
Jesucriston Juan Oinmani Cuscan	504



Diospan Tsain

New Testament in Sharanahua (PE:mcd:Sharanahua)

Language: Sharanahua

Provided by: Wycliffe Bible Translators, Inc.

This print-on-demand edition of Scripture is produced and provided at cost by the Digital Bible Society in partnership with the Bible League of Canada, Open Doors International, and other missions and translation agencies. To order additional copies of this or other Bibles, please visit www.dbs.org (USA), www.bibleleague.ca (Canada), and www.opendoors.org (Europe).

Copyright and Permission to Copy

Copyright © 2008 Wycliffe Bible Translators, Inc.

Copyright © 2008 Wycliffe Bible Translators, Inc. Scripture text used by permission.

PDF, ePub, and MOBI Bible covers and design are copyrighted 2017 by the Digital Bible Society (www.dbs.org).

PDF generated on 2017-08-24 from source files dated 2017-08-24.

23536a7f-5104-55dc-b35f-d0f0410fedb3

ISBN: 978-1-5313-0402-7

Mateo Jesushuunoa Cununi

Jesucristo ahuun shunifo

Lc 3.23-38

1 Un mato Jesucristohuunoa tsain shara tapimai. Ahuun shunifoan aton anufo un mato yoiqui tau huai. Ahuun shuni David yafi Abraham.

² Abraham facu Isaac ini.

Isaac facu Jacob ini.

Jacob facu Judá yafi ahuun yorafo ini.

³ Judápan facu Fares yafi Zara ini. Aton ahuari Tamar ini.

Fares facu Esrom ini.

Esrom facu Aram ini.

⁴ Aram facu Aminadab ini.

Aminadab facu Naasón ini.

Naasón facu Salmón ini.

⁵ Salmón facu Booz ini. Ahuun ahuari Rahab ini.

Boozpan facu Obed ini. Ahuun ahuari Rut.

Obed facu Isaí ini.

⁶ Isaí facu David ini. Nan David Israeli-foan aton niaifocoin ipaoni.

David facu Salomón ini. Salomón ahuafin Uriaspan ahuin ipaoniquin.

⁷ Salomón facu Roboam ini.

Roboam facu Abías ini.

Abías facu Asa ini.

⁸ Asa facu Josafat ini.

Josafat facu Joram ini.

Joram facu Uzías ini.

⁹ Uzías facu Jotam ini.

Jotam facu Acáz ini.

Acáz facu Ezequías ini.

¹⁰ Ezequías facu Manasés ini.

Manasés facu Amón ini.

Amón facu Josías ini.

¹¹ Josías facu Jeconías yafi ahuun yorafo ini.

Nantianri Babilonia anoa niaifoan ahuun ranushumuafu nichini Israelifo rutushon atirifi ahuun mai ano

ihuushonafoanno ahuun oinmatifo huanon. ¹² Chipofin Babilonia anoashu futsafori cainni.

Jeconías facu Salatiel ini.

Salatiel facu Zorobabel ini.

¹³ Zorobabel facu Abiud ini.

Abiud facu Eliaquim ini.

Eliaquim facu Azor ini.

¹⁴ Azor facu Sadoc ini.

Sadoc facu Aquim ini.

Aquim facu Eliud ini.

¹⁵ Eliud facu Eleazar ini.

Eleazar facu Matán ini.

Matán facu Jacob ini.

¹⁶ Jacob facu José ini.

José ahuin María nan Jesús ahuia ini. Jesús Upa Diosin catonni nocon Numamisi inon. Nan non Cristoran huamisi. ¹⁷ Abraham ahuun funafo catorce ahuun unutani David ini. David ahuun funafori catorce ahuun unutani Babilonia anoshon ato achinifo ato mai ano inonfo. Nanfoan ahuun funafori catorce ahuun unutani Cristo cainni.

Jesús cainni

Lc 2.1-7

¹⁸ Jesucristo cainfin iscaniquin. José María yoini, —Non fiananon, —ishon. Ascafia fiananfotaima María man facu nanua ini. José ayamafian Diosin Yoshin Sharapan nanumana. ¹⁹ Ascashon José Dios tanasharacoinshon ahuun chain ahuin rafini huacasmaquin yorafoan ointaifi yoicasmani. ²⁰ Nanscara ahuun nomuranshon shinanfiaino ahuun namapan Diosin ahuun oinmatinin afu nai muran imisi aqui oshon yoiquin isca huani, —José minfin David funaquin. Ascacun shinanchacaquima María fihuu. Nan facu nanuafin Diosin Yoshin Sharapan nanumanaquin. ²¹ Ascan nan caianofin anuqui Jesusran min huashquicain. Nantonmain ahuun yorafo chaca soashofain ato numashquiamaiton, —ishon yoini.

²²Diosinhuunshon inon pacoai yoimisifoan cununifo cuscan man aaquin. ²³Nanfoan cunuquin isca huani, “Nicapon. Ainfo funuoma tsoa afu iyamafiamisi facu nanushquin. Caianno furonafacu iishquin. Ahuun anufin Emanuel (Onicoinnin tsainman Diosin nofu icaran) ishquiquin,”

ishon Dioshuunshon inon pacoai yoimisi cununi.

²⁴Ascaino José moinacahuatan nan Diosin oinmatinin afu nai muran imisi yoia cuscan María fiini. ²⁵Fiiflashocai afu ipaonima furun caiyain chain. Ascashu furun caincun José anuqui Jesus-ran huani.

Nocofunu tapicoianfo fari oaiquirinoashu Jesús oinpai funifo

2 Ascano Herodes niaifoaitian Jesús Belén anoashu cainni. Nan Belén Judea muran ini. Nantianri fishifohuunoa tapicoianfo fari oaiquirinoashu fucani Jerusalén ano noconifo. ²Ascano nococashon ato yocanifo, —Raniashumun a facu caianquin Judiofoan aton niaifo ishquiai. Non fishi oianhuunshon non tapia facu caincun. Man nonfin ahun fishi fari oai aria oianquin. Ascacufin non aqui unimai oaqin. Min nocon niaiforan ishon oinpai non oaran, —ishon ato yocanifo.

³Ascaifoan nicai Herodes ahun ointi fucashricatani. Jerusalén anoa yoraforifi Herodes icai cuscan arifi muunifo. ⁴Ascacun ahun yorafohuunshon Diosin cufimisifoan niaifofu yafi Moisés cununi cuscan tapimamisifo Herodes ato yoimaquin isca huani, —Uqui fucahuun, —ishon ato yoimanano aqui fuaifoan ato yocaquin —¿Raniashumun Cristo cainshquiquin? —ishon Herodes ato yocani. ⁵Ascaiton cumacaquin, —Belén

Judea murannoashu cainshquin, —nannori Diosinhuunshon inon pacoai yoimisifoan cunuquin isca huani.

⁶“Belén anofoan ua nicasharacahuun. Maton mai Judea muran. Maton pushu ichapayamafiano nannoashu niaifo uhuapacoin cainshquin. Uhuun yora Israelifoan aton cushumisi iishqiran,”

icashu cununi.

⁷Ascacun Herodes a fishifohuunoa tapicoianfo tsoa yoitama tsain ato fomaquin isca huani, —Fucahuun. Un matofu tsainon, —ishon ato yoimani. Ascano nocotoshiaifoan ato yocaquin, —¿Ahuutianmun man fishi oinquin tau huaquin? —ishon ato yocaiton. Tapimanifo ahutianmain oinquin tau huafoquin. ⁸Ascashon aton yoini, —Belén ano focashon facu funatacahuun. Fuchicashon nasofuratan ua yoi fuushcaquin. Urifi un ahun noicanon, —ishon Herodes ato yoini.

⁹⁻¹⁰Ascano niaifoan ato yonoa cuscan nicatan fishifohuunoa tapicoianfo fonifo. Focaquin oianfo fishi fari oaiquirinoashu oaiton oincani unimacoinnifo. Ascatan muufocaquin oianfo facu raca manaon nituni.

¹¹Ascaiton oincani pushu muran iquifainshon facu yafi ahua María fuchinifo. Ascashon ratoconun mai chachishon facu yoinifo isca huaquin, —Minfin fasi sharashtacoinquin. Min nocon Ifo, —ishon yoinifo. Ascacatan aton mao fupucashon ahuaara chicoin inancoinnifo. Oro inanfain ahun ininti shara inanfain ininti sharacapa futsa ahun anu mirra nanri inannifo.

¹²Ascashu nanno oshayofoan aton namapan Diosin ato yoiquin isca huani, —Afanan Herodes ari foyamacahuun. Fai futsan mato mai ari fotacahuun, —ishon Diosin ato yoini. Ascacuai Jerusalén ano fonifoma.

**José futan María furun Belén
anoshon Egipto ano ichoquinifo**

¹³Man fishihuunoo tapicoianfo atomaquinoashu foafono Diospan oinmatinin afu nai muran imisi José ahuun namapan yoiquin isca huani, —Funinaca huahuun. Nan facu yafi ahua Egipto ano iyoriscaahuun. Ascashu nanri iyohuu nan un mia afanan yoiatian. Nan Herodes facu funaiqui rutushquin, —ishon Diospan oinmatinin José yoini. ¹⁴Asca huaino moinacahuatan facu ahua futan yamu Egipto ano ichoquinifo. ¹⁵Ascashu nanno iyopaonifo nan Herodes naitian. Ascacun Diosihuunshon inonpacoai yoimisiton cunushoni isca huaquin, “Unfin uhuun facu Egipto anoa afanan yoimanicain,” ishon yoini cuscacoin man aaquin.

**Herodes ahuun ranushumuafu
yononi facumishtifo rutunonfo**

¹⁶Ascano fishihuunoo tapicoianfo fai futsan foafo nicai, —Ua paraforan, —icashu Herodes fasi sinacoinni. Nan fishifohuunoo tapicoianfoan yoiato man fari rafu caano fishi oinquin tau huafo. Ascacun Herodes ranushumuafu yononi, —Belén anoafu yafi a chaima icafoan aton furonanfacu fari rafu yafu non yomumishti rutuqui cuyotacahuun, —ishon ato yononi. ¹⁷⁻¹⁸Ascano “Ato nicafo Ramá anoashu uaicani aton facuhuunoo uaiyanan shorarascaifoan nicacaquin. Aton ointi main huamapaicaquin, ‘Uaiyamacahuun,’ ato huafaiainfono aton facu manocani unupainifomaran,” ishon Jeremías Diosihuunshon inonpacoai yoishomisiton cununi cuscacoin man aaqi.

¹⁹Ascashu man Herodes naano Diosin oinmatinin afu nai muran icaton José ahuun namapan yoiqui isca huani, ²⁰—

Moinacahuahuu. Facu yafi ahua afanan Israelifo muran ato nasuquishquin. A facu rutupaimisifo man naafoquin, —huani. ²¹Ascaino moinacahuatan José ahua yafi furun Israeli mai ano afanan ato iyoni. ²²Caaquin nica Herodes man naano ahuun facu Arquelao Judea murrannoo niaifo nicai José musuni. Ascaciton Diosin oinmati afu nai muran imisiton afanan ahuun namapan yoini, —Judea muran caquima futsanori catahuun, —huani. Ascano Judea muran catama Galilea anori fonifo. ²³Ascashu Nazaret pushurasi muran fonifo. Diosihuunshon inon pacoai yoimisiton nanonori cunuquin isca huani, “Cristofin Nazarenon ishiquin,” ishon cununi.

**Nan ato unu muran iquimamisi Juan
tsoa istaipama ano ipaoni**

Mr 1.1-8; Lc 3.1-9, 15-17; Jn 1.19-28

3 Ascatan man fari ichapa finoanno nan Juan yorafo unu muran iquimamisi tsoa istaipama Judea ano cani. ²Ascano nannoshon ato yoiquin isca huani, —Nantifi yorafoan ua nicacahuun. Maton chaca shatucoincashon Diosin tsain nicacoincahuun. Samamashta Diosin mato yonoshqui oiquin, —ishon Juanpan oi ashcafinin ato yoini.

³Nan Isaías Diosihuunshon inon pacoai cuscan yoimisi ipaoni. Nanton Juanhuunoo yoini isca huaquin, “Tsoan istaipamashon Diosin yonoo cuscan oi ashcafinin yoiquin isca huanonpacoan, ‘Nocon Ifo nocoqui ooshquin. Ascacun itisharacahuun. Maton chaca shatucoincahuun,’” ishon Isaías Juanhuunoo cununi.

⁴Ascano camello inapan ahuun rani sahuuti huashon Juanpan sahuua ini. Ascashon yoina fichin aqui nanushumuni. Ascatan ocutsuru pifain afuchi fona ayani. ⁵Ascano Jerusalén anoafu

yafi unu Jordán ano icafo non Judea muran icafori ahuun tsain nicapaicani aqui funifo. ⁶Ascashon aton chaca shatupaicaquin yoiaifohan Juanpan unu Jordán muran ato iquimacacuni afanan ipaoni cuscan huatama ismanonfo.

⁷Ascaino Fariseofo yafi Saduceofo Juanqui funifo yorafo ato unu muran iquimanaiton oin fucani. Nanfori Israelifo ini. Ascaiton oinquin Juanpan ato yoini isca huaquin, —Manfin rono paupaton facu cuscaracoinfoquin. Icoinra huayamaifoan Diosin atoqui sinaquin ato omitsiscapanonfo. Ascan manfin omitsiscapanacafo muran focas-mafiaqui maton chaca man shatupaima. ⁸Ascacun chaca shatucoincashon Diosin mato yoia cuscan nicacoincahuun. Man ipaoni cuscani afanan ayamacahuun. Man ascaiton yorafoan ointirofo man afanan chaca huapaitama Dios fusti man tanasharaiton.

⁹Ascashon maton nomuran shinanquin isca huayamacahuun, “Nonfin Abraham funafo non ahuun caiforiquin. Diosin Abraham yoiyotiani cuscan nocorifi ashotiro. Ascan Diosin noco onaintimashquimaran,” ishon anori shinanyamacahuun. Diosin onihuapaiquifin na unu cusumunnoa toquirifo Abraham ahuun funafo oni huatiroquin. ¹⁰Fana fimi sharayamaiton ifohan ahuun tapo nantifi ruratinin shatuquin cuyoshon chi muran potatiro coi futsunon. Nanscarifiai natianri Diosin man itishara chaca shatutama man isharayamacaiyaiton mato omitsiscamacacushquin.

¹¹Ascacun un mato unu muran iquimacacua maton chaca shatucoshon natian Diosin tanasharashon man ismanon. Ascafia futsa matoqui chipo oi. Naantofin ua fasi finoncoianquin. Ahuamamishti huatiro. Nantorifi ahuun Yoshin Shara mato ya rafumacacuna.

Ascaino ahuunshon maton nomuran man shinansharanon. Matofu rafuano nantifi ahuara chacafo ahuunshon shatuashu a cuscara shara man inon. Ascan uncai a cuscarama. Un ahuara shara huahuu rafanancai un ahuun oinmatima. Ascatama uhuun ramapayamainoricai un ahuun oinmatian icuanama. ¹²Ascaino naantorifi chipo a icoinra huafo yafi a nicacasmaifo ato pashcanan huaashquin. Nan icoinra huafoasi a icari ato ihuicoishquin afu isharapacushanonfo. Ascan nan nicacasmamisifo chi urumanhuan muran ato potai anoashu omitsiscain unupacunacafomaran, —ishon Juanpan nan Fariseofo yafi Saduceofo yoini.

Jesús unu muran iquimani

Mr 1.9-11; Lc 3.21-22

¹³Ascaino Jesús Galilea anoashu unu Jordán ano cani. Nan Juanpan ato unu muran iquimani nanno cani naanrifi iquimanon. ¹⁴Ascashu aqui nocoaiton Juanpan Jesús yoini, —Uacaiarocon mian acafin shara icuanquin, —huaiton. ¹⁵Jesús cumani, —Upa Diosin noco yonoa cuscan fusti nantifi non aca shara itiro. Ascan natian ua iquimahuu, —huaiton. —Ascan min ua yoiai cuscan un mia unu muran iquimairan, —ishon Juanpan yoini. ¹⁶Asca huatan Jesús unu muran iquimani cainna cahuan mapuinfoanni. Ascatapaiyaino Dios ica ariashu nai fupuini. Nai fupuicaino Diospan Yoshin Shara ruhui cuscara Jesusqui fotopacu cahuani. ¹⁷Ascaino nanno niafoan nai murannoa Upa Diosin ahuun oi nicanifo yoiquin isca huaiton, —Nan uhuun Facu un catoan. Un fasi ahuun noi. Un fasi aqui unimacoinran, —ishon Apa Diosin yoini.

Yoshin chacanun Jesús chaca huamapaini

Mr 1.12-13; Lc 4.1-13

4 Ascano Jesús Diosin Yoshin Sharapan tsoa istaipama ano iyon. Nannoshon nan yoshin chaca Satanás cuarenta oshatan chaca huamapaifafainni. ²Nan cuarenta oshatan piqui tununi. Ascashu fasi fonaincoinni. ³Ascaino nan yora chaca huamapaimisi aqui nocoshon yoini isca huaquin, —Min Diospan facumainquin na toquirifo misi onihuaahuu, —ishon Satanás yoiaiton. ⁴Jesús cumani, —Noncai misi fustihuunoashu ipatiroma. Diosin tsain fusti non yopacoin. Nan noco yoia cuscan fustihuunoashu non isharatiroquin, —huaiton.

⁵Nicaquin Satanás Jesús Jerusalén pushurasi shara Diosin ahuun yorafofu imisi ano iyon. Nan Israelifoan aton Diosfu tsainti pushu pumancaya cuyacoin iyoshon yoiquin, ⁶—Minmain Diospan facuquin nuriashu pacucain-tahuun. Diosin tsain mihuunoa cununi isca huaquin,

“Diosifin ahuun oinmatifo afu nai muran icafo yonoiquin min pacuaiton mia cushunonfo. Min tauri toquirifoquin rutunonma mia achinonfo,”

nannorifi Diosin tsain mihuunoa cununiquin, —ishon Satanás yoiaiton. ⁷Afanan Jesús cumani, —Ascacia Diospan tsain cununiri isca huaquin, Ahuara musunicoin huaquin shinanyamacahuun uatsi Diosin cushuiquin ishon. Ascacun asca huayamahuu ishon cununiran, —Jesús huani.

⁸Ascaiton afanan Satanás Jesús machi cuyamamaquin iyoshon nan manifoti sharashtacoin oinmani. ⁹Ascashon yoini, —Oinpon Mian ratoconun mai chachishon ua yoiquin, “Minfin

uhuun Ifoquin,” mian huaitofin nan na maitio un mia inantiroquin, —ishon yoiaiton. ¹⁰Afanan Jesús cumaqui, —Diospan tsain cununiri “Nan nocon Ifo Diosin fustifin non ratoconun mai chachishotiroquin. Nan fustimain nocon Ifocun,” ishon cununi. Ascan umaquinoashu cariscatahuun Satanás, —ishon Jesús yoini.

¹¹Asca huaino Satanás Jesus-maquinoashu caino Diosin ahuun oinmatifo afu nai muran icafo aqui fotonifo pimashcaquin.

Jesús Galilea anoshon ato tapimaquin tau huani

Mr 1.14-15; Lc 4.14-15

¹²Ascashu nan Juan ranushumuafoan cunu muran iquimanafo nicatan Jesús Galilea ano nasoni. ¹³Nan Nazaret anoashu pushconi. Nannoashu Capernaum ano cani atofu iyoicai. Nan Galilea ian cusumunri Capernaum ini. Nannori mani rafutan ato mai Zabulonfo yafi Neftalifo icafo. ¹⁴⁻¹⁶Jesús nanno inon pacoai cuscan nan Isafás inon pacoai yoimisiton ahuunoa cunuquin isca huani,

“Zabulonfo yafi Neftalifo Galilea ian ano icafo. Nanno aton mai. Unu Jordán ocuma futsa. Nannori Dios icoinra huamafo atofu icafo. Ascashu nanfo faquish muran ica shinantsafo. Ascacia samamashta oianfo shafariscatani cafiscashqui. Nanscarifiai numamisimaisi omitsiscapanacafo muran focuanafo. Ascacun Cristo atoqui nocorisca ato numashquiran,”

icashu atohuunoa cununi.

¹⁷Nannoshon Jesús ato yosiquin tau huaquin isca huani, —Nocon Ifo Diosin matoqui samamashta nocoyoi. Ascacun maton chaca shatucahuun. Chaca huata-marocon Diosin tsain nicacoincahuun, —ishon Jesús ato yoini.

**Jesús rafu non rafuri nushumisifo
ato cunani afu fononfo**

Mr 1.16-20; Lc 5.1-11

¹⁸ Ascano ato yoitan Jesús ianmanhuan cusumun cani. Caquin Simón chipocu Andrés futan nushutinín nushuaifoan ato ointoshini. Nan Simón ahuun anu futsa Pedro. Nan rafutafin nushumisicoín inifoquin. ¹⁹ Ascaiton ato yoiquin, —Ufu fucahuun. Manfin nushumisicoínquin. Man shiman ichaparasi nushutinín fia cuscan natian man uqui yora ichapa ihuushqui un aton Ifo inon, —ishon Jesús ato yoini.

²⁰ Ascaino nushuti huafaicani afu fonifo.

²¹ Ascashu chaimashta catan Zebedeo facu rafuri fuchini. Nan rafuri nanu rafu Santiago yafi Juan. Nan rafutan apa futan shasho naquishon nushuti icushaifoan atori yoini, —Ufu fucahuun, —ato huaino. ²² Samamashta apa shasho naqui nichifainifocani afu fonifo.

Jesús yorahuanrasi ato yosini

Lc 6.17-19

²³ Ascatan afu foafoanno nantishon Galilea ano cahuancacaiquin. Judiofoan ichananti pushu muranshon Jesús ato Apa Diosin tsain shara yoiquin isca huafoanfaini, —Itisharacahuun. Upa Diosin mato iquishquin oiran, —ishon ato yoifoafaini. Ascashon pau futsa futsatapafoan icaifoan ato caya huamani. ²⁴ Ascaiton Siria mai anoafoanri ahuunoa nicacashon isinincaifo aqui ihuunifo ato cayahuamapacunon. Ascashon isipaunun icaiton caya huamafain yoshin chaca atomaquinoa potafain nisofoi caya huamafain yoratisho charishi futsuari caya huamapaoni. Nantifi ato caya huamapacuni. ²⁵ Ascaiton yorafoan mufainifo. Atirifi Galilea anoashu fuaino atirifi Decápolis anoashu fuaino atirifi Jerusalén

anoashu fuaino atirifi Judea anoashu fuaino atirifiri unu Jordán oquirinoashu fucatan Jesús mufainifo.

Jesús machi anoshon ato yosini

Lc 6.20-23

5 ¹⁻² Yorahuanrasi aqui fuaifoan oin Jesús mapufaintan machi pochinin tsaoni. Nanno tsaano ahuunshon tapi-afu a shinain caiton noco yosiquin isca huani.

³—Tsoa futsan aton nomuran shinanquin isca huai, “Uficai un isharatiroma. Un Dios yopacoinran,” icaiton Diosin ato unimamashquin. Ascashu uhuun Upa Diosin niaifo ano afu ipatirofoquin.

⁴ Ascán tsoara futsa uaiquin omitsiscafi-ashu chipo unimatiro.

Diosin atohuun ramapaiquin aton ointi main huamatiro.

⁵ Cacapaimisi itamarocon futsa ahua huamisima. Mato ahuun nomuran shinanquin isca huai, “Ufi apaiyai cuscan atama Diosin ua amapaiyai cuscan fusti un atiroran,” ishon shinanfafainaiton Diosin ato unimamatiro.

Nan cuscarafo Diosin yoiyotiani cuscan ato inanshquin. Diosin icano arifi afu inonfo. Ascashu nantifi ahuunari atonari iishquin.

⁶ Ascán nan ratoranfo Diosifu ipaiquin ahuun tsain tapipaiquin finaifo a cuscara shara iishcaquin.

Nan cuscarafoan fuchipaiyaifo cuscan Dios ato imatiro a cuscara shara inonfo.

⁷ Ascán nan futsafohuun ramapaiquin ato shara huaiton Diosin man tapia. Ascacun nanrifi ahuun ramapaiqui a shara huashopacunaca arifi unimanon.

⁸ Ascán nan Dios fusti tanasharashu ahuun nomuran shinansharamisi.

Nan cuscarafoan chipo Dios ointirofo. Ascaiton Diosin ato ointi unimamashquin.

⁹Ascan tsoan nan noicasmatanainfoan ato raunan huaino afanan rau huantananko.

Nan cuscarafo Diosin yoiquin, isca huaqui, “Min uhuun facuran,” ishon ato yoiaino fasi unimacoinshcani.

¹⁰Tsoa Diosin yonoa cuscan aiton futsafoan omitsisca huafiainfoan tunua.

Nan cuscarafo Diosin ato unimamashquin. Ascashon nan Diosin niaifo icariafo nanfori atona iishquin.

¹¹⁻¹²Ascan futsafoan uhuunshon mato roaquin omitsiscamafain matohuunochani futsa futsatapafo yoifiaifoanno shinanchacayamacahuun. Mato omitsisca huaifo cuscan mato shunifori nan Diosin tsain yoimisifo omitsisca hupaonifo. Ascan man uhuunoashu omitsiscafishu Upa Diosiqui man nocoaitian fasi sharacoin mato imashquin man afu ipashanon. Ascacun unimacahuun.

**Jesús icoinra huafo
sao yafi shafa cuscara**

Mr 9.50; Lc 14.34-35

¹³Ascan manfin nan nuno mai anoa sao cuscaraquin. Nami saomua shara payocotiroma. Nanscarifiai yora chacafo muran ishon marifi man ato shinanmasharatiro chaca huanonfoma. Ascan nami saomuamacai shara itiroma. Paismacoin itiro. Ascafia afanan nami shara iyamainoricai saori shara itiroma. Afanancai ahuashta itiroma. Nanscara non potatiro puamanonfo. Nanscarifiai afanan man ua tanasharayamainocai matohuunshon tsoan ato chaca shatutiroma isharashquin. Man ua tanasharayamashu man funocointiro.

¹⁴Ascafia manfin nan manifoti ato chasha cuscaraquin. Machi cuya

mamaquinoa pushurasi fasi chaicushon shafacafi ointirofo. Onucai atiroma. Nanscarifi aquin man ua tanasharaino mato oinquin matohuunshon ua icoinra huatirofo shafacafi iishcaquin.

¹⁵Nanscarifi aquin tsoancai faquishiano oinpaifiaquin lamparina tapa camaqui otashon cutipan fupomisima. Ascatarocon otashon tapa camaqui huatiro shafacafi tsaocun pushu muran iquicaquin oinsharanonfo. ¹⁶Ascacun nantifi yorafo shara huacoincahuun. Man ato shara huai cuscan oinquin shinantirofo isca huaquin, “Diospan yorafoan fasi noco shara huafafaincani. Apa Diosin ato yosisharamisi. Asca aton Upa Dios fasi sharacoinran,” ishon shinantirofo. Anori shinancaquin maton Upa Dios nai muran ica yoitirofo isca huaquin, “¡Aicho! Upa Diosin tsoa futsacai mia cuscara sharama. Min nantifi finoncoianran,” ishon yoishquicani. Afanan yoitiro isca huaquin, “Dioshuunshon noco shara huashomisifo. Ascan aton Dios sharacoinran,” ishon yoishquicani.

¹⁷Isca huaquin man shinan raca, “Moisés Diosin yononi cuscan cunushoni yafi Diosin tsain yoimisi futsafoan cununi cuscarin nanfo Jesús noco nicamapaima. Nanfo noco potamapairan,” ishon raca man shinan. Anori shinanyamacahuun. Uncai Moisés yafi Diosin tsain yoimisi futsafoan cununi cuscan potapaiquimarocun man cununifo cuscan un huamashquin un oa. ¹⁸Un mato shafacafi yoi. Diospan tsain cunushoni cuscan nannorifi Diosin yonoi. Ato yonoquin cunushopaoni cuscan nan fustishtacai funopacunacama. Nai yafi maitio cuyoyamainon nanscasi apanaca ahuun tsainri inonpacoai cunushoni cuscan nantifi fustishtacai cuyopacunacama aqui tau huani cuscan.

¹⁹Ascan tsoa Diosin yononi cuscan fustishta potashu non futsafori

potamashu Dios icano aacai ahuama itiro. Ascafiakin tsoan Diosin tsain nicasharafainquin futsafori Diosin tsain shafacafi yosicun nan Upa Diosin icano niaifo patashari itirofoquin. ²⁰Ascano nan Fariseofo non Judiofo aton niaifofo futsafoanri, “Nonfin fasi shara imisiran,” ifianmisishacaquin Diosin yononi cuscan tanacoianfoma. Diosin yononi cuscan huacoinmisifoma. Mancai ato finoanshuma Diosin yononi cuscan man huashuma Upa Diosin icano man nocopacunacama.

—Sinayamacahuun,
—ishon Jesús ato yosini

Lc 12.57-59

²¹Moisés nocon shunifo yononi cuscan man nicamisi isca huaquin, “Tsoa rutuyamacahuun. Man futsa rutucun niaifofo ano mato iyotiro matori copiquiri namatirofo,” ishon Moisés nocon shunifo yononi. ²²Cayacafi anori yonofianicun un mato tsain futsa cayacafiri yoinon. Oinfain. Tsoa futsaqui sinaiton a niaifo ari iyotiro a onaintimanon. Ascan tsoan futsaqui tsain chaca huaiton isca huaquin, “Mincai ahuama. Min ahua tapiamaran,” ishon yoiaiton niaifofo ari iyotiro a onaintimanonfo. Ascafi tsoan futsa chaca huai isca huaquin, “Minfin mapo chacaquin. Min nisoncoiran,” huaiton Diosin a omitsiscapanacafo muran nan chi muran potatiro anoashu capashononma.

²³⁻²⁴Ascacufin man Dios cufiaitian nantianri man shinanquin isca huaquin, “¡Ohua! Un futsa chaca huaran,” ishon shinanquin. Afanan Dios cufitamarocon iquisi nan futsa min chaca huua ano catahuun. Aqui nocoshon yoisharahuu mia rauhanon. Asca huano afanan min nasotiro Upa Dios cufishquin.

²⁵Man futsa nifishon matoqui nocoaiton isca huaquin, “Min ua

nifian cuscacai mian inanma. Natian un mia niaifo ano iyoiran,” ishon mia yoicun. Afu caquin niaifo ano nocoataima rufoto aroshararisca huahuun. Asca huaiyamaiton mato niaifo ano iyotiro. Nocoshon niaifoan ranushumua yoitiro, “Na nocofunun futsa nifian cuscan inanma. Ascan cunu muran iquimatahuun,” huatiro. ²⁶Un mato icon yoicoin. Mato iquimanano man cainritiroma nifian cuscan atifi inanshuma. Nanscarifi aqui man Dios chaca huamisiquin. Oataima arorisca huahuu mato omitsiscahuapanonma.

—Maton ahuinma oincaquin
chotapaiyamacahuun,
—Jesús ato huani

²⁷Moisés nocon shunifo yononi cuscan man nicamisi isca huaquin, “Maton ahuinma chotayamacahuun. Ainfofoan maton funuma chotamayamacahuun,” ishon yononi. ²⁸Aafin iconquin. Ascarifi un mato yoirifi huai. Tsoa ainfo ahuan ahuinma oinquin ahuan nomuran shinain, “Un nan ainfo chotapainonran,” ishon nannori shinanquin a chotacoin shinantsai. ²⁹Ascan man oinquin man chaca huapaiquin maton furon ocuma futsa shara tsucashon potahuu afanan chacanonma. Man mumafiacun omitsiscapanacafo muran mia potacun nancai sharamafinquin. Ascaquimarocon man mumamafiashu Dios icari nocoshon nanno afu ipashanon nan sharacoin. ³⁰Nanscarifai min mumiorishon min mucuman min ahua min chaca huaiton, min mushtua shara icuana. Man mumafiashu omitsiscapanacafo muran mia potacun nancai sharamafinquin. Ascaquimarocon man mumamafiashu Dios icari nocoshon nanno afu ipashanon nan sharacoin.

**Nocofunu yafi ainfo
ununantirofohuunoa Jesús ato yosini**

Mt 19.9; Mr 10.11-12; Lc 16.18

³¹Nocon shuni Moisés nocon shunifo yonoqui isca huani, “Tsoan ahuun ahuin unushquin iquisi cunushotiro isca huaquin, ‘Un afanan mia fipaima. Un naitian mia unuiran,’ ishon cunushotiro.”

³²Nannori Moisés yonofianicun un mato tsain futsa yoinon. Ratoran futsan ahuun ahuin nocofunu futsa fu iyamafaiton unuquin chaca huaino. Nan ainfoan nocofunu futsa fu fiananquin fasi chaca huai. Asca huaquin nan funu fu iqui shinant sai. Funumain afi unucun. Ascafia nan funun ahuin unua nan ainfo nocofunun fiiquin aarifi chaca huai. Asca huaquin nan ahuun ahuinma fu iqui shinant sai huai.

**—Man yoitiani cuscan acahuun,
—ishon Jesús ato yoini**

³³Nocon shuni Moisés afanan tsain futsa nocon shunifo yoini. Nanri man nicamisi isca huaquin, “Man Diosin yoitiani cuscan acahuun. Man Diosin yoitiani cuscan ayamashu nancai sharamafinquin,” ishon Moisés nocon shunifo yoini. ³⁴Mato anori yoini. Un afanan mato yosinon nicacahuun. Yora futsafona yopaquin ato yoiquin, “Un mia yoia cuscan un acunma Upa Diosin ua onaintimatirotiran,” ishon afanan anori yoiyamacahuun. “Un mia yoia cuscan un acunma nantifi nai muranshon ua nicatiro Upa Diosin ua onaintimatirotiran,” ishon afanan anori yoiyamacahuun. Diosin nai muran ica. Ascan anori yoiyamacahuun.

³⁵“Un mia yoia cuscan un acunma nuno mai anoa ua onaintimatirotiran,” ishon afanan anori yoiyamacahuun. Nantishon mai Upa Diosinna. Ascan anori yoiyamafain, “Un mia acunma nocon pushurasi Jerusalén ano ua copitiroran,”

ishon afanan anori yoiyamacahuun. Nan pushurasi Jerusalén nocon niaifocoin Diosina. ³⁶“Uhuun mapon un shinain cuscan un mia acunma ua onaintimatirotiran,” ishon yoiyamacahuun. Maton shinanhuunshon maton fo fiso iyamarai osho imatiroma. ³⁷Ascan maton yora ahuara yoipai ato yoihuu isca huaquin, “Un mia yoia cuscan iconcain,” iyamarai “Nan iconmaran,” ishon ato yoicahuun. “Un mia acunma ahuara ua onaintimatirotiran,” ishon anori yoiyamacahuun. Na yoshin chaca Satanasfin chanimisicoinquin. Ahuunshon yora anori yoitiro.

**Tsoamain futsa copitiro
Jesús ato tapimani**

Lc 6.29-30

³⁸Ascan nocon shuni Moisés afanan tsain futsa nocon shunifo yononi cuscari man man nicamisi yoiquin isca huancun, “Futsa mia asca huaiton niaifo ano min iyotiro mia copishonon. Min furo ocuma futsa mia tsucacun copiquiri niaifoan ahuun furo tsucamatiro. Ascan mia sutuquin min shuta fusti tucucun niaifoan copiquiri ahuun shuta fusti tucuntiroran,” ishon Moisés yononi. ³⁹Nocon shunifo nannori yonofianicun un mato tsain futsa yoiaiton ua nicacahuun. Tsoan mato chaca huafia ato copiyamacahuun. Mato tapasaiton ato copitamaron nanno nishohuun mia ocuma futsari afaiton tunuhuu.

⁴⁰Futsan mia niaifo ano iyocun min camisa mia fiainton min sahuuti cushtopari inanhuu. ⁴¹Ascano ranushumuaton iyamarai futsan mato yonoquin isca huai, “Uhuun forusa kilometro fusti ua foshocahuun,” ishon mato yonoaiton shinantaquima kilometro rafu foshohuun. ⁴²Tsoanran mato ahuara yocaiton ayashon ato inancahuun. Futsan mato yoiquin isca huai,

“Ua inanyopun,” mato huaiton inan-riscayocahuun. Fishcotama.

—**Mato noicasmafiaifoan atohuun noicahuun, —ishon Jesús ato yoini**

Lc 6.27-28, 32-36

⁴³“Ascashon naan maton yorafohuun noicoincahuun. Ascan a mato noicasmaifori copiquirifi ato noicasmacahuun,” ishon nocon shunifoan yoinifo cuscan man man nicamisi. ⁴⁴Nannori yoifianifo un mato yoiquin isca huai, Naan mato noicasmafiaifoan atohuun noicoincahuun. Tsoan mato omitsisca huairi Dios cufishocahuun. ⁴⁵Diosin fari onihuani yora sharafo yafi chacafori chashashonon. Nanscarifi huaquin Diosin oirifi onihuani nan yora sharafo yafi chacafori ato onihuashoni. Diosifin nan tanaifo yafi a chaca huaiforifi ato shara huamisi. Ascacun marifi nanscarifi huacahuun a mato shara huaifo yafi mato chaca huaifori shara huacahuun. Asca huaifin marifi man Diospan facucoinfoshon futsafori man ato ismatiro.

⁴⁶A matohuun noiaifosi copiquirifi man atohuun noiainocai aacai ahuama. Yora chacaforifi ascarifiaifoanno. Man ascainocai Dios mato yoima man shara huaran ishon. ⁴⁷Maton yorafo fustisi man tsain shara yoiano aacai ahuama. Yora Dios icoindra huaamafori nanscarifiaifoanno. Man ascainocai Diosin mato yoima “Man shara huaran,” ishon. ⁴⁸Ascano maton Upa Diosin nai muranshon nantifi yorafo noia cuscan marifi nansca huacahuun. Upa Diosin shinansharamisi cuscan marifi shinansharacahuun.

—**Ahuuomafu atohuun ramapaiquin inanhuun, —Jesús ato huani**

6 Oinfain. Man futsafo shara huaino maton nomuran man shinain isca huaquin, “¡Aicho! Un ato shara huacun futsafo ua oincani uqui shinan-

sharanonforan,” ishon anori man shinancai Upa Diosin matoqui unimaima. Mato ahua inainma. ²⁻⁴Nan paramisifo cuscara iyamacahuun. Nanfoan atohuunoa yorafo shinansharamacani isca huaquin, “Nan yora fasi sharacoin. Futsafo shara huashoanran,” ishon nannori futsafo atohuunoa shinanmapai. Nantifi ato ointaifi yora shara huapai ato oinonfo. Ascara chaca. Upa Diosin atoqui unimaima. Futsafoan ato, “Min shararan,” huatirofiaino Upa Diosincai atohuunoa tsain shara yoishquima. Atoqui unimaima. Ascan marifi ato cuscara iyamacahuun. Futsafo ato ointaifi ahuuoma inanpaicahuun mato oinonfo. Ascaquimarocon toa futsa oinyamaino man ahuuoma inanquin Upa Diosin oin matoqui unimai mato ashosharatiro.

Jesús afu rafuafo yosini ahuuscashomain Upa Dios cufitirofoquin

Lc 11.2-4

⁵Man Upa Dios cufiaitian nan paramisifoan cufimisifo cuscan huayamacahuun. Nanfoanfin nishon yora ichananfo anoshon yafi ichananti pushu muranshonri ato ointaifi Upa Dios cufipaicani ato nicanonfo. Upa Dios shinancointamarocon nannofo atohuunoa shinansharamapaicani. Ascaifoan oinquin futsafoan atohuunoa shinansharatirofia Diosincai atohuunoa shinansharatiroma. Ascashocai ato ahuashta inansharashquima.

⁶Ascacun marifi ato cuscara iyamacahuun. Man Dios cufiaitian toa yamaino Upa cuficahuun. Ascaciafucun Upa fustiton mato ointiro. Ascashu matoqui unimacoinquin man yopai cuscan mato inansharashquin. ⁷Man cufiaitianri nan tsain fustisi yoiriamacahuun. Nan icoindra huamafoan cashmancoin cufimisifo cuscan. Ascashon yoimisifo. “Un nan tsain nannorisi yoiri-

aiton ua Upa Diosin nicatiroran,” ishon shinanmisifo. Asca huafiainfoancai Diosin ascaran tsain nicapaima. ⁸ Ascacun marifi ato cuscara iyamacahuun. Man Upa Dios yocataima man yopai cuscan man tapiaquin.

⁹ Ascashon cufinquin isca huacahuun, “Nocon Upa nai murannoaton min fasi sharacoin.

Nantifain mihuunoa yoisharapainon.

¹⁰ Min apaiyai cuscan min ica nai muranshon samamashta arisca huamisifo.

Nansarifi nuno manifoti anaofaon huanonfo cuscan

nansacoinrifi nuno mai ano anonfo.

Manifotiton aton niaifo iishquin mia ifoannonfo.

¹¹ Shafatifi nocon tushu non yopai cuscan noco inanhuun.

¹² Nan noco chaca huaifoan

non ato rauhua cuscan huafain

nocon chacafori noco rauhuashohuun, Upan.

¹³ Satanás yoshin chacapan noco chaca huamapaifaiton

nocoqui cumatima huahuu.

Nansca huaquin,”

ishon cuficahuun ato huani.

¹⁴ Ascacun futsafoan mato chaca huafiacun ato rauhuacahuun. Ascacufin maton Upa Diosin nai muranshon man aqui chaca huaa cuscari rau huatiroquin. ¹⁵ Ascafia futsafoan mato chaca huaa cuscan man ato rau huayamaiton manrifi chaca huacun Uparicai mato rauhuashoima.

Piqui tunumisifohuunoa Jesús ato yosini

¹⁶ Ascano tsain futsari un mato yoi man tapinon. Man piqui tunuaitian nan paramisifoan amisifo cuscan huayamacahuun. Nanfoan aton fuso chocayamafain puusimisifoma piqui tunucani. Dioshuunoa

shinantama atohuunarocon yorafo shinanmapaicani. Yorafoan atohuunoa shinanqui isca huanonfo, “¡Oincapon! Naton fuso Dios shinanquin piqui tunui puusiquimaran,” ishon. Ascashon atohuunoa shinansharafoanno unimacani. Ascafiafoanno Dioscai atoqui unimaqui ato ahuara inainma. Ascacun marifi ato cuscara iyamacahuun. ¹⁷⁻¹⁸ Ascatarocon man piqui tunuaitian fuchoquimucaín foshti isharashon Dios shinancahuun. Man ascaitocai futsafoan mato oinfiaquin tsoan tapitiroma man piqui tunufaiton. Ascafia Diosin fustichifin tapitiroquin. Ascashon nan icari man nocoaitian mato ahuara sharashta inanshquin.

—Upa Dios icanoa ahuara sharacoinfo mato mucushotiroran, —ishon Jesús ato yosini

Lc 12.33-34

¹⁹ Ascán nuno mai ano niyoshon mafo ichapa mucuyamacahuun. Nanfo chacanai futsuaino man funotiro. Yomut-sori maton pushu muran iquishon nantifi maton mafo onuntiro. Ascaino marifi man funocoin. ²⁰ Ascatarocon Dios fu rafufafaincahuun mato amapaiyai cuscan ashquin. Man asca huaiton Dios nan icanoshon mato ahuara sharacoinfo mucushoni. Nanfocai chacanapacunacama. Tsitsa iquiyamacai yomutsoaicai iquitiroma maton onunshquin. ²¹ Ascán man mafo fusti shinanfainquifin nan fusti man noicain. Ascán man Diosihuunoa fustisi shinanfainquin nanrifi man yonoshosharatiro ahuun noicoinquin. Ascashu man afu isharapacusharatiro.

Nocon furo nan lamparina cuscarahuunoa Jesús ato yosini

Lc 11.34-36

²² Afanan tsain futsa un mato yoi man tapinon. Nocon furo rafu nocon cayan lamparina cuscara. Nan rafu

shara non oinsharatiro. Ascashon nocon caya cushusharatiro non ahuus-canonma. Nanscarifiai mato nomuran-shon man shinansharai man isharacoin-tiro. ²³ Ascafia nocon furo chacanocai non oinsharatiroma. Faquishcoin itiro. Nanscarifiai nocon nomuranshon non shinanchacaicain non isharatiroma. Ascacun oinfain. Man Dios shinain isharafishu chipo Upa Diosin ahuun tsain man cachiquiri huashucaí afanan man ishara-cointiroma. Ascashu nan faquish muran-ica shinantsain man funocointiro.

Dios yafi pui

Lc 16.13

²⁴ Ascan oinmatinincái ahuun ifo nanno rafu nantian yonoshotiroma. Futsa noifain futsa noicasmatiro iyamarai futsa nan yoia cuscacoin huashotiroma. Ascashon futsa, “Nacai ahuamaran,” ishon shinantiro. Tapicai huatiroma ratocaimain nicasharaiquin. Nanscarifiai Dios yonoshopaiquicai man pui noitiro ma ton ifo inon.

**—Upa Diosin ahuun
facufo cushushararan,
—ishon Jesús ato yoini**

Lc 12.22-31

²⁵ Afanan un mato yoisharanon. Isca huaqui shinanyamacahuun, “Non ahua pitama nonricai ahua ayaimaran,” ishon shinanchacayamacahuun. Ahuaricai non sahuuimaran iyamacahuun. Non ahuara pifain non sahuuatocai noco imasharatiroma. ²⁶ Shinancapon. Nan puiyafocancái ahua fanayamafain ahua chintumisifoma ahuaricai fotsuyamafain ahumafocacun Diosin ato pimamisi. Nanscarifi aquin Diosin matohuun noiquin nan puiyafocacái finon-mafain mato cushushara. ²⁷ Ascacun shi-

nanchacayamacahuun. Non shinanchacatocai shafa fusti noco nimayotiroma.

²⁸ Ascashon shinanquiri isca huayamacahuun, “¡Ohuashta! Raniamun un sahuuti fii nan sahuushqui,” ishon shinanyamacahuun. ¡Shinancapon! Charofocai yonoyamafain sahuuti icushumisifoma. ²⁹ Ascataka sharamishticoín foaícafo. Nocon shuni niaífo Salomón sahuuti sharashtacoin sahuufiapaonícái nan charo sharashtacoinfo cuscarama.

³⁰ Diosin charo sharashtacoinfo onihua. Foai sharafia supashon samamashta tsasicun coatirofo. Nanfo finonmafain mato noiquin mato camisa sahuumashquin. Ascafia mancái icoinra huasharacoinnama.

³¹ Ascacun shinanquin isca huayamacahuun, “¡Ohuashta! Unmun ahua piquin uhuun tushuyamaino. ¿Unmun ahua ayaicái? Unricái ahua sahuuimaran,” ishon shinanchacayamacahuun.

³² Ascan nannori nan icoinra huamafoan shinanchacamisifo. Ahuara pifain sahuupaiyai fo fustisi shinanmisifo. Ascan maton Upa Diosifin tapiaquin man yopai cuscan. Ascacun mato inanshquin. ³³ Ascacun Diosicairocon shinancahuun. Mato yonomapaiyai cuscan nan fusti shinanfafaicahuun. A cuscara shara ipaicahuun. Nancái shinanquin tau huafafaincahuun. Man ascaiton ahuara futsa man yopai cuscan Upa Diosin mato inanshquin. ³⁴ Ascacun shinanchacacuí isca huayamacahuun. “¡Ohuashta! Uncaí tapiama funamanri ahuara chaca finoainno raca un tunuima,” ishon anori shinantama shinanquirocon isca huafafaincahuun, “Upa Diosin shafatifi ua cushusharamisi cuscan funamanriri ua cushusharairan,” ishon shinanfafaicahuun.

Futsafohuunoo shinanchacayamacahuun

Lc 6.37-38, 41-42

7¹⁻² Futsafohuun shinanchacaqui yoiquin isca huayamacahuun. “Nanton chaca huai cuscan onaintimaponran,” ishon futsafohuunoo yoiyamacahuun. Man ascara yoiaiton Diosin mato onaintimai.³ ¿Ascacun ahuuscái yora ahuara pasnanshta fuostamua man futsupaiyain marifi sapa uhuapa fuostamufiashocai man muima? Nanscarifai min chaca huairan futsa huafiaquin mancafin fasi finacaiquin.⁴⁻⁵ Ascashon man yoiqui isca huai, “Uhuun yorashtan, un min furo murannoo ahuara pasnanshta un mia futsunon,” man huamisi. Ascafiashocai man tapiama man sapa fuostamufafainna. Man fuparamitsapaimisi. Ascacun sapa futsucumucahuun. Asca huashon oinsharafain marifi man futsa pasnanshta futsutiro. Nanscarifi aqui futsafoan ato chaca man shatumapaifiaquin marifi man chaca huaa. Man fasi paran. Ascacun iquisi maton chaca shatucahuun. Ascashon marifi man futsafo chaca shatumatiro.

⁶ Tsain futsari un mato yoi man tapinon. Pashna pofu iyamarai yahua pofu non tushu inansharatiroma. Non mucuman tushu inansharapafiaiton nan pitama nocorocon mocotiro. Nanscarifi aquin ratoranfoan man ato tsain shara Dioshuunoo yoipafiaiton nicacasmacaquin mato chaca huatirofo. Ascacun ascarafo ato yoiyamacahuun. Man yoisharapafiaiton Diosin tsain potatirofoquin.

Dios yocafain funafain cunahuu

Lc 11.9-13

⁷ Afanan ahuara futsa un mato yoiái cuscan nicacahuun. Ahuara

yopaquin Upa Dios yocacahuun mato ashonon. Man yocain cuscan funaquima manasharacahuun nan Diosin mato ashoaitian. Ascacun Upa Diosin cufifafaincahuun man cufiai cuscan mato inanon.⁸ Tsoan Upa Dios yocariái fiishquin. Ascan tsoan ahuara shara fasi fuchipaiyai cuscan Diosin ato fuchimatiro. Ascan tsoan Upa Dios cufiriaiton ashoshquin.⁹ ¿Ascacun maton facun mato yoa yocaiton man toquiri inantiromun? Ma. Mancai maton facu asca huatiroma.¹⁰ ¿Maton facuri mato shiman yocaiton man rono inantiromun? Ma. Mancai maton facu asca huatiroma.¹¹ Ascacun tapicahuun. Man chaca huamisifiahton maton facufo man inansharamisi. Man ascaiton maton Upa Diosin nai murannoaton man yocai cuscan finacai mato inansharashquin.¹² Man futsafo matohuunoo shara huamapaiyai cuscan nanscarifi huaqui futsafori shara huashofafaincahuun. Moisés cununi cuscan yafi Diosin tsain yoimisifoanri nannori cununifo man shara huashofafainon.

Caincaiti atsoshta

Lc 13.24

¹³ Ascashon tsain futsari un mato yoinon. Nannofin fai rafuquin. Nan fai tohuaica uhuapaton yorahuanrasi ahuunsi fomisifo. Ascafia nan mau fai tanashu ahuun unutaqui omitsiscapanacafo muran iquishcani. Ascacun mau fai uhuapaton catama fai atsoshta tanacahuun.¹⁴ Nan fai tohuaica uhuapama atsoshtacoin. Ascan nanfin fustirasiton fuchitirofo. Nan atsoshta tanafainashu omitsiscatirofofia ahuun unutaqui Dios ari nocoshcani nipasharashcaquin.

**Ihui ahuun fimihuunshon
non onantiro**

Lc 6.43-44

¹⁵ Oinfain. Paramisifo matoqui fucashon mato yoiqui isca huacani, “Nonfin Diosin tsain yoimisifoquin,” ishon yoifiacani afoancai Diosin tsain yoimisifoma. Ascan nanfofin nan chashoan cuscarafiofashu ato nomuran nan masharo pofu cuscarafioquin. Ascacun ato nicayamacahuun. ¹⁶ Un mato tapimaquin isca huai. Fanafoti ahuun fimifohuunshon non onantiro ahuu cuscarafomainquin. Ihui moshayafohuuncai uva foaicun non tuscutiroma. Nanhuafaquisihuunricai shopa foaicun non tuscutiroma. ¹⁷ Ascafia ihui sharano ahuun fimiri shara itiro. Ihui chacano ahuun fimiri chaca itiro. ¹⁸ Nanscarifiai ihui shara cai ahuun fimi chaca itiro. Ihui chacanocai ahuun fimi shara itiro. ¹⁹ Ascacun ihuin ahuun fimi sharamacun ifoan rurashon coatirofo. ²⁰ Ascacun fimi chaca iyamarai sharacun onantirofo ahuu cuscaromain ihuiquin. Nanscarifiai nan tapimamisifoan amisifo cuscan man onantiro yora sharafo iyamaraimain chacafoquin.

Atificai Upa Dios icano iquitirofoma

Lc 13.25-27

²¹ Ascano atirifiton ua Ifo huafiofashucai uhuun Upa Diosin ato amapaiyai cuscan amisifoma. Nan cuscarafio Upa icari nocotirofoma. Nan uhuun Upa nai ari icaton afo ato amapaiyai cuscan huamisifo nanfo fusti uhuun Upa ari nocotirofo afu nipashcaquin. ²² Ascacun Upa Diosin nantifi icoinra huamafo onaintimaitian nantianri yora ichapaton ua yoiqui isca huashcani, “Ifoshhta, shinanhuun. Non min anuhuunshon non yorafo mihuunoa tapimamisi. Min anuhuunshonri yoshin chacafo non futsafomaquinooa potamisi. Min anuhu-

unshonri tsoan atiroma cuscan non huapaoni. ¿Iconmamun, Ifon?” ishon yoishquicani. ²³ Ascaifoan un ato caya-cafi cumaqui isca huashquin, “Mancai uhuun yorafo imisima. Manfin paramisifoquin. Chaca fustisi man huamisi. Ascacun umaquinoashu fotacahuun,” un ato huashquin.

**Futsan pushu mutsisipa huaino
futsan pushu mutsisipama huatiro**

Mr 1.22; Lc 6.47-49

²⁴ Ascacun un mato tapimai un mato yoimisi cuscacoin aashucai man funopacunacama. Nanscarafio nan pushu mutsisipa huamua cuscarafio. Pushu huaquin ahuun quishi mai tuiqui noco. ²⁵ Ascano fasi oi ichapa fucain faitahuan pushu naman foannaino fuhuanri nocofiaquicai pushu mutsisipa paon huaquima. Nanscarifiai nan uhuun tsain nicacoianfo nan un yoia cuscan acani. Ascashu ahuara ahuuscarafioinocai umaqui itirofoma. ²⁶⁻²⁷ Ascafia pushu futsa mai puhuuqui fuquinishta huaa ahuun quishi mai tuiqui nocoama. Ascano fasi oi ichapa fucain faitahuan pushu naman foannaino fuuhuanquiriti pushu mutsisipama paon huaqui chacana huatiro. Nanscarifio aqui tsoan uhuun tsain nicafioquin un ato tapimana cuscacoin aima. Aatocai shinansharama. Ascashu ahuun unutaqui arifi nantifi funoshqui omitsiscairan, —ishon Jesús ato yoini.

²⁸⁻²⁹ Jesús tsainqui anaitiano yorahuanrasi anoshon nicacanasu yoinannifo, —¡Aira! ¡Nicacapon! Ahuun tsain sharacoin. ¿Ahuuscashon anori noco yositromun? Ahuun tsain shara iquina. Nocon tapimamisifoan Moisés cununi cuscan noco yosimisi cuscan acaai anori noco yositamarocon niaifo tapia cuscan noco yosiaran, —ishon yoinannifo.

**Jesús nocofunu yoratiso
rashquishi futsua caya huani**

Mr 1.40-45; Lc 5.12-16

8 Ascatan Jesús ato yoiquin anaititan machi tunanmanri tusuriqui cainaiton yorafoan mufainifo. ²Jesús caino nocofunun ahuun yoratison rani-mamishti rashquishi futsua Jesusqui no-coshon ratoconun mai chachipacufoan yoini isca huaquin, —Ifon, ua caya huapaiquifin mian cayahuatiroquin, —huaiton. ³Jesús aqui mupishon yoini, —Icon un mia caya huai. Ascan natianfin min cayaiquin, —huaino a rashquishi futsua cayariscatani. ⁴Cayacun Jesús yoini isca huaquin, —Un mia caya huaa cuscan tsoa yoyiamahuu. Nocon caifohuunshon Dios cufimisi ismatahuun. Ascashon Moisés noco yononi cuscan chashoanun facu a inantahuun mia rutushonon. Min chaca soafain min caya cuscan ato ismashquin. Ascano tapitirofo Moisés noco yononi cuscacoin min aiton, —ishon Jesús yoini.

**Romano ranushumua niaifoan
ahuun oinmati Jesús caya huani**

Lc 7.1-10

⁵Asca huafaini Capernaum ano cani. Ascaino nanno ranushumua niaifo noconi ahuunshon ahuun oinmati caya huamapai. ⁶Aqui nocoshon yoiqui isca huani, —Ifon, uhuun oinmati isininqui. Uhuun pushu ano furoiquima raca. Fasi omitsiscairan, —huaiton. ⁷Jesús cumani, —Un canonqui cayahuashquin, —ishon yoiaiton. ⁸—Ifon, uncai ahuama. Min nocofunu tsoa cuscaramacoin. Uhuun pushu muran capaiyamaquin. Min tsainmansihuun oinmati ua cayahuashohuun. ⁹Ascan uarifi uhuun niaifoan ua yonomisi. Ascacun urifi ranushumuafu

un yonotiro. Ascan un futsa, “Catahuun,” huaino cariscatiro. Un futsa, “Ohuu,” huaino uqui oriscatiro. Uhuun oinmatiri, “Ua ashohuun,” un huaiton ua ashoriscatiro. Ascan minfin ahuamamishti huatiroquin. Ascacun min tsainmansihuun oinmati cayanon, —ishon yoini.

¹⁰Ascaiton nicai Jesús afu foaifo yoini, —¡Aira! Nicacapon. Israelimafishon naton ua yoiái cuscacai tsoa futsan ua icoinra huacoinmisima. Israeli anofoanricai ua icoinra huacoinmisifoma. ¹¹Ascacun un mato shafacafi yoi. Mani futsafori anoshon nan Dios icoinra huafoti nocon shunifo Abraham yafi Isaac non Jacobori Dios icano nai murannoashu atofu ichananshceni Diosin yorafo iishcaquin. ¹²Ascafia atirifi nocon caifon Israelifo Diosin ahuun yorafo ato imapaifacai tsoan icoinra huafoma. Ascacanashucaí Dios icano nocotirofoma. Ascacun Diosin ato faquish muran potashquin. Nannoashu uaiqui omitsiscapanacaforan, —ishon Jesús ato yoini.

¹³Ascashon Jesús Romanon ranushumua niaifo yoini, —Min ua icoinra huaino min oinmati man caya. Ascan natian min pushu ano catahuun, —ishon yoini. Jesús yoiaitian ahuun oinmati cayariscatani.

**Pedro ahuun raisi yoshafo
Jesús caya huani**

Mr 1.29-31; Lc 4.38-39

¹⁴Asca huatan Jesús Pedro pushu ano cani. Nanno caquin oian Pedronun ahuun raisi yoshafo fasi yonacoin oshati camaqui raca ini. ¹⁵Ascaiton Jesús yoshafoan ahuun mucuqui mupiaiño ahuun yona matsiriscatanaino funinaca huan nan isinincama ointsacai Jesús pimashquin tushu huani.

Jesús yora ichapa caya huamani

Mr 1.32-34; Lc 4.40-41

¹⁶ Ascaino man fari caino isinincai futsa futsatapafo yorafo aqui ihuunifo ato cayahuamapacunon. Atirifi yoshin chacafo atohuun nuufafaina Jesús ahuun tsainansi atomaquinoa potano caya sharanonfo. ¹⁷ Jesús nantifi ato caya huani cuscan nannori ahuunoa Diosin tsain yoimisi Isaiás inon pacoai cuscan cunuqui isca huani, —Cristofin ahuara isin futsafoan noco isininmai cuscan noco caya huaquin. Nocon isinfori nocomaquinoa potaran, —ishon Isaiás cununi cuscan Jesús huani.

Jesús tanasharapaiyafifo

Lc 9.57-62

¹⁸ Ascashon Jesús oian yorahuanrasi aqui fuaifoan afu rafuafo yoini, —Non ian ocuma futsa fonon focahuun, —ato huaino. ¹⁹ Nantianri Moisés yononi cuscan tapimamisi aqui cashon yoiquin isca huani, —Tapimamisiton, min raqira caino urifi un mifu cahuacacainon, —huaiton. ²⁰ Jesús cumaquin, —Marifi quiniyaquin. Puiyaforti naayafofiano uncai pushu yama, —ishon yoini. ²¹ Ascaiton a tanamisi nocofunu futsan Jesús yoiquin isca huani, —Ifon, natian un mifu capaifiai uhuun pushu ano un cayotanon ua nichiyopun. Nan uhuun upa naitian un mai huayotan un mia tanasharashquinon, —huaiton. ²²—Ascaquima ua tanahuun. Ua ifoamafofin nan yora naa cuscarafokin. Ascashon nanfoan ato yora naacun mai huatirofo. Ascan minfin natian ua tanaicain, —ishon Jesús cumani.

Jesús fuuhuan yafi ian fuchomanhuan nishma huani

Mr 4.35-41; Lc 8.22-25

²³ Asca huatan Jesús shasho naqui nanuano norifi afu rafuafo non afu nanucaini. ²⁴ Ascashu ianmanhuan non pocuaino fuuhuan nocoqui noconi. Nantian Jesús shasho murannoashu osha ini. Ascano ian fuchomanhuanquin shasho muran unu iquimani. ²⁵ Ascaiton non moinni. —Moihuu, Ifon, noco numashqui. Man non asai futsuicai, —ishon non yoini. ²⁶ Ascaino moinacahuan noco yoini —¿Ahuuscai man ratuain? Man ua icoinra huasharashucai man ratucuanama, —ishon noco yoini. Ascatan fuuhuan yafi ian fuchomanhuan yoiqui isca huani, —Fuun nishmahuu, —huafain, —Fuchomanhuan nishmahuu —huaino fuu yafi ian fuchoai nishmafaini. Asacatan ianmanhuan pusiquima racani. ²⁷ Ascaiton oin non yoinanni, —Ahuu cuscara nocofunushonmun nocon Ifoan isca huaiquin. Fuuhuan yafi ian nan yoiyai cuscan man nishma huaquin, —icashu non yoinanni.

Gadara mai anoa nocofunu rafuhuun yoshin chaca nuua ini

Mr 5.1-20; Lc 8.26-39

²⁸ Ascatan ianmanhuan pocufaini Gadara mai ano non nocotan Jesús no fu caino nocofunu rafu yoshin chacafo atohuun nuumisi aqui funifo. Nan rafu fasi musucoin ini. Nantifi yorafo atoqui musumisifo. Ascan nan rafu icafoanno cai tsoan ato finontiro imisima. Ascacun atoqui turocomumisifo. Nan mahua quini muran naafo mai huamisifo ano nan rafu inifo. ²⁹ Jesús fuchicatan oi ashcafinitin yoinifo, —Minfin Diospan facuquin. ¿Min noco ahuusca huapai oamun? Min noco omitsisca huaitian

icataiyamafiano min noco omitsisca huai oamun, —ishon Jesús yoinifo.

³⁰ Ascaino nantianri ato chaimashon yahua inafaoan piinifo. ³¹ Ascashon yoshin chacafoan Jesús yoicaquin, —Min na nocofunu rafumaquinoa noco potaimancai yahuarasihun noco nichipun, —huaifoan. ³² Ascaiton —Yahuafohuun fotacahuun, —Jesús ato huaino. Nan nocofunu rafumaquinoashu yoshin chacafo yahuafo muran fonifo. Ascaino yahuahuanrasi ian muran maocofainni asai futsunifo. ³³ Ascaino oinfaincane yahua cushumisifo ichonifo pushufoti anofo ato chani huai focani. Ascatan nococashon Jesús nocofunu rafumaquinoa yoshin chacafo potaiton oianfo cuscan futsafo yoifoanfafainifo. ³⁴ Nicacani nantifi nan pushufoti ano icafo Jesusqui funifo. Ascashon yoinifo, —Nuno noco mai anoashu catapun, —huanifo.

**Jesús nocofunu
funitiroma caya huani**

Mr 2.1-12; Lc 5.17-26

9 Ascatan Jesús shasho naqui nanucaini ian mahuan pocufaini ahuun pushurasi ano noconi. ² Asca caini pushu muran iquicun rafu non rafuri nocofunifoan aton caifo isinincai afi raqui caiyamacai afiri ahua huatiroma Jesús shinanmaqui shuhua naratashon ihuunifo a cayahuamanon. Ascaiton Jesús oian nan nocofunu isinincaiton ahuun yorafoan fasi icoinra huaifoan oinquin isinincai yoiqui isca huani, —Uhuun yorashta, ratuyamahuu. Natian mun mia chaca soashona, —huiton.

³ Nicacani Moisés cununi cuscan tapimamisifoan aton nomuranshon shinanquin isca huanifo, —Ajaa. Natocai chaca soatiroma. Fasi Dios chaca huai. Diosin fustitofin chaca soatiroquin. Asca noco paraquin. “Un

Diosiran,” noco huamapai, —ishon aton nomuranshon shinanchacanifo.

⁴ Ascaifoan onanshon Jesús ato yoiquin isca huani, —¿Ahuuscai maton nomuranshon man amaquiri shinanchacaimun? ⁵⁻⁶ Unfi Cristoquin yorafoan aton chaca un soashotiro. ¿Ascan ahuuscacaimun un huaicai? Un chaca soashoyamarauin un cayahuai. Ascacun un mato ismai Upa Diosin ua catoan. Ahuunshofin un chaca soafain un yorafo caya huacointiroquin, —ishon ato yoini. Ascatan Jesús nan nocofunu afi raqui cayamacai afiri ahua huatiroma yoini, —Min pushu ano min shuhua ya funicaitahuun, —ishon Jesús yoiaino. ⁷ Funinaca huatan ahuun pushu ano cani. ⁸ Ascaiton oincane nantifi mustaiaricatan yoinifo, —Ahuuscashomun Diosin isca huaiquin. Diosin fasi sharacoin tsoa cuscarama. Ahuun yonohuunshon na nocofunu isinincai Jesús ahuun tsainmansa caya huafain ahuun chacari soashonaran, —ishon yoinifo.

Jesús Mateo cunani

Mr 2.13-17; Lc 5.27-32

⁹ Nanscacaini caaquin Jesús ua oinni. Unfin noco niaifo pui fishofafainmisi iniquin. Ascan uhuun anufin Mateoquin. A muranshon aton pui fianti pushun facu muran un tsoa ini. Ascaiton Jesús ua yoini, —Un fu cahuun ua tanamisi iishquin, —Jesús ua catonquin huani. Ua asca huaino un afu cani.

¹⁰ Ascashon Jesús uhuun pushu muranshon un pimani. Yorafori no fu cani. Niaifo pui fishomisi futsafo non icoinra huamafo futsafoan atohuunoa shinanchacamisifo yafi non afu rafuafori cani. Ascashon nanfoan no futan piinifo. ¹¹ Ascaiton oincaquin Fariseofoan Jesús fu rafumisifo yoini, —¿Ahuuscai maton tapimamisi Jesús nan niaifo pui fishomisifo

non chaca futsafo futan piimun? — huanifo.

¹²⁻¹³ Asaifoan nicaquin Jesús ato cumani, —A isinicaifoma cayahuamamitsamisi yopacanima. Ascan nan isinicaifoti fasi cayahuamamitsamisi yopacani. Ascari fi aquin, “Uncai ahua chaca huamísima. Un Numamisi yopaimaran,” icaifocai un aton chaca soashotiroma. Ascan tsoan yoiqui isca huai, “Un fasi chaca huamisi. Un numamisi yopacoinran,” icaifoan un ato chaca soashotiromo. Ascacun Diosin tsain cununi cuscan tapitacahuun. Cunuqui isca huani, “Ua man ina fushomisi un mato chaca soashonon. Nan fusticai un fuchipaima. Ascatarocon man futsafohuun ramapaiyai nancafin un fasi fuchipaiquin,” ishon Diospan tsain cununi. —Jesús ato huani.

Piqui tunuaihuunoa

Mr 2.18-22; Lc 5.33-39

¹⁴ Ascashon ato yoiaino Juan fu rafumisifo aqui fucashon yocanifo. — ¿Ahuuscái Fariseofo futan non piqui tunumisifiano mifu rafuafoan piqui tunumisimamun? —ishon Jesús yocai foan.

¹⁵ Ato cumani, —Nocofunu fu ainfo fianainnoraicai unimai fusicaiquin tsoan piqui tunutiroma. Nanno funu anocai ahuun yorafoan piqui tunutirofoma. Ascafia funu amaiqui rutuafono shinacaiquin piqui tunutirofo.

¹⁶ Sahuuti shunicoin fashnucun potu funapan icushumufia ustua shu fasi chacanai finatiromo. Tsoancai afanan ascara icushpaitiroma. Nanscarifiai un mato tsain funa shara yosia cuscan nicaoinshocai man apaoni cuscan afanan man huatiroma. Tsoan ua tanacoianshu ipaoni cuscan cachiquiri huacointiromo. Ascashu funa cuscara shara iishquin.

¹⁷ Nanscarifiai tsoancai fichi tutso shuni muran vino funa nanutiroma. Fichi tutso toshacainaino vino funa

chacanai cuyofotiromo. Nanscarifiai maton shunicaifoan mato yosimisi cuscan yafi un mato yosiai cuscaicai nan rafu ositirofoma. Un mato yosiain cuscaicoi nannori Diosin tsain shara. Ascafia mato shunifoan mato yosimisifo cuscaicai anorima. Nan tanashocai Diosin mato amapaiyai cuscan man huatiroma. Nan rafu osishon nicapaiquicai man shinansharatiroma. Fichi tutso funa muran vino funa nanua sharacoin itiromo. Nanscarifiai ratoranfoan apaoni cuscan unucatan un ato tsain funa shara yosiain nan fusti tanasharacun Diosin ato funa shara imai, —ishon Jesús yoini.

Jairo shotocofacu caya huafain ainfoan Jesús sahuuti muunni cayashquin

Mr 5.21-43; Lc 8.40-56

¹⁸ Ascashu Jesús tsaincai muran Israelifoan ichananti pushu anoa aton niaifo Jesúsqui noconi. Nocoshon ratocounun mai chachishon yoiqui isca huani, —Uhuun shotocofacushta man naaquin. Un fu capun. Min mucupan uhuun facu mui caashquin cayatan ninon, —ishon niaifoan Jesús yoini. ¹⁹ Asca huaino Jesús niaifo fu caino non acho non afu cani.

²⁰ Nannori ainfon imi imitiani doce fari man aqui cafiano nusu yamacai. Jesús caiton nan ainfoan acachorishori ahuun sahuuti muunni. ²¹ Mun ataima ahuun nomuran shinanqui isca huani, —Un ahuun sahuuti muuanshu un cayatiromo, —ishon shinanni. ²² Ascashon muuaiton Jesús ifiacucahuatan ainfo fuchishon yoini —Achishtan, ratuyamahuu. Min ua icoinra huashufin min caya sharaquin, —ishon yoiaino ahuun imi nusuriscatani. Ascaiton mua man caya sharacoian ini.

²³ Asca huatan Jesús niaifoan pushu muran iquicaiquin nica yorafoan aton

shainti manuaifoanno futsafo shoraras-cacani. Fasi achacoin uaicani. ²⁴ Ascaifoan Jesús ato yoini, —Chifi caintacahuun. Na facucai naama. Oshafinquin, —ato huaiton osanifo. ²⁵ Ato caimatan shotocofacu mutsoinifoannaino samamashta funinaca huani. ²⁶ Ascano Jesús shotocofacu man naafiacun funia nicacani pushufoti chanifoanfainifo.

Jesús fusho rafu cayahuani

²⁷ Ascano Jesús niaifo pushu anoashu caiton fusho rafutan mufainifo. —Min nocon niaifo ipaoni nan David ahuun funa. Nocoahuun ramapaihuu, —oi ashcafinitin cunarianifo. ²⁸ Asca huaifono Jesús pushu futsan muran iquicun fusho rafuri afu iquinifo. Iquiafoan Jesús ato yocani, —¿Un mato caya huanon man icoinra huaimun? —huaiton. —Ai, Ifon, non mia icoinra huai, —huaifoan. ²⁹ Aton furo munquin yoini, —Ua icoinra huashufin man cayaquin, —ato huani. ³⁰ Asca huaino oinsharariscatani. Oinsharaifoan Jesús ato yoisharaquin —Ua nicacaquin. Un mato cayahua tsoa yoiyamacahuun, —ishon yoini. ³¹ Anori yoifiacun nan rafutan nantifi nanno icafo atoqui chaninifo.

Jesús nocofunun tsaintiroma caya huani

³² Nan rafu pushu murannoashu foaifono futsafoan nocofunu yoshin chaca ahuun nua ascacai tsaintiroma Jesusqui ihuunifo cayahuamanon. ³³ Jesús yoshin chaca amaquinoa potano nocofunu tsainon. Nanno icafo mustairitan yoinannifo, —¡Aira! ¡Oincapon! Nocon mai nan Israeli anoshon Jesús rama aca cuscan tsoa oinmisimaran, —icanashu yoinannifo. ³⁴ Asca huafiainfoan Fariseofoan yoinifo, —Nanton yoshin chacafo aton niaifohuunshon yoshin chacafo potatiroran, —ishon yoinifo.

Jesús yorafohuun ramapai

³⁵ Ascaiton Jesús pushurasifoti nanno Judiofo icano cahuacacaini. Judiofoan ichananti pushu muranshonfin Jesús ato Diosin tsain shara yoiquin isca huani, —Itisharacahuun. Diosin nuno maton niaifo ipairan, —ishon ato yoifoanfaini. Pau futsa futsatapafo caya huani. ³⁶ Yorahuanrasi aqui fuainfoan oin atohuun ramapaini. Aton nomuran omitsiscaifoan. Ascan Jesús shinanquin isca huani, —Chashohuan cushumisioma nanscarifiai na yorafo cushumisiomaforan, —ishon shinanniquin. ³⁷⁻³⁸ Ascashon non afu rafuafo noco yoini, —Yora ichapafoan uhuunoa nicayamafiano ichapamaton ua yonoshocani uhuunoa ato yoishcaquin nanfu nipashquin. Ascashon fasi Upa Dios cuficahuun ahuun yonoshomisifo catonquin uhuunoa ato yoinonforan, —ishon Jesús ato yoini.

Jesús doce nocofunofu catonni afu rafunonfo

Mr 3.13-19; Lc 6.12-16

10 Ascatan afu rafuafo noco cunani, —Uqui fucahuun, —noco huaino. Aqui fuaifoan noco yononi ahuuscashomain yorafo ahuunshon cayahuamafain yorafohuun yoshin chaca nuucun atomaquinoa potatiroquin. Ascashon pau isi futsa futsatapaformain ahuuscashon caya huatirofoquin. ²⁻⁴ Nonfin doce iniquin. Nocon anufo un mato yoi. Futsa Simonfiacun ahuun anu futsa Jesús tuqui huani Pedro. Nanton chipocu Andrés. Futsafoan aton anu Santiago non Juan. Nan rafu Zebedeopan facu. Futsafoan Felipe non Bartolomé un Mateo non Tomás non Santiago Alfeopan facu non Simón futsari nanton ahuun caifo futsafo futan Romanonfo

potapai afanan Israelifo yonononfoma. Futsan ahuun anu Judas Santiago facu futsarifi Judas Iscariote nanton Jesús potashon ato achimani. Nocofofi Jesús noco catonni non ahuun rafumisi inon non ahuunshon tsain tapishquin.

Jesús afu rafafo doce nichini Dios niaifo icainomain ahuu cuscara iishquicain ishon ato tapimanonfo

Mr 6.7-13; Lc 9.1-6

⁵Noco catonshon Jesús noco yonoquin isca huani, —Nan noco caifomafoan aton mai ano foyamacain Samaritanon icafo anorifi foyamacahuun. ⁶Ari fotamarocon nocon caifo Israelifo muransi fotacahuun. Nanfofin chashoan funoa cuscarafokin. ⁷Ascano focashon ato yoiqui isca huacahuun, “Nocon Ifo Dios samamashta nocoyoshquin noco niaifo iishqui,” ishon ato yoitacahuun. ⁸Ascashon isinincaifori uhuun curushhuunshon ato cayahuamafain man yora nafiacun funimafain yora nami rashquishi futsufo ato cayahuamafain yoshin chacafo yorafohuun nuucun nanfori uhuunshon atomaquinoa potacahuun. Diosin mato cashman ahuun curush inan cusca huafain futsaforifi caya huasho ato ahua yocayamacahuun.

⁹⁻¹⁰Ascashon focaquin mato ahua foyamacahuun. Pui foyamafain mato sahuuti yafi sapatori foyamafain forusa yafi poquitiri foyamacahuun. Nan man nuta fustiya fotacahuun. Man uhuunshon uhuun tsain shara ato tapimanaiton arifi man yopai cuscan mato inantirofo.

¹¹Ascan nan man pushurasi ano no-coaitian nocofunun Dios tanasharacoian funacahuun nan fuchiashu ahuun pushu muran iyoshon ato yoifoanfaincahuun nan man caitian. ¹²Ascatan ahuun pushu muran icaquin nan pushu ano icafo ato yoiquin isca huacahuun, “¡Aicho! Min pushu muran non oiran,” huac-

ahuun. ¹³Ascasho nan pushu ifo futan ahuun yorafoanari mato shara huano ato yoihuu isca huaqui, “Dios mato ointi shinanshara huamashquiran,” ishon. Ascafia mato tanasharayamaifoancai Diosin aton ointi shinanshara huamashquima. Ascano Diosicai mato ointi shinanshara huamaqui unuima.

¹⁴Ascan rato pushu futsa iyamarai pushurasi anofoanari mato nicacasmaifoan atomaquinoashu focaquin maton sapato tatashacahuun. Ascaquifin man ato ismatiroquin mato nicacasmaifain Diosirifi nicacasmaifo cuscan. ¹⁵Un mato icon yoi. Diosin nantifi nan chaca huamisifo ato yoipacuaitian nan Sodoma yafi Gomorra ano ipaonifori ato onaintimashqui. Ascashon nan mato nicacasmafari natian ato onaintimaquin finacoinshquin.

Diospan tsain ato yoiafoan nicacasmacaqui ato omitsisca huanifo

¹⁶Chashoanfo masharonun pipaitiro. Nanscarifiai nan icoinra huamafoan mato chaca huapaitirofo. Ascafia nanfo muran un mato nichu. Ascacun nan rono onanya cuscara marifi icahuun. Ruhuincai ahua shinanchacamisima cuscan marifi nanscarifi isharacahuun.

¹⁷Ascacun oinfain. Nan yora chacafo masharo pofu cuscarafato ato achimatirofo. Ascano achicashon aton niaifofa ano mato iyotirofo. Asca huashon aton ichananti pushu muranshon mato ihuin futsa coshamatirofo. ¹⁸Ascashori niaifofa ano mato iyocani uhuunshon mato nansca huacani. Ascafia nanfo yafi caifo futsafori nan tsain shara uhuunfo man ato yoitiro. ¹⁹Ascatan mato achifiafo shinanchacayamacahuun ahuscashomain man ato cumasharaicai. Ascashon niaifofa ointaifi mato yocaifoanno nantianri Upa Diosin mato

shinanmani man ato cumasharanon.
²⁰Man ato yoiaitiancai mafi man ato yoi
 ma. Maton Upa Diosifin aficoi
 n yoi cafisca huaquin ahuun Yoshin
 Sharapan man ato yoipai cuscan mato
 huashoi.

²¹Ascano nantianri nocofunfoan
 ahuun yora afu nanuafu achimacani
 niaifofoan ato rutumanon. Apafoanri
 aton facufo achimacani ato rutunonfo.
 Nanscarifi huaquin facufoan aton
 apa yafi ahua nicacasmacaquin ato
 achimani niaifofoan ato rutunonfo.

²²Ascasho nantifi yorafoan man ua
 icoinra huacun uhuunshon mato
 noicasmacani. Ascan omitsiscafiaquin
 man ua potama nan man naitian uhuun
 tsain tanasharashu Upa Dios fu man
 ipasharaiqui. ²³Ascan pushurasi futsa
 anoshon mato omitsisca huaifoanno
 pushurasi futsa ano ichotacahuun.
 Ascacun un mato cayacafi yoi. Ua
 nicasharacahuun. Israel pushurasifo
 atirifi ari man cataima un afanan
 matoqui nasoshquin.

²⁴⁻²⁵Ascano ahuunshon tapiafoancai
 ato tapimamisi finontiroma. Oinmat-
 ifoanricai ato ifo finontirofoma. As-
 cashu marifi man ua cuscara iishqui.
 Ua chaca huamisifo cuscan matorifi
 nansca huashceni. Nanfoan ua noicas-
 macaquin ua yoimisifo isca huaquin,
 “Minfin yoshin chacafoan ato niaifo-
 quin,” ishon ua yoimisifo. Un mato ifofi-
 acun ua asca huamisifo. Ascan mato-
 caifin asca huaquin finacaicaniquin.

Tsoaquimain man ratutiroquin

Lc 12.2-7

²⁶Ascacun mato omitsisca
 huafiaifoanno atoqui ratuyamacahuun.
 Nanfoan ahuarashta onupaifiamisi
 nantifi Diosin ato puashoshquin.
 Ahuarari fomanpaimisifo nanfori ato
 puashoshquin. ²⁷Ahuara un mato fusti
 yoimisi nanfo nantifi yorafo cayacafi

ato yoisharacahuun. ²⁸Ascasho mato
 rutupaifiaifoanno ratuyamacahuun.
 Mato rutufiatirofocai maton yoshin
 tsoan ahuusca huatiroma. Ascacun
 atoqui ratucaquimarocon Dios fustiqui
 musucahuun. Nantofin noco rutufain
 nocon yoshin omitsiscapanacafo muran
 potatiroquin. ²⁹Ascano tsitsipio rafu
 inanmitsashon toro fustishtaraca
 fitiro. Ascafia mato Upa Diosin
 asca huapaiyamaquicai fustishta
 namatiroma. ³⁰Diosin nantifi tapicoian.
 Nocon foori tanan huani. ³¹Ascashon
 Upa Diosin tsitsipiofo shinanmisi cuscan
 fasi mimacai mato shinanfafainiquin.
 Ascacun ratuyamacahuun. Matocaifin
 tsitsipio aca finonmafain Diosin
 matohuun noiquin. Cushushon mima
 huaquin mato cushusharamisiquin.

Yorafoan ointaifi, —Jesús uhuun Iforan, —huaa

Lc 12.8-9

³²Ascano yorafoan ointaifi, “Jesús
 uhuun Iforan,” ishon ato yoiabin uhuun
 Upa Dios nai muran icanoshori ahuun
 ointaifi, “Naafin uhuun yoraquin,” ishon
 un yoishquin. ³³Ascafia tsoan yorafoan
 ointaifi, “Jesús uhuun Ifomaran,” ishon
 yoia. Nantocai ua icoinra huamisima.
 Nanscarifi huaquin uhuun Upa Diosin
 nai muranshon ahuun ointaifiri “Nacai
 uhuun yoramaran,” ishon un yoishqui.

Jesushuunoacai yorafoan anorisi shinanfoma

Lc 12.51-53; 14.26-27

³⁴Man shinanmun nantifi manifoti
 anoafu uhuunoashu unimanonfo un
 oni. Ma. Ascaramafiqui. Un mato
 yoiyai cuscacai tsoan nannorifosi
 shinancanima. Asca nan ua icoinra
 huafoan sharafosi shinainfoanno nan
 ua icoinra huamafoan ahudara chaca
 futsafosi shinancani.

³⁵ Ascashon apa ua icoinra huaino furumun ua icoinra huashuma apaqui sinatiro. Ahuanri ua icoinra huaino ainfacun ua icoinra huashuma ahuaqui sinatiro. Ahuun yayan ua icoinra huaino ahuun raru ua icoinra huashuma ahuun yayaqui sinatiro. Un nai murannoashu matoqui oyamanicai tsoa ascacuanafoma. ³⁶ Nanscarifi aquicai tsoan nannorifosi uhuunoa shinancanima. Ascano tsoan ua icoinra huacun ahuun yoracoinfoan nan noicasmatirofo.

³⁷ Ascán tsoan ua finonmafain apa yafi ahua noiashucái uhuun yora itiroma. Nanscarifiai tsoan furu yafi ainfacu ua finonmafain noiashucái uhuun yora itiroma. ³⁸ Ascán unfin mato ihui coyan iquinanquin nashoshquicain. Ascfafia tsoan yoiqui isca huaima, “Natian un Jesús tana. Ascacun nai omitsiscafiaquicai un shinanchacaimaran,” ishon tsoan anori yoicasmaicai uhuun yora itiroma. ³⁹ Ascashon tsoan shinanqui isca huai, “Un Jesús tanaiton raca ua omitsisca huacanicati,” ishon shinanqui uhuun tsain cachiquiri huashu nanscara yorafo naashu omitsiscapanacafo. Asca tsoa uhuunoashu omitsiscafiaqui ua potama nanscara yorafori naashu ufu isharpacunaacafo.

**Ahuara shara noco
Diosin inain cuscan**

Mr 9.41

⁴⁰ Ascano ratoranfoan mato nicafain mato shara huaifo. Nanfoanfin nan uacoin shara huai cafisca mato huacaniquin. Nanscarifi aquin tsoan nan un yoiái cuscan nicacoin yafi nan ua nichini uhuun Upa Dios nicacoin cafisca huaiquin. ⁴¹ Ascashon tsoanri Diosin tsain yoimisi ahuun tsain nicacoinfain shara huacun Diosin nanrifi nan ahuun tsain yoimisi inanshara cuscan huaquin

nan shara huari inansharashquin. Ascashon nan Dios tanamisi yora shara futsan ahuun tsain nicasharafain shara huacun, Diosin nan a tanamisi inanshara cuscan huaqui nan shara huarifi inansharashqui. ⁴² Ascano tsoan ua rama icoinra huashon ua tanaiton futsan a shara huaqui unu matsi ayamacun. Ascacun Diosin arifi a futsa shara huaa. Ahuara shara inanshquiain cuscaicai funotiromaran, —ishon Jesús noco yoini.

**Nan Juanpan ato unu muran
iquimapacumisiton a
tanamisifo Jesusqui nichini**

Lc 7.18-35

11 Ascatan non afu rafumisifo doce noco yoiqui anaititan pushurasi futsafo ano Jesús noco iyoni. Nannoafori ato yosifain ato tapimaicai ahuuscashumain non Dios fu ipatiroquin. ²⁻³ Ascano nantianri Juanpan nan unu muran ato iquimapacuni ranushumuafoan cunu muran iquimanifo. Nan muranshon Jesús acái cuscan nicaquin ahuunoa fasi tapisharapaiqui. Nan cunu muranshon a tanamisifo nichini Jesús yocanonfo. Ascano nan Juanpan ato yonoa cuscan fofashon Jesús yocaquin isca huanifo, —¿Iconmun nan minmun nan non manamisi iyamarai futsa raca non manaicai? —ishon Jesús yocanifo.

⁴ Ascaiton Jesús ato cumaquin isca huani, —Nan man nica cuscan yafi man oian cuscarí Juan tapimatacahuun.

⁵ Yora fushocoinfo un ato cayahua afanan oinsharanonfo. Nipaiqui ranainfori un ato cayahua nisharanonfo. Ato yoratisho coyo cuscara tocoi futsuafori un ato caya huaa afanan imisi cuscan ato nami shara inonfo. Pastocoinfori un ato cayahua nicasharanonfo. Man yora naacoinnafori un afanan ato funimana. Ascashon ahuuomafori tsain shara un ato yoifafainmisi ahuuscashumain Dios

fu ipatirofoquin. ⁶ Ascan tsoan ua icoinra huacoinshon ahuara futsa shinainma. Nan cuscara yorafofin unimacointiroquin. Nannori ua Juan yoishotacahuun, —ishon Jesús ato yoini.

⁷ Ascatan man foafono Juanhuunoa Jesús nanno niafo ato yoini, —¿Ahuuscai tsoa istaipama ano Juan oin focani fonifomun? Juancai nan faca tahua pui ninhuun focufocu acai cuscarama. Nanscarifiai man man tapia Juancai nocofunu ointi ranainyama. ⁸ ¿Ascacun ahuuscai Juan oinpai man fonimun? ¿Man shinanmun a nocofunun sahuuti sharacapa sahuucun oin foi man foni? Ma. Juanpacai sahuuti sharacapacoin sahuumisima. Niaifofoanfin aton pushu muranshon sahuuti sharashtacoin sahuutirofoquin. ⁹ ¿Ascacun ahuuscai oinpai man fonimun? Man shinanra Diosin tsain yoimisi Juan oincai man cani. Ascafia nan icon. Juanpan Diosin tsain yoimisifia nanton yoimisi cuscacai tsoa futsafoan anori yoimisima. ¹⁰ Ascacun nanhuunoa Diosin tsain cununi isca huaquin, “Min nai ariashu mai ano fotoataima iquisi uhuun tsain yoimisi un nichiqui tau huai. Mi huunoa ato yoiano itisharashon mia nicanonfo,”

ishon cununi. ¹¹ Un mato icon yoi. Tsoashtacai Juan finoanma. Ascashon Juanpan tsain yoimisi cuscaricai tsoan ascara yoyoyomisima. Ascafia Dios niaifo icanoafoan yoisharatirofo cuscacai Juanpan nicayamafain nanfoan oianfo cuscaricai Juanpan oinyomisima. Ascashon nantifi Dios icanoafoan Juan finoanfo. ¹² Nan Juanpan ato unu muran iquimapacunitian natianri yorafo Dios icano fasi iquipaicoincani. Ascashon shinanqui isca huafo, “Diosin niaifoan ahuun yora urifi un ipai afu nipashquin. Ascacucacai ahuashtaton ua nitun huatiroma un ahuun yora icaiton,” ishon

shinancani. ¹³ Diosin tsain yoishomisifo futa Moisés cununi cuscan yoiquin isca huanifo, “Nan nocon numamisi noco niaifo oshquiran,” ishon yoinifo. Ascacun natian Juanrifi man matoqui noco ahuunoa mato yoishquin. ¹⁴ Nanfoan cununi cuscan icoinra huashon man tapitiro Juan arifi Diosin tsain yoimisi nan Elías cuscara. Ascacun Diosin tsain yoimisifoan cunuqui isca huanifo, “Un matoqui Elías nichishquiran,” ishon Diosin yoini. Ascan nanfin Juanquin. ¹⁵ Manmain ua nicatiroquin ua nicacahuun. Uhuun tsain maton nomuran nanushcaquin.

¹⁶ Ascashon natian niyoafo ahuun cuscarafomainquin un mato yoi man tapinon. Nanfofin nan facu cashumisifo cuscarafokin. Facufo cashucaquin afu facu futsafo oi ashcafinin cunatirofo. Nanscarifiai nanfofin nanscarafokin. ¹⁷ Nan facu cashumisifoan yoitirofo isca huaquin, “Man non shainti manufiainocai monopaicanima. Fanainca omitsiscati cuscara non fanai fiainocai man uaipaimaran,” ishon nan facu cashumisifoan yoitirofo. ^{18–19} Nanscarifi aquin nanfoanri Juan yafi uqui tsain chipufafaini. Ascafia Juanpacai piqui tunufain fimi unu pau ayamisima. Ascacun ahuunoa yoiqui man isca huamisi, “Juan nisocoin. Yoshin chaca ahuun nuaran,” ishon yoimisifo. Asca unfin pii sharafain un aya sharamisiquin. Ascafia uhuunoa yoiqui isca huamisifo, “¡Cuu! Jesús pitsicoin fasi ichapari ayatiroran huafain Roma anoa niaifo puifishomisifo yafi yora chacafo furi rafuiran,” ishon uhuunoa chaca yoimisifo. Ascafia nanfoanri yoiqui isca huamisifo, “Tsoamain shinansharafain icaquin non onantiro. Nan yorafin isharacoianquin shinansharamain huaifin,” ishon nannori yoimisifo. Nannori yoifiaquicai uhuunoa ascara

yoi-paimisifoma. Ascatarocon uqui tsain chaca fusti huamisiforan, —ishon Jesús ato yoini.

Pushurasi anofo nicayosmashunifo

Lc 10.13-15

²⁰⁻²¹ Ascano ato yoiqui anaititan Jesús nan pushurasi anofo ato yoiqui isca huani, —¡Ohua! Man Corazín anofo yafi Betsaida anofoan man chipo fasi omitsisca. Tsoan oiyomisima cuscara shara un mato ismafiano mancai chaca shatupaima. Ascan nan Tiro anofo yafi Sidón anofori un mato isma cuscan un ato ismaiton nanfoan aton chaca shatucuanafoma. Ascasho yoicuanafoma isca huaqui “¡Ohua! Non fasi chaca huamisi. Ascacun natian Diosiqui nasoshon non nicasharanoncahuun,” ishon yoicuanafoma. ²² Ascafia Diosin nantifi icoinra huamafo onaintimaitian nan Tiro anofo yafi Sidón anofori onaintimafiaquicai mato onaintimaquin finai cuscan ato huaima.

²³ ¿Ascan man Capernaum anofoan man shinanmun man nai muran Dios ari foicai? Ma. Omitsiscapanacafoma muranrocon mato potai. Tsoan oiyomisima cuscara shara un mato ismafiaitocai maton chaca man shatupaima. Ascan nan un mato isma cuscan Sodoma anofo un ato ismaiton aton chaca shatu cuanifo. Tsoaricai cuyocuanama. Nantianri aton pushurasi icuana. ²⁴ Un mato yoi. Diosin nantifi icoinra huamafo onaintimaitian nan Sodoma anofori onaintimafiaquicai mato onaintimaquin finai cuscan, —ishon Jesús noco yoini.

Uqui fucahuun. Un mato ointi fiananan huashonon man afanan shinanchacanonma

Lc 10.21-22

²⁵ Ascano ato yoiqui asca huatan Jesús apa cufini, —Upa Diosin, min fasi shara-coin. Nantifi nai murannofo futan mai

anofoan aton Ifofin minquin. Ascano nan mapo sharayafoma yafi unu tapiafo-cai min tsain shara min ato tapimanama. Ascafia nan unu tapiamafishon un ato isma cuscan un ato yoi-ai cuscan ua icoinra huafoma. Nanfofin min ato tapimanaquin. ²⁶ Icon, Upan, minfin nanscara fuchipaiaqui, —ishon apa yoini.

²⁷ Ascashon Jesús afanan ato yoiquin isca huani, —Upa Diosin tapia cuscan uarifi nantifi tapimani. Unfin Diospan facuquin. Diosin fustitofin ua onancoianquin. Nanscarifi aqui urus fusti Upa Diosin un onancoian. Nanscarifi aqui urifi un futsafo Upa Diosihuunofoma onanmanai cuscan nanfoanri Upa Diosin onantirofoquin.

²⁸⁻²⁹ Ascacun uqui fucahuun ua tapishashcaquin. Unmain ahuu cuscaruquin un mato tapimai. Unfin yorafohuun ramapaimisiquin. Uhuun nomuranricai un ahuashta shinanchacayamafain un isharacoin fustimisi. Ascashon un mato yonomapaiyai cuscacai curushma. Nanricai ahua ihuuma. Ascacun maton nomuran ihuucoin mui uqui fucahuun un maton ointi fiananan huashonon man afanan shinanchacanonma. ³⁰ Ascano uqui oshon man mutiro un mato curush yonomaima. Ascatarocon ua tanasharacoinyashu mato ointi fiananan huashon man isharacointorran, —ishon Jesús ato yoini.

Jesús fu rafumisifoan tunutitian trigo fimi mutusnifo

Mr 2.23-28; Lc 6.1-5

12 Ascatan Israelifoma aton tunutitian Jesús yafi afu rafumisifo mau mamaqui focaquin trigo mutuscashon fonaincoinaquin piyaifoan. ² Oincaquin Fariseofoma Jesús yoinifo, —¿Ahuuscai nocon shuni Moisés yononi cuscacai minhuunshon tapimisifoan nicapaicanimamun?

Tunutitian trigo mutuscaniran, —huaifoan.

³Jesús ato cumaquin isca huani, —¿Davidhuunoa cununi cuscan man man oinmismun? ¿Fonainquin nocon shuni David ahuun yorafo futan ani cuscan man man nicamismun? ⁴Dios fu tsainti pushu muran iquicaishon amurannoa misifo ato piquini fasi fonicoinquin. Ano tushu futsa yamaino. A misifofin nan Diosin tsain yoimisinafosi iniquin. Tsoa futsacai a misi pitiro inima. Nannori yonofianifo fasi fonicoinquin David afu rafuafo futan pini.

⁵¿Ascashon Moisés cununi cuscari man man oinmismun? Cunuqui isca huani, “Dios fu tsainti pushu muran-shon tunutitian ahuun tsain yoimisihoan yonotirofo. Nanfoan yonofiaquicai ahua chaca huacanimaran,” ishon Moisés cununi. ⁶Ascatan un mato yoi. Dios fu tsainti pushu fasi sharashtafia uncaifin fasi shara finacaiquin. ⁷Upa Diosin yoini cuscan cununi isca huaquin, “Man ua inafo rutushomisi un maton chaca soashonon. Nan sharafia man futsafohuun ramapaiquin man ato shara huai. Nancaifin fasi shara finacaiquin. Nan fusti un fasi fuchipairan,” ishon yoini. Ascacun nan tapicoinshocai man ufu rafumisifohuunoa yoicuanama, “Nanfoan chaca huaforan,” ishon. Afoantsi ahua chaca huacun. ⁸Uafin uhuun Upa Diosin catonniquin. Ascacufin urusu fusti un yoitiro ahuamain tunutitian man huatiroquin, —ishon Jesús ato yoini.

Nocofunu mucu musufiquia

Mr 3.1-6; Lc 6.6-11

⁹⁻¹⁰Ascatan Jesús Israelifoan aton ichananti pushu muran iquini. Nanno iquishon ato yosiaino nantianri nocofunu musufiquiaton arifi nicani. Ascano nan Fariseofoan Jesushuunoa ahuara chaca yoipaicaquin nan yocanifo. —¿Nocon shuni Moisés

yononi cuscacun tunutitian non yora caya huatiro iyamarai non caya huamatiromanmun? —ishon yocaifoan. ¹¹Jesús ato cumani, —¿Man chashoan ayano tunutitian quini muran pacucun man ihuiriscatiromamun? Ma. Ascataka manrocon ihuiriscatiro. ¹²Nanscarifi huaquin fasi noicoinquin nocofunuhuunoa tunutitianfiacun non shinantiro. Moiséscai noco yononima tunutitian non yora cayahuanma, —ishon ato cumani.

¹³Ascashon nan nocofunu musufiquia yoiqui isca huani, —Mushahuun, —huaino. Mushatanaino nantian ahuun mucu muma sharacoin iriscatani. Nan ahuun mucu ocuma futsa cuscara shara ini. ¹⁴Ascaiton oincanashu Fariseofo focashon shinannifo —¿Ahuuscashomun non Jesús achitiroquin rutushquin? —icashu yoinannifo.

Upa Diosin ahuun facucuin catonni ahuun oinmati cuscara inon

¹⁵Jesús tapitan a rutupaiyaifoanno anoashu cani. Yorahuanrasiton mufainifo. Ratomain isinincai nanfo cayahuamani. ¹⁶Ato cayahuatan ato yoini, —Uhuunoa tsoa yoiyamahuu, —ato huani. ¹⁷Nannori ato yoi Isaías cununi cuscan icocoin inon. ¹⁸Isaiasin Diosin tsain cununi isca huaquin, “¡Oincapon! Naquian uhuun oinmati cuscara un catonni. Un fasi ahuun noi. Un aqui unimacoin. Uhuun Yoshin Shara un afu rafumamisi. Nan manifoti uhuun tsain nicasharacun atorifi aton chaca yama huashotiro uhuun yora inonfo. ¹⁹Acai yora futsa fu fochishmanantanainma. Tsain isininpaton yoishquima. ²⁰Nan yora omitsiscai afanan tunutirofoma ato potaima ato cushusharai tunumashquin. Tsoan icoinra huapai ato yoisharashquin icoinra

huacoinonfo. Ascan huaino afanan mai ano oaitian nantifi chacafoti unumashquin ahuunshon nantifi ishara fustisinonfo. ²¹Nantifi manifoti ahuunoa nicaquin isca huacani shinanshcaquin, ‘Nan fustiton noco numatiro non ahuunoashu Upa Dios fu nipanon,’ ishon yoishquicaniran,”

Isafas cununiquin.

—**Satanashuunshon Jesús yoshin chacafota potairan, —ishon yoinifo**

Mr 3.20-30; Lc 11.14-23; 12.10

²²Ascatan nocofunu fusho icain tsain-tiroma. Ahuun nuushon yoshin chacanun tsainmapaonima nan Jesusqui ihuunifo caya huanon. Ascacun Jesús nan nocofunu afanan oinmasharafain tsainmani. ²³Ascaiton oincani mustaiaricatan afiranan yoinancaquin yoinifo, — Jesús ahuamamishti shara huatiro. Asca nan naraca David ahun funa. Nan Upa Diosin catonni, —ishon yoinifo.

²⁴Ascaifoa nicaquin Fariseofoa yoinifo, —Ma. Atocai Upa Dioshuunshon yoshin chaca potama. Yoshin chacafota aton niaifo Satanashuunshon yoshin chaca yorafahuunoa potatiroran, —ishon yoinifo. ²⁵Ascana nan shinainfo cuscan onanshon Jesús ato yoini, —Mani futsafo afi ranan rutunain cuyotirofo. Nanscarifiai pushurasi anoa icafo iyamarai pushu fusti muran icafo afi ranan chaca huatananfaincani pashcanantirofo afanancai tsoa anosi itiroma. ²⁶Nanscarifiai Satanás niaifoa afu yoshin chacafota potaquin ahun yono chacana huatiro. Asca huaquin ahun yono cuyocointiro afu yoshinfocai afanan afu itirofoma. ²⁷Ascacia manfin yoimisiqui Satanás curushhuunshon yoshin chaca potaran ishon man yoimisiquin. ¿Un asca huaino tsohuunshon mato yorafota yoshin chacafota atomaquinoari

potafomun? Ascacun nanfohuunshon man tapitiro man uhuunoa amaquiri shinanchacai cuscan. ²⁸Un Diospan Yoshin Sharahuunshon yoshin chacafota atomaquino potaino maton Numamisi Diosin catonni cuscan matoqui noco.

²⁹Afanan mato yoi nicasharacahuun. Ahuuscashomain yorafota nocofunu mutsisipaton ahun pushu cushu ano ahun mafo onutiroma. Ascafiaino finoncaia aqui nocoshon achifain munushquin ahun mafofo cuyonfiatocai ahuusca huatiroma.

³⁰Tsoan unfu rafupaiquima ua nicacasmai. Tsoan uhuun tsain nicacasmaifin ua noicasmaiquin.

³¹Ascana un mato icon yoiquin. Ratoran ahua chaca huai Diosquiri Upa Diosin rau huashotiro. Ascanfia ratoranton yoia isca huaquin, “Nanton aca cuscan Satanashuunshon acaran,” huafishu Diospan Yoshin Sharahuunshon aca. Nanton Diospan Yoshin Sharahuunoa tsain chaca hua. Asca huacun Upa Diosin ahun chaca rau huanacama. Ahun chaca ahun nuupacunaca. ³²Tsoan ua chaca huafin un ahun chaca rau huashotiroquin. Ascan tsoan Upa Diospan Yoshin Sharaqui tsain chaca huacai Upa Diosin rauhuanacama. Ahun chaca ahun nuupacunaca. Natian naitianri ahun chaca ahun nuupacunaca.

Fimi fana ahun fimiunshon non onantiro

Lc 6.43-45

³³Ascana shinancapon. Fimi fana naman non orosharaino fana foaisharatiro. Ascashu ahun fimirifi sharacoin itiro. Ascan non fana naman oroamacai fana foaisharatiroma. Ascashu ahun fimirifi chacacoin itiro. Fimi fana ahun fimiunshon non onantiro ahun cuscara-mainquin. ³⁴⁻³⁵Nanscarifiai nocofunu sharapan ahun nomuranshon ahua

sharafosi shinain cuscan ahuun tsainrifi sharacoin itiro. Nanscarifiai nocofunu chacapan ahuun nomuranshon ahuara chacafosi shinain cuscan ahuun tsainri chacacoin itiro. Ascano nocon ointi muranshon non shinain cuscan nannoricoin non yoitiro. Ascan manfin nan rono paupatan facu cuscarafuquin. Ascacun ahuuscashotsi chacacoinfiashon man ahuara shara yoitiro.

³⁶Ascacun un mato yoi. Ratoran shafatan Diosin nantifi yorafo ichanan huaitian ato yoipacushqui ratotonmain icoinra huamisi iyamarai icoinra huamisimaquin. Nantianri ahuashta shinantama yoimisifo cuscan ato puashoshquin. ³⁷Ascashon man niyoano nantifi man yoimisi cuscan Upa Diosin mato nicamashquin. Ascan mato tsainhuunshon man afu ipatiro iyamarai mato omitsiscapanacafo muran mato potairan, —ishon Jesús ato yoini.

**—Tsoan atiroma cuscan noco
ismahuu non mia icoinra huanon,
—ishon yora chacafoan Jesús yoinifo**

Mr 8.12; Lc 11.29-32

³⁸Ascaiton Fariseofo futan Moisés cununi cuscan tapimamisifoan yoinifo, —Tapimamisiton, tsoan atiroma cuscan noco ismahuu min Dios ariashu oa non mia icoinra huanon, —ishon yoiaifoan.

³⁹Jesús ato cumani, —Manfin chaca shinanfain Dios cachiquiri huamisiquin. Ascacun tsoan atiroma cuscan noco ismahuu ishon man ua yoia. Ascafia nan Diosin tsain yoimisi mato shuni Jonás ani cusacoin un chipo mato ismaiton nan fusti man oinshquin. ⁴⁰Jonás shimanoan shaqui muran osha rafu non fusti iyoni cuscan. Nanscarifiai un Diospan Facu mai muran osha rafu non fusti un iyoshqui. ⁴¹Ratoran shafatan Diosin nantifi yorafo ichanan huaitian ato yoipacushquin ratotonmain icoinra huamisi iyamarai icoinra

huamisimaquin. Ascaino nantianri Nínive ano ipaonifoan matohuunoa yoishcani isca huacaquin, “Jonás noco Diosin tsain yoini cuscan non nicacoinshon nocon chaca shatucoinshon non Dios icoinra huani. Asca man manfin Diospan furucoin nicafiashocai maton chaca man shatumisimaran,” ishon mato yoishquin. Nan icon un Jonás finonfiacuai man ua nicapaimisima.

⁴²Nanscarifiai Diosin nantifi yorafo ichanan huaitian ato yoipacushquin ratofomain afu ipatiro iyamarai omitsiscapanacafo muran foshquicaniqui. Ascaino nantianri nan ainfo Sabafoan ato niaifo ipaoniton matohuunoa yoiquin isca huashquin, “Salomón tapicoian cusacacai tsoan futsan tapipaonima. Ascacun ahuun tsain nicapaicoin un aqui chaicunoashu cani. Ascan mancai nan Diospan Furun nicapaima. Ascatamarocon man nicacasmapaoniran,” ishon matohuunoa yoishquin. Nan icon Salomón tapicoian ipaonifia uncaifin fasi Salomón finoncoiniacun mancai ua nicapaima.

Yoshin chaca afanan yoraqui nasotiro

Lc 11.24-26

⁴³⁻⁴⁴Yoshin chaca noco funumaquinoashu cai tsoan istaipama ano cani shara futsa funai cai anoshon tunushquin. Ascafia fuchiamacaiqui yoshin chacanun afanan shinanqui isca huani, “Unfin nan nocofunuhun ipaoniquin. Ascacun un afanan aqui nasoiran,” ishon shinanni. Ascatan aqui nocoshon oian tsoa futsacai afu rafua inima. ⁴⁵Ascacun nan yoshin chacanun afu yoshin chacafo siete ato ihuuni nan fasi chaca finacaiifo. Ascashon ato yoiqui isca huani, “Nocofunu un mato ismai non ahuun nomuran iquitiroran,” ishon ato yoini. Ascatan aqui focanashu iquicainaifoanno nan

nocofunu fasi mimacai chacacoin ini. Manmain aqui rananri focun. Nanscarifiai maton shunifoan chaca huafiapaonifo mancafin fasi chaca huaquin finacoianquin, —ishon Jesús ato yoini.

Jesús ahua yafi ahuun ushtofu

Mr 3.31-35; Lc 8.19-21

⁴⁶ Ascatan Jesús yorahuanrasi yoi tsaincai muran ahua yafi chipocufu noconi. Ascano aqui iquishon ahuaara yoipaifiacaquin chifishon mananifo.

⁴⁷ Ascaiton futsan yoini, —Min uhua futan ushto rananun chifi nishon mia ahuaara yoipai fuaforan, —ishon yoiaiton. ⁴⁸ Jesús cumani, —Un mato tapimai ratofomain uhuun uhuafo yafi uhuun ushtofuquin, —ishon yoini.

⁴⁹ A tanamisifo oinyacuquin ato yoini, —Nafodin uhuun uhua cuscarafu yafi uhuun ushto cuscarafuquin. ⁵⁰ Nan uhuun Upa Dios nai ari icaton ato amapaiyai cuscan huaifo nanfofin uhuun ushtofu yafi uhuun chicofo non uhuun uhuafoquin, —ishon Jesús ato yoini.

Fimi ushu saacaihuunooa cuscara ato Jesús yosini tapinonfo

Mr 4.1-9; Lc 8.4-8

13 Ascatan nan shafatari Jesús pushu murannoashu cai ian cusumun tsaoni. ² Ascaino aqui yorahuanrasi funifo ahuun tsain nicapai cani. Ascaino shasho muran nanuinacahuan ahuun cuscha camaqui tsaoshon ato yoini. ³ Ascashon ahuaara futsahuunooa cuscara ato yoini ato tapimashquin. Yoini isca huani, —Nocofunun ahuun noshati murannooa fimi ushu fishon ahuun mau mamaqui saani. ⁴ Saacano ushufo fai nushmancayan pacua puiyafoan piinifo. ⁵ Ascano ushu ranan toquiri camaqui pacua mai ichapamashta anoashu

samamashta ushu foaica. ⁶ Fari tsacaqui yositimahuaino man naa. Ahuun taporicai chai foama ini. Ascashu fanafu nai cuyoa. ⁷ Ascaino ushu rananri tasha murannoashu foaifiashucau ushu futsa foaisharanima. ⁸ Ushu rananri mai shara ano saaca nan mai sharanooashu nantifi foaisharashu fimi ichapayacoin ini. Futsa cien fimiya icaino futsa sesenta aya icaino futsari treinta fimiya ini. ⁹ Ascaino manmain ua nicatiroquin ua nicacahuun uhuun tsainri maton nomuran nanucoiancahuun, —ato huani.

Ahuuscaquimun futsafo yoifiashon

Jesús afu rafuafosi shafacafi ato tapimaniquin

Mr 4.10-12; Lc 8.9-10

¹⁰ Ascaino non afu rafua aqui fucashon yocanon, —¿Ahuuscacai shafacafi ato yoitama ahuaahuunooa cuscara min yorafo ato tapimashquinmun? —ishon non yocani. ¹¹ Jesús ato cumani, —Ahuuscashomai Upa Diosin ahuun yorafo iquiniquin mato fusti tapimai. Ascaino nafocai ato tapimaima. ¹² Ascaino tsoan Diosin tsain nicasharafain ahuun nomuran nanucoian naanfin Upa Diosin paratamari tapimashquin. Ascafia tsoan ichapama tapifiashon Diosin nicasharayamafain nan yoia cuscan aima nanfin funoshquin. ¹³ Ascacun nan yorafo un ahuaara futsahuunooa cuscara un ato tapimashquin oinfiacashon tapinonfoma. Nicafiaquiri tapinonfoma. ¹⁴ Nannori Isaías nan Diosin tsain yoimisi ipaoniton atohuunooa inon pacoai yoiqui isca huani,

“Man nicafafaiquicai Diosin ato yoia cuscan tapinacafoma. ¹⁵ Nan yorafoan aton ointi curushcoinyashu nicayosmashunifo. Diosin tsain man nicamisifiashu nan nicama cuscarafu. Uhuun yonoshara oinfiacani nan

futsoi cafiscaafu. Ascashon un ato isma cuscan oianfoma. Ascayamacanashu uqui fucuanafu un ato chaca soashonon uhuun yora sharafo iishcaqui,”

ishon Diosin yoini cuscan Isaiasin cununi.

¹⁶ Ascafia nannori Isaías cunufiani mancai ascarama. Ascatarocon un mato oinmana cuscan man icoinra huafain un mato yoia cuscan man nica-coinmisi. Ascashu maton nomuran man unimacoinna. ¹⁷ Un mato icon yoi. Man oian cuscaai uhuun Upa Diosin ahuun tsain yoimisifo futan a tanamisi fut-safoanri fasi oinpaifiaquicai tsoan oin-paonima. Un mato yoimisi cuscan fasi nicapaifiaquicai tsoan nicapaonima.

Fimi ushu saamisihuunoo yoifashon shafacafi afu rafuafu tapimani

Mr 4.13-20; Lc 8.11-15

¹⁸ Nan fimi ushu saamisihuunoo un ato yoia cuscan natian shafacafi un mato tapimai. Ascacun ua nicasharacahuun tapisharashquin. ¹⁹ Ascan nan Dios ahuun yorafo iquinai cuscan nicafashon tapiama. Nanfofin nan ushufo fai ano pacua cuscarafuquin. Diosin tsain ato nomuran man nanufiafo nan yoshin chaca Satanás atoqui oshon nicafo cuscan ato fiantiro afanan afohuunoo shinanonfoma. ²⁰⁻²¹ Ascano futsafoanri Diosin tsain nicaquin tau huai unimacoinyofiafashu samamashta ahuun tsain cachiquiri huua. Ascan nanfofin nan ushufo toquiri camaqui pacua cuscarafuquin. Nanfori nan ushufo toquiri camaquinoashu foaifia ahuun tapo chai foama. Samamashta nai cuyotiro. Nanscarifiai nanfoancai Diospan tsain aton nomuran nanu sharafofoma. Ascashon ahuara chaca finonyamarai futsafoan ato omitsisca huaino samamashta Dios cachiquiri hu-atirofo. ²² Ascan ushu futsafo moshafu

muran pacuashu foaisharatiroma. Nanscarifiai futsafoan Diospan tsain nicafashon ahuara nan acai cuscan fustisi shinain. Ascashon pui ichapa yafi mafo ichapa noi afi paramuquicai afanan Dioshuunoo shinantiroma. Ascaquicai Diosin ato amapaiyai cuscan futsafo shara huatiroma. ²³ Ascafiaquin ushu futsa mai shara ano saacano foaiquin yosiashu fimi ya itiro. Nanscarifiai futsafo Diospan tsain nicafain tapicanashu nan yoia cuscan aafu. Ascashon nanfoanfin futsafori Diospan tsain yoiquin icoinra huamatirofoquin. Futsan treinta iyamarai sesenta iyamarai cien yorafo icoinra huamatirofan, —ishon Jesús ato yoini.

²⁴ Afanan Jesús ato tsain futsa yoini tapinonfo. Isca huaqui, —Diosin nantifi iquinano nanscarifi aquin nocofunon ushu sharafo fana. ²⁵ Fana sharafiafashu ahuun noicasmamisiton yamu ahuun mau ano caa. Mau ifo ahuun oinmatifo oshano noicasmamisiton tashafori mau ano fana. Fanatan mau anoashu caa. ²⁶ Chipofin nan ushu shara foaicaino tashafori foaini. ²⁷ Ascano aqui fucashon mau ifo ahuun oinmatifoan yoinifo, “¿Ifon, min ushu shara min mau ano fanamamun? ¿Ahuuscaimun natian tashafori foaicaquin?” ishon yocanifo.

²⁸ “Noco noicasmamisiton acarán,” huaiton. “¿Ascan nan tashafu non tsucaí fotiromun?” huaifoan. ²⁹ “Ma. Man tasha tsucaino nan fana sharafori tsucapayamafiaquin man afori tsucatiro. ³⁰ Nanscanonquin. Chitunmisitian tashafu yafi fana sharafori foaitiro. Nantian un mau yonomisifo yoishquin isca huaquin, ‘Iquisi nan tashafu tsucacahuun. Nantifi nushasharahuu coashquinon. Asca huatanfin nan fanasharafori uhuun tapasi muran ua fushotacahuun,’” mau ifoan yoiaran, —ishon Jesús ato yoini.

Mostaza ushuuunoo Jesús ato yoini*Mr 4.30-32; Lc 13.18-19*

³¹⁻³² Ascasho Jesús mostaza ushuuunoo ato yoini ahuara futsa ato tapimashquin. Ato yoiqui isca huani, —Nocofunun ahuun mau ano mostaza ushu fanani. Rato fimi ushu futsacai mostaza ahuun ushu uhuapamashtatioma. Ascafia foaica fasi cuya itiro. Rato pushu umainti fimi charo fanacai mostazatioma. Ihui noconan rafutiro. Ascatan yosiano puiyafu ahuun tushpahuu tsaotiro. Nanscarifiai Diosin ahuun yorafo iquisi fustirasi ifiashu chipo paratama caitioran, —ishon ato yoini.

Jesús misi farashatihuunoo ato yoini nanhuunshon Diosin nantifi yorafo iquinai cuscan tapinonfo*Lc 13.20-21*

³³ Ascán Jesús ahuara futsa ato yoini Diosin nantifi yora iquinai cuscan tapinonfo. Afanan ato yoiqui isca huani, —Diosinmain ahuun yorafo ahuusca huatiroquin un mato tapimai. Diosin ahuun yorafo nantifi ato iquifain ato yonotiro. Ainfoan farashati ichapamashta harinaya osishon camisonano farashinitiro. Nanscarifiai Diospan yorafoan nan icoinra huamafo muranshon nantifi ato shara huatiro, —ishon ato yoini.

Jesús ato yoiai cuscan ahuara futsa tapinonfo*Mr 4.33-34*

³⁴ Ascatan ahuarahuunoo yoiqui Jesús ato yoini tapinonfo. ³⁵ Nannori Diosin tsain yoimisiton nan Jesús yoinon pacoai cuscan cunuqui isca huani, “Un ato ahuara futsahuunoo ato yoi ato tapimashquin. Upa Diosin nantifi onihuani chain tsoan ascara

nicayomisima cuscarafu un ato yoishquiran,”
ishon yoini cuscacoin man aa.

Trigo yafi faasi foaitirohuunoo Jesús shafacafi ato tapimani

³⁶ Ascatan yorahunrasi anoashu cai pushu muran iquini. Ascano non afu rafuafo aqui caashon non yocani, —Ifon, min trigo muran faasi foaitirohuunoo yoia cuscacai non tapiama. Shafacafi noco yoihuu non tapisharanon, —ishon non yocani.

³⁷ Ascaiton noco cumani, —Diosifi ua nichiniquin. Un nan ushu fanamisi shara cuscara inon. ³⁸ Nan maufin nantifi manifotihuunooaqui. Ascán nan ushu sharafofin Diospan yorafohuunooaquin. Ascán faasifin icoinra huamafona nan yoshin chaca ahuun yorafoquin. ³⁹ Ascán nan mau ifo noicasmamisi nanfin Satanasquin. Ascán nan fana fiaifotianhuunooafi nan manifoti cuyotirohuunooaquin. Nan fana fimisfofin Diospan oinmatifo afu nai muran icafo.

⁴⁰ Nan faasi mushashon coafo cuscan huaquin. Nan manifoti cuyoaitian. ⁴¹ Uhuun oinmatifo ufu nai muran icafo un nichishquin nantifi futsa chaca huamamisifo yafi nan chaca huafafainaifo uhuun yorafomaqui ato pascashcani. ⁴² Ascashon nan omitsiscapanacafo chi urumanhuan muran ato potano nan-noashu fasi uaicani omitsiscacoinschcani. ⁴³ Ascaino nantianri Diospan yora shara icoinra huafoti aton Upa Dios icanoashu fari chasha cuscarafu. Ascacun manmain ua nicatiroquin ua nicacahuun. Uhuun tsain maton nomuran nanucoincahuun.

Ahuara sharashta onahuunoo cuscarafin ato yoini

⁴⁴ Nocofunu mai futsa ano caa. Nanno ahuara sharashta paratama ahuun pui nuua fuchia. Ascán fuchishon nannori afanan onua. Ascashu fasi uni-

macoinquin nan aya cuscati inanmitsashon nannoa mai fia nan ahuarashta paratama ahuun pui nuuari ahuuna inon. Nanscarifiai Diospan yorafo nantifi aya cuscan afiri inanmutiro Dios fu ipashcaquin.

**Perla funoahuunoa Jesús
ato ahuario futsa tapimani**

⁴⁵⁻⁴⁶ Diosin ahuun yorafo ahuu cus-caramainquin afanan un mato yoiqui isca huai. Mafo inanmitsamisi cahuan-cacaini macush cuscara perla oshopa sharashtafo funafoanfainni. Ascashon man futsa anoa fuchia ahuun pui paratama nuua fuchishon nan aya cuscati inanmitsashon ahuun rafanan nan perla fii ahuunacoin inon. Nanscarifiai Diospan yorafo nantifi aya cuscan afiri inanmutiro Dios fu ipashcaquin.

**Nushutihuunoa Jesús ato yoini
ahuara futsa ato tapimashquin**

⁴⁷⁻⁴⁸ Ascano nushumisiton ahuun nushuti uhuapa pochishon shiman futsa futsatapafo fiini. Ahuun nushutininhuan shiman fospiano unuhuan cusumun cashon nini funi. Ascashon nan shiman chacafo nushuti murannoa tsucashon potani. Ascanshon nan piti sharafosi shihuati muran nanuni. ⁴⁹ Nanscarifiai manifoldi cuyoaitian Diospan oinmatifo afu nai muran icafo nococashon nan chacafo yafi sharafo pashcanan huashcani. ⁵⁰ Ascashon nan chacafoti chi urumanhuan muran ato potashquin nannoashu uaiqui fasi omitsiscapashanonfo, —ishon Jesús ato yoini.

⁵¹ Ascatan afu rafuafonon Jesús noco yocaiton, —¿Un mato yoia cuscan nantifi man man tapiamun? —ishon noco yocaiton. —Ai. Min noco yoiai cuscan nantifi man non tapiaran, —non huaiton.

⁵²—Ratoran futsafoan Moisés yononi cuscan tapimamisifo nan Diosin ahuun yorafo iquinai cuscan tapiafo. Ascan nanfofin nan mafo inanmitsamisi cuscarafuquin. Mafo inanmitsamisiton yorafo nan yopaifo cuscan inantiro. Ahuara shunifo iyamarai funa ato inantiro. Nanscarifiai tsoan Moisés cununi cuscan yafi un mato rama Diospan yorafohuunoa tapimanai cuscan huafain marifi man futsafo tapimatiroran, —ishon noco yoini.

Jesús afanan Nazaret ano cani

Mr 6.1-6; Lc 4.16-30

⁵³⁻⁵⁴ Ascano noco yoia cuscan ahuaara futsa tapinonfo anaititan Jesús nan pushconi pushurasi ano nasoni. Ascatan Israelifoan aton ichananti pushu muran iquishon ato yoiaiton ahuun tsain nicacani mustairicatan yoinifo, —¿Ahuuscai na nocofunun fasi tapi shara-coianmun? Tsoan atiroma cuscan huapauquifin atiroquin. ¿Tsoanco Jesús as-cara tapimanamun? ⁵⁵ Nanfin ihui sapa yonomisiton ahuun facuquin. Ahuun ahuan Maria. Ahuun ushtofori Santiago yafi José non Simón non Judas. ⁵⁶ Ahuun poifori no fu imisifo. Man nonfin Jesús onanquin. Aacai ahuaara. ¿Ascan ahuus-cashomun ahuaamamishti huatiroquin? —icashu yoinannifo. ⁵⁷ Ascashon nannori ahuaara shinanchacaquicai tsoan icoinra huapainima.

Ascaiton Jesús ato yoiqui isca huani, —Nantifi mai anoshon Diosin tsain yoimisiton yoiai cuscan nicapaitirofo. Ascafia nan cainni anoshon fusticai tsoan nicapaitiromaran, —ishon ato yoini.

⁵⁸ Ascano nannoshon icoinra huaiya-maifoan tsoan atiroma cuscan fustirasi huani.

**Juanpan yorafo unu muran
iquimapacutan nani cuscan**

Mr 6.14-29; Lc 9.7-9

14¹⁻² Ascano nantian Herodes nan Galilea mai anoa ato niaifoan Jesushuunoa nicaquin ahuun oinmatifo yoini isca huaquin, —Nanfin Juanqui. Un tushtumayamua afanan man funia. Ascashofin Diospan curushuunshon tsoan atiroma cuscan huafafainiquin, —ishon ato yoini.

³⁻⁴ Herodes Juan rutumanataima yoiqui isca huani, —Niaifo Herodes, min ushto Felipe ahuun ahuin min fia. Ascaquicai min shara huama. Nocon shuni Moisés Diosin tsain cunuqui isca huani, “Futsan ahuin min fitiromaran,” ishon Moisés cununiran, —ishon Juanpan Herodes yoini. Ascaiton nicai Herodes fasi sinacoinquin ahuun ranushumuafo yononi Juan achishon cunu muran iquimanonfo. ⁵ Ascashon Herodes Juan ruturiscapaifiaquicai funa rutunima yorafoanmain Juan fuchipaiyifoanfin. Ascashon nanfoanri yoinifo, —Juanfin Diospan tsain yoimisiquin, —ishon ahuunoa yoinifo. Ascacun Herodes shinanquin isca huani, —Un Juan rutucun ua yorafoan asca huatiroran, —ishon shinanni. Yorafoqui ratuquin Herodes Juan cunu muran iquimafashocai funa rutunima.

⁶⁻⁷ Ascano Herodes cainnitian yorafo ichananni fuusishcaquin. Ascashu ichananfoanno Herodías ahuun facu shomaya arusu aton ointaifi mononi. Nan Herodías Herodes ahuun ushto ahuin ini. Ascashu shomaya monoaino Herodes fasi unimacoinquin yoini, —¡Aicho! Min monoai cuscan un fasi miqui unimai. Ahuarashta fipaiquin ua yoihuu un mia inanon. Diosin tapia un mia icon yoiaiton min fipaiyai cuscan un mia inantiroran, —ishon yoini.

⁸ Ascashon cashon shomayaton ahua yoini. Ascacun nan ahuan yoia cuscan nasocura niaifo Herodes yoini, —Juan nan yorafo unu muran iquimapacumisi tushtuhuu. Purato naratashon ahuun mapo ua inanhuun, —huaino.

⁹ Niaifon Herodes puusinima. Puusitama ahuun nomuran shinanqui isca huani, — ¡Ohua! Un Juan tushtumapaima. Ascafia yorafoan un shomaya yoia cuscan man nicafo. Ascacun un asca huapaiyamafiaqui un aquicairan, —ishon shinanni.

¹⁰ Ascashon niaifoan ahuun ranushumua yononi, —Juan tushtushon ahuun mapo ua fushotahuun, —huani. ¹¹ Ascaino cashon ranushumuaton Juan tushtushon ahuun mapo purato naratashon funi. Fushon niaifo inancun nan niaifoanri shomaya inanni. Ascano shomayaton arifi ahua inanni. ¹² Ascashon afu rafumisifoan Juan nicacani focashon ahuun caya mai huanifo. Ascatan focanashu Jesusqui chaninifo.

Jesús cinco mil nocofunufu pimani

Mr 6.30-44; Lc 9.10-17; Jn 6.1-14

¹³ Ascashon Herodes Juan tushtuma nicai Jesús shashon tsoa icama ano can. Jesús caa nicacani pushufoti anoashu yorahuanrasiton naman mufainifo. ¹⁴ Ascashu nocoquin Jesús oian yorahuanrasi oin atohuun ramapaini. Nannoshori isinincai futsafo ato cayahuapacuni.

¹⁵ Ascano man fari caino non afu rafuafo aqui cashon non yoini, —Yorafo nichihuun. Man fari caiquin. Fonaincaniquin. Pushurasi ano yafi a chaima icafoanno ato nichihuun anoshon tushu huanonfo, —ishon non yoini.

¹⁶ Ascaiton noco cumani, —Ma. Noncai ato nichima. Mafirocon ato piimacahuun, —noco huaiton. ¹⁷ —Nonfin nuno misi siete yafi shiman rafu ayaquin, —ishon non yoini.

¹⁸ Ascaiton, —Ua fishotacahuun, —noco

huani. ¹⁹Ascashion yorahuanrasi yoini, —Nanno faasi camaqui tsaocahuun, —ato huani. Ascatan shiman rafu yafi misi mucu fustiti tsomashon nai ari foisinifoantan Apa Dios cufinquin, —¡Aicho! Upan, mihuunshon un ato pimai. Min fasi sharacoincun, —huatan. Misi torupacutan shiman rafu ya osishon noco inanni non ato pashcanan huapanon. ²⁰Ascashion picaní mayancoinnifo. A picaquin tushu huafonon afu rafumisifoan doce shihuati fospi huani. ²¹Nan piaifo cinco mil nocofunufosi ini. Ainifo yafi facufocai non tanan huanima. Ascananfoanri ato futan piinifo.

Jesús unu fumancayan cani

Mr 6.45-52; Jn 6.16-21

²²Ascashion ato pimaquin anaititan Jesús noco yoiquin isca huani, —Shashon rufofo oquiri pocui focahuun. Un na yorafo ato nichiyonon, —ishon noco yoini. ²³Ascashion man ato nichiqui anaititan arus fusti machi ano caashon Apa Dios fu tsainni. Man fari caino arus fusti ini. ²⁴Ascatan afu rafuafo shasho caino ian nushmancayan nocoqui fuuhuan noconi. Ascashu ian fuchoquin noco catima huani.

²⁵Ascashu man faquishianon oian Jesús ian fumancayan nocoqui ofiaitocai non onannima. ²⁶Onanshma ratucoin non fiisini. “Yoshiran,” icashu non fiiscaiton. ²⁷—Unqui. Ratu Yamacahuun, —ishon Jesús noco yoini.

²⁸Ascaiton Pedronun yoini, —Ifon, minmainquin uarifi mia ano cunahuu. Urifi un ian fumancayan canon, —huaiton. ²⁹⁻³⁰—Ohuu, —Jesús huaino Pedro shasho naquinoashu fotopacucuhuan ian fumancayan Jesús ari caafian oian fuunhuaquin ian fuchoaiton oin ratui iquipacucuhuanqui yoini, —Ifon, ua ari mutsoinifoanhuun, —Pedronun huani. ³¹Ascaiton Jesús samamashta

mutsoinifoanquin yoini, —Miancai ua icoinra huacoinnama. Ahuuscaquimun mian icoinra huamaquin, —ishon Jesús yoini.

³²Ascantan nan rafu shasho muran nanuinifoanafono fuu nishmapacufoanni. ³³Ascano non shasho muran noafo fasi aqui unimacoquin non yoini, —Iconfinquin min Diospan Facu, —ishon non yoini.

Genesaret anoshon Jesús isinincaifo ato caya huapacuni

Mr 6.53-56

³⁴Ascatan ian pocufaini Genesaret ano non noconi. ³⁵Ascashu non nocoaiton nannoafoan samamashta Jesús onan-cashon a chaima icafori ato tapimanaino nicafuracani fucaquin aton yora isinincaifo Jesusqui ihuunifo. ³⁶Ascano fucashon Jesús yoinifo, —Noco yora isinincaifo min sahuuti cupanan fusti ato muumahuu cayanonfo, —ishon yoinifo. Ascatan ahuu sahuuti muuncanashu cayapacunifo.

Nocofunun ahua chaca huatiro cuscan

Mr 7.1-23

15 Ascano Fariseofo yafi Moisés cununi cuscan tapimamisifori Jerusalén anoashu Jesusqui funifo. ²Fucashon yoinifo, —¡Ahuuscaimun nocon shunifoan piataifoma muchoquimupaonifo cuscaicai mifu rafuafoan asca huapaicanimaran? —ishon yoiainfo. ³Jesús arifi ato yocani, —Ascan ahuuscaicai marifi maton fuyamisi fustisi man tanapaiyain. Ascashofin Diosin yononi cuscan huatamarocon nan maton shunifoan amaqiri yosimisifo cuscan marifi man nansca huamisiquin. ⁴Ascacun Upa Diosin yonoqui isca huani, “Maton upa yafi uhua nicasharafain ato shara huacahuun. Ascan tsoan

apa iyamarai ahuaqui tsain chaca huacun ato rutumacahuun,” ishon yononi. ⁵⁻⁶Nannori yononifianicun manfin noco yorafo yoiquin isca huamisiquin, “Maton upa iyamarai mato uhua man yoiqui isca huatiro, ‘Nantifi uhuun pui un aya cuscan mun Dios inan. Ascacun un mia ahua inanpaifiaquicai un mia inainmaran,’” ishon yoiquicai mato upa yafi uhua man afanan ahua inantromaran, ishon man fasi ato amaqiri yoimisi. Anori yoiquicai Diosin yononi cuscaoin man aima. Ascaquifin nan mato fuyamisi fusti man tanaqui. ⁷Ascashufin man paramitsamisifoquin. Nan Diosin tsain yoimisi Isaías inon pacocai cuscan icocoinquin matohuunoa yoiqui isca huani,

⁸“Nan yorafoan uhuunoa yoisharamisi-fiashocai aton nomuranshon ua shinancoianfoma. ⁹Ipaitsi ichananshu fanaincai ua cuficani. Yorafo tapimamisifo cuscaicai Diosin tsaincoima. Nanfoan aton nomuran shinainfo cuscan futsafori yosimisiforan,”

—ishon Isaías cununi.

¹⁰Ascashon nannori Fariseofo yafi Moisés cununi cuscan tapimamisifo ato yoitan Jesús yorahuanrasi cunaquin isca huani, —Uqui fucahuun un mato yoinon. Ua nicafain un mato yoiai cuscan tapisharashcaquin. ¹¹Ahuarafo non piatocai noco ointi chaca huatiroma. Nocofununfin ahuan nomuranshon nan shinain cuscan yafi nan yoia cuscan chaca huatiroquin, —ishon ato yoini.

¹²Ascaino non afu rafuafu aqui cashon non yocani; —¿Ifon, man min tapiamun nan rama min Fariseofo yoiai cuscan nicacani sinacanian? —ishon non yoini. ¹³Ascaiton noco yoiqui isca huani, —Mau ifoancai ahua chacafo fanatiroma. Ascatafa afin foaicun tsucashon potatiro. Nanscarifi

aqui uhuun Upa Dios nai muran icatocai nan Fariseofo yonoama futsafo ahuan tsain tapimanon. Ascacun nanfo chipo omitsiscapanacafo muran ato potashquin. ¹⁴Ascacun nanfo shinanyamacahuun. Fushocai afu fusho raqui iyotiroma. Iyopai afu shato muran pacutiro. Nanscarifi Fariseofoancai Diosin tsain tapishoma futsafo yositiroma atofu funotiro. Ascashu Dios ari tsoa nocopacunacafomaran, —ishon ato yoini.

¹⁵Ascaiton Pedronun yoini, —Min ato yoia cuscan shafacafi noco tapimahuun, —ishon yoini.

¹⁶Ascaiton Jesús noco yoiqui isca huani, —¿Ascan marifimun man nicas-harama? ¹⁷¿Man tapiamamun ahua man piacai mato shaqui muran nituima? Ascatafa manrocon aya poitiro. Ascacun nantocai mato chaca huamatiroma. ¹⁸Ascashon mato nomuran man shinanchacai cuscan huafain yoiashuri man chacacoin itiro. ¹⁹Ascaino aton nomuranshon ahua chaca shinanfo cuscan nanscacooin huatirofo. Shinanchacafain rutumitsamisi icain aton ahuinma fu nocofunufu icaifoanno ainfori nanscarifiainfoanno. Ascashon ahuarari onufain futsahuunoa ahua chaca yoiqui parafain roanmitsamisi itirofo. ²⁰Nan chacafoanfin yorafo chaca imatiroquin. Ascaino noco shunifoan aponifo cuscan muchoquimushoma non piatocai nocon nomuran noco shinanchacamatiromaran, —ishon Jesús noco yoini.

Ainfoan patasharinoaton Cananea anoaton Jesús icoinra huani

Mr 7.24-30

²¹Ascacaini Jesús nocofu anoashu cai nan pushurasi Tiro ano yafi Sidón ano cani. ²²Nannoashu Cananea ano ainfo Jesusqui noconi. Nocoshon yoini, —Ifon, minfin David ahuan funaquin. Uhuun ramapaihuu. Uhuun facu ainfos-

hta fasi omitsiscai. Yoshin chaca ahuun nuushon omitsisca huamisi. Uhuun facu ua caya huashopun, —ishon yoiriani. ²³ Ascaiton nicafiaquicai Jesús cumanima. Ascaiton non afu rafuafoan yoini, —Ifon, na ainfoan mia yocariaquin noco fucash huaiquin nichihuun, —ishon non yoini. ²⁴ Ascashon Jesús ainfo yoini, —Uhuun Upa Diosin ua Israel ano fusti nichini. Nanfomain nan chashoanun facu funoa cuscarafocun. Ascan uacai caifo futsa ano nichinima, —huaiton.

²⁵ Nicaiyainfo Jesús naman ratocounun mai chachipacufoan yoini, —Ifon, uhuun facushta ua cayahuashopun, —huani. ²⁶ Ascaiton Jesús afanan cumani, —Apacai ahuun facufoan tushu pashnafo inantiroma. Ascaracai sharama. Nanscarifi aqui Upa Diosin ua yonoa cuscan un Israelifo fusti un shara huashonon. Ascacuai un caifo futsa ano catiroma ato shara huashoshquin. Un asca huaino nan Israelifo funotiro, —ishon yoiaiton. ²⁷ Ainfoanri yoini. —Icon, Ifon. Ascafia ahuaara piqui tushu huafo sapa camaquinoashu potomishti pacuaiton pashnafoan pitirofo. Nanscarifi aqui Upa Diosin mia Israelifo ano nichini min ato shara huashonon. Ascafia mani futsafori miqui nocoifoan nanfori min ato caya huatiro. Ascashon min ato shara huashoainocai Israelifori funotiomaran, —ishon yoiaiton. ²⁸ —Min ua fasi icoinra huacoinna. Ascacun min ua yoca cuscan un mia ashoiran, —ishon Jesús nan ainfo yoini. Asca huatanaino ainfo ahuun facu cayariscatani.

Jesús yora ichapa isinincaifo ato caya huapacuni

²⁹ Asca huatan anoashu Jesús no fu cai Galilea ian cusumunri cani. Nannoashu cai machi ano inashu tsaoni. ³⁰ Ascano yorahuanrasi aqui funifo. Fucaquin isinincaifo ihuunifo Jesús ato caya huanon. Isinincai futsa futsatapafo. Futsafo ni-

paiqui ranainfo ihuufain fushofo ihuufain ahuun caya mumamafo ihuufain tsaintiromafo ihuufain isinincai futsafori Jesusqui ihuunifo. Ascacun nantifi Jesús ato cayapacuni. ³¹ Ascashon ato caya huaa oincani mustairicatan yorafo afi ranan yoinancaquin yoinifo, —Noncai iscara oinyomisima. Tsaintiromafo natian tsainceni. Ahuun caya mumamafori natian man niisharafo. Nipaiqui ranainfori natian niisharatirofo. Jesusfin ahua-mamishti huatiroquin. Israelifoan nocon Dios fasi sharacoinran, —ishon yoinifo.

Jesús cuatro mil nocofunufu pimani

Mr 8.1-10

³² Ascatan non afu rafuafo noco cunashon Jesús noco yoiqui isca huani, —Un na yorafohuun ramapai. Ufu rafu non fusti oshatan icafo. Afanan tsoa tushu ayama. Ahuashtacai picanima. Ascacun uncai ato tushuoma nichipaima. Fasi fonainceni shaca fuatiroforan, —ishon noco yoini. ³³ Ascaiton non cumani, —Nuno tsoa icamanocai non tushu fuchitiroma na yorahuanrasi pimashquin, —ishon non yoiaiton. ³⁴ Noco yocani, —¿Ahuuti misi man ayamun? —noco huaiton. —Siete non shiman rananri non ayaran, —ishon non yoini.

³⁵ Ascaiton Jesús yorafo yoiqui isca huani, —Nanno tsaocahuun, —ato huani. ³⁶ Ascatan ato yoia cuscan tsaofoanno Jesús misi siete non shiman rananri finifoantan Apa Dios cufini, —¡Aicho! Upan, mihuunshon un ato pimani. Min fasi sharacoinquin, —huatan. Misi yafi shiman torupacutan non afu rafuafo noco inanni. Ascacun yorahuanrasi norifi non ato pashcashopacuni. ³⁷ Ascashon nantifiton picani mayancoinnifo. Ascano man piqui tushu huafo siete shihuati non fospi huani. ³⁸ Ascan nan piaifo cuatro mil nocofunufuosi ini. Ainfofo yafi facufocai non

tanan huanima. Ascafia nanfoanri ato futan piinifo. ³⁹Ascatan Jesús nantifi yorahuanrasi nichitan. Noco nanuquifaini cai mai futsa ahuun anu Magadán ano no cani.

Fariseofo futan Saduceofoan Jesús yocanifo, —Tsoan atiroma cuscan noco ismahuu, —huanifo

Mr 8.11-13; Lc 12.54-56

16 Ascashu Magadán ano man non nocoano Fariseofo yafi Saduceofofori Jesusqui funifo. Ascano fucashon yocanifo. —Minmain Diospan facucoinquin nan Diosin nai aria icahuunshon tsoa atiroma cuscan noco ismahuu non mia icoinra huanon, —ishon yoinifo. Ahuunoa ahudara chaca ato niaifofo yoipaicaquin. ²Ascaifoan Jesús ato cumani, —Manfin yoiquin isca huamisiquin, “Man fari caino imi poshnan. Ascan funamanrifi nai shara itiroquin,” ishon man yoimisi. ³Ascashon shafaino nai choshtacun man yoimisi, “Nai choshtapan fupoa. Ascan natian oi fuiran,” man huamisi. Ascashon nai foisquin man tapitiro oi fuyamaraimain ahuiscaquin. Ascan ahuiscaquitsi Diosin mato yoi ai cuscan man icoinra huapaima. Natian ahudara ahuiscaicai cuscaicai man tapiama. ⁴Man ua icoinra huayamafain chacafashon man ua yocai. Ascafia tsoan atiroma cuscan un Diosihuunshon huatirofiacai un mato ismaima. Man oinpaifiaiton. Nan Diosin Jonás ani cuscan nan fusti man chipo oinshquiran, —ishon Jesús ato yoini. Ascatan atomaquinoashu cani.

Fariseofoan yositirofo cuscahuunoa

Mr 8.14-21

⁵Ascano man ian pocufaini cashon non shinanni, —Non tushu ointiaquimacuranaran, —ishon non yoini. ⁶Non ascaiton onanshon Jesús noco yoini, —Oinfain. Fariseofo futan

Saduceofoan aton misi farashati cuscara fiyamacahuun, —ishon noco yoiaiton. ⁷Nicai nofi ranan non yoinanni, —¿Ahuuscaimun Jesús noco yoiqui isca huaiquin, “Fariseofo futan Saduceofoan aton misi farashati fiyamacahuun,” noco huai? Non tushu fucuma racan noco isca huaiquin, —icashu non yoinanni.

⁸Ascano nan non yoi ai cuscan onanshon Jesús noco yoini, —¿Ahuuscaquimun tushuhuunoaasi man yoicai? Mancai ua icoinra huaa sharacoiantaima. ⁹Ascashon mancai tapisharataima. ¿Un mucu fustiti misihuunshon cinco mil nocofunufu un pimaita nan man shinainmamun? ¿Ahuuti shihuati fospia tushuita man ointiaquimamun? ¹⁰¿Nan siete misihuunshori un cuatro mil yorafo pimaita nanri man man ointiaquimanamun? ¿Ahuuti shihuati fospia tushuitamun man ointiaquimamun? ¹¹¿Ascan ahuiscai un mato tushucoihuunoa yoiyamafiaiton man tapimamun? Unfi tushuhuunoa yoi cafisca huaquin nan Fariseofo futan Saduceofoan yosiaifo cuscahuunoa un mato yoiqui, —ishon noco yoini. ¹²Ascashon Jesús noco yoi ai cuscan nicaquin non tapini tushucoihuunoa yoitama naan Fariseofo futan Saduceofoan noco amaquiri tapimapaiyai cuscan Jesús noco yoini.

Pedronun, —Jesús Diospan facuran, —huani

Mr 8.27-30; Lc 9.18-21

¹³Ascatan Jesús no fu mai futsari cani. Nan mai ahuun anu Cesarea Filipino. Nanno nocoshon Jesús noco yoini, —Unfin Diospan Facufiashu un nocofunucuinquin, —ishon yoitan afanan noco yocani, —¿Yorafoan shinanmun un tsoaquin? —ishon noco yocaiton. ¹⁴Non cumaquin

isca huani, —Futsafoan yoiiafin min Juanquin. Nan yorafo unu muran iquimapacumisi, ishon yoiiafoanno futsafoanri yoiquifin min Eliasquin. Ascano futsafoanri yoiiafo minfin Jeremiasqui. Ascan futsafoanri yoiiafo minfin nocon shunicaifo Diosin tsain yويمisi futsa afanan funiaquin, —ishon noco yoiaiton. ¹⁵ Afanan noco yocani, —¿Asca marifi man shinanmun un tsoaquin? —noco huaiton. ¹⁶ Ascaiton Pedronun cumani, —Minfin Cristoquin. Nan Diosin nipanacaton mia catonni min ahuun facuran, —ishon yoaiton. ¹⁷ Ascaiton Jesús cumani, —Simón, minfin Jonás ahuun facuquin. Diosin mia noiquin mia shara huua. Rato nocofununcai mia tapimanama un Diospan facu. Uhuun Upa Diosin nan nai muran icaton mia tapimana.

¹⁸ Un mia afanan yoi. Minfin Pedroquin, —ishon Jesús yoini. Ascan Pedrofin Israeli tsainman toquirininhuan. Tsoan putsiquitiroma. Ascasho Jesús afanan yoiqui isca huani, —Min yoiacuscahuunshon futsafoan aarifi icoinra huashquicani. Ascaiffoan uhuun yorafo un ato imashquin. Yoshin chacafoan aaton curush huahuunshon ato namapaifi-aquicai ato shatuyamafain aato finon-tiroma. ¹⁹ Tsoan shafi ya fupoti fuputiro yorafo pushu muran iquimashquin. Nanscarifi aquin un mia yonoi uhuunshon min yorafo uhuunoa yoitiro uhuun yorafo inonfo. Ascashu uhuun Upa icano iquitirofo. Min yorafo yosiai cuscan tsoa nicacasmai uhuun yora itiro Upa Dios fu ipashcaquin. Nannori Diosin yoini. Ascan min yorafo yosiai cuscan tsoa icoinra huai uhuun yora itiro Upa Dios fu ipashquin. Nannori Upa Diosin yoini. Ascacun un mia yonoi min futsafo tapimatiro Upa Dios icano iquinonfo. Un mia shafi inain cafisca huai min ato fupushotiro iquiashu afu ipanonfo. Ascashon tsoan min yoiiai

cuscan icoinra huayamashocai iquitiroma afu ipashquin. Ascan tsoan min yoiiai cuscan icoinra huacoinnashu afu ipashquin, —ishon Jesús Pedro yoini. ²⁰ Ascatan non afu rafuafo futsafori noco yoiqui isca huani, —Unfin Cristoquin tsoa yoiyamacahuun, —noco huani.

—Unfin chipo naashquicai,
—ishon Jesús ato yoini

Mr 8.31–9.1; Lc 9.22–27

²¹ Ascatan nantian yafi nan achiaifotian Jesús noco shafacafi yoiqui isca huayofafainpaoni, —Un Jerusalén ano cai. Nannoshon nocon niaiffoan ua omitsisca huafain ua ato rutumafiafo osha rafu non fustitan un afanan funishquiran, —ishon noco yoini. ²² Ascaiton Pedronun Jesús mutsofaitan yoini, —Ifon, ascayamahuu. Miacai tsoan rutupacunacama, —huaiton.

²³ Jesús ifiacucahuan Pedro yoini, —Satanás catahuun. Min ua amaquri shinanachacamapai. Upa Diosin shinain cuscaiai shinantama nan nocofunuffoan shinainfo cuscan min shinanran, —ishon Jesús yoini.

²⁴ Ascatan non afu rafua futsafori noco yoiqui isca huani, —Tsoan ua tanapaisharaquicai afi apaiyai cuscan huatiroma. Ascataama nan un yoiiai cuscaicoi huatiro. Ascashon shinanqui isca huatiro, “Ua omitsisca huafiaiffoanno uncai uhuun Ifo potapacunacama. Ahuunshon ua rutufiaiffoanno un tanaqui unupacunacamaran,” ishon man shinantiro. ²⁵ Ascan tsoan shinanqui isca huai, “¡Ohua! Un Jesús tanaiton raca ua omitsisca huacanicati,” ishon shinanquin uhuun tsain cachiquiri huua. Nanscara yorafo naashu omitsiscapanacafo. Ascan tsoa uhuunoashu omitsiscacai naa. Nanscara yorafofin nacanashu ufu isharpacunacafoquin. ²⁶ Ascan ratoran futsa nantifi manifoti anoafu ahuaia fia ahuanacoin ifiashu amaqi naino nantifi

ahuunafo funotiro. Ascashu nantifi ahuuna iyopaonifia omitsiscapanacafo muran cainocai afanan ahuashta itiro. Ahuaracai Dios inantiroma afu ipashqui.

²⁷ Ascatan un chipo nai murannoashu mai ano fotoaino nan uhuun Upa cuscaracoin iishqui. Ascashu un chasha curanaino uhuun oinmatifo ufu nai muran icafo ufu fotoshceni. Nantianri un nantifi yorafoan aton niaifocoin iishquin. Ascashu nan yorafoan acafo cuscan un ato inanpacushquin. Nan shara huamisisifo un ato inansharafain un ato unimamashquin. Ascan nan chaca huamisisiforica un ato ahua inansharashquima. ²⁸ Ascacun icon un mato yoi. Man futsa nuno ufu niaton naataishoma un maton niaifo Upa Dios cuscaracoin un icaiton man oinshquiran, —ishon Jesús noco yoini.

Jesús fianananriscatani

Mr 9.2-13; Lc 9.28-36

17 Ascano man seis osha finontan Jesús Pedro non Juan non Santiagori machi cuya pochininshon ato iyoni. ² Ascan nannoashu aton ointaifi Jesús ahuun yora mumacoin fianananriscatanaino ahuun fusori fasi chashacointani. Nan fari chashai ointsa. Ahuun sahuutiri oshopacoin nan yoa rama furoa ointsa ini. ³ Ascaino nantianri Moisés yafi Elías aqui niriscatanifo. Ascashu nan rafu Jesús fu tsaincaiton oinnifo. ⁴ Ascaiton Pedronun yoini, —Ifon, nuno non icashara itiro. Man ascapaiyaiton un mato tapasi rafu non fusti huashotiro. Mina futsa non Moisésna futsa non Eliásna futsa un mato ashotirotan, —ishon yoini.

⁵ Ascashu Jesús fu tsaincaino coin osho sharacoin atoqui cuyopacuni. Ascaino coin murannoa oi nicanifo yoiqui isca huaiton, —Nanfin uhuun Facuquin. Un fasi ahuun noi. Nanfin un catoanquin. Un aqui unimacoin. Ascacun a nicacoincahuun, —ishon

Upa Diosin yoini. ⁶ Ascaiton nicacani fasi ratucoincani fuopacufoannifo. ⁷ Ascaifoan Jesús ato pumanqui yoini, —Funicahuun. Ratucaquima, —ishon ato yoini. ⁸ Ascaiton foisinifoanquin oianfo Jesús fusti nia ini.

⁹ Ascatan machi pochininnoashu fotoshon Jesús ato yoiqui isca huani, —Nan man rama oian cuscan tsoashta yoiyoyamacahuun. Nan un naashu afanan funiano man rama oian cuscan man yorafo yoitiroan, —ishon ato yoini.

¹⁰ Ascaiton nicacaquin afu rafuafo yocanifo, —¿Ascan ahuuscaquimun Moisés cununi cuscan tapimamisifoan noco yoimisifo isca huaquin, “Nocon Numamisi Cristo nan Diosin catoan nocoqui oataima rufoto Elías oshquiran,” ishon noco yoimisiforan? —huaifoan. ¹¹ Jesús ato yoini, —Icon. Elías rucun oitautiro. Oshon nantifi ato imasharapai aton chaca shatunonfo. ¹² Ascan man ofiacucai tsoan onannima. Nan chaca huapaiyairo cuscan fusti nan chaca huanifo. Nanscarifi aquin ua omitsisca huashcaniran, —ishon Jesús ato yoini. ¹³ Ascaiton nicacani afu rafuafoan shinantani nan Juan yorafo unu muran iquimapacumisihuunoa ato yoiái cuscan tapinifo.

Jesús furonanfacuahuunoa yoshin chaca nuua caya huani

Mr 9.14-29; Lc 9.37-43

¹⁴ Ascatan machi anoashu fotocuranaino yorahuanrasi aqui noconifo. Ascaino nannoshon nocofunun ratoconun mai chachipacufoan Jesús yoini, ¹⁵ —Ifon, uhuun facuahuun ramapaihuu. Yoshin chaca ahuun nuushon fasi omitsiscamai. Chii muran potafain unu muranri potatiro. ¹⁶ Uhuun facu mifu rafuafo ano un iyofiacai tsoan caya huama, —ishon yoiáiton. ¹⁷ Ascaiton Jesús non afu rafuafo noco yoini, —¡Ohua! Mancái ua icoinra

huacoinnama. Man fasi amaquiri shinanmisi. ¿Ahuutia un matofu icamun man ua nicayamacaiyai? —ishon noco yoini. Ascatan facun ahuun apa yoini, —Min facu ua ihuushonhuun, —huani. ¹⁸ Ascaiton furun ihuushocun Jesús yoini, —Minfin yoshin fasi chacacoinquin. Na facumaquinoashu catahuun, —ishon Jesús curushcain yoiaino cayariscatani.

¹⁹ Ascatan non afu rafuafosi Jesús fu tsaintan non yocani, —¿Ahuuscaimun norifi non yoshin chaca facumaquinoa potamaquin? —ishon non yocaiton.

²⁰ Noco afanan yoini. —Manfin ichapama ua icoinra huaaquin. Ascacun un mato icon yoinon. Nan mostaza ushu uhuapamashtacoinfia foaicashu yosia uhuapacoin itiro. Nanscarifiai man ua ichapama icoinra huaquin tau huatiro. Ascan chipo uhuun tsain maton nomuran nanucoinshon man ua fasi icoinra huaqui finacointiro. Ascashon man machi yoitiro shucucaitahuun man huaino shucucaini futsa ano catio. Ascaino ua icoinra huacoinshon nan man apaiyai cuscacoin man huatiroquin. ²¹ Ascan man Upa Dios cufiyanan piqui tunuyamashocai nan na cuscara yoshin chaca man potatiromaran, —ishon Jesús noco yoini.

**Jesús nashquiai
cuscan afanan yoi futsani**

Mr 9.30-32; Lc 9.43-45

²²⁻²³ Ascatan Galilea ano nocofu caquin afanan Jesús noco yoiquin isca huani, —Un mato yoimisi cuscan afanan un mato yoi. Futsan ua ato achimashquin ua rutunonfo. Ascafia osha rafu non fustitan un afanan mai murannoashu funishquiran, —ishon Jesús noco yoini. Ascaiton nicaquin non fasi shinancoinni nocon nomuran noconi.

**Israelifoa pui inantiro cuscan Dios
fu tsainti pushu cushusharanonfo**

²⁴ Ascatan nannoashu non cai Capernaum pushurasi ano non noconi. Nanno non nococun nan Dios fu tsainti pushu murannoa pui fimisifoa Pedro yocainfo. —Man min tapia nocon caifoa faritifi pui inanfo Dios fu tsainti pushu muran yonoafoan nan yopaifo cuscan ahuun finonfo. ¿Ascan mato Ifo Jesús arifi man inanmismun? —ishon Pedro yocainfo.

²⁵ Pedronun ato cumani, —Aifain. Naanfin inanmisiquin, —ishon ato yoini. Ascashu Jesús man pushu muran iquiano Pedro arifi iquini. Ascaiton Jesús Pedro yoini. —¿Maifoti anoa niaifoafoanmun ahuun caifocoin pui fiapai iyamarai mai futsa ariafo yocaiqui? ¿Pedro, asca min raquiri shinainmun? —ishon Jesús Pedro yocaiton. ²⁶ —Mai futsa ariafo fiantiroran, —ishon Pedronun cumani. ²⁷ Ascaiton yoini, —Min ua cuma cuscan iconfia non na pui fimisifo nocoqui shinanchacamapaima. Ascacun ian ano catahuun shuamaquin shiman fiishquin. Ascashon ahuun shaqui murannoa toro fuchishon min fitiro uhuuna yafi mina nan Dios fu tsainti pushu murannoa pui fimisifo nocohuunshon ato inanshquin, —ishon Jesús yoini.

**Ratotocaimun Dios
icari fasi finoncoianquin**

Mr 9.33-37; Lc 9.46-48

18 Ascaiton non Jesús yocani. —¿Ifon, ratotocaimun Dios icari fasi finoncoianquin? —ishon non yocaiton.

² Jesús facu cunani, —Facushta, nuri ohuu, —huaino ocun ato nastui nimani. ³ Ascashon ato yoini, —Un mato icon yoi. Man shinan futsayamashu nan facu cuscara man iqui. Man ascayamacai Dios

icari man noconacama. ⁴Ascacun na facu apa yafi ahua nicafein icoinra huatiro cuscan ratoran futsan ua icoinra huacoinnashu nanfin uhuun Upa Dios icariashu fasi finoncoian iishquiquin. ⁵Asca ratoran futsan uhuunshon facufo shara huafin nan uari shara huai cafisca huai.

**Futsafoan noco chaca
huaquinaino fasi musucoin**

Mr 9.42-48; Lc 17.1-2

⁶Ascacia ratoranfoan ua icoinra huafuna futsan chaca huamai nancaifin fasi onaintimaquin finacoinquin. Chaca huamataima toquiriya tunushushon unu noacoin muran potafin shara icuanaquin. ⁷Ascano nan icoinra huamafoan futsafo chaca huamamisi. Ascacia nanfocafin fasi omitsiscacoinshcaniquin. Ascashon mato chaca huamapaifafaincani. Ascacia nan futsa chaca huamafocafin fasi omitsiscacai finacoinshcaniquin. ⁸Ascano mato mucuman man chaca huacun mushatumushon potacahuun afanan chaca huashquima. Man raquiria caquin chaca huashon mato tau shatuhuu potashquin afanan chaca huashquima. Man mumamafishu Dios icano caafin sharacaiqui. Mumafishu man omitsiscapanacafo muran cacuana. Nanno chii urumanhuan matsinacama. ⁹Nanscarifiai ahua oinquin chaca huashon mato furo tsucahuu potashcaquin afanan chaca huashquima. Niyoashu furo fustiya man Dios icano caafin sharacaiqui. Ascan niyoashu furo rafuya man omitsiscapanacafo muran cacai sharama. Nanno chii urumanhuan matsinacama.

**Chashoan fusti funoahuunoa Jesús
ato ahua futsa tapimani**

Lc 15.3-7

¹⁰Facufohuunoa isca huaqui shinanyamacahuun, “Na facucahuamaran,” ishon atohuunoa shinanyamacahuun. Un mato cayacafiyoi Upa Diosin ahuan oinmatifoan facufo cushusharafafainmisifo. Nan oinmatifori Upa Dios fu ifafaincani. ¹¹Ascacun nantifi yora funofo numayoifin un oquin. Ascashon un aton chaca soashona isharapacushanonfo un oni.

¹²Ascano un mato yoinon. Ratoran futsa cien chashoan ayafiano fustishta amaqui funoano atirifi nan noventa y nueve faasi fununun potayofaintio a fusti funoa funayoicaquin nan fuchi-aitian. ¿Ascan man ahua cuscara shinantiromun? ¹³Ascashu noventa y nueve ahuan chashoanfoqui unimafiaicai nan funoa fusti fuchiaquicaifin fasi unimai finacoinquin. ¹⁴Nanscarifiai maton Upa Dios nan nai muran icatocai nan ua rama icoinra huafo fustishta funopaima.

**—Ahuuscashumain Diospan
yora rafu raunantirofoquin,
—ishon Jesús ato yoini**

Lc 17.3

¹⁵Ascacun tsain futsari un mato yoi. Ua icoinra huaa futsan mia chaca huacun aqui cashon mia chaca huaa cuscan nan fusti yoihuu. Min yoiyai cuscan nicashquin yoinon, “Ai. Mian yoiyai cuscan icon. Un mia chaca huaa. Ascacun ua rau huapun,” ishon yoitiro. Ascaquifin mihuunoashu afanan Diosqui nasoaquin afanan mifu rafushquin. ¹⁶Asca min yoiyai cuscan mia nicacasmaiton icoinra huaa fusti iyamarai rafu iyohuu nan nocofunun yoiyai cuscan nicaquin arifi icoinra huanonfo. ¹⁷Ascacia nan

rafuri nicapayamaiton icoindra huafo ichanainfotian nannoshon nantifi tapimahuu. Asca nan ichananfori nicascamaiton nanfoan yoitirofo, “Aacai afanan Diospan yoracoin cuscaramaran,” ishon.

¹⁸ Ascacun un mato icon yoi. Ahuara man nunoshon yoia cuscan arifi Dios nan icanoshon nannori yoi. Nanscarifiai man ahudara nunoshon yoiyamaino arifi Dios nan icarishon yoitirofo. ¹⁹ Afanan un mato yoi. Man rafu nuno mai ano ichananshon nannori rafu shinanqui man ahudara yocaiton nan uhuun Upa Dios nai muran icaton mato ashoshqui. ²⁰ Ascashu rafu iyamarai rafu non fusti yora ua icoindra huashu ichanainfoanno urifi un atofu ichanainran, —ishon Jesús noco yoini.

²¹ Ascaiton Pedronun yocani —¿Ifon, futsan ua chaca huafafainaitomun un rau huaquin ahuuti huatiroquin? ¿Siete un rau huaquin huatiromun? —huaiton. ²² Jesús cumani, —Ma. Siete huaquima. Nan mia chaca huafafainaiti min rau huatiroman, —ishon yoini.

Oinmatinin futsa rau huapainimahuunshon ato yoini

²³ —Ascacun un mato yoiai cuscan nanfohuunshon man tapitiro ahuu cuscaramain Diosin ahuan yorafo iquifain ato yonotiroquin. Isca huaquin mato tapimai. Niaifoan ahuan oinmatifo cunani nan niaifo cuscan inanonfo. ²⁴ Ascano nan oinmati futsan ahuan niaifo fasi ichapacoin millones nificun aqui ihuunifo. ²⁵ Nan nifian cuscacai ahua inantiro inima. Ascacun ahuan niaifoan yoiqui isca huani, “Min ua ahua inantirofo. Ascacun un mia niaifo futsa inain min ahuan yononmati inon. Nanton mihuun rafanan ua pui inanon. Ascacun un mia inanfain min ahuan yafi min facufo non min maforifori nantifi min aya cuscan un inanmit-

sai ahuan rafanan min ua nifian cuscan fiishquin,” ishon niaifoan yoiaiton. ²⁶ Nicaquin oinmatinin ahuan ratocounun mai chachishon yoiqui isca huani, “Ifon, uhuun ramapaihuu. Funayamaupun. Un mia nifian cuscafin un mia chipo nantifi inainqui,” ishon yoini. ²⁷ Asca huaiton nica niaifo ahuan ramapaiquin yoini, “Afanan ratuyamahuu. Natian min ua nifian cuscan un afanan shinainma. Min ua inanyamafaiton nantifi un soai min ua afanan nifinonma. Ascacun casharatahuun,” huani.

^{28–29} Ascano niaifoan ahuan pushu murannoashu caqui afu oinmati futsa fuchini. Nantori nan ichapamashta nifian ini. Shafa fusti yonona nifian ini. Ascaciacun aqui nocoshon tumosfain achishon yoini. “Mian nifian cuscan ua inanriscahuu,” huaiton ratoconun mai chachishon yoini, “Funayamaupun. Un mia inanon,” huani. ³⁰ Asca huafaiatocai futsa manapainima. Ascata futsanrocon cunu muran iquimani nan nifian cuscan inaintian amuran iyonon. ³¹ Ascaiton oincani oinmati futsafo fasi ahuan ramapaicoinnifo. Ascano focashon nan acaiton oian cuscan niaifoqui chaninifo. ³² Ascano focashon yoiaifoan nicaquin niaifoan ahuan oinmati cunashon yoini, “Minfin fasi chacacoinquin. Mian fasi ichapacoin nififashon min yoiqui isca huaa, ‘Ifon, manayopun. Un mia nifian cuscan un mia inanon,’ ishon mian yoiaiton un mia nantifi soashona. ³³ Ascacun un mihuun ramapaia cuscan nanscarifi aqui mifu oinmati futsa min ahuan ramapaia shara icuana. Ascata marocon min ahuan ramapaiamaran,” ishon niaifoan yoini. ³⁴ Ascashu fasi sinacoinquin niaifoan oinmati cunu muran iquimafain fasi onaintimashqui. Ascashon ahuan oinmatifo yonoqui isca huani, “Nan ua nifian cuscan nantifi ua inanyamaiton cunu muranshon cain-

mayamacahuun,” ishon nan yora omitsisca huamisifo ato huani.

³⁵Nanscarifi huaquin ratoran futsan mato chaca huafiacun man ato rau huayamaino niaifoan ahuun oinmati chaca onaintimana cuscan huafain nanscarifi aquin nan uhuun Upa Diosin nai muran icaton matori onaintimashquiran, —ishon Jesús noco yoini.

**Nocofunu yafi ainfo
ununantirofohuunoa Jesús ato yosini**

Mr 10.1-12; Lc 16.18

19 Ascano tsainqui anaititan Jesús nocofu Galilea anoashu Judea mai unu Jordán ocuma futsa cani. ²Ascaiton yorahuanrasiton mufaincun nannoshon nan isinincaifoti ato caya huani.

³Ascaino Fariseofo Jesusqui funifo. Amaquiri cumamapai fucani. Ascacun yocanifo, —¿Moisés cununi cuscan nocofunun ahuin unupaiquin unutiromun? ¿Nocofunun ahuin ahuuscarashta aiton unutiromun? —ishon yocaifoan.

⁴Jesús ato cumani, —¿Man Moisés cununi cuscan oinmisimamun? Diosin nantifi onihuani. Tau huaquin nocofunu yafi ainfo onihuani. ⁵⁻⁶Ascano Diosin yoiqui isca huani, “Ascacun nocofunun ainfo fiaino apa yafi ahuamaqui pashcashu ahuin fu itiro. Ascashu nan fusti shinantsa ashcaquin,” ishon cununiquin. Ascacun Diosin ato fianan huaa cuscan afanan tsoa pashcanantimaran, —ishon ato yoiaiton.

⁷Yocanifo, —¿Nan iconfiacun asca ahuuscaquimun Moisés yonoquin isca huaniquin? “Tsoan ahuin unupaiquin iquisi cunushoquin isca huatiro, ‘Un afanan mia fipaima. Mun mia unuiran,’” ishon Moisés cununiran, —huaifoan. ⁸Afanan ato cumani, —Manfin nan maton shunifo cuscaquin. Nanfoanri

Dios nicacasmapaonifo. Nanscarifi huaqui marifi man nicacasmai. Ascacun rama man yoia cuscan nannori Moisés cununi. Ascafiagai Diosin tau huaqui anori yononima. ⁹Ascacun un mato cayacafi yoi. Ratoran futsan ahuun ahuin nocofunu futsa fu iyamafiacun ahuin unui futsa fiishquin. Asca huaquifin nanton chaca huaiquin. Nan ahuun ahuinma fu iquin cafiscairan, —ishon Jesús ato yoini. ¹⁰Ascaiton nicaquin non afu rafuafoan yoini, —Nanscaracun nocofunu yafi ahuin fiananfoma shara icuanaran, —non huaiton.

¹¹Jesús noco cumani, —Un yoiyai cuscacai atirifi yorafoan tapitirofoma. Nan Diosin ato shinanmanafaansifin tapitirofoquin. ¹²Ascaino atirifi nocofunufocaiyainfo fu fianantirofoma. Atirifi nan cainni cuscan ainfo fu itiro. Ascacun futsafoan atirifi chaca huatiro ainfo fu inonfoma. Ascaino atirificaiyainfo fu fiananfoma Dios yonosharashoshcaquin. Ascacun tsoa ahuionma itiromainquin nan un mato yoiyai cuscan nicacahuun, —ishon Jesús ato yoini.

**Jesús apa Dioshuunshon
facufo shara huani**

Mr 10.13-16; Lc 18.15-17

¹³Ascaino yorafoan aton facumishti Jesusqui ihuunifo ato manmanpacuquin Apa Dios cufishonon. Asca huafiaifoan non afu rafuafoan ato yoini, —Maton facufo ihuutan nocon Ifo fucash huayamacahuun, —ishon non ato yoiaiton. ¹⁴Jesús noco yoini, —Ato nitun huayamacahuun uqui funonofu. Uhuun Upa Dios niaifo icariafofin nan facumishti cuscaraforiquin, —ishon yoini. ¹⁵Ascashon facufo manmanpacutan Jesús cani.

**Pushcohuai mafo ichapaya
Jesús fu tsainni**

Mr 10.17-31; Lc 18.18-30

¹⁶ Ascano pushcohuai Jesusqui caashon yocani, —Tapimamisiton minfin sharacoinquin, ¿Unmun ahua shara huatiroquin Dios fu ipashashquin? —ishon yocaiton. ¹⁷ Jesús cumani, —¿Ahuuscaquimun mian yocaiquin ahuaa sharahuuoa? Nannofin fustiquin shara. Naanfin Diosiquin. Ascan min Dios fu ipapaiquin nan noco yononi cuscan nicacoinfain nan yoia cuscacoin min huatiroran, —huaiton. ¹⁸—¿Rato noco yononicaimun un nicacoinfain nan yoia cuscan un huaiiqui? —ishon yocaiton. Jesús yoini, —Futsa rutuyamahuu. Min ahuinma fu iyamahuu. Ahuara onuyamahuu. Chaniri yoiyamahuu. ¹⁹Upa yafi uhua nicasharafain ato shara huahuu. Nan mifiri min noiai cuscan futsafohuunri noihuu, —ishon yoaiton. ²⁰—Nantifi min ua yoiai cuscan mun nanscacoïn huaa. ¿Ascan ahua futsamun un ahuusca huatiroquin ahuuoashu isharaashquin? —huaiton.

²¹ Afanan yoini, —Min Dios cuscara shara ipaiqui nantifi min aya cuscan inanmitsashon ahuan rafanan pui fi-ihuu ahuuomafo ato inanshquin. Min ascacitofin Upa Diosin nai muranshon mia ahuaa sharacoin mucushoniquin. Asca huatan ua tanasharahuu, —ishon Jesús yoini.

²² Asca huaiton nicai nan pushcohuai puusinima. Mafo ichapayashu ahuan mafofo inanmitsacasmai. Ascatan Jesusmaquinoashu cani. ²³ Ascashu man caano Jesús noco yoiqui isca huani, —Un mato icon yoi. Yora mafo ichapaya fustirasi uhuun Upa Dios niaifo ari nocopaifiacani nocotirofoma. Nanfoan aton mafo ichapa shinanquicai tsoan Dios shinantiroma. ²⁴ Ascacun afanan un mato

yoi. Nan ina camellocai acoya shoi muran finontiroma. Mimacaifi nocofunu mafo ichapaya Diosin niaifo ari nocotiromaquin, —ishon noco yoini.

²⁵ Ascaiton nicacaquin non afu rafuafo mustairitan non yoini. —¿Ascan tsoa Dios fu nipatiromun? —ishon non yocaiton. ²⁶ Jesús nocoqui fusoacucuhuan noco cumani, —Nocofunucai afiri numatiroma. Diosin fustitofin yorafo numatiroquin. Nantofin ahuaamishti huatiroquin. Nocofunufoan atiroma cuscan nan Diosin huatiroran, —ishon noco yoaiton. ²⁷ Pedronun yoini, —Ifon, nonfin nocon ahuafo nantifi yafi nocon yorafo non pota furani mifu oaqin. ¿Ascan Diosimun noco ahua inainquin? —ishon yocaiton.

²⁸ Afanan Jesús noco yoiqui isca huani, —Un mato icon yoi. Un chipo nantifi manifioti iquinaitian nantifiton ua oinshquicani uhuun Upa Dios cuscara sharacoin icaiton. Nantianri marifi nan ua tanamisi nocon caifo doce shoco Israelifo marifi man ato iquishquin. ²⁹ Ascatari tsoan uhuunshon ahuan pushu yafi ahuan yorafo potafain apa potafain ahuari potafain ahuan facufo yafi ahuan mairi potashon ua tanapaisharai. Nanscara yorafin uqui nocoaitian fasi paratama fiishquiquin. Ascashu ufu ipanaca. ³⁰ Ascafia yora ichaparasi niyoashu nan niaifo cuscarafo. Ascan naashucaí afanan tsoa ahua ishquima. Nanscarifiai atirifi niyoashu nan ahuaa shinantsafo. Ascafia naashu u futan futsafori iquishceni.

**Mau yonomisifohuunoa ahuaa
futsa Jesús ato tapimani**

20 Ascano ahua cuscaramain Upa Diosin ahuan yorafo iquinaí cuscaraquin afanan un mato tapimai isca huai. Mau ifoan funamanrishta nocofunufo funai cani ahuan mau uhuapa

ano yonoi fononfo. ² Ascano ato fuchishon yoiqui isca huani, “Uhuun mau ano yonoi focahuun. Nan man shafa fusti yonoa cuscan un mato inain. ¿Ascan sharamun?” ato huaiton. “Ai. Sharafinquin,” huanifo. Ascashon ahuun mau ari ato nichini.

³ Ascatan man fari cuyainano mau ifoan caaquin oian plaza ano nocofunufonia ini tsoa yonoima. ⁴ Ascaiton mau ifoan ato yoini, “Uhuun mau ano yonotacahuun un mato ahuun rafan inansharanon,” ato huaiton. Nicacani fonifo yonoi focani. ⁵ Ascano mau ifo afanan fari masafinin racano caaquin oian atirifi nocofunufoan ahuushta huatama niafo oinquin. Ato yoini, “Uhuun mau ari fotacahuun,” ato huaino man foafono. Afanan man fari cushca cainnaino macushcamuano atirifi fuchishon nanscarifi huaquin ato nichini. ⁶ Ascatan man yatai fari nii manaon caano mau ifoan afanan caaquin atirifi fuchini yonocanima niafoan. Ascaiton ato yocani, “¿Ahuuscaimun nan shafatisho yonotama man niaquin?” ishon ato yocaiton. ⁷ Cumanifo, “Tsoan ahuashta noco yonoamaran,” huaifoan. “Ascacun marifi uhuun mau ari ua yonoshotacahuun,” ato huani.

⁸ Ascashon man yamuaino mau ifoan yonona niaifo patashari yononi, “Ua yonoshonaifo cunahuu nan yonoafo rafanan ato inanshquin. Ascashu ato inanqui tau huahuu nan ahuun unutaqui foafo yafi nan foi tauafo,” ishon yononi. ⁹ Ascaino man fari nii manaon caano foafo. Nanfo ato inanni naan shafa fusti yonoa shinantsa huaquin. ¹⁰ Ascano nan funamanrishta yonoi tauafoan oincaquin yoinifo, “Mau ifoan ato inanshara. Ascan nonfin paratama yonoaquin. Ascacun noco fasi paratamacoin inainran,” ishon shinannifo. Ascafia nan chipo iquiafo ato inan cuscari ato inanqui huani. ¹¹ Ascashon ato yonohuunshon ato

inainton fiicani mau ifoqui tsain chaca huacani afi ranan yoinancaquin yoinifo. ¹² “Ascan nonfin nan shafatishon yonoaquin. Fari isicoín muran. Ascan man fari caino chipo fuafo min ato inan cuscan huaquin nocorifi min inainran,” ishon yoiaino. ¹³ Mau ifoan futsa cumaqui isca huani, “Uhuun yorashta. Uncai mia inanqui chaca huama. ¿Ascan manmun u futan shara huama man shafa fusti yonoaihuunoa? Man manfin ‘Shararan’ huaaquin. ¹⁴ Ascan naquian min pui fihuu min pushu ano catashquin. Ascan nan fari man nii manaon caano yonoafo nan un mia inain cuscan nanfori un ato inansharapai. ¹⁵ Nan un ato inanpaiyai cuscan un ato inantiro. Nanmain uhuun puicufin. ¿Ascan ahuuscaquin nan faricaino yonoafo yafi man uqui shinain chacaimun? Unfin futsafori shara huapaiquin,” ishon mau ifoan ato yoini.

¹⁶ Ascan nanscarifiai Upa Diosin nan icoinra huaqui tau huafo ato shara huaa cuscan huaquin nan chipo icoinra huafori nanscarifi ato shara huairan, — ishon Jesús ato yoini.

**Naashquiai cuscahuunoa
afanan Jesús yoi futsani**

Mr 10.32-34; Lc 18.31-34

¹⁷ Ascashu Jesús Jerusalén ano caquin doce non afu rafuafo noco fusti futsano iyoni nannonshon noco yoiquin isca huani, ¹⁸—Non Jerusalén ano canon. Nannoshon futsan ua ato achimai nan nocon niaifofo futan Moisés tsain tapimamisifoanri ua chaca huacaquin yoicani isca huacaquin, “Jesús rutucahuun,” ishon yoifocani. ¹⁹ Ascashon caifo futsafori ua inancani nanfoan ua cashu mutsama huafain fichi cunogui tuchiaton ua coshacani. Ascatan ihui coyan iquinanqui ua mastacani un nanon. Ua asca huafiafo osha rafu non

fustitan Upa Diosin afanan ua funimairan, —ishon noco yoini.

**Juan futan Santiago
ahuan yocani cuscan**

Mr 10.35-45

²⁰ Ascano Zebedeo ahuun facu rafu Juan yafi Santiago ahuan ato Jesusqui yoni. Ascatan aqui nocoshon ahuan Jesús ratoconun mai chachishoni. Ahuara futsa yocapaiquin. ²¹ Ascaiton Jesús yocani, —¿Min ahua yoipaimun un mia ashonon? —huaiton. —Ifon, Upa Dios icari nantifain min aton niaifo icaitian uhuun facu rafu mifu niaifo patashari ato imahuu. Ascatan niaifoan ahuun tsaoti ano min tsaoitian uhuun facu rafutan mia naqui huashu tsaononfo, —ishon yoiaiton. ²² —Man ua yocai cuscaai man tapiama. ¿Un omitsiscashquain cuscan man ufu omitsiscatiromun? —ishon Jesús ato yocaiton. Cumanifo, —Ai. Non mifu itiroran, —huaifoan. ²³ Ato cumani, —Icon marifi man omitsiscai. Ascfia uncai yoitirota tsoanmain ua naqui huashu tsaicai. Uhuun Upa Diosin fustitofin tapiaquin. Nan catoanfosi ufu nanno tsaotiroran, —ishon ato yoini.

²⁴ Ascaiton nicai non afu rafuafo atirifi mucu rafuti nan nanu rafuqui non fasi sinacoinni Jesús naqui huashu tsaopaiyaifoan nicai. ²⁵ Non ascaiton tapishon Jesús noco cunashon yoiqui isca huani, —Uqui fucahuun un mato yoinon. Nan icoinra huafoma niaifofoan ato curushcain yonofafainmisifo. Aton niaifo patasharifoanri ato yoiqui isca huamisifo, “Nonfin mato ifoquin. Ascacun non mato yoia cuscan man noco ashorisca huatiroran,” ishon curushcai ato yoimisifo. ²⁶ Ascfiaifoanno ato cuscara iyamacahuun. Man ratoran futsan niaifo ipaiqui maton oinmati man shara huafafainmisi itiro. ²⁷ Ascatan man futsan futsafori finonpaiyaino ahuun yono-

mati man itiro. ²⁸ Nanscarifiai futsa ua ashononcai un oama. Ascatamarocon un futsafo ashoyoi ua oa. Ascataari un atohuunoashu naashquin un oni afanan Satanás ato ifon inonma, —ishon noco yoini.

Jesús fusho rafu caya huani

Mr 10.46-52; Lc 18.35-43

²⁹ Ascatan non Jericó anoashu caiton yorahuanrasifain noco mufainifo. ³⁰ Ascaino nannori fai cusumun fusho rafu tsaofa ini. Jesús fain caiton nicaquin nan rafutan cunanifo isca huaquin, —Ifon, minfin David ahuun funaquin. Noco huun ramapaipun, —ishon cunanifo. ³¹ Ascfiaifoan yorahuanrasifain ato asca huanifo afanan tsainonfoma. Ato asca huafiainfoanno oi ashcafinin afanan cunanifo, —Ifon, minfin David ahuun funaquin. Noco huun ramapaipun, —huariaifoanno. ³² Jesús nituacucuhuan ato cunashon yocani, —¿Un mato ahua ahuusca huashotiro mun? —ishon ato yocaiton. ³³ —Ifon, non fasi oinpaicoin, —huaifoan. ³⁴ Jesús atohuun ramapaquin aton furo muainno cayariscatan oinsharanifo. Ascashon nan rafutari Jesús mufainifo.

Jesús Jerusalén ano cani

Mr 11.1-11; Lc 19.28-40; Jn 12.12-19

21 Ascatan non Jesús fu cai Jerusalén chaima non noconi. Nan chaimari pushurasi futsa ahuun anu Betfagé machi Olivo tunanman ini. Nanno nocoti chaima Jesús afu rafuafo rafu pushurasi Betfagé ano ato nichini. ² Ato nichiataima ato yoiqui isca huani, —Nan pushurasi ano fotacahuun. Nanno nocoshon man oian burro facuya nushua man fuchicai. Nan tupushon nuri ua ihuushotacahuun. ³ Futsan mato yocaiton ato yoicahuun, “Nocon Ifo yopaiton non iyoshoni cai. Ascfia non

mato natorisca huairan,” ishon ato yoitacahuun, —Jesús ato huani.

⁴ Jesús acai cuscan huaquin nannori ahuunoa Diosin tsain yoimision cununi.

⁵ Ascano cunuquin isca huani,

“Jerusalén anofo yoihuu isca huaquin, ‘Oincapon. Mato niaifocoin matoqui oi. Nan burropan facu camaqui tsoashu matoqui oi. Nancai nocofunu ahuaton curafiapaitama shara fustisi oitsii huafain fusti yoitiroran,”

ishon Diosin tsain yoimision ahuunoa cununi.

⁶ Ascatan nan rafutan Jesús ato yoia cuscacoin huashonifo. ⁷ Ascashon burro yafi ahuun facu Jesús iyoshonifo. Iyoshocata burropan facu camaqui ato camisa fucashonafoanno acamaqui Jesús tsoinacahuani. ⁸ Ascatan caiton yorahuanrasifoan fai naman cayan afufori aton camisafo fucashonifo. Ascaino atirifiton shupa shatushon nan caifufori nichinifo. ⁹ Ascano nan yorahuanrasi afufori foaifo futan acachori foaifoan nantifain oi ashcafinin yoinifo.

¡Aicho! David nocon niaifo ipaoniton ahuun funa nocoqui oi. Nanfin

Dioshuunoashu nocoqui oiquin. Ascacun Upa Diosin nan shara huahuu,

ishon yoinifo.

¹⁰ Ascashu Jesús Jerusalén ano caiton nicacani nantifi yorafo mustairicatan afi ranan yocanonannifo, —¿Tsoamun naaquin? —icashu.

¹¹ Ascaifoan nan Jesús fu foaifoan yoinifo, —Nanfin Jesusquin. Diosin tsain yoimisi. Nanrifi pushurasi Nazaret nan Galilea anoaquin, —ishon yoinifo.

Jesús Dios fu tsainti pushu muranshon ahuara chacafo potani

Mr 11.15-19; Lc 19.45-48; Jn 2.13-22

¹² Asca huatan Jesús Israelifoan Dios fu tsainti pushu muran iquitoshiquin

oian amurannoashu ahuara inanmitsashon pui fiaifoan oinquin nan sapa acamaquishon pui fiaifo finifoan arasaquin futsani. Ascashon nan ruhui inanmitsaifoan aton tsaotiri finifoan potaquin futsani. ¹³ Ascashon Jesús ato yoini, —Diospan tsain cunuquin isca huani, “U fu tsainti pushu muranshon man ua fusti cufitiroran,” ishon cunufiani nan yomutsofoan ichananti cuscara man huapairan, —ishon ato yoini.

¹⁴ Ascaino fushofo yafi nipaiqui ranainfo Dios fu tsainti pushu muran Jesusqui funifo. Ascacun ato caya huani. ¹⁵ Ascaiton nan Dios fu tsainti pushu muranshon unimacaquin facufoan oi ashcafinin yoinifo, —¡Aicho! Nan David ahuun funa Jesús fasi shara. Ascacun nan shara huahuun, Upa Diosin, —ishon yoinifo. Tsoan atiroma cuscan huaquin Jesús ato shara huashomisi ascaifoan nicai Israelifoan niaifofo yafi Moisés tsain tapimamisifo sinacoinnifo. ¹⁶ Ascashon nanfoan Jesús yoinifo, —¿Nan facufoan yoiaifo cuscan min nicaimamun? —ishon yocaifoan ato cumani, —Aifain. Munfin nicaiquin. ¿Ascaino marifi nan Diosin tsain cununi cuscan man man nicamisimun? Cunuqui isca huani, “Mihuunshon facufoan mihuunoa tsain shara yoicaniran,” —ishon cununi.

¹⁷ Anori ato yoitan atomaquinoashu no fu cai pushurasi ahuun anu Betania ano cani. Nanno osha fustiyoni.

Fana higuera fimiymacaiyaiton Jesús ahuun tsainmansani namani

Mr 11.12-14, 20-26

¹⁸ Iyoconaino Jesús Jerusalén ano cai fonaincoinni. ¹⁹ Ascashu caquin oian fai cusumunri fana higuera fuchini. Ahuun fimi pipaifia ahuun puifosi ini. Ascacun nan fana Jesús yoiqui isca huani, —Afanacai min fiminacamaran, —

ishon yoini. Yoiquin asca huaino fana tsasisiriscatani.

²⁰ Ascaiton oin non afu rafuafo non mustairini. Ascashon non yoini, —¿Ahuuscashumun nan fana tsasisiscaquin? —ishon non Jesús yocaiton.

²¹ Noco yoini, —Un mato icon yoinon. “Un icoinra huai iyamarai un icoinra huaimaran,” ishon shinantama man icoinra huacoinshon un fana tsasi huacuscancan marifi man nanscarifi huatiro. Ascashon machiri man yoitiro, “Tsu-cucaí. Unuhuan muran pacuhuu,” man huaino unuhuan muran pacuriscatiro. ²² Ascacun man icoinra huacoinshon ahuarashta man Upa Dios yocaiton mato ashotirotan, —ishon Jesús noco yoini.

Jesús noco yonotiro

Mr 11.27-33; Lc 20.1-8

²³ Asca huatan Jesús Israelifoa aton Dios fu tsainti pushu muran iquishon ato yoiaino Israelifoa aton niaifofo aqui funifo. Aquí fucashon yocanifo, —¿Min acai cuscan tsoan mia yonoamun? —ishon yocaifoan. ²⁴⁻²⁵ Jesús ato cumani, —Urifi un mato yocai. ¿Juanpan yorafo unu muran iquimapacuni tsoan yonoa asca huanimun? ¿Diosin iyamarai nocofunufoa yononifomun? Man ua cumasharaiton urifi un mato cumatiroan, —ishon ato yoiaiton. Nicacani afiranan yoinannifo —Diosin Juan nichiniran non huaiton Jesús noco yoitiro, “¿Ascan ahuuscaquin man Juan icoinra huamamun?” noco huatiro. ²⁶ Ascan Juan nocofunufoa nichiniran non huaino yorafo nocoqui sinatirofo. Nantifi yorafoanmain yoimisifo “Juanpan Diosin tsain yoimisiran,” ishon. Ascacun noco asca huatiroforan, —icashu niaifofo yoinannifo atoqui musucani. ²⁷ Ascashon Jesús yoinifo, —Noncai tapiama tsoanmain Juan yonoaquin, —ishon yoiaino. Jesús afiri ato yoini, —

Urificai un mato yoima tsoanmain ua yonoa un ahuafo huaiquin, —ishon Jesús ato yoini.

Pushco rafuhuunoo ahuara futsa ato yoini

²⁸ Asca huatan ato yocani, —¿Man raquiri shinainmun? Nocofunu facu pushcohuai rafuya ini. Ascashon furu iyoa apan yoini, “Upashta, nocon mau ano yonotahuun,” huaiton. ²⁹⁻³⁰ Furumun cumani, “Ma, upa, un yonoicaimara,” huafiashu chipo shinan futsashu cani. Ascashon furu chipocuri yoini, “Upashtan, nocon mau ano yonotahuun,” huaiton. “Ai, upa. Mun yonoicairan,” huafiashucai canima. ³¹ ¿Ascan rato ahuun facu rafu nan apa yoiacuscacoin animun? —ishon Jesús ato yocaiton. —Nan iyoaran, —ishon cumaifoan. Afanan ato yoini, —Un mato icon yoi. Nan yora chacafo niaifo pui fishomisifo yafi ainfo furomafoanri ua icoinra huacanashu nanfo Diosin nantifi iquinai ano iqui tautirofo. Ascan mancai ari iquitiroma. ³² Juanpan mato yoisharapaoni isca huaquin, “Man chaca huamisi cuscan shatufain natian Dios shinancahuun,” ishon mato yoipaoni. Ascacacai man icoinra huanima. Nan niaifo pui fishomisifo futan ainfo furomafoanri icoinra huaifoan oinflaquincaí maton chaca shatuyamafain man icoinra huamisimaran, —ishon Jesús ato yoini.

Mau yonomisi chacafuhuunoo ahuara futsa ato yoini

Mr 12.1-12; Lc 20.9-19

³³ —Nicacahuun un afanan ahuafo futsahuunoo un mato yoi mato tapi-mashquin. Mau ifoan ahuun mau ano fimi ahuun anu uva fanani. Ascashon ahuun fimi ica cuscan toquiri cunacuni ahuun fimi fana ahuaton chaca huanonma. Asca huatan mai quini

huashon amuran uva huashon ahuun tau puama puama anifo ahuun fimi unu fiishcaquin. Ascashon toquiri cuyacoin masoni anoshon ahuun yonomatiniin cushushonon. Asca huaquin anaitishon futsafo yoini ahuun mau cushushononfo. Asca huafaini mau ifo mai futsa ano cayoni. ³⁴Ascashu man fimi ano mau ifoan ahuun oinmati futsafo mau ano nichini ahuun fimi fishononfo. ³⁵Ascano nocofoan fimi cushumisifoan ato achicashon futsa sutufain futsa rutucoinfain futsari toquirinin tsacaqui futsanifo. ³⁶Ascano mau ifoan ahuun oinmati ichapama nichiqui tau huani. Ascashon afanan achori fasi paratama nichini. Ascafia nanfori ato chaca huanifo. ³⁷Ascashon mau ifoan shinanni, “Uhuun facucoin un nichicuraca nicatirofoati,” ishon ahuun unutaqui furucoin nichini. ³⁸Ascashon apa nichian caiton oincani nan fimi cushumisifo ahuun yoinancaquin yoinifo, “¡Oincapon! Mau ifoan ahuun facu oi. Na maufin apanaquin. Ascafia apa chipo ahuun facu inanshquin. Ascacun non rutunoncahuun nonona mau inon,” icashu yoinannifo. ³⁹Ascatan furu iquicuranaiton achicashon mau tsumun sharafoshon rutunifo. ⁴⁰¿Ascán mau ifo oshon nan fimi cushumisifo ato ahuusca huashquimun? —ishon ato yocaiton. ⁴¹Cumanifo, —Nan yora chacafo rutui atohuun ramapaitama nanonfo. Ascashon ahuun mau futsafo cushumani cushusharashononfo. Nanfoan man fimicun cashcu futsa mau ifo inanonfo, —ishon yoiaifoan.

⁴²Jesús afanan ato yoiqii isca huani, —¿Diosin tsain cununi cuscan man man oinmismamun? Isca huaquin cununi, “Pushu yonomisifoan pushu quishi shara potanifo. ‘Nan sharamaran’ ishon potafiafo pushu ifoan afanan fiini nanhuunoashu pushu mutsisipa inon.” Nanscarifiai niaifofoan Diospan facuhuunoo

isca huaqui yoishquicani, “Nacai ahuama. Sharamaran,” ishon yoiqii potashceni. Ascafia Upa Diosin ahuun facu catoan ahuunoashu nantifi ahuun yorafo nipanonfo. Ascacun non yoiro “Diosin Furunhuunshon aca cuscan fasi shararan,” ishon cununi.

⁴³Ascacun Diosin maton niaifocoin ipai ahuun yorafo ato iquifai ato iquipacushquin. Ascafia man Dios nicacasmaiton futsafo catonshquin a fu ipanonfo. ⁴⁴Unfin nan pushu quishi cuscaraqui. Futsafoan uhuunoo cayacafi tapimana cuscan icoinra huayamashu funocoinshceni. Un atoqui sinaqui omitsiscapanacafo muran un ato potashquin, —ishon Jesús ato yoini.

⁴⁵Ascaiton nicacani Israelifoan aton niaifofo futan Fariseofoan tapinifo atohuunoo Jesús yoiaiton. Nanfoan icoinra huafomahuunoo ato yoini. ⁴⁶Ascano ahuun yoinannifo, —¿Ahuuscashomain non Jesús ato achimanan ranushumuatton rutunon? —ishon shafatifi shinannifo. Ascafiaifoanno yorafoan yoinifo Jesús Diospan tsain yoimisiran ishon ahuunoo yoinifo. Ascacun na yorafoan yoiaifo cuscan tapinifo niaifofo yafi Fariseofoan yorafoqui musucaquin Jesús achimatai inifoma.

**Nocofunu yafi ainfo
fianantirohuunoo
ahuara futsa ato yoini**

Lc 14.15-24

22¹⁻²Afanan Jesús ato yoiqii ahuara futsa ato tapimanon isca huani, —Upa Diosin niaifoan ahuun yorafo iquinainmain ahuu cuscaraquin un mato yoinon. Ua nicacahuun. Niaifoan ahuun facu ainfo fiaino ato chanihuani ichananshon ato futan pifain atofu fasi unimashquin. ³Ascano man itisharashon ahuun oinmatifo nichini nan ato chani huaifo ato

ihuitanonfo. Ascafiacai tsoan opainima. Fucasmarocon anifo. ⁴Ascatan afanan oinmati futsafori nichiqui yoini, “Ato yoitacahuun. ‘Uhuun facu ainfo fiaino mun tushu itishara huaaquin. Moi rafu rutufain yoina shoa sharari un rutuaqui pii funonfo.’ Nannori ato yoitacahuun,” ato huani.

⁵Ascano focashon ato yoifiafo afanan fucasmanifo. Atirifi aton mau ari fonifo, pashaifocani. Atirifiri ato inanmitsati ari fonifo. ⁶Ascan atiri nanno nituafoan niaifoan ahuun oinmatifo achicashon ato sutufain atirifi ato rutucoinnifo. ⁷Ascano ahuun oinmatifohuunoa nicai niaifo fasi sinacoinquin ahuun ranushumuafu niichini a rutumitsamisifo ato rutuqui cuyofain aton pushufo coanonfo.

⁸Asca huatan niaifoan ahuun oinmati futsafo yoini, “Uhuun facu ainfo fiaino un tushu ichapa itishara huaa ato futan piishquin. Ascafia futamarocon fasi chaca huafo. Asca huashucaí afanan futirofoma. ⁹Ascacun nan fai uhuapafo nanno nan yora ichapa fotirofo ano fotacahuun. Ratoran futsafo fuchicashon ato yoicahuun Funonfo,” ishon yoini. ¹⁰Ato asca huaino focashon nan fai uhuapafo anoa ratoran futsafo fuchicashon ato ihuunifo. Yora sharafo ihuufain yora chacafori ihuunifo. Ascano nan niaifoan ahuun facun ainfo fiaí pushu muran yorahuanrasi fospicoinnifo.

¹¹Ascatan niaifo pushu muran iquini nantifi fuafo ato oinpai. Ascashon oian nantififain sahuuti shara sahuuafu ini. Niaifoan ahuun facu ainfo fiaino sahuuti funa sharacoin ato sahuumani. Ascafiacuin oian nocofunu futsan sahuuti shuni sahuua niaifoan fuchini. ¹²Fuchishon yoiqui isca huani, “Ahuuscaí sahuuti sharacoin un ato sahuumana cuscan min sahuuamamun. ¿Ahuuscaí ascara min iquiamun?” ishon yocafaiinocai nan nocofunu pusinima. ¹³Ascaiton niaifoan ahuun oinmatifo yononi, “Nan nocofunu

munushfain onushushon faquish muran potacahuun. Nannoashu uaicaifoanno omitsiscapashanon,” ishon ato yoini.

¹⁴Nanscarifiai Upa Diosin yora ichapa cuna a icano funonfo. Nan ahuun facu noiaifosi afu ipanacafo. Ascafia Upa Diosin fustirasi ato catoin nan icoinra huafoasi afu ipashanonfo, —ishon Jesús ato yoini.

Niaifofoan aton caifofo pui yocamisifohuunoa

Mr 12.13-17; Lc 20.20-26

¹⁵Ascatan Jesús ato yoiaí cuscan nica-cani Fariseofo Dios fu tsainti pushu murannoashu chifi focanashu yoinannifo, —Non Jesús ahuara yocanon. Noco amaquiri cumaquin chaca huaiton non cunu muran iquimanon, —icashu ahuun yoinannifo. ¹⁶Ascashon Herodes ahuun tanamisifo yafi atohuunshon tapimisi-fori Jesusqui nichinifo cucun huaquin yocatanonfo. Ascano focashon yocacuí isca huanifo, —Tapimamisiton, man non tapian min icocoin fusti noco yoifafainmisi. Upa Diosin noco amapayai cuscan nannoricoin min noco cayacafí yoimisi. Mincai ahuara yoipai ronomisimari. Nan min noco yoiaí cuscan cayacafí min yoimisi. Ahuaricai min fomamisima. Yora ahuaton cunama min yoimisi cuscan huaquin niaifofofori min yoitiro. ¹⁷Ascacufin min shinain cuscani noco tapimahuu. ¿Nan Romanonfoan aton niaifo Cesari pui inanfo cuscan norifi non inantromun? —huaifoan. ¹⁸Nan fuparamitsamisifoan cucun huaquin yoiaífo cuscan onanshon Jesús ato yoini, —Fuparamitsamisifoan manfin ua amaquiri cumamapaiquin ranushumuafuuafoan ua achicashon ua cunu muran iquimanonfo, —ishon ato yoitan. ¹⁹—Toro ua ismacahuun. Nan man ahuunshon niaifo inanmisi, —ato huaiton. Toro fushonifo. ²⁰Ascashon Jesús ato yocani, —¿Tsoa ointsa torohuun nu-

amun? ¿Tsoan ahuun anuri nuamun? —ishon ato yocaiton. ²¹—Niaifo Cesarinnaran, —huaifoan. —Ascan Cesarinacun nan inancahuun. Ascan Diosinacun Diosiri inancahuun, —ishon ato yoiaiton.

²²Nicacani fasi mustairicatan yoinifo, —Jesús yoiái cuscacái tsoan tafitiromaran, —icashu afi ranan yoinannifo. Ascatan amaquinoashu pashcafaini fonifo.

**Yora naashu afanan
funitirofohuunoa yocanifo**

Mr 12.18-27; Lc 20.27-40

²³Ascano nan shafatari Saduceofo Jesusqui funifo. Nanfoan shinanquin isca huamisifo, —Yora naashucaí afanan funinacamaran, —ishon yoinifo. ²⁴Ascan nanfo Jesusqui fucashon yocanifo, —Tapimamisiton, noco shuni Moisés noco cunushoqui isca huani,

“Nan ratoran futsa ahuin futan facu acashma naano afu nanua futsan ahuun facahua fitiro a futan facu aashqui,”

ishon cununi. ²⁵Un mia yoinon. Si-ete nanupacuafohuunoa. Nanfo nocofu iyopaonifo. Aton iyoacoin ahuinyain tauni. Ascafiashon a futan facu acashma nani. Ascano chipocuton ahuun facahua fiini. ²⁶Ascashu arifi a futan facu acashma naani. Ascano chipocu futsari fiini. Arifi a futan facu acashma naani. Nanscasiai. Ascapacutan amaqúi nai cuyonifo. Aqúi facu ayamacaicani. ²⁷Ascatan ahuun unutani ainfori naani. Facu nanuyamacai. ²⁸¿Ascan ratotocaimun nai muranshon nan yorafo naashu funiaifotian fiishquiquin nan fusti fi-pashquin amaqúi nai cuyoafo? —ishon yocaifoan.

²⁹Jesús ato cumani, —Man man funoa. Mancái Diosin tsain tapiamafain ahuun yonoricái man tapiama. Ascashofin amaqúi man ua yoiiquin.

³⁰Naacanashu funiafocái Dios icari nocotan afanan fianannacafoma. Nantifi Diospan oinmatifo afu nai muran icafo cuscara iishquicani. ³¹¿Ascacun yora naashu funishquiaifohuunoa Diosicoinin mato cunushoni cuscan man man oin-misimun? ³²Isca huaquin Diosin yoini, “Unfin Abraham non Isaac non Jacob afoan aton Diosiquin,” ishon yoini. ¿Yora naashu afanan funiyamaino ahuuscashumun Dios fu itiroquin? Ascafia ascarama. Yora man naafianishaquin afanan nia nanfofin Dios fu itirofoquin. Ascacun Upa Diosifin aton Diosiquin, —ishon Jesús ato yoini.

³³Jesús Saduceofo yoiái cuscan nicacani mustairicatan yoinifo, —¿Ahuuscashomun iscara tsain noco yoiquin? Tsain sharacoin iquinaran, —ishon yoinifo.

**Diosin yononi cuscan nantifi
sharafiashu nan fusti shara finacaiá**

Mr 12.28-34

³⁴Ascano Jesús Saduceofo tsain shatumana nicacani Fariseofo afanan aqúi funifo yocái fucani. ³⁵Ascacun Moisés yononi cuscan tapicoian futsan Jesús amaqúi cumamapaiquin yocani, ³⁶—¿Tapimamisiton, Moisés Diosin yonoa cuscan cununi. Ascan nan ratocaimun fasi shara finacaiáquin? —ishon yocaifoan. ³⁷Jesús cumaqui isca huani,

“Nocon Ifo Dios noiqui fasi mato ointi muranshon noifain fasi mato nomuranshori noifain mato shinanfo yashon fasi noihuu,”

ishon Moisés cununi. ³⁸—Nan yononicaifi fasi shara finacaiáquin. ³⁹Futsari nanscaracuana yonoqui isca huani,

“Nan mifiri min musu huamuai cuscarifi aqúi mia chaima icafori noihuu.”

⁴⁰Nantifi Moisés yononi cuscan yafi Diosin tsain yoimisifoan yosipaonifo nan Diosin yononi rafuhuunoa cununifo.

Dios yafi futsafo noicoinquifin nantifi Diosin yononi cuscacoin man aiqin, —ishon Jesús ato yoini.

**Tsoancaimun Cristo
ahuun shuni ipaoniquin**

Mr 12.35-37; Lc 20.41-44

⁴¹ Ascashu Fariseofo afu ichananfoan Jesús ato yocani, ⁴²—¿Nan Diosin catonni Cristohuunoa ahuu cuscara man shinanmun? ¿Tsoan funacaimun? —ishon ato yocaiton. —David ahuun funaran, —huaifoan. ⁴³Ato yoini —¿Asca ahuuscai David Diospan Yoshin Sharahuunshon nan Diosin catonni yoiqiu isca huanimun?

⁴⁴“Upa Diosin uhuun Ifo Cristo yoini isca huaquin, ‘Minfin ufu niaifocoinquin. Mia noicasmaifoan min ato finoncoian. Un ato shatumashquin mia afanan ahuusca huatiroma. Min ato iquiniran,”

ishon Diosin yoini cuscan David cununi.

⁴⁵ ¿Criston David Ifono ahuuscashucon ahuun funa itiomun? —ishon Jesús ato yoiqiu. ⁴⁶Nicaquicai tsoan ahuashta cumatiro inima. Ascashu nantifi puusini-foma. Ascan anantiancai tsoan afanan Jesús ahuashta yocanima. Ato cayacafi cumaiton nicacanasu aquí ranonifo.

**Fariseofo futan Moisés cununi
cuscan tapimamisifoan chaca
huamisifo cuscan Jesús yoini**

Mr 12.38-40; Lc 11.37-54; 20.45-47

23 Asca huatan Jesús afu rafuafu yafi nanno niafo yoini, ²—Moisés cununi cuscan tapimamisifo futan Fariseofoan Moisés yononi cuscan mato tapimacani. ³Ascan mato tapimanaifo cuscan huacahuun. Ascafiashon nanfoan acai cuscan huayamacahuun. Nanfoan Moisés cununi cuscan mato tapimafiaquicai Moisés yononi cuscacoin acanima. ⁴Mato ahuara ihuucoin papimafishocai

aton mucuman ahuashta mupaicanima. Nanscarifiai Moisés yononi cuscan nantifi huacahuun. “Fustishta finonmayamacahuun,” ishon mato yonoafo. Moisés yononi cuscan fasi finonmafain mato huamacani. Ascano marifi apaifiaquicai man atiroma. Ascashu maton nomuran man omitsiscafiaitocai matohuun ramapaicanima. Mato yonomisifo cuscacai aafi acanima. ⁵Ascashon nanfoan acaifo cuscan futsafoan yoiqiu isca huacani, “Nanfofin sharaquin,” ato huamapaicani. Diosin tsain fichiqui cunushon fumananqui nutafain ato sahuuti poyan ocuma rafu nutafain sahuuti chainipari sahuuafu. ⁶Ascatan picani ichananshu nan niaifoan ahuun tsaoti ano tsaoafo nantifain ato oinonfo. Nanscarifiai aton ichananti pushu anori shafacafi tsaotiofo. ⁷Ascashu nan yora ichaparasi anori fopaicani atohuunoa yoisharanonfo. Nanscain apaicaniqui. “Tapimamisiton,” ato huaifoan nicapaicani.

⁸Ascacun “Tapimamisiton,” ato huayamacahuun. Nocon tapimamisifin fustiquin. Naan nocon Ifo Dios. Ascashufin man nantifi yorahuantananquin. ⁹Ascashori tsoa nuno mai anoa Upa huayamacahuun. Nan nocon Upacoinfi nai ari iquain. Nan fusti non upa huatiro. ¹⁰Ascatan “Iforan” ato huayamacahuun. Nocon ifofin fustiquin. Nan nocon Upa Dios. Nan man Iforan huatiro. ¹¹Ascatari nan man ratoran futsa niaifo ipaiyaifi nantifiton ato oinmati itiroquin ¹²Tsoan nantifi finonpaifafaini naanfin Diosin ismashquiquin aacai ahuama. Ascan tsoa futsafoan aton oinmati cuscarashon ato shara huafafainai nanfin Upa Diosin chipo niaifocoin imashquiquin, —ishon Jesús ato yoini.

¹³Ato asca huatan Jesús Moisés cununi cuscan tapimamisifo yafi Fariseofori yoiqui isca huani, —¡Ohua! Moisés cununi cuscan tapimamisifo futan Fariseofoan ua nicasharacahuun. Manfin fuparamitamisicoinfoquin. Upa Dios icano man yorafo iquimapaifiaquicai man ato iquimatiroma. Ascashu marificai man iquimatiroma. Iquipaifiafoan man ato catima huaa. Ascacun Diosin mato fasi onaintimaquin finacoinshquin. ¹⁴Ascashon man futsafo matohuunoa shinansharamapaifiai man fasi chacacoinfo. Ainfo tatuomafori parashon man pushu ato fian. Ascatan fasi chaicoinri man cufiriatiro matohuunoa shinansharanonfo. Ascafia manfin fasi fuparamitsamisicoinfoquin.

¹⁵Ascashu man foanfafaitsia man shinain cuscan yorafori shinanmashquin. Ascaqui fusti fuchishon man icoinra huua cuscan nanrifi man icoinra huama mato cuscara inon. Ascashon man futsa mato cuscara imano fasi chaca finacaia iiquin. Manfin fasi chacacoinfoquin. ¡Ohuashta! Nanrifi matofu omitsiscapanacafo muran cai.

¹⁶¡Ohua! Ascacun Diosin mato fasi onaintimai. Manfin nan fusho cuscarafofiashon man futsafo tapimapaiqui ahuscashomain Dios tanatirofoquin. Ascan ato tapimapaifiaquicai marifi man tapiama. Ascashon futsafo man yoiqui isca huamisi, “Tsoan yoiqui isca huai, ‘Dios fu tsainti pushu ahuun anuhunshon un mia yoia cuscan un mia ashonon,’ huafiashon chipo man shinan futsashon man yoi ‘Nanscanonquin,’ ishon. Ascafia nan Dios fu tsainti pushu murannoa orohuunshon un mia ashoiran futsa huashon. Nanscacoïn huashohuun. Ascan nan non yoia cuscan huashoyamaino ahuara chaca finontiroran,” ishon man yoimisi. ¹⁷Asca nan icon. Manfin nan fushon futsa iyopaiyai cuscarafokin. Maton mapo curushcain. Man-

cai ahua tapiama. ¿Ascan rato shara finacaiamun Dios fu tsainti pushu murannoa oro iyamarai Dios fu tsainti pushucain? Nan Dios fu tsainti pushuanofin Dios itiroquin. Ascan nancaifin shara finacaiquin.

¹⁸Ascashon marifi man yoiqui isca huamisi, “Tsoan yoiqui isca huai, ‘Nan cufiti camaqui ahuara coamisifohuunshon un mia yoia cuscan un mia ashonon,’ huafiashon chipo man shinan futsashon man yoi nanscanonquin ishon. Ascafia, ‘Nan cufiti camaqui un Dios ahuara inanhuunshon un mia yoia cuscan un mia ashoiran,’ futsa huashon nanscacoïn huashocahuun. Ascan nan min yoia cuscan huashoyamaino ahuara chaca finontiroran,” ishon man yoimisi.

¹⁹Manfin nan fusho cuscarafokin. Mancai cayacafi shinantiroma. ¿Ascan ratocaimun shara finacaiquin? Nan cufiti camaqui ahuara man inan iyamarai nan cufiticoïn. Man cufiahuunshon ina man coashonaino Diosin matoqui unimatiro. Ascafia nan cufiticaifin fasi shara finacaiquin. ²⁰Ascashon Dios fu tsainti pushu murannoa cufitihuunshon futsa man yoiquifin nan cufiti camaqui ahuara man inan nancain yoi cafisca man huaiquin.

²¹Nanscarafi aqui tsoan Dios fu tsainti pushuhuunshon futsa ahuara yoiquifin nan Diosicain yoi cafisca huaiquin. Nan muranmain Diosicun. ²²Nanscarifi aqui tsoan Dios ica muranhuunshon futsa ahuara yoiquifin nan Diospan tsaotihuunshon yafi nan Dioscainhuunshon man yoi cafisca huaiquin.

²³¡Ohua! Moisés yononi cuscan tapimamisifo futan Fariseofoan manfin fuparamitsamisicoinfoquin. Ascacun Upa Diosin mato fasi onaintimashqui. Moisés yononi cuscan nantifi mato fanafo atrifi man Dios inanmisi. Man asca huafiaquicai ahuara shara finacaia man huamisisima. Ascashucaï man futsafohuun ramapaiyamacain atori

man shara huacoianmisima. Mato yorafoan ahuaara chaca finonfiacun man ato shara huatamarocon man ato potamisi. Ascan man futsafohuun ramapaicai ato shara huafain ahuaara ahuuscarafiaino man ato potayamaino Diosin matoqui unimatiro. Ahuaara futsafo Moisés yononi cuscan man huamisi cuscan man shara. Ascafia ahuaara shara finacaiarocon huacahuun.²⁴ Ascafia manfin nan fusho cuscarafuquin. Fushocai oinsharatiroma yora iyoshqui. Nanscarifiai marificai man cayacafi shinantiroma yorafo tapimashquin. Motsa muran napun pacucun man nushfitiro aya shuashquima. Ascafia man nan ina uhuapa camello shuai cafisca huai. Asca huaquifin ahuaarafoan yora imasharatiroma man shinanfainiquin. Ascafiaшон yorafo ahuaara yopacoiainfo cuscacai man ato ashomisima.

²⁵ ¡Ohua! Ascashufin man fuparamitsamisicoinfoquin. Maton cucho yafi purato fumancayan choca sharafiaquicai ocumuran man chocamisima fasi choshtacoin. Nanscarifiai man yorafo shinanmapai yorasharaforan mato huanonfo. Ascafia maton nomuranshocai man shinansharamisima. Man shinanchaca fustimisi. Ahuaara fipaiqui futsa chaca huashon man fianmisi. Futsafo yopai cuscan atohuunoa shinantamarocon mafi man fipaiyai cuscan fusti man shinanfaini.²⁶ Fariseofoan mancai cayacafi shinansharamisima. Ascacun iquisi mato nomuran cayacafi shinansharacahuun isharashcaquin. Man ascaiton nantifiton ointirofo man yora sharacun.

²⁷ ¡Ohuashta! Ascashufin man fuparamitsamisicoinfoquin. Mahua quini muran yorafo nacun mai huamisifo. Amuran yorafoan shao suyacoinfo. Nan ahuun fupoti toquirininhuan

raishamisifo oshopa sharashta inon.²⁸ Nanscarifiai futsafoan mato oinqui shinantirofo man yora shara ointsa man sharayamafiacun. Manfin fuparamitsamisicoinfoquin. Mato nomuranshon ahuaara chacacoinfo man shinanmisi.²⁹ ¡Ohua! Moisés yononi cuscan tapimamisifo futan Fariseofoan. Manfin fasi fuparamitsamisicoinfoquin. Ascacufin Diosin mato onaintimaquin finacoinquin. Ascashon manfin mato shuni Dios tsain yoimisifo mai huanifo ano man ahuaara toquiri onihuamisiqui ato shinanshquin. Ascashori maiifo manaon man charofo huamisi.³⁰ Ascashon man yoimisi isca huaquin, “Nocon shunifoan Diosin tsain yoimisifo rutunifo cuscan nantian norifi niyoshocai non ato rutu cuanimaran,” ishon man yoimisi.³¹ Ascan nan man yoia cuscan icon. Maton shunifo rutumistsamisifoan. Marifi man ato cuscaracoin.³² Nanfoan ato chaca huafafainqui ato rutunifo. Ascan marifi man ato cuscaracoin na Diosin matoqui nichiarifi man rutushquiquin.

³³ Ascashu manfin rono cuscarafuquin. Rono paupaton facu cuscarafu. Diosin yoini cuscan nan omitsiscapanacafo muran marifi man iquishcani. Tsoancai mato nitun huatiroma. Marifi nanno man catio.³⁴ Ascacun un afanan Diosin tsain yoimisifo yafi Diosin tsainhuunshon cayacafi shinansharamisifo non ahuun tsain tapimamisifori un matoqui nichishqui. Nanforifi man ato rutushquin. Futsan ihui coyan iquinanqui man mastashquin nanon. Ascashon atrifi maton ichananti pushu muranshon man fichi cunoqui tuchiaton man coshashquin. Ascaquin man ato omitsisca huai nan pushufoti cafoquin man ato omitsisca huafoicaiquin.³⁵ Ascashofin nantifi Dios icoinra huafu rutunifoqui. Nan Abel shara rutuqui tau

huafain ahuun unutaqui nan Zacarías Berequiaspan facu rutunifo. Nanfin Dios fu tsainti pushu muranshon. Anoshon cufiti chaimashon man rutunifo. Ascan manfin nantifi nan rutunifo cuscan marifi man rutui cafisca huaiquin. Ascacun Diosin atohuunshon mato omitsisca huaqui finacoin. ³⁶ Ascacun un mato icon yoi. Nantifi Diospan yorafo chaca huapaonifo cuscan natian man niyoano atohuunshon mato omitsisca huaqui finacoin.

Jerusalén anoashu Jesús yorafohuunoashu uaini

Lc 13.34-35

³⁷ ¡Ohua! Jerusalén ano icafoan. Manfin Diosin tsain yoimisifo rutufain nan Diosin matoqui nichian futsafori man toquirinin ato tsacaqui nanonfo. ¡Ohua! Tacaranun ahuun facufo ahuun pui naman onutiro cuscan huaquin un mato yorafoya cushupaifia mancafin ua nica-casmamisiquin. Manricai uqui fumisima un mato cushunon. ³⁸ Ascan natiancai tsoan mato cushuima. Diosiricai afanan mato cushuima. ³⁹ Ascacuai man ua afanan oinnacama nan Diosin matoqui nichian un nai murannoashu oaitian. Man yoiqui isca huaino, “Dios nocoqui nichian fasi shara finacaia. Upa Diosin a shara huapanacaran,” ishon man uhu-unoa yoishquin, —ishon Jesús ato yoini ahuunoa.

Jesús yoini Dios fu tsainti pushu paoinshquiran ishon

Mr 13.1-2; Lc 21.5-6

24 Ascatan Jesús Dios fu tsainti pushu murannoashu caiton non afu rafuafoan yoini, —Ifon, oinpon. Nocon Dios fu tsainti pushu fasi sharashtacoinran, —non huaiton. ² Noco cumani, —Ai. Nan icon. Natian Dios fu tsainti pushu toquiri putsamuashu cunuacua sharashtacoin.

Ascafiashu nan man oiain chipo paoincanocai afanan rato toquirishta tushushquima, putsamushquima. Nantifi paoinquin cuyocoinshquiran, —ishon Jesús noco yoini.

Nan cuyoaitian ahuafo iishquiai cuscan

Mr 13.3-23; Lc 21.7-24; 17.22-24

³ Ascatan machi Olivo ano mapu-faintan Jesús tsaoni tsoa futsa anomano non afu rafuafoan yocaqui isca huani, —¿Nan min yoiyai cuscan ahuutian ishquimun? ¿Ahuuscashomun non tapi-tiroquin nantifi cuyoaitian min afanan oshquiai? Noco yoihuu, —non huaiton.

⁴ Jesús noco cumani, —Oinfain mato paranonfoma. ⁵ Yora ichapafoan “Un Cristoran,” ishon mato parapaishcani. Ascashon yora ichapafori parashcani. ⁶ Ascaino mani futsafo ya futsafo rutunainfoan man nicashquin. Ascara nica-cani ratuyamacahuun. Un mato yoimisi cuscan nanscacoïn aiquin. Ascafia nantifi cuyoaitian icataima. ⁷ Mai futsa ariafo fu futsafo ya rutunainfoanno mani futsafori mani futsafo ya rutunashquicani. Ascaino mai futsafoanri yora tushuomafo icaifoanno. Mai futsafo ari fasi mai nayanaiyaishquin. ⁸ Nanscaifin omitsiscái taushcaniquin. Ascafia chipo fasi finacai omitsiscashcani.

⁹ Ascano mato achicashon omitsisca huaquin mato rutushcani. Uhuunshon manfotiton mato noicasmashcani. ¹⁰ Ascaino nantianri atirifi yorafoan ua cachiquiri huashquicani afanancai tsoan ua iconra huashquicanima. Nanfo afiranan achinantananashcani noincasmatanancani. ¹¹ Ascaino nan fuparamitsamisifoan yoiqui isca huashcani, “Unfin Diospan tsain yoimisiquin,” ishon mato yoishcani. Afocai Diosin tsain yoimisiyamafiashton yora ichapafo ato iconra huamashcani. ¹² Ascaifoanno fasi yora chaca huaquin

finacoinshecani. Ascashocai afanan atirifi yorafoan Diosi noishcanima. ¹³Ascafia nan omitsisca huafiafoan tsoan ua cachiquiri huatama tunufain uhuun tsain tanasharacun un cushusharatiro Uhuun Upa Diosin icano afu ipasharanon. ¹⁴Ascano nan tsain shara Diosin nantifi yorafo iquinai cuscan manifoti uhuun tsain yoimisifoan yoiaitian un afanan oshquin.

¹⁵⁻¹⁶Ascacun Daniel nan Diosin tsain yoimisiton inon pacoai cuscan cunuqui isca huani,

“Dios fu tsainti pushu muran ahuara fasi chacacoinfo futsafoan huanonpacoiran,”

ishon cununi. Ascacun nan tapicahuun. Daniel cununi cuscacoin aiton oin nan Judea ano icafoan machi ari ichoriscatacahuun. ¹⁷Ascan tsoa pushu fomancayan niashucaí afanan ahuun pushu muran iquitiroa ahuara fiishquin. Ascatama ichoriscatahuun.

¹⁸Nanscarifiai tsoacai mau ano yonofiai afanan ahuun pushu ano nasotiroa ahuun sahuuti fiishquin. ¹⁹Ascacun ohua ainfo nan facu nanufo yafi aton facu yomumishti chocho acaifo omitsiscaashcani. ²⁰Ascacun Upa Dios cuficahuun nan omitsiscaitian oipacutian yafi tunutianri ascanonma.

Ascan nantian ascayamaino man ichoima. ²¹Nan omitsiscaitiancai tsoan ascara oinyomisima cuscara fasi yorafo omitsiscaí finacoinshecani. Diosin yora onihuaquin tau huani chaincai tsoa omitsiscaí ascayomisima. Ascashucaí tsoari afanan omitsiscaí ascanacama.

²²Ascashu nan omitsiscaifotian nantifi yorafo cuyocuashquin. Diosin ahuun yorafo nan catoanfo atohuun ramapaiqui omitsiscaifotian ato shatumariscashquin. ²³⁻²⁵Ascacun ua nicasharacahuun. Omitsiscaifotiancai icataima iquisi un mato yoiyoi. Nan omitsiscaifotianri nan

fuparamitsamisifo fucani. Fucashon yoiqui isca huacani, “Un Cristoran,” ishon yoi yamarai “Un Diospan tsain yoimisiran,” ishon nanfoan yoishcani. Ascashon nanfoanri Satanashuunshon tsoan atiroma cuscara mato ismaquin mato parapaishcani. Ascan Diosin nan catoanfo ato cushuyamaino nanfoanri nan fuparamitsamisifo icoinra huaacuana. Ascaino nantian mato yoishcani, “¡Oincapon! Nanfin nocon Cristoqui,” ishon yoi iyamarai, “Nanno chaimashta Cristo nocoqui oaran,” ishon yoiaifoan ato icoinra huayamacahuun.

²⁶Ascashon nanfoanri yoicani, “Cristo tsoan istaipama ano nocoaran,” ishon mato yoiaifoanno ari foyamacahuun. Nanscarifi aquin mato yoishcani, “Criston nan pushu cunu muran iquiaran,” ishon mato yoiaifoan ato icoinra huayamacahuun. ²⁷Uficoín un oaiton man ua shafacafi oinshquin. Canan facaicaítion shafacafi nantio non oinriscatatiro. Nanscarifiai unfin Diospan Facuquin un afanan oaiton nantifi yorafoan ua shafacafi oinshcani. ²⁸Ahuara naa nanno cotocotofo nocoriscatiro. Nanscarifiai un nocoaitian ua tanamisifo uqui furiscashcani.

Diospan facu nasoaitian

Mr 13.24-37; Lc 21.25-28

²⁹Ascashu nan omitsiscaifo cuscan anaitiano fari afanan chashayamafain oshuricai afanan chashashquima faquishicoín iishquin. Ascaino fishifori nai ariashu pacui futsushquin. Nantifi nai murannoafori nayanaiyaishquin. ³⁰Ascashon ahuarafu nai arishon un ismai cuscacoin aiton tapitirofo un afanan mai ano nasoai cuscan nantifi yorafoan tapinonfo. Un Diospan facushon un nantifi iquinai cuscan. Un nai murannoashu coin camaqui

fotoaiton oincani manifoti nan icoinra huamafo fasi ratucani uaishcani. Uhuun curushhuunoashu un fotoaiton oincani. ³¹ Ascaino nantianri uhuun oinmatifo ufu nai muran icafo un nichishquin aton manuti fasi curushcai chaan chaan acaino uhuun yorafo manifoti anofo yafi nai murannoafori uqui fushcani.

³² Ascacun un mato fana huiguerahuunoa ahuaara futsa yoinon. Ua nicasharacahuun. Huiguera pui risquisi futsuaiton man tapitiro faritian itiro cuscan. ³³ Nanscarifiai nan un mato yoiai cuscacoin aiton tapicahuun mun oti chaima nanscacoïn aiquin. ³⁴ Ascacun un mato icon yoi. Ahuarafo un mato yoiai cuscacoin aiton nataishoma oinyocani. ³⁵ Ascaino nai yafi mai cuyoshquin. Uhuun tsain cayacafi iconcoin fiananancai apanacama. Un mato yoiai cuscacoin aashquin.

³⁶ Ascafia ahuutiaran un nai ariashu afanan fotoainocai tsoan tapiama. Diosin oinmati afu icafoanricai tapiafoma. Urifi uhuun Upa Diosin facufiashocai un tapiama. Nan uhuun Upa Diosin fustitofin tapiaquin. ³⁷ Noco shuni Noé niyoano inifo cuscacoinrifiai afanan un oaitian nanscarifi ashcani. ³⁸ Ascano nantian tsoan Dios shinantama pii sharafain ayafain fianansharacainaifoanno. Fai tahuan noconi. Nanscasi ariaifoanno Noé ahuun shashohuan muran iquini. ³⁹ Ascashu iquifiaitocai tsoan tapinima fai tahuan nocoai. Ascashu nantifi yorafo asai futsunifo. Nanscacoïnriifi aashcani un afanan oaitian. Ua shinantama afi apaiyaifo cuscasi huariaifoanno. ⁴⁰ Ascaino nantianri nocofunu rafu mau ano yonocani futsa uari cai yamariscatanaino. Futsa nitushquin omitsiscapanacafo muran caashquin. ⁴¹ Nanscarifiai yainfon rafu nanincani.

Futsa uari cai yamariscatanaino futsa nitushquin omitsiscapashquin.

⁴² Ascacun itisharacahuun. Un maton ifofiacucai marifi man tapiama ahuutiain un afanan matoqui oshquicain. Un mato yoimisi cuscan nanscacoïn acahuun. ⁴³ Ua nicasharacahuun tapishcaquin. Pushu ifoan iquisi itisharashon yomutso yamu ahuuscaraino ahuun pushu muran iquiai tapishocai iquimatiroma. ⁴⁴ Nanscarifiai marifi itisharacahuun. “Iscaïno nocon Ifo oïmaran,” ishon shinanyamacahuun. Ahuuscaratanaino un matoqui nocoriscaïquin.

**Oinmati rafu futsa ifoan yonoai
cuscacoin aino futsa nan
yonoai cuscacoin aima**

Lc 12.41-48

⁴⁵ Man tapinon un mato yoi ahuu cuscaramain oinmati shara itiroquin. Niaifocoin mai futsa ari caquin niaïfo patashari yoitiro isca huaquin, “Uhuun oinmati futsafo ato tushu shafatifi inanhuun. Nanticoin rafu ato pashcananshara huahuun. Ascashon ua ato cushusharashohuun,” huafaini catiro. ⁴⁶ Ascatan niaïfocoin afanan nocoshon oian ahuun niaïfo patashari nan yoia cuscacoin aano fasi aqui unimacointiro. Ascashon naan shara huatiro. ⁴⁷ Ascacun un mato icon yoi. Nan niaïfoan ahuun oinmati yoi, “¡Aïcho! Natian nantifi uhuunafo mian cushusharashotïro- ran,” ishon yoitiro. ⁴⁸ Ascafia niaïfo patashari chacapan ahuun nomuran shinanquin isca huatiro, “Uhuun ifo funa nasoïmaran,” ishon shinanquin. ⁴⁹ Oinmati futsafo nantifi sutuqui futsatiro. Ascashon shafatifi nan paunmisifo ya pauncain monocai. ⁵⁰ Ascashon shinantiro isca huaquin, “Natiancai uhuun niaïfo oïmaran,” ifiaino samamashta nocoriscatiro. ⁵¹ Ascashon niaïfoan nan niaïfo patashari fasi onaintimai. Asca hu-

atan ahuun oinmati futsafo yonoqui isca huai, “Nan omitsiscapanacafo muran fuparamitsamisifo ano nan chaca potacahuun,” ishon ato yoishquin. Ascan nan-noashu uaiqui omitsiscapanaca.

Diez shomayafohuunoa Jesús ato yoini ahuara futsa ato tapimashquin

25 Ascatan diez shomayafohuunoa un mato yoi un oaitian ahuu cuscaramainquin un mato tapimashquin. Ascatan nan diez nan nocofunun rama ainfo fiaí manafo atofu fuusishcaquin. Ascafia nan nocofunun ahuun ahuin fiicashu nasoataimacai tosa afi ranan fuusi tauafoma. Nan diez shomayafoan iquisi lamparina foafo. Nocofunu manai focani. ²Nan mucu fustiti shomayafain tsoancai cayacafi shinansharayamafain itisharafoma. Asca nan mucu fustiti futsafoan shinansharafain iquisi itisharafo. ³Nan shinansharaimafoancai aton lamparina fofiaquin tsoan kerosene foama. ⁴Ascafia nan shinansharafain itisharafoan aton lamparina fofain iquisi keroseneri foafo. ⁵Ascafia nan nocofunun ahuun ahuin fiaicai funa nocoyamaino nan shomayafoan manariacani fasi oshapaicoincani oshafo. ⁶Ascashu oshafoanno futsan yamu nacucahuanaino oi ashcafinin ato cuna, “Nan ainfo fiicaitan man oiquin. Moinifoancahuun. Non ihui sharanon,” ato huua. ⁷Ascaino shomayafo moinifoan aton lamparinafo otaqui futsafo. ⁸Ascashon nan mucu fustiti shinansharaimafoan nan itisharafo yocani “Maton kerosene ichapamashta noco inancahuun. Man nocon lamparina nocaiquin,” ishon ato yocaifoan. ⁹Nan itisharafoan ato cumani, “Ma. Noconariraca itiroma. Ascan kerosene inanmitsafo ari fotocahuun fiishcaquin,” ato huanifo. ¹⁰Ascaino kerosene fii focani foaifoanno nan ahuun ahuin fiaí

nocotan iquicainaino nan shomaya itisharafo afu pushu muran iquiafo fuusishcaquin. Ascashon caincaiti fupoafo.

¹¹Ascaino chipo shomaya futsafo nococashon yoiáfo, “Ifon. Noco fupushohuun non iquionon,” huaifoan. ¹²“Un mato fupushotiroma. Icon un mato yoi. Uncái mato oinmisima,” ishon ato yoini. ¹³Nanscarifiai ahuutiaran un afanan matoqui oshquicain tsoan tapiama. Ascacun itisharacahuun.

Puihuunoa yoiqui Jesús ahuara futsa ato tapimani

Lc 19.11-27

¹⁴Afanan un mato ahuara futsahuunoa yoi. Nocofunu ahuun pushu anoashu chai caquin ahuun oinmatifo cunashon yoiquin isca huani, “Uhuun pui ua cushusharashocahuun,” ato huafaini cani. ¹⁵Ascashon ahuun oinmati rafu non fusti ato pui inanni. Futsa cinco mil pui inanfain futsa dos mil pui inanfain futsari mil inanni. Nan tapiáfo cuscan ato inanpacua. Ascan ato inantan mai futsari cani. ¹⁶Niaifoan caquin nan cinco mil inan cuscahuunshon samamashta ahuarafo fiashu afanan inanmitsashon ahuun rafanan cinco mil fia. Asca huaquin diez mil man fia. ¹⁷Nanscarifi aqui nan pui dos mil fiaton afanan dos mil fia. ¹⁸Ascan nan oinmati mil pui fusti fiaton funocasmaquin mai poquishon amuran ahuun niaifo pui huashoan.

¹⁹Ascashu fari ranan finontan afanan niaifo ahuun pushu ano nasoni. Nasoshon nan rafu non fusti ahuun oinmati ato cuna ahuutimain fishofoquin ato yocashquin. ²⁰Ascaino nan cinco mil pui inanniton yoiqui isca huani, “Niaifon, mian cinco mil pui inanni. Ascafia mun mia natian afanan cinco mil fishoan. Ascan oinpon. Naquian,” ishon inanni. ²¹Ascaiton ahuun niaifoan yoini,

“¡Aicho! Mian fasi shara huaa. Un mia yoia cuscacoin min huaa. Un mia ichapama inanfia ahuunshon min yonocoin shara. Ascacun nan un aya cuscan mian cushusharashotiro. Un unimai cuscan mirifi nanscarifiai min ufu unimatiro. Ascacun iquiyohuu,” ishon yoini.

²² Ascacun nan dos mil pui inanniton arifi yoiqui isca huani, “Niaifon, Mian dos mil pui inanni. Ascafia mun mia natian afanan dos mil fishoan. Ascan oinpon. Naquian,” ishon inanni. ²³ Ascaiton nanrifi ahuun niaifoan yoini, “¡Aicho! Mian fasi shara huaa. Un mia yoia cuscacoin min huaa. Un mia ichapama inanfia ahuunshon min yonocoin shara. Ascacun nan un aya cuscan mian cushusharashotiro. Un unimai cuscan mirifi nanscarifiai min ufu unimatiro. Ascacun iquiyohuu,” ishon yoini.

²⁴ Ascacun nan mil pui inanniton arifi yoiqui isca huani, “Niaifo, mun tapian mincai tsoa shinainma. Minricai nocoahuun ramapaima. Non mia yonoshofitocai min noco ahua inantiroma. Mina fusti itiroran. ²⁵ Ascacun un ratuqui min ua inan cuscahuunshon ahuaraf fi-paifiai un funotiroracati, ishon un shinan. Ascacun nan mian inan cuscan un mai muran onua. Ascan natian mun mia fishoan. Oinpon. Naquian,” huaiton.

²⁶ Ahuun niaifoan cumani, “Min fasi chacacoin. Minfin oinmati shanishuniquin. ¿Min shinanmun un futsafo shinainmaquin? ¿Uaraca futsafoan yonoshonaiton un ato ahua inanma? ²⁷ ¿Ascacun nannori shinanfiaquin ahuuscaquin mai muran min pui huamun? Asca huatamarocon nan pui huamisifoanno min huacun un nocoshon paratamari un fiicuanaran,” ishon niaifoan yoini.

²⁸ Ascacun ahuun niaifo patashari yononi, “Nan oinmati shanishuni ahuun pui fianhuun futsa nan cinco mil aya inanshquin. ²⁹ Ascacun nan ua icoinra

huacoinnatin un fasi paratamacoin inainquin. Ascan nan ua icoinra huama ichapama aya cuscan futsan fiain. ³⁰ Ascacun nan oinmati ahua tapiama chaca faquish muran potacahuun. Nannoashu fasi omitsiscapai fasi uainon,” ishon niaifoan yoini.

**Cuyoaitian Jesús yoishquin
ratofomain afu ipatiro iyamarai
omitsiscapanacafo muran focaniquin**

³¹ Ascacun un mato afanan yoi. Unfi Dios ariashu mai ano fotoniquin. Ascacashu un afanan oaitian nantififain aton niaifocoin un iishqui. Un Diospan Facucoincun nantififain ua oinshcani. Uhuun oinmatifo ufu nai muran icafoya un oaiton. Nantianri un ato yoishquin ratofomain Diospan yorafo iyamarai ahuun yorafomaquin. ³² Ascacashu nantifi manifestifi uqui fushcani. Chashoan cushumisiton ahuun chashoanfo yafi nan chashoan ointsafon anu cabra aton ichanan huai. Nan chashoanfosi tiri futsa huafain nan cabrafori tiri futsa huai. ³³ Ascacashon ahuun mumihuuri chashoanfo huafain ahuun mushquihuuri cabrafo huai. Nanscarifiai ua tanamisifo un tiri futsa huafain nan ua icoinra huamafo un tiri futsa huai. Ua tanamisifo uhuun mumihuuri huafain uhuun mushquihuuri nan ua icoinra huamafo ato huashquin.

³⁴ Ascacun un Niaifoshon nan ua tanamisifo un yoiqui isca huashquin, “Uqui fucahuun. Uhuun Upa Diosin mato unimamanon. Nan mai onihuaitian matohuunoa shinanquin isca huani, ‘Un icano un ato iquimanonpacoi uhuun yorafo inonfo. Uhuunafori atona inonpacoiran,’ ishon Upa Diosin shinanyoni.

³⁵ “Man ua shara huamisi. Ascacun uhuun Upa Diosiri mato shara huashquin. Un fonaicaiton man ua pimamisi. Un nomiaiton man ua ayamamisi. Un matoqui nocoaiton ua

oinyamafiamisishaquin man ua yoiqui isca huamisi, ‘Uhuun pushu muran iquiyohuu. Un mia pimafain min nuno uhuun pushu muran oshatiro.’³⁶ Un sahuutiromacuri man ua sahuuti sahumani. Un isinincaitori man ua cushusharamisi. Ua cunu muran iquimanafoan man ua oin camisiran,” ishon ua tanamisifo un yoishqui.

³⁷ Ascacun ua tanamisisharafo uhuun Upa Diosin aton chaca soashona. Nanfoan ua cumacaquin isca huashcani, “¿Ifon, ahuutian non mia oinmismun min fonaincaiton non mia pimafain min nomiaitori non mia ayamamisi?³⁸ ¿Ahuutianritsi min nocoqui nocoaiton non mia oinyamafiamisishaquin non mia nocon pushu muran iquimafain min sahuutiromacuri non mia sahuuti sahumamisi?³⁹ ¿Ascan ahuutianritsi mia cunu muran iquimanafoan non mia oincani?” ishon ua yoishcani.

⁴⁰ Ascaifoan un aton niaifoan un ato yoiqui isca huashquin, “Uhuun yorafo nan ua icoindra huafo futsafoan atohu-unoa yoiqui isca huamisi ‘Nancai ahumararan,’ ishon man yoimisi. Asca nan uhuun yora ahumafiashu man ato shara huamisi cuscafin nan uari shara huai cafisca man ato huamisiquin,” ishon un ato yoishquin.

^{41–43} Ascashon nan ua icoindra huamafo tiri futsa niafoan un ato yoiqui isca huashquin, “Manfin ua chaca huamisiquin. Un fonainfiatocai man ua pimamisima. Un nomiaitoricai man ua ahudara ayamamisima. Un matoqui nocofiatocai ua oinyamafiamisishaquin man ua pimayamafain un sahuutiro-mafiacuri man ua sahumamisima. Un isinincaitoricai man ua cushumisima. Ua cunu muran iquimanafoan cai man ua oincamisima. Ascacun umaquinoashu fotacahuun. Nan yoshin chaca Satanás yafi afu yoshin chaca futsafo Upa Diosin ato chi

urumanhuan itishara huashoan nannori mato potai. Nannoashu nanfoya man omitsiscapashquin,” ishon un ato yoiaiton.

⁴⁴ Nan ua icoindra huamafoan ua cumaquin isca huashcani, “¿Ifon, ahuutiamun non mia oinmisiquin min fonaincaiton non mia pimayamafain min nomiaiton non mia ayamamisima? ¿Ahuutianmun min nocoqui nocofaiton oinyamafiamisishaquin non mia cushusharayamafain min sahuutiromacun non mia sahumamisima? ¿Ahuutianritsi min isinincaiton mia cushuyamafain mia cunu muran iquimafiafo non mia oin camisimamun?” ishon ua yocashcani.

⁴⁵ Ascaiton un ato cumaquin isca huashquin, “Un mato icon yoinon. Nan ua icoindra hua futsafo man yoimisi isca huaquin, ‘Nancai ahumararan,’ ishon atohu-unoa man yoimisi. Ato asca huaquifin nan ua shara huaima cafisca man huamisiquin,” ishon un ato yoishquin.

⁴⁶ Un ato nannori yoiaino umaquinoashu omitsiscapanacafo muran foshcani. Ascaino nan ua icoindra huafo uhuun Upa Diosin aton chaca soashonafo un icano ufu foshcani ufu ipashcaquin, —ishon Jesús ato yoini.

Jesús rutushcaquin afi ranan yoinanifo

Mr 14.1-2; Lc 22.1-2; Jn 11.45-53

26 Ascano noco yoiqui anaititan Jesús afanan afu rafuafosi tsain futsa noco yoiqui isca huani,²—Man man tapian nocon fusiti shafa man nococuwana. [Diosin ahuun oinmati nan afu ica yonoa Egipciofoan aton furun iyoafofosi rutuqui futsani. Ascafiaquicai nocon shunifoan aton furun iyoafofo finonmani ato rutuquima.] Nan non shinanmisi nocon fusiti osha rafutan iqui. Ascan nantianri ua ato achimacani ua mastanonfo, —ishon Jesús noco yoini.

³Ascan nantianri nocon yorafohuunshon Dios cufimisi niaifofo futan Moisés cununi cuscan tapimamisifo non Dios fu tsainti pushu cushumisifo Caifás pushu ano ichanancani. Nan Caifás nocon yorafohuunshon Dios cufimisi niaifofo ini. ⁴Ascashu ichanancashon shinnannifo, —¿Ahuuscashomain non Jesús achinoanti rutushquin? —ishon ahuara chanishtahuunshon rutupaicaquin. ⁵Ascacun yoinifo, —Fusititancái non achitiroma yorafo fasi mucacani nocoqui sinatiroforan, —icashu yoinannifo.

Ainfoan Jesusqui ininti ocani

Mr 14.3-9; Jn 12.1-8

⁶Ascatan non Jesús fu Betania ano cani. Caashu Simón pushu muran non iquini. Nan Simón nami tocoi futsua ini. ⁷Jesús nannoshon noco futan piaino ainfo ininti tsomashu oni aqui ocashquin. Nan moticanun ahuun anu alabastro. Amuran ahuun ininti fasi paratamacoin ahuun pui nuua. Ascashon ainfoan Jesús ahuun mapoqui ininti ocani.

⁸Ocaiton oin non afu rafuafo ainfoqui non sinacoinqui yoini, —¿Ahuuscaimun nan ininti fasi paratamacoin ahuun pui nuua na ainfoan ocaiqui? ⁹Nan ininti ocatama inanmitsashon ahuun rafanan pui fishon nan yora ahuuomafo inanshara icuanaran, —icashu non yoinanni.

¹⁰Ascaiton non yoiai cuscan Jesús onanshon noco yoini, —¿Ahuuscaimun na ainfoqui man tsain chipuicain? Uafin nanton fasi shara huaquin. ¹¹Manfin yora ahuuomafo fu ipanacaquin. Ratoran shafatan man ato ahuara shara huashotiro. Ascafia uncai nuno mai ano matofu ipanacama. ¹²Ascan nan ainfoanfin uqui ininti ocaquin. Nan yora maiamamaquin ininti ocamisifo cuscan un nataiyamafiaiton na ainfoan ua shinanquin uqui ininti oca. Uhuun caya iquisi itishara huapai ua

mai huashquiaifo cuscan. ¹³Ascacun un mato icon yoi. Nan tsain shara uhuunoa manifotiton yoishceni. Nan ainfoan ua rama aca cuscan yoishceni. Ascashon ua shara huaa cuscan ahuunoa shinanpacushcaniran, —ishon Jesús noco yoini.

Judaspan Jesús ato achimani

Mr 14.10-11; Lc 22.3-6

¹⁴Noco nannori Jesús yoaino non afu rafuafo doce futsan ahuun anu Judas Iscariote nocon yorafohuunshon Dios cufimisi niaifofo ano cani. ¹⁵Ascacaini cashon ato yoiqui isca huani, —¿Un mato Jesús achimacun ahuuti pui man ua inantromun? —ishon ato yocaiton. Cumanifo, —Non mia treinta toro os-hopafa inantiroran, —ishon yoinifo. Asca huatan inannifo. ¹⁶Ascano nantian Judaspan ahuun nomuran shinanqui tau huani, —¿Ahuuscashomain un ato Jesús achimanoanti? —ishon shinanriani.

Ahuun unutaqui Jesús afu rafumisifo futan pini

Mr 14.12-25; Lc 22.7-23; Jn 13.21-30; 1Co 11.23-26

¹⁷Ascano noco fusiti shafan man no-coano nan shafa misi farashati maisi non pimisi. Nantian non afu rafuafo Jesusqui cashon non yocani, —Ifo, na shafan nocon fuusititian. Nan nocon shunifoan ato facu iyoafofo Diospan nai oinmati finonmani ato rutuquima nan non shinanmisi. ¿Ascan rani min noco nichipaimun non mia itishara huashonon no futan anoshon piishquin? —ishon non yocani.

¹⁸Jesús noco cumani, —Jerusalén ano fotacahuun. Nanno nocofunu futsaqui nocoshon yoiqui isca huacahuun. “Nocon tapimamisiton mia tsain formaqui isca huaa, ‘Un naitian man nocoti chaimashtaqui. Nocon fusititian non min pushu muranshon piiran,’ ishon noco Jesús yoiaran,” —ishon yoitacahuun noco huani. ¹⁹Ascashu nan noco

yoia cuscacoin huaquin cunu muran non itishara huani. Nannoshori chashoanun facu non pichani piishquin.

²⁰ Man fari caino non afu rafuafoya Jesús sapa ano tsaoni. ²¹ Nannoshon non paiton Jesús noco yoini, —Un mato icon yoi. Nan ratoran futsan man ua ato achimairan, —noco huaiton. ²² Nicai non pusinima. Ascashon non yocani, —¿Umun, Ifon? —ishon nantifiton non yocapacuni.

²³ Ascaiton noco yoini, —Nan man ufutan taso murannoa misi pocotan paitofin man ua ato achimaiquin. ²⁴ Ascan Upa Diosin tsain inon pacoai uhuunoa cununi cuscacoinfin un naicain. Ascafia nan nocofunun ua ato achimanai cainya-manifin shara icuanaquin, —ishon Jesús noco yoiaiton.

²⁵ Nicaquin Judas, nan ato achimaiton Jesús yocani, —¿Umun, Ifon? —huaiton. —Aifain. Minfiqi, —huani.

²⁶ Ascashon piaifoanno Jesús misi finifoantan iquisi apa Diosin cufiyoni —¡Aicho! Upa, min noco cushusharafafainiran, —huatan noco yoini, —Na uhuun caya cuscara. Picahuun, —ishon torupacushon nocoti inanni.

²⁷ Ascashon cucho finifoan afanan Apa cufini, —¡Aicho! Upa, min noco cushushararan, —huatan cuchoqui fimi unu manuta noco inanqui yoini. —Nantififain na ayacucahuun, —noco huani. ²⁸ Asca huatan noco yoini, —Naafin uhuun imi cuscaraquin. Uhuun imi focain un nai. Nantifi yorafoan chaca huamisihuunoashu un nai aton chaca soashonon. Un ascano yora ichapafo Diosin potapacunonma. ²⁹ Ascacun un mato icon yoi. Uncai funa afanan mato futan ayaima. Nan uhuun Upa Diosin ni-aifoan nantifi iquinaitian un afanan maton futan ayashquin, —noco huani.

³⁰ Ascano man ahuun tsain yoiqui anaititan Diosin tsain non fanainni. As-

catan machi ahuun anu Olivo ano non cani.

—Pedro min futsafo, “Un Jesús oinmisimaran,” ishon min yoiran, —Jesús huani

Mr 14.26-31; Lc 22.31-34; Jn 13.36-38

³¹ Ascashon afanan noco yoini, —Na yamutafin nantififain man ua potafaini ichoi caiquin. Diosin tsain cununi isca huaquin,

“Unfi chashoanfo cushumisi rutuicain. Ascaino chashoanfo ichoi futsucaniran,”

icashu cununi. Nanscarifiai ua rutu-aifoanno na yamutan man uhuunoashu ratufaini ichoicai. ³² Ascafia un funiashu Galilea ano un cai tauicai. Ascano man uqui chipo nocoicashquiran, —ishon Jesús noco yoiaiton.

³³ Pedronun Jesús cumani, —Nantifiton mia potafiaifoannocai un mia potaimaran, —huaiton. ³⁴ Jesús Pedro yoini, —Un mia icon yoi Pedro. Tacara cuoataima min ato yoiqui “Uncai Jesús oinmisimaran,” ishon min ato yoiqui rafunon fusti huairan, —huaiton. ³⁵ —Ma, Ifo. Un mifu nafiaquicai un ato yoinacama un mia oinmisimaran, —ishon Pedronun yoini. Ascaiton norifi nantifiton non nannori yoini.

Jesús Getsemaní anoshon apa cufini

Mr 14.32-42; Lc 22.39-46

³⁶ Ascatan ihuifo mapoano ahuun anu Getsemaní nanno Jesús no fu cashon noco yoini, —Nuno tsaocahuun. Uhuun Upa un cufiyotanon, —noco yoini. ³⁷ Ascatan Pedro yafi Zebedeo ahuun facu rafu Santiago yafi Juan nan rafu non fusti ato iyoni. Nan fasi omitsiscai tauai cuscan shinain fasi ahuun nomuran isicoinni. ³⁸ Ascashon ato yoini, —Un fasi omitsiscai cuscan uhuun nomuran-shon shinain mun naacuana. Ascacun

nunoshon oinyocahuun. Oshacaquima, —ishon ato yoini.

³⁹ Ato asca huatan chaimashta caashu fuopacucahuan Apa Dios cufini, —Upa un omitsiscai cuscan mian numatiromainquin ua numahuu. Ascafiaшон un apaiyai cuscan huaquima nan min apaiyai cuscan fusti ua huahuu, —huani.

⁴⁰ Ascashon apa cufinquin anaititan afanan atoqui oquin oian man oshafo ini. Ascaiton Jesús Pedro yoini, —¿Man u futan Diosin cufiyotiomamun?

⁴¹ Oshacaquima. Dios cuficahuun Satanás mato chaca huamapaiyai cuscan huashcaquima. Ascashon Diosin mato amapaiyai cuscan marifi huapaifiaquicai Diospan curushyamainocai man atiro-maran, —ishon Jesús ato yoini.

⁴² Ato asca huatan afanan apa Dios cuficaicani. Cashon apa yoini, —Upa, min ahuara futsa yorafo numashqui atiomamainquin nan min apaiyai cuscan huahuu. Unfi man itisharaqui atohuunoashu omitsiscacaini naashqui, —ishon Jesús apa cufini.

⁴³ Ascashu afanan atoqui oquin oian afu rafuafo afi oshafo ini. Fasi osha murancoianfo. ⁴⁴ Ascaino afanan ato anoashu cashon apa Dios cufini. Nan cufia cuscacoin afanan nannori cufini.

⁴⁵ Ascatan afanan oquin oian afi oshafo ini. Ascaiton ato yoini, —¿Manmun afi moiama? Natianfin nan chaca huamisifoan ua ato achimai fucaniquin. ⁴⁶ Funicahuun. Non canon. Nan nocofunun ua ato achimai man oiquin, —ato huani.

Jesús achinifo

Mr 14.43-50; Lc 22.47-53; Jn 18.2-11

⁴⁷ Ascaino nan Judas Jesús fu rafumisi futsan oaino a yorahuanrasi nopu yafi coshatifo tso macanashu funifo. Nocon yorafohuunshon Dios cufimisi niaifofoan futan Dios fu tsainti pushu niaifo

patasharifoan ato yonoa funifo. ⁴⁸ Nan Judaspan yorafo iquisi yoiqui isca huani, —Un Jesús tamoqui tsoacaiton tapicahuun nanfin Jesusquin achicahuun, —ato huani. ⁴⁹ Ato yoiqui asca huatan samamashta Judas Jesusqui nocoshon ahuun tamo tsoacatan yoini, —Tapimamisiton, man yamuaran —ishon yoiaiton.

⁵⁰ Jesús cumani, —Uhuun yoran, nan mian apaiyai cuscan ua huahuu. Nanscayoi min oquin, —huani. Ascaiton nan Judas fu fuafoan Jesús achinifo niaifofo ano iyoshcaquin. ⁵¹ Ascaiton Jesús fu rafua futsan nopu fitan nocon yorafohuunshon Dios cufimisi niaifocoinin ahuun oinmati pashtufain rurani.

⁵² Ascaiton Jesús yoini, —Unuhuu. Min nopu ahuun ona muran huahuun. Nan nopun yora rutuafin arifi nopun natiroquin. ⁵³ Uhuun Upa Dios un yocaitofin ahuun oinmatifo afu icafo 72,000 ua nichishotiroquin ua cushui funonfo. ⁵⁴ Ascan uafin uhuun Upa Diosin ahuun nai oinmatifo ua nichishotiroquin ua cushui funonfo. ¿Ascafia ahuuscashumun Diosin tsain uhuunoa cununi cuscan un yorafohuunoashu natiromaquin? Ascan uncai Upa Dios cufima ua ahuun oinmatifo afu icafo ua cushunon, —ishon Jesús ato yoini.

⁵⁵ Ascaino nantianri Jesús achipaiyaifoan ato yoini, —¿Unmun yora pofu cuscaracun man ua nopu yafi coshatifo yashon achi fua? Shafatifi un Dios fu tsainti pushu muranshon un mato yoifiaitocai man ua achipaiti huama. ⁵⁶ Ascafia nan man ua acai cuscan Diosin tsain yoimisifoan uhuunoa cununifo cuscan nanscacoin man ua huairan, —ishon Jesús ato yoini. Ascaino non afu rafuafo nantifi non amaqui ichoni.

Jesús niaifooan ointaifi iyonifo

*Mr 14.53-65; Lc 22.54-55,
63-71; Jn 18.12-14, 19-24*

⁵⁷ Ascano achicashon nocon yorafohu-unshon Dios cufimisi niaifocoinin ahuun pushu ano iyonifo. Nan niaifoan ahuun anu Caifás. Nannori niaifofo ichananifo. ⁵⁸ Ascaino Pedro acachori cani. Acachori cafiái fishtatama cani. Dios fu tsainti pushu cushumisifoya Pedro niaifoan umainti ano tsaoni Jesusmain ahuusca huacaniquin ishon oinpai.

⁵⁹ Nannoshon niaifooan shinanpainifo, —¿Nonmun raquiri huatiroquin Jesús ahuara chaca huaran ishon rutushquin? Ahuacai ahuusca huaiton non nicayomisima non rutuai, —icananshu nocon niaifofo afi ranan yoinannifo. ⁶⁰⁻⁶¹ Yora ichapafoan, —Jesús ahuara chaca huaran, —ishon ahuunoa tsain chaca yoinifo. Paracaquin. Ascafia niaifooancai Jesushuunoa ahuara chaca iconcain nicanifoma rutushcaquin. Ascashon futsafoan Jesushuunoa tsain chaca huaquin anaitiafoanno chipo nocofunu rafutan niaifooan ointaifi Jesusqui tsain chaca huanifo. —Man non nicaitan na nocofunun isca huaquin yoia, “Nocon Dios fu tsainti pushu yorafooan aca cuscan unfi choquiatiroquin. Ascashon osha rafu non fusti finontan un afanan futsa huatiro. Uncai tsofutan atiroma. Urus fustifin un atiroquin,” Jesús iquitaran, —ishon nan rafutan yoinifo. ⁶² Ascano yorafohuunshon Dios cufimisifo aton niaifocoin nan Caifás Jesús yocani, —¿Miqui tsain chaca huafo cuscan icon iyamarai iconmamun? —ishon yocaino. ⁶³ Jesús puusinima. Ascaiton afanan yoini, —Diosin nan nipamisi ahuun anuhuunshon ua yoihuu. ¿Minmain Diospan Furunquin nan Diosin mia catonmainquin? Ascan natian nannori

un mia yonoi. Ua icon yoihuu, —ishon yocaiton.

⁶⁴ Jesús cumani, —Nan mian yoiai cuscafin unquin. Un mato yoinon. Upa Diosin ahuamamishti huatiro cuscan chipo man ua oinshquin. Uhuun Upa Diosin niaifo fu un icun. Urifimain un afu niaifocoianshu. Ascacun un nai arishu coinfo camaqui oaiton man ua oinshquiran, —ishon Jesús ato yoini.

⁶⁵ Ascaiton nicai nocon yorafohuunshon Dios cufimisi niaifocoin, —Un Diospan Fururan, —Jesús icaiton nicai fasi sinacoinni. Ascacun ahuun sahuuti fashnuqui yoini, —Noncai afanan yorafooan Jesusqui tsain chaca huai yopaima. Manmain nofocoin ahuun tsain chaca nicayamaifin, “Un Diospan fururan,” iquifin Dios chaca huaquin. ⁶⁶ ¿Ascacun man ahuusca Jesús huapaimun? —ishon aton niaifocoinin ato yocaiton. Nantififain, —A rutucahuun, —huanifo.

⁶⁷ Asca huatan ahuun fusoqui cumo michofain sutufain futsan tapasni. Ascashon cashu mutsama huacaquin. ⁶⁸ Yoinifo, —Min Cristomainquin min nantifi tapicoian. Asca tsoan mia acamainquin noco yoihuu, —ishon cashu mutsama huanifo.

**—Un Jesús oinmisimaran,
—ishon Pedronun yoini**

*Mr 14.66-72; Lc 22.56-62;
Jn 18.15-18, 25-27*

⁶⁹ Ascaino Pedro pushu umainti caashu tsaoni. Ascano nocohuunshon Dios cufimisi niaifoan ahuun oinmati shomayaton Pedro fuchishon yoini, —Jesús Nazaret anoa fu mirifi min afu oaquin, —huaiton. ⁷⁰ —Ma. Mian yoiai cuscaai un tapiamafinquin, —Pedronun aton ointaifi huani.

⁷¹ Asca huafaini caincaiti ano caacun nannoshori shomaya futsanri Pedro fuchishon ato yoini, —Na nocofunufin

Jesús Nazaret anoa fu imisiquin, —ishon yoiaiton.

⁷² Afanan Pedronun yoini, —Ma. Min yoiai cuscafin Diosin tapiaquin uncai na nocofunu oinmisimaran, —ishon yoini.

⁷³ Sama racatan afu niafoan Pedro yoinifo, —Icon. Minfin mirifi Galilea anoquin. Min tsainhuunshon non mia onanran, —ishon yoiafoan.

⁷⁴ Afanan ato yoini, —Uncai mato paratiroma. Diosin ua oin. Un chanicun Diosin ua chii uru muran potatiro. Nantonfin tapiaquin un mato icocoin yoiaiton. Ascan uncai na nocofunu Jesús oinmisimaran, —ishon Pedronun afanan ato yoini. Ascaino samamashta tacara cuoni. ⁷⁵ Tacara cuoaino Jesús yoia cuscan Pedronun shinantani. —Pedron un mia yoi. Na yamutan tacara cuoataima min ato yoiqi rafu non fusti huai, “Un Jesús oinmisimaran,” —ishon Jesús yoia cuscan shinantani chifi caashu Pedro fasi uaini.

Pilato ano Jesús iyonifo

Mr 15.1; Lc 23.1-2; Jn 18.28-32

27 Ascaino funamanrishta nocon niaifofoan shinanpainifo, —Ahuuscashomain non Jesús rutumatiroquin, —icashu yoinannifo. ² Ascatan munushcashon nan Romanon niaifoan ahuun anu Pilato ano Jesús iyonifo.

Judas nani cuscan

³ Asca huashon Judaspan Jesús rutu-aifoan nicaquin fasi shinanni. —¡Ohua! Un Jesús ato achimanama shara icuanaran, —ishon shinanni. Ascashu nocon yorafohuunshon Dios cufimisi niaifofo yafi Dios fu tsainti pushu niaifofo ano cani treinta toro paratama-coin ahuun pui nuua ato nasoin cai. Ascacainicashon ato yoini. ⁴ —Unfin chaca huaquin. Jesuscai ahua chaca huayamafiamisicun un ato parashon achima-

naran, —ishon ato yoiaiton. Cumanifo, —Ahuuscaquitsi min noco anori yoioa. Noncai ascara tapipaima. Mififin min shinanquin, —huaifoan. ⁵ Nicaquin nan Dios fu tsainti pushu muranshon ato naman torofo saafaini caashu afiri rusfipan tunushumuacucahuatan nani.

⁶ Asca huatan Judas cai cachiori niaifofoan nan torofo topinifo. Ascashu niaifofo afi ranan yoinannifo, —Nocon shunifoan yononi cuscan non ahuun rafanan yora rutumana nan puicai non Dios fu tsainti pushu muran huatiroma. Nan pui huati murancai non huatiroma. ⁷ Na torofohuunshon nan cuti huamisi ahuun mai non finon. Nanno yora futsafo non mai huanon, —icashu yoinannifo. ⁸ Ascasho nan mai anunifo —Imi maiiran, —huanifo. Natianri nan nori yoiafo. ⁹⁻¹⁰ Ascaino nan Diosin tsain yoimisi Jeremías inon pacoai cununi cuscan natian man nanscacoïn huaafo. Isca huaquin cununi, “Israelifoan yoinifo, ‘Non treinta toro inantiro nan nocofunun noco achimashocun,’ ishon yoiafo. Nan torofohuunshon cuti huamision ahuun mai fiafo. Uhuun Ifoan ua yononi cuscan un cuti huamision ahuun mai fia. Nanscarifi aqui nanfoanrifi aton torofohuunshon cuti huamision ahuun mai fiaforan,” ishon Jeremías cununi.

Pilato ano Jesús iyonifo

Mr 15.2-5; Lc 23.3-5; Jn 18.33-38

¹¹ Ascashu Romanon niaifoan ahuun anu Pilato fu Jesús nia ini. Nan niaifoan Jesús yocani, —¿Minmun Judiofoan niaifocoin? —ishon yocaiton. —Nan min ua yoiai cuscafin unquin, —Jesús huani. ¹² Ascashon nocon yorafohuunshon Dios cufimisi niaifofo yafi Dios fu tsainti pushu niaifofoanri Jesús ahua chaca huamisiran huafiaifoanno-cai puusinima. ¹³ Ascaiton Pilato yoini,

—¿Yorafoan mia chaca huaifo cuscan min nicaimamun? ¿Min ato cumapaimamun? —ishon yoini. ¹⁴Asca huafiaitocai Jesús cumanima. Tsain ichapa aqui chaca huafiaifoanricai fustishta ato cumanima. Ascaiton Pilato ahuun nomuran shinanni, —¡Aira! ¿Ahuuscai ato cumapaimamun? —ishon shinanni.

Niaifoan ato yononi Jesús rutunonfo

Mr 15.6-20; Lc 23.13-25; Jn 18.38-19.16

¹⁵Nan fusitian faritifi a cunu muran iquiafo fusti caimaquin Pilato ato yocapaoni. —¿Ratocai man caimaimamun? —ishon yorafo yocapaoni. ¹⁶Nantianri cunu muran iquia nocofunu fasi pofu rutumitsamisi. Ahuun anu Barrabás ini. ¹⁷⁻¹⁸Jesús ahua chaca huaiyamafiacun. A icai cuscan apaicaquin nocon niaifofo Jesusqui sinacaquin Pilato ano iyonifo. Nan acaifo cuscan Pilato man tapian ini. Ascacun Pilato nanno yora ichananfo yocani, —¿Ratocaimun un mato cainmashotioquin? ¿Barrabás iyamarai Jesús nan Cristo Diosin catoanran man huamisi? —ishon ato yocaiton. ¹⁹Ato yocatan tsaoshon manani cumaifoan nicapaiquin. Ascaino ahuinin cunu fuma aqui noconi. Cunun yoiqui isca huani, —Nan nocofunu Jesús shara. Ahua chaca huamaquin. Ahuusca huayamahuu. Uhuun namapan un oian ahua chaca huayamafishu omitsiscaiton oin urifi uhuun nomuran ahuunoashu un omitsiscacoinna. Ascacun ahuusca huayamahuu, —ishon Pilato ahuinin cunushoni.

²⁰Ascafiacun nocon yorafohuunshon Dios cufimisi niaifofo yafi Dios fu tsainti pushu cushumisifoan nanno ichananfo ato yosiquin isca huanifo, —Jesús noco cainmashotamarocon Barrabás noco cainmashohuun. Ascashon Jesús rutuhuu ishon Pilato yoicahuun, —ishon ato yononifo.

²¹Ascacun Pilato ato yocani, —¿Nan rafu ratocaimun man fuchipaiquin un mato caimashonon? —ishon ato yocaiton. “Barrabasquian,” huaifoan. ²²—¿Un Barrabás caimashomun un Jesús nan Cristo Diosin catoan un ahuusca huaicai? —ishon ato yocaiton. Afanan nantifiton yoinifo, —Mastahuun, nanon, —huaifoan.

²³Ascaifoan Pilato ato cumani, —¿Ahuuscacufin? ¿Ahuamun chaca huaquin? —ishon ato yoiaiton. Ascafia fasi curushcain yoirianifo, —Mastahuun, nariscanon, —huanifo.

²⁴Ascaiton Pilato oian tsoan nica-paitama fasirocon mucai finaifoan. Masu fitan aton ointaifi muchoquimuni. Muchoquimutan ato yoini, —¡Oincapon! Uhuun nuama. Un Jesús cainmapaifiaino cai man cainmapaima. Manrocon fasi rutupai. Ascan matohuunfi nuuquin, —ishon ato yoiaiton. ²⁵Nantififain cumanifo, —Nanscanon. A nai nocohuun nu-unonquin. Nocon facufohuunri nuunon, —ishon yoinifo.

²⁶Ascaifoan nicaquin Pilato Barrabás ato cainmashoni. Ascashon ahuun ranushumuafu yononcon fichi cunoqui tuchiaiton Jesús coshaqui futsanifo. Asca huashon mastanonfo iyonifo.

²⁷Nan ranushumuafu Jesús iyoafu anofin niaifoan ahuun pushu iniquin. Ascano nan niaifo cushumisifoan ranushumuafu chifinoafu cunani Jesús oin funonfo. ²⁸Ascashon ahuun sahuuti shorifain futsa shonan sahuumanifo.

²⁹Ascatan mosha chainipafo maiti huashon maimafain poquiti ahuun mumihuuri tsoamashon ratoconun mai chachishon yoinifo, —¡Aicho! Minfin Judiofoan aton niaifoquin, —ishon cashu mutsama huanifo.

³⁰Ascashon aqui cumo michofain ahuun poquiti fiantan ahuun coshacacunifo.

³¹Ascashofin cashu mutsama huacatan nan sahuuti shonan pucashon ahuun

sahuuticoin afanan sahumanifo. Asca huatan mastai focaquin iyonifo.

**Jesús ihui coyan
iquinanqui mastanifo**

Mr 15.21-32; Lc 23.26-43; Jn 19.17-27

³²Focani nan nocofunu Simonqui noconifo. Nan Simonfin Cirene anoashu cainniquin. Ascan nan ranushumuaton yononi. —Ihui coyan iquinan noco foshoicahuun, —ishon iyamafainifo. ³³Gólgota ano fonifo. Gólgota yoia mapo shao.

³⁴Nanno nococashon Jesús fimi unu pau tashipia osia ayamapaiyaifoan muutacai Jesús apainima. ³⁵Asca huatan Jesús iyocashon mastanifo. Mastacatan ahuun sahuuti fianpacunifo. Toquiri tocoro rafuya cashuqui nan finonmanaton ahuun sahuuti fiqúi tau huani. Ascashon cuyonfianifo. ³⁶Asca huatan tsaocashon a Jesús mastafo foisnifo.

³⁷Ascano man ihui coyan iquinanqui mastacashon amanaonri cununifo isca huaquin,

**NAN JESUSFIN ISRAELIFOAN
ATON NIAIFOCOINQUIN**

ishon cununifo. Nannori Jesús icaran ishon mastanifo. ³⁸Ascashon yomutso rafuri mastanifo. Ocuma futsa futsafain ocuma futsa futsa anifo. ³⁹⁻⁴⁰Ascashon camacaquin isca huanifo, —¡Cuu! Minfin yoimisiquin nocon Dios fu tsainti pushu min choquiacaí. Ascatan osha rafu non fustitan min afanan futsa huairan min imisi. Mifin numatan ihui coyan iquinanmaquinoashu fotohuu. Min Diospan facumainquin, —ishon roanifo.

⁴¹Nannori nocon yorafohuunshon Dios cufimisi niaifofo yafi Dios fu tsainti pushu cushumisifo futan Moisés cununi cuscan tapimamisifoan Jesusqui cashumutsamanifo. ⁴²Ascashon yoinifo, —Nanton futsafo numafiatiroshaquin aficai numatiroma. Ascan minmain Israelifoan aton niaifoquin ihui coyan

iquinanmaquinoashu fotohuu. Min ascaiton oinquifin non mia icoinra huaicain, —ishon roanifo. ⁴³Ascasho niaifofoan nanno niafo ato yoinifo isca huaquin, —Jesús noco yoimisi, “Unfin Diospan facuqui,” ishon noco yoimisi. Nantofin Dios icoinra huamisiquin. Ascan Upa Diosin a fuchipaiquifin numatiroquin, —ishon aqui tsain chaca huanifo. ⁴⁴Ascano afu masta rafutan aqui tsain chaca huacaqui roanifo.

Jesús nani cuscan

Mr 15.33-41; Lc 23.44-49; Jn 19.28-30

⁴⁵Ascano fari masafinin racafishu nan maitio faquishpacucahuani. Ascashu man fari caino afanan shafani.

⁴⁶Ascaino nantianri Jesús fasi oi ashcafinin apa cunani, —¿Elí, Elí lema sabac-tani? —nan yoipai, —¿Uhuun Diosin, Uhuun Diosin, ahuuscai mian potamun? —huani.

⁴⁷Jesús ascaiton yorafoan mapo cashon nicacaquin yoinifo, —Nicacapon. Elías cunaiton, —huanifo.

⁴⁸Ascaino futsa ichoni fimi unu focash muran mishan nanupacufoantan faca tahua shatun mishan tunhuuinifoan Jesús inanpaiquin. ⁴⁹Inanpaiyaiton atirifoan yoinifo, —Unuhuu. Elías oshomain fotomaicai non oinon, —huanifo.

⁵⁰Ascano Jesús fasi fiisinacahuani. Fiisinacahuatan naani.

⁵¹Ascashu Jesús natapaiyaino a Judiofoan Dios fu tsainti pushu murannoa pano puta pochimua aficoín fashnupacucahuani. Nanscatapaiyaino mai nayanaiyainquin. Toquirininhuano torufafaini. ⁵²⁻⁵³Ascaino nan Diospan yorafo naacun mahua quini muran mai huanifo. Nan toquirinin huafo fupucui futsuaino Diosin afanan ato nimani. Ascashu Jesús funiaitian nanfori nan mahua quini murannoashu Jerusalén

muran iquinifo. Ascaiton nanao yora ichapafaon oinnifo.

⁵⁴ Ascaino ranushumua niaifo yafi a futan Jesús cushuafoan mai nayanaiyaicaino ahuara futsafori ahuascaraiton oincani fasi ratucoincaquin yoinifo, —Iconfinquin. Nanfin Diospan facuquin, —ishon yoinifo.

⁵⁵⁻⁵⁶ Ascaiton nannoshon ainfo ichapafaon chaicushon oinnifo. Nan María Magdalena non María futsa nan Santiago futan José ahua non Zebedeo facufoan aton ahuari. Nantifi nan ainfofo Galilea anoashu Jesús fu foanfainmisifoan nan apaiyaifo cuscan ato huashomisifo.

Jesús mai huani

Mr 15.42-47; Lc 23.50-56; Jn 19.38-42

⁵⁷ Ascatan man fari caino nocofunu ahuashta yopatanaima ahuan anu José nan Arimatea anoashu cainni. Nantorifi Jesús tanamisi sharacoin ini. ⁵⁸ Nan José niaifo Pilato ano cashon yoiquin isca huani, —Niaifon, un Jesús toquirininhuan quini muran mai huapai. Un mia yocayoaran, —ishon yoini. Ascaiton, —Jesús ahuan caya José inancahuun, —ishon Pilato yononi. ⁵⁹ Ascaiton José Jesús ahuan caya pano oshopa shara-coinchi raconi. ⁶⁰ Racoshon toquirininhuan quini muran Jesús mai huani. A murancai tsoa maiyomisima muran mai huani. Ascashon toquirininhuanun fupofaini cani. ⁶¹ Nannoshori María Magdalena futan María futsan tsaoshon oinnifo.

Ranushumuafoan nan mahua quini ano cushunifo

⁶² Iyoconaino tunutitian yorafohuunshon Dios cufimisi niaifofo yafi Fariseofo Pilatoqui fonifo. ⁶³ Focashon yoinifo, —Niashu nan Jesús chanishunin yoimisi, “Un naashu osha rafu non fustitan un afanan funitiroran,”

imisi. ⁶⁴ Ascacun min ranushumuafo a maia toquirininhuan quini ano ato nichihuun cushunonfo. Min asca huaiyamaitofin afu rafuafoan ahuan caya onui futirofoquin. “Man funiaran,” icashu chanishcaquin. Jesús chani tauyomisi. Ascan chipocainfin fasi chani finacointirofoquin, —huaifoan. ⁶⁵ Pilato ato yoini, —Manfin mato Dios fu sainti pushu murannoa maton ranushumuafo a toquirininhuan quini ano ato nichicahuun cushutanonfo, —ishon ato yoini. ⁶⁶ Ascaiton a toquirininhuan quini ano ranushumuafo nichinifo. Nanfoan toquirininhuan sapa tocoro fuposhon ahuara tuipaton tanyacunifo. Ranushumuafo nanno nichifurani funifo nannoshon cushunonfo.

Jesús funini cuscan

Mr 16.1-8; Lc 24.1-12; Jn 20.1-10

28 Ascano Israelifoan noco tunutitian nan Domingo anaitia iyoonaino nan maia ano oin focani fonifo. ² Ascaino nantianri mai fasi curushcain nayanaiyaicaino nocon Ifo Diosin ahuan oinmati afu icafo nai ariashu fotoni. Fototan toquirininhuan fuputan acamaqui tsaoni. ³ Ascaino ahuan fuso fasi chashacoinni. Naan canan facaica ointsa. Ahuan sahuutiri fasi oshopa yoa rama furoa ointsa. ⁴ Ascaiton oincani ranushumuafo fasi ratui tari taricani aton ratupasi nayonifo. Nan naa shinantisa anifo.

⁵⁻⁶ Ascaiton Diospan oinmatinin afu nai muran icaton María rafu yoini, —Ratuyamacahuun. Mun tapia man Jesús funai yoa. Jesús man mastafaitafo natian nunoma. Mato yoimisi cuscan man funia. Oin fucapon quini muran. Nan racaitano. ⁷ Ascashon afu rafuafo ato yoiriscatacahuun, “Jesús naafitashaqui man funiaquin. Galilea ano cai tauciai anoshon mato manashqui. Nannoshon man ointiro.” Un mato yoiai

cuscan ato yoiriscatacahuun, —ishon Diosin nai oinmatinin ainfo rafu yoini.

⁸Ascaiton nicatan nan ainfo rafu toquirininhuun quini anoashu ichonifo. Ratufiacani aton nomuran fasi unimacoincaquin afu rafuafo yoi focani ichonifo. ⁹Ichoaifoanno Jesús atoqui niriscatani. Ascashon, —Mun moiyan, —ishon ato yoini. Ascaiton nan ainfo rafutan taicopacufoantan, —Min nocon Iforan —huaifoan. ¹⁰—Ratuyamacahuun. Ascatarocon uhuun ushtofo ua yoishotacahuun Galilea ano fononfo. Nannoshon ua oinshcaquin, —ishon ato Jesús yoini.

Ranushumuafoan yorafo chani huani cuscan

¹¹Ascatan ainfofo Jesús anoashu foaifoanno ranushumuafori yorafohuunshon Dios cufimisi niaifofoqui nan oianfo cuscan atoqui chaninifo. ¹²Ascaiton nicacani niaifofo ichanancashon shinannifo, —Nonmun ahusca huaicai, —ishon. Ascashon ranushumuafo yoinifo, —Non mato yoiai cuscan nannoricoinrifi futsafo yoicahuun non mato pui ichapa inanon. ¹³Ascacun ato yoiqui isca huatacahuun, “Jesús fu rafumisifoan non oshano fucashon Jesús ahuun caya man onuaforan,” ato huatacahuun. ¹⁴Ascaiton niaifocoinin nicaquin Jesús ahuun caya anoma nicai raquirira icaiton non yoisharaicanon mato

ahuusca huanonma, —ishon niaifofoan ranushumuafo yoinifo. ¹⁵Ascashon ato pui inanfoanno focashon nan niaifofoan ato yoiafo cuscan nannoricoin ato yoinifo. Ascaiton nan maifoti anoafo futan Israelifoan nicanifo. Ascano nantian icoinra huanifo ranushumuafoan ato yoiaifo cuscan nicacaquin.

Jesús ahuun unutaqui a rafuafo yononi cuscan

Mr 16.14-18; Lc 24.36-49; Jn 20.19-23

¹⁶Ascashu non afu rafuafo once nan Jesús noco yoia cuscan machi Galilea ano non cani. ¹⁷Ascashon oinquin non yoini, —¡Aicho! Min nocon Ifo Jesús. Non mia fasi noiran, —ishon non yoini. Ascafaiitocai futsafoan icoinra huacuanima. ¹⁸Ascano nocoqui chaimashta oshon noco yoini, —Uhuun Upa ua yonoa nantifi nai ariafo yafi mai anoafori un yononon. ¹⁹Ascacun manifoti anoafo yoifoanfafaitecahuun ua icoinra huafain ua tanasharanonfo. Uhuun Upa Diosin ahuun anuhuunshon yafi uhuun anuhuunshon non Diospan Yoshin Sharahuunshonri yorafo unu muran iquimashcaquin. ²⁰Ascashon nantifi un mato yonoa cuscan huafain yorafori yosicahuun icoinra huafain ua nicasharanonfo. Unfin matofu iquicai. Ascashu nan un afanan oaitian un mato furi ipanacaran, —ishon noco Jesús yoini. Nanti.

Marcos Jesushuunoa Cununi

Juan yorafo unu muran iquimamisi tsoa istaipama ini

Mt 3.1-12; Lc 3.1-9, 15-17; Jn 1.19-28

1 Natian tsain shara Jesucristo Diospan Furunhuunoa un mato cunushoni man tapinon. Nuno mai ano niyoashu ini cuscan un mato tapimai.

²Cainyataima fari ichapa inonpacoai cuscan ahuunoa nocon shuni Isaías cununi. Chipin inaca cuscan yoiyomisi. Upa Diosin Furun yoiyoni cuscan Isaías aqui cununi isca huaquin,

“Upashtan, min yorafoan mia onantaima uhuun tsain yoimisi un atoqui nichicain mihuunoa ato yoinon. Itisharanonfo mia nicashquin,”

ishon Upa Diosin Furun yoini cuscan aqui cununi. ³Diosin tsain yoimisihuunooari cununi.

“Tsoan istaipamashon ahuun yorafo yoishquin isca huaquin, ‘Nocon Ifo oshquiquin. Itisharacahuun. Maton chaca shatucoincahuun isharashcaquin,’ atofin ato yoishquiquin,”

ishon Juan cainyataima fari ichapa inaca cuscan Isaías ahuunoa cunushoni.

⁴Ascan cununi cuscacoin aa. Tsoan istaipamanoashu Judea mai ano Juan oni. Ascano aqui furifurinifo. Furifuriaifoan ato yoiquin isca huani, —Maton chaca shatucoincahuun. Man ascaiton Upa Diosin maton chaca rau huanon afanan shinanshquinma. Asca huatan maton chaca shatucoinshon futsafori ismashcaquin un mato unu muran iquimanon, —ishon Juanpan ato yoini. ⁵Ascano Jerusalén anoafao yafi Judea anoashuri aqui funifo. Ahuun tsain nicapai funifo. Fucashon atirififoan aton chaca yoiaiton Juanpan ato unu Jordán naquishon iquimatan cainmapacuniquin.

⁶Camello inapan rani ahuun camisa huashon Juanpan sahuua ini. Ascashon yoinaton fichi aqui nanushumuni. Ascashori ocutsuru pifain afuchi fona ayani. ⁷Ascano isca huaquin yoini, —Nocofunu futsan samamashta mato tapimai oshquin. Ua fasi finoncaia. Ahuamamishti huatiro. Uncai asca huatiroma. Un ahuaara shara huahuu rafanancai un ahuun oinmatima. Uhuun ramapaiyamainocai un ahuun oinmati icuanama. ⁸Un mato unu muran iquimatan cainmanaquin maton chaca shatushon man Dios tanasharanon ascashon man ato oinmanon. Atofin ahuun Yoshin Shara matoya rafumapacuiquin, —ishon Juanpan ato yoini.

Juanpan Jesús unu muran iquimani

Mt 3.13-17; Lc 3.21-22

⁹Ascano Jesús Galilea anoashu unu Jordán ano cani. Nannoshon Juanpan unu muran iquimatan cainmani.

¹⁰Ascatapaiyaino naicoin finoinnifoantat Upa Dios icariashu nai fupuini. Nai fupuicaino Diospan Yoshin Shara ruhuin cuscara Jesusqui fotopacucahuanaiton oinnifo. ¹¹Fotoaino nai murannoa Upan Diosin ahuun oi nicanifo isca huaiton, —Minfin uhuun Facuquin. Un mihuun fasi noicoin. Un miqúi fasi unimacoinran, —ishon Apa Diosin yoini.

Satanasin Jesús chaca huamapairiani

Mt 4.1-11; Lc 4.1-13

¹²Ascano tsoan istaipamashon ano Diosin Yoshin Sharapan Jesús iyoni.

¹³Anocai tsoa icai inima. Yoinafosi nanno icai ini. Nannoshon Satanás cuarenta oshatan chaca huamapairiani. Ascatan amaquinoashu caino Upa Diosin ahuun oinmatifo afu icafo Jesusqui fotonifo cushushcaquin.

**Galilea anoshon Jesús ato
yosiquin tau huaniquin**

Mt 4.12-17; Lc 4.14-15

¹⁴ Ascano Juan ranushumuafaoan cunu muran iquimanano Jesús Galilea ano nasocaini Diospan tsain shara yorafo yoishquin. ¹⁵ Ato yoiqui isca huani, —Nocon Ifo Diosin matoqui oshquiquin. Maton chaca shatucahuun. Chaca huaquima Diosin tsain shara icoinra huacahuun, —ishon Jesús ato yoini.

**Jesús afu rafumisi rafu non
rafuri catonquin tau huani**

Mt 4.18-22; Lc 5.1-11

¹⁶ Ato yoitan ianmanhuan Galilea cuseumun cani. Caquin Simón chipocun Andrés futan nushutinin nushuaifoan ointoshini. Nan rafutanfin nushumisi inifoquin. ¹⁷ Ascaiton, —U fu fucahuun. Manfin nushumiscoinquin. Man shiman ichaparasi nushutinin fia cuscan natian uhuunshon man uquin yora ichapa ihuushqui aton Ifo un inon, —ishon Jesús ato yoiniquin. ¹⁸ Ascaino nushuti huafaini afu fonifo.

¹⁹ Jesús chaimashta catan Zebedeo facu rafu fuchini. Nan nanu rafutan Santiago futan Juanpan shasho naquis-hon nushuti icushnifoquin. ²⁰ Ato fuchishon, —Un fu fucahuun, —ato huani. Ascaino samamashta apa yafi ahuun oinmatifo shasho naqui nichifaini focani afu fonifoquin.

**Jesús yoshin chaca
nocofunumaquinoa potani**

Lc 4.31-37

²¹ Ascano Capernaum mai ano fonifo. Judiofoan aton tunutitian ichananti pushu muran atofu ichanannifo. Ichananfoan Jesús ato yosiniquin. ²² Ascaiton nicacani —¡Aira! Nicacapon. Tsoancai anori

noco yosimisima. ¿Ahuuscashon nunori noco yosisharaimun? Ahuun tsain sharacoin nanua. Moisés cununi cuscan nocon tapimamisifoan anori noco yositamarocon niaifoan tapicoian cuscara noco yosiaran, —ishon yoinifo.

²³ Ascano nanno ichananti pushu murannoa nocofunu yoshin chacanun ahuun nuushon fiisimani. ²⁴ Fiisimaino, Jesús fuchini. Fuchishon yoiquin, —¿Ahuuscain min noco fucash huai oamun, Jesús Nazaret anoaton? ¿Min noco omitsiscapanacafo muran min noco potai oamun? Man non mia onan. Diosin mia catonni. Mincai chaca huamisima, —ishon yoshin chacapan yoini.

²⁵ Ascaiton, —Tsainyamahuu.

Amaquinoashu catahuun, —ishon Jesús yoshin chaca curushcain nichini. ²⁶ Ascainofin yoshin chacapan nocofunu fasi musta mustaimatan amaquinoashu fiiscaini cani. ²⁷ Ascaiton oincani, —¡Aira! Jesús fasi ahuamamishti huacointiro. Iscaracai ahuashta non oinyomisima. ¿Ahuuscashomun

ahuun tsainman yoshin chacapan nicacasmafaiaton nan yoia cuscacoin huaaquin? —icashu yoinannifoquin. ²⁸ Ascatan chanifoanfainifo Jesús aca cuscan ahuunoa Galilea anoafu yoifoanfainifo.

**Simón ahuun raisi yoshafa
Jesús caya huamani**

Mt 8.14-15; Lc 4.38-39

²⁹ Ascacaini Judiofoan ichananti pushu murannoashu Santiago yafi Juan fu focani Simón futan Andrés pushu ano noconifo. ³⁰ Nanno Simón ahuun raisi yoshafa fasi yonaiton Jesús tapimanifo.

³¹ Ascano Jesús mutsoinifoannaino funinaca huani. Funinaca huatan yona matsiriscatan nan yoshafaoan ato pimashquin pichacufaini.

Jesús yora ichapa caya huamani

Mt 8.16-17; Lc 4.40-41

³² Ascatan man fari caino isinincai futsa futsatapafo yafi yoshin chacafo atohuun nuufafaina yorafoan Jesusqui ihuunifo ato cayahuamapacunon. ³³ Nan pushurasi anoashu Jesusqui funifo. ³⁴ Isinincai futsa futsatapafo ato cayahuamapacuanon. A yoshin chacafo atohuun nuufafaina atomaquinao potani. Jesús Diospan facun yoshin chacafoan onainfoan —Tsainyamacahuun, —ato huani.

Jesús ichananti pushu muranshon Apa tsain ato yoini

Lc 4.42-44

³⁵ Ascatan shafacuaino pushu muran-noashu Apa Dios cuficai tsoan istaipama cani. ³⁶ Caano Simón non afu rafuafoan Jesús funai focani fonifo. ³⁷ Fuchicas-hon, —Nantifi yorafoan mia funairan, —huanifo.

³⁸ —Pushurasi futsafo ano non canon un atori Upa Diosin tsain yoinon. Ascacacun uhuun Upa Dios ariashu nuno un oquin, —Jesús ato huaniquin. ³⁹ Ascashu nantishon Galilea ano cahuacacaini Israelfoan aton ichananti pushu muranshon Diosin tsain ato yoini. Nan yoshin chaca atohuun nuuafu atom-quinao potaniquin.

Jesús nocofunu nami rashquishi futsua caya huamani

Mt 8.1-4; Lc 5.12-16

⁴⁰ Ascatan nocofunu futsa yoratishon ranimamishti rashquishi futsua Jesusqui nocoshon. Ratoconun mai chachishon yoini, —Ua caya huapaiquifin mian caya huatiroquin, —huaiton. ⁴¹ Ahuun ramapaiquifin ahuan mucuman ramanni, —Ai Un mia caya huai. Ascan natianfin min caiyaicain, —huainofin. ⁴² A rashquishi futsua

cayariscani. ⁴³⁻⁴⁴ Cayacun yoini, —Un mia caya huaa tsoa yoiyoyamahuu. Nocon caifohuunshon Dios cufimisi a ismatahuun. Moisés mato yononi cuscan chashoanun facu a inanhuun mia rutushonon. Min chaca soafain min caya ato oinmashquin. Ascano tapinonfo Moisés noco yononi cuscan min aiton, —ishon Jesús yoifia. ⁴⁵ Nicatamarocon samamashta ato yoifoanfafaini, —¡Oincapon! Jesús ua caya huashara, —ishon ato yoifoanfafaini. Ascaiton nicacani yorahunrasi Jesusqui fupaifiacani Jesús iquitiroma ini. Ascano tsoan istaipama caano pushurasiti aqui cuyo funifo.

Jesús nocofunu charishi futsua caya huani

Mt 9.1-8; Lc 5.17-26

2 Ascano osha ranantan afanan funifo. Capernaum ano nasofuracani. Nanno pushu muran iquicun nicanifo. ² Nicacani yorahunrasi aqui funifo ato Diosin tsain yoinon. Pushu fospicoianno tsoa futsa afanan iquitiroma ini. Umaintiri yora ichapacoín yuruicafono afanan tsoa iquitiroma ini. ³ Ascano nocofunu rafu non rafuriton aton yora charishi futsua shuhua naratashon ihuunifo Jesús caya huamanon. ⁴ Iquimapaifiacaquin yorahunrasi pushu fospiano iquimani-foma. Ascashon pushu fomancayan tapa tsucashon Jesús nia naman fotomacupacufuannifo. Nanno yorahunrasi nastui shuhua ya ratapacufuannifo. ⁵ Jesús oian nan nocofunu yoratishon charishi futsua ahuan yorafoan fasi icoinra huaifoan. Oinquin a yoratishon charishi futsua yoini, —Uhuun yorashta, mun mia chaca soashona, —huani.

⁶ Ascano Moisés cununi cuscan tapimamisifo nanno tsoafo ini. Aton no-muran shinancani, ⁷ —¡Ajaa! ¿Ahuuscain na nocofunun anori yoiimun? Diosin

fustitofin chaca soatiroquin. Nocofin fuparaniquin. “Un Diosiran,” ishon. Anori yoiquifin “Upa Diosin chaca huaiquin,” —ishon aton nomuran shinannifo.

⁸Ascaiffoan shinainfo cuscan Jesús onanshon ato isca huani, —¿Ahuuscaquimun maton nomuran amaquiri man shinaincain? ⁹⁻¹⁰Unfin Cristoquin un yorafo aton chaca soashotiroquin. Un chaca soafain un ahuamamishti huatiro un mato oinmanicain. Upa Diosin ua catoan. Ahuunshonfin un yorafo aton chaca soashotiroquin, —ishon ato yoini. Asca huatan nocofunu yoratishton charishi futsua yoini, ¹¹—Min pushu ano min shuhua ya funicaitahuun, —huani. ¹²Asca huatanaino nanno icafoti aton ointaifi funinaca huantan ahuun shuhua chishtofaini cani. Ascacainaiton oincani nantifi yoinain futsunifo, —¡Aira! Diosin ahuamamishti huatiroquin. Noncai iscara oinyomisima. Diosin sharaquin, —icashu yoinannifoquin.

—Uqui ohuu. Ua tanamisi ishquin, —Jesús Mateo huani

Mt 9.9-13; Lc 5.27-32

¹³Jesús nanscacaini afanan ian cusumunri caino yorahuanrasi afanan aqii funifo. Ascano ato yosini. ¹⁴Ian cusumun cahuanquin Alfeopan facu ahuun anu Mateo Jesús oinni. Nanton niaifo pui fishofafainmisi. Pushu facu muran tsoa ini. Ascaiton Jesús a yoiquin, —Uqui ohuu. Ua tanamisi ishquin, —huani. Asca huaino funinaca huatan afu cani.

¹⁵Ascaino Mateon Jesús yafi afu rafumisifo ya ahuun pushu ano iyonni ato pimashquin. Niaifo pui fishofafainmisifo non Moisés cununi cuscan tapificashon tanapainifoma Jesús fu foanfainmisifo ahuun tsain nicapaicani. Afori Mateon pushu muran iquinifo ato futan pishcaquin. ¹⁶Ascano Moisés cununi

cuscan tapimamisifo nanfofin Fariseofu iniquin. Oincaquin Jesús tanamisifo yoini, —¿Ahuuscain Jesús na niaifo pui fishomisifo yafi Moisés tsain tapimafiacashon tanapainifoma futan piimun? —huanifo.

¹⁷Ascaiffoan nicaquin Jesús ato cumani, —A isinincaifoma caya huamamitsamisi yopacanima. Ascan nan isinincaifoti fasi caya huamamitsamisi yopacoicani. Ascarifi aquin, “Uncai ahua chaca huamimaran,” icaifoan un aton chaca soashotiroquin. Ascan, “Unfin fasi chaca huamimaran. Un imisi cuscan un afanan apaimaran,” icaiton un ato yoiro, “Uqui fucahuun. Un maton chaca soashotiroquin,” —ishon Jesús ato yoini.

Piqui tunumisifohuunoa Jesús yocanifo

Mt 9.14-17; Lc 5.33-39

¹⁸Ascano iyoco futsaino nan Juanhuunshon tanamisifo non Fariseofu piqui tununifoquin. Ascaiton futsafoan Jesús yocanifo, —¿Ahuuscain Juanhuunshon tapimisifo futan Fariseofu piqui tunufaino minhuunshon tapimisi-foancai piqui tunucanimamun? —ishon yocaifoan.

¹⁹Jesús ato cumani, —Yora unimaifoancai chaca shinancanima. Ascacuai piqui tunutirofoma. Funun ato chani huafoanricai piqui tunutirofoma. Fununmain ato fucunfin. Ascaino unimacaquin. ²⁰Ascaino funu chipo atomaqui cano shinancaquin piqui tunutiroforan, —ishon Jesús ato yoini.

²¹Tsain futsari ato yoini isca huaquin, —Camisa shunishta fashnucun funa potonun icushumua potu funa chopi futsuashu camisa fasi uhuai finacointiro. Tsoancai afanan ascara icushpaitiroquin. Nanscarifi aqii un mato tsain funa yosian cuscan nicacoinshon man apaoni

cuscan man afanan apaitiroma. Tsoan ua tanacoinshocai apaoni cuscan huatiroma. Ascashu funa cuscara shara itiro. ²²Nanscarifi aqui tsoancai fichi tutso shuni muran vino funa a muran manutiroma. Toshacainaino fichi tutso chacanatiro. Vinori cuyofotiro. Nanscarifi aquin maton shunicaifoan mato yosimisi cuscan yafi un mato yoiyai cuscan nan rafucaí ositiroma. Un mato yosiain cuscacoin nannori. Diosin tsain shara. Ascan maton shunicaifoan yosia cuscacai anorima. Anori tanashucái Diosin mato imapaiyai cuscan man atiroma. Nan rafu osishon nicapaiquicai man shinansharatiroma. Vino funa fichi tutso funa muran manua shara itiro. Nanscarifi aquin ratoranfoan apaoni cuscan unutan un ato tsain funa yosiain cuscan fusti tanacointirofo Diosin ato funa shara imatiroran, —ishon Jesús ato yoini.

Tunutitianhuunoa Jesús ato yosini

Mt 12.1-8; Lc 6.1-5

²³Ascatan Israelifoan aton tunutitian Jesús yafi ahuunshon tapimisifo mau mapai fucaquin trigo mutuscashon fonicoíncaquin piainfoan. ²⁴Fariseofoan oincaquin Jesús yoinifo, —¡Oincapon! ¿Ahuuscain nocon shuni Moisés yononi cuscacai man aimá? Tunutitian trigo man mutuscaniran, —huaifoan.

²⁵Ascaiton Jesús ato cumaquin, —¿Davidhuunoa cununi cuscan man oinmisimamun? ¿Fonainquin nocon shuni David afu rafuafo futan ani cuscan man nicamisimamun? Nicacapon un mato yoinon. ²⁶Abiatar nocon yorafohuunshon Dios cufimisi niaifocoin ini. Nantianri David yafi afu rafuafo Diosin tsain cufiti pushu muran iquinifo. Iquicatan amurannoa misifo ato piquini fasi fonicoínquin. Tushu futsa yamaino, misifofin nan nocon yorafohuunshon Dios cufimisi niaifocoinnaasi ini. Tsoa futsan

pitiroma. Nannori yonofiani fasi fonicoínquin David pini. Ascashon afu rafuafori pimani.

²⁷Ascan un mato yoinon. Upa Diosincai nunori shinannima. Isca huaquin, “Un tunutitian yonoyonon. Chipó un yorafo onihuai tunutitian yonononfomaran,” ishon anori shinannima. Ascata Upa Diosin yorafo shara huaipaiquin Moisés yoini isca huaquin, “Ato yonohuun semanantifi shafa fusti yonononfoma. Tunuyononfo ua shinancaquin,” ishon Upa Diosin yoini. ²⁸Ascacun un yoitiro ahuuscain tunutitian man atiroquin. Uafin Upa Diosin catoniquin, —ishon ato yoini.

Jesús tunutitian nocofunu musufimua cayahuani

Mt 12.9-14; Lc 6.6-11

3¹⁻²Ascatan tunuti futsaino Jesús Israelifoan aton ichananti pushu muran iquini. Iquicun Fariseofo yafi Moisés cunu tapimamisifoanri Jesús aasi oinifo ahuuscashomain nocofunu musufimua tunutitian caya huaicain. Ahuunoa ahuara chaca yoipaicaquin. ³Ascan Jesús a nocofunu musufimua yoini. —Aton ointaifi nuno nihuu, —huani. ⁴Ascaino nocofunun ato nishoni, —Un mato yocain man ua cumatiromainquin. ¿Raquiri Moisés tsain noco yonoamun? ¿Tunutitian non ahuara huatiromun? ¿Nonraca sharatiro? ¿Nonraca chacatiro? ¿Tunutitian non yora cayahuatiromun? ¿Yora isinin icai oamun non cayahuaimun? Non caya huamama natiro. Noco huun nutiro. ¿Non rutua shinantsain? ¿Ascacun shara? —ishon ato yocani. Ascafiaino puusinifoma.

⁵Ascatan sinaquin ato oiancutan ahuun nomuran fasi shinain, —¡Ohuashta! ¿Ahuuscashon aton nomuran shinanchacamisifomun? Ua icoinra huacata, —ishon shinanni. Ascashon a nocofunu musufimua

yoini, —Min mucu mushan huahuun, —huaino. Yonoa cuscan mushaniquin. Ascashu ahuun mucu muma sharacoin iriscatani. ⁶Ascaino Fariseofo amaquinoashu Herodes ahuun yorafo ano fonifo, —¿Ahuuscashomain non Jesús achimanain rutunonfo? —icashu yoinannifo.

Jesús fu yorahuanrasi ian cusumun fonifo

⁷⁻⁸Ascatan Jesús yafi afu rafumisifori nannoashu ianmanhuan Galilea ano fonifo. Foaifoanno yorahuanrasi Jesusqui funifo. Galilea anoashu fuaifo Judea anoashu fuaino Jerusalén anoashu fuaino Idumea anoashu fuaino unu Jordán chaimashta icafori fuaino Tiro yafi Sidón anoashuri aqui funifo. ⁹⁻¹⁰Yora ichapa caya huamamisi tapicanashu isinincaifo ichaparasi aqui funifo. —Norifi non Jesusqui mupiashu non cayatiroran, —icashon shinannifo. Jesús oinquin afu rafuafo yoini, —Ua shasho fushocahuun. Ipaishoma un yopaicai. Yorahuanrasiton ua yuruatiroquin, —Jesús huani. ¹¹Yora yoshin chacafo atohuun nuafu Jesús fuchicatan fuopacufoannifo. Ascashon yoinifo, —Minfin Diospan facuquin, —huaifoan. ¹²—Tsainyamacahuun. Un Diospan facuqui tsoa yoiyamacahuun, —ato curushcai huaniquin.

Jesús afu rafuafo tanamisifo doce catoan

Mt 10.1-4; Lc 6.12-16

¹³Ascatan Jesús machi mapufaitan afu rafuafo cunani, —Uqui fucahuun, —ato huani. ¹⁴Aqui fuafoan doce catonshon ato yoini, —Man uhuun yonomisifo itiro ufu rafufafaincahuun. Un mato nichicai man yorafo Upa Diosin tsain ato yoinon. ¹⁵Un mato yonoshqui uhuunshon yoshin chacafo futsafohuun nuucun atomaquinoa man potatiroran, —

ishon ato yoini. ¹⁶Nan doce Jesús catonni afoan aton anufo un mato tapimanon. Futsan Simonfiacun ahuun anu futsan Jesús tuqui huani Perdo. ¹⁷Futsafo Zebedeo facu rafu Santiago yafi Juan. Aton anu tuqui huani Moanurquisi, onicoinnin tsainmanfin nocofunufu curushcain nan turuica cuscara. ¹⁸Futsanfoan aton anu Andrés non Felipe non Bartolomé non Mateo non Tomás non Alfeopan facu Santiago non Tadeo non Simón futsan nanton fasi Diosin tsain tanasharacoinpaiyaino. ¹⁹Futsan ahuun anu Judas Iscariote nanton Jesús potashon ato achimani.

Jesús yafi Satanás

Mt 12.22-32; Lc 11.14-23; 12.10

²⁰Ascatan Jesús yafi afu rafuafo pushu muran iquinifo. Iquiano yorahuanrasi a nicapaicani aqui funifo. Ascano ato yosiano a futan afu rafuafoan ahua piinifoma. ²¹Ascano ato yosifaiquin, yosifaiquin huaiton. —¡Uru! Jesusfin nison cuscaracoinquin, —icashu ahuun yoinannifo. Acaifoan nicai ahuun yorafo funifo. Ihuipaicani.

²²Asca Moisés tsain tapimamisifori Jerusalén anoashu nicapai aqui funifo, Ascashon yoicaquin —Jesusfin Satanashuunshon ahuarafa huaiquin. Satanás yoshin chacafoan aton niaifo. Ahuunshon nocofunumaquinoa yoshin chacafo potairan, —ishon yoinifo.

²³Ascano Jesús ato cunani. Ato ahudara futsafohuunoa yoishquin ato tapimanon. Yoini isca huaquin, —¿Ahuuscashumain Satanás afiri potatiroquin? ²⁴Caifofo afi ranan rutunain cuyotirofo. ²⁵Yorafori afi ranan rutunain cuyotirofo. ²⁶Nanscarifi aqui Satanás afin ahuun yoshin chacafo potaino arifi funotiro. Asca huaino ahuun yono chacanatiro arifi cuyotiro. ²⁷Shinancapon. Nocofunu mutsisipacoinin ahuun

pushu cushuanocai tsoa iquitiroma ahuun mafo onunshquin. Ascfaiaino rufofo achifain munushushon ahuun mafo onutiro, —ishon Jesús ato yoini. ²⁸⁻³⁰—Jesuscai Diospan Yoshin Sharahuunshon yorafo caya huamama yoshin chacahuunshon ato caya huamaran, —ishon yoinifo. Ascfaiaino Jesús ato yoini, —Icon un mato yoinon. Ua nicacahuun. Ratoran futsan futsafo tsain chaca huafain Diosquiri chaca huacun Upa Diosin nantifi chaca huaa cuscan rau huashotiro. Ascfaiaino Dios nicacasmaiton yoiquin isca huatiro, “Naton aca cuscan Satanashuunshon acaran,” huafaiaino Diospan Yoshin Sharahuunshon atiro. Nanton Diospan Yoshin Sharahuunshon tsain chaca huacun Upa Diosin ahuun chaca rau huanacama. Chaca huaa cuscan ahuun nuupacunacaran, —ishon Jesús ato yoini.

Jesús ahua yafi ahuun chipocufo

Mt 12.46-50; Lc 8.19-21

³¹Ascano Jesús icano ahua yafi chipocufo noconifo. Pushu fospiaifono chifishon niafo futsa amuran nichini a yoinonfo. ³²Yorahuanrasiton cufuacunifo. Ascano futsan yoini, —Min uhuan futan ushto rananun chifi nishon mia ahua yoiapai fuaforan, —ishon yoiainon. ³³—Un mato tapimai ratofomain uhuun uhua yafi uhuun ushtofoquin, —ishon ato yoini. ³⁴Ascano cufuacufoannaifoan ato oiancufainquin, —Nafu uhuun uhua cuscarafu yafi uhuun ushto cuscarafuquin. ³⁵Uhuun Upa Diosin ato amapaiyai cuscan afofin uhuun ushtofo cuscara non uhuun chicofo cuscarafu non uhuun uhua cuscarafuquin, —ishon Jesús ato yoini.

Ushu saamisihuunoa Jesús ato ahua futsa yosini

Mt 13.1-9; Lc 8.4-8

4Ascano iyoco futsaino ian cusumunshon Jesús ato yosiaiton nicacani yorahuanrasi funifo. Fuaifono shashon naqui nanupacuahuan cushan camaqui tsaoshon ato yoini. Ascaino ian cusumunshon maponifo ahuun tsain nicacani. ²Ahuun tsainman ato ichapa yosini isca huaquin, ³—Uhuun yoramishtichin ua nicasharacahuun un mato yoinon. Nocofunur ahuun noshati murannoa fimi ushu fishon ahuun mau mamaqui. ⁴Saacano ushufo fai nushmancayan pacua puiyafuon piinifo. ⁵Ushu rananri toquiri camaqui pacua maima ano pacuni. Samamashta ushu foaicano ⁶farin tsacaqui yositima huani.

Ascano nani. Ahuun tapo chaimashta foanno fanafo nai cuyoni. Tsasi fut-suni. ⁷Ushu rananri tasha murannoashu foaisharanima. Ascatari fiminima. ⁸Asc-can ushu rananri mai shara ano saaca. Foaisharashu fimini. Futsa foasharashu treinta ahuun fimi icaino ushu futsa sesenta ahuun fimi icaino futsa cien ahuun fimi ini, —ishon yosini.

⁹Ascano Jesús ato yoiquin, —Man pafiqui yaquin ua nicasharacahuun, —ato huani.

Jesús yorahuanrasi yoini cuscan chipo afu rafuafu shafacafi yosini

Mt 13.10-17; Lc 8.9-10

¹⁰Ascano chipo yorafo amaquinoashu fonifo. Foafono afu rafuafu doce fucashon yocanifo, —Ifon, min rama fimi ushu saamisihuunoa ahua noco tapimashquin non tapisharamaquin. Noco shafacafi yosihuu, —huaifoan. ¹¹Asca huaifoan Jesús ato cumani, —Upa Diosin a icanoshon ahuun yorafo iquinai cuscan un mato fusti shafacafi tapimai. Ascashon futsafo ahuafo cus-

carahuunshon fustisi un ato yoiakin.
¹²Nicasharaifoan Upa Diosin aton chaca soashocuana ato rau huashquin. Ascan oinfiaquicai tapitirofoma. Nicafiaquicai tapitirofoma. Tapicashon aton chaca shatucuanafa Diosin tsain icoinra huashquin. Ascaiton un aton chaca soashocuana, —ishon ato yoini.

**Jesús ushu saamisihuunoa
 ato tapimasharani**

Mt 13.18-23; Lc 8.11-15

¹³—¿Nanfo un saamisihuunoa ahuara futsa ato tapima cuscan man nicayamaiton ahuuscashomun man tsain futsafori nicatiroquin?
¹⁴Nicasharacahuun un mato tapimanon. Nan ushu saamisi Diosin tsain yoimisi cuscara. ¹⁵Ushufo fai nushmancayan pacua puiyafoan samamashta piinifo. Nanscarifiai Diosin tsain yoimisiton aton nomuran nanupaifiai aton nomuran fai curush cuscaracoin. Ascan Satanás ato tsain futsa yoiquin afanan Diosin tsain nicanonfoma ahuun ointi muran funomana.

¹⁶⁻¹⁷Ascan futsafoan aton ointi toquiri cuscara. Ushu toquiri camaqui pacuni anoashu ahuun tapo chaimashta foanno samamashta fanafo nai cuyoni. Tsasi futsuni. Nanscarifiai futsafoan Diosin tsain tau huaquin nicaiyoi unimacoinfiashon samamashta ahuun tsain cachiquiri huatirofo. Diosin tsain nicafiacatan aton nomuran nanucoianfoma. Ascan ahuara chaca finonshon iyamarai omitsiscaifoanno afanan Diosin tsain nicapaitirofoma. Dios afanan tanapaitirofoma. ¹⁸⁻¹⁹Ascan un mato yoiai cuscan ushu futsa tasha muran foaicashu foaisharanima. Nanscarifiai futsafoan Diosin tsain nicaifiai chipo ahuara futsa chaca shinanquin. Shinanchacafain pui ichapa noifain, “Un pui ichapayashuraca un isharatiroatin,” ishon amaquiri shinanquin. Diosin tsain afanan shinainma.

Ascano Diosin tsain nicafiaquin ahuara futsa shinaintocai ahuara Dios ashotiroma.

²⁰Ascanfiaquin ushu futsafoan mai shara ano saacano foaiquin yosiashu man fimi ichapa ya. Nanscarifiai futsafoan Diosin tsain nicacoinpaiquin ahuun tsain aton nomuran nanucointiro. Futsan ahuun tsain nanusharaino Diosin yoini cuscaicoi atiro. Futsanri ahuun tsain nicacoinquin finacointiro. Futsanri fasi mima huacointirotan, —ishon Jesús ato yosiniquin.

Jesús lamparinahuunoa yoi cafiscani

Lc 8.16-18

²¹Ascano afanan ahuara futsan ato yosiquin isca huani, —Tsoancai faquishiaino oinpaiquin lamparina otashon cutipan fupotiroma. Tsoanricai oshati nanman huatiroma. Ascatama tapa camaqui huatirofo shafacafi oinsharanonfo. Nanscarifiai Diosin nocon imapaiyai cuscan apaiquicai non ahuun tsain casho muran iyamarai raniran futsa non onutiroma. Ascatama shafacafi oinsharatiro Diosin yoia cuscan huafain. ²²Ascashon non shinanmisi cuscan noco nantifi Diosin puashoshquin. Tsoancai afanan ahuarashta fomantiroma. Diosin nantifi yorafoti aton ointaifi puashoyoshquin. ²³Man pafiqui yaquin ua nicasharacahuun.

²⁴Ascacun oinfain. Uhuun tsain nicasharacahuun. Amaquiri nicayamacahuun. Un mato yoia cuscan aashquin. Ascaquin man fasi uhuun tsain tapicoaintiro. ²⁵Asca tsoan uhuun tsain nicasharai ahuun nomuran nanucoiainno Upa Diosin mima huacoinquin tapimashquin. Ascan tsoan uhuun tsain nicaifiai un yoia cuscan aiyamashu nan cuscarafu nantifi funocani. Upa Diosin funomanano ahuashtayacanimaran, —ishon Jesús ato yoini.

Jesús ushuhuunoo yoicoín cafiscani

²⁶ Ascatan afanan ahuara futsan ato yosini. —Ahuu cuscaramain Upa Diosin nantifi iquinnaquin un mato yoicain. Noco funun ahuun mau ano ushufo fana. ²⁷ Shafatifi non yamutifiri nan ushufo foaicaino yosishara. Ascan mau ifoancain nan ushufo foaimatiroma shafatan yafi yamuri afi yositiroquin. Ahuuscashu-main afin foaitiroquin non tapiama. ²⁸ Mai muran ushu foanno iquisi ahuun tapo foaitiro. Ascashu chipo shuqui fimi ya itiro. Ahuun unutani shuqui choshitiro.

²⁹ Ascan shuqui choshiano mau ifoan shuqui samamashta chituntiro. Nanscarifiai tsoa icoinra huamafoan icoinra huacani itisharacani samamashta Diosin mai ano nocotiro nantifi iquishquin, —ishon Jesús ato yoini.

Jesús ihui mostaza ushuhuunoo yoicoín cafisca huani

Mt 13.31-32; Lc 13.18-19

³⁰ Ascatan afanan Jesús ato yoiquin isca huani, —¿Ahuuscashomain un mato yositiroquin Diosin ahuun yorafoti yonofain iquinaquin? ¿Rato tsain futsacaimun un mato yosicain man tapinon ahuu cuscaramain Upa Diosin nantifi iquinaquin? Ua nicacahuun. ³¹ Mostaza ushu uhuapamashta. ³² Ascafia yosiashu fasi uhuapacoin itiro. Rato ihuicai mostazatioma. Ahuun tushpafori fasi uhuapacoin. Ahuun tushpahuu puiya futsa futsatapafo tsaotiro. Nanno mostaza ahuun puiffoan ahuun tushpafo ihuaquin futsa fari tsacanoma. Nanscarifiai Diosin icoinra huaafo tau huaquin ichapamatón nicayotirofo. Chipó fasi ichapafain tanacointirofo Diosqui nocosharashcaquin, —ishon Jesús ato yoini.

Jesús tsain futsahuunoo ato ahuarafo yosini

Mt 13.34-35

³³ Ascatari tsain futsahuunoo ichapa ato yoini ato tapimanon. Afohuunshon ato Diosin tsain tapimani. Tapitirofo cuscan ato tapimani. ³⁴ Ahuarafo ato yosipaini tsain futsahuunoo nanfotisi ato yoini. Ascafia chipo afu rafumisifo atotisi tsain futsahuunoo shafacafi ato yosini.

Nihuu yafi ian fuchomanhuanri Jesús ahuun tsainmansi nishma huani

Mt 8.23-27; Lc 8.22-25

³⁵ Ascatan man fari caino Jesús afu rafuafo yoini, —Ianmanhuan oquiri non fonon, —ato huani. ³⁶ Ascaino yorafo-maquishon afu rafumisifoan Jesús ianmanhuan oquiri iyonifo. Chipó atirifiton mufainifo. ³⁷ Shashon pocuaifono atoqui fuuhuan noconi. Fuchomanhuaino unu fospini. ³⁸ Ascaino Jesús shasho tsispacamaquinoashu oshano afu rafumisifoan moinnifo. —Nocon tapimamisitón moihuu. ¿Min noco shinainmamun? Man non asai futsucaí, —ishon moinnifo.

³⁹ Asca huaifoanno moinacahuatan ninacahuan fuu nishma huani. —Fuun nishmahuu. Fuchomanhuan pusiya mahuu, —Jesús huani. Asca huaino fuun nishmafainaino ian pusi quima racani. ⁴⁰ Afu rafuafo yoiquin isca huani, —¿Ahuuscain man ratu ain? Un ahua mamishti huatiro mancai icoinra huataimacai, —ato huani.

⁴¹ Ascaino aton nomuran fasi shinnancani, —¡Aira! ¿Ahuu cuscara noco funushonmun nocon Ifon? Na fuuhuan yafi ian fuchomanhuan nan yoiai cuscan huaaquin. Man nishma hua, —icashu afu rafuafo yoinannifo.

**Nocofunu yoshin chacafo ahuun
nuucun Jesús caya huani**

Mt 8.28-34; Lc 8.26-39

5 Ascano ianmanhuan pocufainifo. Gerasafoan aton mai ano fonifo. ²Nocotan Jesús mapufaini. Ascaino nocofunu yoshin chaca ahuun nua aqui noconi. Mahua quini muran naafo mai huapaonifo murannoashu aqui noconi. ³⁻⁴Nan nocofunu mahua quini muran ipaoni. Yorafoan cunopan munushfain onushfain huafiafo cuno tusaqui futsani. Tsoan afanan achitroma munushfain onushushquin. ⁵Yamutifi yafi shafatifiri mahua quinifo muran icain machi ano cahuacacaipaoni. Nannoashu toquirinin afiri tsacai futsuni fiisiyanan.

⁶Jesús chaicunua fuchitan aqui ichoni. Ichotan fuopacucahuatan. ⁷⁻⁸Ascano Jesús yoini, —Minfin yoshin chacacoinquin. Na nocofunumaquinoashu catahuun, —huaiton. —¿Mian ahuusca huapaimun, Jesús? Diosin nai muran icaton ahuun Facufin minquin. Diosinhuunshon yoihuu min ua omitsisca huamashquima. Yoipun, —nocofunun yoshin chaca ahuun nuaton yoini.

⁹Ascaino amaquinoashu cataima Jesús yocani, —¿Min ahuunumun? —ishon yocaiton. Yoshin chacanun cumani, —Uhuun anufin ichapaquin. Urus fusticai na nocofunu muran un icama. Un fu yoshin chaca ichaparasi amuran ica. ¹⁰Mai futsa ano noco nichiyamapun, —huariani.

¹¹⁻¹²Na machi mananunshon yahua inaofoan picaniquin. —Ato muran noco nichipun, —yoshin chacafoan huaifoan. ¹³—Yahuafo muran fotacahuun, —Jesús ato huani. Asca huatanaino nocofunumaquinoashu dos mil yahuafo muran fonifo. Yahuafohuun nuui focani. Ascaino nantifi yahuahuanfo ian muran maocofainni. Ascashu asai futsunifo.

¹⁴Ascaifoan oinfaincani yahuahuanfo cushumisifo ichonifo. Pushurasi ari chani focani. Pasohuatofori chaninifo. Ascaiton nicacani yorahuanrasi yahua asai futsua oinpaicani funifo. ¹⁵Fucaquin oianfo Jesús yafi nocofunu ahuun yoshin chacafo a muran imisi tsoafo ini man amaquinoa Jesús yoshin chacafo potano. Afanan imisi cuscan chitoria inima. Man sahuuti sahuua. Afananricai nison inima. Shinansharacoinni. Ascaiton oincani ratucoinnifo. ¹⁶Ascashon atirifoqui chaninifo nan oianfo cuscan huafain chaniaifoan. ¹⁷Nicacaquin Jesús isca huanifo, —Nocon mai anoashu catapun, —huanifo.

¹⁸Asca huaifono Jesús shashon nanucaini cani. Nanuataima, —Uari iyopicapun. Un mifu capaica, —a yoshin chaca amaquinoa potaton huaiton. ¹⁹—Ma. Min pushu ano cashon min yorafo yoitahuun. Upa Diosin mia ashoan cuscan huafain minhuun ramapaia cuscan ato yoitahuun, —huani. ²⁰Asca huaino cashon Jesús aca cuscan mucu rafuti pushurasi ano yoifoanfaini. Ascaiton nicacani, —¡Aira! ¡Nicacapon! Tsoan anori nicayomisimaran, —icanashu nantifi yoinannifo.

**Jairo ahuun ainfacu naafiacun Jesús
funinini non ainfoan Jesús ahuun
sahuuti muuanshu cayani**

Mt 9.18-26; Lc 8.40-56

²¹Ascatan Jesús fu afu rafuafo afanan ian mahuan pocufurannaino yorahuanrasi cusumun aqui noconi. ²²Ascaifono Judiofoan ichananti pushu anoa aton niaifo ahuun anu Jairo Jesús fuchitan fuoshopacucahuaquin yoini, ²³—Uhuun facushta isinin ishoinquin. Uhuun pushu ano ufu capun. Uhuun facushta ua ma-iatashoshquin cayanon, —huani. ²⁴Ascatan cani. Ascaino yorahuanrasi afu fonifo. Focani fasi yuruinfainifo. ²⁵Nan-

noru ainfo imi imitiani atofu cani. Doce fari man aqui caano nusuyamacai. ²⁶ Doctor rasi ano cata cataquin nantifi ahuun pui ato inanquin anaitini. Ascafi-ashu cayatamarocon finacoinni.

²⁷ Ascano Jesushuunoa yoiainfoan nicaquin ainfoan acachorishon ahuun sahuuti muunniquin cayashquin. ²⁸—Un ahuun sahuuti muuanshuraca un cayatiroati, —ishon ahuun nomuran shinanni. ²⁹ Ascatan aqui mupiashu imi shatariscatani. Afanan isinin inima.

³⁰ Ascano Jesús ahuunoashu ainfo cayano yorahunrasi muran ifiacuahuan ato yocani, —¿Tsoan ua muamun? —ishon ato yocani.

³¹ Ascaiton cumanifo, —¿Min oianmamun yorahunrasiton mia yuruacafo? ¿Ahuuscaquimun min noco yocaicain? —a fu rafumisifoan huanifo. ³² Ascaifoan Jesús ato oiancuni, —¿Tsoan ua muamun? —ini tapipai. ³³ Ascaino ainfo man caya huaa tapiashu ratui fuopacucahuaquin. Nantifi ahuunoa imisi cuscan yafi ramashta acai cuscari yoini. ³⁴ Nicaquin yoini, —Achishtan, mian icoinra huashu min cayaquin. Ratuyamahuu. Min ointi muran unimahuu. Min afanan omitsiscaimacai. Min pushu ano casharatahuun, —ishon Jesús ainfo yoini.

³⁵ Jesús tsaincaino Jairo pushu anoashu futsanfo aqui fucashon yoinifo, —Min facu man naaquin. Non ahuusca huatiromaquin. Nocon tapimamisi afanan catima huayamahuu, —ishon futsanfoan Jairo yoinifo.

³⁶ Jesús Jairo yoini, —Aton tsain nicayamahuu. Ratuquima. Ua fusti icoinra huahuu, —ishon Jesús yoini.

³⁷ Ascano Jesús yorahunrasi nichitan, —Pedro non Juan non Santiago non atiri ufu fucahuun, —ato huani.

³⁸ Ascatan Jairo pushu ano nocoquin nica amurannoashu uaicani shoraras-

canifo manocani. Ascaiton Jesús oinni. ³⁹ Ointan pushu muran iquicaitan, —¿Ahuuscain man shorarascaimun? Na facucai naamafinquin. Oshafinquin, —ato huani. ⁴⁰ Ascaiton osanifo. Osaifoan ato chifi caimatan apa yafi ahua non afu rafuafo rafu non fusti cunu futsa muran ato iyonu. Nanno shotocofacu doce fari aqui caa. Raca ini. ⁴¹ Jesús shotocofacu mutsoinifoan yoiquin, “*Talita, cum:*” Onicoinnin tsainmanfin “*Facushtan, funinaca huanhuun,*” huaino. ⁴² Samamashta funinaca huanaino apa yafi ahua mustairinifo. Ascatan, —¡Aira! Nocon facushta afanan man funia. Oianmaquicai non icoinra huacuanamaran, —icashu yoinannifo. ⁴³—Maton facu man naacoinfiacun un funimana tsoan yoitama piimacahuun, —Jesús apa yafi ahua yoini.

Nazaret anoafoancai Jesús pushconi anoshon icoinra huanifoma

Mt 13.53-58; Lc 4.16-30

6 Ascatan Jesús afu rafumisifo ya anoashu pushurasi ano nasonifo. Nannoashu Jesús pushconi. ² Ascano Israelifoan aton tunutitian Jesús aton ichananti pushu muran iquishon ato yosaiton. Nicacani, —¡Aira! ¡Nicacapon! ¿Ahuuscain na nocofunun fasi tapicoin sharamun? Tsoan oinyomisima cuscara huapaiquifin ahuamamishti huatiroquin. ¿Tsoancon Jesús ascara yosiamun? ³ Nanfin ihui yonomisiquin. María facu. Chipocufu Santiago non José non Judas non Simón. Ahuun poifori nuno no fu imisifo. Nonfin Jesús onanquin. Aacai ahuama. ¿Ahuuscashomun ahuamamishti huatiroquin? —icashu yoinannifo. Nannori shinancashon aqui shinanchacanifo. Acai cuscariocon huacani. Afanan Jesús nicapainifoma.

⁴ Ascano Jesús ato yoini isca huaquin, —Nan maitio Diosin

tsain yoimisi nicatirofo. Ahuunoa yoisharamisifo. Nan cainni anofo non ahuun yorafoancai nanfoansicai nicapaicanimaran, —ishon ato yoini. ⁵Ascano isinin icaifo fustirasi manmanshon ato cayahuamani. Futsafori cayahuamapaifiaquin icoinra huayamaifoa anima. Diosihuunshon tsoa futsan atiroma cuscan ato ashopaifiaquin anima. ⁶—¡Aira! Ahuunscaín ua oinfiamisishaquin ua icoinra huapaicanimaran, —ishon Jesús shinanni. Ascaiton pushurasiti Israelifo icano cahuancacaini ato Diosin tsain shara yosin.

Jesús afu rafuafo doce ato nichini

Mt 10.5-15; Lc 9.1-6

⁷Ascatan afu rafuafo doce cunani, —Uqui fucahuun, —ato huaino. Aqui fuafoan ahuunshon yoshin chacafo yorafuhuun nuucun atomaquinao potanon. Ascashon ato rafurasisi nichini yorafo caya huamanonfo.

⁸⁻⁹Ato nichiataima ato yonoquin isca huani, —Maton tushu foyamafain maton forusari foyamafain puin foyamafain maton sapato nan man sahuua fusti fofain maton sahuuti nan man tsahuua fusti ya fotacahuun. Poqiti fusti ya fotacahuun. ¹⁰Pushurasi muran nocotan nan pushu fusti muransi oshacahuun. ¹¹Pushu futsan icanoafoan yafi pushurasi muran icanoafori mato iquimapaíyamaino iquiyamacahuun. Mato nicacasmaifoa maton sapato potapota sacaquin. Asca huaquin man oinmatiro mato nicacasmaifo. Ascan Diosin tsainri nicacasmacaniran, —ishon Jesús ato yoini.

¹²Ascano ato yoiquin anaitiano pushurasiti anofo ato yoifoanfafainifo. —Maton chaca shatucahuun Diosin tsain nicasharacahuun, —ato huaifoa.

¹³Yoshin chacafo yorafuhuun nuucun atomaquinao potanifo. Isinicaifori

shuniyashon fumanfain Upa Dios cufishonifo Jesushuunshon caya huafoanfainifo.

Juanpan nan yorafo unu muran iquimacumisi nani cuscan

Mt 14.1-12; Lc 9.7-9

¹⁴⁻¹⁶Ascatan Jesús ahuamamishti atiro cuscan nantifi yora nicacani. Ahuunoa yoifoanfafaini. Atirifioan yoinifo, —Jesusfin Juanquin nan ato unu muran iquimamisiquin. Afanan man funia. Ascacufin tsoan atiroma cuscan Jesús Diosihuunshon ahuamamishti huatiroran, —icashon atirifiton yoinifo. Atirifoanri yoiquin, —Jesusfin Eliasquin, —huanifo. Atirifiton yoini, —Jesús Diosin tsain yoimisisiquin. Nocon caifo Diosin tsain nocon shunifoan yoini cuscan Jesusri nanscacoín huaquin yoiaran, —ishon yoinifo. Ascano niaifon Herodes afo nicashon yoini, —Naanfin Juanquin. Mun tushtufiati afanan funiaran, —ishon yoini.

¹⁷⁻¹⁸Juan Herodes rutuataima yoini, —Niaifon Herodes, min ushto Felipe ahuin, Herodiasí, min fian. Ascan mincai shara huama. Nocon shuni Moisés noco Diosin tsain cunushoni cuscan isca huani, “Futsan ahuin min fitiromaran,” ishon Moisés cununiran, —ishon Juanpan Herodes yoini. Anori nicacasmaquin ahuun ranushumuafu yononi Juan achishon cunu muran iquimanon. ¹⁹Herodespan ahuin Herodiasin nicani Juanpan ahuunoa yoiaiton nicai aqui fasi sinai. Rutumariscaifaifiaquicai ahuun funu Herodes, —Ma. Mincai Juan rutumatiroraran, —ishon yoini. ²⁰Juan nocofunu shara Dios tanasharamisi niaifon Herodes tapishon cushusharani.

²¹Funun cushusharafiaino ahuinin ahuuscashoma Juan rutupaini. Funun cainnitian Juan rututiro punin shararan.

Isca huaquin. Cainnitian ahuun niaifofo patashari non ranushumua niaifofo non niaifofo Galilea mai anoafori ichanannifo fuusishoshcaquin. ²² Piainfono Herodes ahuin Herodiaspan facu shomaya arusu mononi. Herodes yafi a futan piaifoan oincani fasi unimanifo. Ascano niaifoan yoini, —¡Aicho! Min monoaiton oin un fasi unimai. Ahuarashta fipaiquin ua yoihuu un mia inanon. ²³ Diosin tapia un mia icon yoiaiton min fipaiyai cuscan ua yoihuu un mia inanon, —ishon yoini.

²⁴ Nicatan shomayaton ahua yoini. —¿Un niaifo ahua yocaimun? —ahua huaiton, —“Juan tushtumahuu. Ahuun mapo ua inanshquin,” niaifon yoitahuun, —ishon yononi. ²⁵ Ascano shomaya niaifoqui nasoni. —Juan tushtuhuu. Purato naratashon ahuun mapo ua inanshquin. Natian ua ashoriscahuun, —huani.

²⁶ Nicai niaifon puusinima. Juan fasi shinain. Ahuun nomuran shinanquin isca huani, —¡Ohua! Un asca huapaima. Ascafia yorafoan un shomaya yoia cuscan nicacashon un asca huapaiyamafiaqui un aqui cairan, —ishon shinanni. ²⁷ Ascaiton futsa yononi, —Juan tushtushon ahuun mapo ua fishotahuun, —niaifoan ranushumua yononi. Ascano cai cunu muran iquishon Juan tushtushoni. ²⁸ Tushtushon purato naratashon funi. Fushon shomaya inanni. Ascano shomayaton ahua inanni. ²⁹ Asca huano Juanhuunshon tanamisifoan nicacatan focashon ahuun caya mai huanifo.

**Jesús cinco mil
nocofunufo ato pimani**

Mt 14.13-21; Lc 9.10-17; Jn 6.1-14

³⁰ Ascano Jesusqui afu rafuafo afanan naso furanifo. Acafo cuscan yafi ato yosia cuscari Jesús tapimashcaquin. ³¹ Ascaifono yorahuanrasi Jesusqui

furi furinifo. Ascaquin ato pitimacoin huanifo. Afu rafumisifo yafi ato yoini, —Tsoa icama ano non fonon focahuun. Anoshon non tunuyonon, —ato huani. ³² Ascano shashohuanun tsoa icama ano fonifo. ³³⁻³⁴ Ascaiton yorafoan ato oinnifo. Ascatan Jesús yafi afu rafuafo nocoatima ian cuseumunri yorahuanrasi atoqui fuainfoan oin Jesús atohuun ramapaini. Ascashon Jesús shinanquin isca huani, —Chashohuanfo cushumisioma nanscarifiai na yorafo cushumisiomaforan, —ishon shinanniquin. Ascashon ato ichapa yosini.

³⁵ Ascano man fari caino afu rafuafoan yoinifo, —Nuno pushu yafi tushu yamai. Na yorafo nichihuun. Man fari caiquin. ³⁶ Fonaincaniquin pushurasi ari yafi pushu patashari ato nichihuun anoshon tushu huanonfo, —ishon Jesús yoinifo.

³⁷ —Mafin ato piimacahuun, —ato huaiton. —Noncai ahua ato pimatiroma. Nocofunun oshu ranan yonoahuunshon ahuun rafanan fishon nan yorafo pimashquin. ¿Nantimun non atohuunshon potaicai? —huaifoan. ³⁸ —¿Ahuuti misi man ayamun? Oinyocahuun, —Jesús ato huaino. Oinshon yoinifo, —Misi mucu fustiti yafi shiman rafusi non ayaran, —huaifoan.

³⁹⁻⁴⁰ Nicatan Jesús ato yononi isca huaquin, —Ato yoicahuun futsano cincuenta tsaohuaifono futsa anori cien tsaononfo, —ato huani. Ascano yorafo faasi camaqui tsaocunifo. Ato yonoa cuscan tsaoshoacunifo. ⁴¹ Ascaino nan shiman rafu yafi misi mucu fustiti tso-mashon nai ari foisinifoantan Apa Dios cufini, —¡Aicho! Upan, mihuunshon un ato pimaicain. Min fasi sharacoincun, —huatan. Misi torupacutan shiman rafu ya oishon ahuunshon tapimisifo ato pashcanan huapani. ⁴² Ascaino picani mayacoinnifo. ⁴³ A misi yafi shiman tushu

huafo afu rafuafoan doce shihuati fospí huani. ⁴⁴ Ascano cinco mil nocofunúfoan piinifo.

Jesús ian fumancayan caní

Mt 14.22-27; Jn 6.16-21

⁴⁵ Ascano ato pimaquin anaititan Jesús afu rafuafo yoini, —Shashon rufofo oquiri pushurasi Betsaida ano pocuí focahuun. Un na yorafo nichiyonon, —ato huani. ⁴⁶ Ato nichitan arus fusti machi mamaqui caashu Apa Dios fu tsainni.

⁴⁷ Man fari caino afu rafuafo ian nushmancayan shashon nocoafono arusu ian cusumunshon Apa cufiyoni. ⁴⁸⁻⁵⁰ Ato oian ian nushmancayashon fuun huaquin ato catima huani. Man faquishiaino Jesús ian fumancayan atoqui caní. Ato finonquin rashquini. Ascaitocai onannifoma. Onanshma ratucani. —Yoshin shafain, —fiisinifo. Ascaiton —Unquin. Ratuyamacahuun, —ato huani. ⁵¹ Ascatan shasho muran atoqui nanuinacahuani. Nanuano fuu nishmapacufoanni. Ascaiton afu rafuafoan, —¡Aira! ¿Ahuuscashocon Jesús isca huaimun? —huanifo. ⁵² Tapiyonifoma Jesús Diospan facu ahuamamishti huatirofiacun cinco mil nocofunúfo piimaiton oinfaitashacaquin Jesús onanyonifoma. Diospan facufiacun aton nomuran tapiyonifoma.

Genesaret anoshon Jesús isinin icaifo caya huani

Mt 14.34-36

⁵³ Ascatan ian pocufainifo Genesaret cusumunri nocoshon. Nanno shasho nushanifo. ⁵⁴ Ascatan mapuinfoannaifoan nannoafoan samamashta Jesús onannifo. ⁵⁵ Onantan ichonifo pushurasifo patashari chani focani. Isinin imisifo shuhua naratashon Jesusqui ihuunifo. ⁵⁶ Nantiocushon

isinin icaifo aqui ihuunifo. —Uhuun yora isinin icaiton min sahuuti cupanan mia munpaicani. Ato yoipun anonfo cayashcaquiran, —ishon yoinifo. Ahuun sahuuti muuncanashu cayapacunifo.

Ahuarafoan noco nomuran chaca huamatiro cuscan

Mt 15.1-20

7 Ascano Fariseofo yafi Moisés tsain tapimamisifori Jerusalén anoashu Jesusqui fucashon. ² Oianfo Jesús fu rafumisifo piataifoma muchoquimupaonifiacashon aton shunifoan yononi cuscacai anifoma. ³ Israelifo aton shunifoan piataifoma aton fuuyamisi cuscan muchoquimupaoni. Ascan aton shunifoan aponifo cuscan Fariseofo yafi nantifi Israelifoan nansca huamisifo. ⁴ Tushu inanmistsamisifo anoashu aton pushu ano nococashon aton shunifoan apaoni cuscan atorifi piataifoma muchoquimunifo. Aton shunifoan ahuafo futsa fuuyamisi cuscan nanfoanri nanscari aponifo. Aton shunifoan cuchofo non aqui unu manutifo non paninrafori chocamisi cuscan nanscara fuuya huanifo.

⁵ Ascano nanfoan Jesús yocani, —Ahuuscaquimun nocon shunifoan piataifoma muchocomushoma pipaonifo cuscacai mifu rafuafoan asca huacanima, —ishon yocainfoan. ⁶ Ato cumani, —Isaías nan Diosin tsain yoimisiton iconcain inaca cuscan matohuunoa yoini. Manfin fuparapaimisifoquin. Matohuunoa yoini isca huaquin,

“Nan yorafoan uhuunoa yoisharafi-acaquin aton nomuran ua shinancoianfoma. ⁷ Ipaitsi ichananshu fanaincaini ua cufiyanan. A yorafo tapimapaiyai cuscacai uhuun tsainma. Nanfoan aton nomuran afi shinain cuscan aton yorafo yoicaniran,”

ishon Isaías Diosin tsain cununi. ⁸Diosin yononi cuscan atama maton shunifoan amaquiri shinanmisifo cuscan marifi man ascamisi. ⁹Maton fuyamisi fusti man tanapai. Ascacuai Diosin mato yononi cuscan afanan man shinainma. ¹⁰Nocon shuni Moisés yononi isca huaquin,

“Maton upa yafi uhua nicasharafain ato shara huacahuun. Tsoan apa iyamarai ahua tsain chaca huai ato rutumacahuun,”

ishon yoini. ¹¹Anori cunufiani man ato yoiquin, “Maton upa yafi uhua man yoitiro isca huaquin, ‘Upa futan uhuash-tan un mato inanpaisharafiaqui un Dios inainran,’” man imisi. ¹²Anori yoitacai Diosin yononi cuscan man ato yosima. “Maton upa yafi uhua cushusharacahuun,” mato huafiani mancai anori ato shinanmapaima. ¹³Ascashon Diosin tsain man ato tapimatamarocon maton shunifoan yonopaoni cuscan nan fusti man ato tapimapai. Asca huaquin Diosin tsainmaquin man ato imai. Nanscara chaca futsafori man huamisiran, —ishon Jesús ato yoini.

¹⁴Ato yoitan afanan Jesús yorahuanrasi cunani ato ahuaara futsa yoishquin. —Uqui fucahuun un mato yoinon. Ua nicasharafain tapisharacahuun. ¹⁵⁻¹⁶Ahuarafo non piatocai nocon nomuran chaca huatiroma. Ascata maton nomuran shinansharashoma ahuaara man chaca huatiroquin, —ishon Jesús ato yoini.

¹⁷Ascatan yorahuanrasi anoashu cai pushu muran iquiano a rafuafu aqui funifo yocain fucani, —Min yorafo min tapima cuscan nocori shafacafi yoihuu non tapinon, —huaifoan. ¹⁸—¿Ahuuscaquimun marifi man tapisharataimacain? ¿Man tapiamamun ahuaara non piatocai nocon nomuran noco shinanchacamatiroma? ¹⁹Maton nomurancai tushu nitutiroma. Maton

shaqui muranfin itiroquin. Chipa man aya poitiroran. Nantifi tushu sharafain non pisharatiroquin, —ishon ato tapimani.

²⁰—Maton nomuran man shinanchaca cuscan man yoitiro. Nanfohuunoa shinanquin man chaca huatiro. ²¹Yorafoan aton nomuran ahuaara shinanchaca cuscan huatirofo. Isca huaquin, shinanchacafain nocofunu yafi ainfo chaca huatanantirofoquin yomutso icain rutumitsapaimisi icain aton ahuinma chotafain aton funumari chotamafain ²²Futsana fianpaifain chaca futsa futsatapafo huafain paramitsamisi icain rafipaitama ahuaara chacafo huafain man ahuarayafiashu ahuan unimatama futsa fuchipaifain futsaqui tsain chaca huafain cacapaimisi icain Diosin tsain nicacasmamisi. ²³Na chacafo aton nomuranshon shinainfo cuscan ato chaca huamashqiran, —ishon ato yoini.

Ainfon mani futsa fustiton Jesús icoinra huani

Mt 15.21-28

²⁴Ascatan Jesús nannoashu pushurasi ahuan anu Tiro chaimashta caani. Caashu pushu futsa muran iquini tsoa tapimapaima. Ascafiaiton samamashta nanno icafoan nicanifo pushu muran icun. ²⁵⁻²⁶Ascano ainfocai Israeli anoa shafo inima Sirofenicia anoa ini. Nan ainfoan nicaní Jesús oaiton. Ascatan aqui iquicaini nan yoshin chaca ainfacuahuun nuucun. Jesús cufini, —Ifon, uhuun facu shotocofacushta fasi omitsiscái. Yoshin chaca ahuan nuua. Na yoshin chaca amaquinoa ua potashohuun. Uhuun facushta ua cayahuashopun, —ishon yoiriani.

²⁷Ascaino Jesús yoini, —Uhuun yorafo un ato tau huamanon. Tsoancai facufo aton tushu fiantan pashnafo potatiroma, —huaiton.

²⁸—Ai, Ifon. Mian yoia cuscan icon. Ascafia facufoan piqui tushu huafo sapa camaquinoashu potomishti pacuaiton pashnafoan pitirofo. Nanscarifi huaquin min yorafo min caya huamayotirofifashon nocori min caya huamatiro. Min nocori caya huainocai min caifori funotiomaran, —ishon cumaiton.

²⁹—¡Aicho! Mian cumasharaquin. Natian min pushu ano min catiro. Yoshin chaca min facumaquinoashu man caaquin, —ishon Jesús yoini.

³⁰ Ascano ahuun pushu ano nocoshon oian ahuun facu shara racaini man amaqui yoshin chaca caano.

Nocofunun tsaintiroma icain nicatiroma Jesús caya huani

³¹ Ascano Jesús Tiro anoashu cai Sidón finonfaini ianmanhuan Galilea cusumunri cani. Cai pushurasi anoafu aton anu Decápolis ano noconi.

³² Nannoa yorafoan nocofunu tsaintiroma icain nicatiroma aqui ihuunifo. —Nocon yoran nicatiromacoin noco manmanshohuun, —ishon yoinifo.

³³ Ascaiton Jesús nocofunu nicatiroma atomaqui chaimashta iyoni. Iyoshon ahuun mutotinin ahuun pachu rafu munni. Ascashon cumo michotan ahuun mutotinin ana munni.

³⁴ Ascashon nai ari foisinifoantan fasi shacaitan yoini, “*Efata*,” Onicoinnin tsainmanfin: “*Cayasharahuu*,” huani.

³⁵ Ascano nocofunun nicasharariscani. Tsain cayacafi shara ato yoini. Afanan ahuun ana curushma.

³⁶ Ascano Jesús yorahuanrasi yoini, —Un nocofunu nicatiroma caya huama cuscan tsoa yoiyamacahuun, —ato huafia nantifiton yorafo chanifoanfainifo. ³⁷—¡Aira! Jesús acai cuscaai tsoan oinyomisima.

Ahuamamishti huatiroquin. Nantifi yoinifo cuscan fasi sharacoinquin. Yoran nicatiroma caya huamafain tsaintiromafori caya huamaran, —ishon yoinifo.

Jesús cuatro mil yorafo pimani

Mt 15.32-39

8 Ascatan nantianri afanan yorahuanrasi Jesusqui funifo. Ahuun tsain nicacaquin ahua piinifoma. Ascano afu rafuafu cunani ato yoishquin. ²—Un nan yorafohuun ramapai. U fu rafu non fusti oshatan nuno icafo. Natian aton tushu man cuyoa. Ahuashta pitirofoma. ³ Atirifi chaicunoashu nuno fuafo. Ascacun un aton pushu ano nichicain fasi fonaincani napuitirofo tacayomancani, —ato huaiton.

⁴—Nuno tsoa icamano non tushu fuchitiroma nan yorahuanrasi pimashquin, —huaifoan. ⁵—¿Ahuuti misi man ayamun? —ishon yocaiton. —Siete non ayaran, —huanifo.

⁶ Anori yoiainifo Jesús nan yorahuanrasi yoini, —Nuno tsaocahuun, —ato huani. Tsoafono Jesús misi siete tsoamashon Apa Dios cufiyoni, —¡Aicho! Upan, minhuunshon un ato pimaicain. Min fasi sharacoincun, —huatan. Misi torupacutan afu rafuafu inanni. Inanno yorahuanrasi pashcananpacunifo. ⁷ Shiman uhuapamamishti fuchishon Jesús inanfoanno Apa Dios afanan aicho huatan shimanri torupacutan afu rafuafu inanni. Inanno yorahuanrasi pashcananpacunifo. ⁸ Ascashon picani mayacoinnifo. Ascashon a tushu huaafo siete shihuati fospicoian ini. ⁹ Cuatro mil yora icuanafo nanno inifo. Piafono Jesús aton pushu ari ato nichini. ¹⁰ Nanucainicai a fu rafuafu fu mai futsa ahuun anu Dalmanuta ari cani.

**—Yorafoan atiroma
cuscan noco ismahuu,
—Fariseofoan Jesús huanifo**

Mt 16.1-4; Lc 12.54-56

¹¹ Nocoafono Fariseofo Jesusqui funifo yocain fucani. Fochishmanantanapai funifo. —Minmain Diospan facucoinqin Diosin nai ariashu icahuunshon tsoan atiroma cuscan noco ismahuu non mia icoinra huanon, —ishon yocacaquin chaca huanifo. ¹² Ascaino Jesús fasi shacaini. Ascashon ato yoini, —Ahuuscain tsoa futsan atiroma cuscara man oinpaifainiquin. Un mato icon yoi. Diosin fustiton atiro cuscaicai un mato ismaimaran, —ishon ato yoini. ¹³ Asca huatan ato anoashu afanan shasho nanucaiquin ian pocufaini cani.

Fariseofoan amaquiri yoinifo

Mt 16.5-12

¹⁴ Ascano ian pocufain cashion afu rafuafoan yoini, —¡Ohua! Non ointiaquima. Non tushu fuamaran, —huanifo. Ascashon misi fustishta shasho murannoa fuchinifo. ¹⁵ —Oinfain Fariseofo yafi niaifo Herodes aton misi faranshati piyamacahuun, —Jesús ato huani. ¹⁶ Nicacani yoinannifo, —Ahuuscain Jesús noco yoiai Fariseofo non Herodes aton misi faranshati piyamacahuun. Non tushu fucunma anori noco yoiran, —icashu yoinannifo.

¹⁷ Yoiaifo cuscan Jesús onanshon ato yoini, —¿Ahuuscaquimun tushuhuunoa man yoinaincain? Mancai ua tapisharataima. Maton ointi muran curushcoin uacai man icoinra huataima. ¹⁸⁻¹⁹ Man oinfiaquin man tapiama. Nicafiaquicai man nicacoianma. ¿Un mucu fustiti misihuunshon cinco mil nocofunufu pimaita ahuuti shihuati misi fospicoinyamain tushuitaquin? —ishon ato yocani. —Ascano doceran,

—huanifo. ²⁰ —Un siete misifo un cuatro mil yora pimaita. ¿Ahuuti shihuati misi fospicoinyamain tushuitaquin? —ishon ato yocaiton. —Sieteran —huanifo. ²¹ —¿Ascaino ahuuscain man tapiataimamun? —ato huani.

**Jesús Betsaida anoa nocofunu
fushocoin caya huani**

²² Ascano Betsaida ano noconifo. Nannofo nocofunu fushocoin Jesusqui ihuunifo. Ihuunshon yoinifo, —Ifon, nocon yora fushocoin noco caya huashopun, —huanifo. ²³ Ascano Jesús fusho mutsoinifoantan pushurasi pasoato iyoni. Nannoshon ahuun furoqui cumo michotan ayashon furo muunni. Ascashon yocani, —¿Min oinsharaimun? —ishon yocaiton.

²⁴ Foisinifoantan, —Ai. Un yorafo oin. Matacoin. Ihui foro cahuanai ointsa, —ishon cumaiton.

²⁵ Afanan furo munni. Ascano oinsharacoinni. Man cayahuamacoian. Shafacaficoi nantifi oinsharani. ²⁶ —Pushufo ari cayamahuu. Min pushu ano cayacafi catahuun, —ishon Jesús yoini.

**—Jesús, minfin Cristo Diospan
Facuquin, —Pedronun huani**

Mt 16.13-20; Lc 9.18-21

²⁷ Ascatan Jesús yafi afu rafuafo anoashu focani Cesarea de Filipino pasoato pushurasifo ano fonifo. Foaifoan Jesús ato yocani, —¿Yorafoan man shinanmun un tsoaquin? —ishon ato yocaiton. ²⁸ Cumanifo, —Futsafoan yoiafin min Juanquin. Nan ato unu muran iquimapacumisi. Asca futsafoanri yoiafofin minfin Eliasquin. Asca futsafoanri yoiafin minfin nocon shunicafoan Diosin tsain yoimisiquin. Man min afanan funiaran, —huaifoan.

²⁹—¿Anori uhuunoa shinanfiafononmun manri shinanmun un tsoaquin? —huaiton. Ascaiton Pedronun cumaquin, —Minfin Cristoquin. Upa Diosin mia catonni nocoqui nichishquiran, —ishon yoiaiton. ³⁰—Un Cristoqui tsoa yoiyamacahuun, —ato huani.

**—Chipo ua rutushcaniran,
—ishon Jesús ato yoini**

Mt 16.21-28; Lc 9.22-27

³¹Ascatan ato yoiquin tau huani, —Nocon caifoan Dios fu tsainti pushu cushumisifo non Moisés cununi cuscan tapimamisifo non yorafohuunshon Dios cufimisi niaiffoan ua omitsisca huashcaniquin. Nan nocon niaiffoan ua nica-casmacaquin ua rutumashcani. Ua rutumafiafo osha rafu non fusti finontan un afanan funishquiran, —ishon ato tapimani. ³²Anori shafacafi icaiton Pedronun Jesús pashaquifain yoini, —Ifon, ascayamahuu. Miacai rutupacunacafoma, —huaiton.

³³Jesús tapacucahuan afu rafuafo oinyoni. Ascatan afanan ifiacucahuan, —Satanás uhuunoashu catahuun. Upa Diosin ahuun nomuran shinain cuscaicai min shinainmacai. Anori min shinaintama nocofunufoan shinain cuscan nannori min shinainran, —ishon Jesús Pedro yoini.

³⁴Asca huatan yorahuanrasi yafi afu rafuafori cunani, —Uqui fucahuun un mato yoinon. Tsoan ua tanapaisharaquicai afin apaiyai cuscan huatiroma. Un yoiyai cuscafin nicatiroquin. Tsoan ua tanapaiquin isca huatiro, “Ua rutufianfoannocai un uhuun Ifo potapacunacama. Ahuunshon ua rutufiainfoanno un tanapacunacaran,” ishon yoitiro. ³⁵Ascan tsoan yoiquin isca huai, “¡Ohua! Un Jesús tanaino uaraca rutucaniquin,” ishon yoitán. Ascashon uhuun tsain cachiquiri nan cuscara

yora naashu omitsiscapanaca. Ascan tsoan uhuun tsain futsafo yoiainfin uhuunoashu rutushquiquin. Nan cuscara yora uhuunoashu naashu unfu isharapacunaca.

³⁶Ratoranfo manifoannati ahuunacoinfiano naanocai afanan ahuunacoin itiroma. Nantifi funocointiro. Niyoshon Diosin tsain tanatama imisishaquin. Ahuun nomuran omitsiscatiro. ³⁷Ahuun yoshin nipanocai ahura inantiroma. ³⁸Yorafoan fasi chaca huamisifo. Upa Diosin tsain cachiquiri huaafo. Tsoan uhuun rafipaiquin uhuunoa yoiacsmái uhuun tsainhuunari yoiacsmáiquin. Chipo un uhuun Upa Diosinhuunoashu un nai murannoashu mai ano un fotoaino uhuun Upa cuscaracoin un chasha curannaino uhuun Upan oinmati afu ica sharafori ufu fotoshcaniquin. Fotoshon nan uhuun rafiaifofin ua Ifo huapaicanima. Uhuun tsainri yoiacsmacani unrifi un atohuun rafitiro. Afocai “Uhuun yoraran,” un huanacama —ishon Jesús ato yoini.

9 Afanan ato yoiquin isca huani, —Icon un mato yoinon. Man futsan nuno ufu niaton nayoshoma Diosin ahumamishti atiro cuscan man oincain. A icano ahuu cuscarainquin man oincain, —ishon ato Jesús yoini.

**Jesús ahuun yora mumacoin
ahuun sahuutifoya
fianananriscatanaino chashatani**

Mt 17.1-13; Lc 9.28-36

²⁻³Asca huatan seis osha finontan Jesús Pedro non Santiago non Juanri machi cuya pochinin iyoní. Nanfo fusti nanno ini. Nannoashu aton ointaifi Jesús ahuun caya mumacoin sahuutifoya fianananriscatanaino ahuun sahuuti os-hopacoin chashacoinni yoa rama furoamua ointsa iriscatani. Tsoacai sahuuti ya ascatiroma. ⁴Ascaino Moisés yafi Elías nitariscatan Jesús fu tsainnifo.

⁵ Ascaiton Pedron yoini, —Tapimamisiton, nuno non isharatiro. Non pushu facu rafu non fusti mato huashotiro. Mina futsa non Moisésna futsa non Elisna futsa. Santiago futan Juanpan non mato ashotirotan, —ishon Pedron yoini. ⁶ Raquirira huapaifiacani ratucoinnifo.

⁷ Ascatanaino naicoín atoqui cuyopacuni. Naicoín murannoa ahuun oi nicanifo, —Nanfin uhuun Facuquin. Un ahuun noi. A nicacoincahuun, —Upa Diosin huani.

⁸ Asca huatan nan rafu non fusti samamashta oinnifo Moisés yafi Elías yamariscatani Jesús fusti atofu nia ini.

⁹ Ascano machi cuya pochininnoashu fotoshon Jesús ato yoini, —Man rama oian cuscan tsoashta yoiyoyamacahuun. Nan naashu un afanan funiano rama man oian cuscan man yorafo yoitiroquin, —ishon ato yoini. ¹⁰ Ato yoia cuscan tsoa futsa yoionifoma. Tapiamafishu yoinannifo, —Ahuacón Jesús noco yoiamun naashu afanan funishquiran. Noco huua cuscan non tapiamaran, —icashu yoinannifo.

¹¹ Ascatan Jesús yocanifo, —¿Ahuuscaquimun Moisés tsain tapimamisifoan yoimisiquin isca huaquin? “Nocon Numamisi Cristo Diosin catonni nocoqui oataima Elías rufoto nocoqui oshquiran,” —ishon noco yoinifo. ¹²⁻¹³ —Icon. Elías rucun oitautiro. Oshon nantifi isharamapai aton chaca shatunonfo. Ascafia tsoan onannima. Juanfiacun tsoan onannima. Nan chaca huapaiyai cuscan chaca huanifo. Nannori ahuunoa cununi cuscan. Nanscarifi aquin unfin Dios ariashu un nocofunucuin cainfianicun ua omitsiscamacani. Nannori Diosin tsain yoimisifoan uhuunoa cununiforan, —ishon ato yoini.

Jesús furonanfacu ahuun yoshin chaca nua caya huani

Mt 17.14-21; Lc 9.37-43

¹⁴ Ascatan machi tununman fotocatan yorahuanrasi nastui Jesús fu rafumisifo yafi Moisés tsain tapimamisifo fu fochishmanantanannifo. ¹⁵ Ascano yorafoan Jesús fuchishon, —¡Oincapon! Jesús afanan oi. Tsoa futsacai a cuscarama. Ahuamamishti huatirotan, —icashu yoinannifo. Yoitan aqui ichonifo. ¹⁶ —¿Ahuuscain Moisés tsain tapimamisifo fu man fochishmanantanainmun? —ishon ato yocani. ¹⁷ Ato yocaiton nocofunu futsa cumani, —Tapimamisiton, uhuun furonanfacushta un mia ihuushona. Yoshin chaca ahuun nuucun tsaintiroma. ¹⁸ Achitan mipuani ahuun ashfapan facoshurasi atsispomumisi. Shucurushui futsutan charishi futsua. Uhuun facushta mifu rafuafu ano un ihuufia ua tsoa caya huamashotiromaran, —ishon nocofunun Jesús yoini. ¹⁹ Ascaiton Jesús, —¡Ohua! Mancai ua icoinra huaima. Man fasi amaquiri shinanmisi. ¿Ahuutia un matofu ipamun ua man nicayamacaiquin? —Jesús ato huani. —Min facu ua ihuushonhuun, —Jesús apa huani. ²⁰ Ihuuafono yoshin chacanun furonanfacu musta mustaimani. Ascatan taruamucucaini facosh atsispomutan pacuni.

²¹ Ascashon Jesús apa yocani, —¿Ahuutiamun iscamisiquin? —ishon yocaiton. —Nan facuaitian tauniran, —huani. ²² —Yoshin chacanun uhuun facu chi muran potafain unu muran man potamisi rutupaiquin. Min uhuun facu ua caya huashotiromainquin nocohuun ramapaihuu, —huaiton. ²³ —¿Ahuuscain mian anori huaimun? Tsoan ua icoinra huacoian un ato

ahuamamishti ashotiro, —Jesús huaiton.

²⁴—Un mia icoinra huai. Ua paratama icoinra huamahuu, —ishon apa yoiaiton.

²⁵Ascano yorahuanrasi oinpai atoqui ichonifo Jesús yoshin chaca curushcain yoini, —Minfin yoshin chacaquin. Nan facu min pastomafain tsaintiroma. Amaquinoashu catahuun. Mincai afanan a muran ipanacamaran, —ishon Jesús yoshin chaca curushcain yoini.

²⁶Asca huaino yoshin fiiscaini cani. Facu musta mustaimafaini amurannoashu cani. Ascaino oianfo furonanfacu naa shinantsacun yoinifo, —Man facu naaran, —ishon yoinifo. ²⁷Ascafia Jesús furonanfacu mutsoinifoannaino funininacahuani.

²⁸Ascashu Jesús pushu muran iquini. Iquiano afu rafuafo aqui funifo. Ascashon yocanifo, —¿Ahuuscashomun nofi non yoshin chaca facumaquinoa potatiromaquin? —huaifoan. ²⁹—Na cuscara yoshin chaca man Upa Diosin cufinyamaquicai man potatiromaran, —ishon Jesús ato yoini.

Afanan Jesús ato yoini, —Ua rutushquicaniran, —ishon yoini

Mt 17.22-23; Lc 9.43-45

³⁰⁻³¹Ascatan anoashu Jesús yafi afu rafuafo Galilea mai finonfaini. Nantian afu rafuafosi tapimani. Ascashon tsoa futsan tapimayopainima. Ato yoini, —Un mato yoimisi cuscan un Dios ariashu mai ano ftoni nocofunucain cainshquin. Ascafiacun futsan ua achimashquin ua rutunonfo. Ua rutufiafo osha rafu non fusti finontan un afanan mai murannoashu funishquiran, —ishon Jesús ato yoini. ³²Ato yoifiaiton tapinifoma. Ratucaquin tsoancai afanan yocanima.

¿Ratocaimun fasi shara finacoianquin?

Mt 18.1-5; Lc 9.46-48

³³Ascatan Capernaum ano noconifo. Pushu muran iquicashon Jesús afu rafumisifo yocani, —¿Ahuuscai fai anoashu man fochishmanantanaimun? —ishon ato yocaino. ³⁴Fuaifoan yocani, Ratocaimun fasi shara finacoianquin fochishmanantanancanashu rafinifo tsoancai Jesús cumanima. Puusinifoma.

³⁵Puusiyamaifoan Jesús ato onanni. Ascashon tsaoshon ato yoini, —Nicasaracahuun un mato cayacafi yoinon. Tsoan ahuun yorafo fasi finonpaiquin nantifi yorafo aton oinmati itiroran, —ishon ato yoiniquin.

³⁶Ascatan aton ointaifi ato nushmancayan facu nichipacufoanni. Ascatan chishto inifoantan ato yoini. ³⁷—Tsoan uhuunshon facu cushusharaifin nanscarifi ua huaiquin. Nanscarifiai tsoan ua shara huaiquin uhuun Upa Diosiri nanscari huairan, —ishon ato yoini.

Tsoan noco chaca huapaitama noco shara huai

Mt 10.42; Lc 9.49-50

³⁸Ascano Juanpan Jesús yoini, —Tapimamisiton, non oian nocofunun min anuhuunshon yoshin chacafo atomaquinoa potaiton. Nancai no fu rafumisima. Ascacun non yoiquin isca huai, “Mincai no fu rafumisima. Asca min yoshin chaca yorafomaquinoa potatiromaran,” ishon non yoiaran, —ishon Juanpan Jesús yoini.

³⁹Ascaiton Jesús cumani, —Na nocofunu shutiyamacahuun. Tsoancai uhuun anuhuunshon ahuamamishti yorafoan atiroma cuscan huaitocai uhuunoari tsain chaca huatiroma. ⁴⁰Tsoan noco nicacasmaquima noco futan aqui. ⁴¹Un mato icon yoi. Tsoan ahuun nomuran matohuunoa shinanquin isca huaiquin,

“Afin Cristo ahuun yoraquin. Ascacun un shara huairan,” ishon yoitirofo man nomaiaton mato unu ayamatiro. Mato as-cara shara huacun Diosin inanpaiyai cus-can funotiroma.

Futsafoan noco chaca huamatiro

Mt 18.6-9; Lc 17.1-2

⁴²Ua rama futsa icoinra huafiacun futsan chaca huamaiton nancairocofin toquiri uhuapa tuhumashon unuhuan noa muran potanon.

⁴³⁻⁴⁴Asca huatan min mucuman ahuara chaca huai mifiri min mushatumua shara icuana. Mucu rafuya omitsiscapanacafo muran catama mucu fusti ya Upa ari min nocotiro nipashquin. Nan shara. Omitsiscapanacafo muran a chicai nocanacama. Nanscasi apanaca. Acai sharama.

⁴⁵⁻⁴⁶Nanscarifi aquin min tau rafu yashon min raquiri capai ahuara chaca huapai mifiri oshatumua shara icuana. Min tau rafu ya omitsiscapanacafo muran catama min tau fusti ya Upa ari nocotiro nipashquin. Nanscara shara itiro.

⁴⁷⁻⁴⁸Nanscarifi aquin ahuara chaca oinquin min ahuara chaca huaiton mifiri min futsucumua shara icuana. Min furo rafu ya omitsiscapanacafo muran catama min furo fusti ya Upa ari min nocotiro nipashquin. Nanscarafin shara itiro. Nan chi uru muran caashu fasi min omitsiscacointiroquin. Nanscasi apanaca. Nan chiicai nocanacama.

⁴⁹Tsoancai anori capanacama.

⁵⁰Ascan sao fasi shara itiro. Nami saomua funa payocotiroma. Ascan saomui chacano nami payocotiro. Nanscarifiai tsoa ufu rafushocai chaca huatiroma. Futsafori ua icoinra huamatiro. Ascafiaino tsoa ufu rafuyamaino afanan chacacoin itiro. Ua futsafori afanan icoinra huamatiroma. Ascacun ufu rafupacahuun. Fochish-

manantanacaquima. Isharacahuun, —ishon Jesús ato yoini.

Funu yafi ahuin ununainhuunoa Jesús ato tapimani

Mt 19.1-12; Lc 16.18

10 Ascatan anoashu a rafuafo afu Judea mai nan unu Jordán ocuma futsa fonifo. Ascano afanan yorahuanrasi aqui funifo. Amisi cuscan afanan Jesús ato yosinon.

²Ascano Fariseofo Jesusqui funifo. Aqui fucashon amaquiri cumamapainifo. Fuparapaicaquin. Ascashon yocacaquin, —¿Nocon shunifoan Diosin tsain cununi cuscan nocofunun ahuin unupaiquin unutiromun? —ishon yocaifoan.

³—¿Moisés ato yononi cuscan raquiri yoiamun? —huaiton.

⁴—Moisés cunuquin isca huani, “Tsoan ahuin unupaiquin acataima cunushotiro isca huaquin, ‘Un afanan mia fipaima. Munfin mia unuicain,’ ishon yoitiro.” Anori Moisés ato yononiran, —huaifoan.

⁵—Maton shunifo mato cuscarari. Nanfo Diosin yonoquin tau huani cuscan nicacasmacani. Ascashon Moisés tsain futsan yononi cuscan maton shunifo cunushoni. ⁶Ascafiaino Diosin nocofunu yafi ainfon onihuashocai anori shinannima. Ato onihuaquin tau huani funu yafi ahuin potananonfoma. ⁷Ascano Diosin yoini isca huaquin, “Ascan nocofunun ainfo fiashu apa yafi ahua-maqui pashcatiromo. Oshati fusti muran afu iishquin. ⁸Ascashu ano rafu niishcaquin. Fusti ica shinantsa aashquin. Afanan rafuma.” ⁹Ascacufin Diosin ato cumanan huaa afanan tsoa pashcanantimoraran, —ishon Jesús ato yoini.

¹⁰Ascano afanan pushu muran iquiano a rafuafoan Jesús yocani —Min rama yorafo yosia cuscan nocori yoihuu, —huanifo. ¹¹Ascaiton

ato cumani isca huaquin, —Ratoran futsan ahuin unuquin futsa fiishquin chaca huai ahuun ahuinma fu iquin. ¹²Nanscarifi aquin ainfoan funu unutan futsa fiishquin arifi chaca huaiquin funuma fu iquin, —ishon Jesús ato cumani.

Jesús facumishtifo yoisharapacuni

Mt 19.13-15; Lc 18.15-17

¹³ Ascano yorafoan aton facumishti Jesusqui ihuunifo ato manmanpacuquin Upa Dios cufinon. Ascaifoan oinquin Jesús fu rafuafoan yoinifo isca huaquin, —Maton facufo ihuutan nocon Ifo fucash huayamacahuun, —ishon yoinifo. ¹⁴ Anori huafiaifono nicatama Jesús atoquei unimatama yoini, —Asca huayamacahuun. Facufo uqui funonfo. Ato nitun huayamacahuun. Uhuun Upa Diosin ni-aifo icanori facumishti cuscaraforiquin. Facufoan ua icoinra huacoinnafo. Nai muran Uhuun Upa icano nanscarifi afoquin, —ishon ato yoini. ¹⁵—Un mato icon yoiquin. Facufoan ua icoinra huamisi cuscan tsoan nanscarifi aquin ua icoinra huashuma uhuun Upa ni-aifo icano afu ipanacamaran, —ishon Jesús ato yoini. ¹⁶ Ato yoiquin facufo shatsaomushon manmanpacuquin, —Upa Diosin, na facumishti shara huahuu, —ato huapani.

Nocofunu mafo ichapaya ahuashta yopaima ini

Mt 19.16-30; Lc 18.18-30

¹⁷ Ascano nocofunu aqui ichotoshini. Ichotoshitan ratoconun mai chachishon yoini, —Tapimamisiton, minfin shara-coinquin. ¿Unmun ahuuscatiroquin Dios fu ipashquin? —ishon yocaiton.

¹⁸—Ahuuscaquimun mian “sharacoinran” huacai. Fusticoifin sharaquin. Nanfin a Diosiquin. ¹⁹ Diosin yononi cuscan min tapian. Isca huaquin noco yoini, “Futsa rutuyamacahuun.

Maton ahuinma fu iyamacahuun. Ascatori maton funumafuri iyamacahuun. Ahuara onuyamacahuun. Chaniri yoiyamacahuun. Fuparayamacahuun. Maton upa yafi uhua nicasharafain ato shara huacahuun,” —ishon Jesús yoini. ²⁰ Ascaiton cumani, —Tapimamisiton. Nantifi nan Diosin yononi cuscan facushon un nicainifoana, —huaiton.

²¹ Jesús oianan noiquin. Yoini isca huaquin, —Fustiricai min nicataima. Nantifi min ahuara ya cuscan inanmitsatahuun ahuun rafanan pui fiishon ahuaomafo inanshquin. Min asca huaiton Upa Diosin nai muranshon mia ahuara sharacoin mucushoshquin. Asca huatan ua tanahuun, —huaiton.

²² Nicai nocofunu puusinima. Mafo ichapayashu ahuun mafofo inamitsacasmai puusinima. Ascatan Jesusmaquinoashu cani.

²³ Caiton oinquin tanatan ifiacucahuun afu rafuafo yoini, —Yora mafo ichapaya Uhuun Upa Dios niaifo ari atirifi nocotiroma. Aton mafo ichapa potacasmacaquin Diosiquiri shinanpaicanimaran, —ishon ato yoiaiton.

²⁴ Nicacani afu rafumisifoan ahuun tsain tapipainifo. Ascano Jesús afanan ato yoini, —Uhuun facumishtichin, iconcoin mafo ichapayafo Dios icano fustirasi nocotirofo. Dios shinantama aton mafo fusti shinanfo. ²⁵ Ina uhuapa camellocai acoya shoi muran finontiroma. Mimacai fin nocofunu mafo ichapa ya Diosin niaifo ari fustirasi nocotiro, —ishon yoiaiton. ²⁶ Nicacani ahuun tsain fasi tapipaicani yoinannifo, —¡Aira! ¿Mafo ichapa ya Dios fu ipatiromainquin tsoa futsamun Dios fu ipatiroquin? —icashu yoinannifo.

²⁷ Jesús atoquei fusoacucahuan yoini, —Nocofunufocai afinri numatiroma. Diosin fustitofin yorafo numatiroquin. Diosifin ahuaamishti huatiroquin.

Nocofunufaoan atiroma cuscan Diosin huatiroquin, —huaiton.

²⁸ Nicaquin Pedro yoini, —Ifon, nonfin nocon mafo yafi nocon yorafo nantifi nocona non pota furanaquin mia tanay-
oquin, —huaiton.

²⁹ —Un mato iconquin yoi. Tsoan ahuun pushu potafain ahuun ochifo potafain ahuun ushtofu potafain ahuun poifo potafain ahua potafain apa potafain ahuun facufo potafain ahuun mauri potafurashon ua tanapaisharatiro uhuun tsain shara futsafo yoishquin.

³⁰ Nanscarafoan niyocashon Diosin ato fumimacoin inain. Pushufo non ochifo non poifo non ahuafo non facufo non maufori ato inain. Ato inansharafiaino ahuunoashu nantianri omitsiscashquin. Ascatan chipo Upa Dios fu ipasharashcani. ³¹ Ascafia yora ichapa natian isharacoinfiashu naashu funocoincani. Nanscarifiai atirifi natian ahuama shinantsa. Afo naashu Upa Dios fu ipasharashcaniran, —ishon ato yoini.

Afanan Jesús ato yoini, —Ua rutushquicaniquin, —ishon yoini

Mt 20.17-19; Lc 18.31-34

³² Ascano Jerusalén ano fonifo Jesús rucun caiton afu rafumisifoan mufainifo. —¡Ohuashta! Ahuuscaín nocon Ifo Jesús Jerusalén ano caimun. Nanno musucoinran, —icashu yoinannifo. Futsafoanri mufainifo. Nanfori ratucoin-
nifo. Ascano Jesús fu rafumisifo doce futsa chaimashta ano atotisi iyoni atofu tsainshquin. Ahuara ahuuscarashquin fi-
aiton ato yoini isca huaquin, ³³ —Ua nicacahuun. Non Jerusalén ano canon. Nannoa futsan ua achimashquin nocon yorafuunshon Dios cufimisi niaifofo yashon Moisés tsain tapimamisifoan ua tsain chaca huashcani. “Jesús ato fasi chaca huamisi. A rutucahuun,” icashu uhuun yoinanshon. Mani futsafoan ua iyoshcani ua rutunonfo. ³⁴ Nanfo uqui

cashupaicain uqui paran nashquicani uqui cumo michofain ua fichi cunoquin tuchiaton ua coshashcani. Ua asca huacatan ua ihui coyan iquinanqui mastashcani un nanon. Ascafia osha rafu non fusti finontan Upa Diosin ua afanan funimashquiran, —ishon Jesús ato yoini.

Santiago futan Juanpan Jesús yocanifo cuscan

Mt 20.20-28

³⁵ Ascano Zebedeo facu rafutan Santiago futan Juanpan oinomashta Jesús yoinifo, —Tapimamisiton, non mia yocain cuscan noco ashopun, —huanifo.

³⁶ —¿Ahua man ua yocapaimun un mato ashonon? —huaiton.

³⁷ —Nantifiton niaifo min iqui nocori min icano niaifo patashari noco imahuu. Min yorafo yonoaitian min tsoano non mifu tsaonon. Nocori catonhuun, —huaifoan.

³⁸ —Ua man yocan cuscacai man tapiama. ¿Un omitsiscashquiain cuscan manrifi man omitsiscatiromun? —Jesús ato huani.

³⁹ Ascaiton cumanifo, —Ai. Nonfin itiroquin, —huaifoan. —Icon. Un omitsiscái cuscan marifi man omitsiscaicain. ⁴⁰ Ascafia tsoanmain ua naqui huashu tsaotirofoqui uncai tsoa yoitiroma. Uhuun Upa Diosin fustiton tapia. Nan Upa Diosin catoan fosi nanno tsaotiroforan, —ishon ato cumani.

⁴¹ Santiago futan Juanpan ato finonpaiyaiton Jesús naqui huashu tsaopainifo afu rafumisi diez futsafoan nicacanashu atoqui sinanifo. ⁴² Ascano Jesús ato yoini, —Uqui fucahuun un mato yoinon. Yora futsafo nocon caifoma aton niaifofoan ato curushcain yonofafainmisifo. Aton niaifo patasharifoanri ato yoimisi isca huaquin, “Nonfin mato ifoquin. Non mato yoiái cuscan man noco ashorisca

huatiroran,” ishon yoimisifo. ⁴³Asca huafiamisifo mancai ato cuscara itiro. Nan man ratoran futsa niaifo ipai maton oinmati itiro. Maton shara huafafainmisi itiro.

⁴⁴Ascatari nan man futsan finonpai maton oinmati itiro. Shinanqui isca huamisitiro, “Un futsafo shara huapai. Man yopa cuscan un ato ashopairan,” ishon anori yoitirofo. ⁴⁵Urifi anori shinan. Un Upa Diosin ariashu mai ano fotonu urifi nocofunucuin cainshquin. Un Diospan facufiacun ua man amanon un oama. Ascatamarocon un futsafo ato ashomisi. Un yora ichapari un atohunoashu nashoshquin Satanás afanan aton ifon inonma un oaquin, —ishon Jesús ato yoini.

Nocofunu fusho ahuun anu Bartimeo Jesús caya huani oinsharanon

Mt 20.29-34; Lc 18.35-43

⁴⁶Ascatan Jericó pushurasi ano noconifo. Nannoashu Jesús fu rafuafo non yorahuanrasi fonifo. Timeopan facu fushon ahuun anu Bartimeo fai cusumunri tsoa ini ahua ato yocashquin. ⁴⁷Jesús nan pushurasi Nazaret pushconi fain caiton nicai oi ashcafinin cunani, —Jesús, minfin David funaquin. Uhuun ramapaihuu, —huani.

⁴⁸Ascaiton yora ichapafoan yoinifo, —Tsainyamahuu, —curushcain huanifo. Anori huafainfono fasi curushcain oi ashcafinin afanan cunani, —Minfin David funaquin. Uhuun ramapaihuu, —huaiton.

⁴⁹Nicai Jesús nituacucahuani. Nitucucahuan, —Yoihuu uqui onon, —ato huani. Yorafoan yoinifo, —Natian min unimatiro. Funihuu. Jesús mia cunaquin, —ishon yoiaifono. ⁵⁰Nicaquin ahuun camisa potatan funiriscatan Jesusqui oni. ⁵¹—Un mia ahua ahuusca huashotromun ua yoipaiquin ua yoi-

huu, —Jesús huani. Ascaiton cumani, —Tapimamisiton, un oinpai. Afanan un fusho ipaima, —huaiton.

⁵²—Mian icoinra huashu min cayaquin. Casharatahuun, —Jesús huani. Catan oinsharani. Ascashon fai Jesús mufaini.

Jesús Jerusalén pushurasi ano nocotoshiniquin

Mt 21.1-11; Lc 19.28-40; Jn 12.12-19

11 Ascatan Jesús fu focani Jerusalén chaima noconifo. Nannori chaima pushurasi futsan ahuun anu Betfagé. Nan pushurasi rafu machi cuya ahuun anu Olivo ano inifo. Noco cuatan Jesús afu rafuafo rafu ano ato nichini. ²Ato yoini, —Nan pushurasi chaima sharaqui fotacahuun. Nocoshon man inapan facu nushua man oincai. Tsoacai na burro camaqui caiyomisima. Tupushon nuri ua ihuunshotacahuun. ³Ascan ratoran futsan mato yocaiton, “¿Ahuuscaquin man muropan facu man iyoimun?” ishon mato yocaiton. “Nocon Ifo yopaiton non iyoshoni cairan,” ishon ato yoicahuun, —Jesús ato yoini.

⁴⁻⁵Ato nichian focatan pushu caicainti ano muropan facu nushua fuchitoshinifo. Man tupuaifoan nannoa niafoan ato yocani, —¿Ahuuscaquin man burro cahuashara tupuimun? —huaifoan. ⁶Jesús ato yoia cuscan cumacaquin, —Nocon Ifo yopaiton non tupuyoaran, —huanifo. Ascaiton, —Iyotacahuun, —ato huani. ⁷Ascano Jesús ano ihuushontan camisa muropan catu camaqui fucashonifo. Fucashonafoanno acamaqui Jesús tsoainacahuani. ⁸Jerusalén ano caino yorahuanrasifoan fai naman cayan aforin aton camisafo fucanifo. Futsafoan shupa shatushon nan cai fufori nichiacunifo. ⁹⁻¹⁰Ascan nan yorahuanrasi afori yafi acachori

foaifoan nantifain oi ashcafinin curushcai yoinifo,

¡Aicho! Noco numai oiquin. Upa Diosin Jesusqui unimai. Ascan nocon Ifon Dioshuunoashu nocoqui oa. Nocon shuni David nantifi yorafoan aton niaifo cuscara. Arifi nocon niaifo ishquin oa. ¡Aicho! Nocon niaifo shara nantifi iquinaran

ishon oi ashcafinin yoinifo.

¹¹Ascatan Jesús Jerusalén ano nocotan Dios fu tsainti pushu muran iquitoshini. Amuran nantifi ato oian. Man yataino. Afu rafumisifo doce fu Betania ano fonifo nanno oshashquin.

Fana higuera Jesús tsasi huani

Mt 21.18-19

¹²Iyoconaino Betania anoashu Jerusalén ano fonainquin naso curanquin. ¹³Oian chaima fana ahuan anu higuera nia fuchini. Fuchishon ahuan fimi apaiquin oian ahuan puifosi. Fimiama ini. Fimitiataima. ¹⁴Ascaiton yoini, —Afanan min fimimaran, —ishon Jesús yoini. Yoiai cuscan a rafuafoan nicanifo.

Jesús Dios fu tsainti pushu murannoashu inanmitsaifoan ato potani

Mt 21.12-17; Lc 19.45-48; Jn 2.13-22

¹⁵Ascano afanan Jerusalén anoashu cai Jesús Israelifoan Dios fu tsainti pushu muran iquitoshini. Iquitoshiquin oian ahuafoa a murannoashu inanmitsaifoan. Fuchitan ato chifi cainmaquin futsani. Pui fiainfoan aton acamaquis-hon pui fitiri finifoan arasacaquin futsani. A ruhui inanmitsaifori aton tsaotiri finifoan arasacaquin futsani. ¹⁶—Na Dios fu tsainti pushu murannoashu-cai non ahuafoa inanmitsatiromaran, —ishon tsain curushcain ato yononi. ¹⁷Ato tapimaquin yoini,

—Diospan tsainhuunoa isca huaquin cununi. “Uhuun tsainti pushu muran-shon nantifi manifoti iquitiro ua cufishcaquin,” ishon cunufianicun yomutsofoan ichananti cuscara man huapairan, —ishon ato yoini.

¹⁸Ascan Israelifoan aton yorafohuunshon Dios cufimisi niaifofo non Moisés cununi cuscan tapimamisifo Jesús yoiaiton nicacaquin rutupainifo. Ascaiton futsafoan Jesús yoiai cuscan nicapaicoinnifo. Ahuan tsain nicai, —¡Aira! Ascaran tsain shara tsoan nicayomisimaran, —icashu yoinannifo. Ascano aton niaifofo Jesusqui ratunifo. Rutupaifiaquicai tapinifoma ahuscashomain rututirofoquin.

¹⁹Ascatan man fari caino Jesús yafi a rafuafo Jerusalén murannoashu patashari fonifo.

Fana higuera tsasi futsua

Mt 21.20-22

²⁰Ascano iyoco futsaino afanan nasquin fana higuera fuchitoshinifo. Man tsasi futsua. Ahuan tapofori man naa. ²¹Oinquin Jesús higuera yoita cuscan Pedronun shinanquin yoini, —Tapimamisiton, oinpon. Na fana higuera min yoitan cuscan man tsasiaran, —ishon yoiaiton.

²²—Upa Dios icoinra huacahuun. ²³Un mato icon yoinon. Maton nomuran man icoinra huacoinshon na machi man isca huatiro, “Tsucucain. Unuhuan muran pacuhuu,” man huaino man yoia cuscan asca huariscatiro. ²⁴Ascacun un afanan mato yoinon. Man icoinra huacoinshon ahuarashta man yocaiton Upa Diosin mato inantiro. Matonna inon. ²⁵⁻²⁶Ascano man Upa Dios cufipaiquin iquisi futsan mia chaca huaa cuscan rau huayohuun. Man ascaiton Upa Diosiri maton chaca rauhuatiro. Ascan man Upa Dios nai murannoa man cufiai cus-

can mato ashotiroran, —ishon Jesús ato yoini.

—¿Tsoanmun mia yonoaquin?

—ishon niaifofoan Jesús yocani

Mt 21.23-27; Lc 20.1-8

²⁷ Ascano afanan Jerusalén ano nococatan Jesús Israelifoan aton Dios fu tsainti pushu muran caino. Yorahuunshon Dios cufimisi yafi Moisés cununi cuscan tapimamisifo fu Dios fu tsainti pushu cushumisifo aqui funifo. ²⁸ Aquí fucashon yocanifo, —¿Min acai cuscan tsoan mia yonoamun? Min inanmitsamisifo nocon ichananti pushu muranshon min ato pota. ¿Tsoan mia yonoamun min ato asca huua? —ishon yocaifoan.

²⁹⁻³⁰ —Urifi un mato ahuara yocain. ¿Juanpan yorafo unu muran iquimapacuniquin tsoan yonocumun? ¿Diosin yonoyamaraquin nocofunifoan yonoafomun huani? Man ua cumasharaiton urifi un mato cumasharatiroquin, —ishon yoiaiton.

³¹ Jesús yoia cuscan nicacani yoinanannifo. —Diosin Juan nichiaran non huaiton Jesús noco yoishquin, “¿Ascan ahuuscaquin man Juan icoinra huamamun?” ishon noco yoitiro.

³² Ascacia Juan nocofunifoan nichini Diosincai nichinima ishon yoiaiton yorafo nocoqui sinatirofo. “Juanpan Diosin tsain yoimisiran,” ishon yoiaiton noco asca huatiroran, —icashu niaifofo yoinannifo.

³³ Ascashon yoinifo, —Tsoanmain Juan yonoaquin noncai tapiama. Non mia yoipanan, —ishon Jesús huaifoan. —Ascarifiatan un acai cuscamain tsoan ua yonoaquin uncai mato yoima, —ato huani.

Ahuarafo yoiai cuscarahuunshon

Jesús ato yosini

Mt 21.33-46; Lc 20.9-19

12 Ascano nantianri Jesús ahuarafo cuscarahuunshon ato yosini. Isca huaquin, —Nocofunu futsan ahuun mau ano fimi ahuun aqu uva fanani. Ascashon fimicun aqui toquiri cunuacuni ahuaton chaca huanonma. Mai quini huashon prensa mafishtamani. Ascashonri toquiri cushuti cuscara cuya masoa anoshon cushusharashquin. Anaitishon mau yonomisifo ifoan ato inanyoa ahuun mau cushusharanonfo. Ato inanyotan mai futsa ano cayoni. ² Fimiatian ahuun oinmati futsan ahuun mau ano nichini fimi atrifi fishonon.

³ Nocoaiton mau cushuafoan achinifo. Achicashon sutunifo. Ascanshon fimi inanyamaifoanno oinmati ahuun ifo ano nasoni. ⁴ Ascano mau ifoan ahuun oinmati futsa atoqui nichifain arifi mapo sutunifo. Fasi chaca huacaquin namaquirashquinifo. ⁵ Ascano mau ifoan ahuun oinmati futsa atoqui nichini. A rutunifo. Ichapa nichian futsa sutufain futsa rutucoinnifo.

⁶ Ahuun unutani Furun fusti tushuni. Nan Furun fasi noifiaquin ahuun unutaquin atoqui nichini. “Uhuun facucoinfin nicacoinshecaniquin,” ishon mau ifoan yoini.

⁷ Ascashori shinanfiaquin ahuun facucoin nichini. Ascano caiton mau cushumisifoan fuchinifo. Fuchishon yoinifo, “¡Oincapon! Mau ifoan ahuun furun oi. Apana na mau. Ascan ahuun facuna chipo iishquin. Ascacun non rutunoncahuun nocona mau inon,” ishon yoinifo. ⁸ Ascatan furun iqui curannaiton achicashon rutunifo. Rutushon mau tsumun sharafoshon ratanifo.

⁹ ¿Ahuamun man shinaincain? Mau ifoanfin tapiaquin ato rutumaquin

cuyoai. Futsafo inanshquin cushunonfo.
¹⁰¿Diosin tsain yoini cuscan man oinmisimamun? Ascashon yoiquin isca huani,

“Pushu yonomisifoan toquiri quishi shara oincaquin yoinifo, ‘Nacai sharamafinquin,’ ishon potafo. Man potafiafoan pushu ifoan catonni nan toquiri quishihuunoashu pushu nisharanon. Nanscarifi aquin Diospan Furunhuunoa niaifofoan yoisimifo, ‘Nancai ahuamaran,’ ishon man potafo. Ascafiacun Upa Diosin catonni ahuun yorafoti ahuunoashu nipanonfo. ¹¹Ascan Diosin aca cuscan oinshon non yoitiro, ‘¡Aicho! ¡Diosin ahuun Furunhuunshon aca cuscan fasi sharacoinran!’ ishon non yoitiroran,”

—ishon Jesús ato huani.

¹²Nicacani Israelifoan aton niaifofo fasi sinanifo. Jesús atohuunoa yoiyai tapicanashu Jesús achipaifiacani yorafoqui ratunifo achinifoma. Asca huatan amaquinoashu fonifoquin.

**Niaifofoan noco inanmamai
cuscahuunoa Jesús ato yosini**

Mt 22.15-22; Lc 20.20-26

¹³Ascatan chipo ichanancashon yoinifo, —Non Jesús ahuara yocanon noco amaquiri cumaimancai. Noco cumaquin chaca huaiton non cunu muran iquimanon, —ishon yoinifo. Asca huacatan Herodes niaifo ahuun tanamisifo non Fariseofo aton tanamisifori Jesusqui nichinifo a yocanonfo. ¹⁴Aquin nococashon yocanifo,

—Tapimamisiton, man non tapian min iconcoin fusti min noco yoifafainmisi. Upa Diosin noco amapaiyai cuscan nannori min noco cayacafi yosimisiquin. Min ahuara yoipaicain min ranoima. Nan min noco yoiyai min cayacafi yoi.

Ahuashta min fomainma. Min yora ahuuoma yoiya cuscan nanscarifi huaquin min niaifofo yoitiro. Nan rafu min ato Diosin tsain iconcoin yoi. Ascacufin noco tapimasharahuu. ¿Romanonfoan aton niaifo Cesari nocon pui noco yoca cuscan non inantiro iyamarai non inantiramamun? Noco tapimahuu, —huaifoan.

¹⁵Ascashon Jesús onanni nan fuparamitsapaimisifo. —¿Ahuuscain ua amaquiri cumamapaicanimun? Uhuunoa ahuara chaca niaifofo man yoipaicain ua cunu muran iquimanonfo. Man toro inanmisi ahuunshon ahuara finon. Futsan ua fishoriscahuun un oinon, —huaiton. ¹⁶Toro fushoan. —¿Tsoa ointsamain torohuun nuaquin? Tsoan ahuun anu nutamun, —ishon ato yocaiton. “Niaifon Cesarinnaran,” huaifoan.

¹⁷—Ascan Cesarina inancahuun. Diosinna Dios inancahuun, —ishon ato yoini.

Nicacani mustairinifo, —¡Aira! Ahuun tsain tsoancai tafitiromaran, —icashu yoinannifo.

**—¿Yora naa afanan
funiashu ahuuscatoromun?**

—ishon Jesús yocanifo

Mt 22.23-33; Lc 20.27-40

¹⁸Ascatan nan shafatari Saduceofo aqui funifo. Nanfori Israelifo. Shinanquin isca huanifo, —Yora naashu afanan funipacunacamaran, —ishon yoinifo. Nanfoan yocapaicani Jesusqui funifo.

¹⁹—Tapimamisiton, Moisés noco cunushoni isca huaquin, “Nan ratoran iyoa naano ahuun ahuin facuoma imisino chipocuton fishon a futan facu ashquin,” ishon cununi. ²⁰Ascano siete nanupacuafihuunoa non mia yoinon. No fu iyopaonifo. Aton iyoacai ahuinyain tauni. Ascafiashon a futan facu acashma nani. ²¹Ascano chipocu

futsan arifi ahuun ochin ahuin fini. Ascashu arifi a futan facu acashma naani. Ascaino chipocuton futsan arifi ahuun ochin ahuin fini. Arifi a futan facu acashma nani. ²²Ascacaputan amaquisi nai cuyonifo. Aqwi facu ayamacai. Ascatari ahuun unutani ainfo nani facu nanuyamacain. ²³¿Funiaitian nai arishon rato futsacaimun fiicaiquin? —ishon yocaifoan.

²⁴Ascan Jesús ato cumani, —Mancai Diosin tsain tapiama. Ahuun yonori man tapiama. Ascashofin man ua amaquiri yoiacquin. ²⁵Yora naashucai funiafo Dios ari nocotan afanan fiananpacunacafoma. Nantifi Diospan oinmatifo afu icafo cuscarafosi iishcaniquin. ²⁶Ascan yora naashu funishquiaifohuunoa Diosin mato yoini. ¿Yoiyai cuscan Moisés mato cunushoni man oinmisimamun? Diosin fana urumanhuan muranshon ahuun oi nica cuscan mato cunushoni isca huaquin, “Upa Diosin chofo urumanhuan muran ua yoiquin, ‘Unfi Abraham non Isaac non Jacob afoan un aton Diosiquin,’” ishon Moisés yoini. Nan rafu non fusti yamashtafiacanashu natian Dios fu niafo. ²⁷Nayofianishaquin natian niafo. Diosin noco tapima nantifi niafo. Nocon yoshin cuyopacunacama. Ascan manfin amaquiri shinanmisiquin, —ishon Jesús ato yoini.

Diosin yonoa cuscan futsa fasi shara finacaiian

Mt 22.34-40

²⁸Ascatan Jesús fu Saduceofo yoinanannifo cuscan Moisés tsain tapimamisiton nicani. Nicaquin ahuun nomuran shinanni, —Jesús ato cayacafi shara cumaran, —ishon shinanni. Ascashon arifi Jesús yocani, —¿Diosin yononi cuscan aafu Moisés cunushoni ratofomain fasi shara finacaiquin? —ishon yocaiton.

²⁹—Israelifoan, nicasharacahuun. “Nocon Ifo Diosin fusti nocon Ifoquin. Futsan yamai. ³⁰Nocon Ifo Dios maton ointi muranshon noifain maton nomuranshonri noifain man shinansharai cuscan ahuun noifain fasi mutsiscain maton Ifon Dios noicahuun,” ishon Moisés cununi. ³¹Futsari nannoricoin yononi isca huaquin, “Nan mifiri min musu huamuai cuscarifi aquin mia chaima icafori noiuhu.” Nan rafu Diosin mato yononi cuscan fasi shara finacaiianran, —ishon Jesús ato yoiaiton.

³²—Tapimamisiton, mian cayacafi shara cuma. Icon min yoia Dios fusti. Tsoa futsacai Diosima. ³³Noncai Dios ahuashta inantiroma ahuun rafanan nocohuun noinon. Min yoia cuscan fusti shara. Ascacun non nocon Ifo Dios nocon ointi muranshon noifain nocon shinansharayashon noifain non fasi mutsiscain nocon Ifo Dios noi nofiri non musu huamuai cuscarifi aquin non nocon chaima ica noiaino. Ascaran fasi shara finacaiianran, —ishon yoini.

³⁴Jesús nicashon cumasharani. Ascashon yoini, —Natian Upa Diosin ahuun yorafo imapaiyai cuscan mirifi min tapicuana afu nipashquin, —ishon Jesús yoini. Ascaiton nicacani pusinifoma. Afanancai tsoanshta Jesús ahua yocanima. Nantian yafi nan Jesús naitian afanan tsoan ahuashta yocanima. Ato cayacafi cumaiton nicacani tsoan cumanima aquin ranonifo.

—¿Tsoamun Cristoquin? —huanifo

Mt 22.41-46; Lc 20.41-44

³⁵Ascatan Jesús Israelifoan aton Dios fu tsainti pushu muranshon ato yosianan yocani, —¿Ahuuscain Moisés tsain tapimamisifoan yoimisi isca huaquin? “Criston David ahuun funaran,” ishon yoini. ³⁶Diospan

Yoshin Sharanun David ahuun nomuran shinanmana cuscan yoini,
 “Upa Diosin uhuun Ifo Cristo yoini isca huaquin, ‘Minfin ufu niaifocoinquin. Mia noicasmaifoan min ato finoncoian. Un ato shatumashquin mia afanan ahuusca huatiroma. Min ato iquiniran,’”

ishon Diosin yoini cuscan David cununi.
³⁷ ¿Criston David Ifono ahuuscashuon ahuun funa itirumun? —Jesús ato huani. Yorahuanrasi Jesús yoiai cuscan nicanani fasi unimanifo.

—Moisés cununi cuscan
 tapimamisifoan chaca huaforan,
 —ishon Jesús ato yoini

Mt 23.1-36; Lc 11.37-54; 20.45-47

³⁸ Ascano nicatoshinifo Jesús ato yoiaiton, —¡Oinfain! A Moisés cununi cuscan tapimamisifoan saya chainipafo sahuushon ato oinmafoanfaincani. Fasi tapicoianforan ato huamapaicani. Yora ichaparasi ano foanscanifo “Sharacoinforan,” ato huamapaicani. Fasi cacapaimisifo. ³⁹ Ichananti pushu muran iquitan shafacafi tsaonifo. “Noco oiononfo, non tsaotiroran,” ishon shinannifo. Ichananshon piyainfoannori shafacafi tsaopainifo. ⁴⁰ Ainfo funuomafo, “Non mia shara huairan,” huafashon paranifo. Aton ahuarafo onushcaquin. Fuparacaquin. Fasi chaicoín cuffirianifo atوقي oinanpaiquin. Dioshuunshoncai cufficoinnifoma. Nanscarafu Upa Diosin ato fasi onaintimacoinquin, —ishon Jesús ato yoini.

**Ainfomaqui man funu naa
 ahuuomashtacun Dios inansharani**

Lc 21.1-4

⁴¹ Yoitan fuhuunina cahua Jesús oinni Dios fu tsainti pushu muranshon yorahuanrasiton pui nanuti muran nanuiniyaifoanno.

Yora mafo ichapayatón atirifoan paratama pui nanuti muran nanunifo.
⁴² Ascano ainfomaqui funu naano ahuuomashtaton toro chimashta rafusi pui nanuti muran nanuni.

⁴³ Oinquin Jesús fu rafumisifo cunashon yoini. —¡Oincapon! Un mato iconquin yoinon. Na ainfo funuoma ahuuomashtafashon yora futsan inan cuscan aafin paratama nanua cuscara. ⁴⁴ Ascano mafo ichapayafoan inanfiacaquin ichapa tushu huanifo. Ascafia nan ainfoan nantifi ahuun pui nanuqui cuyoni. Inanqui anaititan. Afanancai ahuahuunshon ahuun tushu fitiromaran, —ishon Jesús ato yoini.

—Dios fu tsainti pushu paon
 ishquinran, —ishon Jesús ato yoini

Mt 24.1-2; Lc 21.5-6

13 Ascano Jesús Dios fu tsainti pushu murannoashu caiton afu rafumisifo futsan yoini, —Ifon, oinpon. Nocon Dios fu tsainti pushu fasi sharastacoin. Toquiri cunu putsamuashu cunuacua uhuapacoin fasi sharastaran, —ishon yoiaiton. ² —¡Ai! ¡Oincapon! Natian Dios fu tsainti pushu toquiri putsamuashu cunuacua sharastacoin. Ascafiahu na man oiain chipo paon ishquin. Afanancai toquirifo putsamua ishquima. Ratoshtacain putsamua tushuimaran, —ishon Jesús ato yoini.

**Jesús oti chaima ahuarafo
 ahuuscarashquiai cuscan ato yoini**

Mt 24.3-28; Lc 21.7-24; 17.22-24

³ Ascano machi ahuun anu Olivo ano mapufaintan Jesús tsaoni nanno ishon Dios fu tsainti pushu ointiro ini. Tsoa futsacai ano inima Pedro non Santiago non Juan non Andrés non afo aqui funifo. ⁴ —¿Nan min yoiai cuscan ahuutian ishquimun? ¿Ahuuscashomun non tapitiroquin? ¿Icataka non ahua oin-

tiromun tapishquin? Noco tapimahuu, —huaifoan.

⁵—Oinfain mato paranonfoma.

⁶Yora ichapafoan. “Un Cristoran,” ishon mato parapaishcani. Ascashon ichapafori parashcani. ⁷Mani futsafo ya futsafo rutunainfoan man nicashquin. Icataimari anori man nicaiyoicai. Anori nicai ratuyamacahuun. Un mato yoimisi cuscan nanscacoin aiquin. Ascafia Jerusalén cuyoataima. ⁸Mai futsan fu yorafo mai futsari ya rutunainfono mai futsafo anori fasi mai naiyanaiyashqui icaifono mai futsanoafori yora tushuomafo icaino. Nanscai taushcani. Ascafiafashu chipo omitsiscai finacaishcani.

⁹Ascan itisharacahuun. Mato achishon mato niaiffoan maton ichananti pushu muranshon mato fasi coshashcaniquin. Niaiffoan aton ointaifi mato iquimashcani. Mato asca huacani. Uhuunshon man ato yoishquin. ¹⁰Ahuun unutani nan omitsiscacoinshquiai cuscan icataima uhuun tsain shara uhuunoa atirifiton nicataicanima. Uhuun tsain shara manifotiton nicacoiainfono un afanan ooshquin. Nantianri ua icoinra huafo afanan omitsiscashquima.

¹¹Ascano chipo mato achimashquin matohuunoa tsain chaca yoishcaquin. Nantianri, “¿Raquiri non huaimun?” ishon shinanyamacahuun. Nan nocoaiton un mato tapimashquin man cumasharanon. Mafincai man cumaima. Diospan Yoshin Sharahuunshon ahuun tsain maton nomuran nanumashquin man niaiffo cayacafi cumasharanon.

¹²Nantianri iyoaton chipocuqui tsain chaca huashquin achinonfo rutushcaquin. Nanscarifi aqui chipocuton ahuun ochiqui tsain chaca huashquin achinonfo rutushcaquin. Nanscarifiai facufoan aton apa yafi ahua afanan nicacasmashcani niaiffo yoishcani ato rutunonfo.

¹³Uhuunshon mato noicasmacani man ua tanasharaiton, manifotifoan mato noicasmashcani. Ascashon mato omitsiscahuafiainfoanno tsoan uhuunoashu omitsiscafiaquin tunucoin uhuun tsain tanasharaqui unupacunacama. Nanfo un cushusharatiro uhuun Upa Dios icano nipasharanon.

¹⁴Ascacun Diosin ahuun yorafo fu imisi ano futsafoan ahuaa fasi chaca huai. Nan un mato yoiai cuscan tapicahuun. Nanfo oin man ratoran futsa Judea mai anoashu machi ano ichotacahuun. ¹⁵Tsoan pushu osa futsa nishu afanan pushu muran iquiyotiroma ahuaa fipai. ¹⁶Tsoan aton mau ano yonoi afanan pushu ano nasoyotiroma ahuun sahuuti fipai. ¹⁷¡Ohua! Ainfon facu nanuafo yafi aton facu yomishtifo omitsiscaashcani.

^{18–19}Natian yorafo omitsiscai cuscan tsoan ascara oinyomisima. Fasi finaciaia yora omitsiscaiquin. Diosin yora tau huaquin onihuani chain cai tsoan ascaran omitsiscai oinyomisima. Tsoaricai afanan ascari omitsiscanacama. Ascan Upa Dios cuficahuun oipacutian ascanonma. ²⁰Nan omitsiscalfotian yorafoti cuyocuancani. Diosin yonoyamaino nan yorafoti cuyocuanafu. Ahuun yorafo nan catoanfo atohuun ramapaiqui omitsiscaitian shaturiscamashquin.

^{21–23}Ua nicasharacahuun. Omitsiscashquiaitian nocoataima un mato yoiyoi. Man omitsiscaitian fuparapaimitsamisifocoin matoqui oshon. Mato yoitiro isca huaquin, “Unfin Cristoquin,” ishon yoyimaraquin, “Unfin Diospan tsain yoimisiquin,” ishon mato yoishcani. Satanashuunshon yora atiroma cuscan mato ismai. Mato parapaishcaquin. Diosin nan catoanfo cushuyamaino atorifi nan fuparapaimitsamisifo icoinra huacuana. Ascano nantian tsoan mato yoiquin

isca huai, “¡Oincapon! Naafin nocon Cristoquin. Cristo nocoqui oaran,” ishon yoiaifoan ato icoinra huayamacahuun.

**Jesús nan Diospan Furun
afanan mai ano fotoshquin**

Mt 24.29-35, 42, 44; Lc 21.25-36

²⁴⁻²⁵ Ascan nan omitsiscái cuyocoiaínno fari faquishcoín ishquin oshuri faquishcoín icaino fishifo nai ariashu pacuí futsushquin. Nantifi nai murannoáfo naiyanaiyainqui futsushquin. ²⁶ Nantianri un nai ariashu fuufoya camaqui mai ano fotoaino uhuun Upa Diosin ahuun yonohuunoashu un afanan matoqui fotoshquin. Nantififain ua oinshcani unfin Diospan facuquin. Un oaino fasi chashapacucahuanshquin. ²⁷ Nantianri uhuun oinmatifo ufu nai muran icafo un nichishquin uhuun yorafo manifoti uqui ihuunonfo.

²⁸ Ascatan nii ohuamisifohuunoa ahwara un mato tapimanon. Ua nicasharacahuun. Casho pui risquisi futsuaiton man tapitiro faritian. ²⁹ Nanscarifiai nanfo un mato yoiai cuscaín futsuaiton man onantiro mun oti chaima nuno mai anoa niaifocoin iishquin. ³⁰ Un mato icon yoi. Ahwarafo un mato yoia cuscan a mai anoáfoan naiyocashoma oinshcaniquin. ³¹ Nocon nai yafi mai cuyoái cuscan fianananain futsuin. Uhuun tsain ascatarocon cayacaficoín. Iconcoín. Uhuun tsain un mato yoiai cuscan nanscacoín aiquin. Fianannanpacunacama.

**Ahuutiaran Jesús afanan
nai murannoashu mai ano
fotoi tsoancai tapiama**

³² Ascafia ahuutiaran un nai murannoashu afanan fotoicain tsoancai tapiama. Diosin oinmati afu nai muran icafoanricai tapiáfoma. Urifi un Upa Diosin facufiashocai un tapiama. Nan

uhuun Upa Diosin fustitofin tapiaquin. ³³ Un afanan oaitian tsoan tapiama. Ascacufin oinfain. Itisharacahuun. ³⁴ Shinacapon. Noco funu mai futsa ari caquin iquisi ahuun oinmatifo yoitiro, “Un mato yoiai cuscan uhuun pushu cushusharacahuun. Yonosharacahuun. Futsan uhuun pushu anoshon cushutiro un afanan nasoaitian un oinnon,” ishon ato yoitiro. ³⁵ Nanscarifiai marifi itisharacahuun. Ahuutiaran un afanan matoqui nasoshquin tsoan tapiama. Fari caino iyamarai yamu nacucahuaino iyamarai tacaranun acaino iyamarai shafaino un nocorisatiro. ³⁶ Oinfain. Un nocoaitian oshacaquima ua yonosharashocahuun. ³⁷ Un mato yoiai cuscan un nantifi yorafo yoi, “Itisharacahuun,” —ishon Jesús ato yoini.

**—Ahuuscashomain non Jesús
rututiroquin, —ishon shinannifo**

Mt 26.1-5; Lc 22.1-2; Jn 11.45-53

14 ¹⁻² Ascano Jesús ato yoini nantianri fusiti shafa nococuanaino. Nannoshon misi farashati maisi pinifo. [Nan fusiti Israelifoan Egipto mai anoashu fonifo shinantacani. Nantianri Egipciofoan aton facu furonafacu iyoafofosi Diosin namaquin cuyoiquin. Israelifo ato muran ipaonificanashu Egipciofoan aton facufo namafiaquin Israelifoan aton facufo finonmani.

Ascan faritifi ichanancashon Upa Diosin aton shunifoan aton facufo finonmani nanonfoma shinantacani. Ascan nan fuusiti anumisifo nocon shunifoan aton facufo finonmaniran.] Nantianri nocon yorafohuunshon Dios cufimisi niaifofoan Moisés cununi cuscan tapimamisifo futan ichanancashon isca huaquin yoinifo, —¿Ahuuscashomun non Jesús rutumatiroquin? ¿Ahua chacamain ahuunoa non yoiqi rutumashquin? Natian fusimuainocai

non achimatiroma. Yorafo fasi sinacani mucatirofo, —icashu yoinannifo. Jesús onushta rutumapaicani.

**Ainfoan ahuun ininti paratamacoin
pui nuua Jesusqui ocani**

Mt 26.6-13; Jn 12.1-8

³Ascano Jesús Betania ano caní. Cai Simón pushu muran iquini. Nan Simón nami rashquishi futsua ini. Nannoshon Jesús Simón acamaquishon piti ano tsaocun ainfoan toquiri moti tsomashu otan aquí ocashquin. Nan toquiri ahuun anu alabastro moti huamua. A muran ininti fospi huani. Ininti ahuun anu nardo fasi pui nua. Ascano ainfoan motica fuputan Jesús ahuun mapoqui ininti ocani. ⁴Atirifoan oincani sinanifo, —¿Ahuuscaimun na ainfoan ininti paratamacoin ahuun pui nuua potaquin? ⁵Nan ininti inanmitsashon ahuun rafanan pui ichapa fishon yora ahuuomafo inanshara icuanaran, —ishon yoinifo. Yoicatan ainfoqui curushcain tsainnifo.

⁶—¿Ahuuscain na ainfoqui man tsain chipuain? Fucash huayamacahuun. Ua fasi shara huaquin. ⁷Yora ahuuomafo matofu ipanacafo. Ratoran shafatan man ato shara huashotiro. Ascafia un nuno matofu ipanacama man ua shara huanon. ⁸Na ainfoan nan oiainshta ua shara huaa. Yora maiaquin ininti ocamisifo cuscan un nataiyamafaiton na ainfoan ua shinanquin uqui ininti ocayoa. Ua ashquiai cuscan uqui ocaquin tau huaa. ⁹Un mato icon yoinon. Na tsain shara uhuunoa manifoti yoishcaquin. Nantianri na ainfoan ua aca cuscarí ato yoishcaquin. Ascatan ua shara huaa cuscan ahuunoari shinanpacushcaquin, —ishon Jesús ato yoini.

**Judas yoini, —Un mato Jesús
achimairan, —ato huani**

Mt 26.14-16; Lc 22.3-6

¹⁰Ascano Jesús ato yoiquin afu rafumisifo doce futsan nan Judas Iscariote nocon yorahuunshon Dios cufimisi niaifofo ano caní Jesús ato achimashquin. ¹¹Nicacani niaifofo fasi unimanifo. —¡Aicho! Min noco Jesús achimaicai. Ascacun ahuun rafanan non mia pui inainran, —huanifo. Asca huai-fono nannoshon Judaspan shinanquin tau huainifoanni, —¿Ahuuscashomain un Jesús ato achimanoain? —ishon shinainyofafaini.

**Jesús ahuun unutaqui afu
rafumisifo futan pini**

Mt 26.17-29; Lc 22.7-23; Jn 13.21-30; 1Co 11.23-26

¹²Ascano shinantani Israelifoan aton fuusititan nocoaino misi farashati maisi pimisifotian. Nantianri chashoanun facu piinifo. Nan chashoan facu faritifi rutupaonifo Diosin aton shunifo cushuni shinanonfo. Ascano Jesús fu rafumisifo aquí fucashon yocanifo,

—Ifon, Diosin nai oinmati nan afu imisiton nocon shunifoan aton facu iyoafofosi finonmani aton rutuquima. Non faritifi ichananmisi anori shinan-shquin. Afanan natian non atiroquin. ¿Ascan rato pushu muran non mia itishara huashoimun nannoshon mi futan chashoanun facu piishquin? —ishon yocaifoan.

¹³—Pushurasi ano fotacahuun. Nannoa nocofunun unu tutsaomushon fuiton fuchishcaquin. Aquí nocoashu afu fotacahuun. ¹⁴Nan iquiai ano afu iquifainshon pushu ifo yocacaquin, “Nocon tapimamisiton mia yocan, ‘¿Rato cunu muranshon ufu rafumisifo futan non chashoanun facu piimun?’”

¹⁵Man yocaiton mato cunu uhuapa

fomancayan ismaiquin. Nan cunu muranfin nan non yopaiti mato ismaiqui. Nannoshon noco ati shara huashotacahuun, —Jesús afu rafumisi rafu yononi.

¹⁶ Ascano nan rafu pushurasi ano fonifoquin. Pushurasi ano focashon Jesús ato yoiya cuscan nanscocioainton oinnifo. Ascashon chashoanun facu pichanshonifo.

¹⁷ Man fari caino Jesús yafi afu rafuafo doce pushu ano noconifo. ¹⁸ Fomancayan focashon acamaquishon piti ano tsaoshon piaifoan Jesús ato yoini, —Icon un mato yoinon. Nuno u futan piai futsan ua achimaiquin, —ato huaiton.

¹⁹ Nicacaquin aton ointi noconifo. Fasi shinannifo. Ascashu puusinifoma. —Ifon, uncai mia ashquimaran, —ishon nantififain yocapacunifo. ²⁰ —Nan man nocofunu doce u futan piai futsan uqui yonoafin ua achishcaniquin. ²¹ Unfin Diosin ariashu nuno mai ano fotoniquin. Un nocofunucain cainshquin. Diosin tsain uhuunoa inon pacoai cununi cuscan un nai cai. Asafia na nocofunun ua ato achimashufin arifi omitsiscapanacaquin. Caianmafin shara icuanaquin, —ishon Jesús ato yoini.

²² Piainfoanno Jesús misi finifoantan iquisi apa Dios cufiyoni, —Upan, aicho, min noco shara huafafaini, —huani. Apa asca huatan afu rafumisifo yoiqui isca huani, —Na uhuun cayan cuscara. Pichahuun, —ishon. Misi torupacushon atoti inancuniquin.

²³ Ascatan Apa Dios afanan cufinquin, —¡Aicho! Upan, min noco shara huaquin, —huani. Cuchori finifoantan aqui fimi unu fuatan ato inancuniquin. Ascaiton nantififain ayapacunifo.

²⁴ Ascashon ato yoiquin, —Naafin uhuun imi cuscaraquin. Uhuun imi foiquin mun nai. Nantifi yorafoan chaca huamisifoanno un atohuunoashu nai cai. Un ascaino yora ichapafo Diosin ato potapacunacama. Un ato nashoin-

cai aton chaca soashoshquin. ²⁵ Un mato icon yoi. Un nunoshon afanan mato futan un ayaima. Mun nai ari cai. Nan uhuun Upa Dios niaifocoin ica anoshon un afanan ayashquinran, —ishon ato yoini.

—“**Uncai Jesús oinmisimaran,**
min ato huashquicain,
—ishon Jesús Pedro yoini

Mt 26.30-35; Lc 22.1-34; Jn 13.36-38

²⁶ Ascano ahuun tsain yoiqui anaititan Diosin tsain fanainnifo. Anaititan machi Olivos ano fonifo.

²⁷ Ascatan Jesús tsain futsan ato yoini, —Nantififain man ua potafainicaiquin. Diosin tsain cununi isca huaquin, “Unfin chashoanfo cushumisi un rutuicai. Ascano chashoanfo ichoi futsuiqui,” ishon cununi. Nanscarifiai ua rutuaifoanno man uhuunoashu ratufaini foi ichoshquin. ²⁸ Ascan un funiano Galilea ano man uqui noco foshqiran, —ishon Jesús ato yoini. ²⁹ Ascaiton Pedronun Jesús cumani, —Nantifiton mia potafaiifoannocai un mia potanacamaran, —ishon yoiaiton.

³⁰ —Pedron, un mia icon yoicain. Na yamutan tacara cuoi rafuamano min ato yoiqui rafu non fusti huaicai, “Un Jesús oinmisimaran,” —ishon min ato yoicain. ³¹ —Ma, Ifon. Un mifu natirocai un ato yoinacama un mia oinmisimaran, —ishon Pedronun yoini. Nantifiton afu rafumisifoan nannori yoinifo.

Jesús Getsemaní anoshon
Apa Dios cufini

Mt 26.36-46; Lc 22.39-46

³² Ascano nanno ihuifo mapoa ano ahuun anu Getsemaní ano Jesús afu rafumisifo ya cani. Jesús ato yoiquin, —Nuno tsaoshon ua manacahuun. Uhuun Upa fu un tsainyotanon, —ishon ato yoini. ³³ Ascano Pedro non Santiago non Juan non afo ato iyoni. Fasi shinan-

quin ahuun nomuran omitsiscái tauai.

³⁴Ato yoiquin, —Unfin fasi oimitsiscái. Uhuun nomuran un fasi shinain. Mun muucóin un nai cuscan. Nunoshon ua manayocahuun. Un futan oinyocahuun, —ato huani. ³⁵⁻³⁶Ato yoitan chaimashta catan fuopacucahuan Apa Dios fu tsainni. —Uhuun Upashtan, ua rutushcáni. Un omitsiscái cuscan mian numatiromainquin ua numahuu. Ascáfíashon un apaiyai cuscan huaquima. Min apaiyai cuscan ua huahuu, —huani.

³⁷Ascatan Apa fu tsainqui anaititan afanan atoqui oni. Oquin ato oian man oshafo ini, —¿Pedron, min oshamun? ¿Min u futan Dios cufimamun? ³⁸Oshaquima. Dios fu tsainhuun Satanás mato chaca huamapaiyai cuscan anonma. Maton nomuran Diosin mato imapaiyai cuscan marifi nanscasi huapíaiquicái mafin man atiromaquin, —ishon Jesús Pedro yoini.

³⁹Ascashu afanan Apa fu tsainqui cai chaimashta cani. Apa cufian cuscan nannori afanan cufini. ⁴⁰Ascashon afanan atoqui nasokin oian afanan afu rafuafo oshafo ini. Fasi oshapan noicani moipaiquin ranannifo. Raquirimain Jesús ato yoicái tapinifoma. Ascan puusinifoma.

⁴¹Ascaino afanan atomaqui chaimashta cashon Apa Dios cufitani nasokin oian afanan man oshafo ini. Ascaiton ato yoini, —¿Man man afanan oshamun? Nanscanon. Man oshatiro. Ascáfíashu man afanan natian oshatiroma. Natianfin man ua achi fucaniquin. Na nocofunun ua yora chacafo achimani oiquin. ⁴²Funicahuun. Non canon. Na nocofunun ua noicasmaifo ua ato achimani oiquin, —ato huani.

Jesús achinifo

Mt 26.47-56; Lc 22.47-53; Jn 18.2-11

⁴³Ascano Judas nan Jesús fu rafumisi futsan aquí oni. Yorarasi Judas fu nopu yafi coshati tsoamacanashu funifo. Israelifoan aton yorafohuunshon Dios cufimisi niaifofo non Moisés tsain tapimamisifo ato yonoa funifo. ⁴⁴Judaspan yorafo Jesús achimashquin yoini, —Un Jesús tsoacaiton tapicahuun nanfin Jesusquin. Achiti sharaqui. Achicatan niaifofo ano iyocahuun, —ato huani. ⁴⁵Asca huatan samamashta nocoshon tsoaqui. Tsoatan, “Tapimamisitón,” ishon yoini. ⁴⁶Ascano nan Judas fu fuafoan Jesús achinifo. Achicashon niaifofo ano iyoshquin. ⁴⁷Ascaino Jesús chaimashta futsan nicun. Nopu fitan nocon yorafohuunshon Dios cufimisi niaifocoinin ahuun oinmati pashtufain rurani.

⁴⁸Ascaiton Jesús ato yoini, —¿Man shinan un yomutsocunmun coshatifo ya nopu ya man ua achipai fua? ⁴⁹Shafatifi un Dios fu tsainti pushu muranshon un mato yosifíaitocái man ua achiyoti huama. Natian man ua acái cuscan Diosin tsain uhuunoa cununi cuscaoin man ua huairan, —ishon Jesús ato yoini. ⁵⁰Ascaino afu rafumisifoan potafaini amaqi ichonifo.

⁵¹⁻⁵²Ascano pushcoai man Jesús mu-fainaiton achiaifoanno ahuun piracommua shorifaini chitoria ichoni.

Israeli aton niaifofoan Jesús yocanifo, —¿Min ahua chaca huamisimun? —ishon yocani

Mt 26.57-68; Lc 22.54-55, 63-71; Jn 18.12-14, 19-24

⁵³Ascano achicashon Israelifoan yorafohuunshon Dios cufimisi aton niaifocoinin pushu ano Jesús iyonifo. Nanno nan niaifofo non Moisés cununi cuscan tapimamisifo ichanannifo.

⁵⁴ Ascaino Pedro ato cachiori chaima cani. Nocon yorafohuunshon Dios cufimisi niaifocoin ahuun pushu unmainti ranushumuafu yooaino Pedrori atofu yoini.

⁵⁵ —¿Nonmun raquiri huatiroquin Jesús ahuaa chaca huaran ishon rutushquin? Ahuacai ahuusca huaa non nicayomisima non rutuai, —icashu Israelifohan aton niaifo yoinannifo. Nanno pushu muran nantifi Israelifohan aton niaifofu ichanannifo. ⁵⁶ Yora ichapafoan, —Jesús chaca huaran, —ishon yoifiacaquin nannorisi shinannifoma. Paracaquin.

⁵⁷ Yoiti huaquin anaitafono noco-funu futsafoan niaifofohan aton ointaifi Jesusqui tsain chaca huanifo. Chanicani. ⁵⁸ —Non nicaino na nocofunu iscaita, “Nocon Dios fu tsainti pushu yorafoan acafo. Un choqui ashquin. Ascashofin osha rafu non fusti finontan un afanan futsa huashquicain. Unfin un atiroquin. Tsoan nocofunun u futan aquima. Urus fustifin un ashquicai,” ishon Jesús yoitaran, —ishon yoinifo. ⁵⁹ Yoifiacaquin tsoan anorisi yoinifoma.

⁶⁰ Ascano nocon yorafohuunshon Dios cufimisi niaifocoinin aton ointaifi Jesús yocani, —¿Miqui tsain chaca huaafu cuscacan icon iyamarai iconmamun? ¿Min ato cumaimamun? —ishon yocaino. ⁶¹ Jesús puusinima. Ascaiton afanan yoini, —¿Diosin sharapan mia catonnimun min ahuun facu inon? ¿Icon min ahuun facucoinmun? —ishon niaifocoinin yocani.

⁶² —Mian yoiai cuscafin unquin. Upa Diosin ahuamamishti huatiro. Chipoman ua oinshquicai uhuun Upa niaifo fu un icaiton. Urifimain afu niaifocoinshufin. Un nai ariashu nai coin camaqui un oaiton man ua oinshquicai. Un mai ano foshquinran, —ishon Jesús ato yoini.

⁶³⁻⁶⁴ Nicatan Israelifohan aton niaifocoin Jesusqui fasi sinaquin. —Man man

nica Jesús fasi chaca huaa. “Un Diospan facuran,” icaiton man man nica. Ascano non tsain futsa yopaima a onaintimashqui. ¿Na nocofunun non ahuusca huaimun? —ishon niaifohan ato yoini. Ascashon nantififain, —Diosquiri chaca huaquin nanonquin, —ishon yoinifo. ⁶⁵ Asca huatan ahuun fusoqui cumo michofain funushfain sutunifo. Sutchashon cashu huanifo, —Min Cristomainquin min nantifi tapicoian. Ascantsoan mia sutuamainquin noco yoi-huu, —ishon cashu mutsama huanifo. Ascatan ranushumuafohanri Jesús fasi coshanifo.

**Pedro, —Uncai Jesús
oinmisimaran, —ato huani**

*Mt 26.69-75; Lc 22.56-62;
Jn 18.15-18, 25-27*

⁶⁶ Ascainofin Pedron nocon yorafohuunshon Dios cufimisi niaifocoinin pushu umaiti ano atofu yooaiton niaifohan ahuun oinmati shomayaton Pedro fuchiniquin. ⁶⁷ Fuchishon yoini, —Na nocofunufin Jesús Nazaret anoa min afu rafumisiquin, —huani.

⁶⁸ —Ma. Mian yoiai cuscacai un tapiaquin, —Pedronun shomaya huani. Yoiqui asca huatan shoi caincaiti ano caani.

⁶⁹ Ascashon nan oinmati shomayaton Pedro fuchia afu niafo yoini, —Na nocofununfin arifi Jesús fu rafumisiquin, —huaiton. ⁷⁰ —Ma. Uncai Jesús fu rafumisimaran, —ishon Pedronun yoini. Samaracatan Pedron fu niafoan yoinifo, —Icon. Mirifi min Galilea mai anoashu oa. Ascan minfin Jesús fu rafumisiquin, —ishon yoinifo.

⁷¹ —Un mato paratiroma. Un chanicun ua Diosin chii uru muran potatiroquin. Diosin tapiafin un mato iconcoin yoiaquin. Uncai na nocofunu Jesús oinmisimaran, —ishon Pedro ato yoini.

⁷² Ascaino samamashta afanan tacara cuoni. Cuoaino Jesús yoia cuscacoin Pedronun shinantani. —Pedro, un mia yoi. Na yamutan tacara cuoi rafuamano min ato yoiqui rafu non fusti huaicain, “Un Jesús oinmisimaquin,” —ishon Jesús yoia cuscan Pedronun shinantani. Ascashu fasi uaini.

Pilato ano Jesús iyonifo

Mt 27.1-2, 11-14; Lc 23.1-5; Jn 18.28-38

15 Ascano shafa acuaino nocon yorahuunshon Dios cufimisi niaifofo yafi Moisés cununi cuscan tapimamisifo Dios fu tsainti pushu cushumisifo fu ichanancashon shinanpainifo, —¿Ahuuscashomain non Jesús rutumaicai? Nan Pilato Romanonfoan aton niaifon ahuun mai arishon nocoqui nichini nocon niaifo inon. Non Pilato ano Jesús iyoicanon, —icashu yoinannifo. Ascatan munushcashion Pilato ano iyonifo.

²—¿Minmain Israelifoan aton niaifo-coinquin? —ishon Pilaton Jesús yocani. —Aifain. Nan min ua yocain cuscafin unquin, —Jesús huani.

³ Ascano nocon yorahuunshon Dios cufimisi niaifofoan Jesusqui tsain chaca huanifo. ⁴ Ascashion Pilaton yoini, —¿Yorafoan mia chaca huaifo cuscan min nicaimamun? ¿Min ato cumapaimamun? —ishon yoini.

⁵ Asca huaino puusinima. Aqúi tsain chaca huafiaifono puusinima. Ascaino Pilaton ahuun nomuran shinanquin, —¿Aira! ¿Ahuuscain ato cumapaimamun? —ishon shinanniquin.

Pilaton ato Jesús inanni rutunonfo

Mt 27.15-31; Lc 23.13-25;

Jn 18.38–19.16

⁶ Ascatan aton fuusititan faritifi cunu muran iquiafo fusti ato caimapaoni. —¿Ratocai man caimapaimun? —ishon Pilato fuusititan ato faritifi yocapaoni.

⁷ Nantianri nocofunu Barrabás cunu muran ini. Nanton yorafo shinanchacamani. —Romanonfoan aton niaifofo non potanon, —ato huani. Fasi ato mucumati huapaoni. Asca yora ichapafoan Romanon niaifo potapainifo. Nantianri Barrabás yora rutuni. Ascaiton ranushumuafoan cunu muran iquimanifo. ⁸ Ascatan man Jesús achiafono Israelifoan Pilato yoicaquin, —Min noco faritifi fuusititan ashopaoni cuscan afanan noco huashohuun. Afanan cunu muran iquia futsan noco caimashohuun, —huanifo.

⁹⁻¹⁰—Jesuscai ahua chaca huamisima. Ato ashoan cuscacai Israelifo aton niaifofoan atiroma. Ascacufin Israeli niaifofo Jesusqui sinacaniran, —ishon Pilato ahuun nomuran shinanniquin. Ascashion ato yoini, —¿Maton niaifo Jesús man caimapaimun? Un mato caimashonon, —ishon ato yocafashion. ¹¹ Israelifoan aton niaifofo nannosi ichanannifo ato shinanchacamapaicani. —“Jesús noco caimashotama Barrabás noco caimashohuun,” ishon Pilato yoicahuun, —ishon niaifofoan yorafo yononi.

¹² Nannori, —Israelifoan, man yoimisi Jesús maton niaifo. ¿Ascacufin un Barrabás caimashomun un Jesús ahuusca huaicai? —ishon ato yocani.

¹³ Nantifishon, —Ihui coyan iquinanqui mastahuun, —ishon oi ashcafinin yononifo.

¹⁴—Ahuuscacufin. ¿Ahuamun chaca huaquin? —ishon yocani. Ato yocafaiton fasi curushcain, —Ihui coyan iquinanqui mastahuun nariscanon, —huarianifo.

¹⁵ Sinaifoan oinquin Pilato ato rau huapaiquin Barrabás caimaniquin. Ascashion ato yonoa fichi cunocui tuchia-ton Jesús coshaquin futsanifo. Ascatan mastashcaquin iyonifo.

**Ranushumuafoan Jesús
cashu mutsama huanifo**

¹⁶Ranushumua Romanonfoanfin Jesús iyonifoquin. Niaifoan ahuun pushu chaimashta. Nannofin ranushumuafoan aton pushurasi iniquin. Nanno iyonifo. Ascashon niaifo cushumisifo ranushumuafoan ato chifi cunanifo oin funonfo. ¹⁷Ascashon ahuun sahuuti pucanifo. Pucatan futsa shonan sahumanifo. Ascatarí mosha chainipafo maiti huashon maimanifo. ¹⁸⁻¹⁹Ascashon yoicaquin, —¡Aicho! Minfin Israelifoan aton niaifoquin, —icashu aquí cashupainifo. Asca huacatan ratoconun mai chachishonifo. Aquí cashupaiqui poquiti ahuun mapo cosharianifo. Ascatan aquí cumo michonifo. ²⁰Ascashon aquí paranaquin cashushonifo. Cashushoncatanfin sahuuti shonan pucashon ahuun sahuuticoin afanan sahumanifo. Ascashon ihui coyan iquinanqui mastai focaquin iyonifoquin.

Jesús mastanifo cuscan

Mt 27.32-44; Lc 23.26-43; Jn 19.17-27

²¹Jesús iyocaquin oianfo pushurasi patasharifo nocofunu Simón oaiton fuchishon ato finonfoanpaiyaiton ranushumuafoan achishon yoini, —Minfin ahuun ihui coyan iquinan foicaicain —ishon ranushumuafoan iyamafaini. Nan Simón Cirene mai anoashu oa iniquin. Ahuun facu rafu Alejandro yafi Rufo. ²²Gólgota ano Jesús iyonifo. Gólgota onicoinnin tsainmanfin mapo shao. ²³Nanno nococashon fimi unu paun tashipia osia Jesús ayamapaiyaifoan ayanima. ²⁴Ascatan Jesús ihui coyan iquinanqui mastanifo. Mastacatan ahuun sahuuti fiashcaquin. Toquiri tocoro rafu ya cashuqui potapacunifo. Nan

finonmanaton ahuun sahuuti fiqui tau huani. Asca huapatan cuyonfianifo.

²⁵Man fari nai pochinin racano mastanifoquin. ²⁶Man mastacashon amanaonri ihui coyan iquinanqui cununifo isca huaquin,

ISRAELIFOAN ATON

NIAIFOCOINQUIN

ishon amanaonri cununi. ²⁷Ascashon yomutso rafuri mastanifo. Ocuma futsa futsafain ocuma futsa anifoquin. ²⁸Nannori ahuunoa cunuyoni cuscan, —Shinanfo arifi chaca shafai, —ishon Diosin tsain inonpacoai cuscacoin aquin cununiquin. ²⁹⁻³⁰Ascashon camacaquin, —¡Cuu! Minfin yoimisiquin nocon Dios fu tsainti pushu min choquiacai. Ascatanfi osha rafu non fusti finontan min afanan futsa huairan min ica. Iconmainquin mifiri numatan fotohuu. Ihui coyan iquinanmaquinoashu fotohuu, —ishon roanifo.

³¹Ascano nanscarifiai nocon yorafohuunshon Dios cufimisi niaifofo yafi Moisés cununi cuscan tapimamisifoan aquí cashupai yoinannifo, —Nanton futsafosi numafiatiroshaquicai aficai numatiroma. ³²Iconmainquin aafin Criston Diospan Furun Israelifoan nocon niaifoashu ihui coyan iquinanhuunoashu fotoaiton non oinquin non icoinra huacai, —icashu yoinannifo. Ascashon afu ihui coyan iquinanqui masta rafutari aquí tsain chaca huaquin roanifo.

Jesús nani cuscan

Mt 27.45-56; Lc 23.44-49; Jn 19.28-30

³³Ascatan fari masafinin racano nan maitio faquishpacucahuani. Ascashu man fari caino afanan shafani. ³⁴Nantianri Jesús oi ashcafinin apa cunani, —*Eloi, Eloi, ¿lema sabactani?* —oinicoinin tsain manfin, —*¿Uhuun Diosin, uhuun Diosin, ahuuscain mian potamun?* —huani.

³⁵Yorafoan mapo casho Jesús nica-caquin, —Nicacapon. Elías cunaiton, —huanifo.

³⁶Ascainofin nocofunu futsan ichoniquin. Fimi unu focash muran nashan nanushon fiicai ichotan fitani oshon faca tahua shatun tuhuunifoontan Jesús inanpaiyaiton yoini, —Non oinyonon. Elías oshomain fotomaicai. Non oinyonon, —ishon cashu mutsama huanifo.

³⁷Ascainofin Jesús fasi fiisnac-ahuaniquin. Fiisina cahuatanfin naaniquin.

³⁸Nanscatapaiyaino Israelifoan aton Dios fu tsainti pushu murannoa pano putan pochimua afincoin fashnupacu cahuaniquin. ³⁹Ascaiton, —Iconfinquin na nocofunufin Diospan Furunquin, —ishon ranushumua niaifoan Jesús naa cuscan oinshon yoini.

⁴⁰Nannoshori ainfofoan chai mapo casho oinnifo. Futsan María Magdalena non María futsan Santiago non José aton ahua non Salomé. ⁴¹Nan rafu non fusti ainfofo futsafoanri chai mapo casho oinnifo. Galilea anoashu Jesús fu foan-fafainmisifo cushusharashcaquin. Ainfofo futsafoanri Jerusalén ano afu funifo. Ato furi nanno nia ini.

Jesús mai huanifo cuscan

Mt 27.57-61; Lc 23.50-56; Jn 19.38-42

⁴²⁻⁴³Ascatan sabado fainaca shafatan Israelifoan nan shafan anunifo, —Itisharati shafaran, —ishon anunifo. Nan itisharati shafatan man fari caino nocofunu José ratutama Pilato niaifo ano cani. Nan José arifi Israelifoan aton niaifo futsan. Arimatea mai anoa ini. Nanton manamisi Cristo Diosin catoanton aton niaifo inon. Nansacaini cashon José Pilato yoini, —Niaifon, un Jesús ahuun caya ihui coyán iquinanmaquinoa fotomapai mahua quini muran mai huai cashquin.

Un mia yocai oa, —ishon yoini. ⁴⁴Pilaton nicatan, —¡Aira! ¿Ahuuscai Jesús samamashta naamun? —ishon shinanni. Ascashon ranushumua cunani yocashquin, —¿Iconmun man Jesús naamun? —ishon yocaiton. —Ai, man naaran, —ishon ranushumuaton cumani. ⁴⁵Ascaiton nicaquin, —Jesús ahuun caya José fotomatiro mahua quini muran mai huashquin, —ishon Pilaton ranushumua yononi. ⁴⁶Ascatan José pano oshopa sharacoin fiini. Fiitan a mastafó ihui coyán iquinanmaquinoa Jesús ahuun caya fotomapacufoan ahuun yoratishton nan pano oshopa sharacoinchi raconi. Racoshon toquiri mahua quini muran mai huani. Mai huashon toquirininhuun fuponifo. ⁴⁷Mai huaifono María Magdalena futan María futsan José futsan ahuan nannoshon oinnifo.

Jesús maiashu funini cuscan

Mt 28.1-10; Lc 24.1-12; Jn 20.1-10

16 Ascano Israelifoan aton tunutitian cuyoano María Magdalena non María futsan Santiago ahuan non Salomé non afoan ininti sharashta finifo Jesús ahuun cayaqui ocashcaquin. ²⁻³Ascano iyoconaino nan Domingoai shafatan funamarishta ainfo rafu non fusti Jesús mai ano fonifo yoinanfonifo, —¿Nocomain tsoa toquirininhuun quini fupushonan? —icashu ainfo rafu non fusti yoinannifo. ⁴Nococaquin oianfo quini ahuun fupoita toquirininhuun toromahuan man fupucuaini. ⁵Ascaino iquifainpaiquin oianfo nocon mumicayahuuri man ointiaca quini muran tsaoan ini. Sahuuti osho sharashta sahuuashu. Fuchitan mustai irinifo.

⁶Ascaiton ato yoini, —Ratuyamacahuun. Man Jesús funicainquin. Man funai Jesuscai

nunoma. Mastafaiatafo man funiaquin. Na quini muran raca iquitano. Oin fucapon. ⁷Afu rafumisifo yoitacahuun. Pedrori yoifain. “Jesús Galilea ano caiyoi tauicaiquin. Anoshon mato manai. Mato yoimisi cuscan nanooa man ointiroran,” ishon man ointiaca Upa Diosin atoquei nichiaton, —ato yoini.

⁸Nicafaini nan ainfo rafu non fusti mahua quini murannoashu ichonifo. Ichoainfoancai icoinra huaquin rashquinifoma. Ratufaini focaquin rama oianfo cuscan tsoa yoinifoma.

**Jesús María Magdalena
oinmaquin tau huani**

Jn 20.11-18

⁹Ascano Jesús Domingo funa-manrishta funini. Funiashu María Magdalenaqui noicoi tauni. Jesús naataima Mariamaquinoa yoshin chaca siete potani. ¹⁰Jesús oian cuscan afu rafuafo ano caní ato tapimashquin. Atoqui nocoshon oian Jesús shinancani uainifo. ¹¹—Un rama Jesús oian. Man funiaran, —ishon María ato yoifiaiton nicacaquin tsoan icoinra huanima.

Jesús afu rafumisifo rafu oinmani

Lc 24.13-35

¹²Ascano ahuun tanamisi rafu fai foaifoanno Jesús atoquei niriscatani. Ascaitocai onannifoma. ¹³Onancanashu afu rafumisi futsafo ano fonifo ato tapimashquin. —Non Jesús oianran, —ishon ato yoifiaifoan tsoan atori icoinra huanima.

**Jesús afu rafumisifo
once yononi cuscan**

Mt 28.16-20; Lc 24.36-49; Jn 20.19-23

¹⁴Ascatan chipo piyainfoanno Jesús atoquei nocoriscatani. Ascashon ato

yoini, —¿Ahuuscain un afanan funia man icoinra huamamun? Futsanfoan ua oinshon mato yoifiaiton man ato icoinra huamaran, —ishon afu rafumisifo once yoini.

¹⁵Ascano ato yoiquin, —Mun funia. Atohuunoashu naiyofiahu un afanan funia aton chaca soashoshquin ufu nipanonfo. Manifoti ato yoitacahuun.

¹⁶Ratoran futsanfoan uhuun tsain shara icoinra huatan unu muran iquimamuashu ufu Upa Dios icano nipatiroquin. Ascafia ratoran futsafoan nan tsain shara uhuunooa icoinra huayamashu ahuun chaca ahuun nupacunaca. Ascashufin omitsiscapanaca muran fotirofoquin. ¹⁷Ascano ratoran ua icoinra huashon uhuunshon yoshin chaca futsamaquinoa potafain tsain shara tsoan nicayomisima cuscara yoifain ¹⁸rono paupan tsomashu yotucuyamarain rao paupan ayashu ahuuscayamacain isinin imisifo manmanshon caya huamashquiran, —ishon Jesús ato yoini.

Jesús nai muran Apa ari cani

Lc 24.50-53

¹⁹Ato yoitan Upa Diosin atomaquis-hon nocon Ifo Jesús nai muran ihuini afu niaifocoin inon. ²⁰Ascatan afu rafumisifo maitio foanfaincaquin Jesushuunooa ato yoiaifono, nocon Ifoan atofu yononi ahuamamishti ahuunshon huanonfo. Ascano nocon Ifoan tsainhuunooa ato yoini cuscan icoinra huanifo. Nanti.

Lucas Jesushuunoa Cununi

Lucaspan tau huaquin ahuun tsain cununi cuscan

1¹⁻²Teófilo un mia cunu fomai futsafoan Jesucristohuunoa cunuafu cuscan mirifi min icoinra huacoinnon. Jesús acaiton oinmisifo cuscan yafi ahuun tsain yoimisifoan noco yoinifo cuscan nannori futsafoan aqui cununifo. ³Ascano urifi un nantifi yocapacuni Jesushuunoa aqui cunushquin. Nan caini cuscan huafain nan ahuamamishti huayopaonishaquin apa ari nai muran naso caini cani. Ascacun afu rafuafu un ato yoca urifi tapisharashqui. Ascashon cayacafi cunushon mia fomashquin. ⁴Ascacun uhuun cunuhuunshon mia futsafoan yosiainfo cuscan min icoinra huacointiro.

Diosin nai oinmatinin nan Juan yorafo unu muran iquimapacumisi caiantaima ahuun apa tapimayoni

⁵Ascacun natian un nica cuscan un mia yoinon. Herodes Judea anoa niaifoatian nantianri Zacarías nocofunu shara nanno ini. Naanfin Aarón ahuun funaquin. Ascashu nannoa ahuun caifohuunshon Dios cufimisi ipaoni. Aarón ahuun funafo shocoranan. Nan shoco futsafoan aton niaifo Abías. Nanrifi Zacarías ahuun niaifo ini. Nan Zacarías ahuin Isabel arifi Aarón funa. ⁶Ascashon nan rafutan Diosin tsain cununi cuscan nicasharacoinpaonifo. Nantifi Diosin yononi cuscan tanasharamisifo. Nan rafutan tanasharaifoan Diosin oinpaoni. Ascacuai tsoan ato ahuashta rafatiro ipaonima. ⁷Ascafiashu facuoma rafu. Zacarías anifo icaino ahuinri yoshafo toosma ini.

⁸Ascano Abías ahuun shocofo nan ahuun yorafohuunshon Dios cufimisifo ato yoini isca huaquin, —Manfin natian siete oshatan Dios cufiti pushu muranshon man yonoshonici, —ishon ato yoini. Ascano nannori Zacarías atofu ini. ⁹Nantianri Zacarías catonni Dios fu tsainti pushu muran iquishon ininti shara coanon. Nan ininti ahuun anu incienso. Nanscara cufimisifoan aton fuyamisi ipaoni. ¹⁰Nan incienso fiin cuscara coaino yora ichapafo cufiti pushu umainti ano nishon Dios cufishcaquin.

¹¹Ascashon Dios cufiti camaqui incienso coa ahuun mumihuuri Diospan oinmati afu nai muran ica Zacariasqui niriscatani. ¹²Ascaino Zacarías mustairitan fasi ratucoinni. ¹³Ascafiaiton Diosin oinmatinin afu nai muran icaton yoini isca huaquin, —Ratuyamahuu, Zacarías. Min cufiainton Diosin man mia nica. Min ahuin Isabel chipo furonanfacu nanushquin. Ascan caincun min anuquin Juanran min huashquin. ¹⁴Ascashu min fasi aqui unimasharacoinshquin. Ascaino yorafori fasi aqui unimacoinshquin caiano. ¹⁵Ascano Upa Diosirifi aqui unimashquin. Nocofunu fasi sharacoin iishquin. Ascashocai ahuara pau ayapacunacama. Fimi unu pau ayayamafain ayati futsa pauri ayashquima. Caiyaintian Diosin Yoshin sharapan nan iquishquin. ¹⁶Nan nocofunuaitian ahuun caifo Israelifo Diosin tsain shara ato yoishquin ato chaca shatunonfo. Ascano aton Ifo Diosiqui nasononfo.

¹⁷Ascashu nan Juan Elías ipaoni cuscara arifi iishquin. Elías Dioshuunshon ahuun yorafo cayacafi icocoin tapimpaoni cuscan nanscarifi aqui Juanpan ahuun yorafo arifi ato tapimashquin. Ascano ahuun tsainhuunoashu ato apafu yafi aton facufo afanan noinanshcani. Ascashu nan Diosin tsain nicacasmamisi-

foan arifi aton chaca shatucashon Dios icoindra huafain shinansharashcani. Ascacun Juanhuunoashu ahuun caifofo itisharashcani Diospan furun atoquei no-coaitian a nicasharashcaniran, —ishon yoiaiton.

¹⁸ Nicaquin Zacarías cumani, —¿Ahuuscashomun min yoiyai cuscan un icoindra huatiroquin? Unfi anifocoinquin. Uhuun ahuinrifi yoshafoquin, —huaiton.

¹⁹ Afanan cumaquin, —Unfi Gabrielquin. Un Dios fu imisi. Ascacun nanton ua nichian un ahuun tsain shara mia yoinon. ²⁰ Ascan un mia yoiyai cuscaai mian icoindra huaima. Ascan natiancai min afanan tsainyoima nan min facu caiyaintian. Un mia yoiyai cuscafin nan apaiyaitian Diosin huaashquiquin, —ishon Diosin nai oinmatinin yoini.

²¹ Ascaino yorafoan Dios fu tsainti pushu umaintishon cufinquin anaiticatan Zacarías mananifo. Ascafiaino Zacarías atoquei funa caiamaino yoinifo, —¿Ahuuscain Dios cufiti pushu murannoashu Zacarías saman huaimun? —icashu yoinannifo. ²² Ascariaino atoquei cainfiashocai ato tsainquinima. A pucutiroma muuquin ahuun mucupan ato yoi fustini. Ascaiton onannifo Dios fu tsainti pushu muranshon Zacarías namapan cuscara oianran, icashu ahuun yoinannifo.

²³ Ascashu yorafohuunshon Dios cufimisifo ato yono anaiticatan Dios cufiti pushu murannoashu fonifo. Ascaino Zacarías arifi ahuun pushu ano cani. ²⁴ Ascashon chipo ahuinin facu nanuni. Ascashucaai ahuun pushu murannoashu mucu fustiti oshu raqui caipainima. ²⁵ Ascashon Isabel shinanquin isca huani, —¡Aicho! Diosihuunshon uhuun funun ua facu nanumana. Diosin ua ashoan. Afin ua nanumapaiyaitian ua facu

nanumana. Uhuun ramapaiquin. Asca natiancai afanan uhuunoa yorafoan yoiroma isca huaquin, “Nacai facuyanacamaran,” ishocai yoirofomaran, —ishon shinanni.

Jesús cainshquiai cuscan Diosin nai oinmatinin yoini

^{26–27} Ascaino seis oshu Isabelqui man caano Diosin nai oinmati Gabriel Mariaqui niriscatani. Nan María funuoma ini. José fu fiananfotaima afu iyopaonima. Tsoaricai afu imisima. Ascan José ahuun shunifin David iniquin. Nan Israelifoan ato niaifo ipaoni. Ascacun Diosin ahuun oinmati afu nai muran icaton yoini isca huaquin, —Galilea mai Nazaret pushurasi muran Mariaqui catahuun, —ishon ahuun oinmati Gabriel nichini. ²⁸ Ascaino aqui nocoshon yoini, —Un miqoi oa. Diosin oian min fasi sharacoincun. Mia fasi noicoin. Nocon Ifo mifu icaran, —ishon yoini.

²⁹ Ascaiton nicaquin María ahuun nomuran shinanpaini, —¿Raquiri ua yoipaimun? —ishon shinanni. ³⁰ Ascaiton afanan cumani, —María, ratuyamahuu. Diosin mihuun noifain miqoi unimasharai. ³¹ Ascan minfin natian furonafacu nanuicai. Ascashu caincun min anuquin Jesusran, huaashquin. ³² Ascaino caianshu niaifocoin iishquin. Diosin nai murannoaton ahuun shuni David niaifo ipaoni cuscan arifi apahuunoashu niaifocoin iishquin. ³³ Ascashu naanfin Israelifoan aton niaifo unupacunacamaran, —ishon Gabriel yoiaiton.

³⁴ Afanan María cumani, —Uncai funuyamafinquin. Uacai tsoan tanamisima. ¿Ascan ahuuscashomun un facu nanutiroquin? —huaiton.

³⁵ Diosin oinmatinin afu nai muran icaton afanan María cumani, —Diosin ahuun Yoshin Sharapan miqoi oshon

mia facu nanumashquin. Nanto ahuun curushhuunshon ahuamamishti huatiro. Nanhuunshon mia facu nanumashquin. Ascan nan facu cainshquiaifin shara fustisi imisiquin. Ahuashtacai chaca huamisima. Naanfi Diospan facuquin. ³⁶Min yaya yoshafoancai facu nanumisima. Ascan toosmaran huafiamisifo natian man facu nanua seis oshu man aqui caa. ³⁷“Ascacun ahuacai Diosin aquimaracai,” non huatiroma. Nantofi ahuamamishti huatiroquin, —ishon yoini.

³⁸Ascaiton afanan María cumani, — Unfin uhuun Ifoan oinmatiquin. Afifin nan apaiyai cuscan ua huatiroquin. Nan mian yoiyai cuscan ua huanonquin, —ishon María yoiaino amaquinoashu yamariscatani.

Marían Isabel oin cai cani

³⁹Ascano man shafa ranan finontan María ahuun yaya ano cai fasi coshi cani nocoriscapai. Nan Judea muran pushurasi ano machihuanrasifo ini.

⁴⁰Nocotan Zacarías ahuun pushu muran iquitoshiquin ahuun yayan Isabel yoini, —Yayan, un mia oinyoiran, —huani.

⁴¹Ascaiton nicai Isabel ahuun shaqui muranshon ahuun facun potapotani. Asca huaino Diosin Yoshin Sharapan ahuun nomuran shinansharamani.

⁴²Ascaino oi ashcafinin Isabel ahuun raru María yoini isca huaquin, —¡Aicho! Rato ainfo futsacai mia acai cuscan Diosin catoanma. Fasi mia shara huacoinna. Min facu chipo cainyano Apa Diosin aqui unimacoinqui a cushusharashquin. ⁴³Ascan un ahuaara shara huara rafanancai Diosin ua shara huama. Ascashon uhuun Ifoan ahuun ahua uqui nichian ua oinyonon. ⁴⁴Ascano min tsain nicai unimaqui uhuun shaqui muranshon uhuun facun ua potapotaca.

⁴⁵Upa Diosin nan min ishquiai cuscan mia iquisi tapimanaiton nantifi ahuun

tsain min icoinra huua. Ascacun Diosin mia unimamaran, —ishon Isabel ahuun raru María yoini.

⁴⁶Ascaiton María arifi ahuun yayan yoini,

“Uhuun nomuranshon un shinanqui isca huua,

‘Ifon min sharacoin. Tsoa futsacai mia cuscara sharama.

⁴⁷Min uhuun Numamisi

Diosiran icashu uhuun nomuran un fasi unimacoinna.

⁴⁸Ascashu un ahuun oinmati.

Un ahuamafiacun uhuun ramapaiquin ua oinfafainni.

Ascacun ua Diosin shara huua cuscan yorafoan uhuunoa yoipacunacafo.

⁴⁹Diosin ahuamamishti huamiton ua ahuaara sharashtacoin ashoan.

Aafin shara fustisiquin.

⁵⁰Ascan ratoran futsan Dioshuunoa nicaquin ahuunoa shinansharafafainai.

Nan cuscara yorafohuun Diosin ramapaipacunaca.

⁵¹Diosin ahuun shinanpan ahuamamishti huamisi.

Ascashon nan cacapaimisifoan aton nomuran shinanchacamisifo cuscan Diosin ato shatumafain atori onaintimai.

⁵²Ascatan niaifofori Diosin ato shatumanafanan niaifo inonfoma.

Ascashon nan ahuamafo ato shinansharamana nanfoan tapinonfo ahuun facufocashon.

⁵³Ratoran futsa ahuuomafo foni cuscarafo fasi Diosihuunoa tapipai tanasharashcaquin.

Nanscarafo Diosin ato cushusharatiro.

Ascashon ahuaara yopai cuscan ato inansharafain a tanasharaifoanri

ato unimamashquin.

Ascashon ahuaara ichapa ayafofiahu Diosihuunoa shinanyamaifo copiquirifi ato ahuaara inainma.

Man mafo ichapayafiashu ato nomuran
shinansharayamafain tsoa
unimamisima.

⁵⁴⁻⁵⁵ Ascafiaifoanno nocon caifofo Is-
raelifofin Diospan oinmatifoquin.

Ascashon non ahuara acai cuscan noco
ashomisi.

Nonfin noco shuni Abraham ahuun
funafokuin.

Ascacun nocohuun ramapaipacunaca.

Nannori Upa Diosin nocon shunifo
yoyiotianiran,”

ishon María yoini.

⁵⁶ Ascashu oshu rafu non fusti ahuun
yayan Isabel fu iyoni. Ascatan María
ahuun pushu ano nasoni.

Nan yorafo unu muran iquimpacumisi Juan caini cuscan

⁵⁷ Ascashu Isabel ahuun facu
caiyaintian furonanfacu cainni.

⁵⁸ Ascaiton a chaima icafo futan ahuun
yorafoan nicanifo nocon Ifo Isabelhuun
ramapaiqui facu cainmashara. Ascashu
afu unimacoinnifo. ⁵⁹⁻⁶⁰ Ascatan ocho
osha finontan Zacarías pushu ano
ahuun yorafo funifo facushta ahuun
foshqui rupa shatuni fucani. Ascashon
apa anuquiri Zacariasran huapaifiaifoan
ahua Isabel yoini, —Ma. Anoricai
ahuun anu iquima. Juan ishquiran,
—ishon ahuan yoiaiton.

⁶¹ Cumanifo, —Ma. Rato min
yorafoan ahuun anucai Juanmaran,
—ishon yoinifo.

⁶² Ascashon Zacariasrifi yocanifo
ato mucumansi raquinimain ahuun
facun anuicai. Ascafiaifoan tsaintiroma
muuqui ahuun mucumansi mutoacu-
faini ahuun anu tapipaifiaifainfoan.

⁶³ Ato papio yocain mucu mushan
mushainni. Ascaiton inanfo cunutan
ato ismaiton oianfo Juan ini. Ascara
oincani mustairitan, —Icon ahuun anu
Juan ishquiran, —ishon shinannifo.

⁶⁴ Ascano ahuun facun anu cunutapai

Zacarías afanan tsainnacahuani.
Ascashon Dioshuunoa shara yoini.

⁶⁵ A chaima icafo futan Judea muran
machi ichapa ano icafoan nicacaquin
Diosin aca cuscan fasi sharacoin.

—Noncai ascara nicayomisimaran,
—icashon Zacarías yafi ahuin Isabel

non aton facu Juanhuunoa yoiquin
futsanifo. ⁶⁶ Ascashon nan nicafoan

yoinifo, —¿Ahuu cuscaramun nan facu
iishquiquin? Man non oian facufiacun

Diosin Yoshin Sharapan iquinaiton,
—icashu yoinannifo.

Zacarías fanainni cuscan

⁶⁷ Ascano facu ahuun apa Zacarías
Diosin Yoshin Sharapan iquinaiton inon
pacoai cuscan yoini isca huaquin,

⁶⁸ “Uhuun caifo Israeliffoan nocon Diosin
fasi sharacoin.

Nocoqui oa noco numashqui.

⁶⁹ Diosin nocon Numamisi nan ahua-
mamishti huamisi nocoqui nichian.

Noco shunifoan aton niaifo David
ipaoni.

Nanton ahuun funa nocoqui nichian
noco niaifocoin ipashanon.

⁷⁰ Nannori ahuun tsain inon pacoai
yoimisisharafohuunshon Diosin
yoyioni.

⁷¹ Ascashon yoiquin isca huani, ‘Un
mato cushui.

Nan mato noicasmamisifoan afanan
mato ahuusca huanonfoma.

Ascacun un mato Numamisi matoqui
nichiran,’ ishon Diosin inon pacoai
yoimisifohuunshon noco yoini.

⁷²⁻⁷⁵ Ascashu noco shunifohuun Diosin
ramapaipaoni.

Abraham yoyioni cuscacai Diosin ointi
aquimanama.

Yoiquin isca huani, ‘Un min funafo nu-
mashqui ato noicasmaiffoan ato ahu-
usca huanonma.

Ascano ratutama ua yonoshopacutirofo-
quin,’ ishon Diosin yoyioni.

Nocon Ifoan yoiyotiani cuscacoin man noco ashoin non isharacoincain non ahuun tsain tanapacushanon,”

ishon Zacarías yoini. ⁷⁶Ascashion ahuun facu yomushtafiacun pushcoashu ishquiai cuscan yoiqui isca huani, “Uhuun facushtan, ‘Mirifi min Diosin tsain yoishomisirán,’ mia huaashquicani.

Diosin nai murannoaton ahuun Yoshin Sharahuunshon ishquiai cuscan min ato yoifoanfainquin isca huashquin.

‘Nocon Ifo oshquiquin itisharacahuun. Maton chacari shatucahuun a nocoaiton nicasharashcaquin.

⁷⁷⁻⁷⁹Diosin fasi nocohuun ramapaiqui nocon Ifohuunshon noco chaca soashona non afu ipashanon,’

ishon noco caifo min ato yoishquin.

Nii muran faquishiainocai non oinsharatiroma.

Chashamatimaisicai non fai tanasharatiroma nocosharapaiquin.

Nanscarifiai nocon Ifo oataimano tsoan Diosin fai tapiataima.

Shafaino fari otiro afanan faquish inonma.

Nanscarifiai nocon Ifo nai murannoashu oataima nan faquish cuscara.

Ascafia nan nocoqui oaitian nan chashamati cuscara shara iishquin.

Ascashion Diospan fai noco oinmaskuin ahuunoashu non Dios fu rafunon.

Nonricai nai afanan ratutiroma.

Naashumain non Upa Dios fu ipasharatiro.

Non nicuri noco cushusharafain nocon ointi fucash huanonma non isharashquin,”

ishon Diosin Yoshin Sharahuunshon Zacarías yoini.

⁸⁰Ascashu nan Juan facu pushcocoin sharani. Ascashion shara fustisi tanapaiquin ahuun nomuran Diosin tsain shara nanucoinni. Tsoa istaipama anori

iyopaoni ahuun caifo nan Israelifo Diosin tsain yoiquin tau huaitian.

Jesús cainni cuscan

Mt 1.18-25

2 Nan Juan caiyaintianri Romanonfoan aton niaifoan ahuun anu Cesar Augusto. Nanton ahuun yorafo yononi maitio ato tanan huashon aton anufo cununonfo ahuuti yoramainquin tapi-paiquin. ²Nantianri Siria anofoan ato niaifo ahuun anu Cirenio ini. Ascan nan Cirenio niaifoaitian ato tanan huaquin tau huani. ³Ascano nantifi focanashu aton mai anoashu cununifo.

⁴Ascacun José yafi María Nazaret pushurasi Galilea murannoashu focani Belén pushurasi Judea mai ano noconifo. Nan Belén David ahuun mai ini. José David ahuun funa. Ascacun arifi Belén ano cani. ⁵María fu aton anu cunui focani fonifo. Ascashu man yoinanfo ini afu fiananshquin. Ascafia nantianri man facu nanua ini. ⁶Belén ano nocoaitian facu cainti sunuin ini. ⁷Nannoashu furo-nanfacu caianshu facuyai tauni. Nantifi pushu fospifafainano tsoan ato iquimapaiyamaino inafaan pimisifo pushu facushta murannoashu furun cainni. Caincun ahuun rashutinín rashuni. Ascashion inafaan piafo muran furun ratani.

Diosin nai oinmatifo yafi chashoan cushumisifo

⁸Nan Belén chaimashon chashohuan cushumisifoan nan yamutari aton inafaa faasi funununshon cushushinifo. ⁹Ascaino atoqui nocon Ifoan ahuun oinmati afu nai muran icafo fotoi chashapacucahuani. Faasi funununnoafo Diosihuunshon ato chashariscatani. Ascaino nan chashoanfo cushumisifo fasi ratui futsunifo. ¹⁰Ascaifoan ato yoini, — Ratuyamacahuun. Un mato tsain fasi sharacoin yoiyoaquin. Nicaí man unimaino manifoti anoafori unimanonfo.

¹¹ Na yamutafin Belén nan mato shuni David cainni anoashuri maton Numamisi cain huanquin. Naanfin Upa Diosin matoqui nichiaquin. Nan maton caifoon manamisifo. Nanrifi maton Ifoquin. ¹² Ascacun un mato yoi ahuscashomain man fuchitiroquin. Nan facu ahuun rashutinin rashucaí inafoon pimisifo muran racacun man fuchitiroquin, —ishon Diosin nai oinmatinin ato yoini.

¹³ Ato yoiqui unutupaiyaino samashta atirifi Diosin oinmati afu nai muran ica atoqui cuyopacunifo. Ascashon Diosihuunoa yoisharacaquin isca huanifo.

¹⁴ *“Diosin fasi shara. Nai murancoin ica. Atirifoqui Diosin unimai. Nafo aton nomuran unimasharacunaniran,”*

icashon yoinifo.

¹⁵ Ato yoiqui anaiticatan atomaquinoashu Diosin oinmatifo nai muran fonifo. Ascaino nan chashoan cushumisifoan yoinifo, —Non Belén ano canon. Nocon Ifoan noco yoia cuscan non oin fonon, —icanashu yoinannifo.

¹⁶ Ascashu ichocaquin María yafi José fuchitoshiquin oianfo facu inapan pimisifo muran fasi toca racai ini.

¹⁷ Ascatan nan facu oianfo cuscan huafain ato yoifoanfainifo. ¹⁸ Ascán nan chashohuan cushumisifoan

ato yoiaifoan nicacaquin yoinifo, —¡Aira! ¿Ahuuscashomun ascara shara noco yoiafoquin? —inifo.

¹⁹ Ascacun María ahuun nomuran fasi shinanpaoni nan nicafain oian cuscan. Ascashori, —¡Aicho! Diosin noco shara huashoanran, —ishon shinanpaoni.

²⁰ Ascashu nan chashohuan cushumisifoan ato yoifoanfaintacani aton inafon ano naso furacashon yoinifo isca huaquin, —¡Aicho! Diosin fasi shara. Nan noco yoia cuscan huafain nanscaracoin man non oianran, —icashu yoinannifo.

Dios fu tsainti pushu muranshon apa futan ahuan aton facu Jesús Dios inannifo

²¹ Jesús cainta ocho oshatan nan facun ahuun foshqui rupa shatuni. Nantianri anuquin Jesusran huani. Nannori María facu nanuataima Diospan oinmatinin afu nai muran icaton yoiquin tau huani.

²² Moisés Israelifo yononi isca huaquin, —Maton ahuin facu caianshu cuarenta oshatan Dios fu tsainti pushu muran iquiyotiomaran, —ishon ato yononi. Ascacun María futan José aton facu man cuarenta oshatan Jerusalén ano iyonifo. Dios fu tsainti pushu muranshon apa Dios inanshcaquin. Ascano Dios fu tsainti pushu muran iquicashon yoinifo isca huaquin, —Upa Diosin nocon facu non mia ihuushona mia inainyoshquin mia yonoshopacushanon, —ishon yoinifo.

²³ Ascacun nannori nocon Ifoan yononi isca huaquin, —Nan furonanfacu cain tauafo nocon Ifo Diosina. Ascashon afi amapaiyai cuscan ato huapashanon, —ishon cununi. ²⁴ Nantianri José yafi María Diosin yononi cuscaín ruhui rafu iyamarai ruhui cuscara rafu foni nan ahuun caifohuunshon Dios cufimisi María inanni a rutushonon. Ahuun chaca soapaiyaiton Diosin ashonon. Ascashon a tanasharafain ismanon.

²⁵ Ascán nantianri Jerusalén anoa nocofunun shara ahuun anu Simeón. Diosin Yoshin Sharapan iquina. Nanton Dios tanasharashon cufifafainpaoni. Ascashon nan Diosin catoon Israelifoan aton Numamisi manafafainpaoni. ²⁶ Ascacun Diosin Yoshin Sharapan ahuun nomuran yoini, —Min naataishoma nan Diosin catoon maton Ifo Cristo min oinshquiran, —ishon yoini. ²⁷ Ascashon Diosin Yoshin Sharapan shinanmani cuscan Israelifoan Dios fu tsainti pushu

muran iquini. Ascaino José yafi María arifi aton facuya iquifainnifo. Diospan tsain yononi cuscan aton facu huashoshcaquin iquinifo. ²⁸Ascano Simeón atoquei otan yoini, —¡Aicho! —ianan facu chishtoinifoanni. Ascatan Dios yoisharaquin isca huani,

²⁹⁻³⁰“Ifon, min nantifi tapicoian. Mian yoiyotiani cuscan mun oian. ¡Aicho!

Natian unimacaini un nai manmain min facu nan nocon Numamisi mun oianmashu.

³¹Nantifi manifotiton aton Numamisi min nocoqui nichian.

³²Ascacun nocon caifomafoan mia onanyamafiamisishaquin min facuhuunshon mia onanshquicani. Ascafia nonfin min yora Israelifoquin non tapicoinshquin na facuhuunoashu Diosin nocohuun ramapaiyaiton.

Ascano ahuunshon min noco yoiyoatiani cuscan noco huashoshquiran,” ishon Simeón yoini.

³³Ascaiton nicacaquin José futan Marían aton nomuranshon shinanquin isca huanifo, —¡Aira! Noncai iscara nicayomisimaran, —ishon shinannifo.

³⁴⁻³⁵Ascashon Simeón Diospan Yoshin Sharahuunshon ahua María yoisharaquin isca huani, —Min facu nan nocon caifo Israelifo atirifoan nicacasmacanashu omitsiscapanacafo. Ascan min facu nicacasmaifoanno min fasi shinanshquin. Ascafia nocon caifo atirifoan min facu icoinra huacanashu fasi unimacoinshecani. Ahuunshon yora ichapafain aton nomuranshon shinainfo cuscan puashcaniran, —ishon Simeón yoini.

³⁶Nannori ainfoan ahuan anu Ana, Fanuel facu. Nanton arifi Dioshuunshon inon pacoai cuscan yoipaoni. Nanrifi Aser ahuan caifo ini. Siete fari funun fi-paoni. Ascafiashu amaqui funu naniano

man Ana yoshafoshta ini. ³⁷Ascashu-cai ochenta cuatro fari funuya. Nantianri Dios fu tsainti pushu muranshon Dios cufinquin piqui tunufafainpaoni. Nan muransi ipaoni ahuan Ifoan amapaiyai cuscan aashquin. ³⁸Ascano José yafi María Simeón fu tsaincaifoanno nantianri atoquei Ana oni. Oshon facu fuchitoshiquin yoini, —¡Aichoran! Upa Diosin, natian min facu min nocoqui nichian nocon Numamisi ipashanon, —ishon yoini. Ascashon nan facu oian cuscan Jerusalén anoafo nan manamisifo Anapan yoiqui isca huani, —Mun nocon Numamisi oincoian. Man nocoaran, —ishon ato yoipacuni.

Nazaret ano naso furanifo

³⁹Ascano José fu María Diosin tsain yononi cuscan aton mai Nazaret ano nasonifo. Nan Nazaret Galilea muran. ⁴⁰Nannoashu facu mutsisipacoin yosini. Shafatifi ahumamishti tapicoinfafaini. Diosin ahuan noiquin shara fusti huamafafainni.

Facushtafiashu Jesús Dios fu tsainti pushu muran iquini

⁴¹Ascano nan faritifi Jesús apa yafi ahua Jerusalén ano fopaonifo. Diosin nai oinmatinin aton shunifoan furo-nanfacu iyoafosi ato finonmashoni shinantacani. ⁴²Jesús man doce fari aqui caano apa futan ahuan nan imisifo cuscan fuusin focaquin iyonifo. ⁴³Ascashu man fuusi anaiticatan María yafi José aton pushu ano naso furanaifoanno. Jerusalén ano nan facu Jesús atom-aqui nitufiaitocai apa futan ahuan tapinifoma. ⁴⁴Ascano atofu cai shafain icashon. Man shafa fusti fofaicatan ifiacuc-ahua oian yamaiton. Funacufaincaquin ahua futan apa ahuan yorafo yafi afu rafuafu yocanifo, —¿Man Jesús oianmamun? —ato huaifoan. —Ma. Noncai oianmafinquin, —huaifoanno. ⁴⁵Afanan

nasofaincani fonifo Jerusalén ano funai focani.

⁴⁶ Ascano focashon rafu non fusti os-hatan funacaquin Israelifoa Dios fu tsainti pushu muranshon. Moisés cununi cuscan tapimamisifo ya tsaoshon yoiaino cuscan nicaquin ato yocariaiton apa futan ahuan fuchinifo. ⁴⁷ Ascaiton nicacaquin yoinifo, —Nicacapon. ¿Ahuuscashomun na furonanfacu ato cayacafi cumasharaiquin? Fasi tapisharacoian, —ishon nan nicafo cuscan afi ranan yoinannifo. ⁴⁸ Ascano ahua futan apan fuchicashon yoinifo, —Oinpon. Nocon facu iyoafofo nastui tsoa. ¿Ahuuscaimun noco facu icuscaiquin? —huanifo.

Ascashon ahuan cunani, —Cocan, ¿Ahuuscaini upa yafi min noco funamanain? ¿Min tapiamamun upa futan un mia funai? Non fasi ratua, —huaiton.

⁴⁹ Jesús ahua cumani, —¿Uhuun, ahuscashon huaashquin man ua funaiquin? Man tapiamamun nuno uhuun Upa cufiti pushu muran un iquia ahuan tsain nicasharashquin, —huani.

⁵⁰ Furumun yoiaini cuscaicai ahua futan apa tapinifoma.

⁵¹ Ascashu ahua yafi apa fu Nazaret ano nasoni. Ascashon nantifi apa futan ahuan yonoaifo cuscan yafi yoiaino cuscan nicacoinni. Ascatan furunmun yoiaino cuscan ahuan ahuan nomuran shinanfaini. ⁵² Ascashu Jesús pushcosharacoinni. Diosin ahuan shinanpan shinanmasharamanaino mapo sharayacoin ini. Ascacun Apa Diosin ahuan shinansharaiquin yoini isca huaquin, —Uhuun facun Jesús fasi sharacoin. Un ahuan noicoinran, —ishon yoini. Yorafoan arifi Jesushuunoo nannorisi shinannifo.

Nan ato unu muran iquimamisi Juan tsoa istapamashon ani

Mt 3.1-12; Mr 1.1-8; Jn 1.19-28

3 Nantianri Tiberio Romanonfoan aton niaifocoin ini. Quince fari niaifoyoni. Nantifiton aton niaifocoin. Ascano rafu non rafuri niaifo patasharinoa nannori afu ipaonifo. Futsan ahuan anu Poncio Pilato nan Judea mai anoafoan aton niaifo. Galilea mai anoafoan aton niaifo Herodes ipaoni. Chipocu Felipe Iturea yafi Traconite anoafoan aton niaifo ipaoni. Abilinia anoafoan aton niaifo Lisania ipaoni. ²⁻³ Nantianri Anás yafi Caifás ahuan caifohuunshon Israelifo Dios cufimisi aton niaifo rafu ipaonifo. Ascaifono Juan tsoa istapamashon icamanoshon Diosin yononi. —Min caifo yoitahuun isca huaquin, “Maton chaca shatucahuun. Man chaca shinain cuscan afanan shinanyamacahuun. Diosin mato yoiaino cuscan nicacahuun. Man ascaiton Diosin mato chaca rau huashotiro. Ascacun un mato unu muran iquimacutiro maton chaca shatushon man ismanon.” Anori ato yoitahuun, —ishon Diosin Juan yononi. Ascacun Diosin yoini cuscan Juanpan unu Jordán cusumunshon ato yoiriani. ⁴ Nannori Juanhuunoo Isaiás inon pacoai cuscan yoisiton cunuquin isca huani,

“Tsoashta icamanoshon Diosin yononi cuscan oi ashcafinin yoiquin isca huanonpacoai, ‘Nocon Ifo nocoqui samamashta ooshqui. Ascacun itisharacahuun. ⁵ Un tsoa cuscaramaran iyamacahuun. Ascatarocon uncai ahua. Uhuun numamisi un yopacoinran,’ icahuun. Ahuara onushon afanan nasocahuun. Cayacafi isharashcaquin. Man ipaoni cuscan afanan ayamacahuun. Nantifi mato

chaca potacahuun nocon Ifo fusti tanasharashcaquin. ⁶Nan Diosin catoan nocon Numamisi oaiton nantifiton oinshquicaniran,”

ishon Isaías cununi.

⁷Ascano yorahuanrasi Juanqui funifo ato unu muran iquimapacunon. Ascashon ato yoiquin isca huani, —Manfin rono paupaton facu cuscaracoinfoquin. Icoinra huayamaifoan Diosin atoqui sinaqui amaquishon ato potano omitsiscapanacafo. Ascan manfin nanscarafuquin. Omitsiscapanacafo muran focasmafiacai maton chaca man shatupaima. ⁸Ascafia chaca shatucoincashon Diosin mato yoia cuscan nicacoincahuun. Man ipaoni cuscarifan afanan ayamacahuun. Man ascaiton yorafoan ointirofo afanan chaca huapaitama Dios fusti man tanasharaiton. Maton nomuran shinanquin isca huayamacahuun, “Nonfin Abraham funafo non ahuun caiforiquin iyamacahuun. Diosin Abraham yoiyotiani cuscan nocorifi ashotiro. Ascan Diosin noco onaintimashquimaran,” ishon anori shinaryamacahuun. Diosin onihuapaiquifin na unu cusumunnoa toquirifo Abraham ahuun funafo oni huatiroquin. ⁹Fana fimi sharayamaiton ifoan ahuun tapo nantifi ruratinin shatuquin cuyoshon chii muran potatiro coi futsunon. Nanscarifiai natianri Diosin man itishara chaca shatutama man isharayamacaiyaiton mato omitsiscamapacushquiran, —ishon Juanpan ato yoiaiton.

¹⁰Nicacaquin cumanifo, —¡Ohua! ¿Nonmun ahuuscaicain? —huaiton

¹¹Ascan Juanpan yoiquin isca huani, —Nan sahuuti rafuyaton futsa ahuuomacoincun inancahuun. Nanscarifi aquin nan tushuyaton a futsa tushuomacun inancahuun, —icaiton nicacani.

¹²Niaifo pui fishomisifori aqui fucashon yocanifo, —¿Tapimamisiton, nonmun ahuuscatiroquin unu muran iquimamushquin? —huaifoan.

¹³Ato cumani, —Afanan maton niaifoan yonoamati finonmafain pui fiyamacahuun, —huaiton.

¹⁴Ascaino atirifi ranushumuafanri yocanifo, —¿Ascan nonmun norifi ahuuscatiroquin? —huaifoan atori yoiquin isca huani, —Pui fianpaiquin ato asca huayamacahuun. Pofuyamacahuun. Man tapifiashon yora futsan ayamafiacun, “Nanto acarán,” ishon maton niaifo yoyamacahuun. Nan mato niaifoan mato inantisiya unimacahuun. Tsain chipuyamacahuun, —ishon ato yoini.

¹⁵Ascaiton nan Cristo manamisifoan Juan nicacani ato nomuranshon shinannifo, —Nanracafin Cristoquin. Nan Diosin catonni, —ishon shinannifo.

¹⁶Ascaifoan Juanpan ato cumani, —Uncai Cristoma. Unfin mato unu muran iquimapacuaquin. Ascan nantofin ahuun Yoshin Shara matoya rafumapacui oiquin. Ahuun shinansharapan maton nomuran shinanmanon. Ascashu matofu rafuano nantifi ahuara chacafo ahuunshon shatuashu a cuscara shara ishcaquin. Naanfin Diosin catoanquin. Nantofin ua fasi finoncoian. Ahuamamishti huatiro. Ahuashta chaca huayomisima. Uncai ascarama. Un ahuara shara huahuu rafanancai un ahuun oinmatima. Uhuun ramapaiyamainoricai un ahuun oinmati icuanama. ¹⁷Ascan natian man itishara a icoinra huafo yafi a nicacasmamisifo ato pashcanan huashquin. Ascashon nan icari nan icoinra huafosi ihuicoishquin afu isharapacunonfo. Asca nan nicacasmamisifo chii urumanhuan muran ato potai anoashu omitsiscaicai unupacunacafomaran, —ishon Juanpan ato yoini.

¹⁸Ascashon tsain futsafori ato yoiriani aton nomuran nanumapaiquin chaca shatunonfo. —Nocon Ifo Cristo nocoqui oi noco numashqui, —ishon ato yoini. ^{19–20}Ascashon Juanpan nan niaifo Herodes yoiqi isca huani, —Ushto ahuin fianfain ahuaara chacafori min huaran, —ishon yoini. Asca huaiton nicaquin Herodes Juan cunu muran iquimani. Ahuara chacafo huafiamisishaquin Juan iquimaquicaifin fasi chaca huaquin finacoinniquin.

Juanpan Jesús unu muran iquimani

Mt 3.13-17; Mr 1.9-11

^{21–22}Juan cunu muran iquiataima yorafo unu muran iquimapacuni nantianri Juanpan Jesusrifi unu muran iquimani. Asca huatan cainmainifoannaino Jesús Apa Dios cufini. Ascaino nai murannoashu ruhui cuscara Diospan Yoshin Shara nai ariashu aqui fotopacucahuani. Fotoaino nai murannoa oi nicani yoiquin isca huaiton, —Min uhuun Facucun fasi un mihuu noicoin. Un miqui unimacoinran, —ishon Apa Diosin yoini.

Jesucristo ahuun shunifo

Mt 1.1-17

²³Jesús treinta fariatian tau huaquin yorafo yosini. Ascano yorafoan shinancaquin Jesús José ahuun facuran, huafiafonocai ahuun facucoin inima.

José ahuun apa Elí ini.

²⁴Elí ahuun apa Matat.

Matat ahuun apa Leví.

Leví ahuun apa Melqui.

Melqui ahuun apa Jana.

Jana apa José.

²⁵José ahuun apa Matat.

Matat ahuun apa Amós.

Amós ahuun apa Nahúm.

Nahúm ahuun apa Esli.

Esli ahuun apa Nagai.

²⁶Nagai ahuun apa Maat.

Maat ahuun apa Matatías.

Matatías ahuun apa Semei.

Semei ahuun apa Josec.

Josec ahuun apa Judá.

²⁷Judá ahuun apa Joanán.

Joanán ahuun apa Resa.

Resa ahuun apa Zorobabel.

Zorobabel ahuun apa Salatiel.

Salatiel ahuun apa Neri.

²⁸Neri ahuun apa Melqui.

Melqui ahuun apa Adi.

Adi ahuun apa Cosam.

Cosam ahuun apa Elmadam.

Elmadam ahuun apa Er.

²⁹Er ahuun apa Josué.

Josué ahuun apa Eliezer.

Eliezer ahuun apa Jorim.

Jorim ahuun apa Matat.

³⁰Matat ahuun apa Leví.

Leví ahuun apa Simeón.

Simeón ahuun apa Judá.

Judá ahuun apa José.

José ahuun apa Jonam.

Jonam ahuun apa Eliaquim.

³¹Eliaquim ahuun apa Melea.

Melea ahuun apa Mena.

Mena ahuun apa Matata.

Matata ahuun apa Natán.

³²Natán ahuun apa David.

David ahuun apa Isaí.

Isaí ahuun apa Obed.

Obed ahuun apa Booz.

Booz ahuun apa Sala.

Sala ahuun apa Naasón.

³³Naasón ahuun apa Aminadab.

Aminadab ahuun apa Admin.

Admin ahuun apa Arni.

Arni ahuun apa Esrom.

Esrom ahuun apa Fares.

Fares ahuun apa Judá.

³⁴Judá ahuun apa Jacob.

Jacob ahuun apa Isaac.

Isaac ahuun apa Abraham.

Abraham ahuun apa Taré.

Taré ahuun apa Nacor.

³⁵Nacor ahuun apa Serug.

Serug ahuun apa Ragau.

Ragau ahuun apa Peleg.

Peleg ahuun apa Heber.

Heber ahuun apa Sala.

³⁶ Sala ahuun apa Cainán.

Cainán ahuun apa Arfaxad.

Arfaxad ahuun apa Sem.

Sem ahuun apa Noé.

Noé ahuun apa Lamec.

³⁷ Lamec ahuun apa Matusalén.

Matusalén ahuun apa Enoc.

Enoc ahuun apa Jared.

Jared ahuun apa Mahalaleel.

Mahalaleel ahuun apa Cainán.

³⁸ Cainán ahuun apa Enós.

Enós ahuun apa Set.

Set ahuun apa Adan.

Nan Adán ahuun apa Dios. Nan Adán

Diosin onihuani.

Yoshin chacanun Jesús chaca huamapaini

Mt 4.1-11; Mr 1.12-13

4 Ascano Jesús unu Jordán anoashu nasoni. Ascashon Diosin Yoshin Sharapan iquinaino tsoanshta icamano cani. ²Nannoashu cuarenta oshatan nannoshon Satanás nan yoshin chacapan chaca huamapaipaoni. Ascano nantianri ahuashta pia inima. Ascashu fasi fonicoinni.

³ Ascaiton Satanás yoini, —Min Diospan Facumainquin na toquirifo misi onihuahuu, —huaiton.

⁴ Jesús cumaquin, —Uhuun Upa Diosin tsainhuuoa cununi isca huaquin, “Noncai misi fustihuunoashu ipatiroma. Diosin noco yoiai cuscan nan fusti non fasi yopacoinran,” —ishon yoiaiton.

⁵ Satanás Jesús nai sumunmun iyoshon arishon manifoti ismariscatani. ⁶⁻⁷—Oinpon. Ua ifoafain mian yonoshonaitofin nan min oiainfo un mia inantiroquin. Ascashu nantifi manifoti sharashtacoinfoan aton niaifo min itiro. Nantifi na maifotifi uhuuna. Ascacufin

un tsoara inanpaiquin un inantiroquin ahuuna inon, —ishon yoiaiton.

⁸ Jesús cumani, —Ascafia Diosin tsainhuuoa cununi isca huaquin, “Maton Ifo Dios fustifin man ratoconun mai chachishotiroquin. Nan fustimain noco ifocun. Ascashon non yoitirori ‘Min uhuun Ifocun. Un mia fasi noicoinran,’ ishon non yoitiroran,” —huaiton.

⁹ Jerusalén ano Jesús iyoni. Nannoshon Dios fu tsainti pushu pumancaya cuyacoin iyoshon yoiquin isca huani, —Minmain Diospan facuquin nuriashu pacuaintahuun. Diosin tsain mihuuoa cunushoni cuscan aquin.

¹⁰ “Nantofin ahuun oinmatifo afu nai muran icafo yonoaino mia cushuiquin min ahuuscanonma.

¹¹ Min pacuaiton mia achicani. Min toquirifoqui pacui rutunonma. Ahuuscatama,”

nannorifi Diospan tsain cununiquin, —ishon Satanás yoiaiton.

¹² Afanan Jesús cumani, —Ascafia Diospan tsain cununiri isca huaquin, “Ahuara musunicoinquin shinyanyamahuu uatsi Diosin cushuiquin,” cununiran, —ishon Jesús yoini.

¹³ Jesús chaca huamapairiashu caaquin Satanás shinanni, —Un chipo afanan Jesús chaca huamayoshqiran, —ishon shinanni.

Jesús Galilea anoshon ato tapimaquin tau huani

Mt 4.12-17; Mr 1.14-15

¹⁴ Ascatan Jesús Galilea ano nasoni. Diosin Yoshin Sharapan a iquinaino ahuuoa nicanifo. Galilea ano icafoan nicaifoanno a chaima icafoanri nicanifo. ¹⁵ Israelifoan aton ichananti pushufo muranshon ato yosifoanfainaiton oincani fasi aqui unimacoinnifo, Ascashon, —Na nocofunun sharacoinran, —ishon yoinifo.

Jesús afanan Nazaret ano cani

Mt 13.53-58; Mr 6.1-6

¹⁶ Ascacaini cai nan pushconi Nazaret ano cani. Nannoashu Israelifoa aton tunutitian nan imisi cuscan ato ichananti pushu muran iquishon ninacahuan Diosin tsain Jesús ato yoini.

¹⁷ Nan Isaiás Diosin tsain yoimisiton cununi cuscan Jesús inainfoan fupoacufoan nan yoipaiyaino fuchitan ato yoiqui isca huani.

¹⁸ “Diospan Yoshin Shara ufu ishon ua catoan. Ascashon ua nichian un ahuuomafo tsain shara yoifain nan cunu muran iqui cafiscaafu un ato caimanon. Ascashon fushofori un caya huai oinsharanonfo. Omitsiscaifori un numai afanan omitsiscaatama isharanonfo. ¹⁹ A mia nicas-haraifo ato yoihuu isca huaquin, Nantian Upa Diosin unimayanan mato shara huafain mato numashquiran,” ua huaran ishon Isaiás cununi cuscan Jesús ato yoini.

²⁰ Ascashon ato Diosin tsain yoiqui anaititan ahuun libro fupoacufoan noco-funu futsa inantan tsaopacuhauani. Ascaiton nantifiton oinquin futsanifo.

²¹ Ascaiton ato yoiqui isca huani, — Na rama un mato yoiai cuscan uhu-unoa Isaiás cununi cuscacoin natian man aaran —ishon Jesús ato yoini.

²² Ascaiton nicacani mustairicatan yoinifo, —Ahuun tsain fasi sharacoin. ¿Nocofunu sharacoinfiashon ahuuscashon iscara tsain shara noco yoimun ahuamafiashon? Naanmun José ahuun facu, —ishon yoinifo.

²³ Ascaifoa Jesús ato yoini, —Noco shunifoa yoini cuscan marifi raca man ua yoiqui isca huapai, “Min caya huamitsamisimainqui min futsafo caya huaa cuscan mifiri caya huamuhuu,” ishon raca man ua yoipai. Ascashon man raca ua yoipai isca huaquin, “Man non nica

min Capernaum anoshon tsoan atiroma cuscan min ato huashoan. Ascan nuno min pushconi anoshori noco nanscarifi huashohuun,” ishon raca man ua yoipaiqui. ²⁴ Ascacun un mato icon yoi. Diosin tsain yoimisiton cainni anoshon tsoancai nicapaima. ²⁵ Un mato cayacafi yoi. Nocon shuni Elías niyopaonitian nocon mai Israeli ano ainfon funu amaqui naa funuomafo ichapa ini. Nantianri fari rafu non fusti nushmancayan oi funima. Ascano tushu yamacoin ipaoni. ²⁶ Ascafia Upa Diosicai noco shuni Elías nocon caifo funuomafo ano nichinima. Ascatamarocon Sarepta mai anoa funuomaqui nichini pimanon. Nan pushurasi Sidón chaimashta. ²⁷ Nan Israel anori yora ichapa isinincani cooyo cuscara tocoi futsuafiafocai nocon shuni Diosin tsain yoimisi Eliseocai nocon caifofu caya huatama. Nan Siria mai anoa fusticoi caya huani. Nancai Israeli inimaran, —ishon Jesús ato yoini. ²⁸ Ascano ato caifo caya huatama caifo futsa fusti caya huani nicacani fasi Jesusqui sinacoincaquin. ²⁹ Achicashon Nazaret pasoato iyonifo. Nanno mahua cuyacoin anoshon potapaicaquin. ³⁰ Ascafia potapaifiaquicai tsoan anima. Jesusrocon ato rahuin yocofaini atomaquinoashu caitocai tsoan puusanima.

Nannori nocofunu yoshin chaca ahuun nua icai ini

Mr 1.21-28

³¹ Ascashu Jesús Capernaum mai ano cani. Nan Capernaum Galilea muran ini. Nannoshon Israelifo tunutitian ato yoini. ³² Ascaiton nicacani, —Nicacapon. Ahuun tsain sharacoin. ¿Ahuuscashucon iscara tsain noco yoimun? Ahuun tsain niaifoa tsain cuscararan, —ishon yoinifo.

³³ Ascaino Judiofoan ichananti pushu muranshon nocofunu yoshin chacanun ahuun nuushon fiisimani. ³⁴ Asca

huatan nan yoshin chacanun Jesús yoini, —Minfin Jesús Nazaret anoquin. ¿Min noco fucash huai oamun? Noncai mi futan ahua huatiroma. ¿Omitsiscapanacafo muranri min noco potai oamun? Unfin mia onanquin. ¡Ohua! Noncai mia ahuusca huatiroma. Miamain Diosin catoancun, —ishon yoshin chacanun yoini.

³⁵ Ascaiton, —Tsainyamahuu. Nocofunumaquinoashu catahuun, —ishon yoshin chaca Jesús curushcain nichini. Asca huaiton nan yoshin chacapan nocofunu mipuafain potafaini amaquinoashu yoshin chaca cafiarquicai ahuusca huanima. ³⁶ Ascaiton oincani mustairicatan afi ranan yoinancaquin yoinifo, —Jesús fasi ahuamamishti huatiro. Iscaracai ahuashta non oinyomisima. ¿Ahuuscashomun ahuun tsainmansi curushcai yoshin chacafo atomaquinoa potaquin? —icashu yoinannifo. ³⁷ Ascatan nan Jesús aca cuscahuunoa yorafo yoifoanfainifo.

**Simón Pedronun ahuun raisi
yoshafo Jesús caya huani**

Mt 8.14-15; Mr 1.29-31

³⁸ Ascacaini Israelifoan ichananti pushu murannoashu cai Pedro pushu muran noconi. Nanno Pedro ahuun raisi yoshafo fasi yonai omitsiscacoinnaiton Jesús yoishonifo, —Na isinincal cayahuapun, —huaifoanno. ³⁹ Amanaoon ota catipacuhuan yoini, —Ahuun yona matsiriscahuun, —huaino samamashtacoin a yonai matsiriscatani. Ascano funinacahuan nan isinincama ointsa sharacain ato pimashquin pichacufaini.

**Isinincalifo ichapa Jesús ato
caya huamapacuni**

Mt 8.16-17; Mr 1.32-34

⁴⁰ Ascano man fari caino isinincal futsa futsatapafo yorafoan aqui ihuunifo

ato cayahuamapacunon. Ascacun ahuun mucuman ato ramanpacuaino cayai futsunifo. ⁴¹ Atirifi yoshin chacafo atohuun nuufafaina Jesús atomaquinoa potaino fiisifainfainquin yoinifo, —Minfin Diospan Facuquin, —ishon yoshin chacafoan Jesús yoinifo. Ascaiton Jesús curushcain ato asca huani, —Tsainyamacahuun. Uarifi anuyamacahuun, —ato huaino manmain tapiafoanfin a Diosin catonnicun.

**Ichananti pushu
muranshon Jesús ato yoini**

Mr 1.35-39

⁴² Ascashu shafacuaino Jesús Apa Dios cuficai tsoan istaipama ano cani. Ascacun yorafoan funaquin fuchicashon yoinifo, —Nocomaquinoashu afanan cayamapun. Nuno no fu ipun, —huaifoan. ⁴³ Jesús ato cumani, —Un nan pushurasi futsafo muranri uhuun Upa Diosin tsain shara un ato yoifoanfainon ua nichini. Ahuu cuscaramain uhuun Upa Diosin niaifoan ahuun yorafo iquinal cuscaracui. Un nanscanon ua nichini un ato tapimanon, —huani. ⁴⁴ Ascashon Judea maitio Israelifoan ichananti pushu muranshon ato Diosin tsain yoiriani.

**Jesushuunshon tsoan atiroma
cuscan shiman finifo**

Mt 4.18-22; Mr 1.16-20

5 Shafa futsaino Jesús ianmanhuan Genesaret cusumun ini. Ascaino yorahuanrasi aqui funifo. Diospan tsain nicai fucani. ² Nan chaimanoa shasho rafu rutica Jesús fuchini. Ifofoan aton nushuti chocaifono. ³ Ascatan nan futsa muran Jesús nanuinacahuani. Nan shasho Simonna ini. Ascashon nan yoini, —Ua onanshta shasho putsiquishohuun. Un anoshon ato yosinon, —ishon yoini. Ascatan

shasho cusha camaqui tsaoinacahuan ato yosini. ⁴Ato yoiquin anaititan Jesús Simón yoini, —Simón, noa ano focashon mato nushuti potacahuun shimanfo fiishcaquin, —huani.

⁵Ascaiton Simón cumani, —Tapimamisiton, non nushushifiaquicai shiman fustishta non fiishiamo. Non fasi yonoshina. Ascafia min noco yoi ai cuscan natian non huaicai, —ishon Simón yoini.

⁶Ascashon aton nushutininhuan pochinifo. Pochishon muafo shimanfoan nushutininhuan fospicoinshon fashnuqui rashquini. ⁷Ascaiton a shasho futsa murannofo atirifo cunaquin ato mushananni ato futan inamashcaquin. Ascaino furiscatan ato muran nanuinfoan rananfatan shasho muran nanunifo. Ascashon shimanrasi shashohuan rafu fospicoinni. Unu cufirisicoinni shashohuan rafu shimanfoya iqui cuani.

⁸⁻¹⁰Nan Simón Pedro futan nushumisi rafu Santiago yafi Juan Zebedeo facu rafu inifo. Nan rafu non fustifain nushumisicoinfo. Ascaiton ato futan nushumisi futsafoanri shasho rafu fospicoian oincani mustairicatan yoinifo. —¡Oincapon! ¿Ahuuscashomun shiman ichaparasi fiafoquin? —icashu atoqui yoinannifo. Ascaiton oin Pedronun shasho naquishon Jesús ratoconun mai chachishon yoini, —¡Ohua! Ifon ufin nocofunu chacaquin. Asca minfin sharacoquin. Chaca yafi sharacai ositiroma. Ascacun umaquinoashu catapun, —Pedronun huaiton. Jesús cumaquin, —Ratuyamahuu. Min shafatifi nushumisifiashon natian min uhuun Yoshin Sharahuunshon uqui yorafo ihuushqui ua icoinra huanonfo, —ishon Jesús Pedro yoini.

¹¹Nicacatan aton shasho rafu cusunun corafainnifo. Ascashon nantifi

aton ahuarafoya ato yorafori potafaini Jesús fu fonifo.

Nocofunu yoratisho rashquishi futsua Jesús caya huani

Mt 8.1-4; Mr 1.40-45

¹²Shafa futsaino Jesús pushurasi ano ini. Nannoshon nocofunu ahuun yoratishton ranimamishti rashquishi futsua-ton cahuanquin Jesús fuchitan fuopacacahuan yoini, —Ifon, ua caya huapaiquin mian caya huatiroquin, —huaiton.

¹³Jesús aqui mupishon yoini, —Icon un mia caya huapai. Asca natianfin min cayaicain, —huaino. A rashquishi futsua cayariscatani. ¹⁴Cayacun Jesús yoini isca huaquin, —Un mia cayahua cuscan tsoa yoiyamahuu. Noco caifo ahuunshon Dios cufimisi ismatahuun. Ascashon Moisés noco yononi cuscan chashoanun facu a inantahuun mia rutushonon. Min chaca soafain min caya cuscan ato ismashquin. Ascano tapitirofo Moisés noco yononi cuscan min aiton, —ishon Jesús yoini.

¹⁵Asca huafiaino ahuunna nantifi yoifoanfaini. Ascaiton nicacanashu Jesusqui funifo ato caya huamapacunon.

¹⁶Ascacaini cashon tsoan icamanoshon Apa Dios cufin capaoni.

Nocofunu afi cayamacai ahuari afi huatiroma Jesús caya huani

Mt 9.1-8; Mr 2.1-12

¹⁷Shafa futsaino Jesús ato yosini Fariseofo yafi Moisés yononi cuscan tapimamisifori nanno tsaocunifo. Ascaino pushurasiti Galilea anofo yafi Judea mai anofo non Jerusalén anoashuri aqui funifo. Diosin curushhuunshon Jesús isinincaifo nannoshon ato caya huapacuni. ¹⁸⁻¹⁹Ascaino nocofunu afi raqui cayamacai afiri ahua huatiroma ahuun yorafoan Jesús shinanmaqui shuhua

naratashon iquimapaifiafo yorahunrasi fospicoian ini. Ascano foman caya ina cashon tapa tsucashon Jesús nia naman yora huanrasi nastui shuhua ya ratapacuoannifo. ²⁰ Ascaiton Jesús oian ahuun yorafoan fasi icoinra huaifoan oinquin Jesús a isinincai yoiquin isca huani, —Uhuun yorashtan, natian mun mia chaca soashona, —huaiton.

²¹ Nicacani Fariseofo yafi Moisés yononi cuscan tapimamisifoan yoinifo, —¡Ajaa! ¿Na nocofunumun tsoaquin? Fasi Dios chaca huai. Natocai chaca soatiroma. Diosin fustitofin chaca soatiroquin. Ascan naton noco parapai. “Un Diosiran” noco huamapai, —ishon aton nomuranshon shinanchacanifo.

²² Ascaifoan onanshon Jesús ato yoiquin isca huani, —¿Ahuuscaquimun mato nomuranshon man amaqiri shinanchacaiquin? ²³⁻²⁴ Unfin Cristoquin yorafoan aton chaca un soashotiro. ¿Ascan ahuuscacaimun un huaicai? Un chaca soashoyamaraquimun un caya huaiquin. Ascacun un mato ismai Upa Diosin ua catoan. Ahuunshofin un chaca soafain yorafo un caya huacointiroquin, —ishon ato yoini. Ascatan a nocofunu afi raqui cayamacai afiri ahua huatiroma yoini, —Min pushu ano min shuhua ya funicaitahuun, —ishon Jesús yoiaino.

²⁵ Funinaca huantan ahuun shuhua papifaiquin yoifoni, —¡Aicho! Min ua caya huaa sharaquin. Fasi Dios sharaquin, —huani. ²⁶ Ascaiton oincani nantifi mustairicatan yoiquin isca huanifo, —Dios tsoa cuscarama. Fasi sharacoin. Non oinyomisima cuscara non oianran, —ishon yoinifo.

Jesús Leví cunani

Mt 9.9-13; Mr 2.13-17

²⁷ Nanscacaini caaquin Jesús oian Roma anoa niaifo pui fishomisi tsoa ini. Nan nocofunumun ahuun anu Leví.

Ascaiton Jesús yoini, —U fu cahuun, —huaino. ²⁸ Funina cahuatan nantifi potafaini afu cani. ²⁹ Ascashu afu cai ahuun pushu ano nocoquin Leví Jesús yoini, —Nuno uhuun pushu muran iqui ohuu. Uhuun yorafo yoimanashu un ato futan mia fuusishonon, —huani. Ascaino yorahunrasi aqui funifo. Roma anoa niaifo pui fishomisifo yafi futsaforifi aqui funifo ato futan pishcaquin. ³⁰ Ascaifoan Fariseofo futan Moisés yononi cuscan tapimamisifoan Jesús fu rafumisifo yoini, —¿Ahuuscain man pui fiimisifo yafi yora chacafo futan man piiyain? —ato huanifo. ³¹ Ascaifoan nicaquin Jesús ato cumani, —A isinincaifomacai caya huamitsamisi yopacanima. Asca nan isinincaifofin fasi caya huamamitsamisi yopacaniquin. ³² Nanscarifi aquin, “Uncai ahua chaca huamisimaran,” icaifocai un ato chaca soashotiro. Asca tsoan yoiqui isca huai, “Unfin fasi chaca huamisiquin. Un Numamisi yopacoiran,” icaifofin un ato chaca soashotiroquin, —ishon Jesús ato huani.

Piqui tunuaihuunoa

Mt 9.14-17; Mr 2.18-22

³³ Ascaiton futsan Jesús yocani, —¿Ahuuscain mifu rafuafoan piqui tunumisimamun? Juan fu rafumisifoan piqui tunufain Dios cufimisifo. Nanscarifi Fariseofo yafi afu fomisifoan huamisifo. Ascan manfin pifain ayafain huamisiquin, —huaifoan.

³⁴ Ato cumani, —Nocofunu fu ainfo fianainnorica unimai fusicaquin tsoan piqui tunutiroma. Nanno funu anocai ato chani huaifoan piqui tunutirofoma unimamain acaquin. ³⁵ Ascafiaino funu amaqi rutuafono shinancaquin piqui tunutiroforan, —ishon Jesús ato yoini.

³⁶ Ascashon afanan Jesús ato yoiquin isca huani, —Tsoancai sahuuti shuni fashnucun poto funapan icushtiroma. Asca huashon poto funapan icushuano

ustui futsuashu chacanai finatiro. Aquirifi sahuuti shuni anaitirisatiro. Afanancai funa cuscara itiroma. Nanscarifiai un mato yosiai cuscan nicacoinshocai man apaoni cuscan afanan man huatiroma. Tsoan ua tanacoinshon ipaoni cuscan cachiquiri huacointiro. Ascashu funa cuscara shara iishquin. ³⁷Ascashon tsoancai fichi tutso shuni muran vino funa nanutiroma. Fichi tutso toshacainaino vino funa cuyofoi chacanai futsutiro. Nanscarifiai maton shunifoan mato yosimisi cuscan yafi un mato yoiyai cuscacai nan rafu ositiroma. Un mato yosiain cuscacoin nannori Diospan tsain shara. Ascafia mato shunifoan mato yosimisifo cuscacai anorima. Nan tanashuca man isharatiroma. Nan rafu osishon nicapaiquicai man shinansharatiroma. ³⁸Ascacun vino funa fichi tutso funa muranri nanua sharacoin itiro. Nanscarifiai ratoranfoan ipaonifo cuscan unucatan un ato yosiain nan fusti tanashu isharacointirofo. ³⁹Tsoan puti pau ayatiashocai afanan fata ayapaitiroma. Nanscarifi aquin yorafoan yoiqui isca huatirofo, “Un ipaoni cuscan un afanan apai. Uhuun shunifoan ua yosia cuscan shara. Nan fusti un tanapai. Ascacun tsain futsan un yopaimaran,” —ishon shinantirofo.

Jesús fu rafumisifoan trigo mutusnifo

Mt 12.1-8; Mr 2.23-28

6 Ascatan Israelifoan tunutitian Jesús yafi afu rafuafu mau mapai fo-caquin trigo mutuscashon rashoquiri ashon piyaifoan. ²Oinquin Fariseofoan ato yoinifo —¿Ahuuscai Moisés noco yononi cuscan tunutitian trigo man mutusimun? —ato huaifoan.

³Nicaquin Jesús ato cumaquin isca huani, —¿Davidhuunoa cununi cuscan man man oinmisimun? ¿Fonainquin nocon shuni David ahuun yorafo futan ani

cuscan man man nicamisimun? ⁴Dios fu tsainti pushu iquicaishon a muran-
noa misifo ato piquini fasi fonicoinquin. Ano tushu futsa yamaino. A misifofin nan Diosin tsain yoimisifo naasi iniquin. Tsoa futsacai a misi pitiro inima. Nannori yoifianifo fasi fonicoinquin David pini. Ascashon afu rafuafori pimani. ⁵Ascun uafin uhuun Upa Diosin caton-
niquin. Ascacun urusu fusti un yoitiro ahuamain tunutitian man huatiroquin, —ishon Jesús ato yoini.

Nocofunun mucu musufimua

Mt 12.9-14; Mr 3.1-6

⁶Ascatan tunuti futsaino Jesús Israeli-foan aton ichananti pushu muran iquini. Nanno iquishon ato yosiaino nantianri nocofunun ahuun mucu mumiori musufimuatun arifi nicani. ⁷Ascaino Fariseofo futan Moisés cunu tapimamisifoanri nannoshon oincaquin shinannifo, —Non tapinon Jesusmain tunutitian nocofunu caya huai iyamarai Moisés noco yononi cuscacoinmain aquin, —ishon Jesushu-
unua shinannifo. Ato niaifofoqui chani-
paicaquin. ⁸Ascashon a shinainfo cus-
can onanshon Jesús a nocofunun musu-
fimua yoini, —Funinaca huahuun. Mia
oinonfo, —ishon yoiaino nan yoiyai cus-
cacoan ani.

⁹Asciton Jesús ato yoini, —Un mato yocain. ¿Moisés yononi cuscan tunuti-
tian non shara huatiro iyamarai non
chaca huatiromun? ¿Ascayamarai non
futsafo nimatiro iyamarai non namatiro-
mun? —ishon ato yoini.

¹⁰Ascashon ato oiancutan a nocofunu
musufimua yoini, —Mushahuun,
—huaino. Nan yoia cuscan huatanaiton
oianfo ahuun mucu muma sharacoin
ini. ¹¹Asciton oincani Fariseofo yafi
Moisés cunu tapimamisifo fasi aqu
sinacoincaquin yoinifo —¿Nonmun
ahuuscashon Jesús shatumatiroquin

afanan isca huanonma? —icashu ahuun yoinannifo.

**Jesús doce nocofunufu
catonni afu rafunonfo**

Mt 10.1-4; Mr 3.13-19

¹² Shafa futsaino Jesús machi ano mapuni Apa Dios cufishquin. Ascano nanoshon yamutishon apa cufishini. ¹³ Ascashu iyoconaino a tanamisifo yoini, —Uqui fucahuun, —ato huaino aqui fuafoan doce ato catonni afu rafunonfo. ¹⁴ Nan docefain ato anufo. Futsa Simonfiacun Jesús ahuun anu tuquihuashoqui, Pedroran, huani. Nanton chipocu Andrés. Futsafoan ato anu Santiago non Juan non Felipe non Bartolomé non ¹⁵ Mateo non Tomás non Santiago Alfeopan facu Simón futsari nanton ahuun caifo futsafo futan Romanonfo potapai afanan Israelifo yonononfoma. ¹⁶ Futsan ahuun anuri Judas, Santiago ahuun facu. Futsarifi Judas Iscariote nanton Jesús potashon ato achimani. Nanfosi Jesús ato catonni.

Jesús yora ichapaforasi tapimani

Mt 4.23-25

¹⁷ Machi tununman fotoaino aqui yorahuanrasi funifo. Ascaino a tanamisifo yafi Judea anoafo atirifi fuaino Jerusalén anoafori fuaino ianmanhuan cusumunna Sidón yafi Tiro pushurasi anoafori funifo. ¹⁸ Ahuun tsain nicashcaquin fuafoan atirifi a isinincaifo ato cayahuafain a yoshin chacapan ato fucash huaifori Jesús atomaquinoa potapacuni. ¹⁹ Ascashon nan isinincaifo futan nan yoshin chaca atohuun nuafoan shinannifo, —Non ahuunoashu cayanonmun Jesús noco ramanmapainon, —ishon shinannifo. Nanfoan tapinifo Diosin ahuun curushhuunshon Jesús ato caya huapacua.

**Tsoa unimatirofo yafi
unimatirofoma Jesús ato yosini**

Mt 5.1-12

²⁰ Ascatan Jesús afu rafumisifo oinquin ato yoini isca huaquin, —Man ahuuomafiashu chipo Dios niaifo icari matonari iishquin.

Ascacun ahuuomafiashu unimacahuun.

²¹ Man natian Dios fu rafupaicain ahuun tsainri man tapipaiquin finai a cuscara shara iishcaquin.

Man ascafia Diosin chipo mato imasharai a cuscaracoin man inon.

Natianri man uaifiashu chipo man shuchitiro.

Ascacun unimacahuun.

²²⁻²³ Futsafoan uhuunshon mato noicasmaquin mato potafain mato roafain matohuunna tsain chaca yoicani.

Nanscarifi nan Diosin tsain yoimisifo mato shunifo omitsisca huapaonifo.

Ascan matori omitsisca huafiaifoanno chipo man Upa Diosqui nocoaitian fasi sharacoin mato inanshquin man afu ipanon.

Ascacun unimacoincahuun, —huani.

²⁴ Ascacun futsafo Jesús yoiqui isca huani,

—¡Ohua! Manfin natian mafo ichapayashu unimaicain.

Ascafia naashu man chipo omitsiscapanaca. Mancai afanan unimanacama.

²⁵ ¡Ohua! Natian man shinanquin isca huaa, “Un ahuaa yopaima. Un ica cuscan shara. Uncai ahua futsa shinanpaimaran,” ishon man shinan.

Ascafia ohua. Man chipo mato nomuran shinansharapaiashu man omitsiscapanaca.

Man fasi numamisi yopapacunaca. Natian man shuchisharai. Dios shinantama. Ascafiashu chipo uaiqui man omitsiscapanaca.

²⁶Nantifi yorafoan mato yoiqui isca huacani, “Na nocofunu fasi ishara. Ahuacai yopaimaran,” ishon matohuunoa yoiabo. Ascafia ¡Ohua! Nanscarifi aquin Diosin tsain yoifiaquin afi shinainfo cuscan yoimisifo. Nanfo mato shunifoan nannori atohuunoa yoipaonifo. Ascan manfin atofu omitsiscapanacaquin, —ishon Jesús ato yoini.

**Mato noicasmafiaifoan
atohuun noicahuun**

Mt 5.38-48; 7.12

²⁷—Ascan nan man ua nicaifo un mato yoi. Mato noicasmaifo atohuun noicoicahuun. Tsoan mato noicasmái ato shara huacahuun. ²⁸Tsoan mato chaca huai copitama rau huafain ato yoisharacahuun. Tsoan mato roafia-cun ato Dios cufishocahuun. ²⁹Tsoan mato tapasíai ato copitamarocon nanno nishohuun mato ocuma futsari afiaiton tunucahuun. Futsan mato niaifo ano iy-ocun mato sahuuti mato fiainton mato sahuuti custopari inancahuun. ³⁰Tsoan-ran mato ahua yocaiton ayashon ato inancahuun. Futsan mato ahua fiano shinanchacayamacahuun matori nasoyamafiaino. ³¹Man futsafo shara huamapaiyai cuscan marifi futsaforifi shara huashocahuun.

³²A matohuun noiaifosi copiquirifi man atohuun noiaínocai acái ahua. Yora chacafori nanscarifiaifoanno. Man ascainocai Diosin mato yoima, “Man shara huaran,” ishon. ³³A mato shara huafosi copiquirifi man ato shara huaino acái ahua. Yora chacafori nanscarifiaifoanno. Man ascainocai Diosin mato yoima, “Man shara huaran,” ishon. ³⁴Ascashon man yora ahua inanyopaiquin shinanqui isca huai. “Un inanyocun ua nasotiro. Ascan nanscara yorafo fusti un inanyotiroran,” ishon man shinain. Acái ahua. Yora

chacafoanri nannorifi shinantirofo cuscan. Marifi man anori shinainnocai Diosin mato yoima, “Man shara huaran,” ishon.

³⁵Ascacun un mato yoi. Mato noicas-maifo atohuun noicaquin ato shara huacahuun. “Ato ahua inanyoshon ua nasoimaran,” ishon shinanchacayamacahuun. Mato nasoyamafia, “Nanscanon-ran,” ishon yoicahuun. Man ascacoin-nashu Upa Dios ari man nocoaiton matoqui unimaqui ahua fasi shara-coin mato inanshquin. Diosi nai mu-ran isharacontsia. Diosin nantifi yorafo shara huaa. Tsoan “¡Aicho! Upa Diosin,” huayamafiaifoan nanfohuunri fasi noi. Yora chacafohuuri noi. Marifi nanscarifi aquin man futsafo ismatiro man Diospan facufo. ³⁶Maton Upa Diosin nantifi-huun ramapaia cuscan marifi nanscarifi acahuun.

**Futsafohuunoa
shinanchacayamacahuun**

Mt 7.1-5

³⁷Futsafohuunoa shinanchacacacuí fut-safori yoyamacahuun. Man futsafohu-unoa yoisharayamaino Diosiricai ma-tohuunoa yoisharashquima. Ascashon yoiquin isca huayamacahuun, “Nanton chaca huaa. Ascacun Diosin iconquin onaintimairan,” ishon yoyamacahuun. Nan onaintimainonran, ishon man futsahuunoa shinanyamaino Diosiricai mato onaintimaima. Man futsafo rau huacuri Diosirifi mato rau huashquin. ³⁸Ascacun yorafo shara huacahuun. Man yorafo shara huacun Diosin ma-torifi shara huai. Ascacun futsafo inan-sharacuí finacoincahuun. Matsiquima-coinquin. Maniriqui futsunon. Man fut-safo asca huacun Diosin arifi mato nan-scacoin huaashquin, —Jesús huani.

³⁹Jesús ahua-rafo yoiái cuscarahu-unshon ato yosini, —Fushocai afu fusho raquí iyotiro. Iyopai afu

shato muran pacutiro. Nanscarifi aqui futsan Diosin tsain tapishomacai mato tapimatiroma. Matofu afiri funotiro. Mato amaquri yoitirofoquin.⁴⁰ Ahuunshon tapiainfoancai tapimamisiton tapian cuscan tapiafoma. Asafia nan ahuunshon tapiainfoan chipo tapiaino nan tapimamisi cuscara itirofo.

⁴¹¿Ascan ahuuscai yora ahuara pasnanshta fuostamua man futsupaiyain marifi sapa uhuapa fuostamufiashon? Ascashon min chaca huairan futsa huafiaquin mancafin fasi finacaiquin.⁴² Ascashon man yoiqui isca huai, “Uhuun yorashtan, un min furo murannoa ahuara pasnanshta un mia futsunon,” man huamisi. Ascafiafocai man tapiama man sapa fuostamufafainna. Man fuparamitsapaimisi. Ascacun sapa futsucumuuhun. Asca huashon oinsharafain marifi man futsa pasnanshta futsutiro. Nanscarifi aquin futsafoan ato chaca shatumpaiiaquin marifi man chaca hua. Man fasi paran. Ascacun iquisi mato chaca shatucahuun. Ascashon marifi man futsafo chaca shatumatiro.

Ihui ahuun fimihuunshon non onantiro

Mt 7.17-20; 12.34-35

⁴³Ihui sharafoan ahuun fimicai chaca itiroma. Ihui chacafoan ahuun fimicai shara itiroma.⁴⁴ Ascano ihuifoti ahuun fimifohuunshon non onantiro ahuu cuscarafoamainquin. Ihui moshayafohuunoacai shopa foaicun non tuscutiroma. Nanhuafaquisihuunricai uva foaicun non tuscutiroma.⁴⁵ Nanscarifiai nocofunun sharapan ahuun nomuranshon ahuara sharafosi shinain cuscan ahuun tsainrifi sharacoin itiro. Nanscarifiai nocofunun chacapan ahuun nomuranshon ahuara chacafosi shinain cuscan ahuun tsainri chacacoin

itiro. Ascashon nocon ointi muranshon non shinain cuscan nannoricoin non yoitiro.

Futsan pushu mutsisipa huaino futsan pushu mutsisipama huatiro

Mt 7.24-27

⁴⁶¿Ahuuscai Ifo ua huafiamisishaquin un mato yoia cuscan man aimamun?⁴⁷ Ascacun un mato yoi ahuu cuscara-main tsoan ua nicasharashu nan un yoia cuscacoin aaiquin.⁴⁸ Tsoan pushu huaquin ahuun quishi nichishquin iquisi mai puhuuqui mai tuiqui noco. Ascashon pushu anaitiano ananmanri unu foanfiaquicai pacutiroma. Fasi pushu mutsisipacoin. Nanscarifiai nan uhuun tsain nicacoiانو nan un yoia cuscacoin acani. Ascashu ahuara ahuuscarafiainocai umaqui itirofoma.

⁴⁹Ascan un yoi ai cuscan nicafiashu tsoa ascaima ahuuscamain acanicain un mato yoi. Yoran pushu huaqui ahuun quishi nichifiaquin mai puhuuqui tuiqui nocoama. Fuquinishtacoin hua. Ascashon pushu anaitiano ananmanri unu fai foanquin pushu paoanquin chacana huatiro. Nanscarifiai tsoan uhuun tsain nicafiai ascashuma ahuun unutani nantifi funocani. Omitsiscashcaniran, —ishon Jesús ato yoini.

Romano ranushumua niaifohan ahuun oinmati Jesús caya huani

Mt 8.5-13

7 Yorafo yoiquin anaititan Jesús Capernaum ano cani.² Nannoa ranushumua niaifohan ahuun oinmati nan ahuun noicoian fasi isininqui finacoin ini.³ Ascacun Jesús ahumamishti huatiro nicaquin ranushumua niaifohan shinanquin isca huani, —Uncai Israelima. Ascacun un niaifofo ato yoi ua Jesús yoishonafoshoon uhuun oinmati ua caya huashoyoi onon, —ishon shinanni.⁴⁻⁵ Ascano ato

yonoa focani Jesusqui nocoshon yoinifo isca huaquin, —Ranushumua niaifoan noco yonoa non mia yoi onon. Nan nocofunu shara. Nocon caifohuuri fasi noimisi. Nanton nocon ichananti pushu huamashona. Noco shara huashomisi. Ascacun mirifi asharashoicapun ahuun oinmati caya huashoshquin, —ishon Israeli niaifofoan yoinifo.

⁶⁻⁷ Ascano Jesús atofu cani. Ranushumua niaifoan ahuun pushu chaimashta man fuaifoan afanan ahuun yorahuafo Jesusqui nichini yoiqui isca huanonfo, —Ifon, un mia fucash huapaima. Un cai ahuama. Min nocofunu tsoa cuscaramacoin. Uhuun pushu ari capaiyamaquin. Min tsainmansi uhuun oinmati ua caya huashohuun. ⁸ Ascun uafin uhuun niaifoan ua yonomisiquin. Urifi ranushumuafo un yonotiro. Unmain ato yonoainofin un futsa, “Catahuun,” huaino cariscatiro. Un futsa, “Ohuu,” huaino uqui oriscatiro. Uhuun oinmatiri, “Ua ashoriscahuun,” un huacun ua ashoriscatiro. Asca minfin ahuamamishti huatiroquin. Ascacun min tsainmansi yoihuu uhuun oinmati cayanon, —ishon yoini.

⁹ Ascaiton nicaquin Jesús a mufaina yorafo yoiqui isca huani, —¡Aira! ¡Nica-capon! Tsoa futsacai naton acai cuscan ua icoinra huacoinmisima. Israeli anofoanricai ua isca huaqui icoinra huacoinmisifoma, —ishon Jesús ato yoini. ¹⁰ Ascano a ranushumua niaifoan ato nichiafo Jesús tsainqui anaitiano afanan naso furan oianfo ahuun oinmati man cayasharacoian ini.

Ainfomaqui ahuun funu naa ahuun facu man naafiacun Jesús funini

¹¹ Ascano chipo shafa futsa Jesús pushurasi Naín ano caino afu rafuafo yafi yorahuanrasi afu fonifo. ¹² Ascashu Naín ano nocoti chaima oian pushcohuai naa mai huai focani ahua fu yora

ichapa fonifo. Nan pushcohuai ahuan ahuun facu fusticoin. Nan ahuanmaqui funu naani ini. ¹³ Ascashu uaicaiton oin Jesús ahuun ramapaicoinquin yoini, —Uaiyamahuu, —huani. ¹⁴ Asca huatan pushcohuai ahuun ihuaifo aqi racati muuainno nitunifo. Ascaiton Jesús yoini, —Pushcoshtan. Un mia yoi. Funihuu, —huaino. ¹⁵ Pushcohuai tsaoinacahuan tsainni. Ascaiton ahuun ahua Jesús yoini, —Naquian. Min facu afanan man nia. Iyosharatahuun, —huani.

¹⁶ Ascaiton oincani yorafo fasi ratu-coinnifo. Ratu nishmapacuquin Dios yoisharaqui isca huanifo, —Diosin tsain yoimisi noco muran Diosin nichian. Diosin ahuun yorafo ashoin oaran, —ishon yoinifo. ¹⁷ Ascashon nan Jesús aca cuscan yoifoanfainfo. Judea anoafu futan mai futsa ariafon ahuun nicaquin futsanifo.

Nan yorafo unu muran iquimamupacuni Juanpan afu rafuafo Jesusqui nichini

Mt 11.2-19

¹⁸⁻¹⁹ Juanpan tanamisifoan Jesús ahuafo huaiton oianfo cuscan Juan yoi focani cunu muran iquinifo. Ascaiton nicaquin Juanpan a tanamisifo rafu yoini, —Nanmain Diosin catonniquin ointacahuun. Ascashon yocaquin isca huatacahuun, “Nan miamun Diosin catonni nocoqui nichishquin. Ascayamarai futsa raca non manaicai noco Numamisi inon,” ishon ua yocashotacahuun, —Juanpan ato huani.

²⁰ Ascano nan rafutan focashon Jesús yoinifo, —Nan yora unu muran iquimamisi Juanpan noco nichian non mia yocayonon. Ascacun non mia yocai. Nan miamun Diosin catonni nocoqui nichishquin. Ascayamarai futsaraca non manaicain nocon Numamisi inon, —ishon yocanifo. ²¹ Ascaino nantianri

Jesús nan isininqui omitsiscaifo caya huafain yoshin chacafo atohuun nuuafoto atomaquinao potafain fushoforifi oinmasharapacuni.

²² Ascashon nan Juanpan ato nichian rafu Jesús yoini, —Un acaiton man oian cuscan uhuunoa man nicai cuscan Juan yoitacahuun. Ascashon fushofo un caya huua oinsharaifo cuscan yoifain pastocoinfori un caya huua nicasharanonfo nanrifi yoifain ato yoratisho coyo cuscara tocoi futsuafori caya huafain yora nipaiqui ranainfori un ato caya huua yoifain man nacoinnafori un ato funimana. Ascashon yora ahuuomafori tsain shara un ato yoifafainmisi ahuuscashu-main Diosin niaifo fu ipatirofoquin, ishon un ato yoimisi. ²³ Ascan nanfo un mato yoiai cuscan Juan yoitacahuun tsoan ua iconra huacoinshocai afanan ahuara futsa shinainma. Nan cuscara yorafofin fasi unimacointirofoquin, —ishon Jesús ato yoini.

²⁴ Ascatan man foafoanno Juanhuunoa Jesús nanno niafo yora huarasi yoini, —¿Ahuuscai istaipama ano Juan oin focani fonifomun? Juancai nan facatahua pui ninhuun focu focu acai cuscarama. Nanscarifiai man man tapia Juancai ointi rananyama. ²⁵ ¿Ascan ahuuscai Juan oinpai man fonimun? It-sairaca nan nocofunun sahuuti shara-capacoin sahuucun oincai man foni. Ma. Juanpacai sahuuti shara sahumisima. Niaifofoanfin ato pushu muranshon sahuuti sharacapacoin sahuutirofoquin. ²⁶ Nan Diosin tsain yoimisiraca oincai man foni. Ascafia nan icon Juanpan Diosin tsain yoimisifia nanton yoimisi cuscaai tsoa futsan anori yoimisima.

²⁷ Ascacun nanhuunoa Diosin tsain cununi isca huaquin, “Min nai ariashu mai ano fotoataima iquisi uhuun tsain yoimisi nichiqui tau huai mihuunoa ato yoiaino itisharashon mia nicanonfo,” is-

hon cununi. ²⁸ Un mato icon yoi. Tsoash-tacai Juan finoanma. Ascashon Juanpan tsain yoimisi cuscaricai tsoan as-cara tsain yoiyomisima. Ascafia Dios niaifo icanoafoan yoisharatirofo cuscaai Juanpan nicayamafain nanfoan oianfo cuscaricai oinyomisima. Ascashon nan-tifi Dios icanoafoan Juan finoanfo, —ishon Jesús yoini.

²⁹ Ascashon nan Jesús nicaifo futan Roma anoa niaifo pui fishomisiko Juanpan ato unu muran iquimapacuni aton chaca shatunonfo. Ascano nanfoan Jesús yoiaiton nicaquin yoinifo, —Jesús noco cayacaficoin yoi. Diosin noco yonoo cuscan nan iconran, —ishon yoinifo. ³⁰ Asca huafiaifoan Fariseofo futan Moisés cununi cuscan tapimamisifoancai Diosin ato amapaiyai cuscan nicapainifoma. Ascasho nanfoanri yoinifo, —Juanpan noco yoiai cuscaai anorima. Nocoricai unu muran iquimatiromaran, —ishon yoinifo.

³¹ —Ascashon afanan un mato tapimai. Natian niyoafo ahuu cuscarafoquin. ³² Nanfofin nan facu cashumisi cuscarafoquin. Facufo cashucaquin afu facu futsafo oi ashcafinin cunatirofo. Nanscarifiai nanfofin nanscarafoquin. Ascan nan facu cashumisifoan yoitirofo isca huaquin, “Man non shainti manufiainocai monopaicanimaran,” ishon yoifain “fanainca omitsiscati cuscara non fanaifiainocai man uaipaimaran,” ishon nan facu cashumisifoan yoitirofo.

³³⁻³⁴ Nanscarifi aqui nanfoanrifi Juan yafi uqui tsain chiptufafainmisi. Ascafia Juanpacai piqui tunufain fimi unu pau ayamisima. Ascacun ahuunoa yoiqui isca huamisifo, “Juan nisocoin. Yoshin chaca ahuun nuaran,” ishon yoimisifo. Asca unfin piisharafain un ayasharamisiquin. Ascafia uhuunoori yoiqui isca huamisifo,

“¡Cuu! Jesús pitsicoin fasi ichapari ayatironan huafain Roma anoa niaifo puifishomisifo yafi yora chacafo furi rafuiran,” ishon uhuunoa chaca yoimisi. ³⁵ Nanscarifi aquin nanfoanri yoiqui isca huamisifo, “Tsoanmain shinansharafain icaquin non onantiro. Nan yorafin isharacoianquin shinansharamain huaifin,” ishon nanori yoimisifo. Nannori yofiaquicai uhuunoa ascara yoipaimisifoma. Ascatarocon uqui tsain chaca fusti huamisiforan, —ishon Jesús ato yoini.

Jesús Simón pushu muran iquini nan Simón Fariseo ini

³⁶ Ascano Fariseo futsan Jesús yoini, —Tapimamisiton, uhuun pushu ano cahuun un mia pimanon, —huani. Ascaino ahuun pushu ano cashon a futan pini. ³⁷ Nan pushurasi anori ainfo furo-macoin ica ini. Ascashon Fariseo pushu muranshon Jesús piaiton nicai arifi nan pushu muran iqui caini. ³⁸ Ininti motica tsomashu Jesús cachiori nitishoni. Nan moticanun ahuun anu alabastro a muran ahuun ininti fasi paratamacoin ahuun pui nua ini. Ascatan amanaon niashu uaiqui ahuun fuonpan Jesús tau muchana huani. Ascashon ahuun foo chainipaton otucuruacuí shara huatan ahuun tau tsoatan ininti ahuun tauqui ocani.

³⁹ Asca huaiton nan Fariseo Jesús pimaiton shinanquin isca huani, —Na nocofunu Diosin tsain yoimiscoinshon na ainfoan muai cuscan onancuana na ainfomain ahuu cuscaracuin, —ishon ahuun nomuran shinanni.

⁴⁰ Ascaiton onanshon Jesús Fariseo yoini, —Simón, un mia ahuara futsa yoiran, —huaiton. Simón cumani, —Tapimamisiton, ua yoihuu, —huani.

⁴¹ Ascaiton Jesús yoini. —Ato pui inanyomisiton nocofunu rafu pui inancun nan rafutan ahuun rafanan nifinifo.

Futsan quinientos denario nifiaino futsan ichapama nifini cincuenta denario. ⁴² Ascafia nan rafutan nan nifian cuscan nasopaifiacai tsoa puiya inima. Ascacun nan ato pui inanyomisiton ato yoisharani afanan tsoan a nifinonma. Ascan nan rato futsacaimun fasi ahuun noi qui finacaiquin, —ishon Jesús yocaiton.

⁴³ Simón cumani, —Nan paratama nifatocairaca fasi noi qui finaiquin, —ishon yoiatton.

⁴⁴ Afanan Jesús cumaqui isca huani, —Min cayacafi yoiran, —huatan ifiacuc-ahuan yoini, —Oinpon. Na ainfoan fasi ua noicoin. Min pushu muran un iquifi-aitocai mian ochoama. Asca na ainfoanfin fasi uhuun noi quin ahuun fuonpan uhuun tau muchana huafain ahuun foon ua otucuruacuin. ⁴⁵ Nocon fuyamisi cuscaricai mian uhuun tamo tsoama. Asca na ainfoanfin min pushu muran un iquiatian uhuun tauqui ua tsoari-aiquin. ⁴⁶ Ascán mianricai uhuun mapoqui shuni ocama. Asca na ainfoanfin uhuun tauqui ininti ocaquin.

⁴⁷ Ascacun un mia yoi. Na ainfoan ahuara ichapa chaca huafiamisicun natan ahuun chaca mun soashona. Ascashori mun rau huacoinna uhuun fasi noiatton. Asca tsoan shinanquin isca huai, “Uncai ichapa chaca huamisima. Ascacun uari uhuun chaca ichapama ua rau huashotironan,” ishon shinaintocain ua ichapa noimaran, —ishon Jesús Fariseo yoini.

⁴⁸ Ascashon ainfo Jesús yoini, —Natan mun mia chaca rau huashoanran, —huani.

⁴⁹ Ascaino Fariseo pushu murannoafo afi ranan yoinannifo, —¿Tsoamun na nocofunuquin? Fasi chaca huamisifo ato chaca soashofain ato rau huatironan, —icashu yoinannifo.

⁵⁰ Ascashon Jesús afanan ainfo yoi qui isca huani, —Mian icoinra huaitofin

un mia numaquin. Caasharatahuun, —ishon Jesús yoini.

Jesús futan ainfofoan apaoni cuscan

8 Asca huatan chipo Jesús pushurasiti ato yoifoanfafaini ahuu cuscaramain Upa Diosin niaifoan ahuun yorafo iquinai cuscaraquin. Ascaino doce afu rafuafori afu fonifo. ²Ascaino ainfofori afu fonifo. Nanfo isinincal yoshin chaca atohuun nuucun Jesús ato caya huapaoni. Nan futsan ahuun anu María Magdalena. Nanhuun siete yoshin chacafo ahuun nuucun Jesús amaquinoa potani. ³Futsan ahuun anu Juana nan Cuza pan ahuin ini. Nan Cuza niaifo Herodes ahuun niaifo patashari ini. Ainfon futsan ahuun anu Susana. Ascashu ainfo fut-saforifi Jesús yafi afu rafuafo fu fonifo. Nan ainfofoan Jesús yafi afu rafuafo pui inannifo ahuun rafanan tushu finonfo.

Jesús fimi ushu saamisihuunshon ahuafo ato yosini

Mt 13.1-9; Mr 4.1-9

⁴Pushurasifoti anoashu ahuun tsain nicapaicani yorahuanrasi aqui fuaifoan ahuafo yoiai cuscarahuunshon ato tapimani isca huani, ⁵—Nocofunun ahuun noshati murannoa fimi ushu fishon ahuun mau mamaqui saaca ushufo fai nushmancayan pacucun puamanafoanno puiyafonri piinifo. ⁶Ushu rananri toquiri camaqui pacua mai ichapamashta anoashu foaifia fari tsasi huani unun muchana huaiyamaino nai cuyoni. ⁷Ascaino ushu rananri tasha murannoashu foaifiafashucai ushu futsa foaisharanima. ⁸Ushu rananri mai shara ano pacuafo foaisharashu fimi ichapayacoin iniran, —ishon Jesús ato yoitan oi ashcafinin ato yoiqui isca huani, —Manmain ua nicatiroquin ua nicafain uhuun tsainri maton nomuran nanucoincahuun, —ishon ato yoini.

Ahuuscaquimain Jesús futsafo ahuafo futsahuunoa yoini ato yosinon

Mt 13.10-17; Mr 4.10-12

⁹—Min ato saamisihuunoa ahuafo futsa tapima ato yoia cuscan noco shafacafi tapimahuu, —ishon afu rafuafoan Jesús yocaifoan. ¹⁰Jesús ato cumani, —Upa Dios a icanoshon ahuun yorafo iquinai cuscan un mato fusti shafacafi tapimai. Ascaino nanfofin ahuafo cuscarahuunshon fustisi un ato yoiaquin. Ascashon nanfoancai un ato oinmana cuscan oinfaquicai tapiafoma. Nicafi-aquiricai tapisharafoma.

Fimi ushu saamisihuunoa ahuafo yoifiafashon shafacafi afu rafuafo tapimani

Mt 13.18-23; Mr 4.13-20

¹¹Un saamisihuunoa ahuafo futsa un ato yoia cuscan un mato shafacafi tapimai. Nan ushufo Diospan tsain cuscara. ¹²Nan fai curushu yorafoan aton ointi cuscara. Ascashon nanfoan Diospan tsain nicafain ato nomuran nanufiafo nan yoshin chaca Satanás atoqui oshon nan nicafo cuscan ato fiantiro icoinra huayamafain Dios fu ipanonfoma. ¹³Ascaino nan toquiri camaqui mai ichapama cuscan nanscarifiai yorafoan Diosin tsain nicaquin tau huai unimacoinyofiashu ahuafo ahucaraino samamashta cachiquiri huatiro. Nanfoan Diospan tsain icoinra huaqui chai huashoma ahuafo chaca finonquin samamashta Dios cachiquiri huatirofo. ¹⁴Ascaino nan ushu futsafo moshafoma muran pacuashu foai sharatiroma. Nanscarifiai futsafoan Diospan tsain nicafiafashon ahuafo nan acai cuscan fustisi shinanfain pui ichapa yafi mafo ichapa noi qui itiashmashtafi Dios cachiquiri huai. Ascaino Diosin ato amapaiyai cuscan huacanima. Ahuafo futsafohuun-

shosi ato nomuran afi unimamapaicani.
¹⁵Ascacia ushu futsafo mai shara ano pacuashu foaiquin yosiashu fimi ya itiro. Nanscarifiai futsafoan Diospan tsain nica cuscan icoinra huashu ahuun nomuran sharacoin. Ascaquicai Diospan tsain nicafo cuscan cachiquiri huacanima. Ascashon nanfoanri futsafo icoinra huamatirofo.

**Lamparinahuunoa
 cuscara Jesús ato yoini**

Mr 4.21-25

¹⁶Tsoancai tapa camaqui lamparina otashon paninranun fupomisima. Asca huatama otashon tapa camaqui huua pushu muran iquiafoan oinsharatirofo.

¹⁷Nanscarifiai man shinanmisi cuscan ahua huafashon man fomanmisi cuscari nantifi mato puashoshquin. Anoshocai ahuashta afanan man fomantiroma.

¹⁸Ascacun oinfain. Uhuun tsain nicasharacahuun. Tsoan uhuun tsain nicasharacoian paratamari Dioshuunoa tapisharatiro. Ascan tsoan uhuun tsain nicafishu ascacoianma ascashu nan nicamisi cuscari funoshqui, —ishon Jesús ato yoini.

Jesús ahua yafi ahuun ushtofo

Mt 12.46-50; Mr 3.31-35

¹⁹Ascatan Jesús ahua yafi chipocufo aqui iquipai oianfo yorahuanrasi fasi fospiafono iquinifoma. ²⁰Ascaiton futsan yoini, —Min uhua futan ushto rananun mia oinpai fuafo chifi niaforan, —ishon yoiaiton.

²¹Jesús cumani, —Nan uhuun Upa Diosin yoiyai cuscacoin aafodin uhuun uhuafo yafi uhuun ushtofoquin, —ishon yoini.

**Jesús fuuhuan yafi ian
 fuchomanhuan nishma huani**

Mt 8.23-27; Mr 4.35-41

²²Shafa futsa Jesús afu rafuafo yoini, —Non ianmanhuan oquiri fonon focahuun, —ato huaino afu nanufainifo. ²³Ascashu foaifono atoqui fuuhuan noconi. Nantian Jesús shasho tsispa camaquinoashu osha ini. Ascano fuuhuanquin ianmanhuan fuchoquin unu shasho muran iquimani. Fasi musucoin ini.

²⁴Ascaiton afu rafuafoan moinnifo, —Moihuu, Ifon, man non asai futsuicai, —ishon yoiaino moinacahuatan ninacahuani. Ascashon yoini isca huaquin, —Fuun nishmahuu huafain fuchomanhuanun nishmahuu, —Jesús huani. Ascaino ian fuchoi nishmafaini. Man asca huano ian pusiquima racani. ²⁵Ascaiton ato yoini, —¿Ahuuscai un nunofiano ua icoinra huatama man ratuai? —ishon Jesús ato yoini. Ascaino fasi ratucani mustairicatan afi ranan yocanonannifo. —¿Noco ifomun tsoaquin? Fuuhuan yafi ian nan yoiyai cuscan man nishma hua, —icashu afu rafuafo yoinannifo.

**Gerasa mai anoa nocofunuun
 yoshin chaca nuua ini**

Mt 8.28-34; Mr 5.1-20

²⁶Ascatan ianmanhuan pocufaini Galilea ocuma futsa Gerasa mai ano noconifo. ²⁷Ascashu shasho murannoashu Jesús fotocainaino nocofunu yoshin chaca ahuun nuua aqui noconi. Sahuuti sahuu sahuutianima. Pushu muranricai imisima. Mahua quini muransi iitiani. Nan mahua quini muranri naafo mai huamisifo. ²⁸Jesús fuchitan ratoconun mai chachipacufoan oi ashcafinin yoiquin isca huani, —¿Mian ahuusca huapaimun, Jesús? Diosin nai muran ica nantifi finoncoianton ahuun Facufin minquin. Ua omitsisca huayamapun,

—ishon yoshin chacahuunshon nocofunun Jesús yoini. ²⁹Nannori yoini Jesusmain yoshin chaca amaquinoa potayamaiton. Asca aqui Jesús nocoataima yoshin chacapan nocofunu achiriapaoni. Ascaiton yorafoan cadenanun munushfain onushushon cushufiafo nanfo tusaqui futsafaini ichopaoni. Ascashon yoshin chacanun tsoan istaipama iyon.

³⁰Ascaiton Jesús yocani, —¿Min ahuanumun? —ishon yocaiton. Yoshin cumani, —Nocon anufin ichapaquin. —Anori yoini yoshin chacafomain ichapa ahuun nuucun. ³¹Ascashon yoshin chacafoan Jesús yoinifo, —Omitsiscapanacafo quininhuan muran noco potayamapun, —huarianifo.

³²Ascaino nantianari machi mananunshon yahua inafoan piinifo. Ascacun yoshin chacafoan Jesús yoicaquin isca huanifo, —Noco yahuarasihun nichipun, —huaifoan. —Ascaiton yahafohuun fotacahuun, —Jesús ato huaino. ³³Nocofunuhuunoashu yoshin chacafo yahafohuun fonifo. Ascaino yahuahuanrasi ian muran maocofainni asai futsunifo.

³⁴Ascaifoan oinfaincani yahua cushumisifo ichonifo pushurasi ano chani focani. Pushu patashari icafo yafi chaima icafoquiri chaninifo. ³⁵Ascaiton nicacani yorahuanrasi yahua asai futsuaiton oinpaicani funifo. Fucaquin oianfo Jesús naman nocofunu ahuun yoshin chacafo nuumisi tsoa ini. Man amaquinoa Jesús yoshin chacafo potano. Afananricai imisi cuscan chitoria iyamacain nison inima. Shinansharacoinni. ³⁶Atirifi atoqui nocoifoan Jesús amaquinoa yoshin chaca potaiton oianfo cuscan futsafoqui chaninifo. ³⁷Ascaino Gerasa anofoan nicacani ratucoincaquin yoinifo, —Nocomaquinoashu catapun, —huaifoanno Jesús shashon nanucaini

cani. ³⁸Jesús cataima a yoshin chaca amaquinoa potaton yoini, —Uari iyoicapun. Un mifu capaica, —huafiaiton. ³⁹Jesús yoiquin, —Ma. Min pushu ano cashon min yorafo mia Diosin ashoan cuscan huafain yoitahuun, —huani. Asca huaino cashon Jesús ashoan cuscan yoifoanfafaini. Pushurasi muran yafi patashari icafo chaima icafori yoifoanfafaini.

**Jairo shotocofacu caya huafain
ainfoan Jesús ahuun sahuuti
muunni cayashquin**

Mt 9.18-26; Mr 5.21-43

⁴⁰Asca huatan ianmanhuan pocufurannaiton yorahuanrasiton cusumunshon Jesús mananifo. Fasi aqui unimacaquin —Nocoqui ohuu, —huanifo. ⁴¹⁻⁴²Nannori nocofunun ahuun anu Jairo. Israelifoan ichananti pushu ano aon niaifo ini. Nanton ahuun shotocofacu fustishtacoin doce fari aya ini. Ascaino Jesús shasho murannoashu foto curanaiton Jairo fuoshopacucahuan yoini, —Uhuun facushta isininqui man naiquin uhuun pushu ano ufu capun. Uhuun facushta ua caya huashoshquin, —ishon Jairo yoiaino Jesús afu caino yorahuanrasi atofu focaquin fasi yuruanifo. ⁴³Nannori ainfo atofu cani. Nan ainfo imi imitiani doce fari man aqui caafiano nusuyamacai. Cayapaiqui nan aya cuscan doctorfo ato inanfiacucai tsoanshta caya huamamisima. ⁴⁴Ascashu Jesús caiton ainfoan acachorishori ahuun sahuuti cupanan muunni. Muuanshu imi shaturiscatani. ⁴⁵Ascaiton Jesús ato yocani, —¿Tsoan ua muamun? —ato huaiton.

Nantifiton yoinifo, —Non mia muamaran, —ishon futsan yoicun futsan yoicun huanifo. Ascaiton Pedronun yoini, —Tapimamisiton, yorahuanrasiton mia yuruafain mia putsiquinaforan, —huaiton.

⁴⁶ Afanan ato yoini, —Ratoran futsan man ua mua. Uhuun curushhuunoashu nan ratoran man cayaran, —ishon. ⁴⁷ Jesús yoiano ainfoan tapini Jesús man onan. Ascacun raquicai onutiroma oin ratui taritari iyanan yora huanrasiton ointaifi Jesús nia naman ratoconun mai chachishon nan ica cuscan yoini, —Un imi imitiani doce fari man uqui caa. Tsoancai ua caya huamamisima. Ascacun min sahuuti muuashu un imi shaturiscaran, —ishon ainfoan Jesús yoini. ⁴⁸ Ascaiton, —Achishtan, ua icoinra huashufin min cayaquin. Caasharatahuun, —ishon Jesús yoini.

⁴⁹ Ascashu Jesús tsaincai muran ni-ainfoan pushu anoashu aqui oshon futsan yoini, —Min facu man naaqui. Natian nocon tapimamisi afanan fucash huayamacahuun, —ishon futsan niaifo yoini.

⁵⁰ Ascaiton nicaquin Jesús yoini, —Ratuyamahuu. Min ua icoinra huaino min facu cayaquin, —ishon yoini.

⁵¹ Ascatan pushu ano nocoshon Jesús yoini, —Pedro yafi Juan non Santiago non facun ahuun apa non ahuari marusu ufu pushu muran iquicahuun, —ato huani. ⁵² Ato asca huaino iquifainquin oianfo uaicani shorarascanifo. Manocani. Ascaifoan Jesús ato yoini, —Uayamacahuun. Na facucai naama. Oshafinquin, —ishon ato yoiaiton.

⁵³ Jesús osanifo. Man facu naacoina oinfiainfoan. ⁵⁴ Ascashon Jesús shoto- cofacu mutsoinifoanquin oi ashcafinin yoiquin isca huani, —Facushtan, funinaca huanhuun, —huaino. ⁵⁵ Afanan funinaca huatan shotocofacushta nini. Ascaiton, —Piimacahuun, —Jesús ato huani. ⁵⁶ Apa yafi ahua aton facu funia oincani fasi unimacoinnaifoan ato yoini, —Maton facu naacoinfiacun un funimana cuscan tsoa yoiyamacahuun, —ishon Jesús ato huani.

Jesús afu rafua doce nichini Diosi niaifo icanomain ahuu cuscara iishquicai ishon ato tapimanonfo

Mt 10.5-15; Mr 6.7-13

9 Shafa futsaino Jesús doce afu rafuafo cunaino aqui funifo. Ascano aqui fuafoan ato yoiqui isca huani, —Uhuun curushhuunshon yoshin chacafo yorafohuun nuucun atomaquinoa potafain pau futsa futsatapafori uhuunshon man ato caya huatiro. ² Ascashon uhuun Upa Dios niaifohuunoari ato yoifain isinincaifori ato caya huatacahuun.

³ Ascacun mato ahuara foyamacahuun. Mato poquiti non forusa non tushu non puiri foyamafain mato sahuuti futsafori foyamacahuun.

⁴ Ascán ratoran pushurasi ano man nocoano tsoa aton pushu muran mato iquimai nan fusti muran iyocahuun nan man caitian. ⁵ Asca rato pushu futsa iyamarai pushurasi anofoanri mato nicacasmaifoanno atomaquinoashu focaquin maton sapato tatashacahuun. Ascaquifin man ato ismatiroquin mato nicacasmafain Diosirifi nicacasmaifo cuscan. Diosin tsain icoinra huamaforan, —ishon Jesús ato yoini. ⁶ Ascashon ato yoiquin anaitiano pushurasifoti ano Upa Dios niaifohuunoa yoifain isinincaifori Jesushuunshon ato caya huafoanfainifo.

Niaifo Herodescai nannorisi shinanima

Mt 14.1-12; Mr 6.14-29

⁷ Ascano nan niaifo Herodes a Jesús aca cuscan nicashu, —¿Tsoamun na nocofunuquin? —ishon shinanni. Atirifoan yoinifo, —Nanfin Juanqui man afanan funia, —ishon yoinifo. ⁸ Futsafoanri yoicaquin, —Nanfin Eliasquin, —huaino. Futsafoan yoicaquin, —Ma. Nantofin noco shuni caifo Diosin tsain

yoimisi ipaoniquin man afanan funiaran, —ishon yoinifo. ⁹ Ascafiaifoan Herodes yoini, —Ma. Nancai Juanma. Munfin Juan tushtumayamaquin. ¿Asca nan nocofununmun tsoaquin? —ishon yoini. Asca nan niaifoanri fasi Jesús oinpaicoinni.

Jesús cinco mil nocofunufu pimani

Mt 14.13-21; Mr 6.30-44; Jn 6.1-14

¹⁰ Ascashu chipo afu rafuafo Jesusqui naso cashon nan acafo cuscan Jesús yoinifo. Ascaiton nicaquin Jesús ato yoini, —Pushurasi Betsaida ano nocotisi non fononfocahuun, —ishon ato yoini.

¹¹ Ascafia yorahuanrasi Jesús yafi afu rafuafo nan foafo ano tapicanashu atoquei funifo. Ascashu nocoifoan Jesús ato yoini, —¡Aicho! Man uqui fui. Uhuun Upa Dios niaifo icanomain ahuu cuscarauqui un mato yoinon, —ishon ato yoini. Nannoshori ratoran futsa isinincai fuafu ato caya huapacuni.

¹² Ascashu man fari caino afu rafuafo doce aqui fucashon yoinifo, —Yorafo nichihuun. Pushurasi ano yafi a chaima icafoanno fotanonfo. Fonaincaniquin. Anoshon tushu fifain ranimain oshacanicain shara futsa fuchinonfo. Nuno tosa yamaquin, —ishon yoinifo.

¹³ Ascaiton ato cumani, —Ato piimacahuun, —ishon a rafuafo yoiaiton. —Nonfin misi mucu fustiti yafi shiman rafusi ayaquin. Min shinanmun na yorafo pimashquin non tushu ichapa fiicaiquin, —ishon yoinifo. ¹⁴ Nanno cinco mil nocofunufosi ini. Ainfofo yafi facufocai tanan huamunima. Ascaiton ato yoiqui isca huani, —Ato yoicahuun futsano cincuenta tsaohuaifono futsa anori cincuenta tsaononfo. Nanscasi anonfo, —ato huani.

¹⁵ Nan ato yoiái cuscan tsaocunifo.

¹⁶ Ascaino shiman rafu yafi misi mucu fustiti tsomashon nai ari foisinifoantan apa Dios cufinquin isca huani, —¡Aicho!

Upan, mihuunshon un ato pimái. Min fasi sharacoincun, —huatan. Misi torupacutan shiman rafu ya osishon afu rafuafo ato inanni ato pashcanan huapanonfo. ¹⁷ Ascashon picani mayancoinnifo. A picaquin tushu huafu afu rafuafoan doce shihuati fospi huanifo.

Pedronun, —Jesús Diospan facuran, —huani

Mt 16.13-19; Mr 8.27-29

¹⁸ Ascatan shafa futsa Jesús afu rafuafo ointaifi apa Dios cufini. Cufinquin anaititan ato yocani, —¿Yorafoan shinanmun un tsoaquin? —ishon ato yocaiton.

¹⁹ Cumanifo, —Futsafoan yoiáfin min Juanquin. Nan yorafo unu muran iquimapacumisi. Asca futsafoanri yoiáfofin min Eliasquin. Asca futsafoanri yoiáfofin min noco shuni nan Diosin tsain yoimisi ipaoniquin man min afanan funiaran, —huaifoan.

²⁰ —¿Asca marifi man shinanmun un tsoaquin? —ishon ato yocaiton. Pedronun cumani, —Minfin Cristoquin. Nan Diosin mia catonniran, —ishon yoiáiton.

²¹ —Ascacun tsoashta yoiyamacahuun, —Jesús ato huani.

—Unfin chipo naashquicai, —ishon Jesús ato yoini

Mt 16.20-28; Mr 8.30-9.1

²² Ascatan afu rafuafo yoiqui isca huani, —Un chipo fasi omitsiscashquin. Nocon yorafohuunshon Dios cufimisi niaifofo non Dios fu tsainti pushu cushumisifo Moisés cununi cuscan tapimamisifoan futan ua iconra huashquicanima. Ascashon ua ato rutumafiafo osha rafu non fusti finontan un afanan funishquiran, —ishon Jesús ato yoini.

²³ Ascashon nantifi yorafo yoiqui isca huani, —Tsoan ua tanapai sharaquicai afin apaiyai cuscan huatiroma. As-

catama nan un yoi ai cuscacoin huatiro. Ascashon shafatifiri shinanqui isca huatiro, “Ua omitsisca huafiaifoanno uncai uhuun Ifo potapacunacama. Ahuunshon ua rutufiainfoanno un tanaqui unupacunacamaran,” ishon shinantiro. ²⁴ Ascan tsoan shinanquin isca huai, “¡Ohua! Un Jesús tanaitonraca ua omitsisca huacanicati,” ishon shinanquin uhuun tsain cachiquiri huaa. Nanscara yorafo naashu omitsiscapanacafo. Ascan tsoan uhuunoashu omitsiscacai naa. Nanscara yorafofin nacanashu ufu ishara-pacunacafoquin. ²⁵ Ascan ratoran futsan nantifi manifoti anofo ahua ra fia ahunacoin ifiashu amaqui naino nantifi ahunafo funotiro. Ascashu nantifi ahuna iyopaonifia omitsiscapanacafo muran cainocai ahuashta itiro. ²⁶ Ascan tsoa uhuun rafipaiquin uhuun tsainri uhuunoa yocasmaifo. Nanscarafohuun urifi un chipo uhuun Upa Dios cuscacoin iicaino uhuun Upa Diospan oinmati afu nai muran ica sharafoya chasha curani un fotoaitian un nanscara yorafohuunri un rafipaishqui. “Nacai uhuun yoramara,” ishon un yoishqui. ²⁷ Ascacun icon un mato yoi. Man futsa nuno ufu niaton naataishoma Upa Dios ni-aifo icano cuscara man oinyoshquiran, —ishon Jesús ato yoini.

Jesús fianananriscatani

Mt 17.1-8; Mr 9.2-8

²⁸ Ascashu ocho osha finontan Jesús Pedro non Juan non Santiago nan rafu non fusti ato machi ano iyoni. Apa Dios cufi caquin. ²⁹ Ascashon Apa Dios cufiaino ahun fuso fianananriscatani. Ahuun sahuutiri chashariscatani nan yoa rama furoa ointsa. Fasi osho shara-cocoin facafacai ini. ³⁰ Ascaino nocofunu rafu aqui niriscatan afu tsainnifo. Nan rafu Moisés yafi Elías ini. ³¹ Ascashu nan rafuri chashariscatishotan nan Jesús Jerusalén anoashu omit-

siscacai naashquiai cuscan afi ranan yoinannifo.

³² Ascaiton oincani Pedro yafi afu rafua rafutari oshapaifiacaquin osha tunucoinnifo. Jesús chashariscatanaiton nan rafutari oinnifo. ³³ Ascashu nan rafu man Jesusmaqui caino Pedronun yoini, —Ifon, nuno non ica shara itiro. Non mia tapasi rafu non fusti huashonon. Mina futsa non Moisésna futsa non Eliasna futsari non huashonon, —ishon yoifishocai Pedronun tapinima raquirimain huaaquin.

³⁴ Ascashu nan tsaincai muran atocoin manipacufuannaino coin muran nii futsuashu ratucoinnifo. ³⁵ Ascashon nan coin murannoari oi nicanifo yoiqui isca huaiton, —Naanfin uhuun facuquin. Nan un catonni. Ascacun a nicacocoinahuun, —Upa Diosin ato huani.

³⁶ Diosin tsainqui anaititanaino oianfo arus fusti Jesús nia ini. Ascafiashocai tsoashta yoinifoma arus fusti aton nomuranshon shinannifo.

Jesús yoshin chaca furonafacuahuun nuua caya huani

Mt 17.14-21; Mr 9.14-29

³⁷ Ascatan iyoco futsaino machi anoashu fotocaini Jesús caino aqui yorahuanrasi funifo oinpai fucani.

³⁸ Nanno yorahuanrasi muranshon futsan Jesús cunani. —Tapimamisiton, uhuun facu fusti ua oinshoniyopun.

³⁹ Yoshin chaca ahun nuushon. Uhuun facu fasi musta musta imayanan fiisimafain ahun ashfapan facoshurasi atsispomamisi. Yoshin chacacai uhuun facumaquinoashu capaima. Nanscaquisi man rutui. ⁴⁰ Un mifu rafuafo yoi ai isca huaqui, “Na yoshin chaca uhuun facumaquinoa ua potashocapun,” un ato huafiaca tsoan atiro icamaran, —ishon nocofunun Jesús yoini.

⁴¹ Ascaiton Jesús afu rafuafo yoini. —¡Ohua! Mancai ua icoinra huacoinnama.

Man fasi amaquri shinanmisi. ¿Ahuutia un matofu icamun man ua nicayamacaiyai? —ishon ato yoini. Ascan facun ahuun apa yoini, —Min facu ua ihuushooun, —huani.

⁴² Ascashon furun ihuushonaino yoshin chacanun afanan musta mustaimainifoanaino pacuni. Ascaiton Jesús yoini, —Minfin yoshin fasi chacacoinquin. Na facumaquinoashu catahuun, —ishon Jesús curushcai yoiaino facu cayani. Ascaiton Jesús apa yoini, —Naquian min facu. Iyosharatahuun, —huani. ⁴³ Ascaino oincani mustairicatan, —Diosin ahumamishti huatiroran, —icashu yoinannifo.

**Jesús nashquiai
cuscan afanan yoi futsani**

Mt 17.22-23; Mr 9.30-32

⁴⁴ Nan acaiton oian cuscan shinansharaifoan Jesús afu rafuafo yoiqui isca huani, —Un mato yoiiai cuscan nicacoincahuun. Futsafin ua ato achimashquiquin, —ishon Jesús ato yoini. ⁴⁵ Ascashon ato yoiiai cuscacai tsoan tapinima. Diosin ato nomuran ato shinantima huaino. Ascacucui yocapaifia ratucaqui yocanifoma shafacafi ato tapimanon.

Tsoacaimun fasi shara finacaiiqui

Mt 18.1-5; Mr 9.33-37

⁴⁶ Ascashu chipo afu rafuafo afi ranan fochishmanantanannifo. Ascan non rato futsacaimun non fasi shara finacaiiqui ishon yoipacunifo. ⁴⁷ Ascashon nan shinainfo cuscan onanshon Jesús facu mutsofuran yoiqui isca huani, —Facushtan, nuno ufu niyohuu, —ishon yoini. ⁴⁸ Asca huatan afu rafuafo yoiqui isca huani, —Tsoan uhuunshon na facu shara huaifin nan uari shara huai cafisca huaiquin. Nanscarifiai tsoan ua shara huaquifin

nan ua nichini uhuun Upa Diosiri shara huaqui. Ascan ratoran man futsa oinmati cuscara ahuuamafisho man yora shara huamisi nanfin fasi shara finacaiiquin, —ishon Jesús ato yoini.

**Tsoan noco chaca huapaitama
noco shara huai**

Mr 9.38-40

⁴⁹ Ascaiton Juanpan yoini, —Tapimamisiton, non oian nocofunun min anuhuunshon yoshin chacafo atomaquinoa potaiton. Nancai no fu rafumisima. Ascacun nan non yoiquin isca huaa, “Asca huayamahuu. Min no fu rafumisimaquin. Asca yoshin chaca yorafomaquinoa min potatiromaran,” ishon non yoiaran, —Juanpan huani. ⁵⁰ Ascaiton Jesús cumani, —Asca huayamahuu. Tsoan noco chaca huapaitama noco shara huaifin sharaquin, —ishon Jesús Juan yoini.

**Jesús Santiago yafi Juan, —Asca
huayamahuu, —ato huani**

⁵¹ Afanan Apa Dios icari cati chaima Jesús Jerusalén ano cayoni. Ascaitocai tsoashta nitun huatiro inima. Manmain tapicufin a Jerusalén anoashu noco nashoyoai Apa Diosin yonoa cuscan. ⁵² Ascacun a rafuafo rafu rucun nichini. Nan pushurasi Samaria ano fochashon itishara huashononfo. ⁵³ Ascafia nannoafoan ato yoiquin isca huani, —Nuno iquiyamacahuun. Non mato oinpaimaquin, —ishon ato yoinifo. ⁵⁴ Ato asca huaifoan nicashon afu rafuafo rafu Santiago futan Juanpan Jesús yoinifo, —¿Ifon, min noco yonopaimun atohuunshon non Upa Diosin cufinon nan pushurasi nai muranshon chii atoqui pota nai cuyononfo? —ishon yoiiaifoan. ⁵⁵ Jesús ato cumani, —Asca huayamacahuun. Man shinain cuscacai un shinanpaima, —ishon Jesús ato yoini. ⁵⁶ Asca huatan pushurasi futsa ano cani.

Jesús tanasharapaiyaifo

Mt 8.19-22

⁵⁷ A fu caquin nocofunu futsan Jesús yoini, —Ifon, min raquira caino urifi un mifu cahuacacainon, —huaiton. ⁵⁸ Jesús cumaquin, —Marifi quiniyaquin puiyafori naa yafofiano uncai pushu yama, —ishon yoini. ⁵⁹ Ascashon nocofunu futsa Jesús yoiquin isca huani, —U fu cahuun, —huaiton. Cumaquin, —Ifon, ua manayohuu. Nan uhuun upa naitian iquisi mai huayotan un mia tanasharashquinon, —huaiton. ⁶⁰—Ascaquima ua tanafafainhuun. Ua ifoamafofin nan yora naa cuscarafokin. Ascashon nanfoan ato yora naacun mai huatirofo. Ascan minfin uhuun Upa Dios niaifohuunoa ato yoifafaincain, —ishon yoiaiton.

⁶¹ Futsan yoini, —Ifon, un mia tanapai. Ascafia iquisi uhuun pushu ano un cayotanon uhuun yorafo ato yoiyoicai, —huaiton. ⁶² Jesús cumaquin, —Tsoan ua yonoshofiaquin apaoni cuscan afanan huapai, nanscara yorafocai itisharafoma uhuun Upa Dios niaifo ano iquishcaquin, —ishon Jesús yoini.

Jesús setenta y dos nocofunufu nichini

10 Ascatan Jesús setenta y dos nocofunufu catonni. Ascashon rafurasi ato nichipacuni. Nan pushurasi patasharifo ato rufofo nichini nanno chipo arifi atoqui caashquin. ² Ascashon Jesús ato yononi isca huaquin, —Yora ichapafoan uhuunoa nicataiyamafishon ichapamaton ua yonoshocani uhuunoa ato yoishcaquin. Ascacun fasi Upa Dios cuficahuun ahuun yonoshomisifo catonon uhuunoa ato yoinonfo. ³ Ascacun fotacahuun. Un mato yonoa cuscan chashoanfo masharonun pipaitiro cuscan

nanscarifi huaquin uhuunoaashu man isharafiacun yora chacafoan mato chaca huapaicaniquin. ⁴ Ascashori a muran pui huati yafi forusa non mato saporori foyamacahuun. Focaquin yorafo finonfaincahuun. A fu tsainyoashu man funa nocotiromaquin.

⁵ Pushu futsa muran iquishon ato yoicahuun, “Diosin mato shara huacoinnon. Isharacahuun,” ishon ato yoicahuun. ⁶ Asca nan pushu muran ica futsa isharacoincun naanfin “Diosin shara” huacoinnaquin nan man yoia cuscan. Asca man yoi ai cuscan a pushu muran icafoan mato nicacasmaifocai Diosin ato ointi unimamatiroma. Ascashu funocani. Ascafia man ato yoi ai cuscairocufin Diosin matoqui unimaiquin. ⁷ Ascatan pushurasi muran nocoashu pushu fusti muransi oshacahuun. Nannoshon mato pimafain mato ayamanaifoan acahuun. Diosinhuunoaashu yonomisifo nan yopaifo cuscan nan nicamisifoan ato inantirofo.

⁸ Ascashu man pushurasi muran man nocoaiton mato ihui sharafain mato pimafain mato ayamanaiton acahuun. ⁹ Nannoshon isinincaifo uhuunshon ato cayahuamacahuun. Ascashon ato yoicahuun isca huaquin, “Natian Diosin niaifoan ahuun yorafo iquinai cuscan chaimashtaran,” ishon ato yoicahuun. ¹⁰ Ascan mato nicacasmaifoanno ato fai ano fotacahuun nannoshon ato yoicahuun isca huaquin, ¹¹ “Maton chaca no-cohuun nuama. Mato huunfin nuaquin. Ascafiaino Diosin maton Ifo ipairan,” ishon ato yoicahuun. ¹² Un mato yoinon. Diosin Sodoma anofo ato namaqui cuyoni. Ascan nan mato nicacasmaifofin ahuutiaran nan Sodoma anofo ani finonmacaifain ato omitsisca huaquin finacoinshquin.

Pushurasi anofo yoitimacoinfo

Mt 11.20-24

¹³ ¡Ohua! Man Corazín anofo yafi Betsaida anofoan man chipo fasi omitsiscái. Tsoan oinyomisima cuscara shara un mato ismafiano mancai chaca shatupaima. Ascan nan Tiro anofo yafi Sidón anofo un mato isma cuscan un ato ismaiton nanfoan ato chaca shatucuanafó. Ascashon yoicuanafó isca huaquin “¡Ohua! Non fasi chaca huamisi. Ascacun natian Diosiqui nasoshon non nicasharanoncahuun,” ishon yoicuanafó. ¹⁴ Ascafia Diosin nantifi icoindra huamafo onaintimaitian nan Tiro anofo yafi Sidón anofoari onaintimafiaquicai mato onaintimaquin finacoinshquin. ¹⁵ Ascan man Capernaum anofoan man shinanmun man nai muran Dios ari foicai. Ma. Omitsiscapanacafó muranrocon mato potai, —Jesús yoini.

¹⁶ Asca huatan Jesús ahuun tanamisifo afanan ato yoiqui isca huani, —Tsoan man yoiai cuscacoin mato nicaquifin nan uacoin nicai cafisca huaiquin. Ascan tsoan mato nicacasmaquifin uarifi nicacasmaiquin. Ascan tsoan ua nicacasmaquifin nan ua nichini uhuun Upan Diosiri nicacasmaiquin, —ishon Jesús ato yoini.

Setenta y dos nocofunfo Jesús yonoa cuscan afanan naso furanifo

¹⁷ Ascano chipo nan setenta y dos ahuun tanamisifo afanan aquí naso furacani fasi unimacoincani fucashon yoinifo isca huaquin, —Ifon, yoshin chacafoanfin min anuhuunshon noco nicacointirofoquin. Ascacun yorafomaquinoa non mihuunshon potaran, —huaifoan.

¹⁸ Jesús ato cumani, —Aifain. Dios icanoashu nan cana piishicai cafiscái Satanás mai ano pacutanaiton un oian.

¹⁹ Ascano un mato yonoainocai uhuunshon mato ahuaraton ahuusca huatiroma. Rono paupan futan inapapiaton mato ahuusca huanonma un mato cushutiro. Ascashon nan Satanás noco noicasmamisi uhuunshon man finoncointiro mato ahuusca huanonma.

²⁰ Ascacun nan man yoshin chaca potahuunoashu unimayamacahuun Diosifin nai muranshon mato anu ahuun libro muran cunuaquin man ahuun facufocun ato ismashquin. Nan shinainfin man unimatiroquin, —ishon Jesús ato yoini.

Uqui fucahuun. Un maton ointi unimamatiro

Mt 11.25-27; 13.16-17

²¹ Ascano ato yoiqui anaititan Diosin Yoshin Sharahuunoashu unimacoinquin Apa Dios yoiquin isca huani, —Upa Diosin, min fasi sharacoin. Nantifi nai murannofo futan mai anofoan aton Ifofin minquin. Ascano nan mapo sharayafó yafi cunu tapiafocai min tsain shara min ato tapimanama. Ascafia nan cunu tapisharafoma nan facu cuscarafóqui. Ascashon nanfoan un ato isma cuscan yafi un ato yoiai cuscan ua icoindra huafo. Nanfofin min ato tapimanaquin. Icon, Upan, minfin nanscara fuchipaiquin, —ishon apa yoini.

²² Ascashon cufinquin anaititan Jesús nantifi yoini, —Uhuun Upa Diosin tapia cuscan uarifi nantifi tapimani. Unfin Diospan facuquin. Diosin fustitofin ua onancoianquin. Nanscarifi aquin urus fusti Upa Diosin un onancoian. Nanscarifi huaquin urifi un futsafo Upa Diosihuunoa tapimanai cuscan nanfoanri Upa Dios tapitirofoquin, —ishon Jesús yoini.

²³ Ascashon ifiacucahuan ahuun tananmisifo fusti yoini, —Diosin matohuun noiquin ahuun yono mato isma. Ascacun mato shara huacoinna.

²⁴Man oiain cuscan Diosin tsain yoimisifo futsafo futan niaiffoanri oinpaifiaquicai oinpaonifoma. Man nicai cuscani nicapaifiacaquin tsoan nicapaonimaran, —ishon Jesús ato yoini.

Samaritanon sharahuunshon Jesús ato ahuaara futsa tapimani

²⁵Ascano nocofunu futsa Moisés cununi cuscan tapicoian Jesusqui oni yocayoi. Tapipaiquin Jesusmain caya-cafi cumaiquin ishon. Ascashon yocani, —¿Tapimamisiton, unmun ahuuscatiroquin Dios fu ipashquin? —huaiton.

²⁶Jesús cumani, —¿Raquiri Moisés cunumun? —ishon yoiaiton. ²⁷Cumani, —“Nocon Ifo Dios nocon ointi muran-shon fasi noifain, nocon nomuranshori fasi noifain, fasi curushcai Dios noifain nocon shinanfoyashori Dios noihuu. Ascatan nan mifiri min noiai cuscan aquin mia chaima icafori noicoihuun,” ishon Moisés cununiran, —huaiton. ²⁸Ascacaiton Jesús yoini, —Min ua cayacafi cumashara. Nanscacoian atahuun. Ascashufin min Dios fu ipatiroquin, —ishon yoini.

²⁹⁻³⁰Asca huaiton cumani, —¿Ascan tsoafomun ua chaima icafoquin afohuun un noiai? —ishon yocani. Ascacantocai atifihuun noinima. Ascacun Jesús a nocofunun shinain cuscan onanshon cumaquin isca huani, —Nocofunu Jerusalén anoashu Jericó ano caiton. Yomutsofoan achicashon sahuuti shoriquin futsatan sutuquin futsacaquin nama cuanifo. Ascashon fai cusumun ratafaini yomutso ranan ichonifo. ³¹Ascacano ahuun caifohuunshon Dios cumifimisi oquin oian fai cusumun racacun oinfiaquin fai ocuma futsa caquin tanafainima.

³²Ascano nocofunu futsa Levitari fi oquin oian racacun nantorifi rahuinfainni. ³³Ascaino nan fainri

chipo Samaritanon oquin fuchitan ahuun ramapaitoshini. ³⁴Ascashu chipacopacucahuatan ahuun yoratishton shuni ya cayati futsa osishon ahuun ratucuraquin futsatan. Ahuun ina camaqui ratainifoantan iyoshon pushu muranshon cushushoni. ³⁵Ascatan iyoconaino ahuun rafanan toro paratamacoin ahuun pui nua rafu inanni. Ascashon pushu ifo yoiquin isca huani, “Na nocofunu ua cushusharashohuun. Afanan oshon un mia rafuri inanyoshquinon. Min cushusharaiton finonmafaintan afanan oshon un mia pui inanyoshquinon,” huani.

³⁶¿Ascan rato nocofunu rafu non fusti caimun a chaima icafo cuscaracaquin a nocofunu omitsiscapishtai? —ishon yocaiton. ³⁷Nan Moisés tsain tapimamisiton cumani, —Ahuun ramapaiyafin a chaima ica cuscaracaquin, —ishon yoiaiton. Jesús yoini, —Cashon mirifi nanscarifi huatahuun, —ishon yoini.

Marta futan María ahuun pushu ano Jesús ini

³⁸Ascatan Jesús cai pushurasi muran noconi. Nanno ainfoan ahuun anu Marta ica ini. Nanton ahuun pushu muran Jesús iquimasharani. ³⁹Ascacano nan Marta chipocufin María iniquin. Nanton Jesús tsain yoiaiton nicashquin icashu Jesús naman tsaotoshini nicasharashquin. ⁴⁰Ascafiatocai Marta nicanima nan tushu huaisi shinanni Jesús pimashquin. Ascacun nan Martan Jesús yoini, —¿Ifon, mian shinainmamun? Urusu fusti un tushu huai. Uhuun chicocai u futan apaima. Ua yoishohuun u futan aquiyonon, —huaiton. ⁴¹—Martashtan, minfin tushu fusti shinainquin. Ahuarafo futsa huaquicai mian nicaima. Nan uhuun tsain sharafin María catoanquin. Ua nicaquin. ⁴²Uhuun tsain

fusti shinanquin. Nan fusti yopaiquin. María ahuun nomuran uhuun tsain nanushon aquimashquimaran, —ishon Jesús yoini.

—Raquirimain non Upa Dios cufiqui huatiroquin, —ishon Jesús ato yosini

Mt 6.9-15; 7.7-11

11 Ascano shafa futsa Apa cufiqui anaitiano afu rafua futsan yocani, —Ifon, raquirimun non Upa cufiqui huatiroquin. Noco tapimahuun. Juanpan afu rafuafo tapimani cuscan nocorifi tapimahuun, —ishon yoiaiton. ²—Isca huacahuun, —ishon Jesús ato yosini,

“Nocon Upan nai murannoaton min fasi sharacoin.

Manifotiton aton niaifo iishquin mia ifoannonfo.

³ Shafatifi nocon tushu non yopai cuscan noco inanhuun.

⁴ Nan noco chaca huaifoan non ato rau huaa cuscan huafain nocon chacaforti noco rau huashohuun, Upan.

Satanás yoshin chacapan noco chaca huamapaifaiton

nocoqui cumatima huahuu.

Nansca huaquiquian,”

ishon Jesús ato yosini.

⁵ Ascatan afanan ato yoiquin isca huani, —Manmun mato yorahua yamunacucahuanaino mato ano nococun maton yora futsa yoa yocashoquin isca huaquin, ⁶“Ua yoa rafu non fusti inanpun. Un mia nasonon. Un natian yopaicai uhuun yorafo chaicunoashu uqui nocoano un ahuashta pimaimacain,” ishon yocaiton.

⁷ ¿Ascaiton cumaquimun isca huatiro, “Mun uhuun facufo ya iquia caincaitiri man fupoa. Asca ua fucash huayamahuu,” ishomun anori cumatiro?

⁸ Ma. Ascacai huatiroma. ¿Raquiri huatiromun? Un mato yoi. Ahuun yorahuaton inanyamai shafai fasi manariaiton

inanyamacuatan inantiro. Funinaca huatan nan yoca cuscan inantiro.

⁹ Afanan ahuara futsa un mato yoi ai cuscan nicacahuun. Ahuara yopaquin Upa Dios yocacahuun mato ashonon. Man yocain cuscan funaquima manasharacahuun nan Diosin mato ashoaitian. Ascacun Upa Dios cufifafaincahuun man cufiai cuscan mato inanon. ¹⁰ Tsoan Upa Dios yocariai fiishquin. Ascan tsoan ahuara shara fasi fuchipaiyai cuscan Diosin ato fuchimatiro. Ascan tsoanri Upa Dios cufiriaton ashoshquin.

¹¹ ¿Ascán maton facun mato shiman yocaiton man rono inantiromun? Ma. Mancai maton facu asca huatiroma.

¹² ¿Maton facuri mato tacara to yocaiton man inapapia inantiromun? Ma. Mancai maton facu asca huatiroma. ¹³ Ascacun tapicahuun. Man chaca huamisifashon maton facufo man inansharamisi. Man ascaiton finacaiya maton Upa Diosin nai murannoaton man yocai cuscan ahuun Yoshin Shara mato inanshquin, —ishon Jesús yoini.

—Yoshin chaca ato niaifoan ahuun curushhuunshon Jesús yoshin chacafo potatiroran, —huanifo

Mt 12.22-30; Mr 3.20-27

¹⁴ Ascano yoshin chaca nocofunahuun nuushon tsainmatiroma Jesusqui ocun. Amaquinoa yoshin chaca potano tsainnaca huanaiton oincani mustairinifo. Ascashon atirifiton, —¡Aicho shararan! —huaifoanno. ¹⁵ Futsafoan yoinifo, —Satanás curushhuunshon Jesús yoshin chacafo yorafomaquinoa potatiroran, —ishon. ¹⁶ Futsafoan Jesús yoiquin isca huani, —Dioshuunshon nai murannoato noco ahuara futsan ismahuu non mia icoinra huanon Diosin mia catoanquin, —huaifoan.

¹⁷ Ascano nan shinainfo cuscan onanushon Jesús ato yoini, —Mani futsafo

afi ranan rutunain cuyotirofo. Nanscarifiai pushu fusti muran icafori afi ranan chaca huatananfaincani pashcanantirofo afanancai tsoa anosi itiroma. Ascashuricai afanan tsoa yorahuatanantirofoma. ¹⁸Nanscarifiai Satanás ni-aifoan afu yoshin chacafo potaquin ahuun yono chacana huatiro. Asca huaquin ahuun yono cuyocointiro afu yoshinfocai afanan afu itiroma. Un nan-nori yoia manmain yoiquin isca huayamacun, “Satanashuunshon yoshin chacafo potaran,” ishon man uhuunoa yoia.

¹⁹Ascafia manfin uhuunoa yoimisiquin. “Satanás curushhuunshon yoshin chacafo potaran,” ishon man yoimisi. ¿Un asca huaino tsonhuunshon mato yorafoanri yoshin chacafo atomaquinoa potafomun? Ascacun nanfohuunshon man tapitiro man uhuunoa amaquri shinanchacai cuscan. ²⁰Ascafia Diospan Yoshin Sharahuunshon un yoshin chacafo atomaquinoa potaiton man tapitiro maton Numamisi Diosin catonni man matoqui noco. ²¹Ascan nocofunu mutsisipacoinin tucuti yashon ahuun pushu cushuanocai tsoan ahuun ahuashta muntiroma. ²²Ascafia nan finoncaia fasi mutsisipacoin aqui nocoshon achifain ahuun cunoti mufishon ahuun ahuafo cuyonfiatocai ahuusca huatiroma. Ascashu ahuun ahuafo pashcanain futsutirofo.

²³Tsoa ufu rafucasmaquifin uhuun tsain nicacasmaquifin. Nanfoan futsafo ua icoinra huamapaanima. Ascaquifin Diosimaqui ato imacaniquin.

Yoshin chaca yoraqui afanan nasotiro

Mt 12.43-45

²⁴Yoshin chaca nocofunumaquinoashu cai tsoa istaipama ano cani shara futsa funai cai anoshon tunushquin. Ascafia fuchiamacaiqui

yoshin chacanun afanan shinanqui isca huani, “Unfin nan nocofunuuun ipaoniquin. Ascacun un afanan aqui nasoiran,” ishon shinanni. ²⁵Aqui nocoshon oian tsoa futsacai afu rafua inima. Nan pushu matsomua shara oints. ²⁶Ascacun nan yoshin chacanun afu yoshin chacafo siete ato ihuuni nan fasi chaca finacai. Ascashon ato yoiqui isca huani, “Nocofunun un mato ismaicai non ahuun nuifonon,” ishon ato yoini. Ascatan aqui foshon iquinaifoanno nan nocofunu fasi mimacai chacacoin ini. Manmain aqui rananri focun, —ishon Jesús ato yoini. —Asca huaifoanno nan nocofunu afanan finacai pacucahuani. Mimacai fasi omitsiscacai finacoincun, —ishon Jesús ato yoini.

Nicafo cuscan unimacoincani

²⁷Ascaiton ato yoiaino ainfoan nan yorahuanrasi muranshon oi ashcafinin Jesús yoiqui isca huani, —Min uhua mia cainshon mia shoma amani. Ascacun min uhuaquimun Upa Diosin unimasharapainon, —ishon yoini.

²⁸Ascatan Jesús cumani, —Ai, nan min yoiyai cuscan iconfiashu tsoan Diosin tsain nan nica cuscaquin Diosin nan unimamatiro finacoian, —ishon cumani.

—Tsoan atiroma cuscan noco ismahuu non mia icoinra huanon, —ishon yoinifo

Mt 12.38-42; Mr 8.12

²⁹Ascatan fasi paratama yorahuanrasi Jesusqui fuaifoan. Ascaiton ato yoini, —Natian niafo fasi chacacoinfo. Ascashon ua yoimisifo isca huacaquin, “Tsoan atiroma cuscan noco ismahuu min Dios ariashu oa non mia icoinra huanon,” ishon ua yoimisifo. Ascafia nan Diosin tsain yoimisi Jonás ani cuscaquin un chipo mato ismaiton nan fusti man oinshquin. ³⁰Ascan Jonás tsainhuunshon

Nínive anoafoan Dios icoinra huanifo cuscan nanscarifi huaquin natian niafo un mato yoi marifi man icoinra huanon.

³¹ Ascashon Diosin nantifi yorafo ichanan huaitian ato yoipacushquin ratofomain afu ipatiro iyamarai omitsiscapanacafo muran foshcaniquin. Nantianri nan ainfo Sabafoan ato niaifo ipaoniton matohuunoa yoiquin isca huashquin, “Salomón tapicoian cuscacai tsoa futsan tapipaonifoma. Ascacun ahuun tsain nicapaicoin un aqui chaicunoashu cani cuscan mancai nan Diospan Fururi asca huapaipaonima. Ascatamarocon man nicacasmapaoniran,” ishon matohuunoa yoishquin. Nan icon Salomón tapicoian ipaonifia uncaifin fasi Salomón finoncoinfacun mancai ua nicapaima.

³² Nanscarifi huaquin Diosin nantifi yorafo ichanan huaitian ato yoi pacushquin ratofomain afu ipatiro iyamarai omitsiscapanacafo muran foshcaniquin. Nantian Nínive ano ipaonifoan matohuunoa yoishcani isca huaquin, “Jonás noco Diosin tsain yoi ai cuscan nicacoinshon non nocon chaca shatucoinfain non Dios icoinra huani. Asca man manfin Diospan furucoin nicafishocai maton chaca man shatupainimaran,” ishon mato yoishcani. Nan icon un Jonás finonfiacucai man ua nicapaimisima.

**Nocon ointi sharaquin
non shinansharatiro**

Mt 5.15; 6.22-23

³³ Asca huatan afanan ato yoiquin isca huani, Tsoancai lamparina ihuashon otayamafain paninaranunri fupoima. Asca huatamarocon shafacafi tsaoni nan iquiaifoan oinsharanonfo.

³⁴ Nanscarifi nocon furo rafu noco cayan lamparina cuscara. Nan rafu sharano non oinsharatiro. Ascashon nocon caya cushusharatiro non ahuuscanonma.

Nanscarifi mato nomuranshon man shinansharai man isharacointiro. Ascacia maton furo chacanocai man oinsharatiroma. Ascashu nan faquish muran ica shinantsain. Nanscarifi maton nomuranshon man shinanchacaicain man isharatiroma. Man funocointiro. ³⁵ Ascacun oinfain. Tapicahuun mato nomuranshon man shinansharai cuscan chaca shinantama. ³⁶ Ascashu shafacafi man icafin nan chashamatinin mato chashama cuscarquin. Nanscara ano man icacai faquish itiroma. Nanscarifi maton nomuranshon man Dioshuunoa fusti shinansharaino man ahuara chaca shinantiromaran, —ishon Jesús ato yoini.

**—Manfin chacafoquin,
—Fariseofo yafi Moisés cunu
tapimamisifo Jesús ato yoini**

Mt 23.1-36; Mr 12.38-40; Lc 20.45-47

³⁷ Ato yoiqi anaitiano Fariseonun Jesús yoimani pimashquin. Ascano ahuun pushu muran oashu tsaoni. Ascaino pishcaquin Fariseofo ato shunifoan ato tapimani cuscan ahuun mucu chocayoni. Asca Jesuscai Fariseo imisifo cuscan anima. ³⁸ Ascaiton oinquin Fariseon ahuun nomuran shinanni, —¡Ajaa! Nocon shunifoan noco tapimani cuscacai Jesús aimaran, —ishon shinanni.

³⁹ Ascaiton Jesús ahuun nomuran onanshon yoiqi isca huani, —Ua nicahuu. Man Fariseofoancai maton mucu chocafiaquicai man maton nomuran ahuara shara shinainma. Yora futsafahuunoa shinantama. Man ahuara futsa futsa tapasi noicoin. Maton nomuran chaca futsa futsatapafo fospicoianran, —ishon ato yoini. ⁴⁰ —Manfin fasi amaquiri shinanmisiquin. ¿Man tapiamamun tsoan noco caya fumancayan onihufain noco nomuranri onihua? ⁴¹ Ascacun

ahuuomafohuun ramapaicain ato inansharacahuun. Man ascaiton tapitirofo Diosin maton chaca mato soashotiro man sharacoin inon. Ascashu man shinain cuscan shara fustisi iishquin.

⁴² ¡Ohuashta! Fariseofoan mato Diosifin onaintimashquiquin. Mato fanafo atirifi man Dios inanmisi. Man asca huafiaquicai man futsafo shara huamisima. Ascaquifin man Diosiri noicoianmaquin. Man mato fanafo atirifi Dios inanmisi cuscan sharafia futsafo shara huafain Diosiri noicoincahuun.

⁴³ ¡Ohua! Fariseofoan Diosin mato onaintimai. Ichananti pushu muran iquitant shafacafi man tsaofafaini mato oinquin, “Sharacoinforan,” mato huanonfo. Yorafoan mato finonfoancaquin, “Noco tapimamisiton,” mato huaifoanno man unimanon.

⁴⁴ ¡Ohua! Ascafia Diosin mato onaintimai. Manfin naan yora naa cuscarafuquin. Yora mai huafu manaon cahuaqui futsafoan tapishoma puamafoantirofo. Nanscarifiai yorafo matoqui nocoflashocai tapiafoma maton nomuran man chacacoinfiacun, —ishon Jesús Fariseofo yoini.

⁴⁵ Ascaiton nicacaquin Moisés cununi cuscan tapimamisi futsan cumani, —Tapimamisiton, min anori yoiquifin nocori min roaiquin, —huaiton.

⁴⁶ Jesús cumani, —¡Ohua! Moisés cununi cuscan tapimamisifoan matori Diosin onaintimai. Man maton caifo yoiqui isca huamisi, “Moisés cununi cuscan nantifi huacahuun. Fustishta finonmayamacahuun,” ishon man ato yonoflashucai marifi man ascacoinyama. Ascatarocon Moisés yononi cuscan finonmafain man ato huama. Ascano apaifiaquicai tsoan atiroma. Ascafiafoancai maton mucuman ahuashta ato futan man

huapaiyama. Ascashu aton nomuran omitsiscafiafoancai man atohuun ramapaiyama.

⁴⁷ ¡Ohua! Diosin mato onaintimacoin. Man mato shunifo nan Diosin tsain yoimisiso maiifo ano man ahua toquiri onihumisi ato shinanshquin. Man asca huafia mato shunifo ato rutupaonifo. ⁴⁸ Mato shunifo Diosin tsain yoimisiso rutunifo. Man amisi cuscan huaquin man yorafo ismai nan maton shunifoan apaonifo cuscan huaquin marifi atofu niyoshon man asca huacuana. Ascashufin marifi man rutumitsamisi cuscaruquin. Diosin tsain yoimisiso maton shunifoan rutunifo. Ascacun maiifo ano man toquiri onanti huaquin fufoa. ⁴⁹ Ascacun Diosin onancoinshon mato huunua yoiqui isca huani, “Uhuun tsain yoimisiso yafi uhuun facu fu rafuafo ato yoisharanonfo un ato nichishqui. Ascafia atirifi ato rutufain atirifi ato omitsisca huashcaniran,” ishon Diosin mato huunua yoini.

⁵⁰⁻⁵¹ Ascan nan icon un mato yoi. Nantifi Diosin tsain yoimisiso ato rutupaonifo nan Diosin ato onihuaqui tau huanitian yafi natian. Ascacun atohuunshon Diosin matoqui nutashquin. Nan Abel rutuqui tau huafain ahuun unutaqui Zacarías nan Dios fu tsainti pushu muranshon cufiti chaimashon man rutunifo. Ascashon nantifi Diospan yorafo chaca huapaonifo cuscan natian man niyoano matoqui nutashon mato omitsisca huaqui finacoinsiqui.

⁵² ¡Ohua! Moisés yononi cuscan tapimamisifoan Diosin tsain cununi cuscan onui cafisca man huafutsafoanri tapisharanonfoma. Mancai Diospan tsain iconra huacoinnama. Ascashon futsafoanri tapipaifiaiton man ato shutia iconra huanonfoma. Ascacufin Diosin fasi mato onaintimaquin finacoinquin, —ishon Jesús ato yoini.

⁵³⁻⁵⁴ Nicacanasu Fariseofo yafi Moisés cunu tapimamisifori fasi aqui sinacoincaquin aqui tsain chipunifo. Fasi ichapafain yocanifo. Ahuarashta amaquiri ato cumaiton nicapaicaquin. Amaquiri ato yoitanaino niaifofoquin chanipaicaquin Jesús cunu muran iquimanonfo.

—Fuparamitsapaimisi
iyamacahuun, —Jesús ato yosini

12 Ascaino yorahunrasi aqui fucani yurui furanifo. Ascaiffoan Jesús afu rafuafo yoiqui isca huani, —Oinfain. Fariseofoan, “Sharaforan,” mato huamapaicani. Sharafomafinquin. Sharafo shafain man ica sharafoyamafiacun. Nanfo fuparamitsamisifo. Ascacun ato cuscara iyamacahuun. ²Ascafia ahuarashta onupaifiamisifo nantifi Diosin ato puashoshquin. Ahuarari fomanpaimisifo nanfori ato puashoshquin. ³Futsafo fomanfain arusu fusti shinanfiamisifo nanfori Diosin ato puashoshquin. Cunu muranshon onushta yoifiafo nanfori ato puashoshquin nantififain tapinonfo.

Tsoquimain man ratutiroquin

Mt 10.26-31

⁴Uhuun yorafoan un mato yoi. Mato rutupaiyaifoanno ratuyamacahuun. Mato caya fusti rutucaniquin. Asca maton yoshinfocai tsoan ahuusca huatiroma. ⁵Ascacun atoqui ratuquimarocon Diosiqui ratucahuun. Nantofi mato rutufain maton yoshinfori omitsiscapanacafo muran potatiroquin. Nanno chi urumanhuan matsinacama. Naan icon un mato yoi. Dios fustiquifin man ratutiroquin. ⁶Ascano tsitsipio mucu fustiti inanmitsashonraca toro rafu fitirofo. Ascafia Diosicai fustishtahuun ointiaquimanima. ⁷Nan icon un mato yoi. Diosin nantifi tapicoian. Mato fori man tanan

huani. Ascasho Upa Diosin tsitsipiofo shinanmisi cuscan fasi mimacai matohuunoa shinanfaini. Ascacun ratuyamacahuun. Matocafin tsitsipio aca finonmacaifain Diosin matohuun noiquin.

**Tsoan yorafoan ointaifi, —Jesús
uhuun Iforan, —huua**

Mt 10.19-20, 32-33

⁸Ascano tsoan yorafoan ointaifi, “Jesús uhuun iforan,” ishon ato yoiafin uhuun Upa Diosin ahuun oinmatifoan afu nai muran icafoan ointaifi, “Nanfin uhuun yoraquin,” ishon un yoishquin. ⁹Asca tsoa yorafoan ointaifi, “Jesús uhuun ifomaran,” ishon yoia nantocai ua icoinra huamisima. Nanscarifi huaquin Diospan oinmati afu nai muran icafo ointaifi, “Nancai uhuun yoramaran” un yoishquin. ¹⁰Tsoan ua chaca huafin Upa Diosin rau huashotiroquin. Asca tsoan Diospan Yoshin Sharaqui tsain chaca huacai rauhuanacama. Aton chaca atohuun nuupacunaca.

¹¹Ascano ichananti pushu muran mato iyocashon niaifofoan ahuun ointaifi raquirira mato huafiaifoan shinanchacayamacahuun. ¹²Nantianfin Diosin ahuun Yoshin Sharapan mato shinanmatanaino mato tsain chaca huaifo Diospan Yoshin Sharahuunshon man ato cumasharanon, —ishon Jesús ato yoini.

Yora mafo ichapaya musucoinquin

¹³Nannoa nia futsan Jesús yoini, —Tapimamisiton, uhuun yora ua yoishohuun nocon upan noco inan cuscan uari pashcashonon, —huaiton.

¹⁴Jesús cumani, —Uhuun yoran. Uncai tsoa yoimisima futsa pashcashonon. Tsoanricai ua catoanma un ato pashcanan huanon, —ishon yoitan.

¹⁵ Afanan ato yoiqui isca huani, —Ua nicacahuun. Matonama fuchipaiyamacahuun. Ahuara ayafiashon afanan finonmafain fipairiyamacahuun. Mafo ichapayahuunoashucaí non unimatiroma. Nocon mafocai nocon ointi unimamatiroma. Nocon mafuhuunoashucaí non isharatiromaran, —ishon ato yoini. ¹⁶ Ascashon nocofunun ichapayahuunshon Jesús ato ahua yosini isca huani, —Nocofunu futsa mafo ichapaya ahuun mau ano ahuun yono sharafori ichapaya ini. ¹⁷ Ascacun nan nocofunu mafo ichapayaton shinanqui isca huani, “¿Umun uhuun yonofu ahuusca huaiquin? Uhuun tasha pushufo murancai uhuun yonofu icoinama. ¹⁸ Ascacun uhuun tasha pushufo pucashon un afanan uhuapacoin huai. A muran uhuun yonofu yafi uhuun mafofo icoinon. ¹⁹ Uhuun nomuran un shinanqui isca huaa, ‘Uhuun ahua ichapa iquisi mucushon chipo un tunusharafain ayafain aqui pifain monocain un unimasharacoinniran,’” ishon ahuun nomuran shinanni.

²⁰ Ascashon anori shinanfaiaton Diosin yoini, “Mincai ahua tapiama. Na yamutafin min naicain. ¿Min naanomun na min mucuafo ahuuscaiquin?”

²¹ Nanscafin yora ahua ichapayashon Diosin shinantama imisishaquin. Naashucaí afanan ahuya iquima. Nan ahuuoma cuscara iishquin, —huani.

Diosin ahuun facufo cushushara

Mt 6.25-34

²² Ascaino Jesús afu rafumisifo yoiquin isca huani, —Afanan un mato yoisharanon. Ua nicasharacahuun. Isca huaqui shinanyamacahuun, “Non ahua pimara,” ishon shinanchacayamacahuun. Ahuaricai non sahuuimaran iyamacahuun. ²³ Non

ahuara pifain non sahuuatocai noco imasharatiroma. ²⁴ Shinancapon. Nan puiyafocai ahua fanayamafain ahua chitunmisifoma ahuaricai fotsuyamafain ahua mafociacun Diosin ato pimamisi. Nanscarifi aquin Diosin matohuun noiquin nan puiyafocai aca finonmafain mato cushushara. ²⁵ Ascacun shinanchacayamacahuun. ¿Non shinanchacatocai shafa fusti noco nimayotromun? ²⁶ Asca shinanchacahuunshoncai ahuaton noco nimayotiroma. Asca ahua futsari shinanchacahuunshon noco imatiroma. Asca ahua shinanchacayamacahuun.

²⁷ Ascashon shinanqui isca huayamacahuun, “¡Ohuashta! Rianamun un sahuuti finanti sahuushqui,” ishon shinanyamacahuun. ¡Shinancapon! Salomón sahuuti sharashtacoin sahuufiapaonicai nan charo sharashtacoinfo cuscarama. Charofocai yonoyamafain sahuuti icushuima. ²⁸ Diosin charo sharashatacainfo onihua. Foaisharafia supashon samamashta tsasicun coatirofo. Nanfo finonmacaifain mato noiquin mato sahuuti sahuumashquin. Ascafia mancai icoinra huasharacoinnama.

²⁹ Ascacun shinanquin isca huayamacahuun, “¡Ohuashta! Unmun ahua piishquin uhuun tushuyamaino. Unricai ahua sahuuimaran,” ishon shinanchacayamacahuun. ³⁰ Ascan nannori nan icoinra huamafoan shinanchacamisifo. Ahuara pifain sahuupaiyaifo fustisi shinanmisifo. Ascan maton Upa Diosin tapiquin man yopai cuscan. Ascacun mato inanshquin. ³¹ Ascacun Diosicairocon shinanchahuun. Mato yonomapayai cuscan nan fusti shinanfaiacahuun. A cuscara shara ipaicahuun. Nancai shinanquin tau huafafaincahuun. Man ascaiton ahua futsa man yopai cuscan Upa Diosin mato inanshquin.

**Diosin icarishon ahuara
sharacoinfo noco mucushotiro**

Mt 6.19-20

³² Ascano uhuun yorafoan ratuyamacahuun. Maton Upa Diosin mato cushushara. Nantifi ahuuna matori inain. Unimacai mato inanshquin. ³³ Maton mafo inanmitsacahuun ahuun rafanan pui fishon yora ahuuomafo inanshcaquin. Man ascaiton Diosin nan icanoshon mato ahuara sharacoinfo mucushoni. Nanfocai cuyopacunacama. Coroisin nanfo piquin chacana huayamainocai yomutsori ano iquitiroma ahuara mato fianshquin. ³⁴ Asca man mafo fusti shinanfafainquifin nan fusti man noicain. Ascan man Dioshuunoa fustisi shinanfafainquin nanrifi man yonoshosharafafaintiro ahuun noicoinquin. Ascashu man afu isharapacupaitiro.

Iquisi itisharacahuun

³⁵ Ascacun itisharacahuun. Un mato anoashu un chipo nai muran caiquin. Ascafiashu ratoran shafatan iyamarai yamu un matoqui afanan nasoshquin. Yamu yora futsa nocoaiton manaquin lamparina otatiro itisharashon. Asca nanscarifiai itisharacahuun. ³⁶ Oinmatifoan aton ifo fustitian mai futsa ari cano futsafoan a pushu anoshon manasharatirofo. Ascano ifoan nocoshon ato cunaiton yoitirofo, “¡Aicho! Iquiyohuu,” huatirofo.

³⁷ Ascaino Ifoan nocoshon oian ahuun oinmatifo itisharafoanno unimacointiro. Nanforifi a unimatirofo. Ascan un mato icon yoi, Nan ifoan atoqui nocoshon ato pimaquin yoiqui isca huai, “¡Aicho! Fucahuun. Un mato pimapaiquin,” ishon ato yoitiro.

³⁸ Ascashu man rama osha pacuaino iyamarai yamunacuhuanaino iyama-

rai shafa matsi matsicaino ifo nocoaiton oin ahuun oinmatifo itisharashu fasi aqui unimacointirofo. ³⁹ Ua nicas-haracahuun tapishcaquin. Pushu ifoan iquisi itisharashon yomutso yamu ahuuscaraino ahuun pushu muran iquiai tapishocai iquimatiroma. ⁴⁰ Nanscarifiai marifi itisharacahuun. “Iscaino nocon ifo oimaran,” ishon shinanyamacahuun. Ahuuscara atanaino un matoqui nocoriscaino, —ishon Jesús ato yoini.

**Oinmati rafu futsa ifoan yonoai
cuscacoin aino futsa nan
yonoai cuscacoin aima**

Mt 24.45-51

⁴¹ Ascaiton Pedronun yocani, —¿Ifon, min ahuarayo yoi ai cuscan noco fusti min tapimapai iyamaraimun nantifi yorafori min tapimapaiquin? —ishon yocaiton.

⁴² Jesús cumani, —Man tapinon un mato yoi ahuu cuscaramain oinmati shara itiroquin.

Niaifocoin mai futsa ari caquin niaifo patasharinoaton yoitiro isca huaquin, “Uhuun oinmati futsafo ato tushu shafatifi inanhuun. Nanticoin rafu aton pashcanan huahuun,” huafaini catiro. ⁴³ Ascatan niaifocoin afanan nocoshon oinquin ahuun niaifo patasharinoan nan yoi cuscacoin aano fasi aqui unimacointiro. Ascashon nan shara huacointirori.

⁴⁴ Ascacun un mato icon yoi. Nan niaifoan ahuun oinmati yoi, “¡Aicho! Nantian nantifi uhuunafo min ua cushusharashotiroran,” ishon yoitiro. ⁴⁵ Ascafia nan niaifo patashari chacapan ahuun no-muran shinanqui isca huatiro, “Uhuun niaifo funa nasoimaran,” ishon shinanquin oinmatifo futsafo nocofunufu yafi ainfori ato chaca huaqui futsani. Ascashu shafatifi pauncain monoi. ⁴⁶ Ascaino ahuun niaifocoin samamashta nocoriscatiro. Nan oinmati chaca itisharamano ahuun niaifo nocoshon a onainti-

mai. Ascashon niaifoan oinmati futsafo yonoqui isca huai, “Nan oinmati chaca icoinra huamafoanno potacahuun omitsiscapashanon,” ishon yoishqui.

⁴⁷ Ascan nan oinmati ahuun niaifoan yoia cuscan man tapifiashu ascayamacai itisharayamacun ahuun niaifoan nocoshon a fasi curushcain coshaquin futsai. ⁴⁸ Asca nan oinmati futsa ahuun niaifoan yoia cuscan tapishoma chaca huacun nan icoquin ahuun niaifoan ichapama coshashquin. Nanscarifiai toa Diosin ichapa tapimana aqui nococun yocaqui isca huai, “¿Un mia ichapa tapimana cuscan man mian nanscacoïn aamun? ¿Ascashon futsafori un mia yoia cuscacoïn min huashoamun?” ishon yocashquin. Ascacoïn huaiyamashu funotiro.

Yoraofoancai Jesushuunoa nannorisi shinantirofoma

Mt 10.34-36

⁴⁹ Un nantifi manifotifi chaca shatuman yoi un oa. Atirififoan ua icoinra huaifoanno futsafoan ua icoinra huacanima. Nan icoinra huamafo Diosin ato onaintimai. Uhuun Upa Diosin ua mai ano yonomai cuscan natian cuyoa shara icuana. ⁵⁰ Ascafiacun matohuunoashu naashqui un oni. Un nataima iquisi un omitsiscacoïnshquin. Ascashu u omitsiscacaini naashquin. ⁵¹ Ascan man shinanmun nantifi manifoti anofo uhuunoashu unimanonfo un oni. Ma. Ascaramafiqui. Un mato yoiai cuscacai tsoan nannorifosi shinancanima. Asca nan ua icoinra huafoan sharafosi shinainfoanno nan ua icoinra huamafoan ahuara chaca futsafosi shinancani.

⁵² Ascashu pushu fusti muran mucu fustiti icafoan rafutasi ua icoinra huaifoannocai nannorisi atirifiton tsoan shinantiroma. Nanscarifiai rafutan

iyamarai rafu non fustifain ua icoinra huaifoannocai nannorifosi atirifiton tsoan shinantiroma. ⁵³ Apa ua icoinra huaino furumun ua icoinra huashma apaqui sinatiro. Ahuan ua icoinra huaino ainfacu ua icoinra huashma ahuaqui sinatiro. Ahuun yayan ua icoinra huaino ahuun raru ua icoinra huashma ahuun yayaqui sinatiro, —ishon Jesús afu rafuafu yoini.

Nai foisquin non tapitirohuunoa

Mt 16.1-4; Mr 8.11-13

⁵⁴ Ascaino nannori yorahuanrasi mapofoan afanan ato yoiquin isca huani, —Fari iquiai anori nai choshtacoïn foancuaiton oinquin, “Oi fuiran,” man huano. Oi futiro. ⁵⁵ Ascasho manri yoimisi, “Fuu fari cai istafari fasi shana iishquiran,” man huamisi. Ascan nan icon fasi shanacoïn itiro. ⁵⁶ Ascafia mancai man yoia cuscacoïn amisima. Nai foisquin man tapitiro oi fui iyamaraimain fuimacai. Ascafia mancai Diosin mato yoia cuscan icoinra huapaima. Natian ahuara ahuuscarai cuscacai man tapiama.

Tsoan mia chaca huamapaiyai shara huarisca huahuu

Mt 5.25-26

⁵⁷ ¿Ahuuscain mafiri man cayacafi shinanharaimamun? ⁵⁸ Tsoara futsan mato yoiqui isca huai, “Min ua chaca huacusan. Un miqui niaifo yoicairan,” ishon mia yoicun. Niaifo ari cataima rufoto shara huacahuun. Man asca huayamacun niaifoan mato cunu muran iquimatiro. ⁵⁹ Mato iquimanocai man cainritiroma nifian cuscan nantifi inanshu man caintiro. Nanscarifiai man Dios chaca huamisiquin. Oatima iquisi mato yoia cuscan acahuun mato omitsiscahuanonma, —ishon Jesús yoini.

Nocon chaca shatushon Jesús noco amapaiyai cuscan fusti non yopacoin

13 Nantianri futsafo Jesusqui fucashon yoiqui isca huafo, —¿Tapimamisiton, man min tapiamun Pilatonun Galilea anoafu rafu rutua? Ascashon Dios fu tsainti pushu muran aton imi yafi inafonan ahuun imi osia Dios cufiti camaqui huaran, —ishon yoiainfoan. ²Jesús ato cumani, —¿Man shinanmun nan Galilea anoafu rafutan chaca huaqui fina ahuun caifofoan acama cuscan huaquin? ³Ma. Ascaramafinquin. Marifi maton chaca shatutama nan man shinanpaoni cuscasi shinanriaqui Dios icoinra huashuma marifi man omitsiscapanaca.

⁴Man shinanrimun nan dieciocho yorafoqui pushu cuyacoin ahuun anu Siloé atoqui paoinquin atoti rutuni. Nanfoanmun fasi chaca huaquin finacaimisifo nan Jerusalén anoafonan acama cuscan finonmafain. ⁵Ma. Ascaramafinquin. Marifi maton chaca shatutama nan man shinanpaoni cuscasi shinanriaqui Dios icoinra huashuma marifi man omitsiscapanacaran, —ishon Jesús ato yoini.

Huiguera fana fimiomahuunoa Jesús ato yoini

⁶Ascashon ahuara futsahuunoa ato yoiquin ato tapimanon isca huani, —Nocofunon ahuun mau mamaqui fimi fanani ahuun anu huiguera. Ascan chipo fimimisitian fii capaiquin oian fimiama ini. ⁷Ascacun nan mau ifoan ahuun mau cushumisi yoini, “Rafu non fusti fari na huiguera fimiataima. Un ahuun fimi fipaiaino fimiama. Ascan natian rurahuu. Non ahuara futsa nanno fananon,” ishon yoiaiton. ⁸Nan mau cushumisiton yoini, “Ifon un afanan mana futsayononhuun. Afanan na fari fusti non manayonon. Un natian cushusharafain ahuun tapo ano un

ahuara futsafo huayonon fimisharanon. ⁹Nan un asca huainomain fimi qui non oinon. Ipaishoma na fari anaitiano man fimi ya shara itiroquin. Ascan fimiya-maiton min ua ruramatiroran,” ishon mau cushumisiton yoiniran, —Jesús ato yoini

Jesús tunutitian ainfo putoco caya huani

¹⁰Ascano chipo Israelifonan ichananti pushu muranшон tunutitian ato Diosin tsain yoini. ¹¹Ascashon ato yoiaino nannori ainfo putoco dieciocho fari isintiani atofu nanno ini. Yoshin chacanun nan ainfo nansca huaa. Cayacaficai nimisima. ¹²Nannoa fuchishon Jesús yoini, —Ainfoshtan, natianfin min cayaiquin, —ishon yoitan. ¹³Ahuun mucuman manmainno samashta cayacafi ninacahuani. Ascatan, —¡Aicho! Diosin ua cayahuaquin. Dios fasi shararan, —ainfoan huani.

¹⁴Ascafiaino ichananti pushu muran-noa niaifo fasi sinaquin ato yoini, —Seis shafatan non yonotiro. Ascan na shafata tunutitiancai tsoa cayayotiro. Cayapai shafa futsan otiro cayashquin, —ishon ato yoini.

¹⁵Ascaiton nocon Ifo Jesús a cumaquin isca huani, —Manfin fuparamitsamisifoquin ¿Asca manmun tunutitianfiacun maton moi iyamarai burro man tuputiro unu ano iyoquin ayanonfo? ¹⁶Ascano na ainfofin nocon caifoquin. Abraham ahuun funa. Satanashuunoashu dieciocho fari putocoa. Cayacafi niisharamisima. ¿Asca ahuuscaimun un tunutitian na ainfo cayahuatiromaquin? —ishon Jesús yoiaiton. ¹⁷Nicacani Jesús noicasmaifo fasi rafipaicaquin tsoan cumanima. Jesús ahuara sharafo huaiton oincani atirifo aqi unimacoinnifo.

Mostaza ushuhuunoa Jesús ato yoini

Mt 13.31-32; Mr 4.30-32

¹⁸ Ascaifoa Jesús ato yocani, — ¿Ahuu cuscaramun Diosin ahuun yorafo nantifi ato iquifain ato yonotiroquin? ¿Ascan ahua futsarimain Diosin ahuun yorafo cuscaraquin? Un mato tapimai. ¹⁹ Nocofunun ahuun pushu umainti mostaza ushu fanani. Asca foaica ihui tio ica. Puiyafa ahuun tushpahuu tsafo. Nanscarifiai Diosin ahuun yorafo tau fustirasi ifiashu chipo paratama caitoran, —ishon ato yoini.

Misi farashatihuunoa Jesús ato ahua futsa yosini

Mt 13.33

²⁰ Afanan Jesús ato yocaquin, —¿Ahua futsamun Diosin nantifi iquina cuscaraquin? Un mato tapimai. ²¹ Diosin ahuun yorafo nantifi ato iquifain ato yonotiro cuscan un mato tapimai. Ainfoan farashati ichapamashtaya harina osishon camisonano farashuinitiro. Nanscarifiai Diospan yorafo taucani fustirasi ifiashu paratama itirofo. Ascashu icoinra huamafo muran ishon ato shara huaino atirifiton ahuunshori icoinra huatiroforan, —ishon Jesús ato yoini.

Caincaiti atsoshtahuunoa Jesús ahua futsa ato yosini

Mt 7.13-14, 21-23

²² Ascashon Jesús pushurasiti ano yofoni Jerusalén ano nocopaiquin. ²³ Ascaiton futsan yocani, —¿Ifon, fustirasitomonun aton chaca soacaniquin Upa Dios fu nipashcaquin? —ishon yocani.

²⁴ Ascaiton Jesús ato cumaquin isca huani, —Uhuun Upa icanocai atirifi iquitirofoma. Ascacun nan un mato yoiái cuscacoin nantifi huacahuun. Nan

fai atsoshta tanashcaquin. Ascashon marifi Diosin tsain tanasharacoincahuun iquisharashcaquin. Yora ichapafa iquipaifianicai iquitirofoma. ²⁵ Nan pushu Ifo Diosin ahuun cunu fupoti fupoanocai tsoashta afanan iquitiroma. Ascacun chifi nishon yoiqi isca huatirofo, “Ifon, noco cunu fupushohuun. Min icano non canon,” huariacani. Tuyuyun ifiaifoancai ato fupushotiroma. Fuputama ato yoiqi isca huatiro, “Mancai uhuun yorafoma,” ato huafiaino.

²⁶ Yoicaquin “Non mi futan pifain ayafain huamisi. Min noco yosiaino,” ishon yoishquicani. ²⁷ Ascafiaifoa afanan ato cumaquin isca huashquin, “Mancai uhuun yorafoma. Uncai matofu rafumisima. Manfin chaca huamisifoquin. Ascacun umaquinoashu fotacahuun,” ishon ato yoishquin.

²⁸ Ato asca huaino nannoashu uaicani omitsiscái futsusheani. Dios fu rafuafo Abraham non Isaac non Jacob non nantifi Diosin tsain yoimisifo Dios fu icafo oin atoqui capai man fasi uaiqui. Yoishquin isca huaquin, “Ahuuscashucái non catioma. ¡Ohua! Ahuuscain un Dios nicacasmamisishaquin. Un omitsiscapanacaran,” ishon man yoishquin. Man ascafiaton Diosimaquishon mato potashquin.

²⁹ Ascaino manifoti anoashu Diosin ni-aifoa ahuun yorafo iquina ano nococanashu afu unimashcani. Ascaifoa Diosin ato yoiquin isca huashquin, “Uqui fucahuun. U fu ipasharashcaquin,” ishon Diosin ato yoishquin. ³⁰ Shinan-capon. Futsafocai natian Diosin ahuun yorafoma. Chipó icoinra huacanashu ahuun yora ishquicani. Futsafoan man Diosin tsain nicafiamisishaquin tsoa ascacoinyafoma. Afocai afu itirofomaran, —ishon Jesús ato yoini.

Jesús Jerusalén anoafohuun ramapai uaini

Mt 23.37-39

³¹ Nantianri Fariseofo Jesusqui fucashon yoinifo, —Nunoashu mai futsa ari cariscatahuun. Nan niaifo Herodes mia ato rutumapai oiquin, —huaifoan.

³² Jesús ato cumani, —Nan onanya yoitacahuun. “Uncai nunoashu funa caima. Na shafata yafi shafa futsa un yorafo yoshin chaca atohuun nua un ato caya huafain isincaifori un ato cayahuayoi. Uhuun yonofu anaititan nan un nocopai ari un nocoicai. ³³ Un natian uhuun Upa ua yonoa cuscan nan fusti un yonoyoi nan un naitian. Man man tapia Diosin tsain yoimisifo Jerusalén anoshon fusti ato rututirofo.”

Jerusalén anoa yorafohuunoashu Jesús uaini

³⁴ ¡Ohua! Jerusalén ano icafoan. Manfin Diosin tsain yoimisifo rutufain nan Diosin matoqui nichian futsafori man toquirinin ato tsacaqui nanonfo. ¡Ohua! Tacaranun ahuun facufo ahuun pui naman onutiro cuscan huaquin un mato yafi mato yorafo cushupaifia mancai ua nicapaimisima. Manricai uqui fumisima un mato cushunon. ³⁵ Ascan nantiancai tsoan mato cushuima. Diosiricai afanan mato cushuima. Ascacucai man ua afanan oinnacama Diosin matoqui nichian un nai murannoashu oaitian. Man yoiqui isca huaino, “Diosin nocoqui nichian fasi shara finacaia. Upa Diosin a shara huapanacaran,” ishon man uhuunoa yoishquin, —ishon Jesús ato yoini.

Jesús nocofunun ahuun poyan rafu yafi ahuun quishi ocuma rafuri quihuarashica caya huani

14 Man ascano chipo Fariseo niaifoan ahuun pushu muranshon Jesús tunutitian pimani.

Ascaino yora futsafori afu pushu muran iquinifo. —Jesusmain ahua huaicain non oinnon, —icanashu.

² Ascaino nannori nocofunu poyan rafu farashicain quishi rafuri farashiqui futsua. Ato fu iquia oincaquin atirifoan shinannifo, —Jesusmain cayahuaicain non oinnon, —ishon. ³ Ascaiton Fariseofo yafi Moisés cunu tapimamisifo Jesús ato yocani, —¿Tunutitianmun non ahua ahuusca huatiroma? ¿Moisés cununi cuscan tunutitian non yora caya huatiromanmun? —ishon. ⁴ Ato yocafiainocai tsoa puusinima. Ato asca huatan a isinincal Jesús mutsoano cayariscani. Ascacun Jesús a nichini.

⁵ Ascashon Jesús ato yocani, —¿Rato man futsamun tunutitian maton facu futsa iyamarai maton moi mai quini muran pacucun man ihuirisca huatiromaquin? —ishon ato yocaino. ⁶ Tsoa puusinima.

Nocofunun yafi ainfo fianaintian piitirofihuunoa ato yoini

⁷ Ascashon Jesús oinni shafacafi tsaopaiyaifoan —Noco oinsharanonfo, —icanashu. Ascaifoan oinquin Jesús ato yoini, —Ua nicasharacahuun un ahuaara futsa mato yoi man tapinon. ⁸ Tsoan mato piimaino pushu ifo tsoano tsaoyamacahuun. Un tsoa cuscaramaran ato huamapaiyamacahuun. Min pushu ifo fu tsoaiton mia yoitiro, “Nuno min tsautioma yora futsa nuno tsaoyoi. Nan mia finoncoian. Ascan minfin futsano tsaotiroquin.” ⁹ Aton ointaifi pushu ifoan mia anori acaino min fasi rafipaicai. Shararocoai min pasotain tsaotiro. ¹⁰ Ascan ifoan mia tsaopaiquin a chaima mia cunatiro. Mia asca huaiton oinonfo a mia shara huai cuscan.

¹¹ Ascan tsoa oinanpaimisi chipo Diosin ismashquin acai ahucuma. Ascan tsoa oinanpaimisima naanfin

yorafoan ointaifi Diosin yoitiro isca huaquin, “Ua chaima tsaoyohuu. Ufu nipashquin,” ishon yoishquiran, —Jesús ato yoini.

¹²Ato asca huatan nan pimai Jesús yoiqui isca huani, —Min yorafosi yafi yora mafo ichapayafo pimapaiquin nanfosi cunayamahuu. Nanfoanri mia copiquiri aton pushu anoshon mia piimacani. ¹³Ascatamarocon man yorafo man pimapaiyai cuscan a yora ahuuomafo yafi yora nipaiqui ranainfo non a fushofori piimacahuun. ¹⁴Nanfoan mato copiquiri shara huapaifiaquicai atirofoma. Ascashu man Dios icari nococun man ato shara huaiton oian cuscan Diosin nantian mia shara huacoinshquiran, —ishon Jesús Fariseo yoini.

**Nocofunun tushu sharacapacoin
yorafo pimapaiyaihuunoa
Jesús ato ahua futsa yosini**

Mt 22.1-10

¹⁵Futsan sapa ano tsaoshon Jesús yoini, —Ifon, Upa Diosin nantifi yorafo iquinai ano atofu iquiashu fasi ipasharashquiran, —ishon yoiaiton.

¹⁶Jesús cumani, —Nocofunu futsan tushu ichapa itishara huashon yora ichapafafo chani huani a futan piishquin. ¹⁷Ascano man itishara huashon ahuun oinmati nichini ato yoitanon. Yoiqui isca huani. “Nan un chani huafo ato yoi foanfafahtahuun isca huaquin, ‘Man nantifi itishara huaqui. Fucahuun,’ ishon ato yoitahuun,” huani.

¹⁸Asca huano caashon ato yoiaiton, “Un cayotimaran,” ishon yoipacunifo. Futsan yoiquin isca huani, “Un rama mau fia. Natian un mau ari capai oincai. Ascacun un mia yoi un ari cayotimaran,” ishon yoini.

¹⁹Futsanri yoiqui isca huani, “Un rama moi rafurasi nushua mucu fustiti un fia. Un natian ato yonomapai

yonosharacanimainquin un ato oinpai. Ascacun un ari cayotiroma mi futan piishquin,” ishon yoini.

²⁰Ascano futsan yoiquiri isca huani, “Un rama ainfo fia. Ascacun un ari cayotiroma mi futan piishquin,” ishon yoini.

²¹Asca huaifoanno oinmati ahuun ifo ano nasoshon nan yoirafo cusari yoini. Ascaiton nicai pushu ifo atoqui sinacoinni. Afanan ahuun oinmati nichiqui yoini, “Natian pushurasi anoa faifoti ano cariscatahuun yora ahuuomafo yoifain nipaiqui ranainfo yoifain fushofori yoiriscatahuun un ato pimanon,” ishon yoini.

²²Asca huano afanan cashon nan yoia cuscacoin ahuun oinmatinin huashotani oi. Naso cura ahuun ifoqui oshon yoini. “Ifon, mian yoia cuscan mun ato yoia. Ascan natian man fucani. Ascafia min pushu fospicanima. Tushufori tushuiran,” huaiton.

²³Pushu ifoan afanan yoini, “Afanan fai futsafo ari cariscatahuun ua ato yoishoshquin funonfo. Ato yoihuu isca huaquin, ‘Uhuun ifoan pushu ano nitutama furiscacahuun mato pimapaiquin,’ ishon ato yoitahuun uhuun pushu fospifunonfo. ²⁴Nan yorafo un tau huaqui ato pimapaiyafocanai u futan pinacafoma,” ishon pushu ifoan yoiniran, —Jesús ato huani.

**Cristo tanapaifi yora itisharatiroquin
omitsiscashoshquin**

Mt 10.37-38

²⁵Yorahuanrasi afu foaifoan. Ifiacucahuan ato yoini, ²⁶—Tsoan ua finonmacaifain apa yafi ahua non ahuin non ahuun facufo non ahuun yorafo non poifo afiri noiashucai ua tanamisi itiroma. ²⁷Ascan unfin mato ihui coyan iquinanqui nashoshquicain. Ascafia tsoan yoiqui isca huaima, “Natian un Jesús tana. Ascacun nai omitsiscafiaquicai un

shinanchacaimaran,” ishon tsoan anori yoicasmai acai ua tanamisi itiroma.

²⁸Nanscarifiai tsoan pushu huapaiquin iquisi shinanyotiro ahuun pui itiromainquin. ²⁹Ascano pui iyamaitocai pushu huatiroma. Quishifo fusti nichiano yorafo aqui cashutiofo. ³⁰“¡Cuu! ¡Oincapon! Na nocofunun ahua huatiroma. Ahuun quishifo fusti nichian. Pushu anaitima. Ascaracai sharamaran,” icashu aqui cashutiofo. Nanscarifiai nan man naitian ua tanacahuun. Nan man naitian ua tanapaiyamaquin “Un Jesús tananon,” iyamacahuun.

³¹Nanscarifiai niaifo rafu noconain aton ranushumuafu rutunanonfo. Futsa diez mil ranushumuafu aya icaino futsa veinte mil ahuun ranushumuafu ya. Ascacun nan diez mil ranushumua ayaton iquisi fasi shinainyotiro ahuuscamin acanicain. ³²Ascacun afu niaifo tsain fomayotiro isca huaqui, “Non rutunainmaquin. Nanscanon. Min noco rutuyamacun min fipaiyai cuscan mia inantiroran,” icashu raunantirofo. ³³Nanscarifiai ratoranfoan uhuunshon nantifi ahuunafo potayamashucaí ua tanamisi itiroma.

Sao sharacunma non fipaitiroma

Mt 5.13; Mr 9.50

³⁴Ascacun shinacahuun. Sao sharacun non tototiro. Asca sao sharamacai non tototiroma. Chacacun. ³⁵Nanscaracai tsoanshta yopaima. Potacani. Nanscarifi aquin tsoan uhuunshon ua tanasharayamacai uhuun nuusharaima. Chacacoin iqui. Tsoanmain man pafiqui sharayaquin ua nicasharacahuun, —ishon Jesús yoini.

Chashoan cushumisiton ahuun chashoan funoa fuchiahuunoa Jesús ato ahua futsa yosini

Mt 18.10-14

15 Asca nantiantanri niaifo puifishomisifo yafi yora chaca huamisifo aqui funifo ahuun tsain nicai fucani. ²Ascaino Fariseofo yafi Moisés cunu tapimamisifo Jesusqui tsain chaca huaquin yoinifo isca huaquin, —¡Oincapon! Jesús yora chacafo fu rafutiro ato futan piaiton, —ishon yoinifo.

³Ascaifoan onanshon Jesús ato yoiqui isca huani ahua futsa ato tapimanon, ⁴—Ratoran man futsa cien chashoan ayafiano fustishta amaqi funoano atirifi nan noventa y nueve fasi fununun man potayofaintio. A fusti funoa funaiyoicaqui nan man fuchiaitian. ⁵Ascano fuchishon unimacain chishtoinifoan man iyafaintiro ahuun pushu ano foi caquin. ⁶Asca huatan ahuun pushuano nocoshon man atoti chanihuai a chaima icafo yafi afu rafuafo ato cunaqui isca huatiroma, “U fu unimai fucahuun. Uhuun chashoan funoa mun fuchiaquin,” ishon man ato yoitiro. ⁷Ascacun un mato yoi nanscarifiai futsan ahuun chaca shatucoianshu afanan ipaoni cuscan atama Dios ifoacoinna oincani nantifi Dios icanofo fasi unimacoincaini. Noventa y nueve yora sharafo nanfocai tsoa Diosqui nasoima manmain tanasharacanashufin. Ascan nanfoqui unimafiacani nan chaca huamisiton Diosin icoinra huanocaifin fasi aqui unimai finacoincainquin.

Ainfoan ahuun toro funoa fuchiahuunoa Jesús ato ahua futsa yosini

⁸Nanscarifiai yainfo futsa mucu rafuti toro paratamacoin ahuun pui nuua aya

ini. Pushu muran fusti funoni. Ascano lamparina otani ahuun tapa ano matsoyanan funashquin. Ascashon funariaquin fuchini. ⁹Fuchishon ahuun yorahuafo yafi a chaima icafo cunashon ato yoiqui isca huani, “Uhuun yorafoan ufu unimacahuun. Uhuun toroshta mun funofishon natian mun fuchiaran,” ishon ato yoini. ¹⁰Nanscarifiai tsoan ahuun chaca shatuashma man funoa. Ascafashon Diosin icoinra huaino Diospan oinmatifo nai murannoashu fasi aqui unimacoincaniran, —ishon Jesús ato yoini.

Apa furu rau huaa cuscahuunoa Jesús ato ahuara futsa yosini

¹¹Afanan Jesús ato yoiqui ahuara futsa ato tapimaquin isca huani, —Nocofunu futsa facu rafu ya ini. ¹²Ascano chipocuton apa yoini, “Upan, nan naaquin mian inanfanonpacoai natian iquisi ua inanhuun,” huani. Ascaiton apan ahuun pui cashcu futsa ahuun facu chipocu inanni.

¹³Ascano shafa ranan finontan ahuun facu chipocuton nan apa inan cuscantifi ahuun rafanan pui fiananan huani. Asca huatan mai futsa chaicoin ari cani. Nanrishon ahuun pui shafatifi potani monocain pauncaiyainfo furomafo fu icai. ¹⁴Asca huaqui nantifi ahuun pui potaquin anaitini. Ascashon nantianri a mai ano tushu yamacoin ini. Ascashu arifi chipo tushu yamaino fasi fonicoinni. ¹⁵Ascano nan mai ariashu nocofunu futsa ano cashon yono yocaqui isca huani, “Un mia yonoshopairan,” ishon yocani. Ascaiton pushu ifoan nichini yahuarasi faasi funununshon pimanon. ¹⁶Ascashon yahuarasi maropa ahuun shacafo pimani. Ascaino nantian fasi fonicoinquin arifi piqui rashquini. Tsoancai a pimanima.

¹⁷Ascaquicai nan chaca shinanpaoni cuscantifi ahuun shinanpainima. Nantian cayacafi shinanquin isca huani, “¡Ohua!

Uhuun upa ahuun oinmatifoan natian man piisharafo. Aton tushufori man tushu huafo. Asca unfin nunoashu fonicoi naicain. ¹⁸Asca natian un afanan uhuun Upa ari cai. Nocoshon uhuun upa un yoitiro isca huaquin, ‘Upan, un Dios chaca huafain miari chaca huamisi. ¹⁹Ascantifi ahuun unafanan min facu cuscara itiro. Natian min yonoshomisi cuscara un itiroran,’ ishon uhuun upa un yoishquin.” ²⁰Nannori shinantan apa ari cani.

Ascashu caiton chai cunoa apan ahuun facu fuchini. Fuchitan fasi ahuun rama paicoin aqui ichoni. Aqui nocoshon icoacufoan tsoatoshini.

²¹Ascaiton apa yoiqui isca huani, “Upan, un Dios chaca huafain miari un chaca huamisi. Asca un afanan natian min facu cuscara itiro,” ishon yoifiaino. ²²Apan ahuun oinmatifi yoini, “Ichoriscatahuun. Sahuuti sharacapacoin yafi anio fifain saporitifi firiscatahuun. Uhuun facu ua sahumashocahuun. ²³Ascashon moipan facu shoa sharari ua rutushocahuun uhuun facu un pimanon. Noco sharano non fasi aqui unimanon. ²⁴Uhuun facu man naa shinantsa amisishaquin afanan man nasoaquin. Natian afanan ufu nuno nia. Man funofiani natian afanan man non fuchiaquin. Non ichananon nantifi aqui unimaquin pifain non mononon. Noco manutifo non manunon,” ishon apan yoini.

²⁵Ascaino iyoa mau ano yonofaiashu nasoqui pushu chaimashon nicani fasi manuti manuaino monoaifoan. ²⁶Ascaiton nicaquin ahuun oinmatifi cunashon yocani, “¿Uhuun upa pushu anoshon ahua huacanimun?” ishon yocaiton. ²⁷Ahuun oinmatinini yoini, “Min ushto rama nocoano min upa fasi unimacoinquin ato ichanan huaa moipan facu shoa shara ato pimafain manuti manufain ushto ahuuscatama

noco sharano unimaquin upa aquiran,” ishon yoini.

²⁸ Ascaiton nicai iyoa fasi sinacoin pushu muran iquinima. Ascaino chifacatan apa ahuun facu iyoa yoini, “Upashtan, pushu muran iquiyopun. Min ushto rama noco sharaquin,” ishon yoiatton. ²⁹ Cumatama apa yoini, “Shinanpon. Un fari ichapa min oinmati cuscara un mia yonoshomisi. Ascashu min ua yoiái cuscacoin un huamisi. Uncái yoitimamisima. Ascafiaucúcai mian chashoanun facu rutushomisima uhuun yorafo fu un ichananshon unimaqui un pinon. ³⁰ Asca min facu chipocu min inan cuscan nantifi man pota. Ainfo furomafo fu iqui. Ascafiahu afanan miqúi nocoaino unimaqui min a moipan facu rutushonaran,” apa huaiton.

³¹ Apan yoini, “Upashtan, miancai potamisima. Min ufu iitiani. Nan uhuunafon minariquin. ³² Ascafia min ushto man naa shinantsa amisishaquin natian man noco shara. Man funofiani man non afanan fuchia. ¿Asca ahuuscacumun non ichanainmacain aqui unimashquin?” ishon apan furu iyoa yoini, —ishon Jesús yoini.

Niaifo patashari ahuun niaifocoinin yoiá cuscacoin anima

16 Ascatan Jesús afu rafuafo yoiquin isca huani, —Nocofunun futsa mafo ichapayatton ahuun oinmati futsa niaifo patashari huani. Ascashon chipo nica ahuun oinmatinin ahuunafon cushusharashocuma.

² Nicaquin cunashon yocani, “¿Ahuuscai uhuunafon min cushusharamisimamun? Natian min afanan uhuun niaifo patashari iquima. Asca nantifi uhuun cunufon ua nifiafo ati shara huashohuun. Ahuutimain ua nifiafoquin ua ismashquin,” ishon ahuun niaifon yoini.

³ Asca huaiton nicaquin ahuun oinmatinin shinanni, “¿Ai timafin! ¿Unmun natian ahuuscaiquin? Uhuun niaifon ua pota. Uncái afanan a yonoshonima. Unfin nan papio fusti yonoqui fuya huamisiquin. Uncái curushcain yonotiroma un mau huapanan. Unricai yocacamisi ipaima. Un fari rafipaitiro. ⁴ ¿Aira! Natian mun shinanshara. Ratoran futsafoan uhuun niaifo ichapa nifafon un aton shucashopacufoanni ichapama nifonfo. Un ascaino uqui unimanonfo. Uhuun niaifon ua potafiafion nan futsafoan ua shara huatiroforan,” ishon shinanni.

⁵ Ascatan nan niaifo nifiafoti cunani. Ascaino futsa tauí aqui ocun yocani, “¿Uhuun niaifo ahuuti min nifiamun?” ishon yocaiton. ⁶ “Ocho cientos galones de shuni un nifiaran,” huaiton. “Min papio futsaqui ahuu. Cuatro cientos galones de shuni cunuhuu,” ishon niaifon ahuun oinmatinin futsa yoini. ⁷ Ascaino nan nifian futsaqui aqui ocun yocani, “¿Uhuun niaifo ahuuti min nifiamun?” ishon yocaiton. “Cien forusa trigo un nifiaran,” huaiton. “Min papio futsaqui ahuu. Ochenta forusa un nifiaran, ishon cunuhuu,” huani.

⁸ Ascaino niaifon ahuun oinmatinin acái cuscan oinquin yoini, “Minfin fasi onaiancoianquin. Min aca cuscan futsafoan mia shara huacaniran,” ishon yoini. Ascaino nan icon nan iconra huamafoan fasi tapicoianfo yorafo parashcaquin. Nanfoan tapia cuscacái nan ua iconra huafon tapiafoma. Ascafia nan iconra huafon tsoa parapaitirofoma icocoin fusti yoitirofo.

⁹ Un mato yoinon isca huaquin. Man pui ayashon nan Diosin tanamisifo yopaifon ato inancahuun. Man ato shara huacun mato noinonfo. Ascafia naashucái afanan man pui yopaima man Dios ari nocoaiton nan man pui inannifon mato yoiqúi isca huatirofo, “¿Aicho!

Min ua shara huamisi. Natian min nocofu Dios ari noco. Noco fu ipahuun,” ishon mato yoitirofo.

¹⁰Ratoran futsa ichapama ayafiashon nanshtahuunshon nan icaiti ahuunshon fisharashori ichapayashon nanscarifi huatiro ahuun fisharaqin. Parashquima. Ascan ichapamayafiashon ahuun rafanan fisharashoma parain. Nanscarifi huaquí ichapayafiashon fasi finacaiquí ahuun rafanan fisharashoma paratiro. ¹¹Ascacun nuno mai anoashu man aya cuscan afohuunshon man shara huamaquí man pota. Diosiri mato inanpaiyai cuscacai mato inantiroma. Matoricai icoinra huatiroma. Mato inanpaiyai cuscan nanfori man potatiro. ¹²Nanscarifiai futsana man cushusharayamaiton. Tsoan mato inancontiomun matonacoin inon.

¹³Ascano oinmatinincal ahuun ifo nanno rafu nantian yonoshotiroma. Futsa noifain futsa noicasmatiro iyamarai futsa nan yoia cuscacoin huashotiromo. Ascashon futsa, “Nacai ahuamaran,” ishon shinantiro. Tapicai huatiroma ratocaimain nicasharaiquin. Nanscarifiai Diosin yonoshopaiquicai man pui noitiroma maton ifo inon, —ishon Jesús yoini.

¹⁴Nan Fariseofoan pui noiaifohuunoo Jesús ato yoiaiton nicacani aqui cashupaiquí yoinifo. —¡Cuu! Ahuomafiashon noco yoiran, —icaifoan. ¹⁵Onanshon Jesús ato yoini, —“Nafofin sharafoquin” man yorafo huamapaifaiton Diosin man mato onan. Manfin yorafo paratiroquin “Nafofin shara huacaniquin,” ishon yorafo man shinanmapaifaiton Diosin man mato onancoinshon ahuun nomuran shinain, “Nafofin fasi chaca huacani- ran,” ishon Diosin matohuunoo shinain, —ishon Jesús ato yoini.

Moisés cununi cuscan yafi Diosin nantifi ahuun yorafo iquinai cuscan

¹⁶—Moisés Dioshuunshon cununi cuscan yafi Diosin tsain yoimisifoan cununo cuscacoin Juan nocoaitan futsafoan mato yoimisi. Juanpan tsain shara futsa noco yoiquin tau huaquin isca huani, “Diospan Furun matoqui chipo oi. Ascacun maton chaca shatucahuun. Man ipaoni cuscan afanan as- cayamacahuun. Natian Dios fusti shinancahuun,” mato huamisi. Urifi un mato nannori yoimisi. Asca tsoan as- caran shinancanashu Dios niaifo ari iqui- tirofo. Nan fusti shinanshu Diospan yora itirofoquin.

¹⁷Diosin yonoo Moisés cununi cus- cacoinashu non icoinsharanon. Noco yononi cuscaricai non unutiroma ahuara sharafo huaquin. Mai yafi nai cuyotirofi- ashucal Diospan tsain cuyopacunacama.

—Funun ahuin unuyamaino ainfoanricai funu unutiromaran, —ishon Jesús ato yoini

Mt 19.1-12; Mr 10.1-12

¹⁸Ratoran futsan ahuun ahuin un- uquin futsan fiishquin man chaca huai ahuun ahuincoinmafu icaino. Ainfon ahuun funu man unuquin futsan fi- ishquin arifi man chaca huai ahuun funucoinmafu icaiton, —ishon Jesús ato yoini.

Nocofunu mafo ichapa yafi Lázaro ahuomashta ini

¹⁹Ascashon afanan Jesús ato yoiqi isca huani, —Nocofunu futsa mafo ichapayaton sahuuti mapash sharacoin sahuufain tushu sharacapafo shafatifi pisharamisi. ²⁰⁻²¹Asca futsan ahuun anu Lázaro nocofunu mafo ichapaya- ton ahuun cunu caincaiti ano tsaoni. Yoratishon coyoashu tsaocun pashnan aqui oshon ahuun coyo ano tashoni.

Ascaino Lázaro ahuuomaton shinanni, “Na nocofunu mafo ichapayatomain nan tushu huua ua inanpainonrati,” ishon shinanni.

²² Ascashu Lázaro naani. Naacun Diosin oinmati afu nai muran icafoan ahuun yoshin Dios icari iyonifo. Nannori Abraham ica ini. Ascashu nan mafo ichapayari arifi naacun mai huanifo. ²³ Ascano omitsiscapanacafo muran cashon nan mafo ichapayaton Abraham yafi Lázaro foisquin oian icafo ini. Arishon chii isin tunuyamacaiquin cunani. ²⁴ “Uhuun Upan, Abraham, uhuun ramapaihuu. Ua Lázaro nichishojuun. Ahuun mutotinin ua ana muchana huanyonon. Un nunoshon chii isin tunuimaquin,” ishon cunaiton.

²⁵ Abraham cumani, “Upan, min shinainmamun min mai anoashu isharapaoni. Asca Lázarofin omitsiscapaoniquin. Asca natianfin Lázaro man isharaquin fasi unimasharacoinquin. Asca minfin natian fasi omitsiscaiquin. ²⁶ Mia ari capaifiaicai non ahuuscashu catiroma. Mirificai min ahuuscashu nuno nocoqui otiroma. Manhuanhuan rafutan noco naquihua. Tsoan finontiomaran,” ishon Abraham yoiaiton.

²⁷⁻²⁸ Afanan cumani, “Upa Abraham, unfin mucu fustiti yora yaquin. Asca Lázaro ato ano nichihuun ato Diosin tsain yoiaiton nicacoinonfo nurishu omitsiscai futirofoquin,” ishon yoiaiton.

²⁹ “Nanfofin man ayafokin Moisés futan Diosin tsain yoimisifoan cununifo cuscan huafafin afi ointirofoquin,” Abraham huaiton. ³⁰ “Ma. Upan, yora naashu funiaton uhuun yorafo yoiaitofin nicatirofoquin. Ahuara chaca huamisifo cuscan shatutiro Dios icoinra huashcaquin,” ishon yoiaiton. ³¹ “Ascan nan Moisés cununi cuscan nicayamafain Diosin tsain yoimisifoan yoiaiton nicayamashomun nan

ratoran futsa naashu funiaricai icoinra huatirofomaran,” ishon Abraham yoiniran, —ishon Jesús ato huani.

Non chaca huaino fasi musucoin

Mt 18.6-7, 21-22; Mr 9.42

17 Asca huatan Jesús afu rafuafo yoini isca huaquin, —Ahuarafoan mato chaca huama-paifafainshcani. Ascafia nan futsa chaca huamafocaiquin fasi omitsiscai finacoinshcaniquin. ² Ascashon ua icoinra huafuna futsan chaca huamai nancaifin fasi onaintimaquin finacoinquin. Ascacun chaca huamataima toquiri ya tunushushon noacoin muran potafin shara icuanaquin.

³ Asca oinfain. Tsoan futsa chaca huamaino fasi musucoin. Mi futan tanamisi futsan mia chaca huaiton rauhuahuu afanan mia asca huanonma. Ascashon min yoiaiton nicaquin yoinon isca huaquin, “¡Ohua! Ua rauhuahuu. Un afanan ascaran chaca huanonma,” ishon mia yoiaiton a rauhuahuu. ⁴ Nan shafata fusti mia chaca huaquin ichapa huafishon nan chaca huati mia rauhuapairiaiton rau huafafaincahuun, —Jesús ato yoini.

Non icoinra huaiton Dios noco ahuamamishti huashotiro

⁵ Asca huatan afu rafuafoan Jesús yoinifo, —Ifon, non mia fasi icoinra huapaiquin noco finonmafain icoinra huamahuu, —ishon yoiainfoan.

⁶ Jesús ato cumani, —Nan mostaza ushu uhuapamashtacoinfiashu foaicano uhuapacoin yositiro. Nanscarifiai tau man ua icoinra huashon uhuun tsain man tapisharayotiro. Chipu uhuun tsain maton nomuran man nanucoinshon ihui uhuapa ahuun tapofoya tsucucain “Ununhuan muran pacuhuu,” man huaino a muran afanan fanainacahuan man yoiainfoan atiro.

Ahuun oinmatinin ifoan yoia cuscacoin ashotiro

⁷Ascacun tsain futsa un mato yoinon. ¿Man oinmati yashomun mato maumamaqui oro yamaraquin chashoanfo cushuashu yatashta pushu ano nasoaitomun ahuun ifoan yoitiromun? “Piyohuu,” huatiromun. ⁸Ma. Ascarama. Asacatamarocon man yoitiro isca huaqui, “Ua pichashoniyohuu. Ascan man icun mian yoitiro un picanon. Mun piqui anaitiano min chipo pitioran,” ishon man oinmati yoitiro. ⁹¿Asca ahuun oinmati nan yoia cuscacoin aino ahuun niaifoan yoitiro “¡Aichoran! Min fasi shara huaran,” ishon yoitiromun? Ma. Afi tau huafaincai acama. Ahuun ifoan yonoo cuscan huaa. ¹⁰Nanscarifiai Diosin mato yonoo cuscacoin aquin marifi yoicahuun isca huaquin, “Noncai ahuama. Nofi tau huafaincai non acama. Nocon Ifoan noco yonoo cuscan non acaran,” ishon yoicahuun, —Jesús ato huani.

Jesús mucu rafuti nocofunufu aton nami tocoi futsua cayahuani

¹¹Jerusalén ano caaquin Jesús nan fai Samaria yafi Galilea shatsocamun rafu finonfaini. ¹²Ascashu pushurasi ano no-coano mucu rafuti nocofunufu aton nami tocoi futsuafo aquin noconifo. ¹³Ascatan ato chaima caiton oi ashcafinin cunanifo, —Nocon Ifo Jesús, nocohuun rama-paihuu, —huaifoan.

¹⁴Ato oinquin Jesús ato yoini, —Diosin yoimisifo ano fotacahuun. A man cayashara ato ismashcaquin, —ato huaino focani cayariscatanifo.

¹⁵Ascaino fustiton mua man caya sharashu afanan Jesusqui naso curan oi ashcafinin yoini, —¡Aicho! Dios shara. Ua cayahua shararan, —ishon yoini. ¹⁶Ascatan Jesús naman fuopacacahuan, —

¡Aicho! Jesús, min ua cayahua. Min fasi sharacoinran, —ishon yoini. Naanfin Samaritanon iniquin.

¹⁷Ascaiton Jesús yoini, —Un mucu rafuti nocofunufu cayahuafia na fustiton ua shinanquin ua yoishara yoa. ¹⁸¿Ahuuscaimun na nocofunu uhuon caifomafishu nan fusti uqui naso Dios shara huapai futsafo uqui nasoyamafiaino? —ishon Jesús yoini. ¹⁹Asca huatan a Jesús yoini, —Funicaitahuun. Min ua icoinra huashufin min cayasharaquin, —ishon Jesús yoini.

Ahuuscashumain Diosin nantifi iquinai cuscan iishquicain

Mt 24.23-28, 36-41

²⁰Ascano Fariseofoan Jesús yocanifo. —¿Ahuutianmun manifotiton ato niaifo Dios iishquiquin? —ishon yocaifoan. Jesús ato cumaqui isca huani, —Ahuuscashocai Diosin yorafo iquinai cuscan man ointiroma. ²¹Ascashu Upa Diosin mato nomuran mato niaifo itiro mato yonoshquin. Ascacuai tsoan yoitiroma isca huaquin, “Diosin niaifo nuno noco mai ano icaraca,” tsoan huatiroma. Futsaricai yoitiroma isca huaquin, “Diosin mai futsaria niaifo icaran,” ishoncai tsoan yoitiroma, —ato yoitan.

²²A fu rafuafori yoiqui isca huani, —Chipo un mato anoashu matomaqui caano fasi man ua shinancoinquin yoishquin isca huaquin, “Nocon Ifo no fu ipainon. Fasi non oinpaicoinran,” ishon yoifiaquicai man ua oinshquima. ²³Ascano futsafoanri mato yoishqui isca huaquin, “Nanfin Cristoquin. Oa ono icaran,” ishon futsafoan yoiaino futsafoanri, “Nuno icaran,” ishon yoiaino. Ari foyamacain atori tanayamacahuun. ²⁴Uficoon un oaiton man ua oinshquin. Caná facaicaiton shafacafi non oinriscatatiro. Nanscarifiai un oaiton shafacafi man

oinshquin. ²⁵Ascafiashu tauí un fasi omitsiscacoinshquin. Natian nia yorafocanai ua niaífo huapaicanima.

²⁶Noé niyoano inífo cuscacoinrifíai un afanan oaitian nanscarifí ashcani. ²⁷Ascan nantian Dios shinantama pisharafain ayafain fianansharacainaifoanno faitahuan noconí. Nanscasi ariaifoanno. Noé ahuun shashohuan muran iquitapaiyaino oinhuanrasi furíai unuyamacaiyaino faitahuanun nantio manífoí unuhuan marafumuni. Ascaino asai futsunífo.

²⁸Nanscacoínrífi nan nocofunu Lot niyoano nanscacoínífo. Dios shinantama pisharafain ayafain inanmitsashon ahuarafó fifain mau fanafain pushu huapaonífo.

²⁹Nanscarifí ariaifoanno Lot Sodoma anoashu caani. Diosin yonoa cuscan. Nantianri Diosin yononí nai murannoashu chihuan atoquí pacunon. Ascaino Sodoma anoafó cuyocoinnífó. ³⁰Nanscacoínrífi aashquí un afanan oaitian. Ua shinantama afí apaiyaífo cuscasi huariaífoanno.

³¹Ascan tsoa pushu fomancayan niashucaí afanan ahuun pushu muran iquitíroma ahuun ahuaífi shquin. Ascataíma ichoriscatahuun. Nanscarifíai tsoacái mau yonofíai afanan pushu ano nasotíroma ahuun sahuutí fiishquin. ³²Ascacun Lotpan ahuihuunoa shinancahuun. Naanton ahuun ahuarafosí shinain ifiacucahuan oinpai nariscaní cuscan marifí ascayamacahuun.

³³Ascan tsoan shinanquí isca huai, “¡Ohua! Un Jesús tanaiton raca ua omitsisca huacanicatí,” ishón shinanquin uhuun tsain cachiquirí huaa. Nanscara yorafó naashu omitsiscapanacafo. Ascan tsoa uhuunoaashu omitsiscacái naa. Nanscara yorafófin nacanashu ufu ishara-pacunacafoquin. ³⁴Ascacun un mato yoinon un oaitian yora rafu mosquítero

muranfiashu fustí ufu cariscatanaino futsa nitushquin. ³⁵Nanscarifíaiyaino rafu nanincaní futsa ufu uarí caí yamariscatanaino futsa nituashu omitsiscashquin. ³⁶Ascaino nantianrí nocofunu rafu mau ano yonocaní futsa uarí caí yamariscatanaino futsa nitushquin omitsiscapanacafo muran caashquin, —ishón Jesús ato yoiní.

³⁷—¿Ifon, raquí focanimun? —ishón yocaifoan. Jesús ato cumaquí isca huani, —Ahuara naa nanno cotocotofo nocoriscatíro. Nanscarifíai un nocoaitian ua tanamisífo uquí furiscatashcaniran, —ishón Jesús ato yoiní.

**Niaífo yafí ainfomaquí funu
naahuunoa Jesús ato
ahuaí futsa yosiní**

18 Afanan Jesús ahuaí futsahuunoa ato yoiní ato tapimashquin, —Upa Dios unutama cufiríai atsananonfoma. ²Pushurasi futsa ariá niaífo ini. Nan niaífo Diosquí ratutama yorafohuunrí noínima. ³Ascafiaino ainfomaquí funu naa aquí oshón yoiriapaoní, “Ua noicasmamisíton ua chaca huaiquin ua yoishohuun ua afanan asca huanonma,” ishón yoífiaino ⁴niaífo ahuun ramapaitama. Puusiníma. Asca huafiaino aquí ihuan ihuanpaoní. Ascaiton niaífoan yoiní isca huaquin, “¡Cuu! Na aínfo funuoma fasi ua fucash huariái. Uncai Diosquí ratuíma. Na aínfohuurícaí un ramapaiyamafiaino ⁵fasi ua fucash huariái. Ascacun afanan ua fucash huanonma un aroshoniran,” ishón niaífoan yoiní.

⁶Ascana a niaífo chacapan yoiní cuscan nicacahuun. Chacafíashon nan aínfo funuoma yoiríaiton man aroshoní. ⁷Asca Diosicái a niaífo chaca cuscarama. Ascataamarocon fasi noco nicapai. Noco nicaicain atsanatíroma. A catoanfoan shafatíshon yafí yamutíshon cufiaífo cuscan ato nicacasmáima. ⁸Ascacun un

mato yoi nan manamisifo mato aroshoriscatashquin. Ascan nan mato noicasmamisifo onaintimashqui. Ascafia un chipo afanan uhuun Upa Dios icariashu mai ano oaino fustirasiton ua icoinra huacaniraca, —ishon Jesús ato yoini.

**Fariseo yafi niaifo pui
fishomisihuunoa Jesús ato
ahuara futsa yosini**

⁹Ascan afanan ato ahuara futsa yoini ato tapimashquin, —Unfin sharaquin. Uncai chaca huamisima. Yora futsafo ua cuscaraman, —ishon shinanmisifohuunoa Jesús ato yoiquin isca huani, ¹⁰—Nocofunu rafu Israelifohan Dios fu tsainti pushu muran iquinifo Dios cufishcaquin. Futsan Fariseo icaino futsan niafo pui fishomisi ini. ¹¹Nan Fariseo ninacahuan cufiqui isca huani, “Uncai tsoa cuscarama. Unfin nocofunu sharaquin. ¡Aichoran! Upa Diosin, uncai na nocofunu niaifo pui fishomisi cuscarama. Uncai yora chacafo cuscarama. Unricai yomutsoma. Uncai tsoa paratiroma. Unfin yora futsa shara huatiroquin. Uncai uhuun ahuinma furi imisima. ¹²Nan semantifi un piqui tunuquin rafu huafafaini. Nan un fiaishtafin un mia pashcashofafainiquin, Upa Diosin,” ishon Fariseo yoini.

¹³Ascafianocai nan niaifo pui fishomisiton anori yoitama. Mananquiri foistamari. Tutipacutsishon shochi sutu sutuaquin yoini, “¡Ohua! Diosin, un mia fasi chaca huamisi. Uhuun ramapahuu. Un chacaquin,” huani.

¹⁴Un mato cayacafi yoi. Nan pui fishomisi Diosin ahuun chaca soashofain ahuun yora ima. Ascafiaquicai nan Fariseo ahuun chaca soashonima. Ascan tsoan ahuunoa yoiqui isca huai, “Un shararan,” ishon futsafo shinanmapai nanscara yorafo chipo Dios ismashquin arifi chaca huamiscun. Ascan tsoan yoiqui isca huua, “Unfin chaca

huamisiquin,” ishon yoicun nanscara yorafofin Diosin aton chaca soashotiroqui afu ipanonfo, —ishon Jesús huani.

**Jesús Apa Diosihuunshon
facufo shara huani**

Mt 19.13-15; Mr 10.13-16

¹⁵Ascaino yorafoan aton facumishti Jesusqui ihuunifo ato manmanpacuquin Apa Dios cufishonon. Asca huafiaifoan afu rafuafoan ato yoini, —Maton facufo ihuutan nocon lfo fucash huayamacahuun, —ishon yoinifo. ¹⁶Asca huafiaifoan Jesús facufo cunani, —Uqui fuchahuun, —ato huatan afu rafuafo yoini, —Unucahuun uqui funonfo. Ato nitun huayamacahuun. Uhuun Upa Dios niaifo icariafofin nan facumishti cuscaraforiquin. ¹⁷Ascacun un mato icon yoi. Nan facumishtifohan Dios icoinra huacoinnafo cuscan tsoan icoinra huashmacai Dios icari iquinacafomaran, —ishon Jesús ato yoini.

**Nocofunu mafo ichapaya
Jesús fu tsainni**

Mt 19.16-30; Mr 10.17-31

¹⁸Ascaino Israelifohan aton niaifo futsa Jesusqui oshon yocaquin isca huani, —Tapimamisiton, minfin sharacoinquin. Ua tapimahuu. ¿Unmun ahuuscatiroquin Dios fu ipashquin? —ishon yocaiton.

¹⁹Jesús cumani, —¿Ahuuscaquin mian “shararan,” huaimun? Dios fusti sharaquin. ²⁰Diosin yononi cuscan man min tapian. Yonoqui isca huani, “Min ahuinma fu iyamahuu. Futsa rutuyamahuu. Ahuara onuyamahuu. Chaniri yoiyamahuu. Ascashon upa yafi uhuari nicasharafain ato shara huahuu,” —ishon yoiaiton.

²¹—Nantifi mian yoiai cuscan facushon un nicainifoannaran, —huaiton.

²²Afanan Jesús cumaquin, —Fustiricai min nicataima. Nan yoiqui

isca huua. Ahuarafo inanmitsashon ahuun rafanan pui fihuu ahuuomafo inanshquin. Min ascaitofin Upa Diosin nai muranshon mia ahuaa sharacoin mucushoniquin. Asca huatan ua tanasharahuu, —ishon Jesús yoiaton.

²³ Nicaí puusinima. Mafo ichapayacoinshon ahuun mafofo potacasmai.

²⁴ Ascaiton oinquin Jesús ato yoini, — Yora mafo ichapaya Uhuun Upa Dios niaifo ari nocopaiacani nocotirofoma. Fustirasifin nocotirofoquin. ²⁵ Nan ina camellocai acoya shoi muran finontiroma. Mimacaifi nocofunu mafo ichapaya Diosin niaifo ari iquitiromaquin, —ishon Jesús ato yoini.

²⁶ Ascaiton nicacaquin —¿Ascan tsoa Dios fu nipatiromun? —ishon yocaifoan.

²⁷ —Nocofunucái afinri numamutiroma. Diosin fustitofin yorafo numatiroquin. Diosinfin ahuamamishti huatiroquin. Nocofunufocanai asca huatiroma cuscan Diosin huatiroquin, —huaiton.

²⁸ Pedronun yoini, —Ifon, nonfin nocon ahuaafo nantifi nocon yorafo potafurani mifu non oquin, —ishon yoiaton.

²⁹ Jesús afu rafuafo yoiqui isca huani, —Un mato icon yoi. Tsoan Dioshuunshon ahuun pushu yafi ahui non ahuun yorafo non apa yafi ahua non ahuun facufori potashon ua tanapaisharai. ³⁰ Nanscara yorafofin Upa Diosin finacaiqui ato shara huaiquin. Ascana naashu Dios fu ipasharashcani, —ishon Jesús ato yoini.

Nashquiai cuscahuunoa afanan Jesús yoi futsani

Mt 20.17-19; Mr 10.32-34

³¹ A fu rafuafo doce futsano atotisi iyoni nannoashu atofu tsainquin iscani, —Ua nicacahuun uhuun yoramishtichin. Non Jerusalén ano fononfocahuun. Nan Diosin tsain

yomisifoan uhuunoa cununifo cuscan nanscacoín aiquin. ³² Nannoshon nocon caifoan futsafo ua ato inancani. Nanfoan ua cashu mutsama huafain fasi ua chaca huacani. Uqui cumo michofain fichi cunoqui tuchiaton ua coshacani. Ascatan ua rutucani. ³³ Ua asca huafiafo osha rafu non fustitan un afanan funiran, —ishon ato yoini.

³⁴ Ato asca huafaitocai tsoa tapinima ato yoiái cuscan. Man nicafiaquiricái tapisharanifoma. Diosin ato tapimanataima.

Jesús Jericó anoshon fusho caya huani

Mt 20.29-34; Mr 10.46-52

³⁵ Ascaino Jesús Jericó ano nocoataima fusho fai cusumun tsoa ini. Nannoashu pui yocacamisi. ³⁶ Ascanao nan fai cusumun tsoashon yorahuanrasi foannaiton nicaquin ato yocani, —¿Tsoafo na iscai foancanimun? ¿Ahuahuacanimun? —ishon ato yocaiton. ³⁷ Yoinifo, —Jesús Nazaret anoa cahuaniran, —huanifo.

³⁸ Ascaiton nicaquin yoini, —Jesús, minfin David ahuun funaquin. Uhuun ramapaipun, —ishon cunani.

³⁹ Ascanao Jesús fu foaifoan asca huanifo afanan tsainonma. Asca huafiafoanno fasi oi ashcafinin yoiriani, —Minfin David ahuun funaquin. Uhuun ramapaipun, —huariaino.

⁴⁰ Jesús nituacucahuan ato yoini, —Nuri ua ihuushocahuun, —ato huaiton aqui ihuunifo.

⁴¹ Ascaiton Jesús yocani, —¿Un mia ahua ahuusca huashotromun? —ishon yocaiton. Cumani, —Ifon, un fasi oinpaicoinran, —huani.

⁴² Ascaiton afanan Jesús cumani, —Ua icoinra huashon natian min oinshairan, —huani.

⁴³ Ascaino nantian oinsharariscatan yoini, —¡Aicho! Man mian caya huua

shara. Dios shararan, —icashu afu caiton oincaquin futsafoan arifi, —¡Aicho! Dios fasi sharacoinran, —ishon yoinifo.

Jesús yafi Zaqueo

19¹⁻²Asca huatan Jesús Jericó anoashu cahuanaino nanno nocofunu ahuun anu Zaqueo ini. Nantofin ahuun niaifo pui fishomisi iniquin. Pui fishomisi futsafoan aton niaifo ini. Nanrifi ahua yopatanaimacoin ini. ³Jesús yorafoan naqui huano cahuannaiton ahuuscashoma oinpaquin fuai mishtoshtacoianshu, —¿Ranishomain un oinnanti? —ini. ⁴Ahuuscashoma oinpaquin ranain. Ascacun rusoatori ichoni finoantaima. Ichotan fai cusumun ihui niahuun ichoinacahuani. Inainacahuatan ahuunshon Jesús cahuanaiton oinshquin icashu inacun. ⁵Nan ihui nia naman finonfainquin foisnifoantan fuchishon, Jesús yoini

—Zaqueo, fotoriscahuu. Un min pushu ano osha fusti yoi canon, —ishon yoiaiton.

⁶Nicai Zaqueo fotoriscani. Fasi unimasharacoinquin ahuun pushu ano iyon. —¡Aichoran! Min uhuun pushu ano oiquin. Iquiyohuu, —Zaqueo huani.

⁷Ascaiton oincaquin yorahuanrasiton yoinifo, —¡Ajaa! ¡Oincapon! ¿Ahuuscaimun Jesús yora chacapan ahuun pushu ano caiquin? —icashu afi ranan yoinannifo. ⁸Ascafiaifoanno Zaqueo Jesús yoini,

—Ifon, natiantafin un yora ahuuomafo cashcu futsa un ato inanpacuicain. Nan un finonmafaintan fia cuscan onushori un ato finonmafaintan ato inanpacuiquin. Un diez soles fiashonfin cuarenta soles un ato inainquin. Ascan veinte soles ato fiashonfin ochenta soles un ato inaincain. Un ato onuyofiamisishaquifin

un ato asca huapaiquin, —ishon Zaqueo yoini.

⁹Ascaiton Jesús Zaqueo yoiqui isca huani, —Zaqueo, na shafata min chaca un mia soashona min Diospan facu ica afu nipanonran, —ishon yoini. Ascan nanno pushu murannoafori ato yoini, —Na nocofunu Zaqueo arifi Abraham ahuun funa. Abraham Dios icoinra huaa cuscan arifi natian icoinra huaa. ¹⁰Ascan tsoa funoa un ato fai shara ismayoi uhuun Upa Dios anoashu un oni nanfo Dios fu ipasharanonforan, —ishon ato yoini.

Puihuunoa Jesús ato ahuaara futsa yosini

Mt 25.14-30

¹¹Nan nicatan focani Jerusalén chaima nocoshon shinanfo, —Nan Diosin niaifo ahuun yorafo iquinai cuscan nocoti chaimaran, —ishon shinannifo.

¹²Ascaiffoan Jesús ahuaara futsahuunoa ato yoiqui ato tapimaquin isca huani. —Nocofunu niaifo cuscara ini. Nan nocofunu mai futsa ari caani niaifo huashu afanan naso curashquin. ¹³Cataima ahuun oinmatifo mucu rafuti cunashon yoiqui isca huani, “Un mato pui paratamacoin inanfaincai. Nan puihuushon ahuaara fiashu inanmitsashon finonmainiffoan ahuun rafanan man finon nan un nasoaitian,” ishon ato yoini. ¹⁴Ascaiton ahuun caifo futsafoan nan noicasmacoinnifo. Ascashu caiton yorafo achon nichinifo. Nan niaifocoin yoiqui isca huanonfo, “Nan nocofunu non niaifo huapaimaran,” huanonfo.

¹⁵Asca huafiaifoanno niaifocoinin catoan niaifotan afanan ahuun mai ano naso curani. Ascashu nocotan ahuun oinmatifo cunatoshini ahuuti pui man fiafomainquin tapipaiquin.

¹⁶Ascaino futsan aqui oi taushon yoiqui isca huani, “Ifon, mian inan cus-

can mucu rafuti finonmainifoan un mia fishoaran,” huani.

¹⁷ Ascaiton niaifoan yoini, “¡Aicho! Minfin oinmati sharaquin. Mian yonoshon shara. Un mia ichapama inanfia finonmafain mian fishoano un miqúi fasi unimai. Un mia yoia cuscacoin min aano. Ascacun pushurasifo mucu rafuti anofoan ato niaifo min iquiran,” ishon yoini.

¹⁸ Ascaino futsanri aqui oshon yoini, “Ifon, mian pui inan cuscan mucu fustiti finonmainifoan un mia fishoaran,” ishon yoiaiton.

¹⁹ Nicaquin nanrifi yoini, “Mirifi mucu fustiti pushurasi anofoan ato niaifo min iquiran,” ishon yoini.

²⁰ Ascaino oinmati futsari aqui oshon arifi yoini, “Ifon, naquian min pui. Un mia rashushon huashoan. Min ua inan cuscan finonmafain fiamafishucai un funoama. ²¹ Un miqúi ratuqui un mia mucushona. Mun tapia mincai tsoa shinainma. Minricai nocohuun ramapaima. Non mia yonoshofiaitocai min noco ahua inantiroma. Mina fusti itiroran,” ishon yoini.

²² Ascaiton nicaquin ahuun ifoan yoini, “Min fasi chacacoin. Minfin shanishuniquin. Min tsainhuunshon un mia onaintimai. ¿Min shinanmun un futsafo shinainmaquin? ¿Uaraca futsafoan yonoshofiaiton un ato ahua inanma? Un fimisi ua mian huua. ²³ ¿Ascan nannori shinanfiquin ahuuscaquin min rashushon huamun? Asca huatamarocon nan pui huamisifoanno min huua shara icuana paratama finonmainifoan fiishquin,” ishon niaifoan yoini.

²⁴ Asca huatan nanno niafo niaifoan ato yoiqui isca huani, “Nan oinmati chaca ahuun pui fiashon nan mucu rafuti finonmainifoan fiarocon inancahuun,” ishon ato yoiaiton.

²⁵ Cumanifo “Ifon, nanfin ichapayacaiquin,” huaifoan. ²⁶ Afanan niaifoan ato cumani, “Un mato icon yoi. Nan ratoran futsan ua iconra huacoinafin un fasi paratamacoinri inainqui. Ascan nan ua iconra huamafin nan ichapama aya cuscan futsa fiainquin. ²⁷ Ascashon nanfoanfin ua noicasmacaquin yoiafoquin, ‘Noncai mia niaifo huapaimaran,’ ishon uhuunoa yoiafo. Ascacun ato ihuucahuun uhuun ointaifi ato rutushcaquin,” ishon yoiniran, —Jesús ato huani.

Jesús Jerusalén ano cani

Mt 21.1-11; Mr 11.1-11; Jn 12.12-19

²⁸ Asca huatan Jesús Jerusalén ano caino. Achon ahuun tapimisifo fonifo. ²⁹ Machi ahuun anu Olivo tunanman pushurasi rafu Betfagé yafi Betania ini. Nanno chaima noconifo. Nocoshon afu rafua rafu nichini.

³⁰ —Pushurasi ano fotacahuun. Nocoshon man burro cahuashara nushucun man fuchicaicain. Tsoacai na burro camaqui cayomisima. Tupushon nuri ua ihuushotacahuun. ³¹ Futsan mato yocaiton, “¿Ahuuscaquin man burro cahuashara tupuimun?” yocaifoan ato yoiquin. “Nocon Ifo yopaiton non tupuyoaran,” ishon ato yoitacahuun, —Jesús ato huani.

³² Ato nichiafocatan nococashon Jesús ato yoia cuscan nanscacoín huaquin fuchitoshinifo. ³³ Man tupuafoanno muropan ifofoan ato yocani, —¿Ahuusca huashquimun man nocon burro cahuashara tupuaquin? —anoa ifofoan ato yocani.

³⁴ Ascaiton cumacaquin, —Nocon Ifo yopaiton non tupuyoaran, —huanifo. ³⁵ Nan burro cahuashara Jesús ihuushonifo. A fu rafuafoan aton sahuuti muropan catu camaqui fucashonafoanno acamaqui Jesús tsaoinifoannifo. Ascaino cani.

³⁶ Cahuanaiton fai naman cayan afofori

sahuuti fucashonifo. Niaifo cahuanaiton aponifo cuscan Jesusrifi cahuanaiton afofori sahuuti fucashonifo. ³⁷⁻³⁸ Machi Olivo tusirimucaitan ahuunshon tapimisifo aqoi noconifo. Unimacaquin oi ashcafinin Jesús yoinifo,

—¡Aicho! ¡Diosin shararan!

Dioshuunshon ahuamamishti min huaiton non oian. ¡Aicho! Nocon niaifo nocoqui oaqin. Diosin shara huamafafainni. Diosin yononi Jesús nocon Niaifocoin inon. Ahuunshon Diosin nantifi shara huanon. Ascarifiatan ahuun nai oinmatifoan nai muranshon yoicani, “Diosifin sharacoinshon yorafoqui ahuun Furun nichiniquin ato numanon,” man huaiacain —ishon oi ashcafinin yoinifo.

³⁹ Asca huacatan Fariseofoan yorahunrasi muranshon Jesús yoini, —Tapimamisiton, minhuunshon tapimisifo yoihuu ascanonfoma, —huaifoan.

⁴⁰ —Un mato yoinon. Ua yoisharaya-maifoan na toquirifoan ua oi ashcafinin tsain shara ua yoicuanaforan, —ishon Jesús ato yoini.

⁴¹ Machi tusirimupacuquin nan pushurasi Jerusalén anoa icafo oin atohuum ramapai Jesús uaini. ⁴² Ascashon yoiquin isca huani, —¡Ohua, Jerusalén icanoafoan! Ua icoinra huashufin man isharapacucuaquin. Mancai tapiama natian Diospan Facu nocoa. Mancai ua niaifo huapaima. Un mato numapaifaiton man ua tanacasmai. Natiancai un afanan mato numatiroma. Man fasi finoan. ⁴³⁻⁴⁴ Mancai tapiama un mato cushunon Diosin ua catonfiacun, tsoancai mato noicasmamisifoan mato ahuuscara huaiton mato numatiroma. Mato chituacuafo nantia iqui furancatan mato rutuquin anaitishocani. Matofu yafi maton facufo rutuqui cuyoshceni. Maton pushufo paoinquin futsui.

Diosin ua matoqui nichifiacun man ua nicacasmaiton mato asca huashcaniran, —ishon Jesús ato yoini.

Jesús Dios fu tsainti pushu muranshon ahuara chacafo potani

Mt 21.12-17; Mr 11.15-19; Jn 2.13-22

⁴⁵ Asca huatan Jesús Israelifoan Dios fu tsainti pushu muran iquitoshiquin oian a murannoashu ahuarafo inanmit-saifoan fuchitan ato chifi cainmaqui futsani.

⁴⁶ Ascashon ato yoiqui isca huani, — Diospan tsain cunuquin isca huani, “U fu tsainti pushu muranshon man ua fusti cufitiroran,” ishon cunufianicun nan yomutsofoan ichananti cuscara man huapairan, —ishon ato yoini.

⁴⁷ Asca huatan shafatifi Israelifoan Dios fu tsainti pushu muranshon Jesús ato yoini. Ascafiaton nocon yorahuunshon Dios cufimisi niaifofo futan Moisés cununi cuscan tapimamisifo non Israeli niaifo futsafoanri Jesús rutupainifo.

⁴⁸ Asca huafiaifoan ato caifo futsafoan nan Jesús yoiái cuscan nicapaicoinnifo. Ascacuai a rutupaifiaquin tsoan tapinima ahuuscashomain rututirofoquin.

Jesús noco yonotiro

Mt 21.23-27; Mr 11.27-33

20 Ascatan shafa futsaino Jesús Israelifoan Dios fu tsainti pushu muranshon ahuun tsain shara ato yoifain ahuuscashumain Dios fu ipatirofoquin ato yoiaino nocon yorafohuunshon Dios cufimisi niaifofo Moisés cununi cuscan tapimamisifo non Dios fu tsainti pushu cushumisifoan Jesús yocanifo.

² —¿Tsoan mia yonoamun min isca huanon? —ishon yocai foan.

³ Jesús ato cumani, —Urifi un mato yocai. ¿Juanpan yorafo unu muran iquimapacuni tsoan yonoa asca huanimun? ⁴ ¿Diosin iyamarai

nocofunufoan yononifomun? —ishon ato yocaino.

⁵Afi ranan yocanonannifo. —“Diosin Juan nichiniran,” non huaiton Jesús noco yoitiro. “¿Ascan ahuuscaquin man Juan icoinra huamamun?” —noco huaitiro. ⁶Ascan —“Juan nocofunufoan nichiniran,” non huaino yorafo nocoqui sinatirofo. Nantifi yorafoanmain yoisifocun “Juanpan Diosin tsain yoisiran,” ishon yoiafo. Ascan “Juan Diospan yonoamaran,” non icaiton toquirifoan noco rututiroforan, —icashu yoinannifo.

⁷Ascashon Jesús yoinifo, —Noncai tapiama tsoanmain Juan yonoaquin, —huaifoan.

⁸Jesús ato yoini, —Urificai un mato yoima tsoanmain ua yonoa un ahuafo huaquin —ishon ato yoini.

Yonomisi chacafohuunoo Jesús ato yosini

Mt 21.33-44; Mr 12.1-11

⁹Ascashon Jesús ato ahuaara futsan tapimani isca huaquin,

—Nocofunu futsan ahuun mau fanafaini mai futsa ari caano. Futsafoan cushushonifo. Nasoshon ahuun fana atirifi pashcashoshquinon.

¹⁰Fimimisitian mau ifoan ahuun oinmati nichini ahuun fana fimifo fishotanon. Mau cushumisifoan a oinmati sutucashon ahuuoma nichinifo. ¹¹Ascashon futsari nichian nanrifi sutunifo. Sutuafono maisi cani. ¹²Ascashon afanan futsari nichini. Nanri nanscari huacashon. Maumamaquishon potanifo.

¹³Ascashon mau ifoan shinan futsani, “¿Un ahuusca huaimun? Uhuun facucoin nan un ahuun noiai un nichicai. Nanraca nicacointirofo,” huani.

¹⁴Ascano ahuun facucoin mau ano oaiton fuchinifo, “Ahuun facucoin oiquin. Non rutucoionon. Apa naano

naafo ahuun facu ifoaiquin. Non rutunoncahuun. Afin aton apa fiama noncairocon non fianon,” ishon yoinannifo. ¹⁵Asca ocun achicashon mau pasotain iyoshon rutucoinnifo. ¿Asca a mau ifoan nicatamun ahuun facu rutuafo ato ahuusca huaquin? ¹⁶Oshon mau cushumisifo ato rutuquin anaitishon futsafoan ahuun mau cushumaniran, —ishon Jesús ato yoini. Nicacatan, —Ascanacama ipainonran, —inifo.

¹⁷Ascaifoan Jesús atosi oinquin ato yocani. —¿Asca ahuuscaquimun Diosin tsain nunori yoiquin?

“Pushu yonomisifoan, ‘Ahuun quishi chacaran,’ ishon potafiacun ifoan afanan shara catonshon nichiano pushu onitiro.”

Nanscarifiai man Diospan Furun pota. “A chacaran,” huafo. Ascafiacun Diosin man catoan ahuuonoashu fustisi yorafo Upa Diosin fu nipatirofoquin. ¹⁸Ratoran futsa a nicacasmaifo omitsiscatiro. Asca ratoran futsanfoan nicacasmariamisicun naitian a omitsiscapanacafo muran potashquinran, —ishon Jesús ato yoini.

¹⁹Nicacanashu Moisés tsain tapimamisifo yafi nocon yorafohuunshon Dios cufimisi niaifofoan Jesús achipainifo cunu muran iquimashcaquin. Atohuunoo yoiaiton nicacani aqui sinanifo. Ascafiashocai a nicapaiyifoqui musucaquin tsoan achinima.

Niaifofoan ato caifofo pui yocamisifohuunoo

Mt 22.15-22; Mr 12.13-17

²⁰Ascacun nan fuparamitsamisifo Jesús fu foanfainimisifo ahuun tsain nicapaicani ahuarashta amaquiri yoiaiton ato niaifoqui chanishcaquin Jesús achinonfo. Asca nanfo Jesusqui nichinifo cuncun huaqui yocatanonfo.

²¹ Ascano nanfoan focashon Jesús icon tsainman yocanifo, —Tapimamisiton, ahuara icocoin fusti min noco yoifafainmisi. Nan atirifi min yoiái cuscan nannoricoinrifi min noco yoifafainmisi. Ascashon icon fustisi min nantifi yorafo Diospan tsain yoifafaini. Minricai ahuara yoipai ranomisima. Nantifi min ato cayacafi yoiá. ²² Asca sharamainquin noco yoihuu. ¿Norifimun non Romanonfoan aton niaífo Cesari non pui inainquin? —ishon yocaífoan.

²³ Nan fuparamitsamisifoan yoiáifo cuscan onanshon Jesús ato yoini.

²⁴ —Ua mato toro fusti ismacahuun, —ato huaiton. Ismaífoan ato yocani, —¿Tsoa ointsa torohuun nuuamun? ¿Tsoan ahuun anuri nuuamun ua yoicahuun? —ishon ato yocaiton. ²⁵ —Niaífo Cesarnaran, —huaífoan.

—Ascan Cesarnacun nan inancahuun. Ascan Diosinacuri Dios inancahuun, —ishon ato yoiáiton. ²⁶ Nicacani fasi mustairicatan yoinifo, —Nan yoiái cuscacai tsoan tafitiroma. Fasi tapisharacoianran, —icashu ahuun yoinannifo. Ascacuai yorafoan ointaifi, —Jesús amaquíri noco cumaran, —ishon tsoan yoitiroma. Ascashu afanan tsoa puusinima.

Yora naashu afanan funitirofohuunoa yocanifo

Mt 22.23-33; Mr 12.18-27

²⁷ Ascano nannori Saduceofo ini. Nanfoan shinanquin isca huamisifo, —Yora naashucái afanan funinacamaran, —ishon yoimisifo. Ascan nanfo Jesusqui fucashon yocanifo.

²⁸ —Tapimamisiton, Noco shuni Moisés noco cunushoqui isca huani, “Ratoran futsan ahuin futan facu acashma naano afu nanua futsan ahuun facahua fitiro a futan facu aashquin,” ishon cununi. ²⁹ Ascacun

un mia yoinon. Siete nanupacuáfo ini. Nan iyoacoinnin iyoacaichin ainfo fiqui tau huani. Ascafiashon a futan facu acashma naani. ³⁰ Ascano chipocu futsan arifi ahuun facahua fini. Arifi aquí facu acashma naani. ³¹ Ascano chipocu futsanri arifi fiini. Nannrifi afutan facu acashma naani. Nanscasiai amaquí nai cuyonifo. Aquí facu acashma. ³² Ascatan ahuun unutani arifi ainfo naani. Facu nanuashma. ³³ ¿Ascan ratotocaimun nai muranshon nan yorafo naashu funiaífoatian fiishquinquin nan fusti fipashu amaquí nai cuyoáfo? —ishon yocaífoan.

³⁴ Jesús ato cumani, —Yorafo nuno mai ano niyoashu nocofunufu yafi ainfofo fiananmisifo. ³⁵ Asca ratoranfoan Diosin tsain icoinra huacun Diosin ato imasharatiro afu ipanonfo. Asca nanfo naashu afanan funiashu Dios icari nocotan afanan fianantirofoma. ³⁶ Afanaricai tsoa natiroma. Nanfo Diospan oinmati afu nai muran ica cuscaráfo. Ascashu Diospan facufo. Naashu funicatan Dios fu nipanacafo.

³⁷ Ascan Moisésirifi noco yoini yora naashu afanan funitiro nipashashquin. Ascashon noco yoiquin isca huani, “Choyo uru manhuain murannoa Diosin oi un nicani. Ua yoiquí isca huaiton, ‘Unfin Abraham non Isaac non Jacob non afoan aton Diosiquin natián ufu niafo,’” ishon Moisés yoini. ³⁸ Yora naashu afanan funiyamaino ahuscashumun Dios fu itirofoquin. Ascafia ascarama. Yora man naafianishaquin afanan nanfofin Dios fu ipatirofoquin. Ascacun Upa Diosifin ato Diosiquin. Diosinafin nantifi niafoquin, —ishon Jesús ato yoini.

³⁹ Ascacun nicacani Moisés cununi cuscan tapimamisifoan yoinifo. —Tapimamisiton, min ato cayacafi yoiran, —huanifo.

⁴⁰ Ascashocai afanan tsoan yocapainima. Ato cumasharaino aqui ranonifo.

Tsoan funamun Cristo

Mt 22.41-46; Mr 12.35-37

⁴¹ Ascatan Jesús ato yocani, —Asca ahuuscaimun “Cristo David ahuun funaran,” huamisifoquin. ⁴² Nan David-coinin fanainti cunuqui isca huani, “Upa Diosin uhuun Ifo Cristo yoini isca huaquin, ‘Minfin ufu niaifocoinquin. ⁴³ Mia noicasmaifoan min ato finoncoian. Un ato shatumashquin mia afanan ahuusca huatiroma. Min ato iquiniran,”

ishon Diosin yoini cuscan David cununi.

⁴⁴ ¿Criston David Ifono ahuuscashucon ahuun funa itirumun? —Jesús ato yoini.

Moisés cununi cuscan tapimamisifoan chaca huamisifo cuscan Jesús yoini

Mt 23.1-36; Mr 12.38-40; Lc 11.37-54

⁴⁵ Ato asca huatan afu rafuafori ato yoiaiton yora huarasifain arifi nicanifo ato yoiqui isca huaiton.

⁴⁶ —Oinfain. Moisés cununi cuscan tapimamisifoan sahuuti chainipafo sahuusho ato oinmafoanfafaicani fasi tapicoianforan ato huamapaicani. Yora ichaparasi ano foanscacani “Sharacoinforan” ato huamapaicani. “Nanfoan fasi Diosin tsain tapicoianran” ato huanonfo. Ichananti pushu muran iquitan shafacafi tsaotiofo ato oinonfo. Ichananshon piyainfoannori shafacafi tsaopaicani. ⁴⁷ Ascasho ainfomaqui funu naafo parashon pushu ato fianceni. Ascatan fasi chaicoinri cufiriatirofo atohuunoa shinansharanonfo. Ascafia nanfo fasi fuparamitsamisicoinfo. Nanfoaifin Dios ato onaintimaquin

finacoinshquiquin, —ishon Jesús afu rafuafo yoini.

Ainfomaqui funu naa ahuomashtacoinfiacun Dios inansharani

Mr 12.41-44

21 Ato yoitan fuhuunina cahuan Jesús oinni yora mafo ichapayafoan pui ichapa nanuti muran nanuiniyaifoanno. ² Asca huaifoanno ainfo funuoma otan arifi nanuni. Toroshta rafusi a muran nanuni.

³ Ascashu oiainfoan Jesús ato yoini, — Un mato icon yoi. Na ainfo funuoma ahuomashtafiashon inancoian. Ahuun toroshta rafu cuyoina. Ascacun na ainfo funuomashta fasi Dioshuun noicoinquin inanshara. ⁴ Asca ichapayafoancai Dios inanfiacaquin atirifi tsoan inanqui cuyoafoma tushu huafo. Na ainfoan Dios inain cuscacai ichapa yafoan inanshara-coianfoma. Ascafia na ainfo funuoma ahuuomafiashon nantifi ahuun pui man inanquin cuyoina. Man inanqui anaitia afanancai ahuahuunshon ahuun tushu fitiromaran, —ishon Jesús ato yoini.

Jesús yoini, —Dios fu tsainti pushu paoinshquiran, —ishon ato yoini

Mt 24.1-2; Mr 13.1-2

⁵ Ascano afu rafuafo afiranan yoinancaqui yoinifo, —Nocon Dios fu tsainti pushu toquiri putsamuashu cunuacua fasi sharashtacoin. Yorafoan ahuara sharashta Dios inancoianfo cuscan nutamuacua, —icashu yoinannifo. ⁶ Ascaifoan Jesús ato yoini, —Nan man oiain toquiri putsamuashu cunua Dios fu tsainti pushu chipo paoinshquin. Afanancai toquirifo putsamushquimaran, —ishon ato Jesús yoini.

Nan cuyoaitian ahuarafó ishquiái cuscan

Mt 24.3-28; Mr 13.3-23

⁷ Ascaiton cumanifo, — Tapimamisiton, ¿Nan min yoiái cuscamun ahuitian iishquiáquin? ¿Ahuuscashomun non tapitiroquin a ishquiái cuscan? ¿Diosimun noco ahua futsa ismaiáquin non tapinon? —ishon yocaifoan.

⁸ Jesús ato cumani, —Oinfain. Mato parapaicaniqui. Yora ichapafoan, “Un Cristoran,” ishon mato parapaishcani. Ascashon nanfoanri yoishcani, “Un mato yoia cuscan Cristo samamashtacoin oiran,” ishon mato yoiáifoan ato tanayamacahuun. ⁹ A man nica yorafo rutunainfoanno ratuyamacahuun. Man nica futsafoan aton niaifo potashu arifi niaifo ipaiyaiton nicai ratuyamacahuun. Nan un yoiáifin nanscacoín aashquiáquin. Ascafia nantifi cuyoaitian nocoataima.

¹⁰ Iquisi mai futsa fu yorafo rutunainfoanno mani futsafori mani ya futsafori rutunainfoanno. ¹¹ Ascaino mai futsafoari fasi mai nayanaiyaicaino mai futsafoariri yora tushuomafo icaifoanno. Mai futsafoariri pau isininpacoínfoan ishquiáquin. Ahuara chaca futsa futsata-pafo icaino yorafo fasi ratucoínshcani. Nai ari tsoan oinyomisima cuscara oin-cani fasi ratucoínshcani.

¹² Ascataima achicashon mato ichananti pushu muran iyoshcani niaífofoan mato yocanon. Ascashon chipo mato cunu muran iquimashcani. Asca huatan niaífo futsafoan ointaifiri afanan mato asca huashcani. Uhuunshofin mato asca huashquiáquin. ¹³ Mato asca huafiaífoan man ato uhuúnoa yoitiro. ¹⁴ Ascán man niaífofo ano cataima shinanchacayamacahuun nanfoan matohuúnoa tsain chaca yoishcani. ¹⁵ Ascafia unfi mato

cayacafi yoimamaicain man ato cumasharon. Uhuun tsain shara un mato nomuran nanumashquin. Ascano nan mato noicasmaífoan tsoan mato cumayamafain matori tafitirofoma. Ascashori tsoancai anorimaran mato huaima.

¹⁶ Ascashon mato upafo futan uhuáfo non mato yoracoinfo non man yorahuan futsafoanri mato achimashon atirifi mato rutumashcani. ¹⁷⁻¹⁸ Ascano uhuunshon nantifi yorafoan mato noicasmáfiaífoan Upa Diosin mato cushusharafafainshquin. Ascashon mato rutufiafocai ahuashta man funotiroma. ¹⁹ Ascán omitsiscafiáquin man ua potama nan man naitian uhuun tsain tanasharashu Upa Dios fu man ipasharashquin.

²⁰ Mato noicasmaífo aton ranushu-muafoan Jerusalén chituacuaífoan oinquin man tapitiro man samamashta Jerusalén cuyoi. ²¹ Nanscara oincani Judea mai anoáfoan machi ari ichotacahuun Jerusalén anoafomaqui. Patashari icafo Jerusalén muran fuyamacahuun. ²² Nantifi Diosin tsain cununi cuscan Jerusalenhuúnoa nanscacoín aiquin. Nantian Jerusalén anoáfo Diosin ato onaintimai. ²³ Ascacun ohua. Ainfo facu nanuáfo yafi aton facu yomumishti shoma acaífoya nantifi Israel anoáfo fasi omitsiscaashcani. Yora futsafo fasi atoqui sinacoincaquin ato asca huashcani. ²⁴ Ato rutufain atirifi achicashon mai futsafoari ato nichishcani. Ato asca huatan a Israelifoma Jerusalén ano iyoshcani. Nan Diosin ato nasopaiyaitian Israelifó afanan Jerusalén ano fushcani. Yora futsafo afanan aton niaífo inonma.

Diospan facu nasoaitian

Mt 24.25-35, 42-44; Mr 13.24-37

²⁵ Ascaino nantianri fari yafi oshu non fishifo nan imisima cuscaín fut-

sushcani. Ascaiton nuno mai anoafaoan oincani fasi ratucoincaquin yoishcani, “¿Ahuuscaimun unuhuan fasi fuchoaino ahuun oi achacoinquin? Noncai iscara oinyomisimaran,” icashu ratucani afiranan yocanonanshcani.²⁶ Ascaiton oincani yorafo ato ratupan naiyoshcani. Nai ari yafi mai ano ahuaa chacafo tsoan oinyomisima cuscarafao oincani.²⁷ Ascaifoanno nantianri un nai ariashu coin camaqui mai ano fotoshquin. Ascaiton nantifiton ua oinshcani. Un Diospan facuashu uhuun curushhuunoashu un fotoaiton ua oinshcani. Un nantifi iquinai cuscan.²⁸ Ascacun nan un mato yoiai cuscacoin tau aino nan ua icoinra huafo unimacain ua manasharayanan itisharacahuun. Nansacocoin aino un matoqui oti chaimaquin mato numayoi, —ishon Jesús ato yoini.

²⁹Ascashon afanan ato yoiqui isca huani, —Nan fana higuera yafi nii fut-safohuunoari shinacahuun. Nanhuunshon mato ahuaa futsa tapimanon.³⁰ Nan nii pui risquisi futsuaiton man tapitiro manmain fariaitonfin.³¹ Nanscarifiai nan un mato yoiai cuscacoin aiton tapicahuun Diosin niaifoan ahuun yorafo iquinai cuscan man nocoti chaima.

³²Ascacun un mato icon yoi. Ahuarafo un mato yoiai cuscacoin aiton nataishoma oinyoshcani.³³ Ascaino nai yafi mai cuyoshqui. Uhuun tsain cayacafi iconcoin. Fiananancai apanacama. Un mato yoiai cuscacoin aashquin.

³⁴Ascacun oinfain. Un matoqui nocoriscatashquin. Man itisharayamano ahuaafo ahuuscarai futsui. Ascacun ahuaa chaca huayamacahuun. Paunyanan monofafainyamacahuun. “¡Ohua! Un ahuuscarairan,” ishon shinanfaiyamacahuun. Nanscafin nan ua icoinra huamafofo aaquin. Afo itisharafomano un nocoriscatashquin. Afo icai cuscan

ayamacahuun. Oinfain. Masharo nicat-sashu cunu muran iquitiro cuscan ayamacahuun.³⁵ Ahuarafo ahuuscarai futsuaino nan maitio omitsiscasai futsushcani.³⁶ Ascacun itisharayanan Upa Dios cufifafaincahuun omitsiscaitian ahuun curushhuunshon mato amapaiyai cuscacoin huashcaquin. Ascashu man chipo uqui nocoaitian un matoqui unimatiro-ran, —ishon Jesús ato yoini.

³⁷Ascatan shafatifi Israelifoan Dios fu tsainti pushu muranshon ato yoini. Yamutifi machi ahuun anu Olivo ano oshani.³⁸ Funamanritifi aqui fupaonifo Dios fu tsainti pushu muranshon nicashcaquin.

Jesús rutushcaquin afi ranan yoinannifo

*Mt 26.1-5, 14-16; Mr
14.1-2, 10-11; Jn 11.45-53*

22 Nan noco caifo Israelifoan ato fusititian shinanpaonifo Diosin nai oinmati ato facu iyoafofosi finonmani rutuquima. Ascan nan fusiti shafa anunifo pan farashati maisiran ishon anunifo man nocoti chaima.² Ascan nantianri nocon yorafohuunshon Dios cufimisi niaifofo yafi Moisés cununi cuscan tapimamisifo ichanancashon shinanqui isca huanifo, —¿Ahuuscashomun non Jesús ato rutumatiroquin? ¿Ahuara chaca ahuuoa non yoitiro ato rutumashquin? Non cashman rutuaino yorafo fasi mucacani noco raca asca huatirofo, —icashu yoinannifo.

³Ascaino nantianri Judaspan ahuun nomuran Satanás shinancha-camariscatani. Nan Judaspan ahuun anu futsa Iscariote nanrifi Jesús fu rafua futsa ini.⁴ Ascashu niaifofo ano cani atofu tsainquicai. Ascano cashon ato yoini, —Unmun ahuuscashon Jesús ato achimatiroquin matoqui ihuunonfo, —ato huaiton.⁵ Nicacani fasi unimacoincaqui yoinifo, —¡Aicho!

Non mia pui inain min noco Jesús ato achimashocun, —ishon Judas yoiainfoan.
⁶Judas ato cumani, —Ai. Man ua yoia cuscan un mato Jesús achishotiroran, —ishon yoini. Ascacun nantian Judaspan shinanni ahuuscashomain un Jesús ato achishotiroquin. Yorahuanrasi yamaino achimapai.

Ahuun unutaqui Jesús afu rafumisifo futan pini

*Mt 26.17-29; Mr 14.12-25;
 Jn 13.21-30; 1Co 11.23-26*

⁷Asca noco fusititian non misi farashati maisi pimisi. Diospan nai oinmatinin nocon shunifoan ato facufo rututamarocon Diosin ato yononi cuscan chashoanun facufo rutunifo. Ascacun nocon fusititian norifi chashoanun facu rutumisi nocon shunifoan ani cuscan shinanshquin. ⁸Ascacun Jesús Pedro yafi Juan nichiqui ato yoini isca huaquin, —Itishara huatacahuun. Non chashoanun facu picanon, —ato huaiton.

⁹Cumanifo, —¿Rato pushu muran caashon non ati shara huaicaimun? —ishon yocainfoan.

¹⁰Jesús ato cumani, —Jerusalén ano nocoshon man oian nocofunun unu tutsaomushon foaiton nan mufaitacahuun. Ascashu nan iquaino afu iquifainshon pushu ifo man yoiqui isca huatiro, ¹¹“Nocon tapimamisiton mia yocaiqui isca huaa, ‘¿Rato cunu muranshon ufu rafuafo futan non chashoanun facu picaimun?’” ishon man yoiatton. ¹²Mato cunu uhuapa fomancayan ismai. Nan cunu muranfin nan non yopaiti mato ismaiquin. Nannoshon atishara huacahuun, —Jesús ato huani.

¹³Ascaino nan rafu Jerusalén ano focashon nan Jesús ato yoia cuscacoin oinnifo. Nannoshon chashoanun facu pichashonifo.

¹⁴Ascashon man itishara huashoafono Jesús yafi afu rafuafo ari fonifo. Noco-catan nantifi sapa ano tsaonifo.

¹⁵Ascashu tsaofafoan Jesús ato yoini, —Un matomaqui nataima un fasi mato futan chashoanun facu piiyopaimisi.

¹⁶Ascacun un mato iquisi icon yoiyoi uncai afanan mato futan piiyoima. Nan man Upa Dios niaifoan nantifi iquina ano nocoaitian yafi natian un acai cuscan ahuu cuscaramainquin man tapishquin, —ishon ato yoini. ¹⁷Ascatan cucho finifoan Apa Dios cufiyoni, —¡Aicho! Upan —huatan. Ato cucho inanqui yoini, —Ayapacahuun. ¹⁸Un afanan mato futan na fimi unu ayaima nan un nasoaitian uhuun Upa Dios fu nantifiton niaifo un iishquiran, —ato huani.

¹⁹Asca huatan Jesús misi finifoan afanan Apa cufiyoni, —¡Aicho! Upan, —huatan. Torupacushon atoti inanqui afanan ato yoini, —Naafin uhuun caya cuscaraquin. Un nantifi yorafohuunoashu nai. Ascacun nan man piatitan ua shinanfafaicahuun, —ishon ato yoitan.

²⁰Nanscarifi huaquin cucho finifoantan ato ayamapacuquin yoini, —Na ayatihunshon un mato ahuaa funa shara yoi isca huaquin, “Uhuun imi foaino un matohuunoashu nai man ufu uhuun Upa Dios ari ipanon,” —ishon ato yoini.

²¹Ascashon Jesús afu rafuafo yoiqui isca huani, —Nuno ufu sapa ano tsaofan futsan ua ato achimai. ²²Ascan Upa Diosin tsain inon pacoai uhuunoa cununi cuscacoinfin un naicain. Ascafia nan nocofunun ua ato achimanai cainyamainfin shara icuanaquin, —ishon Jesús ato yoini.

²³Ascaiton nicacani afu rafuafo yocanonannifo, —¿Rato futsacaimun non achimaiquin? —icashu afi ranan yoinannifo.

Tsoacaimun fasi shara finacaiquin

²⁴ Ascatan rato futsacaimun fasi finoinnifoan niaifocoin ishquiquin icashu fochishmanantanannifo.

²⁵ Ascaifoan Jesús ato yoini, —Nan icoinra huama niaifofoan ato curushcain yonofafainmisifo. Ato asca huafiacaquin yoimisifo, “Noco shara huashofafainmisiforan,” ishon noco huunoa yoicahuun,” ato huamisifo.

²⁶ Asca huafiamisifo marifi ato cuscara iyamacahuun. Ascataमारोcon facu pushco cuscara icahuun. Nanfo nan iyofofaan ato yonoafo cuscan ato ashotirofo. Ascatari niaifopaicaquin futsafo shara huacahuun. Asca nan mato shara huafafainmisi nanfin niaifo iishquiquin. ²⁷ ¿Ascan ratotocaimun futsafo finoanquin? ¿Futsafo yonofafainmisi iyamarai ato yonoshomisi? Nan icoinra huamafoan yoimisifo nan yonomitsamisitocaifin futsafo finoanquin ishon yoimisifo. Anori yoifiafo uncaifin mato yonoshomisiquin.

²⁸ Ascafia ahuara chacafo finonfiaqui man ua potama. Man uhuun nuua. ²⁹ Ascacun uhuun Upa Diosin ua catoan un afu niaifo inon. Nanscarifi aquin un mato catoan man ufu niaifo inon. ³⁰ Ascano un mato yoiái cuscan un niaifoanno marifi man ufu niaifofo iishqui. Nocon Upa Dios ari man ichanaintian marifi man ufu tsaoshquin. U futan pifain man ufutan ayashquin. Ascashu nocon caifo Israelifoan aton niaifofo man iishquin. Nan doce shoco noco caifofoan ato niaifo man ishquiran, —ishon Jesús afu rafuafo yoini.

—Pedro min futsafo, “Un Jesús oinmisimaran,” ishon yoiran, —Jesús huani

Mt 26.31-35; Mr 14.27-31; Jn 13.36-38

³¹ Asca huatan Jesús Pedro nan ahuun anu futsa Simón yoini, —Simón, Satanás Dios yocashon mia chaca huamapai. Umaqui mia imapaiquin. ³² Ascafia un mia Upa Dios cufishona min ua icoinra huafain afanan ua tanasharanon. Ascán min afanan uqui nasoino ufu rafua futsafori min ato yoisharatiro ua tanasharanonfo, —ishon yoiáiton.

³³ Pedronun cumani, —Ifon, mia cunumuran iquimanaifoanno urifi un mifu iquitiro. Ascashon mia rutuaifoannori urifi un mifu natiroran, —huaiton.

³⁴ Afanan yoini, —Pedro, un mia yoi. Tacara cuoataima min ato yoiquin, “Un Jesús oimismaran,” ishon min ato yoiqui rafu non fusti huairan, —ishon Jesús yoini.

³⁵ Asca huatan Jesús ato yocani, —¿Un mato nichiyamuatian pui non forusa non sapato futsan maisi nichiano man ahuara futsari yopaiyamuamun? —ishon ato yoiáiton.

Cumanifo, —Noncai ahuara futsa afanan yopayamuama, —huaifoan.

³⁶ —Asca natian pui ayashon mato pui fofain maton forusari fotacahuun. Asca nupu yopaquin maton sahuuti shochiquirinoa futsahuunshon nupu ficahuun. ³⁷ Ascacun uhuunoa cununi isca huaquin, “Arifi yoicaquin ‘man chaca huamisan,’ huashquicani,” ishon uhuunoa cununi. Uhuunoa icon yoiamafiaquin nan icocoin yoi cafisca huaafo. Ascano uquin cununi cuscan samamashtacoin aiquin, —ishon ato yoiáiton.

³⁸ A fu rafuafoan yoinifo, —Oinpon. Na nupu rafu, Ifon, —huaifoan.

—Un mato yoipaiyai cuscacai man tapiama. Ascacun non afanan aya tsainquimaquin, —ishon ato yoini.

Jesús Getsemaní anoshon apa cufini

Mt 26.36-46; Mr 14.32-42

³⁹ Nan camisi cuscan machi Olivo ano caino afu rafuafo achon fonifo. ⁴⁰ Nanno nocoshon ato yoini, —Upa cuficahuun Satanás mato chaca huamapaiyai cuscan huashcaquima. Ascacun ua potashcaquima cuficahuun, —ato huani.

⁴¹ Ato asca huatan chaimashta atom-aqui caashon Apa cufinquin isca huani ahuun ratoconun mai chachipacufoan Apa cufini.

⁴² —Upa, min ahuara futsa yorafo numashqui atromamainquin nan min apaiyai cuscan huahuu. Unfi mun itisharaquin atohuunoashu omitsiscacai naashquin, —Apa huaino.

⁴³ Ahuun oinmati afu nai muran ica aqui niriscatan mutsismainifoanni.

⁴⁴ Asca huaino fasi curushcain Jesús Apa cufini fasi ahuun nomuran nan omitsiscacai cuscan shinanquin. Ascaino imi foya niscan maiiqui futosomuni.

⁴⁵ Ascacaini afanan afu rafuafo ano caaquin oian man oshafo ini. Fasi aton Ifon omitsiscaiton shinancani oshafainnifo.

⁴⁶ Atoqui nocoshon oian oshafoan ato yoini, —Ahuuscain Upa cufitama man oshariai. Ascaquima Upa cuficahuun yoshin chacapan mato chaca huamapaiyai cuscan huashcaquima. Ua potashquimari cuficahuun, —ato huani.

Jesús achinifo

Mt 26.47-56; Mr 14.43-50; Jn 18.2-11

⁴⁷ Nan ato yoiyai muran yorahuanrasi nocotoshinifo. Nan afu rafumisi futsa Judascaifin rufofo oaino acho yora huanrasi funiquin. Nocotan Judaspan tamo tsoacatoshini. ⁴⁸ Ascaiton Jesús Judas yoini, —¿Judas, nan Diosin ua catoan-

caimun ua tamoqui tsoacaihuunshon mian ato achimaicai? —huani.

⁴⁹ Asca huaiton oincaquin afu rafuafoan Jesús yocanifo, —¿Ifon, non ato nopa rurapacutiromun? —ishon yocanifo.

⁵⁰ Asca huatan futsan nopa fifaitan nocon yorafohuunshon Dios cufimisi niaifocoinin ahuun oinmati pashtufain rurani.

⁵¹ Ascaiton Jesús yoini, —Unuhuu, —huatan afanan ahuun pafiqui funa futsa panichirishcatani.

⁵² Ascashon Jesús nocon yorafohuunshon Dios cufimisi niaifofu yafi ranushumuafu yafi Dios fu tsainti pushu cushumisifo yocani, —¿Ahuuscacai nopa yafi coshatifo ya man uqui fuamun?

⁵³ Shafatifi Dios fu tsainti pushu muran un matofu icanocai man ua achipaiti huama. Asca na yamu man uqui fua Satanás maton ifoanno, —Jesús ato huani.

—Un Jesús oinmisimaran, —ishon Pedronun yoini

*Mt 26.57-58, 69-75; Mr 14.53-54,
66-72; Jn 18.12-18, 25-27*

⁵⁴ Ascafiaiton achicashon nocon yorafohuunshon Dios cufimisi niaifocoinin ahuun pushu ano iyonifo. Ascaino chipo achon Pedro cafiaquin fishtanima. ⁵⁵ Umainti chii cutuhuashu yooaifoanno Pedrori atofu yooni. ⁵⁶ Ascaiton niaifoan ahuun oinmati shomayatton Pedro fuchini. Chii uruquin fuchashaiton ahuun fuso onanshon yoini, —Naafin nan Jesús fu imisiquin, —huaiton.

⁵⁷ Pedronun cumani, —Ma, ainfon. Uncai Jesús oinmisima, —huani.

⁵⁸ Man ascano futsanri afanan onanshon yoini, —Minfin nan Jesús fu imisi futsaquin, —huaiton. —Ma. Unmafiquin, —Pedronun huani.

⁵⁹ Man ascano chipo afanan futsanri onanshon yoini, —Nancoinfinquin. Jesús fu cahuacacaimisi. Nanrifi Galilea anoaran, —ishon nocofunu futsan yoiaiton.

⁶⁰ —Min yoiai cuscaai un tapiama. Uncai Jesús oinmisimaran, —itapaiyaino tacara cuoni.

⁶¹ Nanscatanaino ifiacuahuan Jesús Pedro fuistani. Fuistanaiton nan Ifoan yoia cuscan shinanriscatani, —Tacara cuoatama min yoiquin rafu non fusti huai, “Un Jesús oinmisimaran,” —Jesús huacun Pedro shinantani.

⁶² Umaintinoashu chifi caicaintan fasi uaicoinni.

Jesusqui cashupainifo

Mt 26.67-68; Mr 14.65

⁶³ Ascaino nan cushuafo Jesusqui cashu mutsamai taunifo. ⁶⁴ Ascano fufoposhon sutucashon yocanifo, —¿Mia tsoan acamainquin? Oinyamafishon noco yoihuu, —huanifo. ⁶⁵ Asca huashon roaqui futsanifo.

Niaiffoan Jesús yocanifo

Mt 26.59-66; Mr 14.55-64; Jn 18.19-24

⁶⁶ Shafatapaiyaino Israeliffoan niaifofosi nan yorafohuunshon Dios cufimisi niaiffo non Moisés cununi cuscan tapimamisifoan ichanannifo atoqui Jesús iyoafoan yocashcaquin.

⁶⁷ Ascashon atoqui iyoafoan yocanifo, —¿Minmun Criston? ¿Diosin mia catonni? Noco yoihuu, —ishon niaiffoan yocaiton.

Jesús ato cumani —Un mato, “Ai,” huaitocai man ua icoinra huaima. ⁶⁸ Ascashon un mato yocaitoricaí man ua cumaima. ⁶⁹ Ascacun natian yafi nantishon tapiquin uhuun Upa Diosin ahua-mamishiti huatiro futan un nantifi ato iquipacunacaran, —ishon yoiaiton.

⁷⁰ Afanan yocanifo, —¿Ascan minmun Diospan facu? —ishon yocaifoan.

—Nan man yocain cuscafin unquin, —ato huani.

⁷¹ Ascaiton nicacaquin yoinifo, —Nicacapon. Afanancai ahuunoa tsain chaca huaifoan non yopaima. Naan yoiai cuscan noficoín man non nicairan, —icashu yoinannifo.

Jesús Pilato ano iyonifo

Mt 27.1-2, 11-14; Mr 15.1-5; Jn 18.28-38

23 Ascatan Israeli niaiffoan Jesús aton niaifocoin shinanmaqui iyonifo. Nan Pilato niaifofin Romanonfoan ato niaifo iniquin. ² Ascano niaiffoan Jesús tsain paranacaquin yoinifo, —Na nocofunún fasi noco yorafo fucash huaquin ato yoia, “Romanon niaiffoan mato pui yocaiton inanyamacahuun,” ishon yoifain “Un Diospan facu un mato niaiforan,” noco huaran, —ishon Pilato yoinifo. ³ Ascaiton Pilatonun yocani, —¿Minmun Israeliffoan niaifo? —ishon yocaiton.

Jesús cumani, —Nan mian yoiai cuscafin unquin, —huani

⁴ Ascaino Pilato nocon yorafohuunshon Dios cufimisi niaiffo yafi nanno nia futsafo ato yoini, —Na nocofununcai ahuara chaca yoima. Ahuash-tacai ahuun nuama non iquimanai, —ishon ato yoini. ⁵ Ascafiaton fasi curushcain cumanifo, —Na nocofunúnfi ato yoiquin Judea maitio fasi ato fucash huafoanfaini. “Romanonfoan niaifo non potanon,” ishon yoiagain. Tau huaqui Galilea anoafu yoiqui fucash huatan nunorifi man oaran, —huanifo.

Jesús Herodes ano iyonifo

⁶ Ascaiffoan nicaquin Pilato afanan ato yocani, —¿Na nocofunumun Galilea anoa? —ishon ato yocaiton. ⁷ —Aifain, —huaiffoan. —Asca un Herodesqui Jesús nichinonquin. Nan Galilea anoa niaiffoquin. Ahuuscamain huaicai afi noco

yoinon, —ishon Pilato yoini. Nantianri Herodes arifi Jerusalén ano oni.

⁸ Jesús aqui nocoaiton fuchitan Herodes unimacoinni. Fasi oinpaimisishaquin. —Ahuamamishti noco ismapainonran, —ishon ahuun nomuran shinanni. ⁹ Ascashon fasi ahuarafa Jesús yocapaifiaitocai cumanima. ¹⁰ Ascaino nocon yorafohuunshon Dios cufimisi niaifofo yafi Moisés cununi cuscan tapimamisifo Herodesqui fasi chanirianofo chaca huacaquin. ¹¹ Ascaino Herodes futan ahuun ranushumufoanri fasi cashumutsama huaquin roarianifo. Niaifoan sahuuti sahumatan Pilato ano afanan nichinifo. ¹² Pilato fu Herodes shara huantananyamafiamisishaquin nantian shara huantanannifo. Jesús achicanisi raunannifo.

Niaifoan ato yononi Jesús rutunonfo

Mt 27.15-26; Mr 15.6-15;

Jn 18.39-19.16

¹³ Ascacun Pilato afanan ato cunani. Nocon yorafohuunshon Dios cufimisi niaifofo yafi niaifofo futsafori ichanan huashquin. ¹⁴ Ascaino ato ichanan huashon ato yoini,

—Man uqui na nocofunu ihua. Man ua yoia naton yorafo tsain chaca yosian Romanonfoan aton niaifo non potanon, icaran ishon man ua yoia. Ascafiacai as-carama. Maton ointaifi un yocafiaitocai man ua yoiai cuscan ua cumaqui chaca huama. ¹⁵ Herodesricai ahuunoa ahua chaca nicama nan man yoiai cuscan. Ascacun Herodes nocoqui afanan Jesús nichian. Na nocofununcai ahua chaca huamafinquin naashquin. ¹⁶ Ascacun un onaintimaiyoi catanon, —ishon ato yoini.

¹⁷⁻¹⁸ Ascaino mucainifoannifo. —Na nocofunu rutuhuu. Barrabás noco cainmashohuun, —huaifoan. Fuusititiansi Pilato a cunu muran iquiafo fusti ato

caimapaoni. Faritifi nan yorafoan cainmapaiyaifo Pilaton ato cainmashopaoni.

¹⁹ Nan Barrabásfin yora rutumisi iniquin. Nantori yoini, —Romanonfoan niaifo non potanon, —ishon yorafo yoini. Ascaiton cunu muran iquimanifo. ²⁰ Ascaifoan afanan Pilatonun ato yoini Jesús nichipaiquin. ²¹ Ascafiaino afanan mucainifoan yoinifo,

—Mastahuun, —huarianifo.

²² Ascaifoan afanan Pilato ato yoini, —Ahuuscacufin. Ahuacai chaca huamafinquin. Ahuashtacai chaca huatananma napanan. Unfin onaintimashon nichiqui catanon, —ishon ato yoini.

²³ Ascafiaino oi ashcafinin, —Mastahuun, —huarianifo. Yoiquin unuyamacaiyaifoan Pilato shinantani ascaiton, —Mafin acahuun. ²⁴ Man fasi yoiriaicai asca nan man apaiyai cuscan huacahuun, —ato huani. ²⁵ Nan Barrabás yora rutufain niaifo potapaifiamisicun nancai cunu murannoa cainmafain Jesusrocon ato inanni nan apaiyaifo cuscan huanonfo.

Jesús ihui coyan iquinanqui mastanifo

Mt 27.32-44; Mr 15.21-32; Jn 19.17-27

²⁶ Jesús iyocaquin oianfo Simón pushurasi patasharinoashu oaiton fuchitan Simón Cirene anoa yononifo, —Ihui coyan iquinan noco foshocahuun, —ishon iyamafainifo. Jesús rucucaino achon iyashon foni.

²⁷ Ascaino yorahuanrasifo ya ainfofori achon fonifo. Nan ainfofo uaifonifo aton Ifo manocani. ²⁸ Ascaifoan ifiacucahuan Jesús ato yoini, —Jerusalén anoa ainfofoan, uhuunoashu uaiyamacahuun. Mafiri uaicain maton facufohuunoashu uaicahuun. ²⁹ Manfin chipo omitsiscaquin yoishquiquin isca huaquin, “Non facuomafofi shara icuanaquin no fu omitsiscanonfomaran,” ishon man yoishqui. ³⁰ “Machi nocoqui

maocoano non nai futsuafin shara itiroquin. Omitsiscashquima,” ishon nannori man yoishqui. ³¹ Un ahua chaca huayamafiamisicun ua isca huacani. Ascan tsoan ahua chaca huaquin unuyamacaiyafin fasi finacaicani omitsiscamashcaniquin, —ishon Jesús ato yoini. Ascashon Jesús iyonifo mastaifocaquin. ³² Ascashon yomutso rafuri iyonifo Jesús ya mastaifocaquin

³³ Ascatan anoshon mastaifoano noconifo. Nanno ahuun anu mapo shao ini. Nannoshon Jesús mastanifo. Ascashon nocofunu chaca rafuri ocuma futsa futsafain ocuma futsari futsa mastanifo. ³⁴ Ascashon mastaifoan Jesús Apa cufini, —Upan, ato rau huahuu. Ua isca huaifo cuscan tsoan tapiamaquin. Un min facufiacun tapiafoma, —ishon Jesús apa cufini.

Mastacatan ahuun sahuuti pashcanan-shcaquin. Aya cashuti ya cashunifo nan finonmanaton ahuun sahuuti fiqui tau huani. ³⁵ Nanno yorahuanrasi mapo cashon oinnifo. Ascashon niaifofanri roaqui futsacaquin yonifo,

—Non oinon. Futsafo numamisi cusca-main afiri numaiquin nan Diosin catonni Cristo huashuforan afiri numaicain futsafo numamisi cuscan, —ishon yoinifo.

³⁶ Ascaino ranushumuafu aqai cashupainifo. Fimi unu focashcoin muran mishan pocotan inanpaicaquin.

³⁷ Ranushumuafu yoinifo, —Minmain Israeliffoan niaifofquin mifiri numahuu, —huanifo.

³⁸ Ascashon ahuun mapo manaonri aqai cununifo.

ISRAELIFFOAN NIAIFORAN

ishon.

³⁹ Ascaino afu masta futsan Jesusqui tsain chaca huani.

—Minmain Cristoqui mifiri numacain nocori numahuu, —huiton.

⁴⁰ A fu masta futsan yoini, —Asca huayamahuu. ¿Minmun Diosqui ratu-

imacai? ⁴¹ Non chaca huamiscufin noco mastafocuin. Asca Jesuscai ahua chaca huayamafiamisicun mastaforan, —ishon futsan yoini.

⁴² Ascashon nantori yoini, —Ifon, Dios niaifo ari nocoshon ua shinanhuun, —huiton.

⁴³ Jesús cumani, —Icon un mia yoi. Na shafatan min ufu ari iquicaiquin. Nanno fasi sharacoin. Min ufu unimacoin shara-pacunacaran, —huani.

Jesús nani cuscan

Mt 27.45-56; Mr 15.33-41; Jn 19.28-30

⁴⁴ Asca huatanaino fari masafin racafiashu nan maitio faquish-pacucahuani. ⁴⁵ Ascainocai fari chashayonima. Ascashu man fari caino afanan shafani. Ascaino nantianri Dios fu tsainti pushu murannoa Dioshuunoashu panomanhuan pochimua aficoín nushmancayan fashnupacucahuani. ⁴⁶ Ascaino Jesús Apa cunainifoanni oi ashcafinin,

—Upan, miari ua ihuicoinhuun, —huatan shacaica unufaini naani.

⁴⁷ Ascaiton ranushumua niaiffoan yoiquin. —Icocoínfinquin na nocofununcai ahua chaca huayomisima. Fasi sharacoin. Nan non oian cuscan nantifi Diosin acaran, —ishon ranushumua niaiffoan yoini.

⁴⁸ Ascaiton oincani fasi manocoincaini fonifo. ⁴⁹ Ascaiton ahuun yorahuafo yafi nan ainfo Galilea anoashu afu foafan chai nishon oinnifo.

Jesús mai huani

Mt 27.57-61; Mr 15.42-47; Jn 19.38-42

⁵⁰ Nannori nocofunun ahuun anu José Israeliffoan aton niaifo ini. Nan nocofununfin Dios tanasharapaicoinniquin.

⁵¹ Nantoricai niaifo futsafoan shinainfo cuscan shinannima. A niaiffoin Ari-matea mai ano iniquin. Arimatea nan pushurasi Judea muran ini. Nantorifi

Cristo nan Diosin catoan manapaoni aton niaifo inon.

⁵² Ascashu cashon José Pilato yocani. —Un Jesús ahuun caya toquirininhuan quini muran mai huapairan, —ishon. ⁵³ Ascano yocafaini cashon a ihui coyán iquinanqui mastafu fotomapacufuon ahuun yoratishton racoshon toquirininhuan quini muran mai huani. Jesús naataima quini puhuunifo nan murancai tsoa maiyomisima muran Jesús mai huani. ⁵⁴ Tunutitian man nococuanaino Jesús mai huani. Nan shafatan itishara huamisifotian ini.

⁵⁵ Ascaino nan Galilea anoashu ainfofo Jesús fu fuitafoan José Jesús mai huaiton oinshcaquin mufainifo. Ahuuscashomain rataicain oinsharanifo. ⁵⁶ Ascashu nan ainfofo afanan aton pushu ano nasofainifo. Ininti shara itishara huai focani. Unupa yafi mutopa inin shara fii focani fonifo. Jesús ahuun caya camaqui ocashcaquin. Ascafiaino tunutitian nasoyonifoma. Finonyocani. Israelifoan yononi cuscan tunutitian tsoa raqui cayotiroma ini. Ascacun nan nicacoinnifo.

Jesús funini cuscan

Mt 28.1-10; Mr 16.1-8; Jn 20.1-10

24 Israelifoan tunutitian iyoco futsaino funamanrishta aton ininti rafu ya Jesús maia ano fonifo. Iquisi ininti ati shara huafaincani. ² Nococaquin oianfo quini ahuun fupoita toquirininhuan tocoro man fupucua ini. ³ Ascaino iquifainpaiquin oianfo aton Ifo Jesús ahuun cayacai ano inima. ⁴ Ascaiton oinquin aton nomuran shinannifo, —¿Raquimun ahuun caya foafoquin? —ishon shinanpaiyaifoanno nocofunu rafu ato sahuutifoya chashatanaino atoqui niriscatanifo.

⁵ Ascaino ainfofo fasi ratucoincani fuoi futsunifo. Ascaifoan Diospan oinmati

rafutan ato yoini, —¿Ahuuscaquimun yora nia man funaicain nan yora naacun mai huamisifo murannoa? ⁶ Afanancai nunomafinquin. Manfin funiaquin. ⁷ ¿Galilea ano matofu iyoshon mato yoimismun man shinainmacai? Mato yoimisi isca huaquin, “Chacafoan ua achishon ua mastafu un naafiashu osha rafu non fusti finontan un afanan funishqiran,” mato huamisi nanmun man shinainmacai, —ishon ato yoinifo.

⁸ Ascaiton nan Jesús ato yoimisi cuscan shinanriscatanifo. ⁹ Ascatan ainfofo nasofaincani nan once nocofunufu Jesús fu rafumisifoquin chanitoshinifo. Nannoa futsaforifi nan rama oinfainfo cuscaicoan ato yoinifo. ¹⁰ Nanfofin María Magdalena non Juana non Santiago ahua María non ainfo futsafori nanfo atoqui chanitoshinifo. ¹¹ Ascafiainoancai ato icoinra huanifoma. —Icon yoicani maran, —ato huanifo.

¹² Ascaiton nicafaini Pedro ichoni toquirinin huua quini muran oincai. Nocotan tucupacuhuan quini naisquin oian ahuun racoita fusti nanno mania ini. Ascaino Pedro —¿Ahuuscacun aquin? —icaini cani.

Jesús Emaús fain cani cuscan

Mr 16.12-13

¹³ Nan shafatanri Jesús tanamisi rafu pushurasi Emaús ano fonifo. Emaús Jerusalén chaima ini. ¹⁴ Nan rafu focaquin Jesús aquitafo cuscan afi rafu yoinanfonifo. ¹⁵ Ascaifoanno Jesuscoan afanan atoqui nocotan. ¹⁶ Ato fu cafiaitocai tsoan onannima. Diosin ato onantima huaino. ¹⁷ Ascaiton Jesús afincoan ato yocani,

—¿Nocofunu rafutan, raquiri man yoinanfoi caimun? —ato huaino. Pusi-tama nituriscatanifo.

¹⁸ Ascaiton naan Cleofas fustiton cumani,

—Mirus fusti Jerusalén ano min ica-toracafin min tapiamaquin na rama iquitan cuscan, —huaiton.

¹⁹—¿Ahua ahuuscaitamun? —ishon ato yocaiton.

—Jesús Nazaret anoaya non tsainquin. Nanfin Diosin tsain yoimisiquin. Diosin ahuun curushhuunshon noco yoimisi. Dioshuunshon ahuamamishti noco huashomisi. Ahuun tsainman yora caya huafain ahuara sharafo noco huashomisi. Nan acái cuscan nantifi man non oian. Diosin yafi nantifi man non oian. Nocofunu sharacoinfin non oinmisi. ²⁰Ascafiaton nocon yorafahuunshon Dios cufimisi niaifofo non nocon niaifofoan achicashon mastaitafo. ²¹“Nancairocon nocon caifo Israelifo nocon Numamisi ipainonran,” non huamisi. Asca natian man naita shafa rafu non fusti man finoan. ²²Na funamanri ainfofoan no fu focashon man funatanafo ahuun caya quini muran yamaiton.

²³Ascashon naso furan noco yoiäfo ahuun caya anocuma. “Ahuun oinmati afu nai muran ica rafutan yoiäfo Jesús man afanan niaran,” noco huafo. Ascacun non shinan “¿Ahuuscamun aaquin?” ishon. ²⁴Ascaino nocomaquinoashu rafu ichocashon oiancai ano Jesús ahuun caya icama. Naan ainfofoan yoiäfo cuscan iconcoiran, —ishon non yoiä.

²⁵Ascaifoan ato yoiqui isca huani, —¡Ohua! Manfin tatimacoinfoquin. Diosin tsain yoimisifoan yoinifo cuscan mancai icoinra huacuanama. ²⁶Man cununi isca huaquin, “Diosin yonoa nan catoan Cristo omitsiscayotan. Apa Dios fu ni-aifocoin iishquiran,” icashon ahuunoo cununiran, —ishon Jesús ato yoini.

²⁷Ascacun tau huaquin ahuunoo Moisés cununi cuscan yoifain Diosin tsain yoimisifoanri ahuunoo cununifo yoifain nantifi Diosin tsain ahuunoo

cununi cuscan atofu cafoquin shafacafi ato yoifoni.

²⁸Ascaino Emaús ano man nocoti chaima nan rafutan shinannifo, —Noco finonfaini cairan, —ishon shinannifo. ²⁹Ascatan nan rafutan yoinifo —Cayamahuu. Man fari caiquin. No fu iyopun, —huariaifoanno atofu caani. ³⁰Ascatan piaifoanno Jesús misi finifoantan Apa Dios yoiqui isca huani, —¡Aicho! Upan, non yopai cuscan min noco inanmisan, —huatan. Misi torupacushon aton inanni.

³¹Ato inainton Dioshuunshon Jesús onanriscatanifo. Onantapaiäifoanno atomaquinoashu yamariscatani. Afanancai tsoan oinnima. ³²Ascaino afi rafu yoinannifo, —Noco fu fain oquin Diosin tsainhuunoo cununi cuscan noco yoi fuaino non mua nocon ointi fupuisharatanaiton. Ahuun tsain sharacoinran, —icashu yoinancatan.

³³⁻³⁴Ascashu Jerusalén ano nasoriscaturanifo nan Jesús fu rafuafo once funashcaquin. Ascashon ato fuchinifo ichananshu nan once yoinainfoanno, —Icon, nocon Ifo funia. Pedro man oinmanaran, —ishon yoinifo.

³⁵Ascaifoanno nan rafu Emaús anoashu fua rafutari yoinifo, —Noficoinri Jesús man non oian Emaús fain non caino noco ahuunoo Diosin tsain yoiä. Ascatan noco misi torupacushonaiton man non onanriscatanaran, —ishon nan rafutari ato yoinifo.

A fu rafuafoqui Jesús niriscatani

Mt 28.16-20; Mr 16.14-18; Jn 20.19-23

³⁶Nan yoiriaifo muran Jesús afanan atoqui niriscatani. Ascashon ato yoini, —Maton ointi unimacain isharacoineaahuun, —ato huani.

³⁷Ascaino —Yoshiran, —icashon shinannifo. Fasi mustairitan ratucoinnifo.

³⁸ Ascaifoan Jesús ato yoini, —¿Ahuuscai man ratuain? ¿Ahuuscai maton nomuran man icoinra huaimamun? ³⁹⁻⁴⁰ Ua oincahuun. Uhuun mucun yafi uhuun tau oincoincahuun. Pirico tohua. Nan uncoinfiquin. Yoshincai ua cuscara namiyacain shaoyamafinquin. Man manfin oincain shao yacain un nami yaran, —ishon ato yoini. Ato yoiquin asca huatan ahuun mucun tohua yafi ahuun tau ato ismani. ⁴¹ Ascaiton oincaquin ato nomuran shinannifo, —Namaparaca non oincatin, —ishon shinannifo. Icoinra huacuatama fasi aqui unimacoinnifo. Ascaiton nan iconcainran huacaicainonfo ato tushu yocani.

⁴² Ascaiton shiman shoi inannifo.

⁴³ Ascano aton ointaifi pini.

⁴⁴ Ascashon afanan ato yoini, —Munfin mato yoiyomisiquin. Uhuunoa Moisés non Diosin tsain yoimisifoan non fanainti uhuunoa cununifo cuscan nanscacoifin un aiquin, —ishon Jesús ato yoini.

⁴⁵ Ahuun shinanpan aton nomuran nanumana aqui cununifo cuscan tapisharanonfo. ⁴⁶⁻⁴⁷ Ato yoini, —Diospan tsain cununi isca huaquin, “Cristo nan Diosin catoan naafiashu afanan osha rafu non fusti finontan finishquin.” Ascacun uhuunshon ato

yoifoanfafaishcahuun aton chaca shatucashon shinansharaifoan un ato chaca soashonon. Jerusalén ano ato yoiqui tau huatacahuun. Ascashon nan manifoati ato yoifoanfafaishcaquin.

⁴⁸ Ascashon un mato yoiaiton man oian cuscan yafi man nica cuscan futsafori yoipacushacahuun. ⁴⁹ Ascafia nuno Jerusalén ano oinyocaquin. Upa Diosin yoiyotiani cuscan un ahuun Yoshin Shara matoqui nichishqui. Ascano matoqui nocoshon ahuun curush mato inain. Nantian un mato yonoo cuscan man futsafo uhuunoo ato yoitiro, —ishon Jesús yoini.

Jesús nai muran cani cuscan

Mr 16.19-20

⁵⁰ Ascashon Jesús Jerusalén anoshon Betania pasoato ato iyoni. Betania pasoato nococashon Jesús mushainacahuan yoini, —Upa Diosin, fasi uhuunshon tapimisifo cushusharapacuhuun, ⁵¹ —huatan atomaquinoashu Jesús nuinacahuan Apa Dios icano ari cani. ⁵² Ascaino nanno amaquinoashu naso furanifo. Yoinifo, —Jesús, min nocon Ifo fasi sharacoin. Non minhuun noiran, —ishon yoinifo. Yoicatan Jerusalén ano naso furancatan fasi unimacoinnifo. ⁵³ Dios fu tsainti pushu muranshon Dios yoisharariapaonifo. Nanti.

Juan Jesushuunoa Cununi

Jesucristohuunoa Juanpan cununi

1¹⁻²Natian Jesucristohuunoa un mato yoicain man tapinon. Ahuashta oniataima Cristo Apa Dios fu iyopaoni. Arifi Diosin. Apa Diosin shinain cuscari arifi shinamisiquin. Nannori fusti ahuun tsain. ³Ahuunshon Upa Diosin nantifi onihuaniquin. Cristohuunoomacai ahuashta onihuanima. Arusu fusti Apa futan nantifi onihuaniquin. ⁴Ahuunashu fusti yora nitirofoquin. Aafin chashamati cuscaquin. Upa Diosin ahuu cusaramainquin arus fusti yorafo oinmatiro. ⁵Faquissh muran chashamatinin noco oinmasharatiro. Nanscarifiai yora chacafo murannoari Cristo noco oinmatiro non Dios tanasharanon. Nan chacafoancai Cristo unumatiroma.

⁶⁻⁷Ascano Upa Diosin Juan nichini Jesucristohuunoa yorafo yoinon. —Jesushuunoaashu yorafo Dios fu ipatiro. Upa Diosin mato tapimapaiyai cuscan Jesushuunshon mato tapimatiro, —ishon Juanpan ato yoini. Nannori ato yoini icoindra huanonfo. ⁸Juanpacai yorafo Dios ya imapacutiroma. Diosifin man Juan nichiniquin ato yoinon. —Jesucristo fustichifin noco Dios ya imapacutiroquin, —ishon ato yoinon. ⁹Yoioni cuscan atoqui noconi. Criston iconquin Dioshuunoa tapimatiro. Diosin nantifi yorafoti imapaiyai cuscan ato tapimamisi.

¹⁰Nanton mai yafi yorafoti onihuafianicucai atoqui nocoaiton tsoan onanifoma. ¹¹Ahuun mai ano nocofiaitocai ahuun yora Israelifoan oinpainifoma. ¹²Asca huafiainfoanno, nan noiaifoan

icoindra huanifo. Ascaiton ato yoini isca huaquin, —Man ua icoindra huaashu Upa Diosin Facu man itiroan, —ishon ato yoini. ¹³Yorafoancai Diosin Facu huatirofoma Diospan Facu inon. Ascashon tsoancai yoiqui isca huatiroma, —Uhuun ahuin un facu nanumatiro. Caianshu Diospan Facu inon, —ishoncai tsoan anori yoitiroma. Diosin fustiton ahuun facufo cainmatiro. Noncai asca huatiroma. Upan Diosin apaiyai cuscan Jesús icoindra huafoti aton nomuran finanantiro ahuun facufo ishcaquin.

¹⁴Ascan Criston Apa Dios icanoashu mai ano oni yoracoin ishquin. Nocoashu no fu iyopaoni. Nantifi yorafo noimisi. Nocoahuun ramapaicoin. Ahuun tsain iconcain. Arusu fustifin Upa Diosin facucoinquin. Apa Dios shara imisi cuscan arifi nanscacoimisisiquin. Man non oinpaoni. ¹⁵Ahuunoa Juanpan yoini isca huani, —Ua nicacahuun. Nanhunoa un mato yoimisisiquin. Un mato Diospan tsainhuunoa yoiofiamisi natian aficoin man matoqui noco. Un mato yoimisi cuscan nanfin Diospan facu oinquin. Unmaquian. Un caiantaima Apa Dios fu iyopaoniquin. Ascan ua fasi finoncoian, —ishon Juanpan ato yoiniquin.

¹⁶Jesús nantifi noco shara huamisisiquin. Nocoahuun noiquin noco shara huafafaini. Nantifain man non mumisisiquin. ¹⁷Upa Diosin noco yonopaiyai cuscan Moisés nocon shunifo yoiniquin. Ascaiton ahuunshon norifi non tapitiroquin. Moisés nanfo noco tapimafiaino Jesucristo nocoqui oni nocoahuun ramapaicain aafin iconmisisicoinquin noco ismapaoni. ¹⁸Tsoancai Upa Dios oinmisisima. Ascacia ahuun Facu fu rafumisiton ahuunoa noco yoimisisiquin. Ahuunshon non tapitiro ahuu cusaramain Upa Diosiquin.

**Juanpan yorafo unu muran
iquimapacumisiton
Jesucristohuunoa ato yoiniquin**

Mt 3.11-12; Mr 1.7-8; Lc 3.15-17

¹⁹ Ascano nocon caifo Israeli niaifofoan Jerusalén anoshon nan nocon yorafohuunshon Dios cufimisifo non ato fu niaifo patasharinoafo Juan icano nichinifo. —Juan yocatacahuun, “¿Min tsoamun?” ishon yocatacahuun, —ato huaafo focashon. ²⁰ Juan yocaifoanno pusitama shafacafi ato cumani, —Uncai Diospan Furunma. Unricai Cristoma, —huiton.

²¹ —¿Ascan min tsoamun? ¿Minmun Elías? —huaifoan. —Ma. Uncai Eliasma, —huiton. —¿Ascan minmun Diosin tsain yoimisi nan nocoqui oiran Moisés noco huamisi? ¿Nan non manamisi minmun? —huaifoan. —Ma. Unmafinquin, —huiton.

²² —¿Ascan min tsoamun? Noco yoihuu noco nichiafo non ato tapimanon. Mihuunoa noco tapimahuun, —huaifoan.

²³ Isaiás cununi cuscan nannoricoin Juanpan ato yoini isca huaquin, —Diosin mato yoipaiyai cuscan ua tapimana un mato yoinon. Tsoan istaipamashon un oi ashcafinin yoimisi isca huaquin, “Nocon Ifo nocoqui oshquiquin. Nocoataima itisharacahuun. Man ipaoni cuscan afanan ayamacahuun. Nantifi maton chaca potacahuun. Cayacafi ishharashcaquin,” —ishon ato yoini.

²⁴⁻²⁵ Nicacashon nocon caifo Fariseofoan ato Juanqui nichinifo yocanonfo, —¿Min Cristo iyamacain, min Elías iyamacain nan non manamisi Diosin tsain yoimisciai min ahuuscashocon min yorafo unu muran iquimapacuamun? —ishon yocaifoan.

²⁶ Ascaiton Juanpan ato cumaquin, —Unfin ato unu muran iquimapacuaquin.

Ascafiano nuno noco muran futsan no-coa. Mancai onanma. ²⁷ Un natian mato Diosin tsain yoifafaini. Ascafia afincoin chipo mato yoishquin. Fasi ua finoncoian. Un ahuara shara huaa rafanancai un ahuun oinmatima. Uhuun rama-paiyamainocai un ahuun oinmati icuamamaran, —ishon Juanpan ato cumani.

²⁸ Nan pushurasi Betania unu Jordán oquirishtashon Juanpan nannoshon ato unu muran iquimapacuni. Nannoashuri atofu tsainni.

**Jesufin Diospan Chashoan
Facu cuscaraquin**

²⁹ Ascatan iyoconaino Juanpan Jesús aqui oaiton oinni. Ascanshon yorafo yoini isca huaquin, —¡Oincapon! Nan Diospan Chashoan Cahuashara cuscaracoin oi. Nanton nantifi yorafo nan icoinra huafotisi aton chaca soashonpacunaca. ³⁰ Un mato ahuunoa yoimisi cuscan, un mato yoiqui anaitiano nocofunu shara matoqui nocoi. Un caiantaima iyomisi. Ascan ua fasi finoncoian. ³¹ Unrifi un onansharayamafishon un yorafo unu muran iquimapacuaquin a nocon caifo Israelifoan a onanonfo, —ishon Juanpan ato yoiniquin.

³² Jesushuunoa Juanpan ato yoini isca huaquin, —Diospan Yoshin Shara nai murannoashu ruhui cuscara Jesusqui fotopacucahuanaiton. Uficoi un oian.

³³ Un onantaima Upa Diosin ua yoia isca huaquin, “Tsoan ua icoinra huaifo min unu muran iquimapacutiro. Futsa miqiu oaino uhuun Yoshin Shara nan nocofunuhuun nuupacucahuashquin. A fu nitushquin. Nan oinquin min tapitiro uhuun Yoshin Shara matoya rafumashquin ahuun shinanshara maton nomuran shinanmaniran,” ishon ua yoia. Upa Diosin ua anori yoiyamacucaí Jesús nan Diospan Furun urifi un onancuana. ³⁴ Ascafiaшон mun oian. Ascan un mato iconcoin yoiquin nancaifin

Diospan Furunquin, —ishon Juanpan ato yoini.

Jesús icoinra huaquin tau huanifo

³⁵ Iyoconaino afanan nanno Juan yafi ahuun tananmisifo rafu. ³⁶ Niafoanno Jesús ato finonfainaiton Juanpan oinquin ato yoini, —¡Oincapon! Nan Diospan Facu Chashoan Facu cuscara, —ishon ato yoini.

³⁷ Nicacatan nan rafutan Jesús mufainifo. ³⁸ Ascaiton Jesús ifiacucahuan ato oinquin yoini. —¿Ahua man funaimun? —ishon ato yocaiton. —¿Tapimamisiton, rani min iquimun? —huaifoan.

³⁹ —Fucahuun un mato ismanon, —ishon ato yoini. Ascatan afu focaquin oianfo ica ini. Nanno afu yatapacunifo.

⁴⁰ Nan rafu Juanpan ato yoia cuscan nicacatan Jesús mufainifo futsan ahuun anu Andrés. Nan Andrés ahuun ochi Simón Pedro. ⁴¹ Jesús icano nococatan Andrés samamashta ahuun ochi Simón funai cani. Aquí nocoshon yoini, —Upa Diosin noco yoiyoni, “Un maton Numamisi matoqui nichishquiran,” ishon noco yoiyoni. Nan man non fuchia. Nanfin Cristoquin. Oinyohuu, —huani.

⁴² Ascantan foaifoanno Andrés Simón Jesusqui iyoni. Aquí nocoshon Jesús Simón oinquin yoini, —Minfin Simonquin Juanpan facu. Natian un mia anu futsa tuquihuanon. Non mia Cefas huairan, —ishon yoini. Cefas nahua tsainmanfin Pedro.

Jesús Felipe yafi Natanael cunani afu fononfo

⁴³ Ascan iyoconaino Jesús shinanni isca huaquin, —Un Galilea ano cairan, —ishon shinanni. Caquin Felipe fuchitan yoini, —U fu cahuun, —huani. Nicatan afu cani.

⁴⁴ Felipe non Andrés non Pedrori pushurasi ahuun anu Betsaida ano in-

ifo. ⁴⁵ Ascatan Felipe Natanael fuchishon yoini, —Moisés Diosin yononi cuscan cununi isca huaquin, “Un Numamisi matoqui nichishquiran,” ishon Diosin yoini cuscan Moisés aquí cununiquin. Nannorifi Diosin tsain yoimisi futsafoan yoinifo. Nancai man non fuchiaran. Jesusfin José ahuun facu Nazaret anoquin, —huaiton.

⁴⁶ —¿Ahuatomun noco Nazaret ano shara huashotiroquin? —Natanael huaiton. —Ohuu, Oinshquin, —Felipe huani.

⁴⁷ Natanael aquí nocoaiton Jesús ahuunoa yoini, —Naafin Israelicoinquin. Diospan yora ipaicoin. Nantofin iconcain shinanfafaimisiquin. Paracai huamisimaran, —ishon Jesús ahuunoa yoini.

⁴⁸ Nicatan Natanael cumani, —¿Ahuuscashomun ua oinyamafiamisishaquin min ua onantiroquin? —ishon yocaiton. —Felipe mia cunataima un anoyamafiashton ihui huiguera namannoa un mia oian, —Jesús huaiton.

⁴⁹ Ascaiton, —Tapimamisiton. Felipe ua yoia cuscan iconcain. Minfin Diospan Furunquin. Nocon caifo Israelifo min nocon niaifoquin, —huaiton.

⁵⁰ Jesús cumani, —Min fimi huiguera ihui naman raca. Un ano yamafiashton un mia oian. Un anori mia yoiaiton mian icoinra huaa. Min ahua shara finacaia min oinshquin.

⁵¹ Iconcain un mia yoinon. Min Upa Diosin nai muran icano oinshquin. Uhuunoashu Upa Diosin ahuun oinmati afu nai muran icafo mai arishon nai muran Diosin icano funishquin. Ascaiton min oinshquin. Upa Diosin icanoashuri mai ano fotoaino min ato oinshquiran, —ishon Jesús Natanael yoini.

**Jesús ahuun tsainmansi
unucoin fimi unu onihua**

2¹⁻²Man osha rafu ano Caná ano Galilea muranshon nocofunun ainfo fiaino yorafo anosi ichanannifo. Jesús non ahua non norifi afu rafumisi-fori noco yoimanifo. Ascano non cani.

³Fimi unu man nutsoafono Jesús ahuan yoiquin, —Na focai afanan fimi unu yamafinquin, —huaiton. ⁴Ascaiton, —Uhuashtan, funayamahuun. Uhuun yono un ato ismataimacai, —huani. ⁵Ascaiton ahuan oinmatifo yoiquin, —Nan mato yonoai cuscan huashocaquin, —huani.

⁶Nanno mai cutimahuan seis funupafo chaimashta tsaonifo. Fasi funupafo bidóntirofo. Treinta galones a muran iquitiro. Nocon caifo Israelifoa aton muchoquimuti anoashu muchoquimui futsunifo. Shinanpaoni, —Non iscain muchoquimuaino Upa Dios nocoqui unimatiroran, —ishon shinanpaonifo. Nocon shunifoan nannori noco yonopaoni.

⁷Ascashon Jesús oinmatifo yonoqui, —Na cutimahuanfo muran unu fospi huacahuun, —huaiton. Fospi huacaquin cufirisacoinnifo. ⁸Ascantan Jesús yononi, —Ichananfo cushumisi fuafaintan mumatahuun, —huaiton.

⁹Nicaquin oinmatinin ichananfo cushumisi fuashon inainton muacai unuma. Fimi unucoin ini. Ichananfoan cushumisitocai Jesús aca cuscan onannima. Oinmatifoansi Jesús aca cuscan huaquin onannifo.

¹⁰Ichananfoan cushumisiton Jesús fimi unu onihua onanshoma nan rama ainfo fian cunashon yocani, —Na fimi unufin sharacoinquin. Nan ichananfoti aquifin rufofo shara nutsocashon chipo onanshta ichapama shara amisifo. Ascan huafiainfoan minfin nan sharacai ahuan unutaquin fasi sharacapacoin noco amaiquin, —huani.

¹¹Ahuamamishti yora atiroma cuscan huatiroshaquin Jesús nanno nan pushurasi Caná ano tau huaquin noco ismaniquin. Ato ismani aamain Diospan Facucoinshofin ahunshon ahuaamamishti tsoan oinmisima cuscara huatiroquin. Ascano oincashon non afu rafumisifoan man non icoinra huani. —Icofin Jesús Diospan Facucoinran, —ishon non shinanniquin.

¹²Ascatan Jesús ahua non ahuan ushtofon norifi afu rafumisifo nan pushurasi ahuan anu Capernaum ano non cani. Nanno osha rananyoni.

**Jesús Dios fu tsainti pushu
muranshon ahua chacafo potani**

Mt 21.12-13; Mr 11.15-18; Lc 19.45-46

¹³Diosin ahuan oinmati afu imisiton nocon shunifoan aton furun iyoafofosi finonmani rutunonma. Faritifi nanfohuunoa shinanpaonifo. Israelifoa noco fusititan. Nan fusiti nocoti chaima Jesús nan pushurasi Jerusalén ano cani.

¹⁴Nannoashu Dios fu tsainti pushu murannoashu moifo non chashoanfo non ruhuinfo ya inanmitsacashon ahuan rafanan pui fishcaquin. Nannori pui fi-ananan huamisifo tsaonifo.

¹⁵Ascaiton Jesús ato fuchitan fichi coshatiqui tuchia atoqui sannaino. Chashoanfo non moifo non aton ichonquin futsani. Sapa camaqui aton pui machiafori arasaquin futsani. Sapari cushca huaiacufoan potani. ¹⁶Nan ruhui inanmitsamisifo potashon ato yoini, —Nafu ya Uhuun Upa Diosin pushu murannoashu fotacahuun.

Ahuuscaimun uhuun Upa pushu murannoashu man ahuafo inanmitsaicain ahuan rafanan pui fiishcaquin. Afanan uhuun Upa pushu murannoashu ahuafo inanmitsayamacahuun. Uhuun Upa Diosin ahuan pushucai a murannoashu

inanmitsati pushumafinquin, —ishon ato yoini.

¹⁷Oincatan non afu rafumisifoan non shinanni isca huaquin, —Icon Diosin tsain nannori ahuunoa cununiquin isca huaquin, “Upa Diosin un min pushu cushusharapai a muranshon mia fusti shinanonfo. Ahua futsa a muranshon anonfoma. Ahuara futsacai min pushu murannoa un oinpaimaran,” —ishon cununiquin. ¹⁸Jesús ascaiton Israelifoa nocon niaiffoan a yocanifo, —¿Ahuuscain Dios fu tsainti pushu muranshon min ato potamun? Diosin mia yonoaiton ahua tsoan atiroma cuscan noco ismahuu non mia icoinra huanon, —ishon yoiainfoan. ¹⁹—Man na pushu paonhuaca afanan osha rafu non fusti finontan un afanan mapoinnifoanshquin. Ufin ashquin, —ishon Jesús ato cumani.

²⁰—¡Cuu! Nocon shunifoan cuarenta seis fari afianifo. ¿Ahuuscashocon osha rafu non fustisi min aquimun? —ishon cumanifo. ²¹Ascafiatocai tapinifoma Jesús Dios fu tsainti pushuhuunocai yoinima. Ahuun cayahuunoa afiri yoimuni. ²²Ascan chipo Jesús naafiashu osha rafu non fustitan funiano noco yoiyoni cuscan non shinanni, —Icon Jesús yoini, “Nan pushu paonhuaca unfin shafa rafu non fusti un afanan funimashquicain,” ishon yoini. Nantian man non tapia ahuan cayahuunoa yoiran, —ishon non shinanni. Ascano Diosin tsain cununi cuscan huafain Jesús yoini cuscar non icoinra huani.

Jesús nantifi yorafo onancoinni

²³Ascan tsoanshta atirofoma cuscan huaquin Jerusalén anoshon Jesús ani. Ascan nanfo oincatan yorahuanrasifoan, —Nan Diospan Facucoinran, —ishon icoinra huanifo. ²⁴Ascanfashon afoan shinainfo cuscan Jesús ato onancoinni. Icoinra huaiyamaifoan. ²⁵Yorafoan aton nomuran shinainfo cuscacai

tsoan Jesús yoitroma. Afincoimain nantifi onancoiinton. Aton nomuran shinainfo cuscan onancoinni. Icoinra huayofianishaquin tapini samamashta shinan futsaifoan.

Jesús Nicodemo tapimaniquin

3 Nan nocofunufin Fariseo iniquin ahuan anu Nicodemo. Nanrifi Israelifoa aton niaifo patashari. ²Nantori Jesusqui yamu oshon yoini, —Tapimamisiton, non tapiafin Upa Diosin mia nichiniquin min noco tapimanon. Man nonfin tapiaquin tsoan atiroma cuscan min huaiton Dios fu rafuamatocai asca huatiroma cuscafin min huaaquin, —ishon yoini. ³Ascaiton cumani, —Unfin iconquin mia yoicain. Nocofunu afanan cain futsanyamacai Diosin niaifo ano nocotiromafinquin, —huaiton.

⁴Ascaiton afanan yocaquin, —¿Ahuuscashumun afanan nocofunun cain futsantiroquin? ¿Man anifofiashu ahuscashucon ahuan shaqui muran afanan nanutiromun cain futsashquin? —huaiton.

⁵Ascaiton afanan Jesús cumani, —Unfin iconquin mia yoicain. Yora unu muran iquimamutama ahuan chaca shatutama afanan Diospan Yoshin Sharahuunoashuri cain futsanyamashuricai Dios niaifo ari nocotiroma. ⁶Futsafin futsa cainmatiroquin ahuanfin canon. Nanscarifi aquin Diospan Yoshin Shara fustiton nocon cainma futsatiroquin. Norifi non ahuanfin canon. ⁷Un mia yoiai cuscarifi, cain futsatiroquin, huaiton. “¡Aira! ¿Ahuuscashucon non cain futsatiromun?” iyamahuu. ⁸Fuufin nan fopaiyaiquiri fotiroquin. Fuun nicafiaquicai man tapitiroma raquiriashu futanmain raquiri foicain. Nanscarifiai yorafo Diospan Yoshin Sharapan ato cainma futsatiro. Ahuuscashomain cainma futsatiroquin

tsoancai tapitiroma. Manricai tapitiroma ahuutianmain cainma futsaicain, —huaiton.

⁹—¿Ahuuscashucon ascatiromun? — Nicodemo huaiton. ¹⁰—¿Min Israelifoa tapimamisifiahomun na un mia yoi ai min tapimacain? ¹¹Un mia iconquin yoi. Nan un nica cuscan huafain un oian cuscan un mia yoi. Ascafiacai un mato yoi cuscan man icoinra huama. ¹²¿Nuno mai anoa ahua-rafo icai cuscan un mia yoi ai icoinra huayamashu ahuuscashon Diosin nai muran icariafo un mia yoi aiton min icoinra huatiromun?

¹³Tsoacai nai muran camisima. Urus fustifin un nai murannoashu fotoaquin nocofunucoin iquiyoi. Un afanan chipo nasocaincain. ¹⁴⁻¹⁵Nocon caifo Israelifoa tsoan istaipamashon chaca huapaonifo. Ascaiton oinquin Diosin rono paupan atoqui nichini ato nasonon. Ascanori Moisés Diosin yononi ihuiqui rono ointsa huashon yayomashon nimainifoanni a oincanashu cayanonfo. Nanscarifi aquin uarifi ihui coyan iquinanqui nimainifoanshcaniquin nan ua icoinra huafo uhuunoashu Dios fu isharapacunonfo.

Upa Diosin nantifi yorahuun fasi noiquin

¹⁶Unfin Upa Diosin Facu fustiquin. Ascafiashu nantifi yorafahuun fasi noiquin ua nichini atohuunoashu un nanon. Nan ua icoinra huafoti omitsiscapatamarocon Upa Dios fu ipasharanonfo. ¹⁷Ua mai ano nichini un ato onaintimatama un aton chaca soashonon uhuunoashu nipanonfo. ¹⁸Ua icoinra huafocai Upa Diosin ato omitsiscamapacunacama. Ascan tsoan ua icoinra huayamacun Upa Diosin ato onaintimai yoiyoni cuscan. Unfin Upa Diospan Facu fustiquin. Tsoan ua icoinra huayamashuca i omitsiscai unupacunacama. ¹⁹Isca huaquin mato tapimai. Shafa yafi faquishcai osi-

tiroma. Nanscarifiai unfin Diospan Facu sharaquin. Ahua chacacai ufu itiroma. Upa Diosin ua nichini nan maitio shafa cuscara un imanon chaca shatunonfo. Ascafiacai yorafoan aton chaca potacasmacanifin uqui fucasmacani isharashcaquin. Ascacun Upa Diosin ato onaintimai. Aton chaca noicanicai uqui fupaicanima chaca shatucanashu isharashcaquin. ²⁰Faquish noiquicai tsoa shafa oinpaitiroma. Nanscarifi aquin chaca noicanicai uqui fupaicanima. Uqui ranocani uqui oshon chaca huaifo cuscan tapicasmacani. Chaca huaifo cuscan ato oinmacasmacani. ²¹Tsoa icoinsharapayai fofin uqui fucaniquin Upa Diosin ato amapayai cuscan aquifin futsafoti oinmacaniquin, —ishon Jesús yoini.

Juanpan nan yorafo unu muran iquimapacumisiton Jesushuunoa ato yoini

²²Ascatan chipofin Jesús yafi afu rafumisifo Judea mai ano non cani. Nanno atofu iyonni. Nannori aton chaca shatupayai foan non ato unu muran iquimapacuniquin. ²³⁻²⁴Juan cunu muran iquimanataifoma arifi futsafo unu muran iquimapacuniquin. Nan Enón pushurasi chaimashtari Salim ini. Ano unu noa sharacoin. Anoshon ato unu muran iquimapacuni. Nanno furi furiafoan ato unu muran iquimapacuni. ²⁵Nantianri Juanpan tanamisifo ya nocofunu nocon caifo futsa fu fochishmanantanannifo. Ahuuscashucaimun unu muran iquimamutiroquin icashu fochishmanantanannifo.

²⁶Ascatan Juan ano fonifo. Noco-cashon yoinifo, —Tapimamisiton, non mia tapimapai. Unu Jordán oquirishon min na nocofunu Jesusqui nocotan, “Nan Diospan Facu. Nocoqui nocoaran,” ishon min yoita. Arifi natian yorafo unu muran iquimapacui. Nantifi yora aqui focaniran, —inifo.

²⁷ Nicaquin Juanpan ato cumani isca huaquin, —Diosin fustitofin catontiroquin ahuuscain. ²⁸ Uncai Cristoma. Upa Diosin ua yonoa un Cristohuunoa yorafo tapimanon aton chaca shatunonfo Cristo nocoaiton icoinra huashquin. Nannori un mato yoiaiton man nicamisi. ²⁹ Afanan un mato yoi ua nicacahuun. Man man tapia nocofunon afu rafua yoitiro isca huaquin, “¡Aicho! Na ainfo min ua fuchimana natian un rama fia uhuun ahuin inon. Un aqui unimacoinran,” ishon funun yoiaino afu rafuan aqui unimatiro. Nanscarifiai un Cristo yamafiacun futsafoan nan Cristo Jesús nicacoiainfoanno un fasi unimacointiro. ³⁰ Aafin Cristocoinquin. Uncai Cristoma. Ascan afanan un yoiqui chahuaima ua tanatama Cristo fusti shinancoinonfo.

Nan Upa Dios icariashu oai

³¹ Criston Dios icariashu mai ano ftoni. Nantonfin tsoamamishti finoanquin. Un na mai anoashu caiantonfin na mai anoashu ahuu cuscaramainquin un tapiaquin. Nan fustihuunoasi un yoitiroquin. ³² Ascacia Jesús oinmisi cuscan nicamisi cuscan noco yoifiaiton fustirasiton icoinra huaafo. ³³ Ascacia tsoan ahuun tsain icoinra huacashofin nanfoanfin tapitirofoquin Diosin tsain fasi iconcoin. ³⁴ Upa Diosin ahuun Yoshin Shara Jesusqui nichini afu rafupacunon. Nantifi ahuun curushu inanni. Diosin yoia cuscan nantifi nocori tapimani. ³⁵ Upa Diosin ahuun Furun fasi noicoquin. Yonoa nantifi nai murannoa yafi mai anofoan aton ifo inon.

³⁶ Ascan tsoan Diospan Facu icoinra huashu afu ipatiro. Ascantarifi tsoan Diospan Facu icoinra huayamashu Diosin aqui sinaquin omitsiscamapacunaca. Ascan nan Jesús icoinra huafoma naacanashu afu ipatamarocon faquish

muran omitsiscapanacaforan, —ishon Juanpan ato yoiniquin.

Jesús ainfo Samaritanonqui noconi

4 ¹⁻³ Ascano isca huaquin yoinonanon nifo, —Nan Jesús yorahuanrasifoan icoinra huaifoan ato unu muran iquimapacui. Juanpan aca finonmafain iquimapacuiran, —icashu yoinannifo. Nan yorafoan Jesushuunoa yoini cuscan Fariseofoan nicafiacaquin aririma. Jesuscai afincoin ato unu muran iquimapaacunima. Nonfin afu rafumisifoquin non ato iquimapaconi. Nan yorafoan ahuunoa yoini cuscan tapiashu no fu Judea anoashu Galilea ano nasoni. ⁴ Galilea anoashu Samaria mapaicaini.

⁵ Ascatan Samaria ano mapaicaini nanno pushurasi ahuun anu Sicar ano non noconi. Nanno chaimashta nan mai nocon shuni Jacob ahuun facu José inanni. ⁶ Nannori Jacob mai poquini a murannoa unu fishqui. Ascaino fari masafinin racano Jesús arusu nanno noconi. Fasi chai cunoashu oashu atsanacon. Ascashu nanno tsaoyoni.

⁷⁻⁸ Non afu rafumisifo nantianri pushurasi ano cashon non tushu fini. Jesús nomifiaquicai ahuaqui unu fitiro inima. Ascaino nantianri ainfon Samaritanon shafon nan pozo ano noconi ahuun cuti muran unu fishquin. Ascan Jesús yocani, —Ua unu inanpun, —huaiton.

⁹ Nocon caifo Samaritanon oincasmanifo. Ato futancai piinifoma. Ascan nan ainfoan cumani, —Minfin Israelifoquin. Unfin Samaritanonquin. ¿Ascaino ahuuscain mian unu yocaimun? —huaiton.

¹⁰ —Diosin mia inanpaiyai cuscan onanfain tapishonfin min ua unu yocacuanaquin. Na unun mia nimapacutiro, —Jesús huaiton.

¹¹ —Min cuti yafi rusfi yamai. Na pozo fasi noacon. ¿Ascainon ahuuscashomun

min na unun yora nimapacutiro min fitiroquin? ¹²Nocon shuni Jacob pozo non a murannoa unu finon. Arifi nan unu ayani. Ascaino ahuun facufoanri ayani. Ahuun inafori ayamani. ¿Min nocon shuni Jacob finoanmun? —huaiton.

¹³—Tsoan na pozo murannoa unu ayafiashu chipo afanan nomitiro. ¹⁴Ascacia tsoan na unu un ato ayamacai afanan nomipacunacama. Iconcoin na unu un inanquin a muran unu tsoi shara fuchoi cafiscaí. Ayashu nan unuhunoashu ipasharacointiro, —huaiton.

¹⁵—Min nocofunu shara. Na unu shara ua inanhuun un afanan nomipacunonma un afanan nuno unu fiyononma —huaiton.

¹⁶—Min funu ihuitahuun afanan nasoshquin, —huaiton.

¹⁷—Uncai funuyamafinquin, —huaiton.

—Icon mincai funu fustiyama. Minfin funu rananyaquin. ¹⁸Min funu mucu fustiti mia fimisifo. Natian min futsa fuica. Min funucoinma fu. Icon min ua yoia, —huaiton.

¹⁹—Natian un tapia min Diosin tsainyoimisi. ²⁰Nocon shunifoan nuno machi anoshon Dios cufimisi inifo. Ascaino min caífo Israelifoan yoimisi isca huaquin, “Jerusalén anoshon non Dios cufitiroran,” ishon yoimisifo, —huaiton.

²¹—Un mia yoinon ua icoinra huahuu. Chipu ahuutiaran tsoan afanan shinainma isca huaquin, “¿Ranishomun un Upa Dios cufitiroquin na machi anoshon iyamarai Jerusalén anoshon?” ishon afanan anori shinanshecaquima. ^{22–24}Non ranishora cufiainocai non chipo ascaran shinainma. Na machi ano iyamarai Jerusalén anocai non ascainocai ahuama. Ahuuscashomain non Dios cuficain, nan Diosin tapipai. ¿Nocon nomuran non Dios cuficoimun? ¿Ahuun Yoshin Sharahuunshon non Dios cuficoimun?

Nan Diosin nicacoinpai. Aafin Yoshin Sharaqin. Non Dios cuficoiainton ahuun Yoshin Shara fustiton noco tapimatiro non cufisharanon. Ahuun Yoshin Sharahuunshon non Upa Dios cufiainton nanscara Upa Diosin fuchipai.

Ascafiashu manfin Samaritanonfoquin cufipaifiaquicai nocon Upa Dios man tapisharafoma. Asca nonfin Israelifoquin non nocon Upa Dios tapicoian. Man non tapiari nan Numamisi arifi Israeli iishquin, —huaiton.

²⁵—Mun tapia Upa Diosin chipo nocofunu nocoqui nichishquin. Aafin chipo nocoquin ooshquin. Ahuun anu futsa Cristo. Afin nocoshon noco nantifi shafacafi tapimashquin, —afanan ainfoan yoini.

²⁶—Unfin Cristoquin, —ishon Jesús cumani.

²⁷Ascan Jesús ainfo fu tsaincaino non afu rafumisi aqui noconi. Jesús ainfo fu tsaincaiton oin non mustairini. Ascainoshon non yocanima, —¿Ahuuscain min ainfo fu tsainquinmun? —ishoncai non yocanima. —Min ainfo yoia cuscan noco tapimahuu, —ishoncai non anori yoinima.

^{28–29}Ascantan nan ainfo ahuun cuti potafainicai ahuun pushurasi ano cani. Nocoshon ahuun yorafoti yoini, —Nocofunun uqui nocoshon un amisi cuscan nantifi ua yoiaquin. Nanraca Cristo. Oin fucapon, —ishon ato yoiniquin. ³⁰Nicacatan nan pushurasi anoashu Jesusqui funifo.

³¹Nantianri non afu rafumisifoan non yoini, —Tapimamisiton, piyohuu, —non huaino.

³²—Unfin tushuyaquin. Un tushu ya cuscacai man ahuunoa tapiama, —ishon noco yoini.

³³Ascaiton nicai non yocanonanni, —¡Aira! ¿Tsoancainco tushu fishoamun? —ishon non yoini.

³⁴—Uhuun Upa Diosin ua nichini un ahuun yono ashonon. Afin ua amapaiyai cuscan nantifi un ashoin. Nanfofin uhuun tushu cuscarafoquin. ³⁵Man yoimisi isca huaquin, “Yono noco mau ano fanafo cuscara oshu rafu non rafuri finontan non chitutirotan,” ishon man yoimisi. Nanscarifiai man shinan raca chipo non yora Dioshuunoa yoitiro a Ifo huaa afu ipashcaquin. Oinyocahuun. Yora ichaparasi natian itisharacani Diosin icoinra huashceni.

³⁶Futsan yonoshotanfin chitushotiroquin. Nancai mau ifoan inansharatiro. Nanscarifi aquin futsan Diosin tsain icoinra huamano Upa Dios fu ipasharatiro. Nancaifin ahuun ointi muran unimasharatiroquin. Upa Diosin a inansharacoinshquin. Icoinra huataima futsan yosiyomisi. Nan yosimisiri ahuun ointi muran unimashquin. Upa Diosin arifi inansharashquin. Ascaiton Diosin tsain yosimisifo yafi icoinra huamamamisifo nanscaracoin rafu. Upa Diosin ato inansharashquin aton ointi muran unimanonfo. ³⁷Ascano iconcain yoimisifo isca huaquin, “Futsan fanano chipo futsan nan yono chitutirotan,” ishon yoimisifo.

Nanscarifiai futsan Diosin tsain yoiquin tau huano futsanri chipo yoiano nantocaifin icoinra huamacointiroquin. ³⁸Mancai mai futsa ano yosiamafaiton un mato nichian nannoa man ato icoinra huamanon. Futsafoan nannoshon fasi curushcain yonoa Diosin tsain ato yosicaquin. Mancai nanno yonoama. Ato yosiqui chai huayamafiashton man ato icoinra huama. Futsafoan aton yonohuunshon man ato icoinra huamaran, —ishon Jesús ato yoini.

³⁹Ascaino nan ainfon Samaritanon ahuun caifoan pushurasi ano nocoshon ato yoini, —Un imisi cuscan nantifi

ua puashoan. Ua oinyamafiamisishaquin ua onancoianran, —ishon ato yoiaiton Jesús icoinra huanifo. ⁴⁰Ascano nan ainfoan ato yoiaiton nicacani Jesusqui funifo ahuun tsain nicai fucani. Aquí nocoshon, —No fu nuno iyopun, —huanifo. Ascaiton nicai Jesús atofu osha rafuyoni. ⁴¹Ahuun tsain nicacaquin futsafoan icoinra huanifo.

⁴²Ascano icoinra huacashon ainfo isca huanifo, —Min noco yoifiatitocai non icoinra huama. Noficoin non ahuun tsain nicashon non icoinra huai nanton nantifi yorafo manifoti nocon Numamisiran, —ishon yoinifo.

Jesús niaifoan ahuun oinmatinin facu cayahuamani

⁴³Ascano nan osha rafu yotan Jesús no fu nan Samaritanonfoan pushurasi anoashu Galilea ano caní. ⁴⁴Jesús arifi Galilea anoashu pushconi. Nannoashuri yonopaoni. Ahuun yoraforifi nanno inifo. Ascano Jesús yoini, —Diosin tsain yoimisiton ahuun pushurasi ano ahuunoa isca huaquin shinanfo, “Acai tsoamaran,” —ishon shinanfo. ⁴⁵Ascatan Galilea ano noconi. Atirifi Galilea ano Jerusalén ano fusititan fonifo. Nannoshon tsoan atiroma cuscan Jesús Diosihuunshon huani. Nantifi Jesús acai cuscan oinnifo. Ascan atoqui nocoano aqui unimanifo. —¡Aicho! Man min oaquin, —ishon Galilea anofoan yoinifo.

⁴⁶Ascano pushurasi ahuun anu Caná Galilea ano Jesús nasoni. Nanno fari futsan Jesús ahuun tsainmansí unucainfiacun fimi unu onihuani. Nantianri afanan nanno noconi. Nanno niaifon futsa ica ini. Pushurasi futsan ahuun anu Capernaum ano furun isininni. ⁴⁷Ascaiton niaifoan nica Jesús Judea anoashu Galilea muran Caná ano oaiton nicai aquí oshon yoini, —Ifon, uhuun facu isininqui man nai. Uhuun facushta ua oinshoyopun ua

cayahuashoshquin, —ishon yoini. ⁴⁸—
 ¡Ohuashta! ¿Ahuuscain yoran atiroma
 cuscan un huaiton man oinfiacaquicai
 man ua icoinra huaima? —ishon Jesús
 ato yoini.

⁴⁹Ascan afanan nan niaifohan
 Jesús yoini, —Ifon, U fu cayoiacapun
 uhuun facu nanonma, —ishon yoini.

⁵⁰Ascaiton Jesús cumani, —Min facu
 ano catahuu. Min facucai naima.
 Niifinquin, —ishon Jesús yoini. Jesús
 yoia cuscan icoinra huafaini cani.

⁵¹Nanscatan caino ahuun oinmatifo
 aqui nococashon yoinifo, —Min facu
 man caya. Naima man niaran, —ishon
 niaifo yoinifo. ⁵²Ascaiton ato yocani,
 —¿Ahuutia farimun uhuun facu
 cayafaitaquin? —ishon ato yocaiton.
 —Fari masafinin racano ahuun yona
 matsifaitanran, —huanifo. ⁵³Yoiaifohan
 nicatan apan shinanni, —Icon Jesús
 fari masafinin racano ua yoita, “Min
 facucai naimafinquin. Niifinquin,” ua
 huaitaran, —ishon shinanni. Ascano
 ahuun yorafo yashon nantifiton Jesús
 icoinra huanifo.

⁵⁴Ascano Jesús Judea anoashu Galilea
 ano nocoshon afanan tsoan atiroma cus-
 can ato oinmaniquin. Ato oinmaquin
 rafu huani.

Jesús nocofunu isininmisi Betzata anoshon cayahuani

5Ascano chipo Jesús Galilea anoashu
 Jerusalén ano no fu cani nocon
 caifo Israelifo fu fuusicai. ²Nanno
 chashoanfoan aton iquiti cunu ini.
 Nanno chaimashta ianman facushta ini.
 Cusumun pushu cahuan sharamishti
 mucu fustiti tsaocuafo. ³⁻⁴Nannori
 isinin imisifo ichaparasi racanifo.
 Fushofo non chatofo non yoratisho
 quicurushui futsuafori racanifo.

Ascaino Diospan oinmati afu nai mu-
 ran icaton nanno ian man facushta
 ano oi fustirasi ipaoni. Nanno no-

coshon Diospan oinmatinin ianman facu
 fuchomapaoni. Nan ianman facushta
 fuchoai muran isinin icai futsa iqui
 tauashu cayapaoni. Ascan nantifi isinin
 imisifoan manaifono Diospan oinma-
 tinin ian fuchomanaino ian muran iqu-
 uitaunon. ⁵Ascano Jesús nanno nocoto-
 shiqui oian nocofunu treinta ocho fari
 isinin itianiquin noconi. Yoratisho qui-
 curushui futsua nipaiqui ranainton fu-
 chini. ⁶Futsan Jesús yoishoni na no-
 cofunu treintiocho fari isinin imisiran.
 Huaiton yocani, —¿Min cayapaimun? —
 ishon Jesús yocaiton.

⁷Nicaquin cumani, —Tsoancai ua
 ianman facushta muran iquimamisima
 Diosin nai oinmatinin ian fuchoaino. Un
 iqui taupaiyaiton ua shutimisiforan, —
 ishon yoiaiton.

⁸Ascaiton Jesús cumani, —Funinaca
 huahuun. Min oshati ya catashquin, —
 ishon yononi. ⁹Ascaiton nicai funinaca
 huan ahuun oshati ya cani. Nan sabadoai
 shafatan yoratishon quicurushui futsua
 Jesús caya huani. ¹⁰Ascano nocon caifo
 niaifohan oian nan nocofunun ahuun
 oshati foaiton oincaquin yoinifo, —
 ¿Ahuuscain min oshati Sabadoaino min
 foain? ¿Min tapiamamun nocon shuni
 Moisés noco yononi non Sabadoaino
 ahuashta huatiroma? Ascan min oshat-
 icai na Sabadoaino min fotiromaran, —
 ishon yoinifo.

¹¹Ascaiton ato cumani, —Na noco-
 funun ua caya huamashon. Ua isca
 huaa “Min oshati fotahuun,” ishon ua
 yonoaran, —ato huaiton.

¹²—¿Tsoamun na nocofunuquin anori
 mia yonoa? —ishon yocanifo.

¹³Yoratisho quicurushui futsuatocain
 tapinima tsoanmain caya huamaquin.
 Asca huafainicai Jesús samamashta
 amaquinoashu yorahuanrasi muran
 cani. Ascaitocai afanan tsoan oinnima.

¹⁴Man ascano chipo Jesús nan noco-
 funu caya huama Dios fu tsainti pushu

anoa fuchishon yoini, —Shinanhuun. Min afanan isinin iquimaquin. Man min cayasharaquin. Ascan min chaca huamisi cuscan afanan ayamahuu. Min chaca nantifi shatuhuu. Min chaca shatuyamashu ahua chaca finacaia min ahuuscaratiroquin, —ishon Jesús yoini. ¹⁵ Ascaiton nicafainicai nan noco-funu Jesusmaquinoashu cani. Caya huamano nocon caifo Israelifoqui chanicai cani.

¹⁶ Ascano Jesús sabadoaino yora caya huamana nicacani nocon niaifoho Jesusqui sinanifo. Sinaquin Jesús fucash huanifo. Aquí tsain chaca huarianifo. ¹⁷ Ascaiton Jesús ato yoini. —Uhuun Upa Diosin shafatifi yora shara huafafainmisi. Nanscarifi aqui urifi uhuun Upan acai cuscan un huafafainiran, —ishon ato yoini. ¹⁸ Ascano amaqiri shinannifo. Shinancaquin Jesús yoiti huanifo. —Nocon shuni Moisés yononi cuscan non Sabado ahua huatiroma. Jesús Moisés yononi cuscan aquima. Yoiari Dios ahuun Upacoin. ¡Cuu! Jesús shinanmun afi Upa Dios cuscaracoin. Ascan ahuuscashomain non Jesús ato rutumatiroquin. Non shinanoncahuun, —icashu nocon niaifohan ahuun yoinannifo.

Jesusfin Diospan Facuquin. Ascacufin nan yonopaiyai cuscan atiroquin

¹⁹ Nan shinainfo cuscan Jesús onanniquin. Onanshon ato yoini isca huaquin, —Un mato icon yoinon. Ua nicacahuun. Uficai un ahuashta huaima. Uhuun Upa Diosin acai cuscan mun oinmisi. Nanscacoïn urifi un huai. Ahuunshon fusti un aquin. ²⁰ Unfin Diospan Facuquin. Ua noicoian. Afin acai cuscan ua oinmai urifi un anon. Ahuara futsa fasi finacaia chipo ua ismashquin. Ascaiton man oin man mustairishquin. ²¹ Upa Diosin yora

naacoinfiacun funimapaiquifin afanan nimasharatiroquin. Un ahuun Facu. Nanton acai cuscanrifi un huatiroquin.

²²⁻²³ Upa Diosin uhuunoa nan yorafoti shinansharamapai unfin ahuun Facuquin. Nanhuunoa yorafoan shinansharamisifo cuscarifi uhuunoa ato shinansharamapai. Ascan Upa Diosin afincai yoima ratocaimain afu ipatiro iyamarai ratofomain faquish muran omitsiscapanacaquin. Ua yononi. “Min yorafoti yoitiro ratofomain ufu nipayamarai faquish muran omitsiscapanacaquin,” ishon ua yononi. Nannori ua yononi. Upa Diosin nicapai uhuunoa shara yoiainfoan. Ua nichini. Ascan tsoan “Min Diospan Facu Shararan,” ishon ua yoicasmaiton Upa Diosihuunoiari yoisharama.

²⁴ Un mato iconcoin yoinon. Tsoan uhuun tsain nicasharafain Upa Diosin ua nichini iconra huafin Upa Dios fu ipasharapacunacaquin. Un nan cuscara yora onaintimaima. Afanancai Satanás ahuun yora itiroma. Omitsiscapatamarocon natian afi Upa Diosin ahuun yoracoinquin afu ipashquin. ²⁵ Un ahuara futsa iconcoin mato yoinon. Natian nan naa shinantsain uhuun tsain nicacoianshu ufi Diospan Facu iconra huashu afanan Diosimaquin itamarocon afu nipasharatiro.

²⁶ Tsoan futsacai Upa Dios nimama. Afi nipamisi. Nanscarifiyai Upa Diosin un ahuun Facucun ua yononi cuscan ufin nipamisiquin. Tsoa futsacai ua nimama. ²⁷ Unfin Diospan Facuquin. Ascan ua yoiqui isca huani, “Min yorafoti yoitiro ratofomain ufu nipatiro iyamarai aton chaca shatuashma omitsiscapanacaquin,” ishon ua yononi.

²⁸⁻²⁹ Un mato yoia cuscan mustairiyamacahuun. Chipo nafoan uhuun oi nicashcani. Nicacani funishquicani. Ratoranfo niyoashu isharamisifo funiashu nipasharashcani. Ascanrifiai

ratoranfoan niyocashon chaca huamisifo funiashuri omitsiscapashcani.

Jesushuunooa yoimisi

³⁰ Urus fusticai un apaiyai cuscan un shinainma. Upa Diosin nanton ua nichini. Ascan afi ua amapaiyai cuscan un huapai. Ascafiacai ucai urus fusti un ahuaara huatiroma. Upan Diosin ua tapimana cuscan un nicaquin un yorafo yoitiro. Nantifi onancoianquin. Ascan ua tapimana cuscan un cayacaficoin yorafoti yoitiro ahuu cuscarafoinquin. Urus fusticai un apaiyai cuscan un shinainma. Uhuun Upa Diosin ua nichini afi amapaiyai cuscan ua huamashquin.

³¹⁻³³ Uficoin uhuunooa un yoisharaitocai tsoan nicasharapaima. Ascafiacai aririma. Urus fusticai uhuunooa un yoimisima. Juanpan arifi uhuunooa yoisharamisiquin. Manfin Juanqui yorafo nichiaquin. Nanton uhuunooa icon fusti yoisharamisi. Un Cristocun nanton mato tapimana. Futsanrifi uhuunooa yoisharamisi. Nan Upa Diosiri uhuunooa yoisharamisi. Nan uhuunooa yoimisi cuscan iconcoin mun tapia.

³⁴⁻³⁶ Juanpan uhuunooa iconcoin yoifiamisi unfin tsoan atiroma cuscan un huaiton man man oinmisiquin. Tsoan uhuunooa yoiamaiton oinquin nanfohuunooa man tapitiro un mato iconcoin yoimisi. Ascafia Juanpan uhuunooa yoimisi cuscan un afanan mato shinainmai maton chaca man shatunon omitsiscapatamarocon Upa Dios fu ipasharashquin. Juan nocofunu fasi sharacoin. Ahuunshon Diosin mato yoipaiyai cuscan nanton mato tapimayoni. Chashamatinin man chashashon man faquish muran fai ointiro casharashquin.

Nanscarifiaquin Juanpan mato tapimana ahuscashomain man chaca shat-uashu Dios fu ipatiroquin. Mato yoimisi

cuscan man shinanquin isca huai, “¡Aicho! Juanpan noco cayacafi Diosin tsain yoiaiton. Non nicasharanon,” ishon man anori shinanyomisi. Juanpan uhuunooa yoimisi iconfiashu uhuun Upa Diosin Juan finoncoian. Afincoin ua yonooa. Uhuun Upa ua nichini ua amapaiyai cuscan un anon. Ua amapaiyai cuscan cuyocointan un unutiro. Natianri ua yonooa cuscan un aaquin. Ascan un acai cuscan oinquin man tapitiro Upa Diosin ua nichini ahuunshon un yononon. ³⁷ Upa Diosin matoqui ua nichini arifi uhuunooa yoimisi. Mancai Upa Diosin ahuun oi nicayamafain man oinmisima. ³⁸ Diosin ua nichifianicucai man ua icoindra huaima. Ascan ahuun tsaincai maton nomuran man nanumisima.

³⁹⁻⁴⁰ Man Diosin tsain fasi oinfafain-misishaquin man Dios fu nipatiroran ishon man shinanmisiquin. Anori man shinanfiaquicai Diospan tsain uhuunooa cunufiacashon mancai uqui fupaicanima un mato nimapacunon.

⁴¹⁻⁴² Un mato onancoian. Mancai maton nomuran man Upa Dios noima. Ascacun man uhuunooa shinansharai iyamarai man uhuunooa shinain chacafaiainocai un shinainma. ⁴³ Uhuun Upa Diosin ua matoqui nichini ahuu cuscaramainquin uhuun Upa uhuunshon man onancoinon. Ua matoqui nichifiani mancai ua icoindra huatamarocon ua oincasmacani. Uacairocon icoindra huatama futsan matoqui oshon mato parapaifaiton nancaifin man icoindra huashquiquin, “Unfin Cristoquin,” icaiton nancai man icoindra huai. Upa Diosin nichiamafiacun nancaifin man icoindra huashquin. ⁴⁴ Mafi ranan futsan tsain sharasi man nicapai. Asca Upa Diosin matohuunooa yoipaiyai cuscacai man shinainma. Ascacufin Upa Diosin ua nichini mancai icoindra huamisima.

⁴⁵ Man ua icoindra huayamafiacun uhuun Upa Dios ointaifi un mato

puashoshquin. Man shinanmisi isca huaquin, “Moisés tsain nicashu non Upa Dios fu nipatiroran,” ishon. Man anori yoifiaino Moisés aficoin matohuunoa Upa Dios yoishquin isca huaquin, “Nafoon uhuun tsain icoinra huamisifomaran,” ishon matohuunoa yoishquin. ⁴⁶ Moisés uhuunoa cununi cuscan icoinra huashon ahuun tsainri man icoinra huacuanquin. Uarifi man icoinra huacuanquin. ⁴⁷ Ascafiashocai Moisés cununi cuscan man icoinra huama. Asca un mato yoia cuscaricai man icoinra huamaran, —ishon Jesús nocon niaifofo yoini.

**Jesús cinco mil nocofunufu
ahuun tsainmansi ato pimani**

Mt 14.13-21; Mr 6.30-44; Lc 9.10-17

6¹⁻² Ascano ato yoiquin anaititan Jesús afanan no fu ian ahuun anu Galilea pocufaini cani. Ahuun anu futsa Tiberias. No fu cusumunri noco ano yorahuanrasi aqui funifo. Isinin imisifo aqui fuafoan ahuun tsainmansi ato caya huani. Ato caya huaiton oincani aqui funifo. ³⁻⁴ Nocon caifo Israelifoon nocon fustitian Diosin ahuun nai oinmatinin nocon shunifo aton furu iyoafofosi finonmani nanonfoma. Nan shafan nocoti chaima. Nantianri Jesús cusumunri nocoshon nonfin afu rafumisifori machi ano caashu nanno non tsaoyoni.

⁵⁻⁶ Nanno non tsaono yorahuanrasi funifo. Aqui fuaifoan atoquiri fusoshon Jesús oinni. Ato oinquin shinantani nan yorafo fonicoincani. Ahuuscashomain ato pimaicain affin tapiniquin. Ascashon Feliperifi icoinra huamapaini ahuuscashomain ato pimaicain. Ahuun tsainmansi ahumamishti atiro tapimapaini. Ascano Jesús Felipe yocani, —¿Raniamun non tushu fiicai na yorahuanrasi pimashquin? —ishon yocaiton.

⁷ Nicaquin Felipe cumani, —Ifon, non siete oshu yonoshon pui fiyonon. Aticai itiromaquin na yorahuanrasi non pimaino, —ishon yoini.

⁸⁻⁹ Ascano non Jesús fu rafumisifo futsan Andrés nan Pedronun ushton yoini, —Ifon, oinpon. Nuno furonanfacu misi uhuapamashta mucu fustiti yafi shiman rafuri uhuapamashta. Ascafia nuno yora ichaparasi. Ahuun tushu itiomaran, —ishon yoini.

¹⁰ Ascaino Jesús noco yononi isca huaquin, —Ato yoihuu tsaononfo, —ishon yoini. Nannorifi faasifo ini. Ascaino Jesús ato yoia cuscan faasi camaqui tsaohuacunifo. Cinco mil nocofunufocua tsaohuacunifo.

¹¹ Ascano tsaofono Jesús mucu fustiti misi fitan Apa Dios yoiquin isca huani, —¡Aicho! Upan, min ua nicaran, —ishon Apa Diosin yoini. Yoitan misi yafi shiman rafu tucupacutan noco inanni. Anoshon non ato pashcashonpacunon. Ficashon picani maiancoinnifo. ¹² Ascano nantifi yorafo maiancoianfono Jesús noco yononi, —Nan misi yafi shiman tushu huafo fiitacahuun. Shihuati muran nanutacahuun ahuashta funononma, —ishon noco yoini. ¹³ Ascaiton nicashon misi yafi shiman tushuafo non fini. Doce shihuati non fospi huani.

¹⁴ Ascán Jesús ahuun tsainmansi shiman rafu non mucu fustiti misi nantifi cinco mil nocofunufu piimaiton oincashon yoinifo, —Iconcoincin Jesús Diosin ahuun tsain yomisi. Nanton Upa Diosin noco yoiyotiani cuscan nancoin nocoqui nichiaran, —icashu yoinannifo. ¹⁵ Ascaiton Jesús nan shinainfo cuscan onanashon ahuun nomuran shinanniquin isca huani, —Na yorafoan ua curushcain aton niaifocoin ua imashcaniran, —ishon onanni. Ascatan atomaquinoashu arusu machi ano cani.

Jesús ian fumancayan cani

Mt 14.22-27; Mr 6.45-52

¹⁶⁻¹⁷ Ascano man fari caino non afu rafumisifo non afu shashon nanufaini ian pocufaini foi. Pushurasi Capernaum ano non nocopaini. Faquishiaiino Jesús nocoqui nocoataima. ¹⁸ Fuuhuan nocoano ian fuchoquin. ¹⁹ Ian mahuan naisti chainhuan nushmancayashon fuchomanhuaquin oquiri cusha futsan noco catima huani. Jesús ian fuman cayan ofiaintocai non onannima. Onantama non mustairicoinni. Ascashu non fasi ratucoinni. ²⁰ Ascaiton, —Unquin. Ratuyamacahuun, —Jesús noco huani. ²¹ Ascaiton nicaquin, —¡Aicho! Shasho muran nanuyohuun, —non huani. Jesús nanuano samamashta nan non noco-paiyaiquiri ian cusumunri non noconi.

Yoraofoan Jesús funanifo

²² Ascano iyoconaino yorahuan-rasifoan nan Jesús ato pimaitafoan shinannifo Jesús arus fusti nituaiton. Oinnifo Jesús no fu shasho muran nanuyamaiton. Tapinifoma arifi chipo yamu nocoqui noconi. Nantianri shasho fustiton non afu rafumisifo non foni. Ahuuscashucon Jesús caimun ishon shinannifo. ²³ Nantianri Tiberias chaimanoashu shashorasi muran fuafo. Nan Jesús yorahuanrasi pimaita anoashu funifo. ²⁴ Ascan nan yorahuanrasifoan Jesús norifi non afu rafumisi anoma tapicanashu shasho muran nanuinfoancatan Capernaum ano Jesús funai fonifo.

—Unfi tushu cuscaraquin. Urus fustifin un yora nimapacutiroquin, —ishon Jesús ato yosiniquin

²⁵ Fuchicashon yoinifo, — ¿Tapimamisiton, ahutiancon min nuno nocoamun? —ishon yocanifo.

²⁶ Ascaiton ato cumani, —Iconcoin un mato yoi. Tsoan atiroma cuscan un mato ismafiaiton mancai afohu-unoa shinainma. Ascacuai man ua funaima. Uaricai man iconra huataima. Nan un mato tushu pimafaita nantifi man mayancointan. Ascano man afanan ua funai fua un mato pimanon. ²⁷ Shinancapon. Manfin tushuhuunoasi shinanfafainicain. Nan tushu chacanatiro manmain cuyoifin. Ascan nan cuscara tushu fusti fuchipaiquimarocon nan cuscara futsafin unquin. Unfin Diospan Facuquin, un mato inantiro nancai fuchipaicahuun. Nan cuscara cuyopacunacama. Nan piashu man nipasharatiro. Uhuun Upa Diosin ua catoanshu uqui unimamisi. Matoquirifi ua nichini na tushu cuscara un mato inanon, —ishon ato yoiaiton.

²⁸ Nicacaquin yoinifo, — ¿Ahuuscashomain norifi non yonoshotiroquin Upa Diosin nocoqui unimanon? —ishon yocaifoan. ²⁹ —Upa Diosin ua matoqui nichini. Ascan man Upa Diosin unimamapaiquin ua iconra huacahuun, —ato huaiton.

³⁰⁻³¹ Diosin tsain cununi isca huaquin, —Tsoa futsan atiroma cuscan huafain Moisés ato tushu fariña cuscara fatan shara ato pimaní. Nan tushu shafatifi nai murannoashu pacupaoni. Nan tushu ahuan anu nocon tsainman manán. Nanfo nocon shunifoan tsoa istaipamashon piinifo. Ascan mirifi tsoan atiroma cuscan noco ahuanamishti ismahuu Upa Diosin mia nichini non mia iconra huanon, —huaifoan.

³² —Un mato iconquin yoi man tapinon. Moiséscai nan tushu ahuan anu manán nocon shunifo inannima. Upa Diosin nai muranshon tushu ato niriashoni picanashu niisharanonfo. Ascan natian Upa Diosin ahuan tushucoin nai muranshon mato inanpai. ³³ Nocofunu Upa Diosin nai muranshon

mai ano nichini manifotifi ato nimapacunon. Nanfin tushucoinqin, —huaiton.

³⁴—Ifon, nan tushu noco inanfafainpun, —huaifoan.

³⁵Ascaiton Jesús ato cumaquin, —Unfin nan tushucoinqin. Tsoan fonicoín cafiscái ua onancoínpaiquin ua tanaino aton nomuran fucashamarocón isharapacunaca. Nanscarifiai tsoan nomicoín cuscara ua fasi fuchipaitan ua icoinra huacun un ato nimapacunaca. Acai afanan funopacunacama. Isharapacunaca. ³⁶Ascafia un mato yoia cuscan ua oinfiashocai man ua icoinra huaima. ³⁷Nan ratoranfo uhuun Upa Diosin uqui nichiafin uqui fucaniquin. Ascan nanfofin un ato cushusharapacunacaquin. Un ato potapacunacama.

^{38–39}Uhuun Upa Diosin ua isca huaniquin, “Tsoan un mia ya imapaiyai mifu ishqui funopacunacama. Nan mia icoinra huafo namisifo min afanan nai ariashu mai ano fotoaino funishceni no fu ipashquin. Nanscara un fuchipairan,” ishón Upan Diosin ua yoini. Ascan ufcái un apaiyai cuscan un huaima. Un mai ano fotoní Upa Diosin ua amapaiyai cuscan huashquin. ⁴⁰Nan ratoranfoan un Diospan facun ua icoinra huaashufin no fu Upa Dios icari ipasharatiroquin. Un afanan mai ano oaitian a namisifo un ato funimashquin ufu nipasharanonfo. Ascarafin uhuun Upa Dios fuchipaiquin, —ishón Jesús ato yoini.

^{41–42}—Unfin tushu cuscara un nai murannoashu oniquin. Un yora imapacushquin, —ishón yoini. Ascaiton nocon caifo Israelifoan nicafiacashocai icoinra huanifoma. Jesusqui tsain chipunifo. —¡Cuu! ¡Nicacapon! Aafin Jesusquin. Apa José ahuari non oinmisi. Ascan aacai ahuama. Galilea anoashufin cainniquin. Ascanfiashon, “Un nai murannoashu Diosin icariashu fotoaran,” noco

huaiquin. Tsoancai na tsain icoinra huatiroma, —ishón yoinifo.

⁴³Ascaifoan Jesús aton nomuran shinainfo cuscan onanshon ato yoini, —Uqui tsain chipuyamacahuun. ⁴⁴Icon Upan Diosin ua nichini. Ascanfiacai tsoan Upa Diosin aton nomuran shinanmayamainocai ua icoinra huatirofoma. Ascan un afanan nai murannoashu mai ano nasoaitian ua icoinra huafoti un funimashquin Upa Dios fu ipanonfo. ⁴⁵Diospan tsain yoimision ahuun tsain cununi isca huaquin, “Upa Diosin afincoín yorafo ato tapimashquiran,” ishón cununi. Ratoranfoan Upa Dios nicaifoanfin ahuunshon tapicaniquin. Upa Dios nicacashonri uarifi icoinra huashcaniquin. ⁴⁶Tsoancai Upa Dios oinmisima. Urus fustifin un Upa Dios oinmisiquin. Nanton ua nichini. ⁴⁷Unfin mato iconcoín yoicain. Tsoan ua icoinra huai Upa Dios fu nipashquin. ⁴⁸Unfin nan tushu cuscara. Ua icoinra huafoti un ato nimapacushquin.

⁴⁹Nocon shunifo Moisés fu tsoan istaipama ipaonifo. Nan tushu ahuun anu manán fipaonifo pishcaquin. Pifiapaonishacaquin fari futsa nai cuyonifo. ^{50–51}Ascafia un nai murannoashu Uhuun Upa Diosin icariashu un oni. Unfin na tushucoinqin. Tsoan ua icoinra huashu nipanaca. Nan tushu ahuun anu manán nai murannoashu pacua nocon shunifoan pifianicai ato nimapacumisima. Nantian Upa Diosin afanan tushu nai muranshon mai ano fotomani. Nan tushu piashu yora nipatiro. Unfin nan tushuquin. Un nantifi yora manifoti ano ato nashoshquin nipasharanonfo, —ishón Jesús ato yoini.

⁵²Ascaiton nicacani nocon caifo Israelifo fochishmanantanannifo. —¿Ahuuscashomun na nocofunun ahuun nami noco inantiroquin non pinon? —icashu yoinannifo.

⁵³ Jesús ato yoini, —Iconcoïn un mato yoi. Unfin Diospan facuquin. Man uhuun nami piyamafain uhuun imi ayayamashu man nipatiroma. ⁵⁴ Ratoranfoan uhuun nami pifain uhuun imi ayafain ufu nipashcaniquin. Ascan un afanan nai murannoashu oaitian un ato funimashquin Upa Dios icari nipasharonfo. ⁵⁵ Uhuun nami tushucoin yafi uhuun imi ayaticoin. ⁵⁶ Ratoranfoan uhuun nami pifain uhuun imi ayai ufu rafupacunaca.

⁵⁷ Nan uhuun Upa nipanacaton ua nichini. Urifi ahuunoashu un nipanon. Ascano tsoaran ufu rafucacaini uhuunoashu ipasharatiroquin. ⁵⁸ Afanan un mato yoi. Nocon shunifoan nan tushu ahuun anu manán piinifo. Nan pifiapaonishacaquin nai cuyonifo. Ascan Upa Dios ariashu un matoqui oni. Unfin ahuun tushucoinquin. Tsoan ua piashucaï nanacama. Uhuunoashu nipasharatiroquin, —ishon Jesús ato yoini. ⁵⁹ Nocon caïfo Israelifoan nocon ichananti pushu muranshon ahuun anu Capernaum anoshon nan tsain noco yosini.

Jesushuunoashu yora nipatiro

⁶⁰ Atirifi tanamisifoan yoini, —¡Ohua! Jesús noco yoia cuscaï tsoan tapi-tiroma. Noncaï na cuscara tsain nica-paitiromaran, —ishon yoinifo.

⁶¹⁻⁶² Ascaïton Jesús onanni rama noco yoia cuscan atirifi a tanamisifo nicas-maiton. Ascan noco yoini, —¿Un rama mato yoia cuscan man nicapaimamun? ¿Afanan man ua icoinra huaimamun? ¿Nan nicaï man umaqui ipaiquin raquiri man shinanshquimun ua afanan oinquin un nai muran Upa Dios icari un funicainaiton? ⁶³ Diospan Yoshin Shara fustiton yora nimapacutiro. Mafiricaï man nimapacutiroma. Uhuun tsainri Diospan Yoshin Sharahuunshon un mato yoimisi. Ascacufin uhuun tsain icoinra

huashu man ufu nipatiroquin. ⁶⁴ Ascafia man futsacai ua icoinra huaimaran, —ishon Jesús noco yoini. Noco catoain-tian afincoïn tapiyoni ratotomain achi-manicaïn. ⁶⁵ Ascan afanan noco yoini, —Ascacun un mato yoiqui isca huai, “Upa Diosin tsoan ahuun nomuran shinanmayamaitocai ua icoinra huatiromaran,” —ishon noco yoini.

⁶⁶ Ascano Jesús noco yoiaï cuscan nicatan a tananmisi futsafoan potacashon afanan tanannifoma.

⁶⁷ Ascano Jesús nocori doce catonni non afu foanfainnon noco yocani, —¿Marifi man umaqui capaimun? ¿Man ua potapaimun? —noco huaiton.

⁶⁸ Pedronun cumani, —Ifon, non rato futsacai non catiroma. Mirus fusti min noco yoitiro ahuuscashumain non nipasharatiroquin. ⁶⁹ Minfin Dios ariashu nocoqui oniquin. Min Dios cuscara shara. Nan non icoinra huairan, —huaiton.

⁷⁰ —Un mato doce catonni. Un mato catonfiani matofu rafumisi futsan Satanás yoshin chaca ahuun nuumisiton, —ishon noco yoini. ⁷¹ Nan Simón Iscariote ahuun facu Judashuunoa noco yoini. Jesús noco doce catonni. Judasrifi catonfianicun Jesús ato achimaniquin.

Jesús ahuun ushtofaan icoinra huanifoma

7 Ascashu chipo Jesús Galilea maitio cahuancacaini ato tapimafoanfaini. Norifi non afu cani. Judea ano non cayonima. Nocon caïfo Israeli nocon niaïfofoan Jesús rutupaiyaïfono. ²⁻⁵ Nocon caïfoan fusititian tapaspaonifo. Nan fusiti nocoti chaima Jesús Judea ano catama Galilea ano nituni. Ahuun ushtofori nanno Galilea ano afu ini. Ahuun ushtocoinfoiacashon Jesucristofiacuncai tsoan icoinra huanifoma. Ascanshon yoinifo isca

huaquin, —Nunoashu Judea ano catahuun. Nantifi minhuunshon tanamisifo min ato ashomisi cuscan oinonfo. Min acai cuscan min ato oinmayamaino atirifoancai minhuunoa tapitirofoma. Min ahuamamishti atiro nantifi yorafoti ismafotahuun —huaifoan.

⁶—Uncai ari cayoataima. Uhuun Upa ua nichiataima. Ascafia ahuutianran man capaiyaitian man catiro. ⁷Nan icoinra huafoema nan ua noicasmái. “Manfin chaca huamisiran,” un ato huamisiquin. Ascacun ua noicasmacani. Ua noicasmafiacaquicai mato noicasmatirofoma. ⁸Ascacun natian fusitacahuun Jerusalén ano fotacahuun. Ucai cayoataima. Uhuun Upa Diosin ua nichiataimaran, —ishon Jesús ahuun ushtofoyoini. ⁹Ato yoitan Galilea ano nituyoni.

Jesús fusititiam nannori ini

¹⁰Ascafiahuun ushtofon nan fusi ishcaquin Jerusalén ano foaifoanno. Ascaino arifi chipo caani. Tsoa yoiashuma Jerusalén ano nocoaitocai tsoashta tapinima. ¹¹Nanno nocon caifo Israelifo niaifofoan Jesús funacaquin yoinifo, —¿Ranimun na nocofunu? —huanifo.

¹²Nannori yorahuanrasi. Atirifoan isca huanifo, —Jesús nocofunu sharacoinran, —ishon yoinifo. Ascafiaiffoan atirifoan yoiquin isca huani, —Ma. Na nocofunucai sharama. Yorafo paramisiran, —icashon yoinifo. ¹³Ahuunoacai aton ointaifi yorafoan yoisharanifoma. Nocon niaifofoqui musucaquin oinomashta yoinannifo.

¹⁴Fusiti anaitiataimano Jesús Dios fu tsainti pushu muran iquini a muranshon ato yosicai. ¹⁵Nocon caifo niaifofoan nicashon yoinifo, —¡Aira! ¡Nicacapon! ¿Ahuuscainun na nocofunun cunu tapicoianmashon tsain fasi tapicoianquin? —icashu yoinannifo. ¹⁶Yoiaifo cuscan onanshon Jesús ato yoini, —Un

mato yosiain cuscan uhuun nomuranshoncai un mato yoima. Ascatarocon Upa Diosin ua nichini, nanton ua shinanmana cuscan nannoricoin un mato yosiaquin. ¹⁷Tsoan Diosin yoia cuscan apaiquin afi tapitiroquin ufi shinain cuscan un mato yosi iyamarai Upa Diosin afi ua shinanmanaino un mato yosia.

¹⁸Tsoan ahuun nomuran shinain cuscan yosiqin nanton yorafo ahuunoa shinanmapai isca huaquin, “Na nocofunun fasi tapicoian. Afin fasi sharacoinquin,” ishon ahuunoa ato shinanmapai. Ascanfiatan uncai ascarama. Un mato yoiqui isca huai. “Nan uhuun Upa Diosin ua nichini. Nancaifin fasi sharacaiquin.” Anori un mato yoimisi ahuunoa man shinansharanon. Nanscacufin man icoinra huatiroquin un mato iconcoino yoi un yorafocai paramisima. ¹⁹Nocon shuni Moisés mato Diosin tsain yonofiani tsoashtacai nicasharamisima. Ascacufin ahuuscain man ua rutupaiyain un nocofunu tunutitiam cayahuafiacun, —huiton.

²⁰—¡Cuu! ¿Tsoantsi mia rutupaiquin? Minhuunfin yoshin chaca nuuaquin, —huaifoan.

²¹—Un nocofunu tunutitiam caya huiton man oinquin. Ascan “¡Ajaa! Ahuuscain Jesús tunutitiam nocofunu caya huamamun,” ishon uhuunoa man yoia. ²²Un tunutitiamfiacun ahuara shara huua cuscan marifi tunutitiam ahuara man huamisi. Moisés noco yononi cuscan manfin maton furonanfacufo rama caian ocho osha finoanno maton furonanfacufo man ato foshqui rupa shatumisiquin. ²³Ascan tunutitiamfiacun maton furonanfacufo man ato foshqui rupa shatumisi. Ascafia Moisés yononi cuscan man aima. ¿Ascacufin ahuuscain man uqui sinai tunutitiammain un nocofunu caya huasharacunfin? ²⁴Afanan un ahuara shara huiton oincaquin, “Chaca

huanan,” ua huayamacahuun. Cayacafi shinansharacahuun, —Jesús ato huani.

**—Jesús nocon Numamisi
Cristomun, —ishon yocaifoan**

²⁵ Ascatan atirifi Jerusalén anoashu yoinannifo, —¿Naamun nocon niaifofoan rutupaiafo?

²⁶ Ascanciaanashu yorahuanrasi aton ointaifi ato yoifiaquicai tsoan ahuun tsain shatumanama. Ascacuri natian niaifofoan man shinanraca aafin nocon Numamisi Cristoquin. ²⁷ Ascafiancai Jesús nocon Numamisi itiroma. Nocon Numamiscoin oaiton non tapitiroma raniashumain oicain. Ascan nan nocofunu Jesús raniashu oamainquin man non tapiaran, —ishon yoinifo.

²⁸ Jesús Dios fu tsainti pushu muranshon ato yosifiatan ahuunoa yoiafo cuscan onancoinshon ato cumani isca huaquin, —¿Iconmun man ua onan? ¿Un raniashu oamainquin man tapiamun? Ufi shinanfaincai un oama. Ascafia uhuun Upan ua yonoo un oa. Nantofin ua nichiniquin. Nanfin iconcoquin. Mancai uhuun Upa onanmisima. ²⁹ Un ahuunoashu oni. Ua nichini. Ascan un Dios onancoianran, —ishon ato yoini.

³⁰ Nicacani aqui sinanifo. Ascashon achipainifo cunu muran iquimashquin. Ascafiaquicai tsoan ahuusca huayonima. Nantiancai achiaifotian nocoatai inima. ³¹ Nan yorahuanrasi Jerusalén anoafoan yoinifo, —Tsoa futsan atiroma cuscan Jesús Diosinhuunshon ahua-mamishti shara noco isma. Nan nocofun tsoan asca huatiroma cuscan huatiro. ¿Nocon Numamisi oshon finonmafain ashquimun? —ishon yoinifo. Ascan anori yoiaifoan icoinra huanifo.

Fariseofoan Jesús achipainifo

³² Nan yorahuanrasiton Jesushuunoa tsain shara yoiaifoan Fariseofoan nicanifo. Ascan nocon caifohuunshon Dios cu-

fimisi niaifofoan futan ranushumuafonichinifo Jesús achicashon cunu muran iquimanonfo.

³³ Ascan Jesús ato yoini, —Un matofu ichaipacuima, Un samamashta uhuun Upa Dios ari cai. Nantofin ua nichiniquin. Un samamashta aqui cai.

³⁴ Un mato anoashu caitocai man ua funafiaquin ua fuchishquima. Un cai aricai man catiromaran, —ishon ato yoini.

³⁵ Ascaiton nicacani nocon caifo Israeli niaifofo yoinannifo, —¿Ranimun na nocofunu caiquin noncai fuchitiroma? ¿Nocon yorafo Grecia pushurasi ano pashcafainnifo ano caimun? ¿Nanno Greciafo tapimaicairaca? ³⁶ ¿Raquiri noco yoimun isca huaquin? “Man ua funafiaquicai man ua fuchishquima. Uncai aricai man catiromaran,” ishon noco yoia. ¿Raquiri noco yoipaimun? —icashu yoinannifo.

**Diosin Yoshin Sharapan
yorafo nimapacutiro**

³⁷⁻³⁹ Ascano fusitin ahuun unutaquin Jesús yorahuanrasi muran ninacahuan oi ashcafinin ato yoiquin isca huani, —Nicacapon. Un mato yoinon.

Diosin mato yonomapaiyai cuscan man huashopai uqui fucahuun. Ua icoinra man huacun un mato Diospan Yoshin Shara mato ya rafumapacunaca. Tsoan ua icoinra huaiton Diospan tsain cununi cuscan ahuun shaqui muran unu tsosia shara cuscara a muran foiran, —ishon Jesús ato yoini. Unucoinhuunocai yoinima Diospan Yoshin Sharahunshon ato tapimani isca huaquin, —Tsoan ua icoinra huaiton Upa Diospan Yoshin Shara afu rafupacunaca. Ascan Diospan Yoshin Sharahunshon ahuun nomuranshon yorafo yoishquin afoan-rifi icoinra huacanashu nipasharanonfo, —ishon ato tapimani. Jesús apa Dios ari nasoataima yorafoan aton niaifo

inon. Ascan nan icoinra huafoti Diospan Yoshin Shara atoqui nichiataima.

**Jesushuunoacai
nannorifosi shinannifoma**

⁴⁰ Nicacashon atirifoan yoinifo, — Iconcoin na nocofunu Diospan tsain yويمisiran, —ishon yoinifo.

⁴¹ Atirifoanri yoinifo, —Naanfin Cristoquin, —ishon yoinifo. Ascafiaino futsafoan yoini, —Ma. Nacai Cristoma. Cristocai Galilea anoashu cainshquima.

⁴² Diospan tsain cununi cuscan, “Cristo David funa inon. David ipaoni nannoashuri Cristo cainshquiran,” ishon Diospan tsain cunushoni. Ascan Cristocai Galilea anoashu caintiromaran, —ishon yoinifo. ⁴³ Nanscafiacun nan yorafoan Jesushuunoa nicafiacashocai anorifosi shinannifoma. ⁴⁴ Atirifoan Jesús achipainifo cunu muran iquimashcaquin. Asca huapaifiacaquicai tsoan Jesús ahuusca huaiyonima.

**Israeli aton niaifofoan
Jesús icoinra huanifoma**

⁴⁵ Ascatan ranushumuafaoan aton niaifofo yafi Fariseofoqui nasocashon ato yoinifo. Nocoafono nanfoan ranushumuafao yocani, —¿Ahuuscaquimun man Jesús achiamquin noco ihuushoshquin? —ishon ato yocanifo.

⁴⁶ Cumacaquin, —Na nocofunun ahuun tsain shara cuscara tsoancai anori yoyomisimaran, —ishon yoinifo.

⁴⁷⁻⁴⁹ Ascaiton ato nicacashon niaifofoan ato yoini, —¡Cuu! Ascan Jesús matori paramisi. Shinacapon. Nonfofin Fariseofo yafi maton niaifofoanri Moisés cununi cuscan fasi non tapicoianquin. Nonfoancai tsoashtan Jesús icoinra huamisima. Na yorafoan man rama Jesús nica nanfoan Moisés Diospan tsain cunushoni cuscan tapiafoma. Diosin

ato onaintimaponran, —ishon ato yoinifo.

⁵⁰⁻⁵¹ Asca huafiaifoanno Nicodemon nan shafa futsa Jesús ano cani ahuara yocaicain. Arifi Fariseonfiashon afu Fariseofo yoini, —Uhuun yorafoan, nocon shuni niaifoan yononi cuscan non ratoran nocofunun nicasharayoataima non yoitiroma isca huaquin, “Naton chaca huaa. Non onaintimanonran,” ishoncai non ascatiroma, —huaiton.

⁵² —Min tsain Galilea anoafaoan tsain cuscarari. Shinanhuun. Tsoashtacai Galilea anoashu Diosin tsain yoimisi fuafoma. Nannoricoin Diosin tsain noco yoicoinni. Oinyotahuun tapinon, —ishon Nicodemo cumanifo.

⁵³ Anori yoicatan aton pushufoanri fonifo.

**Ainfun ahuun funuma fu
icaiton niaifofoan achinifo**

8 Asca huafaini Jesús machi ahuun anu Olivo ano cani. ² Shafaino Dios fu tsainti pushu muran Jerusalén ano nasoni. Nanno yorahuanrasi afanan aqui funifo. Nicai fucani. Ascatan tsaoshon ato yosini. ³⁻⁵ Ato yosiaino Moisés cununi cuscan tapimamisifo yafi Fariseofoanri ainfo ahuun funuma fu icaiton fuchicashon Jesusqui ihuutan yorahuanrasifain ointaifi ainfo nimainifoannifo nantiffain oinonfo. Asca huacashon Jesús yoinifo, —Tapimamisiton, na ainfoan fasi chaca huaa. Ahuun funuma fu icaiton fuchiafo. Moisés isca huaquin noco yononi, “Ainfa ahuun funuma fu icaiton fuchicashon toquirinin a tsacacahuun nanon,” ishon Moisés noco yononi. ¿Mirifi min nannori noco yonopaimun? —Jesús cuparananshon yocaifoan. ⁶ Raquirirashta icaiton ahuun chaca inifoan niaifofo ano iyopaicaquin. A yocaifoanno Jesús tutishon ahuun mutotinin mai cununi.

⁷Yocariaifoanno Jesús atوقي fuhuuni inacahua yoini isca huaquin, —Man ratotonmain man ahua chaca huamisi-maquin na ainfo toquirinin tsacaqui tau huahuun, —Jesús ato huani. ⁸Ascan ato yoitan afanan ahuan mutotinin mai cununi. ⁹Ascano ato yoia cuscan nica-catan nantifi nan ainfoqui tsain chaca huafo fustirasi foriforinifo. Nan iyoafofo fosi rufofo foriforinifo. Chipó atirifi cuyo fonifo. Jesús fusti nanno ainfo aquí nituano. ¹⁰Ascan Jesús afanan fuhuuni-nacahuan ainfo yocani, —Uhuun shafoshta. ¿Na nocofunufoan mia chaca huaa man foafomun? ¿Tsoa fusti nituamamun afanan mia tsain chaca huai? —ishon yocaiton.

¹¹—Ifon. Fustishtacai nituamaman, —ishon yoiaiton. —Unricai mia tsain chaca huaima. Natian min catiro. Ascashi-min chaca huamisi cuscan afanan asca huayamahuu, —ishon Jesús ainfo yoini.

**—Unfin chashamati cuscaranquin
—ishon Jesús ato yosini**

¹²Ascatan ainfomaqui caashon Jesús afanan yorahuanrasi yosini isca huaquin, —Unfin chashamati cuscaranquin. Un manifoti anofo un ismasharatiro nipasharanonfo. Tsoan ua tanamisi icashucai funotiro. Uhuunshon fai oinsharatiro Upa Dios ari noco sharashquin. Faquish muran ipashquima, —ishon Jesús yoini.

¹³Ascaiton nicacaquin Fariseofoan yocanifo, —Min noco yoiai cuscaicai tsoa futsan mihuuoa noco anori yoimisima. Mirus fusti minhuuoa min noco yoiai cuscaicai tsoa icoinra huatiroma, —huaifoan.

¹⁴Jesús ato cumani, —Un tapian raquiashumain un oquin ascatai raquimain un caicain. Ascacun uhuuoa un yoitiro uhuun tsain iconcain. Ascafia mancai tapiama raquiashu oashumain

raquiriri un caicain. ¹⁵Tapishoma un yosiaiton man icoinra huama. Uncai tsoaquin shinanchacaima tsain chaca huashquin. ¹⁶Ascafia-cun uhuun Upan shinain cuscan nannoricoinrifi un mato yoi. Ascan un iconcain yoimisiquin. Uhuun Upan ua nichini. Un futsahuuoa yoiquicai unrusu un yoima. Uhuun Upan ua tapimana cuscan un yoi. Ascan un futsahuuoa yoia cuscan iconcain. ¹⁷Moisés mato yononi cuscan isca huaquin cununi. “Nocofunu rafutan nannorisi yoiaiton man icoinra huatiroman,” ishon mato yononi. ¹⁸Ascan uficoín uhuuoa un mato yoimisi. Ascafia-cun uhuun Upan ua nichini nanton uhuuoa nannorisi yoimisi, —huaiton.

¹⁹Nicacashon yocanifo, —¿Ranimun min Upa? —huaifoan.

—Mancai ua yafi uhuun Upa man onanmisima. Ua onanshon uhuun Upari man onancuana, —ishon ato yoini.

²⁰Jesús Dios fu tsainti pushu muran-shon yorafo yosini. Nan cunu muranri nocon pui nanuti. Diosin tsain yonomisifo inanonfo. Nanno ato yoifiani tsoancai Jesús achinima cunu muran iquimashcaquin. Jesús rutuafotaima. Ascan rutushquiaifon shafan nocoataima tsoan ahuusca huayonima.

Un cai aricai man catiroma

²¹Ascan tsoancai achinifoma Jesús afanan nocon caifo aton niaifofo yoini. —Un chipó chai cai. Un caino man ua funafiaquicai man ua fuchishquima. Maton chaca potayamashu nanscasiai man nai. Ascaiton un cai anori cai man catiroma, —ishon ato yoini.

²²Nicacani yoinannifo, —¿Afirimun rutushquiquin? Ascashori noco yoi, “Un cai anoricai man catiromaran,” noco huaiquin, —icashu nocon niaifofoan yoinannifo.

²³ Ascaiton Jesús ato cumani, — Manfin na mai ano iitianiquin. Ucai mai ano ipaonima. Ufin nai muran iitianiquin. ²⁴ Un mato yoiai cuscan maton chaca potayamashu nanscasiai man nai. Un mato uhuunoa yoia cuscan iconra huayamashu maton chaca ya man nai. Man naino maton chaca mato ya ipanaca, —ishon Jesús yoini.

²⁵ —¿Ascan minmun tsoaquin? —ishon yocaifoan. —Nan un mato yoimisi cuscafin unquin. ²⁶ Matohuunoa un ichapa yoitiro. Man chaca huua cuscan huafain un mato yoifiatiro nan ua nichincai man iconra huatiro. Afi ua yoimisi cuscan un nantio maifoti un ato yoifoanfafainon, —ishon Jesús ato yoini.

²⁷⁻²⁸ Apa Dioshuunoa ato yoifiaitocai tsoan tapinifoma. Ascan Jesús ato yoini, —Man ua ihui coyan iquinanqui funinifoanshquiaitian man ua tapishquin umain tsoaquin. Nantianri man tapitiro uhuunoa fusticai un mato yoimisima Upa Diosin ua yoimisi cuscan nan fusti un mato yoi. ²⁹ Nan ua nichini ufu imisi. Ucai potamisima. Afi ua amapaiyai cuscan un amisiquin. Ascacun uqui unimacoin, —ishon ato yoini. ³⁰ Yoiai cuscan nicacashon atirifoan a iconra huancoinnifo.

Diospan facufo Diosin aton ifo. Yora chaca huamisifo chaca fustisi aton ifo

³¹ Ascano Jesús nocon caifo nan iconra huafo yoini, —Un mato yoiai cuscan nicacoianshufin uhuun tanamisicoin man itiroquin. ³² Uhuun tsain nicashon iconcoin tapishon maton nomuran man isharacointiro. Ahuara iconma afanan maton ifo inonma, —ishon Jesús ato yoini.

³³ Ascan Jesús iconra huamisifoan ato yoiaiton niaifofoan nicacashon yoinifo, —Nonfin Abraham ahuun funafoquin. Tsoa futsacai nocon ifo imisima. Noncai

tsoan oinmati imisima. Ascacufin ahuuscain, “Ahuara iconma maton ifo itiroman man iconsharanon,” noco huaran, —huaifoan. ³⁴ —Iconcoin un mato yoinon. Tsoan chaca huamisifin ahuaa chacafoan aton ifo iishquiquin. Nanrifi chacafoan aton yonoshomisi iishquiquin. ³⁵ Man man tapia ahuun yonoshomisciai ifoan pushu muran ipanacama. Pushu ifoan ahuun facu pushu muran ipatiro.

³⁶ Ascan unfin Diospan Furunquin maton chaca soashonano afanan ahua chaca futsa maton ifo itiroman. Man Dios fu isharapashcaquin. ³⁷ Mun tapia maton shuni Abraham. Man ahuun funafoshofin ashon uhuun tsain man nicacasmai. Ascashon man ua rutupai. ³⁸ Uhuun Upan amisi cuscan mun oinmisi. Nanfohuunoa un mato yoimisi. Ascan marifi maton upa mato yoimisi cuscan nannori man huamisi, —huaiton.

³⁹ —Nocon shunifin Abrahamquin, —huaifoan. —Man Abraham funafoshofin nanton apaoni cuscan marifi nanscarifi man huacuanquin. ⁴⁰ Upa Diosin ua yoimisi cuscan un mato icon yoifiaino man ua rutupai. Abrahamcai ascapaonima. ⁴¹ Maton upa acai cuscan marifi man amisiquin, —ato huaiton. —Noncai upa ichapayama. Nocon upacoin fustifin Diosiquin, —huaifoan. ⁴² —Unfin Upa Dios fu imisiquin. Un Dios icanoashu un oni. Ufi shinanfaincai un mai ano onima. Uhuun Upan ua nichiano. Ascan maton upacoin Diosicunfin man uarifi noicuanquin. ⁴³ Ahuuscaín uhuun tsain man shafacafiacucaí man tapiama. Futsanfin mato nicatima huaquin. ⁴⁴ Nanfin maton upa Satanasquin. Ascan maton upan apaiyai cuscan marifi man huapaiquin. Aafin tauí rutumitsamisi ipaoniquin. Iconcai yoimisima. Atocai ahuaa icon yoimisima. Ahuun nomuran chani fusti shinantiro. Nanscashori chani fusti yoitiro. Afin chanimisicoinquin. Chanimisifoan aton apacoin. ⁴⁵ Uncai

a cuscarama. Un mato iconcoin yoifi-aiton mancai ua iconra huaima. ⁴⁶¿Ratoran futsamain un chaca huaa yoitiroquin? Uncai chaca huamisima. ¿Un mato icon yoifiaitocai ahuuscaquin man ua iconra huaimacain? ⁴⁷Ratoranfoan Diosin ahuun yoracoin ahuun tsain nicatiro. Mancai Diosin ahuun yorama. Ascan uhuun tsain man nicaimaran, —ishon Jesús ato yoini.

Abraham Caiantaima Cristo iyoni

⁴⁸Nicacashon nocon caifo Israelifoan cumanifo, —Icon man non yoimisi. Minfin Samaritanonquin. Yoshin chaca mihuun nuumisi, —huaifoan. ⁴⁹—Yoshin chaca uhuun nuumisima. Un uhuun Upa Diosihuunoa tsain shara fusti yoimisifin unquin. Manfin uhuunoa tsain chaca yoimisiquin. ⁵⁰Ascanfiatan mancai uhuunoa yorafo tsain shara yoipaimisima. Upa Diosin fusti iconcoin yorafohuunoa tsain shara yoitiro. Uhuunoa yorafo yoisharamapai. Nantonri yoitiro ratofomain shara iyamarai chacafquin. ⁵¹Iconcoin un mato yoinon. Tsoan uhuun tsain nicacoianfin nacointamarocon nipanacaquin, —huaiton.

⁵²—Natian man non tapicoín minfin yoshin chacayaquin. Abraham non Diosin tsain yoimisifori man naafianicun min noco yoia, isca huaquin, “Tsoan uhuun tsain nicacoianshu nacointamarocon nisharapacunacaran,” ishon min noco yoia. ⁵³Nocon shuni Abraham non Diosin tsain yoimisifori man nani. ¿Ascan min Abraham finoncoianmun? ¿Min shinanmun min nantifi finon? —huaifoan.

⁵⁴—Unfincoin un uhuunoa yoisharainocai ahuama. Upa Diosin fustitofin uhuunoa yoisharamisiquin, “Nanfin nocon Uparan,” man huamisiquin. ⁵⁵Mancai uhuun Upa Dios onanmisima. Ascafiacun unfin uhuun Upa onancoianquin. Uhuun Uparan un

iyamafin Un mato cuscara chanimisiri icuanaquin. Ascataamarocon un Upa Diosin onancoian. Ua yoiai cuscan un huamisi. ⁵⁶Maton shuni Abraham, yoini, “Un chipo Cristo ointiro. Oianshu un fasi unimashquinran,” ishon yoini. Ua oinni ascan fasi unimani, —Jesús huaiton.

⁵⁷—Mincai cincuenta fari icataima. ¿Ascan ahuuscashomun min Abraham oinmisiquin? —huaifoan. ⁵⁸—Iconcoin un mato yoinon. Abraham caiantaima unfin iyopaoniquin, —ishon Jesús ato yoini. ⁵⁹Ascaiton nicacani nocon niaiffofo fasi sinacoincaquin toquiri ficatan Jesús tsacapainifo rutupaicaquin. Ascan huapaiyaifono Jesús ato murannoashu cani. Dios fu tsainti pushu murannoashu atomaqui cafiaitocai tsoan oinnifoma.

Nocofunu fusho cainfianicun Jesús caya huamani oinsharanon

9 Jesús caaquin oian nocofunu fusho nanscarapan caini oinni. ²Ascaiton non afu rafumisifoan yocatoshini. —Tapimamisiton, ¿Ahuuscaimun na nocofunu fushoquin nanscarapan caini? Ahuara chaca huamisishaquinraca fusho cainni. ¿Ascayamarai apa futan ahuan chaca huamisianoraca fusho cainimun? —ishon non Jesús yocani. ³Ascaiton Jesús noco yoiquin isca huani, —Ahua chaca huayamafiamisishaqui afincoin fusho cainni. Apa futan ahuan chaca huanocai fusho cainnima. Nanscarapan cainnicun chipo Diosin ahuaamamishti huatiro cuscan ahuunoa ismashquin.

⁴Diospan ua nichiniquin non yonoshononcahuun. Non shafata fusti yonoshotiroquin. Yamucaí non yonoshotiroma. Nanscarifiai ratoran shafatan nocoqui nocoano afanancai tsoanshtan na mai anoshon Dios yonoshotirofoma. ⁵Un na mai ano iyoashufin un shafa cuscaraquin.

Un ato oinmani ahuuscashumain ishataritirofoquin, —ishon noco yoini.

⁶Asca huatan maiquin cumo michotan. Miscoacufoantan ayashon futucurani. ⁷Asca huatan, —Siloé carayanun nashitahuun, —huani. Carayan ahuun anu futsa —Nichiaran —yoimisifo. Asca huaa caashu nashianan fuchocomutan oinsharacufainiquin. Ascatan naso curani. ⁸Nan oinmisifoan isca huanifo, —¿Nan fusho tsoashu ahuara yocacaiton non oinmisimun? ¿Na nancaimun? —huaifoan. ⁹—Ainfain. Nanfinquin, —atirifiton huanifo. Atirifiton yoicaquifin, —Aamafinquin. Nan ointsacoinfinquin, —huanifo. Afiri ato yoini, —Unfinquin. Unfin fusho imisiquin. Ascafiashofin natiantan un oinsharaiquin, —ato huaiton.

¹⁰—¿Ahuuscashomun min natian oincain? —huaifoan. ¹¹—Na nocofunu Jesusran huaafoanfin ua maiqui cumo michotan a yashon ahuun mucuman ua futucuracaquin. Ascashufin “Siloé naquinoashu nashitahuun,” ua huaano. Siloé carayanun nashianan un fuchoquimushofin un oinshara acufainnaquin, —ato huaiton.

¹²Ascaiton, —¿Ranimun na nocofunu Jesusquin? —ishon yocaifoan. —Un tapiama. Raquiran man caaran, —ato huani.

Nan fusho cainnito oinsharaiton Fariseofoan yocanifo

¹³Ascano Fariseofo icano nan nocofunu iyonifoquin. ¹⁴Jesús nan nocofunu tunutitian cayahuano. ¹⁵Fariseofoan nan nocofunu yocacaquin, —¿Ahuuscacai ashumun min furo cayaquin? —huaifoan. —Ua maiquin cumo michotan ayashon ua futucuraca. Nashianan fuchoquimushofin un oinshara acufainnaquin, —ato huaiton.

¹⁶Nicacaquin Fariseo atirifoan isca huanifo —Acaico Dios ariashu

ocufin tunutitian yora cayahuama, —huanifo. Ascaiton atirifiton yoiquin isca huani —Yora chacapancai naton acai cuscan huacuanamaran, —ishon atirifiton yoinifo. Ascaiton atirifoan shinancaquin, —Jesuscai sharama, —huaifono. Atirififain, —Jesusfin sharaquin, —huanifo. Jesushuunoacai nannorisi shinannifoma.

¹⁷Ascaiton afanan a nocofunu fusho cainni yocacaquin. —¿Minmun ahuuscacai aaqi na nocofunun mia cayahua? ¿A mia furo cayahuamamun tsoanquin? —huaifoan. —Naantofin inon pacoai cuscan huafain Diosin tsain yoimisiquin, —ato huaiton.

¹⁸Ascaitoncai nocon niaifofoan icoinra huanifoma nan fusho nanscarapan cainni. Ascaiton fushon apa yafi ahua cunashon yocanifo.

¹⁹—¿Nan na aamun min facu fusho caini? ¿Ascafiashomun ahuuscashon natian oinquin? —huaifoan. ²⁰—Nanfin nocon facuquin. Nanscarapan cainni. Nan non tapiafin nocon facuquin.

²¹Ahuuscashomun oinquin noncai tapiamafinquin. Ahuuscashumain cayaquin. Facumafinquin. Manfin nocofunuaquin. Afifin mato yoitiroquin ahuuscashumain cayaquin. Nan yocacahuun, —ahua futan apan ato huani. ²²Nocon niaifofoquin musucaquin anori yoinifo. —Tsoan “Diosin Jesús catonniran,” huacai nocon ichananti pushu muran afanan iquitirofomafinquin, —niaifofo icaiton nicai ahua yafi apa atoqui musunifo. ²³—Afanan facumaquin, Nancoin yocacahuun, —huanifo.

²⁴Ascano afanan a nocofunu fusho ipaoni yoimashon yoini, —Yoihuu. “Diosin ua cayahuaran,” ihuu. Jesuscaicon sharacufin. Chacafinquin. “Diosinfin sharaquin,” huahuu. “Jesús shararan,” huayamahuu. Non tapiafin Jesús chacaquin, —huaifoan.

²⁵—Utsan. Uncain tapiama chaca iyamarai sharamainquin. Un tapia fustifin un fusho iyofiamisishaquin natian un oinsharaicain, —huiton.
²⁶—¿Ahuusca huafainmun mia cayahuquin? —ishon yocaifoan.

²⁷—Munfin mato yoifiashucaí mato yoia cuscan man nicapaima. ¿Ahuuscaquin man afanan ua yocainmun? ¿Marifimun ahuun tanamisi man ipaicain? —ato huiton.
²⁸Fasi roaquin futsanifo. —Minfin ahuun tanamisiquin. Nonfofin Moisés tsain tanamisifoquin. ²⁹Non tapiafin Diosin Moisés fu tsainpaoniquin. Noncai a Jesús tapiamafinquin. Tii ahuu cuscararanfinquin a nocofunucái non tapiama, —huaifoan. ³⁰—Choon. Mancai tapiamafinquin raniashumain Jesús oshon. Un fushofiacun ua cayahuamaquin. ³¹Non tapiafin yoran chaca huamisiicai Diospan nicapaitiroma. Ratoran Diosin tanasharafain yoia cuscan aitonfin nanscarafó Diosin nicatiroquin. ³²Nan Diospan mai onihuaní chaincai ascaran nocofunun fusho caya huaa non nicaiyomisimafinquin. ³³Upa Diosin na nocofunu Jesús nichiyamanicai ahua ahuusca huacuanama, —huiton. ³⁴Nicacani fasi aquí sinanifo, —Minfin chacacoin cainiquin. ¿Ascan ahuuscaquimun min noco tapimapaicain? Min chacashunifiashon. Nocon ichananti pushu muran min afanan iquitiroma. Nunoashu cariscatahuun. Noncaicon mia afanan oinpaíyaintonfin. Afanan nuno iquicuranyamahuun, —huanifo.

**Ratoranfoan Jesús icoinra
huayamacanashu
fusho cuscaracoinfo**

³⁵Ascaiton fusho ipaoni aton ichananti pushu muranshon potaifoan Jesús nicani. Ascashon funaquin

fuchini. Fuchishon yoini, —¿Minmun na nocofunu Dios ariashu oni icoinra huaicai? —ishon Jesús yocaiton.
³⁶—¿Tsoanmun na nocofunuquin? Ua yoihuu urifi un icoinra huanon, —huiton. ³⁷—Nan min ufu tsaincaifin unquin, —Jesús huiton. ³⁸Nicatan, —Ifon, unfin mia icoinra huaicain. Min fasi sharacoin. Un mia noi. Un mia Ifoai. Min Diospan Facuran, —ishon yoini.

³⁹Ascano nanno niafo Jesús ato yoini, —Uhuun Upa Dios icariashu un nuno mai ano oni ratofoanmain ua icoinra huayamaino ua icoinra huacanicain un puashoshquin. Ascan tsoa Upa Dios fu ipaífiáquin tapiama ahuuscain atiroquin nanfo fusho cuscarafashon ua icoinra huaashucaí afanan fusho cuscara itirofoma oinsharatiro Upa Dios fu ipashcaquin. Futsafoan shinancaquin tapisharafishocai tapisharafoma. Ua icoinra huayamaífo. Nanfo fusho cuscaracoin. Funoshcaquin, —ishon Jesús yoini.

⁴⁰Nanno Fariseofo Jesús yoiaí cuscan nicacashon a yocanifo, —¡Cuu! ¿Min noco yoimun non fushocun? —huaifoan.

⁴¹Ato yoiquin, —“Nonfin fusho cuscarafóquin. Man non funoa. Non chaca huamisiiran,” ishon man yoiaiton un maton chaca soashocuana. Mancai ascatarocon, “Nonfin oinsharatiroquin. Noncai funoama. Nonfin sharaquin. Noncai chacamaran,” man imisi. Ascan maton chaca soatama man funocoianshu Upa Dios icano nocopacunacamaran, —ishon Jesús ato yoini.

**Chashoanfo cushumisihuunoa
afincoin ahuunoa Jesús ato yosini**

10 Ascatan Jesús ato tapimani nanmain aton cushumisicoínshofin. Chashoan cushumisiton ahuun chashoanfo cushutiro. Nanscarifi aquin Jesús ahuunshon icoinra huafó cushuointiro. Nannori Jesús ato

yoini isca huaquin, —Iconcoïn un mato yoinon. Pasoatoshon yoran chashoanfo cunushotiro iquimashquin raqui fononfoma. Nan cunu caincaiti ya. Ascan tsoa caincaiti murannoashu iquitama pochinnnoashu iquiafin nan yomutsoquin.

²Ascan nan tsoa caincaiti cunu muran iquimamisifin nancaifin ato cushumisiquin. ³Caincaiti ano nocoaiton nan nocofunun caincaiti cushumisiton fupushotiro chashoan cushumisiton iquimapacunon. Ascan chashoan cushumisi iquiaiton ahuun chashoanfoan ahuun oi onanti huanifo. Nantifi ahuun chashoanfo anu futsapacuni. Aton anun cunapacuaino chashoanfoan mufainifo. ⁴Aton cushumisi rucun caino chashoanfoan cunu muranshon mufainifo. Ahuun oi onancoincashon mufainifo. ⁵Futsan cunafiaitocai chashoanfoan ahuun oi onannifoma. Ahuun oi onainyamacani amaqui ichotiroran, —ishon Jesús ato yoini. ⁶Jesús ahuunoa ato yoifiaiton tsoan tapinima.

Jesús nocon cushusharamisi

⁷Ascano Jesús afanan ato shafacafi yoini, —Un mato iconcoïn yoinon. Nan chashoanfo cunu muran iquipaicani shoi fusti muran iquitirofo. Unfin nan shoi cuscarquin. Tsoa Upa Dios icano iquipai uhuunoashu fusti ari iquitirofoquin. ⁸Un matoqui nocoatima futsafoanri yoia isca huaquin, “Un mato tapimatiro ahuuscashumain Upa Diosqui man nocotiro afu nipashquin,” ishon yoifiamisishacaquin afoancaifin paramisifoquin. Yomutso cuscarafu. Diospan yora parapaicani ato yonomapai. Asca huapaifiaifin Diospan yorafoancai na cuscarafu nicapaicanima. ⁹Unfin na shoi caincaiti cuscarquin. Tsoa Upa Dios icano

ipapaiquin uhuunoashu fusti ari iquitiro afu ipashquin. Natianri uhuunoashu ishatarirofo ahuatocai aton nomuran fucash huatiroma.

¹⁰Futsafoan uhuun yorafo parapaicani. “Ua tanacahuun. Un mato tapimasharanon,” ishon ato yoifiaquicai nanfoanfin uhuun yorafo amaqui imapaicani. Yomutso cuscarafu. Ua icoinra huafo shara huapaicanima. Ato shara huatamarocon ato chaca huapaifain ato rutupaicani. Asca ato huafiaifonocai un ascarama. Ua tanamisifo un ato imasharafain un ato unimamashquin. Nanscaifin un oniquin.

¹¹⁻¹³Ua icoinra huafo chashoan cuscarafu. Cushumisi yopacani. Unfin nan chashoanfo cushumisi shara cuscarquin. Ascan na nocofununcai chashoanfo ifoshomacai ato cushusharama. Chashoanfo futsan cushumashofin ifoan aton pui inantiroquin. Ascan chashoanfohuunoa shinantamarocon pui fusti shinain. Ascaino masharo chashoanfoqui nocoaino nan cushumisi futsan ato cushusharatama ato potafaini ichotiro. Shinanquin isca huatiro, “Na masharo fasi musucoin. Nan chashoanfocai uhuunacoïnmafinquin. Ascan na masharonun ato piquin nanscanon. Uncai ahuusca huatiroma un ato numapanan. Unfin atomaqui ichoicaicain masharonun ua ahuusca huanonma,” ishon shinantiro. Chashoanfoan aton ifocoincai ascatiroma. Afifin ahuun chashoanfo cushusharatiroquin masharonun ato pinonma. Shinantiro isca huaquin, “Uhuun chashoanfohuunoaahucaifin un natiroquin. Nanfocairocon ahuuscanonma,” ishon shinantiro.

¹⁴⁻¹⁵Unfin na chashoanfo cushumisi shara cuscarquin. Cushumisinin ahuun chashoanfo onancoïn ato cushusharamisi. Urifi ua icoinra huafo

un ato cushusharamisi. Uhuun Upa Diosin ua onancoin. Urifi uhuun Upa un onancoian. Nanscarifiai ua icoinra huafo un ato onancoin. Nanfoanrifi ua onancoincaniquin. Un atohuunoashu naashquin. ¹⁶Yora futsafoanri ua icoinra huashquicani. Afocai Israelifoma. Nanforifi un uhuun Upa icano iyotiroquin. Nanfoanri mai ano niyocashon ua nicasharayoshcani. Ascan Israelifo yafi mani futsafoanri ua icoinra huacanashu fusti cuscaracoin iishcaniquin. Nantifi nan icoinra huafoti Upa Diosin yorafo iishcaniquin. Urusu fusti un aton cushumisi un iishquin.

¹⁷Un ato cushusharashu un atohuunoashu naashquin. Ascan uhuun Upa Diosin ua noiaino naashu un afanan funishquin nipashquin. ¹⁸Ua icoinra huafohuunoashu napaiyamainocai tsoan ua namatiroma. Uhuun Upa ua yononi cuscan un atohuunoashu naicain. Uhuun Upa Diosin ua yononi cuscan un atohuunoashu nayoflashu un afanan funitiro nipashquin, —ishon Jesús ato yoini.

¹⁹Nicacashon atirifi nocon caifoan icoinra huaifoanno atirifoancai tsoan icoinra huanima. ²⁰Atirifoan yoiquin isca huanifo, —Aafin nisocoinquin. Yoshin chaca ahuun nua. ¿Ahuuscaquitsi non na nocofunu nicatiro? —ishon yoinifo.

²¹Atirifoanri yoini, —Aacai yoshin chaca ahuun nuama. Yoshin chacanuncai nocofunu fusho afanan oinmatiro-maran, —ishon yoinifo.

Israelifo aton niaifofoancai Jesús icoinra huanifoma

²²⁻²⁴Ascano Jesús nocon caifo Dios fu tsainti pushu Jerusalén ano non cani. Oi pacutian non cani. Nanno tapasi uhuparasi muran fonifo. Nantianri nocon caifo Israelifoan nocon fusitin ahuun anu tuqui huani isca huaquin, —Dios fu tsainti pushu onihuashararan, —

ishon anuni. Nanno pushun facu ahuun anurifi tuquihuani, —Salomonran, —huanifo. Nannori Jesús ini. Nocon caifo niaifofo aqui funifo a yocacani. —Minmain Cristoquin nocon shafacafi yoi-huu. ¿Ahuuscaimun min noco shafacafi yoiyamacaiquin? ¿Ahuutiatsi min noco shafacafi yoicain? —huaifoan.

²⁵—Un mato yoifiamisicun man ua icoinra huaama. Uhuun Upahuunshon un yorafo tsoan atiroma cuscan un huafafaini. Nanfo un mato isma unmain Diospan Facushofin. ²⁶Ascacia mancai Upan Diosin ahuun yorama. Man ua icoinra huama. ²⁷Ua icoinra huafoan ua nicasharatiro. Un ato onancoianno ua tanafo. ²⁸⁻³⁰Omitsiscapanacafo muran focanima. Ua tanaifocai ari fonacafoma. Ascatamarocon un ato Upa Dios ya imapacunaca. Upa Diosin ato ua inan. Upan nantifi finoncoian. Upa Dios fu un fusti cuscaracoin. Ascancunfin tsoancai ua tanamisifo unmaqui yafi Upamaquiri imapacunacamaran, —ishon Jesús ato yoini.

³¹Nicacani afanan Israeli niaifofoan toquiri uhuapa ficatan Jesús tsacapainifo rutupaicaquin. ³²Asca huafiaifoan Jesús ato yoini, —Upa Diosihuunshon tsoa futsan atiroma cuscan un mato ismafiamisi. ¿Ascan ahuanhuunshocaimun man ua toquirinin tsacaicain? —huaiton.

³³—Nanfohuunshocai non mia toquirinin tsacaima. “Tsoa futsacai Diosima,” anori Diosin tsain cununi. Minrifi nocon cuscara nocofunuquin. Ascanfashu mian yoia mirifi Diosiran min icaquin. Ascan min Dios chaca huai. Ascacufin non mia toquirinin tsacaicain, —huaifoan.

³⁴⁻³⁶—Diospan tsain mato cunushoni isca huaquin, “Un mato yoi manfin Dios cuscaracoinfoquin,” ishon ato yoini. Diosin yoini cuscaicai tsoan, “Chanirran,” huatiroma. Ascan nan Diosin anori

yoiaino ahuuscain man yoiái “Un Dios chaca huaran,” ishon. Nantofin ua catonshon nai arishon nuno mai ano ua nichiniquin. Ascancunfin un icon yoitiro unfin Diospan Facuquin.

³⁷⁻³⁸ Mancai ua icoinra huaima. Uhuun Upan Diosin aca cuscan un huayamaiton ua icoinra huayamacahuun. Ascfaiaquin uhuun Upa acái cuscan urifi nancasi huaiton ua icoinra huacahuun. Uhuun Upan acái cuscan urifi nancasi un huaiton man tapitiro Uhuun Upa ufu ica. Unrifi uhuun Upa fu un icaran, —ishon Jesús ato yoini. ³⁹ Nicacashon afanan Jesús achipaifiainfoanno atomaquinnoashu caitocai tsoan achinima.

⁴⁰ Atomaquinoashu cai unu Jordán ari cani. Nannoshon Juanpan tau huaquin yorafo unu muran iquimapacuni. Nanno chaimashta Jesús iyoni. Unu cusumunri iyoni. ⁴¹ Ascaino yorafo aqui fucashon. Yoinifo isca huaquin, —Jesús Diosihuunshon ahumamishti noco isma. Juanpacai asca huamisima. Ascfaishon Juanpan Jesushuunoa iconcain. Yoia cuscan nanscain huamisan, —icashu yoinannifo. ⁴² Asca huacanashu nanno yora ichaparasion, —Icon Jesusfin Diospan Facuquin, —icashon icoinra huanifo.

Lázaro nani cuscan

11 ¹⁻² Ascatan nocofunu Lázaro isinin icai. Ahuun pushu Betania ano ini. Nan Lázaro isinin icaiton ahuun poi rafu María yafi iyoa Marta nannori inifo. Nan María Jesusqui motica murannoa ininti sharacapa Jesús tau pumancayan ocatan ahuun foon otucuru aniquin. ³ Nan poi rafutan Jesús tsain fomaquifin, —Ifon, nan min ahuun noiaifin isinin iquiquin, —ishon yoimanifo. ⁴ Jesús nicatan yoiquifin, —Nan Lázaro isinincaicain naimafinquin. Isinin icafin yorafoan

oicaniquin Dios sharacun. Unmain Diospan Facuquin un ahumamishti huaiton tapicashon icoinra huanonfo, —ishon Jesús ato yoini. ⁵ Jesús Lázaro yafi poi rafu atohuun noicoinni. ⁶ Lázaro isinincaiton nicaifai nanno osha rafuyoni. ⁷ Ascaiton —Non Judea ano afanan nasononcahuun, —ishon noco yoini. ⁸ Ascaiton non cumaquin, —Tapimamisiton, nocon niaifofo Judea anoshon ramashta mia rutucuanafa. ¿Ascan ahuuscain min afanan ano capaimun? —ishon non yocainton.

⁹ —Shafatan non oinsharatiro. Farin chashaino non oinsharatiro pacushquima. Nanscarifiai shafatifi uhuun Upa Diosin ua amapaiyai cuscan ua tapimamisi. Ua cushuano un funotiromaquin. Uricai un musutiroma. ¹⁰ Ascafia faquishiano chashamatiyamaino yora pacutiro. Nanscarifiai tsoan Dios fu rafuyamatocai tapisharatiroma ahuscashumain isharatiroquin. Ascai funotiro, —ishon noco yoini.

¹¹ Nannori noco yoitan Jesús afanan yoini isca huaquin, —Nocon yorahuan Lázaro oshafiacun un moimanicain, —huaiton.

¹² Non afu rafumisifoan nicashon non yoiniquin, —Ifon, oshacoianfinquin naama. Chipó cayasharatiroan, —huanifo.

¹³ Man nacoinfiacun, —Osharan, —ato huaiton. Chipó moiran ishon shinannifo. Jesús man arusu onanfiashon ato yoicoinnima.

¹⁴⁻¹⁵ Ascan noco shafacafi yoini, —Lázaro man nacoinfiano un unimaino un ano icama. Ascan man chipó oinquin man fasi ua icoinra huashquin. Ascafia natian non Lázaro ano fononfocahuun, —ishon Jesús noco yoini.

¹⁶ Ascan nicatan Tomás nan rafanacani Jesús fu rafumisi futsan noco yoini, —Non canon. Norifi afu non nannon, —ishon noco yoini.

Jesús fustiton naafo funimatiro nipanonfo

¹⁷ Ascatan Betania ano nococashon Jesús nica man Lázaro naita. Osha rafu non rafuri finoan ini mai huaitafo. Mahua quini muran mai huaitafo ini.

¹⁸ Betania Jerusalén chaima ini. ¹⁹ Nocon caifo Israelifo ichapa María yafi Marta icano funifo aton ointi shinan-masharashopai poi naano. ²⁰ Martan Jesús oaiton nicai aqui nocoicai cani. María pushu muran nichifaini.

²¹ Jesusqui nocotan yoini, —Ifon, min nuno anocai uhuun ushton ua nashocuanitamafinquin. ²² Un tapiafin natianri min ahuara futsa Dios yocaitofin mia ashonrisca huatiroquin, —huaiton. ²³ —Ushtofin afanan funiquin, —huaiton. ²⁴ —Un tapiafi ahuun unutani nan naafo funiaifoannorifi funitiroquin, —huaiton. ²⁵ Ascaiton Jesús cumaquin, —Unfinquin uhuunoashu naafoti funicani. Uhuunoashufin nantifi niafoquin. Nan ua icoinra huaafin nafiashu afanan funiashu ahuuscanacamaquin. ²⁶ Niyoshon ua icoinra huashucaí nanacama. ¿Nan mianmun icoinra huaicai? —huaiton.

²⁷ —Ai, Ifon, unfin mia icoinra huaicai. Minmain Cristocufin Diospan Facu. Nocon caifoan mia manamisi. Nocon shunicaifoanrifi mia manapaonifoquin, —huani.

Lázaro mahua quini muran maia anoashu Jesús uaini

²⁸ Yoitan Martan chipocun María yoicai cani. Nocoquin oian afu rafuafu María fu uaicaifoan oinquin Marta chipocun fusti mushannantan yoiquin, —Nocon tapimamisifin oaquin. Mia yoimana, —ishon yoini. ²⁹ María nicatan funinaca huantan cai aqui nocoriscani. ³⁰ Jesuscai pshurasi

muran nocoatai inima. Nan Marta fu tsaincanoashu oataima ini. ³¹ María fu uaicaifoan oin atofu uaifiain funinaca huatan caiton oincaquin María poi maia anoashu uaiqui cairafain nocon yora Israelifo mufainifo.

³² María Jesusqui nocotan taucopacufoan yoini, —Ifon, min nuno anocai uhuun ushto ua nashocuanitamafinquin. Iscaínofin uhuun ushto ua nishoan icuanaquin, —huaiton. ³³ Jesús María oian uaicaiton nocon caiforifi María fu fucanashu afu uaicaifoan ato oinfin Jesús arifi atohuun ramapaitan ato shinantaquin. ³⁴ Ato yocani, —¿Ranimun man mai huaitanquin? —ato huaiton. Cumacaquin, —Ifon, oinyopon, —huanifo. ³⁵ Oinyopon huaifono, Jesús uaini.

³⁶ Uaicaiton oincaquin nocon caifoan, —¡Oincapon! Lázaro fasi noi ahuunoashu uaiquin, ³⁷ ¿Nan fusho cayahuani cuscarifi huaquimun nunoshon Lázaro cayahuacuanitan? —huanifo.

Jesús Lázaro funimani

³⁸ Ascatan afanan Jesús ahuun ointi muran fasi shinancoinquin maia ano nocotan. Maiano toquirininhuan quini ano nocoshon yoiquin, ³⁹ —Toquiri fupucahuun, —huaiton. Nicaquin poi Marta yoiquin, —Ma, Ifon, manfin osha rafu non rafuri finoanquin a naita. Natianfin man pisiaquin, —huaiton. ⁴⁰ Nicaquin Jesús yoiquin, —¿Un mia yoiaiton min nicamamun? Mian icoinra huafin Diosin ahuara shara tsoan atiroma cuscan huaiton min ointiroquin, —huani. ⁴¹ Ascaiton nicacaquin fupunshonifo. Fupushonafoanno nai foisinifoantan, —Upa, un mia cufia cuscan mian nicai. Un mia aicho huai.

⁴² Un tapiafin mian nicafafainmisiquin. Ascan nuno niafoan mia icoinra huacashofin un mia cufiai

cuscan mia huacaniquin, —Jesús apa cufini.

⁴³ Asca huatan Jesús yoiquin oi ashcafinin, —Lázaro, quini murannoashu funicuruahuun, —huaino. ⁴⁴ Funicurani, —Ahuun rashuafo pucacahuun cainshara curanon —Jesús ato huani.

**Israelifo aton niaiffoan
Jesús rutupainifo**

Mt 26.1-5; Mr 14.1-2; Lc 22.1-2

⁴⁵ Ascaiton a nocon caifo María fu rafuafoan oincaquifin Jesús icoinra huanifoquin. ⁴⁶ Ascaiton oincanifin atirifi Fariseoqui chani focani fonifoquin. ⁴⁷ Ascaiton nicacashufin Fariseofo yafi nocon yorafohuunshon Dios cufimisi niaiffo ichanannifoquin. Ichanancashon yoicaquifin, —¿Nonmun ahuusca huaicai? Jesús tsoan atiroma cuscara ahuafo huaquin. ⁴⁸ Non ahuuscara huaiyamafin nantififain icoinra huacaniquin. Ascano Romanonfoan noco asca huatirofo. “Mancai afanan niaiffoya itiromaran,” ishon noco yoitiro. Nocon ichananti pushuri paon huatiro, —nocon caifo Israelifo niaifo inifo.

⁴⁹ Ascaiton nocon yorafohuunshon Dios cufimisi niaifocoinchi Caifás ato yoiquin, —Mancai ahua tapiamafinquin. ⁵⁰ ¿Man tapiamamun na nocofunu fusti nocon yorafohuunoashu naashquin? Nancaifin sharaquin. Arus fusti nashquin tsoashtamaquian, —ishon yoini. Ascacufin Caifás inon pacoai cuscan yoiniquin. ⁵¹ Caifás yoiquicai afin shinanfain yoinima. Diosin ahuan shinanpan shinanmanainofin yoiniquin. Nocon yorafohuunshon Dios cufimisi niaifocoinchi Diosin ahuan shinanpan shinanmana Jesús nantifi ahuan caifohuunoashu nanonpacoiran, ishon yoini. ⁵² Jesuscai nocon caifo fustihuunoashu naimafinquin. Nantifi manifotichin icoinra huafohuunoashufin noco

naashoshquiquin. Ascano nantifi Diosin facu inonfo. Noinancoincani. Nan yora fusti cuscara ishcaquin. ⁵³ Nan Lázaro funiatianfin shinanquin tau huanifoquin, —¿Ahuuscashomain non Jesús rututiroquin? —icashon nanscasi huaquin shinanriapaonifo.

⁵⁴ Rutupaiyafoan tapiashu Jesús afanan nocon caifo ichapafico cano cayonima. Yorahuanrasi ano catamarocon pushu fustirasi ano cano. Nan pushu fustirasi Jerusalén chaimashta ahuan anu Efraín. Nanno non afu rafumisi.

⁵⁵ Nocon caifo Israelifo nocon fustitin shafatan Diospan oinmati nan afu nai muran imisiton nocon shunifoan aton furonanfacufo iyoafofosi finonmani shinanshcaquin nocoti chaima. Nantianri yora ichapafopushurasi ano chai icanashu Jerusalén ano funifo. Jerusalén anoafu Moisés aton shunifo yononi cuscan atorifi huamapai aton chaca soamapai ichananti pushu muran iquinifo.

⁵⁶ Ascaifoanno nocon caifo niaiffoan Jesús funanifo. Dios fu tsainti pushu ano chifi niafo yocananannifo, —¿Ranimun Jesús? ¿Man shinanmun nocon fustitin Jerusalén ano oimamun? —ishon yocanonannifo. ⁵⁷ Asca huacanashu nocon yorafohuunshon Dios cufimisi niaiffo yafi Fariseofoanri ato yononi isca huaquin, —Jesús fuchishon noco tapimacahuun non achinon cunu muran iquimashquin, —ishon ato yononi.

**Ainfoan Jesús shinanquin inintin
shara ahuan tau pumancaya ocani**

Mt 26.6-13; Mr 14.3-9

12 Ascano seis osha fustitin nocoti chaima Jesús no fu Betania ano cayoni. Nanno Lázaro ica ini. Nan Lázaro naacun Jesús funimani. ² Naannoshon Jesús pimapaiquin tushu pichashon-

ifo. Ascan Lázarorifi nanno atofu ini. Marta ato pimani. ³Piaifono María Jesusqui oano ahuun ininti shara moticaquinoa Jesús ahuun tau pumancaya ocani. Ocashon ahuun foon otucurani. Asca huaiton nan pushu murannofoan nan ininti sharacoin shutunifo.

⁴Ascan Jesús afu rafumisi futsan nan Judas Iscariote nan Simonpan facu nanton chipo Jesús achimashquin yoini, ⁵—¡Cuu! ¿Ahuuscaquimun na ainfoan ininti shara potaquin? Ahuun rafanan pui ichapa fishon noco inancun ahuomafo non inancuana. Ascan shara icuanaran, —ishon Judaspan yoini. ⁶Anori shinanfiaquicai ahuuomafo shinancoinima. Afi yomutso iniquin. Nocon pui nanuti cushupaoni. Cushucoinpaonima. Ahuara fipaiquin nannoa pui onupaoni.

⁷Ascano Jesús Judas yoini, —María fucash huayamahuu. Un samamashta nai tapishon uqui ininti ocaquin. ⁸Nan yora ahuuomafo matofu ipanaca. Ascacufin ato afanan inansharatiroquin. Ucai matofu nuno mai ano ipanacama. Ascaiton María natian ua shara huaran, —ishon Jesús yoini.

Nocon caifo nocon niaifofeoan Lázaro rutupainifo

⁹Ascano Jesús nicafuracani nocon caifo Israelifo ichapa aqui funifo. Lázaro funia nicacani yora ichapa aqui funifo. Jesús fusti oinpaicanimaquian Lázaro nacoinfiacun Jesús funimana oinpaicani funifo. ¹⁰⁻¹¹Lázaro huunooa nicacaquin nocon caifo ichapafoan afanan nocon yorafuunshon Dios cufimisi niaifofeo tanatama Jesús fusti icoinra huanifo. Ascaino nocon niaifofeo yoinannifo, —Nan rafu non rutunon. Jesús fusti-maquian. Lázarori non rutunon, —icashu yoinannifo.

Jesús Jerusalén ano nocotoshiniquin

Mt 21.1-11; Mr 11.1-11; Lc 19.28-40

¹²Man ascano iyoconaino nocon caifofo nocon fusititian yorahuanrasi Jerusalén ano inifo. Jesusrifi nocoaiton nicacani aqui funifo. ¹³Upufu ya aqui fucaquin oi ashcafinin isca huanifo, ¡Aicho! Nocon Numamisi oiquin. Nonfin Israelifoquin. Minfin nocon niaifofeoquin. Nocon Ifo Diosin mia nocoqui nichini. Min fasi sharacoin. Upa Diosin mia shara huapapainonran ishon yoinifoquin. ¹⁴⁻¹⁵Nannori yoiainfono Jesús burro cahuashara camaqui tsaoinacahuatan cani. Diosin tsain yoini cuscaín iscani,

“Jerusalén ano icafoan ratuyamacahuun. Maton Niaifo matoqui oshquiquin. Burro cahuashara camaqui matoqui oshquiran,” ishon cunuyoni cuscan.

¹⁶Nantian nanfohuunooa oinfiaquicai icai cuscan non tapiyonima. Chipo Jesús afanan Apa ari nai muran cani afu niaifocoin iquicai non shinanni isca huaquin, —Jesús mai anoshon amisi cuscan nannoricoin Diosin tsain ahuunooa cunuyonifo. Nocon shunifoan Jesús caintaima inonpacoai cuscan aqui cunuyoniforan, —ishon nocon nomuran non Jesús shinanni.

¹⁷Jesús Jerusalén ano nocoaiton nicacaquin nantianri yorahuanrasifoan a mananifo oinpaicaquin. Atirifoan Jesús Lázaro naafiácun funimanaiton oiniffo. Oincanifin futsafoqui chaninifoquin arifi oinnonfo. ¹⁸Nocofunu man nacoinfiacun funimana nicacaquin nanfoanri oinpainifo. Ascashon fai anoshon Jesús mananifo. ¹⁹Ascano Fariseofo aqui yoinannifo, —¡Cuu! ¡Shinancapon! Noncai ahuusca huatiroma Jesús isca huanonma. Tsoancai noco nicapaicanima. Nantifi yorafoan Jesús nicapaicaniran, —icanashu yoinannifo.

**Jesús inon pacoi cuscan
yoiyoni isca huaquin, —Ua
rutushquicaniran, —ishon yoini**

²⁰ Nantianri Jerusalén ano yorahuan-rasi muran nocon caifomafori nocon yora futsafo fusitin ano funifo. ²¹ Nocoatan Felipe ano fonifo yocain focani. Nan Felipe Galilea mai ano nan pushurasi ahuun anu Betsaida anoashu cainni. —Non Jesús fu tsainpai. Noco ihuushohuun non afu tsainon, —ishon Felipe yoinifo. ²² Nicashon yoiafo cuscan Andrés tapimani. Ascan nan rafutan Jesús yoinifo.

^{23–24} Nicaquin Jesús ato yoini, —Unfin samamashta uhuun Upa Diosin nai muran icano un caicain afu niaifo iqui cai. Ascanfia uhuun Upa ari cataima un yorafotihuunoashu un nayoshqui. Isca huaquin un mato tapimashquin man tapinon. Shuqui furo fusti non fanayamacai foatiroma. Ascatamarocon nan shuqui furo fusti fanano ahuunoashu furo shara ranan caintiro. Nanscarifiai un matohuunoashu nayamacai tsoa futsa un nimapacutiroma. Urus fusti un nipatiro. ²⁵ Tsoan iscatiro “Diosin ua imapaiyai cuscacai un apaima. Ufi apaiyai cuscan fustifin un shinaincani,” ishon anori shinanshu funocointiro. Ascafia tsoan isca huaquin shinain, “Un nuno mai ano niyoshon ufi apaiyai cuscan un shinanpaitamarocon Diosin ua imapaiyai cuscan fusti un shinanpairan,” ishon yoitan Upa Dios fu ipasharatiro.

²⁶ Ascan tsoa uhuunoa yonomisi ipaiqui uhuun tsain nicacointan un yoia cuscan huatiro. Ua tanashu un icano arifi nannori ufu ipatiroquin. Uhuun yonomisi un yonoa cuscan ua ashoinquin Uhuun Upa Diosin futsafo aton ointaifi ahuunoa yoishquin isca huaquin, “¡Aicho! Min uhuun Facu Jesús nicamisi sharacoin. Min shara

huamisiran,” ishon Upa Diosin ahuunoa yoisharatiro.

Jesús rutushquiaifo cuscan yoini

²⁷ ¡Ohua! Natian uhuun nomuran un fasi omitsiscai. ¿Un raquiri huatiromun? Ucai yoitiroma isca huaquin, “Upan, ua numahuu un natian omitsiscanonma,” ishoncai un anori yoitiroma. Upa Diosin ua nichini un natian ato omitsiscashonon. ²⁸ Upan, Uhuunshon ato oinmahuu min fasi shara, —ishon Jesús yoini.

Yoiaiton nai muranshon oi ashcafinin Apa Diosin cumani, —Un minhuunshon un ato ismafafaini un shara. Nanscarifi un afanan huai, —ishon yoini. ²⁹ Nan yorahuanrasi nannoshon nicacani atirifoan yoinifo, —Man turuicaran, —inifo. Atirifoanri yoinifo, —Upan Diosin ahuun oinmati afu nai muran icaton Jesús yoiaran, —ishon yoinifo.

³⁰ Ascan Jesús ato yoini, —Nan oi nai murannoa man rama nicaicain ua tapimanama matofin nicamapaaquin.

³¹ Natian nan icoinra huamafoti Diosin ato onaintimaicoinni. Aton ifonri nan yoshin chaca Satanás arifi nantiantari Diosin potashquin afanan aton niaifo inonma. ³² Ascafian ihui coyan iquinanqui ua mastashon uaya finifoanshcani. Nanhuunshon un nantifi yorafo uqui omashquin, —ishon ato yoini. ³³ Nannori ato yoini ahuuscashumain nashquicai tapinonfo.

³⁴ Nicacashon yorahuanrasifoan nanno nishon yoinifo, —Diosin tsain cununi cuscan noco yoimisi isca huaquin, “Cristo, nan Diosin catoanfin nipanacaquin. Nanacamaran. Ascacufin ahuuscashomain, Diospan Facu ihui coyan iquinanqui uaya finifoanshcanicain,” min noco huaran. Tsohuunnoamun min yoicain, —ishon yoinifo.

³⁵ Jesús ato yoiquin, —Uncai mato chashamashoriaima. Un mato yoia cuscan nicasharacahuun funoshcaquima. Chashamati yamaino faquish itiro yora funonon. Tsoa faquish muran caquin fai funomatiro. Rani caimancai tapitiroma. ³⁶ Un matofu icano ua icoinra huacahuun funoshcaquima. Man ua icoinra huacan un mato chashamashotiro man shafacafi inon. Unfin chashamati cuscaraquin. Ua tanashon manrifi futsafo chashamashotiro matohuunshon uari tananonfo, —ishon Jesús ato yoini. Ahuun tsain yoiqui anaititan atomaquinoashu cani. Ascaitocai afanan oinnifoma.

Israelifoa Jesús icoinra huanifoma

³⁷ Jesús aton ointaifi yoran atiroma cuscan ato oinmfiacun tsoan icoinra huanifoma nan Diospan Facucoinfiacun. ³⁸ Nannori Isafás atohuunoa inonpacoai cuscan yoiyoni isca huaquin, “Ifon, non min tsain ato yoifiainocai tsoan noco icoinra huama. Yoran atiroma cuscan min ato ismfiacun tsoamun mia icoinra huaiquin,” ishon Isafás inonpacoai cuscan cunuyoniquin. ³⁹ Diosin ato yoipaoni cuscan nicacasmanifo. Ascashon icoinra huapainifoma. Ascacufin afanan atohuunoa inonpacoai cuscan cunuyoni isca huaquin.

⁴⁰ “Icoira huayamaifoa Upa Diosin fusho ointsa ato imapacushquin. Diosin tsain iconcoin oinfiacashon icoinra huaiyamaifoa Diosin aton shinantimahuatani shinansharanonfoma. Diosin tsain oinfiacaquin oianma shinantsacani. Nicafiacanashon shinansharatirofoma taphischaquin. ‘Muafo aton chaca shatucasmacani uqui funonfo un ato cainmasharanon,’ ishon Diosin yoini.”

Nannori Jesushuunoa Isafás inaca cuscan cunushoni. ⁴¹ Jesús fasi sharacoin inon pacoai cuscan Isafás oinquin tau huani. Ascacufin nannori ahuunoa yoiyoni.

⁴²⁻⁴³ Nocon caifo Israeli niaifofa atirifoa Jesús icoinra huayamaifoa atirifoa icoinra huanifo. Icoira huafiacani Fariseofoku musunifo. Fariseofoa yoinifo, —Tsoan Jesús icoinra huaicai nocon ichananti pushu muran afanan iquitiromaran, —ishon yoinifo. —¡Ohua! Jesús icoinra huaran non icaiton nocon ichananti pushu muranshon noco potashceni afanan atofu non ichananonma, —ishon yoinifo. Ratucoinnifo. Ascacuncai non Jesús icoinra huaran inifoma. Upa Dios ato yoishara icai fuchipaitama atohuunoasi fuchipainifo.

Jesús ahuun tsainhuunshon yorafoti tapimatiro chaca huayamaraquinmain shara huaquin

⁴⁴ Ascatan Jesús oi ashcafinin ato yoiquin isca huani, —Tsoan ua icoinra huaquin nan ua nichiniri man icoinra huatiro. ⁴⁵ Nanscarifi aquin ua oinfain nan ua nichiniri man oian. ⁴⁶ Nuno mai ano faquishihuan cuscara. Ascacufin Uhuun Upa Dios icanoashu un nuno mai ano oniquin chashamati cuscara iquiyoi. Ascan un mai ano oni afanan yorafoan chaca huafafaintamarocon ua icoinra huashon Upa Dios tanasharanonfo shafacafi icoisharashcaquin.

⁴⁷ Tsoan uhuun tsain nicafiaquicai un yoia cuscan aima uncai ato onaintimaima. Un mai ano oni yorafo onaintimatamarocon ato numaiyoi un oni. ⁴⁸ Ascafiaicai tsoan ua ifo huapaimisima uhuun tsainri nicacasmaquin nanscarafo onaintimaitian Upa Diosin ato yoipacushquin isca huaquin, “Min niyoshon uhuun Facun ahuun tsain min nicacasmamisi. Min omitsiscapanacafo

muran ipanacaquin,” ishon yoishquin. ⁴⁹Uhuun Upa Diosin ua yonoa cuscan nannoricoin un mato yoimisiquin. Ufi shinanfaincai un mato yoima uhuun Upa Diosin ua shinanmanai cuscan un mato yoimisiquin. ⁵⁰Mun tapian Upa Diosin yonoa cuscan icoinra huashu man nipatiro. Ascacufin un mato yoimisi cuscan uhuun Upa Diosin, “Nannori ato yoihuu,” ua huamisi, —ishon Jesús ato yoini.

Jesús afu rafumisifo ochonpacuni

13 Diosin oinmati nan afu nai muran icaton nocon shunifoan aton facu iyoafofosi finonmani ato rutunonma nan fusitin chaima. Jesús onanni iyoonaino rutuaifo. Mai anoashu Apa ari caanon. Non afu rafumisifo nuno mai ano niyoshon noco noiyoapaoni cuscan natian noco isma nocohuun noi finacoinquin.

²Jesús futan non afu rafumisifoan fari caino non pini. Non piataima Satanás yoshin chaca Simón futsan ahuun facu Judas Iscariote ahuun nomuran yoini isca huaquin, —Ato tapimahuu ahuuscashomain Jesús achitirofoquin, —ishon ahuun nomuran yononi. ³Ascatan Upa Diosin ahuun Furun yoini, —Nantio nai murannoa non mai anoafori min ato yonotiro. Min ato iforan, —ishon Upa Diosin yoini cuscan Jesús tapiyoni. Upa Dios ariashu oni afananri aqui nasoshquin nanri tapiyoni. ⁴Ascacufin piquin anaititan Jesús funinaca huan ahuun sahuuti pucatan ahuun turuitinin piracomuni. ⁵Ascatan unu tasoqui manushon non afu rafumisifo noco ochonpacushquin. Ochontan ahuun turuiti piracomuaton noco otucuruapani. ⁶Ascatan Pedrori apaiyaiton, —¿Ifon, ahuuscain min uhuun Ifofiaшон mian ochonpaiyain? —huaiton.

⁷—Un mato acai cuscan natian min tapiama. Ascafia min chipo tapishquin, —huaiton.

⁸—Ma, Ifon. Miancai ochonpacunacama, —huaiton. —Un mia ochonyamainocai min ufu rafutiroma, —huaiton.

⁹—Ascaiton, Ifon tauquisimaquian ua muchofain ua machonhuun, —huaiton.

¹⁰—Rama yora nashia ahuun tau fusti non ochotiro. Mantsi chostanayamacun. Ahuun caya afanan chostanama. Nantificai man choshtama. Ascafiahuu atifincoinmaquian, —ishon Jesús noco yoini. ¹¹Mantsi tapiamashon ratotomain achi mashquicain. Ascacun nannori noco yoini.

¹²Man noco ochopacutan nasocain ahuun sahuuti sahuuni. Sahuutan afanan tsaoti camaqui tsaoni. Ascashon noco yoini, —¿Man man tapiamun un mato ashoan cuscan?

¹³“Tapimamisiton,” huafain “Uhuun Ifon man ua huaaquin.” Iconquiquian. Unmainquifin. ¹⁴Ascatan unmain maton Ifocain maton tapimamisishofin unmain mato iquinshofin. Ascashon un mato ochopacua maton oinmati cuscara iishquin. Ascan un mato ochonpacua cuscari mafi ranan oinmati cuscara huaa tananshu ochononancahuun.

¹⁵Un mato oinmana un aca cuscari marifi man anon. Ua cuscara icahuun. ¹⁶Un mato icon yoi. Yonomisitocai ahuun ifo finontiro. Nanscarifiai futsan futsa nichian ahuun tsain ato tapimashonon. Nan tsain fomisitoncai nichimisi finontiro. ¹⁷Un aca cuscan man man tapia. Ascan man man tapia cuscan aaquin unimacointiroquin.

¹⁸Uncai nantifi matohuunoa yoima. Un tapian ahuutimain un catoanquin. Ascafiaacun Diosin tsain yoia cuscacon non icoinra huatiro.

“Nuno u futan piyai futsan ua chaca huaashquin.”

¹⁹Icataima un mato yoiyomisi. Ahuutiaran icai cuscan un mato yoiyomisi. Chipó icai cuscan un Cristo Diospan Facu man icoinra huanon. ²⁰Un mato icon yoi. Nan un nichian uhuun tsain ato yoinon. Nanrifi icoinra huashofin uarifi man icoinra huatiroquin. Ascatari ua icoinra huashofin un nichiarí man icoinra huaicai, —ishon Jesús ato yoini.

**Jesús Judaspan ato
achimashquiai cuscan ato yoini**

Mt 26.20-25; Mr 14.17-21; Lc 22.21-23

²¹⁻²²Yoiquin anaititan Jesús fasi afiri shinanmucoinni. Ascashon fasi shafacafi nichifain noco yoini, —Un mato iconcoin yoi. Ratoran man futsafin ua ato achimashquiquin, —icaiton nicaquin non oiancufainni nofi ranan fuuisinan acufainni. Tapitsi non huaashu. ²³Unquian afu potasinanshu tsoan. Fasi uhuun noicoian. ²⁴Ascaiton Pedronun oi nomashta ua yoini. —Tsoanmain achimashquicain yocahuun, —ua huani. ²⁵Ascaiton aqui tasicain un yocani, —¿Ifon, tsohuunoa min yoimun? —ishon un yocaiton.

²⁶Jesús ua cumani, —Nan misi torushtan pocotan un futsa inaintonfin man tapicain nantofin ua ato achimashquiquin, —ishon ua yoini. Ascano nansacoin huaquin Simón futsan ahuun facu Judas Iscariote inanni. ²⁷Inantanaino Judashuun yoshin chaca Satanás nuuriscatani. Ascaiton Jesús Judas yoini, —Nan min acai cuscan ariscahuu, —huani.

²⁸Non tsaoshon piairananuncai non tapinima ahuuscain huaacanicain. ²⁹Ascaiton atirifoan shinannifo Jesús Judas nichian shafain fustitian non yopai cuscan fiicaishafain. Atirifoanri shinannifo Jesús ahuuomafo yopai cuscan ato inantahuun huaashafain non ini. Nan Judasfin pui cushumisi iniquin. ³⁰Nan Jesús misi pocotan

Judas inantapaiyaino funinaca huan caicainni. Man yamuaino.

Tsain funa shara noco yononi cuscan

³¹⁻³²Ascatan nomaquinoashu man caano Jesús noco yoini, —Un naitian Upa Diosin mato ismai unmain ahuun Facu sharacun. Un acaiton man oian cuscan Upa Dios fasi shararan huashcaini. Samamashta Upanri ato tapimai unmain ahuun Facu sharacufin. Unmain a cuscaracoincunfin.

³³Uhuun facufoan uncai nuno matofu iqui chaima. Man ua funashquin. Un noco caifo Israelifo yoia cuscan natian un matori yoi un cai aricai man catiroma. ³⁴Tsain funa futsa un mato yocain, “Noinancahuun. Nan un matohuun noiai cuscari huafain marifi noinancahuun.” ³⁵Man noinainno nantifi yorafoan tapitiro man ufu rafuaiton man uhuunshon tapishara, —Jesús noco huani.

**Pedronun, —Un Jesús oinmisimaran,
—ishquiai cuscan Jesús yoini**

Mt 26.31-35; Mr 14.27-31; Lc 22.31-34

³⁶Ascaiton Pedronun yocani, —¿Ifon, raqui min caimun? —yocaiton. Yoiquin, —Uncai aricai natian min ufu cayotiroma. Chipó min ua mufaintiro, —huaiton. ³⁷—¿Ahuuscain natian un mifu catiromamun, Ifon? Natianfin mun itisharaquin mihuunoashu naashquin, —huaiton.

³⁸—¿Iconmun min itishara uhuunoashu naashquin? Iconquin un mia yoi. Na yamu tacaranun acataima, “Uncai Jesús oinmisimaran,” ishon min ato yoiquin rafu non fusti huairan, —ishon Jesús yoini.

**Jesusfin fai cuscaraquin.
Nan fustihuunoashu non
Upa Dios ari nocotiroquin**

14—Maton ointi fucashniyamacahuun. Upa Dios icoinra huafain

uarifi icoindra huacahuun. ²Uhuun Upa icanofin cunu ichaparasiquin. Un mato itishara huashoin caicain. Ascarayamacucain un mato yoicuanama. ³Cayoshon un mato itishara huashoicaicain. Itishara huatani un afanan matoqui nasoshquin un icano mato ihuiyoi. Ari ufu man ipanon. ⁴Man manfin un cai ari fai tapiaquin, —ato huaiton.

⁵Ascaiton Tomás cumani, —Ifon, non-cai a min cai ari fai tapiamafinquin. ¿Ahuuscashomun non tapitiroquin? —huaiton.

⁶Ascaiton Jesús cumani, —Unfin na faiquin. Unfin iconmisiquin. Uhuunoashufin yorafo nipatirofoquin. Tsoacai afi uhuun Upa icano nocotiroma. Uhuunoashu fustifin uhuun Upa ari nocotirofoquin. ⁷Ua onancoinshofin uhuun Upari man onantiroquin. Natian non chipori man uhuun Upa onancoin cai. Nan ua oinquin man uhuun Upa oianri man huacain, —huaiton.

⁸Ascaiton Felipe cumani, —Ifon, noco Upan Dios ismapun. Min noco Upa Dios ismaino non unimacointiro, —huaiton.

⁹Ascaiton Jesús cumani, —Felipen, Un fasi matofu ipaifiamisicun. ¿Ahuuscain mian onanyomisimamun? Nan tsoan ua oinquin uhuun Upari oinquin. ¿Ahuuscain ua “Upa oinmahuu” mian huaimun? ¹⁰Un uhuun Upa fu imisi. Non fusti cuscaroquin. ¿Nan min icoindra huaimamun? Un mato yoiai cuscaai uhuunoacoin un mato yoima. Uhuun Upahuunoafin un mato yoicain. Nai arishon Upa Diosin mai ano apaiyai cuscafin ua huamaquin. ¹¹Un mato yoi uhuun Upa fu rafuaino urifi uhuun Upa fu un rafumisiquin. Ua icoindra huacahuun. Uhuun tsaincoin icoindra huayamaquima. Un acaiton man oian cuscan ua icoindra huacahuun.

¹²Iconquin un mato yoi. Tsoan ua icoindra huashon un acai cuscan arifi huashquin. Uhuun Upa ari un caiyoano. Ascacufin un aca cuscan finonmacaifain ashquicani. ¹³Ahuara uhuun anuhuunshon Uhuun Upa man yocaiton un mato ashotiro. Ascaiton yorafoan “Upa Dios shararan,” huanonfo. ¹⁴Ahuara futsa uhuun anuhuunshon man yocaiton un mato ashotiro.

**—Upa Diosin ahuun Yoshin Shara
un matoqui nichishquin,
—ishon Jesús ato yoini**

¹⁵Ua noifin un mato yonoai cuscan man aicai ^{16–17}Un Upa Dios yocain mato futsan nichishonon maton ointi fucash huanonma man isharanon. Maton tapimamisi inon. Amain Diosin Yoshin Sharashofin. Aafin iconmisiquin. Mato fu ipashquin. Icoindra huafoanmacai a onantirofoma. Ascarifi atacai ahuamain huaincai tapitirofoma. Ascan manfin onanmisiquin mato fumain icufin. Ascatai maton nomuran matofu rafui.

¹⁸Uncai matomaqui iquima. Un mato potacoinma. Un matoqui afanan nasoshquin. ¹⁹Un nuno iqui chaima. Ua icoindra huafoa ua oinyoshcanima. Ascan manfin ua oinshquicai. Nan un nipaño marifi man nipanaca. ²⁰Un funiaiton man tapitiro unmain Upa Dios fu ipanacacufin. Ascarifi atan marifi man ufu icaquin. Urifi un matofu icaino. ²¹Un mato yonoa cuscan ua nicacoinshonfin ua fasi noicoquin. Ua noicoiaiton uhuun Upari ahuun noi. Ascaino urifi un ahuun noi. Un shinain cuscan u ato tapimairan, —ishon Jesús noco yoini.

²²Ascaiton Judas futsan Iscariotemaquian yoini, —¿Ifon, ahuuscain mia icoindra huafoa min shinain cuscan yoitama noco fusti min tapimai? —ishon yocaiton.

²³ Jesús cumani, —Tsoan ua noi un mato yosiain cuscan ua nicacointiro. Uhuun Upa ahuun noiaino urifi un ahuun noi. Non afu rafupacushquin. ²⁴Ua noiamacai un yosian cuscan ua nicaima. Na tsainfo man nicaicain uhu-unacoinma. Uhuun Upan tsain un mato yoi.

²⁵ Un matomaqui cataima un mato yoiyofafaini. ²⁶Ascan Upan Diosin ahuun Yoshin Shara uhuunshon matoqui nichu mato futan afain maton ointi fucash huanonma man ishara. Nantifi un mato tapimafain un mato yoiai cuscan un mato shinanmai man ointiaquimanonma.

²⁷ Un matomaquinoashu cafiacquin un maton ointi mato unimamashquin man isharonon. Icoinra huafoanmacai maton ointi mato unimamatiroma mato imasharonon. Mato anori yoifiaquin ipaitsi mato yoi. Uncai ato cuscarama un mato icon yoi. Ascacun shinanchacayamafain ratuyamacahuun.

²⁸ Un mato yoia cuscan man man nica, “Un matomaquinoashu caicain. Ascafiashu un afanan matoqui ooshquin.” Ua noicoianshu man uqui unimatiro umain Upa ari caiton. Upanmain ua fasi finoncoincufin. ²⁹Nan un mato rama yoia cuscacoin aiton man icoinra huatiro. Ascacun un mato yoiyomisi. ³⁰Yoshin chacafoan aton niaifo Satanás uqui oi. Ofiashocai ua iquintiroma. Ascacun un matomaquinoashu cai. Afanan un mato yoiquin chai huaima. ³¹Un Upa Diosin fasi noicoi ascacun nan ua yoia cuscan un acoinmisi. Ascaiton nantiffain tapicani un fasi ahuun noiaiton. Funicahuun. Nunoashu non canon, —ishon Jesús noco yoini.

**Jesús nan fimi ahuun anu
uva ahuun caya cuscaracoin**

15—Unfin fana uva ahuun caya cuscaracoinquin. Uhuun Upafin

uva fana ahuun Ifo cuscaracoinquin. ²Manfin uva ahuun poyan futsan cuscarafuquin. Rato poya futsanmain fimiofaquin Uhuun Upa nanfo poshtushon potashquin. Ascafia poyan futsa fimiafo aton tushpa futsafo chacamishti poshtutiro poyan sharafo mutininon fimi sharashquin. ³Nanscarifi aquin manfin uhuun tsain nicaquin maton chaca potaquin isharashcaquin. ⁴Umaquin pashcayamacahuun. Nan un matofu ica cuscariai. Poyan fustisicai fimitiroma ahuun cayamaisi. Nanscarifiai umaqui icashucai un mato imapaiyai cuscan man atiroma.

⁵Unfin nan fana ahuun caya cuscaracoinquin. Ascan manfin ahuun poyanofu cuscarafuquin. Tsoa ufu rafucoincacainaino urifi un afu rafucoiaino ua cuscaracoinri itiro. Ua maisicai marusu man ahuuscatiroma. ⁶Ahuun poyan futsa chaca fimiofa poshtushon potashquin tsasinon. Tsasicun poyafo icha huatiro coashquin. Nanscarifiai tsoa ufu rafutamama umaquin icun nanscarafu chipo icha huashon chi urumanhuan muran ato potashquin. ⁷Man ufu rafucoinshon uhuun tsain maton nomuran shinanfainquin man ahuarashta cufia cuscan Upa Diosin mato ashotiro. ⁸Un mato imapaiyai cuscan man afafainnifin man ufu rafumisi itiroquin. Man ascaitonfin mato ointirofoquin Upa Diosimain sharacoincunfin.

⁹⁻¹⁰Uhuun Upa Diosin ua noicoian cuscan nanscarifi huaquin un matoahuun noi. Nan shinanfafaicahuun. Unuyamacahuun. Uhuun Upa Diosin ua yonoo cuscan un amisi. Ascan ua noia cuscan un shinanfafaini. Nanscarifiai un mato yonoo cuscan man aiquin un mato noiaiton man shinanfafaifitiro. ¹¹Un mato yoia cuscan man aino un matoqui unimatiro. Marifi fasi man unimacointiro. ¹²Isca huaquin un mato yonoi, “Un

matohuun noiai cuscan noinancahuun.”
¹³Tsoan afu rafua futsan noicoifin ahu-
 unoashu natiroquin. A noiai cuscacai
 tsoan finontiroma. ¹⁴Un mato yonoai
 cuscan man aifin ufu rafumisi man
 itiroquin.

¹⁵Nan ufu rafuafosi un shinain cus-
 can un ato tapimatiro. Manfin ufu ra-
 fumisiquin. Ascan nantifi uhuun Upan
 ua yoimisi cuscan un matori tapi-
 mana. Ascacucacai man afanan uhuun
 oinmatiforan un mato huaima. Man
 ufu rafumisiran un mato huashquicain.
¹⁶Man ua catonyamafiaiton ufi un
 mato catoan ua cuscara man inon
 matohuunshon futsafoanri ua icoinra
 huanonfo. Nanfoan ua tanapacunacafo
 ufu ipashcaquin. Asca huaino man
 ahuarashta Upa Dios uhuun anuhuun-
 shon yocaiton mato ashotiro. ¹⁷Afanan
 un mato yononon. Noinancahuun.

Icoindra huamafoan Jesús fu rafumisifo noicasmacani

¹⁸Icoindra huamafoan mato noicas-
 mafoan shinancahuun. Uacaifin noicas-
 maquin tau huanifoquin. ¹⁹Marifi man
 ua icoinra huayamaiton matori noicua-
 nafo. Afi ranan noinanfo cuscan ma-
 tori noicuanafa. Ascafiacai man ato cus-
 carama. Un mato catonni icoinra huama
 cuscarafa man inonma. Ascacun icoinra
 huamafoan mato noicasmacani.

²⁰Un mato yoia cuscan shi-
 nancahuun. Un mato yoia isca
 huaquin, “Yonomisitocai ahuun ifo
 finonmatiro.” Ua omitsiscamaquin
 matori omitsisca huashquicani. Un ato
 yosian cuscan acashon marifi man
 ato yosiaiton matori nicacoincani.
²¹Man ua tanaiton ua amisifo cuscan
 matorifi huashceni. Upa Diosin ua
 nichifianicai tsoan onancoinmisima.
 Ascan matori asca huashceni. ²²Un
 atoqui oyamani Diosin tsain un ato
 yoiaino tapicuanafoma. Ascan

chaca huafiaquicai tapicuanafoma.
 Tapiyamaifoannocai atohuun nuama.
 Ascafiacun un oni un ato Diosin
 tsain yoishquin. Ascacucacai natian
 tsoan yoitiroma isca huaquin, “Uncai
 nicataima. Ascacun un chaca huama,”
 ishoncai anori icon yoitirofoma.
 Man nicafiamisishaquin aton chaca
 shatuafoama. Ascan aton chaca atohuun
 nua.

²³Tsoan ua noicasmái uhuun Upari
 noicasmái. ²⁴Diosihuunshon tsoa futsan
 atiroma cuscan un ato ismamisí. Ascafi-
 acai aton chaca shatuafoama. Un ato is-
 mayamaino aton chaca atohuun nuu-
 cuanama. Tsoa futsan atiroma cuscan
 un ato ismafafaini. Man oinfiacashon
 ua noicasmafain uhuun Upari noicas-
 mafo. ²⁵Diosin tsain cununi cuscan mun
 acoinna. Diosin tsain uhuunoa cununi
 isca huaquin,
 “Un ahua chaca huayamafiaicun ua
 noicasmacaniran,”
 ishon uhuunoa cununi.

²⁶Matori noicasmafiaifoan uhuun Upa
 Diosin arishon ahuun Yoshin Shara ma-
 toqui nichishquin. Nanton maton ointi
 unimamatiro isharashcaquin. Afin icon-
 misiquin. Uhuunoa mato yoishquin.
²⁷Un aton Diosin tsain yoiqui tau huani-
 tian marifi man ufu imisiquin. Ascashon-
 fin marifi uhuunoa nantishon tapiquin
 man ato yoitiroquin, —ishon Jesús
 yoini.

16 Ascano Jesús noco yoini isca
 huaquin, —Man omitsiscataima
 un mato yoiyoa man nunori
 shinanonma. “¿Ahuuscaimun Jesús
 uhuun Numamisifiano un omitsiscaí?”
 ishon man anori shinanquin man ua
 potapaishquin afanancai man ua icoinra
 huashquima. ²Tapicahuun. Maton
 caifo nan ua icoinra huamafoan chipo
 yonoi man nocon ichananti pushu
 muran afanan iquinonma. Un mato icon
 yoinon. Chipo amaquiri shinancani

isca huaquin, “Diosin apaiyai cuscan non huashonon. Non Jesús icoinra huafo rutunon,” ishon anori shinancani. ³Uhuun Upa onanyamafain uarifi onancoianfoma. Ascacun mato asca huashcani.

⁴Man ua tanaquin tau huanitiancai man chipo omitsiscashquiran un mato huanima. Un matofu iyofiashocai un mato yoiyonima. Natian un matomaqui caiyoicai. Ascan man omitsiscaitian un mato yoiyomisi cuscan huaquin man shinantaniran, —ishon Jesús noco yoini.

Diosin Yoshin Sharapan acai cuscan

⁵Afanan Jesús noco yoini isca huaquin, —Uhuun Upan ua nichini. Natian un afanan aqui caicain. Ascafiacai man ratoran futsan ua yocama, “¿Min raqui caimun?” man huama. ⁶Un mato yoia cuscan maton ointi muran man fasi noco. ⁷Un mato icon yoinon. Un mato shara huahuunshon matomaqui caiyoicai. Un cayamainocai Diospan Yoshin Shara matoqui otiroma mato cushusharafain mato ashoshquin. Ascafia matomaquinoashu caquin uhuun Yoshin Shara un matoqui nichifainicai. ⁸Afi oshon a icoinra huamafoan chaca huamisifo ato tapimai oshquin Diosin amapaiyai cuscan huafain tapimai oshquin. Diosin icoinra huafoma ato onaintimai cuscan ato tapimai oshquin. ⁹Ua icoinra huatama chaca huafo cuscan ato tapimai oshquin.

¹⁰Unfin uhuun Upan ua amapaiyai cuscan un huamisiquin. Ascan uhuun Upa icano un caicain ua afanan man oionofoma. Nanri Diospan Yoshin Sharapan ato tapimai oshquin. ¹¹Nantianri icoinra huafoma aton niaifo Satanás Diosin man onaintima afanan ahua yoinonma. Nanri Diosin Yoshin Sharapan ato tapimai oshquin.

¹²Un mato fasi paratama tapimapaifi-aintocai man natian tapitiroma. ¹³Ascafiatan Diospan Yoshin Shara matoqui oshon mato ahuarashta Diosin tsainhu-unoa mato tapimashquin. Aafin iconmisicoquin. Ahuunshon mato yoitama uhuun Upan yoia cuscan nannoricoin mato tapimai. Inonpacoai cuscari mato tapimai. ¹⁴Un yoiai cuscan Diospan Yoshin Shara mato tapimai uhuunshon man uhuunoa shinansharanon. ¹⁵Nan uhuun Upanaforifi uhuunariquin. Un mato yoimisi cuscan uhuun Upa Diosin ahuun Yoshin Sharapan mato tapimashquin.

¹⁶Ascan uncain matofu iyoima. Uacai man oinyoshquima. Ascafia ahuutishomatan man afanan ua oinshquiran, —ishon Jesús noco yoini.

Jesús fu rafumisifoan aton ointi nocoyofiacanashu chipo unimacoinnifo

¹⁷⁻¹⁸Nicacatan atirifi non yoinanni, —Ahuuscain noco isca huaimun, “Uhuun Upa ari un cai. Ascan uncai matofu iyoima. Uacai man oinyoshquima. Ascafia ahuutishotama man afanan ua oinshquiran,” ishon noco yoi. Noco yoiai cuscacai non tapiamaran, —icashu non yoinanni.

¹⁹Nanfihuunoa non yocapaiyainton Jesús onanni. Ascanshon noco yoini, —¿Un mato yoiai cuscan man tapiashma man yocanonaincain? ²⁰Un mato shafacafi yoinon. Un omitsiscaino ua icoinra huamafo fasi unimashcani. Mancai ascashquima man ua manoshquin uaiquin. Uaifiashu chipo fasi man unimashquin.

²¹Ainfaon facu cainti chaima tau isin huaino isinyotiro. Chipo ahuun facu cainshon afanan ahuun isin shinantiro. Unimacointiro ahuun facu cainsharashu. ²²Nanscarifiai un matomaquinoashu caitian maton ointi muran man omitsiscayofiashu

un afanan matoqui oano ua oin man fasi unimashquin. Man unimaitocai tsoan mato umaqui imatiroma man unimanonma. ²³Un funiaitian un afanan matofu iyamano man afanan ahuara ua yocaima. Un mato icon yoinon. Uhuun anuhuunshon man Upa Diosin yocatiro. Ahuarashta uhuun anuhuunshon man Upa yocaiton mato inanshquin. ²⁴Uhuun anuhuunshoncai man Upa yocayomisima. Ascan uhuun anuhuunshon Upa yocacahuun. Man yocaiton Upan mato inanshquin. Mato inainno man fasi unimashquin.

Jesucristo fustitofin nantifi chacafu finoncoian

²⁵Un mato yoiyaifo tapiflashocai atirifi man tapiataima. Un mato shafacafi yoicoiantaima. Ascafia un chipo mato yoicoian Upa Diosihuunoa shafacafi man tapinon. ²⁶⁻²⁷Man ua noi. Un Diosin ariashu matoqui oni man ua icoinra huamisi. Ascan Upa Diosin matori noicoian. Ascacufin un matomaquinoashu caitian un matohuunshon Upa yocainmacai mafincian uhuun anuhuunshon Upa yocashquincahuun. ²⁸Un Upa ariashu oni nocofunucian mai anoashu cainshquin. Natian un mai anoashu afanan Upa ari caicain, —ishon Jesús noco yoini.

²⁹Yoiaiton non afu rafumisifoan non cumaniquin, —¡Aicho! Natian min noco afanan fomainma. Natian min noco fasi shafacafi puashoan. ³⁰Natian man non tapia min nantifi tapicoian. Mia yocataima min rufoco onanyoi mia yocapayai cuscan. Ascacun min Dios ariashu onicun non mia icoinra huai, —ishon non yoiaiton. ³¹—Inoncai man ua icoinra huai. ³²Ascafia chipo umaquinoashu man pashcafainicai. Maton pushu ano man cai. Icon natian man ua

potafainicai. Tsoacai ufu nituima. Man ascafianocai urusu un nituima. Man umaqui cuyofofaino uhuun Upa fu un patanain. ³³Un mato yoiafo uhuunshon maton ointi man unimamafain man isharanon. Nuno icoinra huafoma murannoashu omissiscafiaquin shinanchacayamacahuun. Un Satanás yafi icoinra huafomati finoncoianquin. Ascan un mato cushuicai, —ishon Jesús noco yoini.

Jesús ahuunoa Apa Diosi cufini

17 Asca huatan Jesús nai foisini-foantan yoini,

“Upan, natian un nanon ato tapimahuun un min Facu sharacoinquin. Min uqui unimai ato tapimahuun. Min anori ato tapimanaino urifi un ato tapimatiro min fasi sharacoincun. ²Mian yonoo un atoti yonopacunon. Mian inanti un ato nimapacunon. ³Mirus fusti min Diosincian. Unfin Jesucristoquin nan mian nichini. Tsoan noco onancoianfin nipanacafuquin. ⁴Min ahuu cuscara sharamainquin nuno mai ano niyoshon un ato puashoan. Nan mian yonoo cuscan mun aca. ⁵Ascan Upan, un mifu iyopaoni cuscan afanan ua imahuu. Non mai oni huataima u mifu niaifo shara iyopaoni. Afanan nanscara mia ya ua imahuu un min Facu shara nantifain ua tapinonfo.”

Jesús a fu rafumisifo cufishoni

⁶“Nuno mai anoa ufu rafumisifo mian inanni un ato ismanon min ahuu cuscara sharamainquin. Na ufu rafumisifo minafociacun mian ato inanni. Min tsain mia nicacacoianfo. ⁷Mian yoia cuscan nantifi un ato yoimisi. Nanfo tapicoianfo. ⁸Mian yoia cuscan un ato yoiaiton ua icoinra

huacoinnafo. Un miariashu fotoniri tapicoianfo. Mian nichinicun icoinra huacoinnafo. ⁹Un mia ato cufishofafaini. Uncai a icoinra huafoma ato cufishonima. Nan mian inannifosi huunshon un mia cufifafaini. Un mia ato cufishofafaini nanfomoin minafocufin. ¹⁰Nan uhuunaforifi minaquin. Ascan nan minaforifi uhuunafin. Ua icoinra huafohuunshon onantirofo unmain ahuu cuscara sharaquin. ¹¹Uncai afanan na mai ano iyoima. Unfin miqoi caicain. Afofin na mai ano nitucaniquin. Upan, min fasi sharaquin ato cushusharahuu. Min curushhuunshon ato cushusharahuu. Mian inanfoti ato cushusharahuu. Nonfin nan fusti cuscaracoquin. Nanfori no fu nan fusti cuscararifi ato imahuu. ¹²Un atofu iyoshon un ato cushushara. Minhuunshon un ato cushushara. Un tsoanshta funoama. Nan Satanás ahuun facu fusti funoa. Min tsain yoiyoni cuscan nan fusti funoa.”

¹³“Natian un mi ari caicain. Un cataima un yoioi nan un icai cuscarim unimacoinnonfo. ¹⁴Mian yoia cuscan un ato tapimamisi. A icoinra huafoma ato noicasmaifo. Ato cuscarafocutsi ascacun ato noicasmafo. Ascarifi atan unricai ato cuscarama. Ascan uarifi noicasmafo. ¹⁵Uncai mia yocama mai anoshon min icari min ato ihuonin. Ascatamarocon un mia yocain nuno mai anoshon min ato cushushara nan yoshin chaca Satanás ato ahuusca huanonma. ¹⁶Nanfoancai icoinra huafoma aton yorama. Unrifica un aton yorama. ¹⁷Min tsain iconcoin. Min tsainman ato shara huamahuu mia cuscara shara inonfo. ¹⁸Mian yorafoqui nichini cuscan nanscarifi

aquin un ato yorafoqui nichicain. ¹⁹Mian yoia cuscan mun atohuunshon aca afoanri ascarifi huanonfo.”

Jesús nantifin a icoinra huafo cufishoni

²⁰⁻²¹“Uncai ato fustihuunshon cufifafainima. Nantifi aton tsainhuunshon ua icoinra huanonfo un ato cufishofafaini nan non shinain cuscarafosi arifi shinanonfo. Min ufu icacainai cuscan aforifi no fu ifafaincani mian nichini icoinra huamafoan icoinra huanonfo. ²²Min ufu imisi cuscan urifi un atofu imisi. Ascan non shinain cuscarafosi arifi shinannonfo. ²³Min ufu icacainai cuscan urifi atofu icacaini. Ascan min ipaiyai cuscan nanscarafosi non shinantiro. Min ointi cuscarafosi non itiro. Nan oincaquin icoinra huamafoan tapitirofo mian nichinicun mian noia cuscarifi ua icoinra huafohuunri min fasi noicoin.”

²⁴“Upan, nan mian inanfo un mifu icano un atorifi iquinpai un mifu ishara cuscan oinonfo. Non nan mai oni huatama min ua noicoinyopaoni. Ascan min yononi cuscan un mifu imisi nantifi min iquinon.”

²⁵“Upan, min shara fustisi imisi. Icoinra huamafoancai mia onanfoma. Ascan un mia onancoin. Min ua nichini ufu rafumisifoan tapiafo. ²⁶Min ahuu cuscaramaquin un ato ismamisi. Nanscasi aqui un ato ismafafaini min ua fasi noimisi cuscan afoanrifi munonfo un atofu icacainaiton,” ishon Jesús Apa cufini.

Jesús achinifo

Mt 26.47-56; Mr 14.43-50; Lc 22.47-53

18 Ascatan Apa cufinquin anaitiano non afu rafumisifo shushan Cedrón yamu pocufainiquin. Nanno

fanafoan ahuun anu olivo. Nan fanafo muran non iquitoshini. ²Nannorimain Jesús noco iyomiscunfin. Ascano Judas nanton Jesús ato achimaniton tapini raquimain non foaquin. ³Nannori Judaspan ranushumuafu non nocon yorafohuunshon Dios cufimisi niaifofaon futsafo afu nichini non Fariseofo iyoni Jesús achimaicaquin. Chiifo ya nopy non coshatifo non ashifo yari funifo.

⁴Ascaiton Jesús onanni ahuuscain huacanicain. Onanshon ato yocani, —¿Man tsoa funaimun? —ishon yocaiton. ⁵—Jesús Nazaret anoa non funairan, —huaifoan. —Unfinquin, —ato huaiton. Nan ato achimaicai Judas nanno atofu ini. ⁶—Unfinquin —Jesús ato huatanaino chitucuri ifainpai cani pacui fustunifo. ⁷Ascashon Jesús afanan ato yoca futsani, —¿Tsoan man funaimun? —huaiton. —Jesús Nazaret anoa non funairan, —huaifoan. ⁸—Munfin mato yoaquin. Unfinquin. Ua funacaquin na ufu icafo ato nichicahuun, —ato huani. ⁹Inonpacoai cuscan Jesushuunoa cunuyoni isca huaquin, —Uncai mian inan un fustishta funoamaran, —ishon cununi. Nan cununi cuscan Jesús rama Apa Dios cufini.

¹⁰Ascaino Pedronun ahuun nopy chinushumua ahuun ona murannoa tsucainfoantan nocon yorafohuunshon Dios cufimisi niaifocoinin ahuun oinmati pashtufain rurani. Nan oinmati ahuun anu Malco ini. ¹¹Ascaiton, —Min nopy ahuun ona muran huahuu. Upa Diosin ua amapaiyai cuscan un aicai, —Jesús Pedro huani.

Jesús Anás ano iyonifo

Mt 26.57-58; Mr 14.53-54; Lc 22.54

¹²⁻¹³Ranushumuafu aton niaifofoya nocon caifo Israelifo niaifofoyashon osicashon Jesús munushnifo.

Munushushon Anaspan pushu ano iyonifo. Nan Anás Caifás ahuun raisi anifo ini. Caifás nantian nocon yorafohuunshon Dios cufimisi niaifocoin ini. ¹⁴Nanton nocon caifo Israelifo yoini, —Nocofunu fusti nantifi yorafohuunoashu naafin shara itiroquin, —huani.

—Uncai Jesús oinmisimaran, —ishon Pedronun yoini

Mt 26.69-70; Mr 14.66-68; Lc 22.55-57

¹⁵Jesús iyoaifono Pedro yafi afu rafumisifo futsanri achachi fonifo. Pushu ano unmainti nocotan afu iquifainnifo. A fu rafua futsa niaifoan onanshon iquimani Jesús iquicainaino. ¹⁶Pedron shoi caicainti ano nituni. Ascano nan niaifoan oinmisishaqui nasocura shomayataton caincanti cushua yoini, —Pedrori iquimahuu, —huani.

¹⁷—¿Mirifi min Jesús fu rafuamun? —ishon shomayataton Pedro yocaiton. —Ma. Uncai afu rafumisimafinquin, —huani. ¹⁸Matsinacoincaini nantifi chiin yoonifo. Niaifofo yafi oinmatifori yoonifo. Pedrorifi ato fu yooni.

Nocon caifoan aton niaifoan Jesús yocani

Mt 26.59-66; Mr 14.55-64; Lc 22.66-71

¹⁹Ascatan nocon yorafohuunshon Dios cufimisi niaifocoinin Jesús yocani. —Mi fu rafumisifohuunoa ua tapimahuu. ¿Ahu min ato yosiamun? —huaiton. ²⁰—Uncai onuyoiama. Nantifain ua nicanonfo un yoimisi. Un nocon ichananti pushu murannoafo yafi nocon Dios fu tsainti pushu murannoari un nocon caifo yosimisi. Uncai uhuun tsain fustishta un fomanmisima. ²¹Ahuuscain mian yocain. Ua nicamisifo yocahuun. Un yoimisi cuscan nanfoan tapicoianfoquin, —Jesús huaiton.

²² Ascaiton ranushumua afu niaton tapastan. —¿Ahuuscain nocon niaifo min anori aquimun? —huaiton. ²³— Ahua un amaqiri yoiamaquin ua yoi-huu. Ascan uhuun tsain iconfiacun ahuscain mian tapasain, —huani. ²⁴ Anori icaiton nicaquin Anás ahuun raisi Caifás ano Jesús nichini. Caifás nocon niaifocoin ini. Ahuun munushumua ya nichini.

**Ascano Pedron afanan
yoaini, —Uncai Jesús
oinmisimafinquin —ishon yoini**

Mt 26.71-75; Mr 14.69-72; Lc 22.58-62

²⁵ Ascaino afianoashu Pedro atofu yooriani. Ascaiton afanan Pedro yocanifo, —Mirififin min afu rafumisi futsaquin, —ishon yocaiton. —Unmafinquin. Uncai afu rafuamaquin, —huaiton.

²⁶ —¿Un mia oianmamun? Nan mi-afin un oianquin. Fanafo mapoa murannoa Jesús yafi un mia oian. Min racafinquin, —nan nocon yorafohuunshon Dios cufimisi niaifocoinin ahuun oinmati pashtuaton ahuun yoran Pedro huaiton. ²⁷—Ma. Unmafinquin, —Pedron huaino tacara cuoinacahuani.

**Ascano niaifon Pilaton
ano Jesús iyonifo**

Mt 27.1-2, 11-14; Mr 15.1-5; Lc 23.1-5

²⁸ Ascano funamanrishta Caifás ahuun pushu anoshon Pilato niaifo ano Jesús iyonifo. Nanfin Romanon iniquin. Ascashiashcai Pilato ahuun pushu muran iquinifoma aatsi Israelicun. Shinanpaonifo, —Non a muran iquiashu non chaca itiroran, —icashu ascashu iquicasmanifo. Afocai Israelifomaran icashu. Diosin oinmati nan afu imisiton nocon shuninfoan facu iyoafofo ato finonmani nan fusitin icaitian shinantacani. Nanscacun Pilato ahuun pushu muran

iquicasmanifo. A muran iquiashu non chacacoin itiroran fusi muaimuran non iquitiroma. —A muran iquishocai nocon caifo futan non chashoanun facu pitiro-maran, —ishon shinannifo. ²⁹ Ascaino chifi cainacahuan Pilato ato yocani, —¿Ahua chaca huacunmun na noco-funu uano man ihuaaquin? —ishon ato yocaiton. ³⁰—Ahua chaca huayamacucai non miqui ihuucuanamaran, —ishon huaifoan.

³¹—Mafi iyotacahuun. Maton shuni-foan yononi cuscamain chaca Israelifoan huaquin. Nanfin maton fuyamisiquin. Ahuamain chaca huaquin mafi ahucara huacahuun, —huaiton.

—Maton yorafoan yononifo cuscacai non tsoa mastatiroma naanon —icashon yoinifo. ³² Jesús yoiyoni cuscan nanscacoïn huaquin. Mastashquicani naanon.

³³ Ascano Pilaton ahuun pushu muran Jesús iyonifo yocanon. —¿Minmun Israelifoan aton niaifon? —huaiton. ³⁴—Mifimun min anori shinaincai. Futsanfoanraca mia uhuunoa yoirafo, —huaiton.

³⁵—¿Min shinanmun urifi un Israeli? Min yorafo futan maton yorafohuunshon Dios cufimisi niaifocoin mia uqui ihuaafo. ¿Min ahua chaca huacunmun mia uqui ihuaafoquin? Ua yoihuu, —huaiton. ³⁶—Uhuun yorafocai na mai anoafoma. Un nuno mai anoa niaifocun ua numacuanafu Israelifo ua achinonfoma. Uhuun yorafo futsa ari icafo —huaiton.

³⁷ Ascaiton Pilato cumani, —¿Iconmun min niaifo? —ishon yocaiton. —Mian yocain cuscafin unquin. Niaifo icain iconcain yoiapacushaquin un cainni. Tsoan iconcain nicapaiquin ua nicamisifo, —Jesús huaiton.

³⁸—¿Ahuamun iconquin? —Pilato cumani.

Niaifoan ato yononi Jesús rutunonfo

Mt 27.15-31; Mr 15.6-20; Lc 23.13-25

Asca huatan chifi cainacahuani Israelifo yoishquin, —Un na nocofunu yocafiacai un ahuunoa ahua chaca nicama. ³⁹Natian maton fuyamisi nocoano man imisi cuscan maton caifo cunu murannoa iquiafo fusti cainmafafainmisi. Maton shunifoan aton facu iyoafofo finonmani shinantaquin nantianri fusti mato cainmafafainni. ¿Ascan Israelifoan, maton niaifo Jesús un mato cainmashotiromun? Casharanon, —Pilatón ato huaiton.

⁴⁰Oi ashcafinin cumanifo, —Ma. A caimatama Barrabás caimahuun, —huanifo. Nan Barrabás nocon caifo shinanchacamaino mucai futsucashon futsa rutunifo.

19 Ascashon Pilatón ato yonoa Jesús iyonifo fichiqui cuno tuchiaton coshanonfo. ²Ascano ranushumufoan mosha chainipafo maiti huacashon maimanifo. Aquí cashupaiqui sahuuti nanhuainqui pocoa ointsa sahumano. ³Ascashon aquí cashucaquin. —¡Aicho! Minfin Israelifoan aton niaifoquin. Min chai niyopacupainon, —huatan fupasirian.

⁴⁻⁵Ascano Pilatón Jesús chifi cainquifainni oinonfo. Jesús sahuuti nanhuainqui pocoa ointsa sahumatan mosha chainipafo maiti huashotan sahumano. Ascashon Pilatón, —Oicapon na nocofunu. Ucai ahuunoa ahuashta nicayomisima un chaca huapanan, —huaiton.

⁶Ascafiaiton nocon yorafohuunshon Dios cufimisi non niaifo futsafoanri oinquin Jesusqui tsain chipunifo. Ascashon oi ashcafinin —¡Mastahuun! —huarianifo. —Ascaiton mafi iyoshon mastatacahuun. Uncai ahuunoa ahuashta nicayomisimafinquin un chaca huapanan, —Pilatón ato huani.

⁷Ascaiton nocon caifoan cumanifo, —Ma. “Unfin Diospan Facuquin,” Jesús noco huamisi. Ascacun nocon niaifofoan yonoa, “Tsoa anori icafin niaquin. Nayamacaiyaima,” —huaifoan.

⁸Ascifoan nicai Pilatón fasi ratui finacoinni. ⁹Ascashon Jesús ahuun pushu muran afanan iyoni. Iyoshon yocani, —¿Raniamun minquin? —ishon yocani. Yocafianocai Jesús pusinima. ¹⁰—¿Mian cumaimamun? ¿Min tapiamamun un mia caimayamarquin un mia mastamatiro? —huaiton.

¹¹—Diosin mia yonoyamainocai mian ahuusca huacuanama. Ascacun nan mian chaca huanon mi ano ihuuafo nanfoancaifin ua chaca huaquin finacaniquin, —huani.

¹²Ascaiton nicaquin Pilatón Jesús caimapairiani. Ascafiaino nocon caifo Israelifoan tsain isininpaton yoinifo, —Tsoa, “Unfin niaifoquin,” icafin Romanonfoan niaifocoin Cesari chaca huaiquin. Ascan min na nocofunu Jesús caimanacai nocon niaifocoin Cesari min ahuun yorahuancoinma, —icashon oi ashcafinin yoirianifo.

¹³⁻¹⁴Nicatan afanan Pilatón Jesús chifi cainmani. Nantianri nocon caifo Israelifo fusiti iyocoshquin icaino. Nan Diosin oinmati nan afu imisitón aton shunifoan facu iyoafofo finonmani shinantanfafainpaonnifo. Fari masafinin racano Pilatón Jesús iyoni anoshon aton shara aroshofafainmisi. Ano tsaoshon yocanshquin chaca huayamarquin shara huacun. Nannoshon ato yonotiro onaintimayamarquin nichimisi. Nanno anuni —Toquiri saparan, —huapaonifo. Nocon caifo Israelifoan ahuun tsainman, “Gabataran,” huanifo. Pilatón tsaoshon aton ointaifi Jesús cainmani. Cainmashon, —¡Oicapon! Naafin maton niaifoquin, —Pilatón ato huaiton.

¹⁵ Ascafiaiton, —Iyoshon mastatahuun nanon. Ihui coyan iquinanquin mastahuun, —oi ashcafinin huaifoan. —¿Iconmun unmun maton niaifo mastaicai? ¿Manmun mastanpaicai? —Pilaton ato huaiton. —Cesari fustifin nocon niaifoquin. Nocon niaifo futsa yamai, —ishon nocon yorafohuunshon Dios cufimisi niaifofoan yoinifo.

¹⁶ Asca huatan inoncai Pilaton atocui Jesús caimani. Ranushumuafoan iyocashon ihui coyan iquinanquin mastai focaquin iyonifo.

Jesús ihui coyan iquinanquin mastanifo

Mt 27.32-44; Mr 15.21-32; Lc 23.26-43

¹⁷ Ascano iyoaifoanno afincoin ihui coyan iquinan iyashon foni. Anoshon mastaifoanno noconi. Nanno ahuun anu mapo shaoran huanifo. Israelifoan tsainmanfin Gólgotaran huapaonifoquin. ¹⁸ Jesús yomutso rafu yafi mastanifo. Yomutso rafutan naquihuano Jesús mastanifo. ¹⁹ Ascan mastacashon Pilaton yonocun Jesús ahuun mapo manaonrishta aqui cununifo.

JESÚS NAZARET ANOA ISRAELIFOAN ATON NIAIFOCOINRAN

ishon Pilato ato cunumani. ²⁰ Jerusalén anoashu mani futsafo ya osiafo ichapacoin inifo. Jesús nanno chaimashtashon mastanifo. Ascanofin Pilatonun aton tsain futsa futsatapafato ato cunumani isca huaquin, —Jesús Israelifoan aton niaiforan —ishon tapinonfo. Nocon tsain cunufain Griegofoan aton tsainri cunufain Romanonfoan aton tsainri cununi. ²¹ Nan oincatan nocon yorafohuunshon Dios cufimisi niaifofo Pilato ano fonifo. Yoifocani, —“Jesús nocon niaifocoinran,” huacaquima “Unfin Israelifoan un mato niaiforan, Jesús icaran,” ishon cunuhuu, —huaifoan. ²²—Un cunumana cuscan nannoricoin

un cunua. Uncai ahua futsan afanan tuqui huaimaran, —ishon Pilaton ato cumani.

²³ Ranushumuafoan Jesús mastafono ahuun sahuuti fianpacunifo. Pashcananpacushon mani rafu non rafuri machinifo. Ascano ahuun sahuuti chainipa ashcapari chichia tushu huayonifo. ²⁴—Fashnuyamacahuun. Nanscara muma shara non finon. Non aya cashutihuuun aqui numero nuupacua potashon futsa shuhuianton ahuun sahuuti ashcapari chichia fitiroran, —icashu yoinannifo. Nannori Diosin tsain Jesushuunoa inonpacoai cuscan aqui cunuyoni isca huani, “Uhuun sahuutifo aya cashutihuuun aqui numero nuupacua potashon futsa shuhuianton uhuun sahuuti finonran,”

ishon inon pacocununi. Ascano ranushumuafoan nanscacoin huaquin.

²⁵ Jesús mastafon chaimashta ahua non ahuun achin nan Cleofaspan ahuin non María Magdalena non afo nanno chaimashta ninifo. ²⁶ Un non Jesús ahuari chaimashta non nia ini. Jesús noco oinquin yoini, —Uhuashtan, natian Juan min facu iquiran, —ishon yoini. Ua noiquifin anori huaniquin.

²⁷ Asca huatan —Naafin min uhuaquin, —ishon ua yoiaiton nicaquin uhuun pushu ano un iyoni cushusharashquin.

Jesús nani cuscan

Mt 27.45-56; Mr 15.33-41; Lc 23.44-49

²⁸ Jesushuunoa Diosin tsain cunuyonifo cuscacoin acoincun onanshon Jesús yoini, —Un nomicoinran, —ato huani. ²⁹ Ascano fimi unu focash muran nanupacufoantan faca tahua shatun finifoantan Jesús inanpaini. ³⁰ Jesús muushon yoini, —Natian uhuun Upan ua yonoa cuscan mun acoinna, —huani. Ascatan nai fupopacucahuani.

Ranushumuaton Jesús ashin pishi chachini

³¹ Iyoco futsaino nan fusititian Diosin oinmati nan afu imisiton nocon caifo Israelifo aton shunifoan facu iyoafofo finonmani shinantanfafainpaonifo ini. Ascano Jesús yafi yomutso rafu ihui coyan iquinanqui nanno mastaifoanno nocon niaifofoancai fusititian oinpainifoma. Ascanofin Pilato ano fonifoquin, —Funamanri nocon fusititian. Jesús yafi yomutso rafu ato fitucucahuun nariscanon. Mai huariscanonfo nocon fusititian mastafa ano ninonma, —ishon nocon niaifofoan Pilato yoinifo. ³² Ascan Pilato ato yonocun ranushumuafaoan yomutso rafu aton fitash shao tucunifo nariscanon. ³³ Ascano Jesusqui fucaquin oianfo man naacoinna ini. Ascaitocai fitucunifoma.

³⁴ Ascaiton man naa oinquin ranushumuaton ahuun ashin pishi chachiaino imi focain unu foni. ³⁵ Unfin nan oinni cuscan un mato yoiaiton marifi man icoinra huanon. Unfin icon yoiquin. ³⁶ Diosin tsain yoimisiton inonpacoai cuscan cunuyoni isca huaquin, —Ahuun shaocai tucushquimafinquin, —ishon cununi. ³⁷ —Pishi chachiaitonfin oinshcaniquin, —Diosin yoimisi futsan inonpacoai cuscan Jesús naiyoataima cunuyoni.

Jesús mai huanifo

Mt 27.57-61; Mr 15.42-47; Lc 23.50-56

³⁸⁻³⁹ Ascano José Arimatea anoashu cainni nan Pilato ano cani, —Jesús ihui coyan iquinanmaquinoa un fotomapai mai huashquin —ishon Pilato yocani. Ascaiton, —Ahuu, —Pilato huani. Nan José Jesús icoinra huatanafishocai tsoashta yoinima. Nocon caifo niaifofoqui musuquin ato yoipainima. Nan Nicodemo futan José Jesús ihui coyan iquinanmaquinoa fotomani mai

huashcaquin. Nan Nicodemo arifi Jesusqui yamu oni yocaicain. Afi ininti shara ichapa treinta kilo cuana funi Jesús ahuun caya raishashquin funa payocononma. Nan ininti rafu osinan huani tuipa yafi ofucoin. Nan ininti ahuun anu rafu mirra yafi aloes.

⁴⁰ Ascano José yafi Nicodemo inintin pan osho shara ahuun raishashon ahuun raconifo. Nocon caifo Israelifoan nocon yora mai huaquin amisifo cuscan huanifo. ⁴¹ Nii funuamamishti mapoa anoshon afi ano chaimashtashon Jesús mastanifo. Nannori mahua quini funa tsoacai a muran maiyomisima. ⁴² Nocon caifo nan Israelifo nocon tunutitian iyocoshquin icaino fari iquiataima Jesús mai huariscapainifo. Ascan nan mahua quini chaimashtacun a muran Jesús mai huariscanifo.

Jesús mahua quini muran man mai huafiafo afanan funini

Mt 28.1-10; Mr 16.1-8; Lc 24.1-12

20 Ascano Domingoaino shafataimashta María Magdalena Jesús maia mahua quini ano cani. Caquin oian mahua quini ahuun fupoitan man fupucua ini. Nan toquirininhuan man fupucua ini. ² Ascaiton oinfainnicai María ichoni Pedro yafi ua chanihuaicai, Jesús uhuun noimisi noco chani huaicai ichoni, —Nocon Ifoan ahuun caya quini murannoa man raquiran onuafo noncai tapiama, —icaiton nicai.

³ Pedro fu non maia ano ichoni. Mahua quini muran oincai. ⁴ Un Pedro shononfaini un rufofo noconi. Chipa Pedro nocotoshini. ⁵ Rufofo nocotan mahua quini tucupacucahuatan un naistoshini. Naistoshiquin oian ahuun racoitan pano mania ini. Ascafiancai iquitoshinima. ⁶ Ascaino Pedro ucachiori nocotoshitan mahua quini muran iquicaintan oinquin

oian ahuun rashuitafo mania ini. ⁷Ahuun foraconitafo fosoitaquiri mania ini. ⁸Ascaino unfincoini quini muran iquicaini. Iquicaiquin oinquin un icoinra huani Jesús funia. ⁹Oinyoshomacai Diosin tsain yoia cuscan, —Jesús funishqui ain, —non tapiyonima. ¹⁰Ascaiton ointan nocon pushu ano non nasocurani.

Mariaqui Jesús niriscatani

Mr 16.9-11

¹¹Non cafiainocai María canima. Mahua quini cachiori niashu uaiqui arifi quini tucucain naisquin oian. ¹²Diosin oinmati rafu afu ica sahuuti oshopa sahuucanashu tsaoafo ini Jesús rataintanfoanno futsan fosoitaquiri icaino futsan ahuun tau iquitaquiri tsaoafo inifo. ¹³—¿Ahuuscain min uaicain? —oinmati Dios fu imisiton rafutan huaifoan. —Uhuun Ifo man ahuun caya raquiria onuafo uncai tapiama ahuuscara huaforan, —huatan. ¹⁴Ifiacucaguaquin oian Jesús acachori nifiacucui onannima. ¹⁵Jesús arifi yocaquin, —¿Ahuuscain min uaicain? ¿Min tosa funaimun? —huaiton. Afia fasi oromisi shafain, —Minmain uhuun Ifoan ahuun caya rani huaquin ua yoihuu. Un afanan nuno mai huanon, —huaiton.

¹⁶Jesús, —Maria, —yoini. Ascaiton foisini foanquin oian nan Jesús ahuun fusocoincun. Israeli tsainman, —Rabuni, —huani. ¹⁷—Ua muyamaquin. Uhuun Upari un cataimacai. Ascan ua muquima. Uhuun yorafo ua ato yoishotacahuun isca huaquin, “Uhuun Upa ari un caicain. Nan uhuun Uparifi maton Upaquin. Nan uhuun Diosifin mato Diosiquin,” ato huatahuun, —huani. ¹⁸Ascashu cai María nocoshon yoiquin, —Munfin nocon Ifo un oianquin, —ishon. Noco

yoini nan Ifoan yoia cuscan huafain noco yoipacuniquin.

Jesús afu rafumisifoqui niriscatani

Mt 28.16-20; Mr 16.14-18; Lc 24.36-49

¹⁹Asca huatan tunutitian iyoconaino man fari caino non afu rafumisifoan nocon niaifofoqui musuquin non cunu fupoti futaonshacanashu non ichanan ano noco nushmancayan Jesús niriscatani. Ascaiton noco yoiquin, —Maton ointi fucashcaquima isharacahuun —ishon noco yoini. ²⁰Yoitan noco ismaquin a piriconun mastaitafo tsuhuu ismaquin mushanshotan ashin pishi chachitan noco ismaniquin. Noco ismaiton non oinni fasi nocon Ifoqui unimacoinni. ²¹Afanan Jesús noco yoiquin, —Maton ointi fucashcaquima isharacahuun. Nan uhuun Upan ua nichini cuscan huafain natian un matorifi nichiran, —ishon yoini. ²²Ascashon nocoqui ashaintaquin, —Uhuun Upa ahuun Yoshin Shara ficahuun. ²³Ratoran futsan man aton chaca rauhuacufin Diosin aton chaca soashoshquin. Man aton chaca rau huamafin atohuun nuaquin, —ishon Jesús noco yoini.

Jesús afanan atoqui niriscatanaino Tomasri atofu ini

²⁴Ascashon noco yoiaiocai Tomás fusti ano inima. Nan Tomás arifi Jesús fu rafumisi futsa ini. Ahuun anu futsa Gemelo huapaonifo. ²⁵Ascanshon Tomás Jesús oinshoma yoini, —Un ahuun mucu natan pirico tsuhuu uhuun mutotinin muifain ahuun pishi tsuhuu pimuishofin un icoinra huatiroquin. Un asca huayamashocai man Jesús oincoian un icoinra huashquimaran, —ishon Tomás noco yoini.

²⁶Asca huatan ocho osha finontan non afanan cunu muran ichananfono Tomasrifi nanno no fu ini. Cunu fupoti

futaonshacafono afanan Jesús nocoqui niriscatani. Ascashon afanan noco yoiquin, —Maton ointi fucashcaquima isharacahuun, —huaton. ²⁷ Jesús Tomás isca huani, —Ua min mutotinin uhuun mucu natan muifain ua piiimuihuu. Afanan ua icoinmaran huaquima. Ua icoinra huahuu, —huaiton. ²⁸ Ascaiton Tomás cumaquin, —Minfin uhuun Ifoquin. Minfin uhuun Diosiquin, —huaiton.

²⁹—Ua oinquisifin mian icoinra huaicai. Ascan ua oianmefianquin ua icoinra huafofin fasi unimashcaniquin, —ishon Jesús yoini.

Ahuuscashomain

Juanpan Jesushuunoa cunushoniquin ato tapimani

³⁰ Ascatan ahuamamishti tsoa futsan atiroma cuscan ahuara futsafo Jesús noco oinmani. Afohuunoacai un mato cunushonama. ³¹ Upan Diosin Jesús catonni. Afin Diospan Facuquin. Un mato cunushona cuscan nan man icoinra huanon. Icoinra huaashu man Dios fu ipanon.

Ian cusumun Jesús afu rafumisifoqui noconi

21 Ascano Jesús afanan nocoquin noconiquin. Ianmanhuan Galilea cusumun noconi. Un mato yoinon ahuuscashumain Jesús nocoqui oniquin. ² Pedron yafi Tomás nan ahuun anu futsan Gemelo non Natanael nan Canan murannoa Galilea anoa non Zebedeo facufo nonri afu rafumisi non ichananni. ³—Unfin nushuicaicain, —Pedro icaiton. —Non mifu cairan, —non huani. Ascashu focani shasho nanufain nushushifiaquin non shiman fustishta finima.

⁴ Shafa cuaino ian cusumun Jesús nia ini. Nifiacun non onannima. ⁵—Uhuun facufoan man shiman achiamamun,

—noco huaiton. —Ahuashta non fiamaran, —non huaiton. ⁶ Ascaiton noco yoiquin, —Shashon rushti cayacafi potacahuun. Ascashonfin man fitiroquin, —noco huaiton nicacaquin. Nan noco yoia cuscan non potani shashon rushti cayacafi potashon non mua fospicoian ini. Shimanoanfo ihuucocincun shasho muran nanupaiquin non rananni. ⁷ Unfinquin ua Jesús noicoimisi. Ascacun un Pedro yoini, —Nanfin nocon Ifoquin, —un huani. Ascaiton nicaquin Pedron samamashta ahuun sahuuti sahuacufoantan shasho naquinoashu ian muran fotocaini ahuun Ifoqui nocoriscapai. ⁸ Ascaiton atirifiton non shashon mufaini. Nocon nushuti fospicun shashoqui nushashon non aya tohuufoni. Ian cushan chaima shara. Cien metrocuana.

⁹ Non cusumun nocoquin oian chi cutuai ini shiman shoi yafi yoa chi cusumun raca ini. ¹⁰ Ascatan Jesús noco yoiquin, —A man rama shiman fia futsan fucahuun, —huani. ¹¹ Ascaino Pedro shasho naqui nanupacucahuan noco nushuti cusumun sharashon. Non oian shimanoanfo nushuti fospicoian. Ciento cincuenta tres shimanoanfo fospicoinfiahocai nushuti fashnunima. ¹² Ascaiton Jesús noco yoiquin, —Piyoi fucahuun, —noco huaiton. Nicacaquin. —¿Min tsoamunca? —non huanima. Man nonmain tapishofin nocon Ifocun. ¹³ Ascashon Jesús noco pimaquin noco nantifi yoa yafi shiman inanni. ¹⁴ Man funitashaquin nocoqui oi rafu non fusti ya ini.

Jesús Simón Pedro fu tsainni

¹⁵ Piquin anaititan Jesús Pedro yocani, —Pedron minfin Juanpan facuquin. ¿A mifu rafuafoan ua noicoiainfo finonmafain mian noicoianmun? —huaiton. —Aifain Ifon. Man minfin tapiaquin un

minhuun noicoiain, —huaiton. —Ua noisharashon ua rama icoinra huafori ato cushusharahuu ua tanasharanonfo, —huani. ¹⁶ Afanan Jesús Pedro yoini, —Pedron, minfin Juanpan facuquin. ¿Iconmun mian fasi noicoiain? —huaiton. —Aifain Ifon. Man minfin tapiaquin un mihuun noicoiain, —huaiton. —A ua noisharashon ua tanamisifori ato cushusharahuu ua tanasharanonfo, —huani. ¹⁷ Ascaiton afanan yoca futsani, —Pedron, minfin Juanpan facuquin. ¿Mianmun noiquin? —huaiton. Yocariaiton Pedronun fasi ointi noconi.

Ascashon afanan cumani, —Ifon, minfin ahuamamishti tapiaquin. Man min tapiari un mia fasi noicoiain, —huaiton. —Ascan ua tanamisifo cushusharahuu ua tanasharanonfo. ¹⁸ Pedron, iconcoin un mia yoinon. Pushcoshon nan min apaiyai cuscan min huaa. Ascatari nan min capaiyaiquiri min camisi. Ascan min anifo ano futsafoan mia yonoshquicani. Min capaiyamaiquiri mia iyoshquicani, —huani. ¹⁹ Jesús Pedro tapimayoni ahuuscamain naiyaicain. Pedro ahuun Ifohuunoashu naicain tapishquin, —Upa Dios shararan, —huashquicaniquin.

Ascano Jesús Pedro yoini —Ua tanasharahuu, —huani.

²⁰ Asca huaino Pedron ifiacuahuan ua oinni un ato mufainaiton. Ua fasi Jesús noimisi, Jesús nataima no futan yamu piyoaquin un Jesús yocani, —¿Ifon, tsoancai mia achimashquimun? —ishon un yocani. Nan ucaifin yocaniquin. ²¹ Ascaiton Pedron ua oinquin yocani, —¿Ifon ahuuscamain Juan naiyaicain? —huaiton.

²² —Un nimapaiyaino niyoi nan un nasoaitionri. Inon. Shinanyamahuu. Ascatama ua tanacoinfafainhuun, —huani. ²³ Ascano afu rafumisifo yoinannifo, —Juancai nayoimafinquin, —uhuunoa huanifo. Ascafiacai Jesús anori yoinima. Yoini isca huaquin, —Un Juan nimapaiyaino niyoi nan un nasoaitionri. Inonpun shinanyamahuu, —ishon nan fusti Jesús anori ani.

²⁴ Unfin Jesushuunoa yoimisiquin. Jesús ahuarafo huai cuscan mun oinmisiquin. Nanfo un mato cunushoni. Ascacun uhuun tsain man icoinra huatiro. Nantififain man man tapia un ahuunoa yoiaiton nan iconcoin.

²⁵ Ahuarafo Jesús ani cuscaicai non afoqui cunuqui nocotiroma. Unquian Juan un mato cunushoni. Nanti.

Jesús Fu Rafuafoan Apaonifo Cuscan

(Hechos)

**Jesús ato yoiyoni cuscan,
—Diospan Yoshin Shara matoqui
oshqيران, —ishon yoini**

1¹⁻²Unquian, Lucas, un afanan mia cunu fomai min tapinon. Uhuun yora Teófilo, Jesús mai ano iyoshon ani cuscan huafain yosini cuscari Apa Dios ari cainitian nanfohuunoa un mia cunushoni min tapinon. A fu rafuafo catonni ato Diospan Yoshin Sharahu-unshon tapimashquin. Apa Dios ari caiyoataima ato tapimayofafainpaoni.³ Atohuunoashu nayoaitian cuarenta oshatan Apa ari cani. Cayoataima atofu iyopaoni. Ato ahuamamishti oinmayoni afanan funia cuscan icoinra huanonfo. Nantianri Diosin nantifi ato iquinai cuscan ato tapimani.⁴ Ichanancashon piyaifoan ato yoini,

—Un mato yoimisi cuscan uhuun Upa Diosin mato tapimayoni ahuun Yoshin Shara matoqui nichishquin. No-coataima Jerusalén anoashu foriyamac-ahuun. Manayocahuun.⁵ Juanpan ato unu muran iquimacuni aton chaca shatushon oinmanonfo. Ascano samamashta Upa Diosin ahuun Yoshin Shara mato ya imapacunon, —ishon Jesús ato yoini.

Jesús Apa ari nai muran cani

⁶Ascatan chipo afanan afu ichanancashon yocanifo, —¿Ifon, min natian yonoimamun nocon caifo Israelifo nocon niaifo fusti inon Romanofaan aton niaifoan afanan noco yonononma? —huaifoan.⁷—Ahuutian iquimancai mancai tapitiroma. Nocon Upa Diosin fustiton yonotiro ahuutianmain ishquicain.

⁸Ascafia Diospan Yoshin Shara matoqui oshon ahuun curushu mato inanshquin. Ahuun shinanhuunshon uhuunoa man ato yoifoanfafainon. Un amisi cuscan huafain un yoimisi cuscari man man oinmisi man nicamisi cuscan nantifi uhuunoa man ato yoitiro. Nuno Jerusalén anoa yoifain nantio Judea muran yoifain Samaria ano yoifain nantifi manifotiton uhuunoa man yoifoanfafainon, —ishon ato yoini.

⁹Yoiquin anaititan aton ointaifi nuinacahuani. Oiainfono nai coin muran ihuacainaiton afanan oinnifoma.¹⁰ Foiscaquin oianfo nocofunu sahuuti oshopacoin sahuua rafu atoqui niriscatanifo.¹¹ Ascashon ato yoini, —Galilea anoafoan, ahuuscain man nai ari foisain. Jesús man nai muran caa nanscacoín acurani afanan oshquiquin, —ishon Diosin oinmati afu imisiton rafutan Jesús fu rafuafo yoinifo.

**Matías catonni Judas
imisi cuscari anon**

¹²Ascatan machi Olivo anoashu Jerusalén ano nasofainifo. Nan machi Olivo Jerusalén chaimashta ini.¹³⁻¹⁴ Nococatan pushu osa futsa fomancayan inacashon Upa Dios cufinifo. Nanno Pedro non Jacob non Juan non Andrés non Felipe non Tomás non Bartolomé non Mateo non Jacob futsa Alfeopan facu non Simón nanton ahuun caifo futan Romanonfo cachiquiri huapainifo, non Judas Santiagon facu non Jesús chipocufu non ahua María non ainfo futsafori nanno inifo. Ichanancashon shafa rananun Dios cufinifo.

¹⁵Cufiaifono nanno ciento veinte yorafo atofu ichanannifo. Ichananfono Pedronun ato nastui nishon yoini.¹⁶ Isca huaquin, —Uhuun yoramishtichin ua nicacahuun. Judaspan ato tapimaita ahuuscashomain nocon Ifo Jesús

achicanicain. Nocon shuni David Diospan Yoshin Sharahuunshon inonpacoai cunuyoni cuscan Judaspan man aca. ¹⁷No fu rafupaoni. Nocon Ifoan noco yonoai cuscarifi huaquin nan Judasri yonopaoni. ¹⁸Nocon Ifo tanayopaonifiashon fasi chaca huani. Nocon Ifo ato achimacun ahuun rafanon pui inannifo. Nan puihuushon mai fitan nanno fomancayan inashu aficoín tunushumutan pacucuranpai ari rononi. Chipu ahuun posto farashutan musiriqicahuan pacuni. Pacuaino ahuun posto toshatani. Ascaino ahuun poco arasiqifutsuni. ¹⁹Nantiffain Jerusalén anoshon nicafo. Ahuun imi focun nanno anunifo, “Imi mairan,” huani. Yora futsan aton tsainman Acéldama. Nocon tsainman imi mai. ²⁰Nocon shuni David Judashuunoa inaca cuscan aquin cunuquin isca huani, “Ahuun mai ano tsoa afanan ano inonma, Ahuun yono nocofunu futsan finon cushumisi inon,”

ishon David ahuunoa inonpacoai cuscan cununi. Ahuun cunu anunifo Salmos, huanifo.

^{21–22}Ascacun non futsa catononcahuun. Judaspan ahuun yono finon. Nan Juanpan yorafo unu muran iquimacupacunitian non Jesús nomaqui Apa ari canitian no fu itiani non catononcahuun. Nan no fu cahuascapaoni non catontiro. Non Jesús nican cuscan huafain non oinyomisi cuscan arifi huamisi ahuunoi yoinon. No futan yorafo yoinon, “Jesús funia mun oincoianran,” ishon ato yoinon, —Pedro huani.

²³Nicacashon nocofunu rafu catonnifo. Nan fusti anu rafu non fusti ya ini. José Barsabás ahuun anu futsa Justoran huashon anunifo. Nocofunu futsa catonnifo ahuun anu Matías. ²⁴Aton catoncashon Upa Dios cufinifo, —Ifon, nantifi nocon nomuran non shinain cuscan min tapicoian. Noco

tapimahuun ratocaimain nan nocofunu rafu min catonpaicain mifu rafumisi no fu inon. ²⁵Judas min yononi cuscan man pota faquishihuan muran canon. Nanno ipanon. Ascan futsan ahuun yono fianon mifu rafua inon, —ishon cufishonifo. ²⁶Cuficatan toquiri tocoro rafuhuun anu nutanifo. Ascashon motica muran nanushon napacufoanni. Ascashon oianfo ratocaimain Jesús fu rafumisi iquicain. Ascashon oianfo. Matías ahuun anu nuucun. Nan catonnifo Jesús fu rafumisi atofu inon.

Upa Diosin ahuun Yoshin Shara atoqui oni cuscan

2Ascano Israelifoan aton fusititian ahuun anu Pentecostés ini. Nantianri Jesús tanamisifo pushu fusti muran ichanannifo. ²Ichanancatan pushu muran tsaocashon nicafo samamashta nai ariashu fuhuan nicatsain nicanifo. Pushu muran fuhuan rupifurannaiton nicanifo. ³Nocotoshiaino ana ointsa chi rucun maratamufafainafo oinnifo. ⁴Ascaino Diospan Yoshin Shara aton nomuran nanutanaino nantifi tsain futsanman ipaitama inifoannifo. Nantifi ascái futsunifo.

⁵Ascaino nantianri Israelifoan Dios tanasharapaicani manifoti anoashu Jerusalén ano funifo. Fusititian Jerusalén ano funifo. ⁶Ascan fuuhuanun oi cuscara nicafuracani Jesús tanamisifo ichananfo ano ichtoshinifo. Yorahuanrasi nocotoshinifo. Nococatan yoinannifo, —¡Aira! ¿Ahuuscashucon iscaimun? ¿Ahuuscain na yorafo nocon tsainman icanimun?

^{7–8}Na yorafo Galilea anoafofiacashon nocon tsainman noco shafacafi yoi. Nan noco tsainman noco yoicani. ⁹Nonfin tsain futsa futsatapa yafo. Atirifi Partia anoashu caiyainfono, atirifi Media anoashu caiyainfono, atirifi Elam anoashu caiyainfono, atirifi

Mesopotamia anoashu caiyainfono, atirifi Judea anoashu caiyainfono, atirifi Capadocia nan Ponto muran anoashu caiyainfono, atirifi Asia anoashu caiyainfono. ¹⁰ Atirifi Frigia anoashu caiyainfono, atirifi Panfilia anoashu caiyainfono, atirifi Egipto anoashu caiyainfono, atirifi Africa nan Cirene orima futsa anoashu caiyainfono, atirifi Roma anoashu caiyainfono, atirifi Israelifo yafi mani futsafoan Diosin tanapainifo. ¹¹ Atirifi Creta anoashu caiyainfono, atirifi Arabia anoashu caiyainfono. Nonfin manifoti anoashu nuno ichanain fuaquin nan Galileafoan nocon tsainman noco yoicani. Ahuara sharafo Diospan huaa noco yoirafo, man non nicai. ¹² ¿Ahuuscai na yorafoan nocon tsain tapiamafishon noco tsainman noco yoicanimun? —inifo. ¹³ Ascano futsanfoan ato cashu mutsama huaifoan, —Na yorafo pauncaniran, —ato huanifo.

Pedro ato yoini cuscan

¹⁴ Ascan Jesús fu rafuafo once ato nas-tui nishon Pedronun oi ashcafinin isca huaniquin. —Uhuun yoramishtichin Israelifoan nunoa Jerusalén anoafo futan ua nicasharacahuun. Un mato cayacafi yoinon. ¹⁵ Atirifiton man shinan raca non painin. Ma. Noncai paininma. Man shuni cuyainano nocon yorafo paunmisima. ¹⁶ Non pauntamarocon man oiain cuscan nocon shuni Joel inonpacoai cuscan yoiniquin. Diosinhuushon isca huaquin yoini, ¹⁷ Upa Diosin noco yoi isca huaquin,

“Uhuun facu oti chaima un manifoti anoafo uhuun Yoshin Shara atoqui nichishquin. Ahuunshon maton facufo nocofunifo non ainfofori inonpacoai yoishcaquin. Maton pushcoai fo namapan cuscara un ato ahuafo ismai. Maton anifofoanri uhuunshon aton namapan cuscara

ahuafo shara oinshcani. ¹⁸ Ua yonoshonafori nocofunifo yafi ainfofo uhuun Yoshin Shara un nantianri atoqui nichishquin inonpacoai foanri uhuun tsain yoishcani. ¹⁹ Ahuamamishti tsoan oinyomisima cuscara un nai aria yafi mai ano un ato ismai. Imi yafi chi urumanhuan non coinmahuan ishquin. ²⁰ Uhuun facu nan maton Ifoan fasi sharastacoan matoqui oaiton man oinshquin. Oataima faquishihuancoin ishquin. Oshuri imi ointsa oshicoan ishquin. Afanan oaitian ahuaamamishti tsoan oinmisima cuscara nantifiton oinshcani. ²¹ Ascanfiashon ratoran futsan isca huaquin, ‘Ifoan, Jesús, uhuun ramapaihuu. Ua numahuu,’ huaifiton Diosin numaiquin,”

ishon Joel Diospan tsain inonpacoai cuscan yoini.

²² Uhuun yora Israelifoan ua nicasharacahuun. Jesús nan Nazaret anoaton Upa Diosin aqui unimani mato isma. Tsoan atiroma cuscan huafain tsoan oinyomisima cuscara huafain ahuaamamishti futsafori ahuunshon Upa Diosin mato isma. Man man tapia non iconcoin. ²³ Ascafia Upa Diosin inon pacoai cuscan shinanni cuscan mato ahuun Furun inanni man rutunon. Manfin nocofunu chacafo futan ihui coyan iquinanqui mastaitaqui nanon. ²⁴ Naafiacun Upa Diosin funimana afanan omitsiscacai nanonma. Jesuscai tsoan namapacutiroma. ²⁵ Nocon shuni David niaifoan Jesushuunoa yoini isca, “Mun tapian uhuun Ifo ufu ipanaca. Ua potapacunacama. Ua cushui. Ascan tsoancai ua ahuasca huatiroma ua ratupaiquin. ²⁶⁻²⁷ Ascacufin uhuun nomuran un fasi unimacoin. Un nantifi ato yoitiro uhuun Ifoan ua cushuaino un unimai. Uhuun Ifo ua isca huaa, ‘Uhuun Ifoan, Diosin,

un nacuncai uhuun yoshin namisifo muran mian potaima. Mincai uhuun caya payocomaima. Ascan mun tapi un niyoano mian cushusharayoi' ishon ua huani. ²⁸Ahuuscashumain un nipasharatiroquin mian tapimana. Un miqiu nocoano mian unimamacoinshquin,”

ishon nocon shuni David cununi.

²⁹Uhuun yoramishtichin, un tapicoian cuscan mato yoi. Nocon shuni David nani. Man maifiani nanno natianri non ointiro. ³⁰Ascafiano David inonpacoai cuscan Diosin tsain yoiyopaoni. A Diosin yoiyotiani cuscan tapia ini. Diosin yoiyoni chipo ahuun funari niaifocoin ishquioi. Nocon caifo Israelifo a cuscarari nocon niaifo inon. “Un mia icon yoi min funa chipo mia cuscarari min caifoan aton niaifocoin inon,” ishon Upa Diosin David yoini. Diosicai tsoa paratiroma David tapini.

³¹Ascano David chipo fari ichapa inaca cuscan yoini. Cristo funinonpacoai cuscari yoini. “Naacucui Apan naafo muran potanonpacoima. Ahuun cayaricai payoconacamaran,” ishon yoini. ³²Icon, Upa Diosin Jesús funimaita nipanon. Nantififain man non oian. ³³Natian Apa Dios fu niaifocoin nantifi iquina. Apa yoiyotiani cuscan Jesús ahuun Yoshin Shara nocoqui nichian. Ascacufin natian man oian cuscan huafain man nica cuscan Diospan Yoshin Sharapan aca. ³⁴⁻³⁵Ascan nocon shuni Davidcai Dios ari ahuun cayafo ya nai muran canima. Ascashorifi yoini,

“Ifon uhuun Ifo yoini isca huaquin, ‘Min ufu niaifo itiro nantifi iquishquin. Mia noicasmaifori min ato finoncointiro afanan mia chaca huanonfoma. Atorifi min iquini. Un mia amashquinran,’”

ishon yoini.

³⁶Ascacufin nantifi Israeli anofoan maton nomuran tapisharacahuun. Jesús

man ihui coyan iquinanqui mastaitafo Diosin yonoa nocon Ifo Cristo inon. Nan Apan catonni, —ishon Pedro yoini.

³⁷Nicaquin aton ointi noconifo, —¡Ohua! Non chaca huaita, —ishon shinannifo. Pedro non Jesús fu rafuafo futsanfo yocanifo, —Nocon yoramishtichin, non mato nica. ¿Non ahuuscatiromun? —ishon yocaifoan.

³⁸—Man chaca huamisi cuscan shatucahuun. Afanan chaca huatamarocon Dios shinacahuun. Jesucristo Ifo huacahuun. Man Ifo huaino mato unu muran iquimapacutiro maton chaca soafain Upa Diosin mato numanon. Asca huano Diosin ahuun Yoshin Shara matoqui nichishquin matofu rafucoinon. ³⁹Jesús yoiquin isca huaita, “Ratoran futsan nuno nocon Ifo Diosin catoan ahuun Yoshin Shara mato ya rafumashquin. Maton facufo ya chai manifoannafori ato ya rafumashquin,” —ishon Pedronun ato yoini.

⁴⁰Yoitan afanan Pedronun ato tsain ichapa yoini. Ato yoiquin isca huani, —Maton chaca shatucahuun, uhuun yoramishtichin. Nocon caifo futan mani futsanfoanri man fasi chaca huamisifo. Ascarafo iyamacahuun. Jesús icoinra huacahuun mato numanon, —ishon Pedronun ato yoini. ⁴¹Nicacaquin tres mil yorafoan icoinra huanifo. Ascano ato unu muran iquimapacuni.

⁴²Ascatan Jesushuunoa tapi-paiyaifoan Jesús fu rafuafo ya ichanancashon ato tapimafain ato futan pifain Upa Dios cufinifo. Asca huapaonifo.

Jesús icoinra huaquin tau huanifo cuscan

⁴³Nantififain Jesús shinancoinnifo. Ahuun tsain noiquicai ahua futsan shinanpainifoma. Natianri Jesús fu rafuafoan atofu inifo. Doce Jesushuunshon afu rafuafoan tsoan atiroma cus-

can huafain oinyomisifoma cuscarafoto oinmanifo. ⁴⁴Ascatan Jesús icoinra huamisifo shafatifi ichanannifo. Nantifi aton ahuarafoya cuscan pashcananpacunifo. ⁴⁵Aton mafo non ahuarafoto inanmitsacashon ahuun rafanan pui ficashon yopaifo ato inanshaquin.

⁴⁶Shafatifi Dios fu tsainti pushu muran ichanannifo Dios cufincani. Aton pushu muranri fasi unimacoinyanan ichananshon pishcaquin. Picaquin, —¡Aicho! Upa Diosin min noco shara huafafainiran, —ishon yoinifo. ⁴⁷—Upa Diosin min shararan, —ishon huapaoifo. Nantififain atohuunoa yoinifo, —Jesús icoinra huafaoan shararan, —huanifo. Ascatare nocon Ifohuunshon shafatifi futsafoanri ato futan Jesús icoinra huanifo. Ato fu ichanannifo.

Chato chatotiani cayani cuscan

3 Ascatan Dios fu tsainti pushu ano Pedro yafi Juan yatapacu Dios cufin focani fonifo. Yatatifi Dios cufi focani fopaonifo. ²Nocofunu chato chatotiani nanscarapan cainni nan anosi shafatifi tsaotiani. Atirifiton iyopaonifo anoashu pui yocacanone. Ascato Dios fu tsainti pushu shuinshcaian tsaoshon iquifurafafainifoan ato pui yoca yocati. A caincaitinin ahuun anu sharashta. ³Pedro yafi Juan iquifainpaiyainifoan oinquin, —Ua pui inancapun, —ato huafaiton. ⁴Pedro futan Juanpan fuuscaquin Pedronun yoini. —Noco fuuisihuun, —huaiton. ⁵—¡Aicho! Ua pui inancaniran, —ishon ahuun nomuran shinanni. Ascanshon ato foisini.

⁶—Uncai pui yamafinquin. Ascafiaquin un aya cuscan un mia inanone. Jesucristo nan Nazaret anoahuunshon funinaca huahuun. —Pedronun huani. ⁷Mananquiri mutsoinifoannaino funinaca huatan. Mua ahuun oposhco yafi ahuun tau muma curushu shara ini.

Pedronun funaiquimashta mutsoinifoanpaiyaino afin fianshinacahuani. ⁸⁻⁹Ascatan man chaima catan. —¡Aichoran! —icashu, fia fiashuita unimani. Ichotiritiritan. Dios fu tsainti pushu muran atofu cani. Ato fu cashion, —¡Aichoran! Diosin muan caya huakin. Dios shararan, —icashu ichotiritirini. Nantififain Israelifoan ichananti pushu anoshon oinquin futsanifo. ¹⁰Onancashon, —¡Aira! ¡Oincapon! Nan chato chatotiani caincaiti ahuun anu sharashtaran ano tsaoshu pui yocacamisamisi. ¿Ahuuscashumun cahuacacainniquin? Noncai ascara oinyomisimaran, —icashu ahuun yoinnainifo.

Cunu futsan ahuun anu Salomón anoshon Pedronun ato yoini

¹¹Ascato nanno cunu futsan ahuun anu Salomón muranshon nocofunu chato chatotiani Pedro yafi Juan poyatani. Nantififain a oinpai atoqui ichonifo. Nocotoshiqui oianfo, —¡Aira! ¿Ahuuscainmun? —icashu yoinannifo. ¹²Atoqui ichoainifoan Pedronun ato oinquin. Yoini, —Nocofunu Israelifoan ua nicacahuun. ¿Ahuuscain man mustairimun? ¿Ahuuscainmun man noco shararan ishon oincain? Na nocofunu chato chatotiani caya huaran ishon. Non sharacuai nocohuunashu cayama. Nocon curushhuunshocai cayama.

¹³Noncai acama. Nocon Upa Diosin ahuun oinmati Jesushuunshon caya huua. Nocon shunifo Abraham non Isaac non Jacobori Upa Dios aton Dios. Nan nocon Diosin mato oinmapai ahuun facu Jesús sharacoin ahuanamishiti huatiro. Manfin Jesús achimanitaquin futsafoan rutunonfo. Niaifon Pilaton a nichisharapafaiton “Nacai nocon niaifomaran,” man Pilato huaita.

¹⁴Jesucain ahua chaca huamisima. Sharacoinfiacun mancai caima-

paitama. “Jesuscai caimatamarocon rutumitsamisi Barrabás caimahuun,” man iquita. ¹⁵Jesús fustichin yora nimatirofiacun man rutuita. Man rutufiata Upa Diosin funimanita. Non ointa Jesús funiaiton. ¹⁶Man man tapia na nocofunu chato chatotiani imisi. Natian muma shara. Non Jesús icoinra huano ahuunoashu man caya. Man man oian.

¹⁷Uhuun yoramishtichin, mun tapia man Jesús onanshoma rutua. Mato niaifofoanricai onanfoma. ¹⁸Man aca cuscan tapiamafiaquin Upa Diosin nocon shunifo nan ahuun tsain yoishomisifoan inon pacoai yoiquin isca huanifo, “Cristo Diospan Furun omitsiscairan,” ishon inonpacoai cuscan yoinifo. ¹⁹Ascacun man chaca huamisi cuscan shatucahuun. Chaca huatamarocon Upa Dios shinanchahuun maton chaca soashonon. ²⁰Man ascaiton Upa Diosin mato unimamatiro. Ahuun Furun Jesús catonni maton numamisi Cristo inon. Matoqui afanan onon. ²¹Ahuun yonoshomisifoan nan inon pacoai Jesushuunoa yoinifo isca huaquin, “Upa Diosin yoiyotiani, ‘Un chipo nantifi funa shara imai. Afanan ahua chaca inonma. Un asca huayoai chain uhuun facu ufu nai muran iyoiran,’” inonpacoai cuscan Diospan tsain yoinifo.

²²Nocon shuni Moisés arifi yoini, “Nocon Ifon Diosin noco caifo futsa catonshquin noco inon pacoai yomisi inon. Ua cuscara inon. Nantifi mato yoiyai cuscan a nicasharacahuun. ²³Tsoan a nicacasmai afo amaquishon potatiro ariashu omitsiscapanon,” yoini. ²⁴Samuel Diosin tsain yoiquin tau huani. Nan inonpacoai cuscan. Ascano chiporifi Diosin tsain yoisimisifoan nannoricoinri yoinifo cuscacoin man aa. Nantififain Jesushuunoaasi yoinifo. ²⁵Manfin aton funafoquin. Ascan Diosin nocon shunifo yoiyotiani cuscan matori ashoshquin.

“Min funahuunshon nantifi manifoti anofo un ato shara huairan,” ishon Upa Diosin Abraham yoini. ²⁶Ascan ahuun Furun Jesús matoqui nichini ahuun oinmami inon. Matoqui nichiqui tau huani mato shara huanon maton chaca man cachiquiri huapanon, —ishon Pedronun ato yoini.

Israeli niaifofoan Pedro yafi Juan cunanifo ato yocashquin

4 Ascatan Pedro futan Juanpan ato yoiifoanno yorafohuunshon Dios cufimisifo Dios fu tsainti pushu cushumisifoanri aton niaifo non Saduceofori atoqui funifo. ²Upa Diosin Jesús funimanaran ishon Juan futan Pedronun ato yoiaino aton nomuran shinanchacanifo. ³Ascano man fari caino ato achinifo nan yamutan cunu muran ishinifo. ⁴Ascafiashon ato Jesushuunoa yoiifoan yorahuanrasifoan icoinra huanifo. Cinco mil nocofunfoan nantian icoinra huanifo.

⁵Iyoconaino Israelifoan aton niaifofo non Moisés cununi cuscan tapimamisifo Jerusalén ano ichanannifo. ⁶Nannori aton yorafohuunshon Dios cufimisi niaifocoin Anás yafi Caifás non Juan futsa non Alejandro non aton yorafori nanno inifo. ⁷Pedro yafi Juan caincurannaiton niaifofoan cusutumushon yocanifo. — ¿Tsoan mato yonoamun man aca cuscan man huanon? ¿Tsohuunshon man acaya huamun? —ishon niaifofoan yocanifo.

⁸Asca huaifoan Pedronun Diospan Yoshin Sharahuunshon ato cumani, — Niaifofoan un mato yoisharanon. ⁹Man noco yoca tsoa na chato chatotiani shara huamainquin. Man tapipai ahuscashumain cayaqui. ¹⁰Un mato cayacafi yoinon. Man nantififain uhuun caifo nan Israelifo yashon tapisharacahuun un mato yoinon. Jesucristo nan Nazaret anoahuunshon man caya muma

shara inon. Manfin Jesucristo ihui coyan iquinanqui mastaitaquin. Man naafiaacu Upa Diosin funimana.

¹¹ “Pushu yonomisifoan toquiri quishi shara potano pushu oni sharatiroma. Man potafiafo pushu ifoan catonni toquiri quishi shara nichishquin pushu mutsisipacoin inon,”

ishon Diosin tsain cununi. Jesucristo nan toquiri quishi cuscara. Manfin pushu yonomisifo cuscara man man potafia Upa Diosin a catonni ahuunoashu man ahuun yorafo inon. ¹² Tsoa futsacai noco numatiroma. Manifotifoan tsoa futsahuunoashucaí non ipatiroma. Jesucristo fustitofin nocon chaca soatiroquin non Upa Dios fu nipanon, —ishon Pedron ato yoini.

¹³ Ascan nicacani mustairinifo. Niaifofo yoinannifo, —¿Ahuuscaquimun na rafutan ahuamafishon ranotama noco yoiquin? Cunu tapiamafiamisishaquin noco shafacafi yoi. Jesús fu rafumisishaqui noco anori yoiquin, —icashu yoinannifo. ¹⁴ Ascano chato chatotiani cayasharashu atofu nia ini. Ascaitocai niaifofoan, —Cayamaran, —ishon yoitiroma ini. ¹⁵ Ascashonrifi Pedro yafi Juan cunu futsa muran nichinifo atohuunooa yoishcaquin.

¹⁶ —¿Non ahuusca huaimun na nocofunu rafu? Nantifi Jerusalén anofoan tapiafo na rafuhuunoashu nocofunu chato chatotiani man caya. Ascara tsoan oinyomisima. ¿Nonmun ahuusca na nocofunu rafu huaicai? Noncai futsafo fomantiroma. Cayamarancai non huatiroma. ¹⁷ Ascanshon non ato yoinon afanan Jesushuunooa tsoan yoiyamacahuun. Ascan futsafoanricai Jesushuunooa nicatorfomaran, —icashu yoinnannifo.

¹⁸ Ascatan ato cunu futsa murannooa cunani funonfo. Fuafoan ato yoinifo, —Afanan Jesushuunooa

tsoan yoiyamacahuun. Ahuunooa yoiyamacahuun, —ato huaifoan. ¹⁹ Asca huafiaifoan ato cumanifo, —¿Non mato nicayamaraquin Upa Diosin noco yonoa cuscan non nicatoromun? ¿Rato sharamun? Mafin shinancahuun. ¿Non mato nicaino Diosin nocoqui unimatiro iyamarai afin noco yonoa cuscan non yoiaino unimatiromainquin? ²⁰ Non oinmisi cuscan huafain non nicamisi cuscari non mato yoitiroan, —ishon Pedro futan Juanpan cumanifo. ^{21–22} Nicacani ato onaintimapaifiaquin nica nantifi yorafo, —¡Aicho! Upa Diosihuunshon chato chatotiani cuarenta fari aqui caa nanscarapan caini man cayahuamaforan, —ishon yoinifo. Ascan niaifofoan ato onaintimatamarocon ato yoinifo, —Man afanan Jesushuunooa yoiaiton non mato asca huatiroan, —ishon yoinifo. Yoicatan ato nichinifo.

Jesús icoinra huafoan Upa Dios cufini ahuun curushu ato inannon

²³ Nocon yorafohuunshon Dios cufimisi niaifofo non Dios fu tsainti pushu cushumisifoan ato nichiano Pedron yafi Juan Jesús tanamisifo fu ichanannifo. Ichanancashon niaifofoan ato yoia cuscan chanipacunifo. ²⁴ Nicacaquin Dios cufinquin isca huanifo. —Nocon Ifon, min nantifi iquinaquin. Min nai onihuafain mai onihuafain ununhuan min onihuani. Nantio nai murannooa yafi mai anoa non unuhuan murannooa min onihuani.

^{25–26} “¿Ahuuscaimun nan Israelifoma manifoti Diosqui fiishquicaniquin? Ipaitsi ichanancani chaca huapaicani. Manifoannati aton niaifofo ichanancani nocon Ifo Dios yafi Furun Cristo cuyopaicaniran,” ishon nocon shuni nan min oinmati David min Yoshin Sharahuunshon yoini.

²⁷ Nanscarifi atan nan niaifo rafu Herodes yafi Poncio Pilaton Israeliyamafiashu nocon caifo Israelifo fu ichanaintafo min Furun nan min oinmati Jesús min catonni chaca huashcaquin. ²⁸ “Uhuun facun nantifi yorafo omitsiscashoshquin ato nashonon,” ishon min shinanni. Min ahuamamishti huatiro. Ascan min shinanyoni cuscan huaitafo. ²⁹ Ascan nocon Ifon, shinanhuun. Nonfin min oinmatifoquin. Noco ati ati huacaniquin. Min curushu noco inanhuun non min tsain ranotamacoin ato yoinon. ³⁰ Min oinmati sharacoin nan Jesushuunshon tsoan atiroma cuscan huahuu. Ahuunshon isinin icaifo caya huafain tsoan oinyomisima cuscara sharafo ato oinmahuu, Upan, —ishon cufinifo. ³¹ Cuficatan ichananfona mai naiyanaiyaini. Ascatan nantifi nanno Diospan Yoshin Sharapan ato iquini ahuun tsain cayacafi ranotama yoinifo.

Nantifi ahuafo nantifina ini

³² Nantiffain Jesús icoinra huamisi-foan aton nomuran nannorisi shinannifo. Tsoan ahua futsa shinantanima. —Nan uhuunarifi matonaquin. Un aya cuscan man yopaiton un mato inantioran, —icashu yoinannifo.

³³ Ascatan nan doce Jesús fu rafumisifoan, —Nocon Ifon Jesús noco nashoashu funiaran, —ishon Diospan Yoshin Sharapan ahuun shinansharahunshon aton caifo yoinifo. Ascatare nantifi nan icoinra huafo Upa Diosin ato shinanmashara unimacoinonfo. ³⁴⁻³⁵ Aton mai inanmitsafain aton pushu inanmitsanifo ahuun rafanan pui ficashon a Jesús fu rafumisifo doce pashcashoshcaquin. Yopaifoan pashcashonifo. Ascarifi atan tsoa ahua yopatanima.

³⁶ Nantianri nanno nocofunu aton caifoan ahuun anu José. Nanton aton shuni Levipan funa. Unu

nushmancayan rafu mai tomahuan ahuun anu Chipre anoashu cainni. Jesús fu rafumisifoan anu futsa tuqui huani Bernabé. Onicoinnin tsainman yorafo aton fupihuanmapaimisi shinanshamapaimisiran. ³⁷ Ahuun mau inanmitsashon pui fishon Jesús fu rafumisifo inan yopatanaifoan pashcashopacunifo.

Ananías yafi ahuin Safira chaca huani cuscan

5 Ascano Ananías futan ahuin Safira mai inanmitsacashon ahuun rafanan pui finifo. ² Nanscatanfin atirifi pui tushu huafashocai cuyoinanima. Atirifi Jesús fu rafumisifo foshoni. Ato fomaní, —Nantifi pui un mato cuyoinaran, —ishon ato shinanmapaini. Aca cuscan ahuinin arusu tapini.

³ Ascaiton Pedronun yoiquin isca huani, —¿Ananías, ahuuscaimun Satanás min nomuran yonoaino min Diospan Yoshin Shara paraincain? Min mai inanmitsashon pui fia atifincai min noco inanma. Atirifi min mucua mina inon. ⁴ Min inanmitsataima minacoin iyoa. Min atirifi mucupaiquin min noco yoia shara icuana. Ascatarocon min noco fomanpai. Mincai noco fuparanima. Minfin Dios fuparanicai, —ishon yoini.

⁵ Asca huatapayaino Ananías nayacuhuani. Ascaino nantifi anofo ratucoinnifo. ⁶ Ascano pushcofoan rashunifo mai huai foshcaquin. ⁷ Man ascano tapiamaino ahuinri nocotoshini. ⁸ Nocotoshiaiton Pedronun yocani, —¿Man mai inanmitsashon rafanan pui fiamun? ¿Man man nantifi noco inanmun? —ishon yocaiton. —Ai. Mian yocai cuscafin iconquin, —ishon yoiaiton.

⁹ —¡Ohua! Ahuuscaim min funu futan tsoan tapimaran ishon “Diospan Yoshin Shara man fomanpayain. Tsoan tapimaran,” ishon man shinan. Man

shinan raca Diospan Yoshin Sharapan tapiama. ¡Oinpon! Na pushcohuaifoan min funu mai huatacani fucani miarifi mai huacaniran, —ishon Pedronun yoini. ¹⁰ Asca huatapaiyaino Safira Pedro nia naman pacuriscatani. Ascatan charish acucahuani. Ascatapaiyaino iqui furapaiquin oianfo man naa fuchitoshitan ihuifainifo funu patashari mai huai foshcaquin. ¹¹ Ascaiton nicacani Jesús icoinra huafo yafi futsafori ratucoinnifo.

Jesús fu rafumisifoan doce isca huani, —Iscaracai tsoan oinyomisimaran, —huanifo

¹² Ascano ichananti pushu ahuun anu futsan Salomón Jesús icoinra huafo nantifi nanno ichanannifo. Nannori afu rafumisifo doceton Diospan Yoshin Sharahuunshon tsoan atiroma cuscan huanifo. Yorafoan aton ointaifi. ¹³ Icoinra huamafoan ato oinquin yoinifo, —Jesús icoinra huafo yora shararan, —ifiatan Jesús icoinra huayamashu atofu rafunifoma. Musunifo. ¹⁴ Ascafiaino nocofunufu yashon ainfofoanri shafatifi icoinra huarianifo. Ascashu atofu ichanannifo.

¹⁵ Ascano yora isinin icaifo ato shuhua naratashon ihuunifo. Ascashon nanfo fai cusumun ratani cahuaquin, —Pedron ahuun yora faquishi ihuafainaino raca cayatiroati, —ishon shinannifo. ¹⁶ Yorahuanrasi Jerusalén patashari icafo isinincaifo ato ihuunifo. Atirifi yoshin chaca atohuun nushon ato fucashni huaiton ihuunifo. Ascanshon nantifi ato caya huamapacunifo.

Jesús afu rafumisifo doce omitsisca huanifo

¹⁷ Jesús fu rafumisifoan acaifo cuscan huafain yoiaino cuscan, —¡Aicho! Na yorafo shararan, —icashon yoinifo. Ascano Israelifoan aton yorafohuunshon Dios cufimisi niaifocoin yafi ni-

aifo futsafoan nicacaquin shinannifo, —Atohuun noiai cuscacai nocohuun noima. Atohuunooa yoisharai cuscacai nocohuunooari yoimisimaran, —ishon shinannifo. Curafiamisifo Jesús fu rafumisifoqui fiishquinifo. ¹⁸ Ascano ato achimacashon cunu muran iquimanifo. ¹⁹⁻²⁰ Iquifiafoan yamu nacucahuanaino Diospan oinmati afu nai muran icaton atoqui nocoshon ato yoini, —Dios fu tsainti pushu anoshon ato yoitacahuun. Ahuuscashomain nocon Ifo Jesús ato nimapacutiroquin ato yoitacahuun, — ato huani. Yoitan ato cunu fupotifo fupushoni. Fupushonano cain furanifo.

²¹ Shafaino Dios fu tsainti pushu muran iquitoshicashon ato yosiacfainifoquin. Israelifoan aton niaifofo ichanancashon cunu cushumisifo aton niaifofo ato nichinifo Jesús fu rafumisifo doce ihuitanonfo. ²² Ascano cushumisi niaifofo nococashon oian tsoa anoma oincani. Ascanafuran niaifofoqui chaninifo. ²³ —Non ato matoqui ihuupaifia cunu fupotifo fupocoian. Nannoshon ranushumuafan ato cushua. Non fupotifo fupushon cunu muran oian. Ano tsoa yamairan, —icashu cushumisi ranushumuafan aton niaifo uhuapafoqui chaninifo. ²⁴ Nicacani nocon yorafohuunshon Dios cufimisi niaifocoin non ranushumua aton niaifocoin non nocon yorafohuunshon Dios cufimisi naifofo futsafori mustairinifo, —¡Ohuashta! ¿Ahuuscain ascamun? ¿Ahuafinoanmun? ¿Non ahuuscatiromun? —ishon fasi shinanchacatanifo.

²⁵ Shinainfoanno futsan atoqui nocoshon yoini, —¡Oincapon! Na nocofunufu man cunu muran iquimafianatian Dios fu tsainti pushu muranshon yorafo yosicaniran, —ishon ato yoini. ²⁶ Nicacani ranushumua niaifon yafi niaifo patasharifo ato ihui focani. Fofiacashon curushcain ihuunifoma.

—Non ato curushcai ihuaiton yorafo sinatirofo noco toquirinin tsacatiroforan, —ishon yoinifo.

²⁷ Ato ihuunifo Israeli aton yorafo-huunshon Dios cufimisi niaifocoin ato yocanonfo, ²⁸ —Non mato cayacafi yoita Jesushuunoa man yosinonma. Ascacia man Jerusalén anoafoto man yoia-cufaina. Man ato shinanmapai nonmain na nocofunu Jesús rutumaitaquin. Noco rafancaniran, —huaifoan.

²⁹ Ascan Pedro futan Jesús fu rafumisi futsafoanri cumacaquin. —Nocofunun noco yonoa cuscan nicatamarocon Upa Diosin noco yonoai cuscan non nicacointiro. ³⁰ Manfin Jesús ihui coyan iquinanqui mastaitaquin rutushquin. Man asca huafia nocon shunifoan aton Diosin Jesús funimaita. ³¹ “Ua cuscara onihuafoti iquihuun aton Ifo inon,” ishon Apa Diosin Jesús yoini. Ascano Israelifo nocon Numamisi inon non chaca shatunon a ifo huashquin nocon chaca noco soashonon. ³² Non mato yoiai cuscan non afohuunoa yoimisi. Diospan Yoshin Sharapanri nannori yoimisi. Tsoan Dios nicacoiانfin ahuun Yoshin Shara aqui nichishquin afu nipanon, —ishon yoiaifoan.

³³ Nicacani fasi atoquei fiishquinifo. Ato rutupaicani. ³⁴ Ato rutupaifiaifoan Fariseo ahuun anu Gamaliel ato nastui nishon ato yoini, —Oinfain. Ato chifi nichiyocahuun un mato yoinon, —ishon yoini. Nan Gamaliel Moisés cununi cuscan tapimamisi. Nantififain ahuunoa yoimisifo, —Gamaliel fasi nocofunu sharacoin. Fasi tapicoianran, —ishon ahuunoa yoinifo. Ascashu nanno ichanannifo a nicapaicani. ³⁵ Ato yoiquin isca huani, —Uhuun yoramishtichin Israelifoan ua nicasharacahuun un mato yoinon. Man nocofunu rutupaicain. Oinfain. ³⁶ Shinacapon. Fari futsan nocon caifo futsan ahuun anu Teudas,

“Unfin mato niaifo itiroquinran,” ishon noco shinanmapaipaoni. Ascano cuatrocientos nocofunufoan a tanapaonifo. Ascacia futsafoan Teudas rutunifo. Ahuun tanamisifo pashcafainnifo. Ahua finontama.

³⁷ Chipo nocon caifo futsa Galilea anoashu noconi. Ahuun anu Judas. “Non niaifofo potanoncahuun,” noco caifo huani. Nanrifi rutunifo. Ascan nantifi ahuun tanamisifori pashcafainnifo. ³⁸⁻³⁹ Ascacufin un mato yoicain ua nicasharacahuun. Jesús tanamisifoan apaiyai cuscan anaitiriscatiroquin. Diosin shinan cuscan yositamarocon nocofunun afi shinan cuscan yoiquin ipaitsi yositirofo. Ascaiyamaiton Diosin ato yonoaitocai tsoa ato shatumatiroma. Man ato shatumapaiquin Dios fu chaca huan tanain cafiscas man huaicain. Ascacufin ato ahusca huayamacahuun. Ato nichicahuun, —ato huani.

⁴⁰ Nicacani, —Ahuun tsain cayacafi. Noco yoia cuscan non anon, —huanifo. Ascano Jesús fu rafumisifo iquifuranifo. Iquifuranaifoan fichiqui tuchiaaton ato fasi coshaqui futsanifo. Coshatan, —Afanan Jesushuunoa tsoa yoiyamacahuun, —ato huanifo. Yoitan ato nichinifo.

⁴¹ Atomaqui focatan —¡Aicho! Upa Diosin nocoqui shinansharaquin non Jesushuunoashu non omitsisca. Ahuunshon niaifofoan nocohuunoa shinanchacaran, —icashu unimanifo. ⁴² Ascano shafatifi Dios fu tsainti pushu ano yafi pushufotirifi tsain shara yoinifo, —Nocon Ifo Jesusfin nocon Cristonquin. Diospan Furunmun, —ato yosiaino. Ato yoiquin unupaonifoma.

Siete ato futan yonoafo catonni

6 Ato yosiainfoanno yora ichapafoan icoinra huacashon Jesús tanamisicoinfo inifo. Yora ichapafoan icoinra

huariapaonifo. Nantianri nanno Israelifo Griego tsainman inifo. Shoco futsafo Israeli tsainmansi inifo. Nan Griego tsain yoimisifoan tsain chipunifo. —Nocon caifo aton tsain fusti yoimisifoan shafatifi tushu pashcanan huacashon aton ainfo funuomafo inain cuscacai nocon ainfo funuomafo atori ati inanmaran, —ishon tsain chipunifo. ²Ato nicacani Jesús fu rafumisifo doce nantifi Jesús tanamisifo ichanancashon ato yoinonfo. —Non mato Diospan tsain yoifafaini. Noncai unutiroma mato tushu pashcashoshquin.

³Ascan nocon yoramishtichin, maton murannoa nocofunifo siete catoncahuun mato tushu pashcanan huanonfo. Man tapia ratofomain Diospan Yoshin Shara fu rafucain shinansharamisiquin. Nan cuscarafocatonhuun non ato yononon mato tushu pashcanan shara huanonfo. ⁴Ascan nonfin shafatifi Upa Dios cufifafainicain ahuun tsainri yoishquin, —ishon yoinifo.

⁵Nicacani nantifi unimanifo. Ascashon Esteban catonnifo. Nanton fasi icoinra huamisi. Diospan Yoshin Sharapan a iquina ini. Felipe non Prócoro non Nicanor non Timón non Parmenas non Nicolás afo catonnifo. Nan Nicolás Israelifomafishon nanfoan Diosin icoinra huacacashon arifi anorisi acaifo cuscan shinanni. Antioquía anoashu cainni. ⁶Aton catoncashon Jesús fu rafumisifo ano iyonifo. Ascan nan doce ato manmancashon Upa Dios cufishonifo.

⁷Ascatan Diosin tsain mai futsafoanriri yoifoanfainifo. Jerusalén anoshon samamashta icoinra huanifo Jesús tanamisifo ica ini. Israelifoan aton yorafohuunshon Dios cufimisifo ichapafaoanri Jesús icoinra huacashon ahuun tsain nicacoinnifo.

Esteban achinifo

⁸Esteban Upa Diosin shinan-masharani ahuun curushu inanni. Ascan ahuunshon ahuamamishti yora atiroma cuscan ato ismani. ⁹Ascano Israelifoan aton ichananti pushu futsa nanno ichananshon ato anunifo. —Apaiyai cuscan huatiroforan, —ishon atohuunoa yoimisifo. Nanfocai afanan oinmatifoma. Nanfoan aton mai Cirene anoashu non Alejandría anoashu non Cilicia anoashu non Asia anoafori. Nanfo Esteban fu fochismanantanannifo. ¹⁰Fochismanantanapaifaifoan Diospan Yoshin Shara Esteban shinansharamani. Cayacaficoan ato yoiaino tsoan cumanima.

¹¹Ascano fustirasi yoinanpacunifo. Tsoa futsa nicanonma. —Estebanhuunoa tsain chaca yoitacahuun. Nanton Moisés yafi Diosqui tsain chaca huaaran, —ishon ato yoitacahuun. Estebanhuunoa chani yoinifo.

¹²Ascan ahuunoa chani nicacani yorahunrasi Estebanqui fiishquinifoqui. Ascano niaifo patasharifo non Moisés tsain tapimamisifoanri Esteban achinifo niaifofo ano iyoshcaquin.

¹³Ahuunoa chani yoinifo, —Na nocofunun nocon Dios fu tsainti pushuhuunoa yafi Moisés noco yononi cuscahuunoi tsain chaca huariai. ¹⁴Man non nicamisi yoiaiton, “Jesús Nazaret anoaton nocon Dios fu tsainti pushu paoanshquin. Moisés noco yononi cuscaro fiananan huairan,” —ishon chani yoinifo.

¹⁵Ahuunoa chani yoicashon niaifofoan fuiscaquin oianfo ahuun fuso. Diospan oinmati afu nai muran ica ointsu fupishtacoin ini.

Esteban ato cumasharani cuscan

7 Ascatan Israelifoa aton yorafo-huunshon Dios cufimisi niaifocoin yocani, —¿Mihuunoa chaca huafo cuscan iconmun? —huaiton.

²Esteban cumaquin isca huani —Uhuun yorafoan ua nicacahuun. Nocon shuni Abraham Harán ano icataima Mesopotamia ano ini. Nantianri Upa Diosin fasi chashacoishon oinmaquin yoini isca, ³“Min mai anoashu non min yorafo anoashuri catahuun. Un mai futsa ari mia ismaicai. Nanno un mia iyoiran,” ishon Upa Diosin Abraham yoini.

⁴Ascatan Caldeamaquinoashu canishaquin Harán ano ini. Anoashu apa nani. Naacun non icano Upa Diosin nichini. ⁵Nuno nichifiashocai maishta inantaima. “Chipo min non min funafori un na mai inain matona inon,” ishon Upa Diosin yoyotiani. Anori yoi ai cuscaicai Abraham facu yatai inima. ⁶Yoiari “Min funafo yora futsafoan mai ano iishquicaniquin. Aton maima ano iishquicaniquin. Nanno cuatro ciento fari aton yonomisifo iishquicani. Ato fasi curushcai yonomashequin. Fasi omitsiscashceni. ⁷Ascacufin un nan yora futsafo onaintimai. Ascatan chipo aton mai anoashu focani nuno nocoshon ichananfainshcaquin ua cufishcaniran,” ishon Upa Diosin nocon shuni Abraham yoini.

⁸Ascán Upa Diosin Abraham yononi isca huaquin “Min furonanfacufo ato foshqui rupa shatuhuu. Ascán huatanfin min tapitiroquin. Unfin maton Upa Dios ipanacaquin. Un mato cushufafaini min funafo ichaparasi inon.” Ascacufin Abraham ahuun facu Isaac caintan ocho osha finontan facu ahuun foshqui rupa shatuni. Ascán Isaac nocofunuaitian man facu yari anuni Jacob. Ascán Jacob nocofunuaitian ahuun facu furonan-

facufo doce. Nanfo nocon shunifo. Afohuunshon nocon caifo anumisi.

⁹Nocon shunifoan aton ushto José noicasmacaquin yora futsa inannifo ahuun rafanan pui fishcaquin. Ascán José Egipto ano iyonifo nanno aton yonomisi inon. Asca huafainfoan Upa Diosin José potanima. A fu imisi. ¹⁰José omitsiscafiaiton Upa Diosin numani ahuun nomuran shinansharamani. Ascán Egipto niaifoa Faraón fasi José fuchipaipaoni. “Min niaifo patashari itiro. Nantifi uhuun yorafo non uhuun caifo min ato nantifi yonotiroran,” ishon Egipto niaifoa José yoini.

¹¹Asca huatan nantifi Egipto anofo non Canaán anofo fonicoín omitsiscapaonifo. Nocon shunifo tushuoma inifo. ¹²Nantianri nocon shuni anifoshta Jacob arifi tushu yamaino nica Egipto anofo man shuqui ichapa ya inifo. Asca ahuun facufo nanfo nocon shunifo nichini Egipto ano shuqui finonfo. ¹³Asca huatan chipo afanan Egipto ano fonifo tushu ficani. Nantianri José ahuun ochifo futan chipocuton onannifoma. Onainyamafiafoan “Uquian, José un maton ushto,” ishon ato yoini. Ascán Egiptofo aton niaifo Faraón arifi José ahuun yorafohuunoa nicani. ¹⁴Chipo José apa tsain fomani, “Upashtan, uqui ohuu. Un nunoshon mia cushusharanon. Nocon yorafo uqui ihuuhuu. Nan setenta cinco yora uqui ihuuhuu, upashtan” ishon José yoini.

¹⁵Ascán Jacob yafi ahuun yorafo Egipto ano fonifo. Nannoashu nocon shunifo ya nai cuyonifo. ¹⁶Naacun aton caya Siquem ano iyonifo mai huanonfo. Nocon shuni Abraham mai fiini. Noco-funu ahuun anu Hamor mai inanni pui finon. Nanno mahua quini muran nocon shunifo mai huanifo.

¹⁷Ascán Upa Diosin Abraham yoyoni cuscan ato Egipto anoashu cainti

chaima. Nantianri nocon shunifo Egipto ano fasin ichapacoin ini. ¹⁸Nantianri Egipciofoan aton niaifo funapacai nocon shuni Joséhuunoa nicayomisima. ¹⁹Nanton nocon shunifo parafafaini. Ato omitsiscamani. Fasi curushcain ato yonomani. “Maton facufo rama caincon potacahuun nanonfo,” ishon ato yononi.

²⁰Nantianri nocon shuni Moisés cainni. Caianshu rato facu futsacai a cuscarama. Upa Diosin aqui unimai. Oshu rafu non fusti apa yafi ahua pushu muran onunifo Egipciofoan fuchinonfoma. ²¹Oshu rafu non fusti finontan facu chifi cainmafashon shihuatinin fuposhon unu cusumun tsaoni a murannoashu uaicaiton niaifoan facu shomayaton fuchishon ihuini ahuan facucoin cuscara inon. Ascanshon pushconi. ²²Ascatan Egipciofoan tapiafo cuscan Moisés yosinifo. Fasi ahuan mapo shara. Egipciofoan tapini cuscan arifi tapiniquin. Ahuan tsainri cayacafi shara. Niaifo sharapan atiro cuscan arifi asca huapaoni.

²³Ascán Moisés cuarenta fari aqui caano ahuan nomuran shinanni isca huaquin, “Un natian uhuun caifo nan Israelifo ato oin cai atohuunoa tapishquin,” ishon shinanni. ²⁴Atoqui nocoshon nocofunu Egipcion Israeli coshaiton oinni. Ahuan caifo numapaiquin curushcain Egipcio coshakin namani. ²⁵Asca huatan ahuan nomuran shinanni “¡Aicho! Un aca cuscan uhuun caifoan nicacanquin tapitiro Diosin ua yonoa un ato numanon,” ishon shinanni. Anori shinanfiaino ahuan caifoancai anori shinannifoma. ²⁶Nan ifainaca shafatan oinpaiquin oian ahuan caifo rafu sutunainfoan oinquin. Ato numapaiquin, “Unucahuun. Manfin yorahuan tananquin. ¿Ahuuscaimun man sutunaincain?” ishon yoini.

²⁷Ato numapaifiaton ahuan caifo futsan sutuaiton cumaquin chaca huani. “Mifin ihuu. Mincai ahua. ¿Tsoan mia yonoamun min nocon niaifo inon min noco iquinon?” ²⁸¿Min Egipcio nocofunu rutuita cuscan uarifi mian rutupaimun?” ishon yoini. ²⁹Nicatan Moisés mai futsari ichoni. Nan mai Madián ano ichoni ato muran iyoni. Nannoshon ahuan facu furonanfacu rafu ani.

³⁰⁻³¹Ascano cuarenta fari finoanno Diosin ahuan oinmati afu nai muran ica Moisésqui nichini. Nantianri Moisés machi ahuan anu Sinain chaimashta cani. Nanno pushu yamacain nii yamai. Fasi yafi chofo uhuapama fusti nanno. Nii cuyamamishti urufiainocai coonima. Moisés oinni. Oiaingo mustairini. Ascán tapipai ahuscain nii cuyamamishti urufiashucaí nocaima chaimashta cashon. Oinni nii cuyamamishti uruai muran Upa Diosin ahuan oi nicani. ³²“Unfin min shunicaifoan aton Diosiquin. Abraham non Isaac non Jacobori un aton Diosiran,” ishon yoini. Nicatan Moisés ratui taritarini. Afanan uru oinyamafiain aqui ratuni.

³³“Unquian un nuno ica. Ahuara chaca ufu itiroma. Ascán min sapato pucahuu un mia yoinon. ³⁴Uhuun yorafo Egipto ano omitsiscái cuscan mun oian. Man pashapaiyaifoan mun nica. Ascán un fotoa ato caimashquin. Natian un mia Egipto ano afanan nichicai.”

³⁵Nan Moisés nocon shunifoan a nicacasmanifo. “¿Tsoan mia yonoamun min nocon niaifo inon noco iquinshquin?” ishon yoifiafo Upa Diosin Moisés catonni nocon shunifoan aton niaifo inon ato numanon. Nan nii cuyamamishti uruai anoshon Upa Diosin Moisés afanan Egipto ano nichini nocon shunifo numanon. ³⁶Nanno Dioshunshon ahuarashta tsoan oinyomisima shara ato ismani yoran atiroma cuscan ato ismani. Unuhuan ahuan anu oshin

anori tsoan atiroma cuscan Dioshuunshon ato ismani. Tsoan istaipamashon nanscasi huapaoni.

³⁷Nocon shunifo Israelifo yoini “Chipo Upa Diosin nocofunu ua cuscara matoqui nichishquin. Nocon caifo ishquiquin. Inon pacoai cuscan mato yoishquin a nicasharacahuun,” ishon Moisés ato yoini. ³⁸Moisés tsoan istaipama ano nocon shunifo fu ipaoni. Machi Sinain anoshon Diospan oinmati afu nai muran icaton a yoini cuscari nocon shunifo tapimani. Nan Diospan tsainman noco nimapacutiro ishon ato yoini.

³⁹Yoifiaiton nocon shunifo Moisés nicacasmanifo. “Min nocon yonotiro-maran,” ishon shinanni. Aton nomuran Egipto ano nasopaicani. ⁴⁰Ahuun ochin Aarón yoinifo “Dios futsan cuscara noco rami huashohuun. Nanton noco tapimatiro non raqui caimancai. Moisés noco Egipto anoshon iyoafiacun ahua finoanmun noncai tapiama. Machi mamaqui inacun non afanan oianmaran,” ishon yoinifo. ⁴¹Nantian Aarón ato moipan facu cahua shara ointsa rami huashoni aton Dios inon. “¡Aicho! Nan moipan facu cahua shara ointsa non rami huaa. Nan nocon Dios. Non ichananshotiro moi futsa rutushoshquin a fufori ratashoshquin nocoquin unimanon. ¡Aicho! Non rami huaa cuscan shararan,” ishon yoinifo.

⁴²Ascano Upa Diosin afanan atoqui unimanima. Ato potayoni “Ua afanan tanapaicanima. Ascacuncai un ato numaima. Aton diosicoinma ipaitsi aton nomuran shinantirofo. Fishifo ipaitsi shinantiro aton diosiran,” ishon Diosin yoini. Nocon shuni Amós inonpacoai cuscan Diosin tsain yoimisi ini. Diosin atohuunoa yoini cuscan cununi isca huaquin,

“¿Man cuarenta fari pushu yamai ano cahuacacainnai ua yoina rutushon

ua inanpaicani. Ahuara futsari ua inanpaicanimun? ⁴³Ma. Mancai maton nomuran ua shinancoianma. Man yoimisi isca huaquin, ‘Nocon dios Moloc yafi nan fishi Refán,’ man huamisi. Ahuara futsan man rami huashon. Noco diosiran man huamisi. Ascan un mato caifo futsa ano mato nichicai. Mato achinonfo aton yonomisifo man inon. Babilonia mai orima futsa ano fasi chai un mato nichicain.”

⁴⁴Nocon shunifo tsoan icamano foanfainpaonifo pano pushu fonifo a muranshon Dios cufinifo atofu inon. Ascan man isma Upa Dios aton Dios aforifi ahuun yoraquin. Upa Diosin nocon shuni Moisés oinmani cuscan pano pushu onihuani.

⁴⁵Ascatan fari ichapa finontan nocon shunifoan nan pano pushu fonifo. Nantianri aton niaifo ahuun anu Josué ato iyoni mai futsa finonfo. Diosihuunshon caifo futsafo nan mai anoafopotanifo aton mai inon. Nan Josué niaifo taupaonino man fari ichapa finontan Davidrifi yositirofo pano pushu muran ichananpaonifo Upa Dios cufishcaquin. ⁴⁶Upa Diosin David fasi noi aqui unimaicoinni. David Upa Dios cufinquin yoini, “Upa Diosin, min nocon shuni Jacob ahuun Dios nocon Diosiri, un mia pushu futsa shara huashoin. Ihui yafi toquiri pushu un mia onihuashopai a muran un non uhuun yorafo mifu inon mia cufishcaquin,” ishon yoini. ⁴⁷Anori cufifiainton furun Salomón pushu huanshoni.

⁴⁸Ascanfiacai Diosin yora pushu huaa muran itiroma. Diosin nai muran icanoshon nantifi finoncoian. Diosihuunshon nocon shunin inonpacoai cuscan yoini isca huaquin.

⁴⁹“Nai muran un ica. Nannoshon un nantifi oni huati un iquini. Nan mairi un onihuani. Nai muranshon

un mai oinfafainni. Nanri uhuuna. Nantifi onihuafoti nai murannoa yafi mai anoafoti uhuuna. ¿Ascan ahuuscashocon man ua pushu huashotiromun un a muran fusti inon futsa ano cayamashquin?
⁵⁰ ¿Un nantifi onihuanimamun?”

ishon Diosin yoini.

⁵¹ Manfin maton shunifo cuscaracoinquin. Fasi nicayosmashunifo. Upa Diosin tsain nicapaicoincanima. Man icoinra huacoinmisima. Diospan Yoshin Shara mato yoimisi cuscaai man nicacoinmisima. ⁵² Maton shunifoan nantifi Diosihuunshon inon pacoai yoimisifo man ato omitsiscamapaoni. Inonpacoai yoimisi futsafoan yoinifo, “Nocon Numamisi isharamisi nocoqui oshquiquin,” ishon yoipaonnifo. Nanfoanri nocon shunifo man rutunifo. Man yoinifo cuscan nocon Numamisi shara nocofiacun nanrifi man rutuafo. ⁵³ Upa Diosin ahuun oinmati afu nai muran icafo nichini ahuun tsain mato inaniafocai man nicapaimaran, —ishon Esteban ato yoini.

Esteban nani cuscan

⁵⁴ Nicacani fasi fiishquinifo. Aqui sinacoinceni. ⁵⁵ Ascano Diospan Yoshin Shara Esteban rafuquinaino nai muran foisini Diosin chashamanaiton ointapaiquin oian Jesús Apa fu nia ini. Nan rafutan ahuamamishti huaifoan oinni. ⁵⁶ Oinshon yoini, —¡Oincapon! Un nai muran oin. Nanno Jesucristo Diospan furun nocoqui nichini afu nia. Un oinran, —ishon ato yoini.

⁵⁷ Nicacani aqui sinacoinceni. Mucanifo. Ahuun tsain nicacasmacani pafopomunifo. Aqui ichonifo. ⁵⁸ Achicashon pushurasi pasotainri sharafonifo. Aton sahuuti pucashon ointiaca ahuun anu Saulo nia naman machinifo. Ascacatan toquirifoan Esteban tsacaquin futsanifo.

⁵⁹ Toquirinin tsacaifoanno Esteban iscani, —Ifo Jesús, uhuun yoshin mi ari ihuihuun, —ishon yoini. ⁶⁰ Yoitan ratoconun mai chachishon oi ashcafinin yoini, —Ifon, ua chaca huafiaifoan ato numahuu. Ato rau huahuun, —ishon yoini. Yoitan nani.

8 Naacun Saulo ato yoini, —Manfin shara huaqui rutuaquin, —ato huani.

Saulo icoinra huafo omitsiscamani

Nan shafatanri icoinra huamafoan Jesús icoinra huafo Jerusalén anoshon fasi ato omitsisca huanifo. Ascano Judea ari non Samaria mai ariri pashcafaonnifo. Nan doce Jesús fu rafumisifocai atofu fonifoma. Jerusalén ano nitunifo. ² Ascano nan Dios tanasharapaiyaifoan Esteban mai huanifo. Noicani fasi uainifo. ³ Ascantan Saulon Jesús icoinra huafo fasi ato noicasmani. Ato cuyopaiquin. Fasi ato omitsisca huani. Pushuti iquicahuacacaini ato achishon cunu muran iquimashquin. Ainfofo yafi nocofunufori ato asca huani.

Tsain shara Jesushuunooa Samaria anoa yoinifo

⁴ Ascatan nan Jerusalén anoashu pashcafaonnifo. Diosin tsain Jesucristo-huunooa ato yoifoanfaini. ⁵ Nocofunun ahuun anu Felipe Samaria mai ano canni. Nanno pushurasi futsan anoshon ato Cristohuunooa yoini. ⁶ Yorahuanrasifoan nicanifo. Dioshuunshon tsoan atiroma cuscan ato ismani. Ascaiton oincani fasi nicapaicani aqui taisinifo. ⁷ Yoshin chacafo yorafomaquinooa potani. Atomaqui potaino fiisifainifo. Yoratishon charishi futsafo non chato chatotianifo Felipe Jesushuunshon ato caya huani. ⁸ Asca huano nantifi pushurasifoti unimacoinnifo.

⁹Ascan nanno Samaria mai ano noco-funu ahuun anu Simón. Nanton yoshin chacahuunshon yoran atiroma cuscan huapaoni, —Tsoa futsacai ua cuscarama. Unfin fasi uhuapa sharaquin, —ishon cacapaimisiton yoini. ¹⁰Ascano nantifi yorafoan nan niaifofo yafi yora ahua-mafo a nicacoinnifoquin. —Nan no-cofunu Simón fasi ahuaamishti hu-atiro. Diosihuunshon yora atiroma cus-can noco ismailan, —ishon yoinifo.

¹¹Yoshin chacahuunshon yora atiroma cuscan huaiton oincaquin ahua-mamishti acaiton nan fusti fari ranan tanannifo. ¹²Ascafiainfoan Felipe ato tsain shara Jesucristohuunoa yoiaiton Upa Diosin yorafo iquinai cuscan a icoinra huanifo. Icoinra huaifoan ato unu muran iquimacuni. Nocofofunofo yafi ainfofori iquimacuni. ¹³Nan Simón arifi icoinra huacun unu muran iquimani. Ascano Felipe Jesucristohuunshon ahuaamishti yoran atiroma cuscan huaiton oin fasi mustairini. Ascashon Simón Felipe mufoanfainni acaiton oinquin.

¹⁴Ascano Jesús fu rafumisifo doce Jerusalén anofoan Samaria anofo Diospan tsain icoinra huaifoan nicacaquin Pedro yafi Juan ato ari nichinifo. ¹⁵⁻¹⁶Nococashon nan rafutan oian Samaria anofoan nocon Ifo Jesús fusti icoinra huanifo. Ahuun Yoshin Sharahuunoa tapiataifoma. Ato iquinataima. Unu muran iquimacucano Jesús fusti ifoancoinnifo. ¹⁷Ascano Pedro futan Juanpan manmanyanan Upa Dios cufishonifo ahuun Yoshin Shara ato iquinon.

¹⁸⁻¹⁹Jesús fu rafumisifo rafu Pedro futan Juanpan ato manmanni Diospan Yoshin Shara ato iquinaiton Simón oinni. Oinshon yoini isca huaquin, —Uarifi tapimahuun man aca cuscan un ratoran yora mayatashon Diospan

Yoshin Shara ya un ato imanon. Man ua tapimacun un mato pui inanon, —ishon ato yoini.

²⁰—Ma. Min shinan raza non puihu-ushon Diosin noco inanpaiyai cuscan non fitiro. Anorimafinquin. Ascano min-fin min pui ya min maicain. ²¹Min no-muran min Diosihuunoa shinansharama. Ascacucain non Dios yonoshonai cuscan min no futan atiroma. ²²⁻²³Min nomuran min shinanchaca cuscan mun onan. Mincai Diospan yonomisifoan atiro cus-can min atiroma. Ascan min chaca mimuran fospicoian. Chaca min ifo. As-can nocon Ifo Jesús cufihuun min nomuran min shinanchaca cuscan rau huanon, —ishon Pedron yoini.

²⁴—Ua Ifo Jesús cufishohuun min ua yoia cuscan ua Diosin onaintimanonma, —ishon Simón cumani.

²⁵Ascatan Pedro futan Juanpan Samaria anofo nocon Ifo Jesús tsain ato yoicatan Jerusalén ano nasofainifo. Focaquin pushurasifo ano ato tsain shara Jesushuunoa yoifonifo.

Felipe yafi Etiopía niaifo patashari

²⁶Nantianri nocon Ifo Jesús ahuun oinmati afu nai muran icaton Felipe yoini, —Na fai tapiaquiri nii yamai Jerusalén yafi Gaza nushman-cayan catahuun, —huani. ²⁷Caquin no-cofonu Etiopía anoa oaiton oinni. Nan nocofunun ahuun caifo aton niaifo patashari. Ahuun niaifoncoinnifo. Ahuun caifo aton pui cushushomisi in-iquin. Jerusalén anoshon catani Upa Dios cufitani. ²⁸Nasocurani oi ahuun inapan aya ninifoaino ahuun taramuti chinutamuashu cayacafi cani. Tsaoshon Diospan tsain Isaías cununi cuscan oin-foni aya caino.

²⁹Oinfoicai Felipe fu noconanni. Noconanshon Diospan Yoshin Shara Felipe yoini, —A taramutiyahuun aqui catanhuun —huani. ³⁰Aqui

ichotan nicani Isaías nan inonpacoai Diosin tsain cununi cuscan anufoaiton. Nicaquin yocani, —¿Min oiain cuscan min tapiamun? —yocaiton.

³¹—Ma ¿Ahuuscashorocon un tapiafin? ¿Tsoan ua yosiamaiton? —huaiton. Ahuun iyomisi nitumatan. —Mapuinifoanhuun. U fu tsoainacahuahuun, —huani. ³²Mapuinifoantan oinni Isaías cununi cuscan oinquin. Cunuquin isca huani,

“Nan chashoan iyoshon rututirofo cuscan arifi iyonifo rutushcaquin. Chashoanun facu ahuun rani shatuainfoanno furoitiroma cuscarifiai arifi pusinima. ³³Rafini huanifo ahua chaca huua nicayamafiashon niaifofaan numapainifoma. Numatamarocon rutunifo. Chaca huacoinnifo cuscacai non cainmatiroma, tsoancai atirifi noco tapimatiromaran,”
ishon Isaías cununi cuscan oinni.

³⁴Ascashon Felipe yocani, —¿Isaías cununi cuscan ahuunoa cununi iyamaraimun futsahuunoa cununi? Ua yoipun, —ishon Etiopía niaifo patashari yocaiton.

³⁵Cumaquin, —Isaías Jesushuunoa cununiran, —ishon cumani. Nan tau huaquin yoiaino Diospan tsain futsafori ismani a Jesushuunoa cununi. Diosin tsain shara ahuunoa oinmani. ³⁶Caino atoqui unu noconi nocofunun etiope yoini, —Oinpon unu. ¿Mian na unu muran iquimatiromun un Jesús icoinra huacoinnai cuscan un ismanon? —ishon yocaiton. ³⁷—Jesucriston Diospan Furun min ointi muran min icoinra huacoinnaiton un mia iquimatiroman, —ishon Felipe yoini.

³⁸Asca huatan ahuun iyomisi nitun huani. Nitun huano Felipe fu fotocani unu muran iquimanon. Ascano iquimapufoantan cainmani. ³⁹Unu cusumun

nocoafono Diosin ahuun Yoshin Sharan mai futsari Felipe iyoriscatani. Nocofunun oinni Felipe yamariscatanaiton afanan oinnima. Ascafiashu fasi unimai ahuun mai ari cani. ⁴⁰Ascanrifiatan Felipe mai futsa ahuun anu Azoto ano nitariscani. Nanno yafi nantifi pushurasi Cesarea fai anori cashon tsain shara Jesushuunoa ato yoifoanfaini.

Saulo Jesús ifoanquin shinan futsacunfoanni

Hch 22.6-16; 26.12-18

9¹⁻²Nantianri Saulo nantifi Jesús icoinra huafo rutupaiyai. —Un nantifi Jesús tanamisifo un rutuicain, —ishon yoini. Ascan Israeli aton yorafohuunshon Dios cufimisi niaifocoin ano cashon yoini, —Ua cunushoan un nantifi ichananti pushu Damasco ano ismanon min ua yonoo un Jesús icoinra huafo nocofunufu non ainfori fuchishon Jerusalén ano un ato cunu muran iquimanon, —ishon yoini. ³Ascanofin Jerusalén anoashu cai Damasco ano nocoti chaima samamashta nai arishon chashatanaino pacuni. ⁴Pacuquin ahuun oi nicani, —Saulo, Saulo, ¿Ahuuscaquimun mian omitsisca huaiquin? —huaiton.

⁵—Ifon, ¿Minmun tsoaquin? —ishon yocaiton. —Unquian Jesús. Mian omitsisca huai. ⁶Funihuu. Pushurasi Damasco ano catashquin nannoshon min ahua huaimancain un mia yoinon, —huani.

⁷Yoiaino afu fofo puusinifoma. Ahuun oi nicafiaquin tsoan oinnifoma. ⁸Saulo funinaca huapai fushoacucahuanaiton mutsoinifoannifo. Ascashon Damasco ano iyonifo. ⁹Nannoshon osha rafu non fustitan oinyamafain ayayamafain piqui tununi.

¹⁰Asca huatan nanno Damasco ano Jesús tanamisi futsan ahuun anu Ananías namapan cuscara Jesús yoini,

—Ananías, —huaiton —Unquian, Ifon, —huaiton.

¹¹—Fai Cayacafiran huamisifohuun catahuun. Ari cai Judaspan pushu ano catahuun. Nocoshon min ato yocatiro nocofunu Saulo Tarso anoashu cainni nanno pushu muranquin. Nannoshon Saulo ua cufinquin. ¹²Ahuun nama-pan cuscara mia oian min manmainno afanan oinsharanon, —huaiton.

¹³—Ifon, tsain ichapa ahuunoa mun nicamisi. Nantonfin mia icoinra huafo Jerusalén anoafo ato chaca huamisiquin.

¹⁴Natianri mun nica Jerusalén anoashu nuno oi. Nocon yorahuunshon Dios cufimisi niaifofoan a yonoa nantifi mia icoinra huafo cunu muran iquimaniran, —huaiton.

¹⁵Yoifaiton, —Un mia yoia cuscan catahuun. Un na nocofunu catoan Israelifoma non aton niaifofo non Israeliforifi uhuunoa ato yoinon. ¹⁶Uhu-unoashu fasi omitsiscái un oinmacoinshquiran, —ishon yoini.

¹⁷Ascatan nicafainicai Ananías cani. Cai pushu muran iquini. Iquicain Saulo fuchitan manmantoshini. —Mun oa. Uhuun yorashtan, min fain oquin nocon Ifo Jesús oian. Nanton ua nichian min afanan oinsharafain ahuun Yoshin Sharapan mia iquinon, —ishon yoini.

¹⁸Yoiaino ahuun furo murannoashu pusu cuscara fupacumuni. Ascashon oinsharacufaini. Ascatafin Jesús icoinra huashu unu muran iquitan funinaca huaniquin. ¹⁹Iquitan cainnacahuan pini. Pitan muacai afanan shaca fuanima. Ascatan mutsisinacahuani. Shafa ranan Jesús tanamisifo fu Damasco ano yoini.

Saulo Damasco anoshon ato yosini

²⁰Anoashu ichananti pushu ano nocoshon ato yoini isca huaquin, —Jesús Diospan Furunquin, —ishon ato yoini. ²¹Nicacani mustairinifo. —Ahuuscaquitsi Jerusalén anoa Jesús

tanamisifo ato chaca huafain. Nunoari ahuun tanamisifo munushushon nocon yorafohuunshon Dios cufimisi niaifofoqui ano yonon natianrifi, “Jesús Diospan Furunquin” noco huaiquin, —icashu yoinannifo.

²²Ascano Saulo Jesushuunoa fasi tapiquin finacoinni. Ahuun curushu Jesús inanni ahuunoa ato yoinon. Ascan cayacaficoín ato yoini, —Jesús Diospan Furun nocoqui nichiniran, —ishon tsoa futsacai anori yoiaiton nicayomisifoma. Ascaiton shinancaquin, —¿Ahuuscashocaicon na nocofunun tapicoianmun? —ishon ahuun caifoan Israelifoan shinannifo.

Saulo ato rashquimafainni

²³Ascano shafa rananun ichananshon Israelifoan shinanpainifo ahuuscashomain Saulo rutumatirofoquin.

²⁴Ascano futsan Saulo yoini, —Mia rutupaicaniran —ishon tapimani. Yonoafono shafatishon yafi yamutishon cushushinifo Saulo oaiton rutushcaquin. Pushurasi aton caincaiti anoshon cushunifo. ²⁵Asca Saulo caicuranaítan rutupaifiaifoanno fomancayan pochinin tsuhuu anori futanmanhuan muran nanushon yamutan tanamisifoan fotomapacufoannifo.

Saulo Jerusalén ano ini

²⁶Fotomafo Jerusalén ano cani Jesús tanamisifo fu iquicai. Iquicafaiton aqui musunifo. —Nacai Jesús tanamisicoimaran, —icashu yoinannifo. ²⁷Ascafiaino Bernabé icoinra huacoinni Saulo tanasharacun. Ascashon Jesús fu rafumisifo doce ano iyoni ahuunoa shara ato tapimanon. —Damasco fain caquin Saulo ano caiton nocon Ifo Jesús oian. Ascano Damasco anoshon noco Ifohuunoa ranotama ato yoifafainiran, —ishon ato yoini. ²⁸Nicacaquin icoinra huanifo Saulo atofu Jesús tanamisi

ica. Ascano atofu iyopaoni. Jerusalén anoafori ranotama nocon Ifo Jesushu-unoa ato yoini. ²⁹Ahuun caifo Israeli-fofiashon Griego tsain tapinifo ato Jesushuunoa yoiaino fochishmanantanainifo. Ascashon a rutupainifo. ³⁰Nannori Jesús icoinra huafoan nicacatan Cesarea ano yoinifo. Anoshon Tarso ano nichinifo.

³¹Ascaino Jesús icoinra huafoan Judea anoafo non Galilea anoafo non Samaria anoafori isharainifo. Nantian tsoan ato omitsiscanima. Diospan Yoshin Sharapan ato mutsismama Jesús tanasharashu aton nomuran fupi huamani. Nanscaino paratamafain Jesús icoinra huanifo. Icoinra huacashon Dios nicasharapainifo.

Eneas caya huamani cuscan

³²Nantianri Pedronun ato yosifoan-fafaini. Icoinra huafo Lida anori oinmitsai cani. ³³Nannoa nocofunu ahun anu Eneas fuchini. Charishi futsua ini. Ocho fari aqui caa funitiroma ini. ³⁴Fuchishon Pedronun yoini, —Eneas, Jesucristo mia caya huamaquin. Funi-huu min oshati shara huahuu, —ishon yoini. Asca huaino samamashta funina cahuani. ³⁵Nantifi Lida anoafo non Sarón anoafoanri oincashon nocon Ifo Jesús icoinra huanifo.

Dorcas man nacoinfiacun Jesushuunshon Pedro funini

³⁶Ascatan Jope mai futsari ano ainfo ahun anu Dorcas ica. Ahun anu futsa Tabita. Nan ainfo Jesús tanasharamisi. Shara huamisi ahumafori ashomisi. ³⁷Nantianri isinin ipapacuhuanashu naani. Nacun rashucashon pushu fomancayan ratanifo. ³⁸Ascano Jesús tanamisifoan nicafo Pedro Lida chaimanoa. Nicacaquin yora rafu Pedroqui nichinifo yoinon, —Oinrisca huayonon, —Pedro huanifo.

³⁹Nicatan atofu cani. Nococatan pushu fomancayan mapufainifo. Nanno ainfo funuomafo uainifo. —Oinpon. Nocon yora yamashtan nocon sahuutifo icushushomisi. Niyoshon noco shara huamisirán, —icashu uaiquin Pedro yoinifo.

⁴⁰—Chifi cainfaintacahuun, —Pedronun ato huani. Foainfono ratoconun mai chachipacufoantan Dios cufini. Ainfo yamashta oinquin yoini, —Tabitan, funinaca huahuun, —huaino. Fupuinacahuatan Pedro oinni. Ointan tsoainacahuani. ⁴¹Ascaiton Pedronun mutsoinifoanni. Mutsoinifoantan Jesús tanamisifo yafi funuomafo cunani Tabita man funia ato oinmashquin. ⁴²Oincani nantifi yorafo Jope ano chanifoanfainifo. Ascaiton nicacani yora ichapafoan nocon Ifo Jesús icoinra huanifo. ⁴³Ascatan Pedro Jope pushurasi ano nituyoni. Nocofunun ahun anu Simón nan fichi shinan huamisi ahun pushu muran iyoni.

Pedro yafi Cornelio

10 Nantianri nocofunun ahun anu Cornelio mai futsa Cesarea ano ini. Afin ranushumuafaoan aton niaifo. Nan ranushumuafaoan anumisi —Italianoran, —huamisifo. ²A non ahun yorafori Diosquiri shinansharamisifo. Nocofunu fasi shara. Ahuomafo ato inanmisi. Dios cuffafainmisi. ³Ascan shafa futsan fari nai pochinin racano oshashoma namapan cuscara Diospan oinmati afu nai muran ica aqui oaiton oinni, —Cornelion, —huaiton. ⁴Fasi ratucoinquin oinni, —¿Ahua min ua yoipaimun Ifon? —huaiton. —Diosin mia oian min shafatifi cufiainton min yora ahuomafo pui inanmisi. ⁵⁻⁶Ascan nocofunufo Jope ano nichihuun. Nanno nocofunu Simón ahun anu futsa Pedro

ihuinon. Nan fichi shinan huamisi ahuun anuri Simón ahuun pushu muran ica. Ahuun pushu unuhuan cusumunriran, —ishon Diosin nai oinmatinin yoini.

⁷Yoitan amaquinoashu cani. Ascan Cornelio ahuun oinmati rafu non ranushumua ahuun cushumisi nanton Dios shinanmisi cunani. ⁸Diospan nai oinmatinin yoia cuscan nantifi ato tapimani. Tapimashon ato Jope ano nichini.

⁹Ascan iyoconaino fari masafinin racano Jope chaimashta noconifo. Nantianri Pedron pushu manmancaya cashon Upa Dios cufi caicani. ¹⁰Fonaincaiton futsan pichashoni. Pichanqui anaitiataima Pedron oshashoma namapan cuscara ahua futsa oinni. ¹¹Nai fupuicano pano putanmanhuan cushtocoin nai murannoashu fotopacucahuani. ¹²A muran yoina futsa futsatapafo non ronofu non mai ano sharatirofo non puiafori. ¹³Oinquin ahuun oi nica isca huani, —Pedron, funihuu. Rutushon piishquin, —huaiton.

¹⁴—Ma, Ifon. Ascaracai un pimisima. Moisés noco yononi na cuscara non pitiroma. Suyu chacaran, —huaiton.

¹⁵Afanan ahuun oi nica, —Diosin na cuscarafu imashara. Ascan afanan nan chacaran huayamahuu, —huani.

¹⁶Rafu non fusti nanscaracoin oinni. Ahuun unutaqui afanan nan pano putanmanhuan nai muran cani.

¹⁷Ascano Pedronun ahuun nomuran fasi shinanpaini, —¿Ahua ua Diosin yoipaimun? —ishon shinanni. Anori shinanquin nan nocofunufu Cornelio nichian Simón pushu caincaiti ano nococashon yocanifo. ¹⁸—¿Nocofunu Simón ahuun anu futsan Pedro nunomun? —ishon yocanifo.

¹⁹Nantianri Pedro namapan cuscara shinainno Diospan Yoshinin yoini, —

Nocofunu rafu non fustiton mia funai fuaforan. Un ato miqui nichian. Ascan shinanachayamahuu. ²⁰Fotopacucahuatan atofu catahuun, —huani.

²¹Ascaino Pedro atoqui fotoni. —¿Man ua funai fuamun? ¿Ahuuscaquimun man ua funaica? —huaiton.

²²—Nocon niaifo ranushumuaton noco nichian non mia ihuunon. Nanton nocofunu shara. Diosquiri shinanfafaimisi. Cornelio nocofunu shararan min caifo Israelifoan huamisifo. Diospan oinmati sharapan afu nai muran icaton yonoa, “Pedro min pushu ano ihuitahuun mia yoisharanon,” ishon yoitan. Ascan “Ua ihuishotacahuun,” noco huaiton. Non mia ihui oaquin —huanifo.

²³Nicaquin, —Iqui fucahuun. Non pinon. Nuno oshayoshcaquin, —ishon Pedro ato yoini. Iyoco futsaino atofu cani. Icoinra huafo Jope anoafori atofu fonifo.

²⁴Focanashu iyocofutsaino Cesarea ano noconifo. Nannoshon Cornelio ato cunano ahuun yorafu ahuun pushu ano ichanannifo Pedro manacani. ²⁵Pedro pushu muran iquiano Cornelion fuopacucahuatan, —Min fasi shararan —ishon yoini. ²⁶—Funihuu. Uncai Diosimafinquin. Urifi un nocofunuquin, —huani.

²⁷A fu tsainquincai cunu futsan muran caashon yorafu ichanancashon manacaquin oinni. ²⁸Ato yoini, —Man man tapian nocon shunifoan yonoa non Israelifoma fu rafutiroma. Non matofu oinmitsatiromaran, ishon noco yoini. Ascaciacun uhuun namapan cuscara Upa Diosin ua tapimaita un tsoahuunoa shinanachatiroma. Atofin nantifi manifoannati noicoinquin. ²⁹Man ua iyopaiyainocai un cacasmama. Ascatamarocon un samamashta oa. Natian un

tapipai ahuuscaquimain man ua ihuipaiquin, —ishon Pedro yoiaiton.

³⁰ Cornelion cumani, —Osha rafu non rafuri finontan nantianri un Upa Dios cufiaino nocofunu ahuun sahuuti chashaino uqui niriscatana. ³¹ “Cornelion, min cufiain cuscan Upa Dios nica. Min ahuuomafo inainton oian. ³² Ascashon nocofunufo Jope ano nichihuun Simón miqui ihuunon. Ahuun anu futsa Pedro. Simón futsan nanton fichi shinan huamisi ahuun pushu muran ica. Ahuun pushu unuhuan cusumunri icaran” ishon ua yoita. ³³ Ascano un samamashta nocofunufo nichian mia ihuunonfo. ¡Aicho min noco shara huaa! Samamashta min nocoqui oa. Ascashon man non ichanan nocon Ifon minhuunshon noco yoiyai cuscan nantifi non nicanon, —ishon Cornelion yoiaiton.

Pedronun Cornelio pushu muran icafo ato yoini

³⁴ Ascaiton Pedronun nishon yoini, —Nantian mun tapia iconquin. Upa Diosin nantifi yorafo nan manifoti anofo noicoian. Upa Diosincai toon huatan noima nanscasi huaquin noicoian. ³⁵ Manifoti ahuun tsain nicapaicani shara huan tananmisifofin Upa Diosin ahuun facufo itirofoquin. ³⁶ Diospan Furun Jesucristo manifoti anofoan aton Ifo. Ahuunshon Upa Diosin afanan noco onaintimaima. Man nicaino fasi unimacoincaquin. Nannori Upa Diosin uhuun caifo Israelifo tapimani. ³⁷ Judea mai anoa ica cuscan man man nicamisi Galilea ano ato yoiquin tauhuani. “Maton chaca shatucahuun Dios icoinra huacahuun un mato unu muran iquimanon,” ishon Juanpan ato yoini. ³⁸ Ascan man man nicamisi Juan cachiori Jesús oni. Upa Diosin ahuun Furun Jesús ahuun Yoshin

Shara nichian afu rafunon ahuunshon ahuamamishti yora atiroma cuscan anon. Ahuara sharafo huafoanfaini. Upa Diosin afu imisi nantifi yora yoshin chaca ato yonoaiton atomaquinao potani.

³⁹ Nantifi nan aca cuscan uhuun caifo Israelifo mai anoa yafi Jerusalén anori man non oinmisi. Ihui coyan iquinanqui mastayamufo. ⁴⁰ Asca huafiafo osha rafu non fustitan Upa Diosin mai murannoa funimaita noco oinmana. ⁴¹ Atirifoancai oinyamuama. Ratoranfo nan Upa Diosin catoanfoansi oinyamufo. Mai murannoa funiano non a futan pifain ayayamufo. ⁴² “Manifoti anofo uhuunoa ato yoitacahuun. Upa Diosin ua catonni nantifi yorafoti nan niafo nan naafori un ato yoitiro ratofomain un icano nipatiro iyamarai omitsiscapanaca muran focanicain. Ato yoifoanfaincahuun,” Jesús noco huayamufo. ⁴³ Diosin tsain yoishomisifoan isca huani ahuunoa cununifo. “Tsoan a icoinra huacun ahuunshon Upa Diosin aton chaca soatiro rau huanon,” ishon cununifo. —Pedronun ato yoini.

Israelimafoan Diospan Yoshin Shara finifo

⁴⁴ Yoiaifono nantifi ahuun tsain nicaimisifo Diosin ahuun Yoshin Shapan ato muran nanucoinni. ⁴⁵⁻⁴⁶ Ascano anori tsain nicayamafiamisishacaquin Diosin Yoshin Sharahuunoashu tsain futsanman iqui futsunifo. Ascaifoan nicacani Israelifoan nan icoinra huafannano mustairinifo. —¡Aira! Nan yorafo nocon caifomafiashu Upa Diosin ahuun Yoshin Shara atoti nanumanaran, —ishon yoinifo. Ascano Pedron ato yoini. ⁴⁷ —Non Diospan Yoshin Shara fia cuscan afoanrifi fiafo. ¿Ascan ahuuscaimun unu muran iquimamutiromaquin? —ishon Pedro yoini.

⁴⁸ Ascano, —Jesucristo icoinra huafo ato unu muran iquimapacuhauun, — ato huani. Ascatan, —No fu iyopun, — Pedro huanifo.

Pedronun icoinra huafo Jerusalén ano ato tapimani

11 Ascano Jesús fu rafumisifo doce non icoinra huafo Judea anoafanri nicanifo Israeli anoamafoanri Diospan tsain icoinra huanifo. ²⁻³ Ascano Pedro Jerusalén ano noconi ahuun caifo nan Israelifoan aqui tsain curushu yoinifo, —Min mani futsa muran cashon aton pushu muran iquia ato futan min piaran, —ishon yoinifo.

⁴ Ascant nantifi ahuara finoan cuscan ato shafacafi yoiquin isca huani.

⁵ —Un Jope anoshon Dios cufiaino namapan cuscara un oian. Panomanhuan ronoashu nai murannoashu uqui fotoaiton un oian. ⁶ A muran yoina futsa futsatapafu non shafo cuscara mai ano sharatiofo non puiyafari mun oian. ⁷ Un oiainno un ahuun oi un nica ua yoia, “Funihuu. Rutushon piishquin,” ua huaa.

⁸ “Ma, Ifon. Uncai ahua chaca pitiroma. Moisés noco shunifo yononi cuscacai na cuscara non pitiroma. Ascant afocai un pimisima,” huani.

⁹ Nai muranshon afanan ua yoia, “Nan Diosin shararan huaafin nan sharaquin. Acai sharamaran min huatiroma,” ua huaa. ¹⁰ Nai murannoashu panomanhuan fotoi rafu non fustia. Ascatan afanan nai muran caa.

¹¹ Nantianri nocofunu rafu non fusti Cesarea anoashu pushu ano nocofo. ¹² Ascano Diospan Yoshin Sharapan, “Min caifoyamafiacun shinanchacayamahuu. Natian atofu catahuun,” ua huaa. No futan icoinra huafo seis ufu fofo. Non Cornelio pushu muran iquia. ¹³ “Uhuun pushu muran Diospan oinmati afu nai muran

ica uqui nocoita. ‘Min yorafo Jope ano nichihuun Simón ahuun anu futsan Pedro miqi ihuunon. ¹⁴ Aafin mia tsain shara yoinon. Ahuun tsain nicaino min non min yorafori Dios fu nipatiroran,’ ishon ua huaitaran,” ishon Cornelio ua yoita.

¹⁵ Un ato yoiaino Diospan Yoshin Shara nocoqui nocoyamua cuscan atoquiri noco. ¹⁶ Ascano nocon Ifo Jesús noco yoini cuscan un shinanpacutana, “Juanpan mato unu muran iquimapacuni maton chaca shatushon man oinmanon. Ascafia Upa Diosin ahuun Yoshin Shara matoqui nichishquin mato ya imapacunon,” ishon noco yoini cuscan uhuun nomuranshon un shinan. ¹⁷ Upa Diosin ahuun Yoshin Shara noco inanni cuscan atorifi inainta. Ascacuncain ahuuscaquin “Ato inainyamahuu” un Diosin huatiroma. Uncai anori yoitiroma, —ishon Pedron ato yoini.

¹⁸ A nicacashocai afanan tsoan — Min aca cuscan afanan huayamahuu, —huanifoma. Ascatamarocon, —¡Aicho Upa Dios shararan! Nocon caifomari ato shinan futsamana afu nipanonfo, — ishon yoinifo.

Icoinra huafo Antioquía ano ichanannifo

¹⁹ Ascano Esteban rutuaifotian ato omitsiscamaifoanno Jesús icoinra huafo pashcafaifafainifo. Atirifi Fenicia ano foaino atirifi Chipre ano foaino atirifiri Antioquía ano fonifo. Nococashon aton caifo Israelifo fusti tsain shara Jesushuunoo yoifoanfainifo. ²⁰ Ascafianashu atirifi Chipre yafi Cirene anoashu Antioquía ano fonifo. Tsain shara Jesucristohuunoo Israelifomari yoifocani. ²¹ Upa Diosin ahuun Yoshin Shara atofu ini. Aton tsainhuunshon

Israelimafoan ichaparasiton nocon Ifo icoinra huanifo.

²²Ascano Jesús icoinra huafo Jerusalén anoa nicacaquin Bernabé Antioquía anoshon nichinifo.

²³Nocoshon Diosin ato shara huaa cuscan atohuun ramapaiyaiton oinni. Oin ahuun nomuran fasi unimani. —¡Aicho! Natian man Jesús icoinra huaa. Ascan nocon Ifo tanasharacahuun. Maton nomuran ahua futsa shinanyamacahuun, —ato huani. ²⁴Nan Bernabé nocofunu fasi shara. Diospan Yoshin Sharapan rafuquimisi. Fasi Jesús icoinra huani. Ascacufin ahuunshon yora ichapafoan nocon Ifo Jesús icoinra huanifoquin.

²⁵Ascatan chipo Bernabé Antioquía anoashu Tarso ano cani Saulo funaicaí.

²⁶Aqui nocoshon Antioquía ano ihuuni. Ascano nanno fari fusti nan rafu Jesús icoinra huafo ichapa fu ichananifo ato Diosin tsain tapimanifo. Antioquía ano Jesús tanamisifo ato anu futsaqui tau huanifo, —Cristofoan —ishon ato anunifo.

²⁷Ascaino nantianri Diosin tsain inon pacoai cuscan yoimisifo Jerusalén anoashu Antioquía ano funifo. ²⁸Ascan icoinra huafo ichanancanashu ato nicapai futsan ahuun anu Agabo Diospan Yoshin Sharahuunshon ato yoini isca huaquin, —Nantifi maitio Romanofoan ato yonoafo tushu cuyoiran, —ishon ato yoini. Icon nan Romano Claudio niaifotian tushu cuyocoinni. ²⁹Nicacatan icoinra huafo Antioquía anofoan pui ichanan huacashon icoinra huafo Judea mai anoa yopaifoan fomanonfo. Nan inainton inannifo. ³⁰Asca huacatan Bernabé yafi Saulo inannifo Jerusalén ano fomanonfo. Nanno Jesús tanamisifo aton niaifofo inanno pashcananonfo.

Santiago rutufain Pedro cunu muran iquimanifo cuscan

12 Ascatapaiyaino Herodes niaifoan atirifi Jesús icoinra huamisifo achimani cunu muran iquimashquin ato omitsiscamanon. ²Ascashon Juanpan iyoa Santiagori achimani nopun tushtunon. ³Tushtumana nicai Israelifo aqi unimanifo. Ascanori Israelifoan aton fuusititian ahuun anu misi farashati maisi pimisiforan huanifo nantianri Herodes yonocun Pedro achinifo. ⁴Achimashon cunu muran iquimani. Ascashon ranushumua dieciseis cushuriapaonifo. Nantianri Israelifoan aton fuusititian Diosin nai oinmatinin aton shunifoan facu iyoafofosi finonmani shinanshcaquin. —Nan fuusititian cuyoano un Pedro cunu murannoa cainmayoshquin ahuun caifoan oinonfo. Ascano un yoishquin nanton chaca huaquin rutucahuun un ato huashquinran, —ishon Herodes shinanniquin.

⁵Ascano Pedro cunu muran iquimanaiton Jesús icoinra huafoan fasi Upa Dios cufishonifo.

Diosin cunu murannoa Pedro cainmani

⁶Herodes iyoco futsaino Pedro rutupai. Nan yamutan Pedro fasi osha murancoian ini. Cunopan munushushon ocuma rafutan ranushumu rafushon aton mucu rafuqui nushashon cushushinifo. Atiri ranushumuafu ahuun cunu caincaiti anoshon cushushinaifoanno. ⁷Ascantapaiyaino Diosin ahuun oinmati afu nai muran ica cunu muran niriscatani. Faquishfiashu punariscatani. Ascaino Pedro moinpaiquin pipasni, —Funiriscahuun, —huaino ahuun cuno mupucumuriscatani. ⁸Ascashon, —Min sahuuti yafi min sapato sahuufain min

nanushumutinin nanushumuhuu ufu cashquin, —ishon Diosin oinmati afu nai muran icaton Pedro yoini.

⁹Ascaino cunu murannoashu afu caicainni. Caicainquin ahuun nomuran shinanni, —Uncai cacoinnima. Uhuun namapan raca un caicatin, —ishon shinanni. ¹⁰Ascanshu cunu rafu mapai cainni. Ranushumua cushuafo finonfaini. Ascatan ahuun cuno fupoti ano nococaquin oian man fupucua ini. Ascaino cainnacahuatan fai tanafainifo. Chaimashta afu catan Diosin oinmati afu nai muran ica amaqui yamariscatani.

¹¹Ascaino Pedronun shinanni, —Iconfinquin. Uhuun Ifo Jesús ahuun oinmati nai muranshon ua nichian ua numaquin. Herodes yafi uhuun caifo Israelifoan ua rutupaifiaifoan ua numaran, —ishon ahuun nomuran shinanni.

¹²Ahuun nomuran tapicoinfaini cani Diosin ashoan cuscan. María pushu ano cani. Nan María ahuun facu Juan. Ahuun anu futsan Marcos ini. Nanno yora ichapa ichanancashon Upa Dios cufiaifono. ¹³Caincaini ano nocotan Pedronun cunu fupoti tooto huani. Ascaino oinmati shomaya ahuun anu Rode fupoti ano caquin. ¹⁴Pedro ahuun tsain onantan fasi unimacoinquin samamashta nasocain ato chani huani. Cunu fupuyotama. —Pedro man oashu. Caincaini ano niaran, —ishon ato yoini. ¹⁵—Ma. Mimun nison, —huaifoan. —Ma. Nancoinfinquin, —iriani. —Man rutuafoano ahuun oinmati Diosfu imisi nocoqui oaran, —ishon shinannifo.

¹⁶Ascafiaifono afi Pedronun tooto huariani. Fupuacufoan oianfo nancoinini. Fasi mustairinifo.

¹⁷Fasi tsaincaifoan, —Tsainyamacahuun. Nocon Ifoan ua cunu muranno caimana cuscan un mato tapimanon, —ato huani. —Un

mato yoi ai cuscan Santiago yafi nocon yora a futan icoinra huamisifo ato yoitacahuun, —ato huani. Yoitan pushu futsa ari cani.

¹⁸Ascatan man shafaino Pedro yamaino fuchicanashu ranushumuafoan fasi mucanifo. —¿Ahuuscashucon Pedro yamaimun? —icashu yoinannifo.

¹⁹Herodes nicatan, —Funariscahuun, —ahuun ranushumuafo huani. Fuchiya-maifoan Herodes cushumisifo fasi yocar-iani. Tsoancai tapinima raquimain Pedro caaquin. Ascaiton ranushumua futsafo ato yononi a nantifi nan cushumisifo rutunonfo. Ascano Herodes Judea anoashu Cesarea ano cani. Nanno osha rananni.

Herodes niaifo nani cuscan

²⁰Nantianri Tiro anoafo yafi Sidón anoafoqui Herodes atoqui sinacoinni. Ascafiaino rau huapaicani aficoin aqui fonifo yoisharapaicani. Herodes ahuun oinmatinin ahuun anu Blasto yoi ai cuscan fasi icoinra huani. Ascano yoicaquin, —Blaston, niaifon Herodes noco yoishohuun non afu tsainon. Nocoqui sinaiquin. Non afu ipaisharaicai afanan nocoqui sinanonma. Nocoqui sinaquin ahuun yorafo yonotiroquin afanan noco tushu yafi non yopai cuscan noco inanonma, —ishon Tiro anoafo non Sidón anoafoanri Blasto yoini. Nicatan yoi aifo cuscan ahuun niaifo tapimani.

²¹Ascaiton, —Ato yoi huun un samamashta atofu tsainnon, —ishon yoini. Chipo aqui funifo. Sahuuti sharacapocoin niaifoan sahuumisi cuscara sahuuashu tsaolan ini. Ahuun tsaoti ano tsaoni ato yoishquin. Tsain ichapa ato yoini. ²²Yoiquin anaititapaiyaino nantififain oi ashcafinin isca huanifo, —Nacai nocofunuma. Nafin Dioscoinqin. Diosin ahuun oi cuscaracoinran, —ishon yoinifo. ²³Herodescai, —Un Diosinma. Dios fustifin shararan, —inima. Asca

huaifoannocai Diosin oinmatinin afu nai muran ica yonoa isinin imariscatani. Noinmanhuarasi ahuun shaqui muran fospitanaino nariscani.

²⁴Ascafiaino Diospan tsain shara Jesushuunoa manifoti yoiaacunifo. Paratama yorafoan icoinra huanifo.

²⁵Ascaino Bernabé yafi Saulo icoinra huafo Jerusalén anoafo ato shara huani Jerusalén anoashu Antioquía ano nasofuranifo. Juan ahuun anu futsan Marcos arifi atofu caní.

Bernabé futan Saulo Diosin tsain yoiquin tau huani

13 Ascatan Antioquía anoashu Jesús icoinra huafo ichananfafainifo. Atirifi Diosin tsain inonpacoai cuscan ato yoifain. Atirifi ato yosipacunifo. Nanfo futsa Bernabé non Simón ahuun anu futsa Negro non Lucio nan Cirene yafi Manaén nan Herodes niaifo fu pushconi non Saulo. ²Ascan shafa futsaino nanfo ichananshon piqui tununifo nocon Ifo Jesús cuficani. Asca huaifono Diospan Yoshin Sharapan yoini, —Un Bernabé yafi Saulo catoan ua yonoshononfo. Ato cufishocahuun. Ascan un ato tapimatiro un ato yonomai cuscan, —ishon ato yoini.

³Ascatan piqui tununifo Upa Dios cufinquin anaíticashon Bernabé yafi Saulo manmanshon cufishonifo. Ascashon ato nichinifo futsafo Diosin tsain yoitanonfo.

Bernabé yafi Saulo Chipre ano ini

⁴Asca huatan Diospan Yoshin Shara ato Seleucia ano nichini. Anoashu shashon pocufainifo Chipre mai ano ocuma rafu unu tapia rafu nushmancayan mai mapaifainifo. ⁵Nanno Salamina pushurasi ano noconifo. Nococatan Israelifoa aton ichananti pushu muran iquinifo ato Diospan tsain yoishquin. Juanpan

ahuun anu futsa Marcos atofu caní. Ato futan ashoicai.

⁶Nannoashu nantifi nan mai natoroti ocuma rafu unu tapiano foanfafaínifo. Ascano pushurasi ahuun anu Pafos ano noconifo. Nanno Israeli shoingtian Barjesusran, ishon anuniquin. Inaca cuscan yoipaifiaquin icon yoinima. ⁷Nan niaifo Sergio Paulo fu imisi. Niaifoan ahuun mapo fasi shara. Shinansharamisi. Bernabé yafi Saulo nicapaiquin ato cunani Diospan tsain nicashquin. ⁸Ascafia Barjesús ahuun anu futsan Elimas nan shoingtian ahuun niaifoan Diosin tsain nicatima huani, —Niaifo Sergio Paulo, nan Bernabé yafi Saulo aton tsain nicayamahuu. Mia amaquiri yoitiroquin, —ishon yoini.

⁹Ascaiton Saulon ahuun anu futsa Pablo Diospan Yoshin Shara iquinano aasi oinquin yoini, ¹⁰—Min nan yoshin chaca Satanás ahuun facu. Nan sharafoti min noicasmái. Minfin chanimisiquin. Min fuparapaimisi. Nocon Ifoan yorafo cayacafi tapimafiatiro afohuunoa min ato amaquiri yoimisi. ¿Ahuutian min unuimun? ¹¹Natian nocon Ifoan mia onaintimái. Ipaitama min fusho acucahuani. Fari chashaino min afanan oinyoimaran, —ishon Pablonun yoini. Asca huatapayaino fushoriscatani. Ascashon cunacufaini, —Ua mutsoyopun ua iyoshquin, —ishon yoini. ¹²Ascaino niaifo mustairini nocon Ifoan tsain fasi curushcoin oin. Ascaiton oinquin arifi nocon ifo Jesús icoinra huani.

Pablo yafi Bernabé pushurasi ahuun anu Antioquía ano ini nan Antioquía Pisidia mai ano ini

¹³Ascashu Pafos anoashu Pablo yafi afu rafuafoan unu pocufaini Panfilia mai mapaifainifo. Nanno pushurasi ahuun anu Perge ano noconifo. Nannoashu Juan Marcos atomaqui nituni. Nitushu Jerusalén ano nasoni. ¹⁴Perge

anoashu Pablo yafi Bernabé Antioquía futsa ano fonifo. Nan Antioquía Pisidia muran ini. Nanno Israelifooan aton tunutitian ichananti pushu muran iquicanashu tsaonifo. ¹⁵ Moisés Diosin tsain cununi cuscan yafi inon pacoai yoimisifoan Diosin tsain cununi cuscan yoicatan niaifooan atori yoimanifo, — Nocon yoramishtichin, man nocon ointi fupi huamatiro noco yoicapun, —ato huanifo.

¹⁶ Ascatan Pablonun ninacahuan ato mushanshon yoini, —Uhuun yorafo Israelifo futan imafofoan no futan Upa Dios cufipaiquin ua nicayocahuun un mato yoisharanon. ¹⁷ Nonfin Israelifoquin. Upa Diosin nocon shunifo catonni ahuun yorafo inonfo. Egipto ano iyoshon ato shara huani. Ahuun curushhuunshon Egipto anoshon ato iyoni. ¹⁸ Tsoan istaipamashon cuarenta fari ato cushusharayopaoni. ¹⁹ Siete mani futsafo aton mai muranshon ato potani. Nocon shunifo inanni atona inon. ²⁰ Nocon shuni Abraham ahuun mai anoashu cainitian yafi nocon mai ano nocon shunifo funifotian cuatrocientos cincuenta fari finonni.

Ascano Diosin yononi nocon shunifo futsan nocon caifo aton niaifo inon. Samuel niaifoataima nocon shunifooan aton niaifofu ichaparasi iyopaoni. Samuel inonpacoai cuscan yoimisi ini. ²¹ Ascatan nocon shunifooan Samuel yoinifo, “Caifo futsa niaifo cuscara noco inanhuun,” huanifo. Ascano Diosin Cispan ahuun facu Saulo catonni aton niaifo inon. Aafin cuarenta fari Israelifooan aton niaifo ipaoniquin. Saulofin Benjamín ahuun funa iniquin. ²² Upa Diosin Saulo unumashon nocon shuni David tuqui huaniquin. Ahuunooa yoini isca huaqui, “Isaipan facu David ua noicoin. Uhuun ointi muran un fuchipaiyai cuscan arifi fuchipaiquin.

Un yonoa cuscafin atiroquin,” ishon yoini.

²³ David ahuun funafo futsahuunshon Upa Diosin Jesús cainmani nocon numamisi inon. Noco yoiyoni cuscan Israelifo muran nocoqui nichini. ²⁴ Jesús nocon caifo Diosin tsain yoiaatima Juanpan noco caifoti yoini isca huani, “Maton chaca shatucahuun. Ascano un mato unu muran iquimanon,” ishon ato yoini. ²⁵ Ahuun yono anaiticuantan Juanpan ato yocaquin, “¿Man shinanmun un tsoanquin? Uncai maton Numamisima. Ascafia Upa Diosin samamashta nocoqui ahuun Furun nichishquin. Ua fasi finoan. Un ahuun oinmati ipaifiashucai Upa Diosin uhuun chaca soayamanocai un itiomaran,” ishon ato yoini.

²⁶ Uhuun yoramishtichin, manfin Abraham ahuun funafoquin. Uhuun caifomafiashon Dios icoinra huatan marifi ua nicacahuun. Upa Diosin ahuun Furun nichini nocon Numamisi inon. Na tsain shara Jesushuunooa manifesti Upa Diosin yoipai. ²⁷ Diosin tsain inonpacoai yoimisifoan cununifo isca huaquin, “Nocon numamisi rutushcaniran,” ishon cununifo. Tunutitiansin na cunu noco yoifafaini. Ascafiacai nocon Numamisi nocoano Jerusalén anoa icafo futan nocon niaifooanri a onannifoma. Ascan Diosin tsain inonpacoai yoimisifo cununifo cuscan nanscacoin huaquin. Nocon Numamisi Jesús rutunifo. ²⁸ Ahuashta chaca huaiton oianmafiaquin, “A rutucahuun,” niaifofu futan yorahunrasifooan Pilato huanifo. ²⁹ Ahuunooa nocon shunifooan cununi. Nantifi ahuunooa cununifo cuscan huacashon ihui coyan iquinanmaquinshon fotomashon mahua quini muran mai huanifo.

³⁰ Asca huafiaintafo Upa Diosin mai murannooa funimani nipanon. ³¹ Ascano man samano Galilea anoashu Jerusalén

ano afu foafoan oinnifo. Nanfo ahuunoa natian nocon yorafo yoitiro.

³²⁻³³ Nan tsain shara ahuunoa non mato yoi. Upa Diosin nocon shunifo yoiyoni cuscan nonfin aton funafoquin noco ashoan. Jesús funimana. Diosin tsain nan Salmo rafu yoini isca huaquin,

“Min uhuun facu. Natian un

nantifi un ismai un mihuun noiai cuscan oinonfo un min Upacun,”

ishon cununi. ³⁴ Diosin ahuun Furun yoini cuscan Isaiás inon pacoai cunuquin isca huani,

“Ahuara shara tsoan oinyomisima un mia ashoshquin. Nannori un David yoiyoni cuscan un mia inanon,”

ishon yoini. Ascan cununi cuscan Upa Diosin ashoni. Ahuun Furun naafia-cun mai murannoa funimani afanan nanonma. ³⁵ Nanscara Diosin tsain futsan aqui cununi,

“Upa Diosin ahuun Facu shara cushusharani payocononma,”

ishon cununi.

³⁶ Davidhuunoacai cununima. Man non tapia Diosin yonomani cuscan David ahuun yorafo ashoquin. Anaititan naani. Ahuun shunifo maini ano arifi maini. Ascano ahuun caya payoconni.

³⁷ Ascafiacun Upa Diosin Furun funimayamua payocononma.

³⁸⁻³⁹ Ascacufin uhuun yoramishtichin, un mato tapimapai Jesushuunshon Upa Diosin nocon chaca soashotiro noco rau huanon. Nan mato yoi. Moisés noco yononi cuscacai nocon chaca soatiroma. Ascafiashu tsoan Jesús icoinra huaiton Upa Diosin ahuun chaca soashotiro.

⁴⁰ Oinfain nan inon pacoai yoimisifoan cununi cuscan man anonma.

⁴¹ “Nicacapon. Man niyoaichain un ahuara sharacoin mato ashoicain. Ahuara un mato ashoai cuscan futsan mato yoiaiton mancai icoinra huaima. Man yoishquin, ‘¡Cuu! ¿Tsoan na tsain icoinra

huatiromun? Nonmaqian,’ ishon man yoishquin. ‘Ascan nanonquin,’”

—ishon Diospan tsain cununi.

⁴² Ascatan tsainqui anaititan ichananti pushu murannoashu Pablo yafi Bernabé fonifo. Focashon, —Man noco tapimapaiyai cuscan afanan tunuti futsaino no fu ichanancahuun noco afanan tapimashquin, —ishon yoinifo. ⁴³ Ascano nantifi ichananti pushu murannoashu fonifo. Israelifo yafi futsafoanri Upa Diosin tana cuscan afoanrifi tanapaicani atofu fonifo. Pablo yafi Bernabé mufainifo. Ascashon ato yoini, —Nocon yoramishtichin, Diosin mato shara huashoiaian cuscan shinancahuun. Unuyamacahuun, —ato huani.

⁴⁴ Ascatan semanana futsan aton tunutitian nantifi yorafo nan pushurasi anofo ichanannifo nocon Ifoan tsain nicashcaquin. ⁴⁵ Fasi yorahuanrasi ichanannifo ato nicacani. Israelifoan oincani Pablo yafi Bernabequi sinanifo. Ascano yoiäfo, —Pablonun noco yoiäi cuscan chacacoin. Jesuscai Diospan facumaran, —ishon yoinifo. Ato roanifo.

⁴⁶ Asca huafiainfoanno ranotama ato cumanifo, —Non Diosin tsain Jesushuunoa mato yoiqui tauhuai yoi non oa. Ascafiaiton man nicacasmai. Nicacasmahucai man Upa Dios fu ipatiroma. Ascacun non nocon caifoma yoiäi. ⁴⁷ Nocon Ifoan noco yononi isca huaquin,

“Un mato yonoi man chashamati cusca man inon. Man manifestifo oinmai ahuuscashumain man ufu ipatiroquin,”

—ishon yoini.

⁴⁸ Nicacani Israelifoma fasi unimanifo. —¡Aicho! Nocon Ifoan ahuun tsain fasi shararan, —inifo. Tsoan Upa Diosin catoan afu nipashquin icoinra huanifo.

⁴⁹Ascano nan mai anoafoan nocon Ifoan tsain Jesushuunoa yoinifo. ⁵⁰Yoifi-aifoan Israelifoan atoquei tsain chaca huanifo. Pablo yafi Bernabé omitsisca-manifo. Atoquei tsain chaca huacatan nan ainfofo Dios tananpaiyaifo non ni-aifofoanri Antioquía anoshon aton nomuran Pablo yafi Bernabequi shinanchacashon aton mai anoshon ato rafu potanifo. ⁵¹Ato potaifoanno aton sapato potapota saquin Jesushuunoa nicasmaifoan ismaifo. Ascatan Iconio ano fonifo. ⁵²Nan Antioquía ano icafo rama Jesús icoinra huacashu fasi unimanifo Diospan Yoshin Sharapan ato iquinano.

Pablo yafi Bernabé Iconio ano ini

14 Iconio anoshon Pablo futan Bernabé amisifo cuscan pushurasi futsa anoshori ato yoinifo aton ichananti pushu muranshon. Ato shafacafi Jesushuunoa yoiainfoan Israelifo non yora futsafoan ichaparasion icoinra huacoinnifo. ²Ascanfiainfoan Israeli atirifoan icoinra huafoma atoquei tsain chaca huanifo. Ato chaca huaifoan yora futsafoanri aton nomuran atoquei shinanchacanifo. ³Ato asca huafiainfoanno Pablo yafi Bernabé nanno iyopaonifo. Nocon Ifohuunshon ranotama ato Jesushuunoa yoinifo. —Nocon chaca soashotiro Dios fu ipanon, —ishon ato yoinifo. Ahuunshon ahuafo fasi sharafo tsoan oinyomisima cuscara fusti ato ismanifo. Asca huaifoan Diosin ato oinmani ahuunshon ato yoinonfo.

⁴Ascafiainfoan Iconio anoafoan anorisi shinannifoma. Ascashon Pablo futan Bernabé ato yoiainfoan cuscan atirifoan icoinra huanifo. Ascafiaiton Israelifo nan icoinra huamafoan ato yoishonai cuscan icoinra huanifoma. ⁵Ascano Israelifo yafi futsafo aton niaifofori ichanannifo yoinanshaquin, —Non Pablo yafi Bernabé omitsisca huanon. Non ato toquirinin tsacan rutushquin,

—icashu yoinannifo. ⁶⁻⁷Ascaifoan nicacani anoashu Licaonia mai ari ichonifo. Nanno pushurasifoan aton anu rafu Listra yafi Derbe anoshon. Ato tsain shara Jesushuunoa yoinifo.

Pablo Listra anoshon toquirinin tsacanifo

⁸Listra ano nocofunu chato chatotiani nanscarapan cainni cahuascamisima. ⁹Pablonun ato yoiaino arifi nicacoinni. Ascaiton fuisquin Pablonun ahuan nomuran shinanni, —Na nocofunu Jesús caya huamatiro icoinra huanon, —ishon shinanni.

¹⁰Ascashon yoiquin, —Funiuu, —huaino. Nicatapai aficoi fiashinacahuani. ¹¹Ascaiton oincani yorahuan-rasi tsain futsan man inifo. Licaonia tsainman inifo.

—¡Aicho! Diosifo nocoqui fotoa. Nocofunu ointsafishu dios rafu nocoqui fotoaran, —icashu yoinannifo.

¹²Bernabé anu futsa tuqui huaquin Zeusiran huanifo. Pablonri aton tsain ichapa yoiaiton anu futsaqui Hermes huanifo. ¹³Pushurasi patashari pushu huanifo Zeus aton dios cufishcaquin. A muranshon Zeus yonoshomision Pablo yafi Bernabé shinanmaqui charofo ya moi funufo ihuunshoni. —Man diosiran, —ishon ato moi rutushopainifo ato inanshquin. ¹⁴Man acai cuscan nan rafutan oincaquin aton sahuuti fashnunifo aton nomuran ointi isincoinaquin ato oinmapaiquin. Ato muran ichotanonfo,

¹⁵—Nocofunufon. ¿Ahuuscain man noco isca huashopaiyain? Noncai Diosimafinquin. Nonrifi maton cuscara nocofunu rafuquin. Non mato tsain shara yoi oa. Non mato yoimisi Dioscoinma shinanyamacahuun. Ahuafo Dioscoinma potacahuun nan Diosicoiinfon niaquin. Nan icoinra huacahuun. Nanton nantifi onihuaniquin. Nantifi nai muran

onihuafain maitio onihuafain yorafoti onihuafain unuhuanri nantifi a murannoari onihuaniquin. ¹⁶Ipaoni maifoti anofoan man apaiyai cuscan Upa Diosin ato shatumanataima. ¹⁷Ascafiashu afincoian ahuu cuscaramainquin ato ismamisi. Tsoacai “Diosin ahuu cuscaramainquin ua ismamaran,” itiroma. Diosin nantifi manifoti anofo shara huapai ato isma. Ascan maton mai ano oi fumamisi maton fanafo foaisharanonfo. Mato tushu ichapa inanmisi maton ointi unimanonfo, —ishon ato yoini.

¹⁸Pablo futan Bernabé ato yoisharapaifaiton ina rutushopainifo. Nocon Diosiran huapaicaquin. ¹⁹Ascatapaiyaino Israelifo Antioquía yafi Iconio anoashu atoqui funifo. —Pablo yafi Bernabé fasi chacafo. Mato amaquiri yoipai, —ishon ato yoinifo. Nicacaquin shinan futsa acufoantan ato chaca huanifo. Pablo toquirinin tsacaquin futsanifo. Ascan huacashon, —Man naaran, —huanifo. Ascashon pushufo pasoato shara fonifo ratai focaquin. ²⁰Jesús tanamisifoan Pablo naqui huanifo. Ascano funinaca huan pushurasi ano naso curani. Iyoco futsaino Bernabé fu Derbe ano cani.

²¹Naannoshon tsain shara Jesushuunoa ato yoinifo. Ascaiton nicacani yorahuanrasiton Jesús icoinra huanifo ahuun tanamisi ishcaquin. Ascano Listra non Iconio non Antioquía anori nasonifo. ²²Nanno Jesús tanamisifo Diosin tsain yoinifo aton ointi fupihumashquin Jesús tanaquin finacoinnonfo. —Diospan tsain cachiquiri huayamacahuun. Jesús fusti icoinra huacahuun. Upa Diosin nantifi iquina ano non nocoataima non niyoashu non fasi omitsiscatiroran, —ishon ato yoini. ²³Ichananti pushuti anoshon Pablo futan Bernabé Upa Dios icoinra huafohuunoa cufifain

piqui tununifo aton cushumisifo catonshcaquin. Ascaino, —Upa mia icoinra huacaniquin ato cushusharahuu, —ishon cufinifo.

Pablo yafi Bernabé Antioquía ano nasonifo nan Antioquía Siria mai muran ini

²⁴Ascano anoashu focani Pisidia yafi Panfilia mapaifainifo. ²⁵Anoashu Perge ano nococatan nanno nituyonifo Diosin tsain yoishcaquin. Ascatan anoashu Atalia ano fonifo. ^{26–27}Atalia anoashu unuhuan pocufaini focani Antioquía ano nasonifo. Nococashon icoinra huafo Pablo futan Bernabé ato ichanan huani. Atomaqui cataima ato Upa Dios cufishonifo Diosin ato mutsismafain ahuunshon yoisharanonfo. Ascan nantian Diosin ato yonoa cuscan anaiticashon nantifi acafo cuscan ichanancashon ato yoinifo. —Nantianri nocon caifoma yora futsan icoinra huafo Upa Diosin atorifi ahuun yorafo imaran, —icashon ato yoinifo. ²⁸Ascano Pablo yafi Bernabé Jesús tanamisifo fu iyopaonifo.

Jerusalén ano icoinra huafo ichanannifo

15 Ascano nocofunufu Judea anoashu Antioquía ano funifo. Nococashon yoinifo, —Nocon shunifo ipaonifo cuscan non amisi. Nocofunufu foshqui rupa shatuama Dios fu ipatiromaran, —ishon Moisés noco tapimani cuscan yoinifo. ²Ascaiton nicacani Pablo futan Bernabé, —Aririmaran, —icashu atofu fochishmanantanannifo. Ascano icoinra huafoan Pablo yafi Bernabé non futsafori catonnifo. Ascashon ato Jerusalén ano nichinifo. Jesús fu rafumisifo doce non cushumisi futsafori ato yocanonfo iconmainquin.

³Asceno icoinra huafoan ato nichifafo. Focani Fenicia mai ano yafi Samaria mai anori mapaifainifo. Ascashon ato yoinifo, —Israelimafoan Jesús icoinra huashon ato chaca shatuaforan, —ishon ato yoinifo. Icoinra huafo anoafoan nicacani fasi unimanifo.

⁴Ascatan Jerusalén ano nocoafono Jesús fu rafumisifo doce non cushumisi futsafori nantifi Jesús icoinra huafoti iscanifo, —¡Aicho! Man nocoqui fuafoquin, —ishon yoinifo. Ato fu ichanancashon Diosihuunshon afoanfainnafo cuscan ato yoinifo. ⁵Nicacashon atrififoan icoinra huafo Fariseofoan yoinifo, —Nocon caifomafashon Moisés yononi cuscan aton nocofunufori non foshqui rupa shatupacutiro, —ishon yoinifo.

⁶Asca huaifoan Jesús fu rafumisifo doce yafi icoinra huafo aton cushumisifoanri tiri futsan ichanancashon nanfohuunoa yoinanshaquin. ⁷Tsain ichapa yoinainfoanno Pedron ninacahuanaino nishmapacufoanaifoan ato isca huani,

—Uhuun yoramishtichin, ua nicacahuun. Man man tapia noco futsan Diosin ua catonni mani futsanfo muran ua nichishquin ahuun tsain shara Jesushuunoa un ato yoinon icoinra huanonfo. ⁸Diosin yorafoan aton nomuran shinain cuscan tapicoian. Nanton noco ismani nocon caifoyamafiacun ato iquina ahuun yorafo inonfo. Ahuun Yoshin Shara noco inan cuscan atorifi inan. Ascan non tapitiro Diosin atorifi fuchipai. ⁹Nan non icoinra hwaiton nocon chaca soashona cuscari afoanri icoinra huaifoan atori chaca soashona. Nanscarasi huaquin noco fuchipai. ¹⁰Nan iconquin. Moisés noco yononi cuscaai nocon shunifo non norifi non ascatiroma nipashquin. ¿Ascacufin ahuuscain norifi non atiroma cuscan man Jesús tanamisifo yonomapai? Asca huaquin man ato ointi ihumatiro. ¹¹Ma. Aririma. Nocon Ifo Jesús

nocoahuun ramapaiyaino non Upa Dios fu ipatiroquin. Nan non icoinra huai. Afoanri icoinra huacashu Dios fu ipatiroan, —ishon Pedro ato yoini.

¹²Asca huatan Bernabé yafi Pablonun ato yoaifono nantifi nanoashu ichanancashu pusinifoma nicapaicani. Diosin atohuunshon tsoan oinyomisima cuscara ahuafoasi shara Diosin fustiton atiro cuscan Israelimafo muranshon huanifo.

¹³Aton tsain anaitiano Santiago ato isca huani,

—Uhuun yoramishtichin ua nicayocahuun. ¹⁴Pedro noco rama yoa cuscan ahuuscashomain Upa Diosin nocon caifoma catoanquin ahuun yorafo inonfo. ¹⁵Nannorifosi Diosin tsain inon pacoi yoimisifoan yoinifo. Isca huaquin cununi,

¹⁶“David ahuun caifoan ua potaino urifi un ato potayoni. Ascafia un ahuun funafo afanan atoqui nasoshquin ato caya huanon uhuun yorafo afanan inonfo. ¹⁷Ascacun manifestifoanri ua cufishcani uhuun yorafori un ato anupacushquiran, ishon Upa Diosin yoini. ¹⁸Diosin ahuamamishti tapian. Icataima inonpacoi cuscan yoioniran,” ishon cununi.

¹⁹Ascancufin un shinanquin isca. Nocon caifoma Dios tanapaiyaino non ato ahuaa curushcai non yonotiroma. ²⁰Ascatarocon non ato cunu fomatiro yoiquin isca huaquin, “Dioscoinma aton Diosiran huacashon tushu tamanchinafo. A oincaquin tushu piyamacahuun. Man ascara piaino futsafoanri mato oincaquin shinantiro marifi ato futan dioscoinma man fuchipai cufishquin. Ascan chaca itiro. Maton ahuinmari chotayamacahuun. Maton funumari chotamayamacahuun. Yoina yafi ina tumosishon ahuun imi foyamaino ahuun nami piyamacahuun. Imiri ayayamacahuun.”

²¹ Nanfohuunoa nocon ichananti pushu muranshon tunutitian yoimisifo. Afo ascayamacahuun. Nocon shunifoanri nannori yoimisiforan, —ishon Santiago ato yoini.

Israelifoma cunu fomani

²² Ascatan Jesús fu rafumisifo doce non Jesús icoinra huafo non cushumisifo non icoinra huaa futsafori ato futan rafu catonnifo Judas ahuun anu futsa Barsabás yafi Silas catonnifo Pablo yafi Bernabé fu Antioquía ano fononfo. Nan rafu icoinra huafoan nicacoinnifo. ²³ Ato cunu inanquin isca huani,

—Nonquian Jesús fu rafumisifo doce non cushumisi futsafori non nantifi Jesushuunoa yoimisifoan non mato cunu fomai man tapinon. Nocon yoramishtichin Antioquía anoafu yafi Siria anoafu non Celicia anoafu man nocon caifoyamafishon no futan man Jesús icoinra huamisi. Non mato tsain shara yoinon.

²⁴ Man non nica futsafo noco anoashu mato ano foitaucashon mato yoicaquin maton nomuran fucashmana. Non ato nichiana. Mato yoia cuscan noncai ato yonoama.

²⁵ Ascacun non ichanan nannorifosi non shinan nocofunu futsafo catonshquin Pablo yafi Bernabé fu mato ano nichishquin. Pablo yafi Bernabé non atohuun noicoin. ²⁶ Nan rafutan nocon Ifo Jesushuunoa futsafo yoipaiiafoan atirifoan ato rutupaifiafoancai yoiquin ununifoma.

²⁷ Ascano non Judas yafi Silas matoqui nichian non mato cunushona cuscan nannoricoin mato yoinon. Ato tsainhuunshonri man tapitiro iconcoin.

²⁸ Diospan Yoshin Shara shinan cuscan norifi nannori non shinan. Nanfohuunoa non mato

cunushona. Man ahuara futsa yopaima isharashquin. Nan fusti man yopai. ²⁹ Diosicoinma tushu tamanchinafo piyamacahuun. Imi ayayamacahuun. Yoina yafi ina tumosishon imi foamano ahuun nami piyamacahuun. Maton ahuinma chotayamacahuun. Maton funuma chotamayamacahuun. Nan fusti non mato yoipai. Nantisi non mato yoi. Non cunua cuscan aashu man isharacointiroran, —ishon cununi.

³⁰ Ascano Jerusalén anoshon ato nichinifo. Antioquía ano nococashon icoinra huafo ichanan huashon ato cunushoni cuscan inanni oinonfo.

³¹ Oincani fasi unimanifo, —¡Aicho! Noco cunushona cuscan nocon ointi roamaroama sharairan, —icashu yoinannifo. ³² Ascatan Judas yafi Silas nan rafutan Diosin tsain inonpacoai cuscan yoimisi inifo. Jesushuunoa yoiai cuscan icoinra huanifo. Nicacoinmisifo aton ointi fupi huamani ato mutsismanon Jesús tanasharashcaquin. ³³⁻³⁴ Nanno osharanan atofu ichanannifo. Ascatan Antioquía icanoafoan ato nichinifo, —¡Aicho! Non fasi unimai noco yoisharamisifo. Natian afanan Jerusalén ano fosharacahuun. Nan icoinra huafo nanno nocoaino ato yoisharashohuun, —huanifo. ³⁵ Ascafiainocai Pablo yafi Bernabé atofu fonifoma. Antioquía ano nitunifo futsafo futan Diosin tsain tapimanifo.

Pablonun afanan cai futsacai Jesushuunoa pushurasifoti ato tapimani ³⁶ Ascaifoan chipo, —Icoinra huafo pushurasi futsa anoafu non oin canon. Non ato nocon Ifoan tsain yoini. Man natian tanasharafomainquin non oin canon, —ishon Pablonun Bernabé yoini.

³⁷ —Ai. Non canon. Juanrifi no fu canon, —Bernabé huani. Nan Juanpan

ahuun anu futsan tuqui huani Marcos.
³⁸—Ma. Noncai Marcos iyoicaima. Noco Panfilia anoshon potani. No fu afanan yonotiroma. Afanan noco potatiroraca, —ishon Pablonun yoini.
³⁹Fasi fochishmanantanancanashu pashcananfainnifo. Bernabé shashon Marcos Chipre ano iyoní. ⁴⁰Ascano Pablonun Silas catonni afu yononon. Antioquía anoashu foataifoma icoinra huafo atofu ichanannifo. —Nocon Ifon, Pablo yafi Silas cushusharahuu mihuunoa yorafo yoinonfo, —ishon ato cufishonifo.
⁴¹Ascatan anoashu focashon Siria yafi Cilicia anoafo Jesushuunoa ato yoifoanfainnifo. Icoinra huafo pushurasifoti shinanmasharani Jesús tanasharanonfo.

Timoteo Pablo yafi Silas fu cani

16 Ascano Derbe ano Pablo yafi Silas noconifo. Anoashu chaimashta Listra ano fonifo. Nanno Jesús tanamisi futsan ahuun anu Timoteo ini. Ahuari Israeli shafu ini. Arifi Jesús icoinra huani. Apa Griegofo ini. ²Icoinra huafoan Listra anoa non Iconio anoafoan, —Timoteo nocofunu shararan, —huanifo.
³Ascacun Pablo ato ya Timoteo iyopaini. Iyoataima shinanni, —Nantifi uhuun caifo nan Israelifoanri tapiafo Timoteo apa Griego. Ascan uhuun caifoan amisifo cuscan un Timoteori foshqui rupa shatumatiro ahuunoa shinansharanonfo, —ishon shinanni. Asca huano atofu cani. ⁴Pushurasiti mapaicainicai Jesús fu rafumisifo doce non cushumisi futsanfori Jerusalén ano yononifo cuscan ato tapimani yoiafo cuscan huanonfo. ⁵Ascano nicacashon fasi icoinra huaquin finacoinnifo. Paratama yorafoanri icoinra huanifo.

Pablonun namapan cuscara nocofunu Macedonia ano aoinni

⁶Asia mai ari Jesushuunoa yoifopaiyaifoan Diospan Yoshin Sharapan, —Asia mai ari foyamacahuun, —ato huani. Ascaino Frigia yafi Galacia ano mapaifaini fonifo.
⁷Anoashu Misia mai pasoato ano noconifo. Anoashu pushurasi futsan Misia anoashu Bitinia ano fopaiyaifoan, —Ari foyamacahuun, —Jesús ahuun Yoshin Sharapan ato huani. ⁸Ascaino Misia finonfaincaini Troas ano noconifo.
⁹Nococashon nan yamutan Pablonun ahuun namapan oinni nocofunu Macedonia anoaton, —Macedonia ano ohuu. Noco tapimashquin, —ishon yoini. ¹⁰Moishon Pablonun noco yoini, —Natian Upa Diosin noco Macedonia ano nichipai tsain shara Jesushuunoa non ato tapimanon, —ishon noco yoini. Ascaino non ati shara huani samamashta afu cashquin.

Pablo yafi Silas Filipos ano inifo

¹¹Ascaino Troas anoashu shashon nanucaini non cani. Mai ano ocuma rafu unu tapia rafu ahuun anu Samotracia ano cayacafi non pocufaini cani. Anoashu iyoco futsaino non pushurasi Neápolis ano noconi. ¹²Anoashu non pushurasi ahuun anu Filipos ano cani. Nan Macedonia mai ano. Macedoniafoan aton ni-aifofo nanno icafo ini. Nanno non osha rananyoni. ¹³Tunutitian pushurasi pasoato non unu cusumunri cashon. Non nica nanno ichanannisi Upa Dios cuficaini. Nocoshon man non oian ain-fofo nanno ichanannifo. Ascan tsaoshon non ato Diosin tsain tapimani. ¹⁴Nannoshon ainfo futsan noco nica ahuun anu Lidia. Pushurasi ahuun anu Tiatira anoa ini. Pano mapash inanmitsamisi. Dios cufinmisisoin. Pablonun Jesushu-

unoa yoiaiton nocon Ifohuunshon ahuun nomuran icoinra huani.

¹⁵ Ascaiton icoinra huaino ahuun yorafoanri icoinra huanifo. Icoinra huaifoan ato unu muran iquimani Jesús aton Ifocun ismashcaquin.

—Man tapia unrifi nocon Ifo Jesús un icoinra huaquin uhuun pushu ano fucahuun un mato pimanon. Nanno man itiroran, —ishon Lidia noco yoini.

¹⁶ Ascatan shafa futsan non afanan cufimisi ano foanno shomaya nocoqui noconi. Futsafoan aton oinmati yoshin chaca ahuun nua. Nanton inonpacoai cuscan yoshin chacahuunshon ato onanshopaoni. Onanmafoan ato yoini. Ato yoiaiton ahuun ifofo pui inannifo. ¹⁷ Nanton Pablo yafi noco mufoquin oi ashcafinin yoifoni,

—Nan nocofunufofin nan Diosin nantifi finoanton ahuun oinmatifo. Ahuunscashumain non Dios fu ipatiroquin noco yoi fuaforan, —ishon yoini.

¹⁸ Shafa ranan noco ascasi huafoanfafaini. Noco fucash huamisi. Pablonun afanan tunuyamacaiquin ifiacuahuan yoshin chaca shomaya fu imisi isca huani,

—Jesucristohuunshon un mia yonoicai. Na shomayamaquinoashu catahuun, —huani. Ascan huatapaiyaino samamashta amaquinoashu cani.

¹⁹ Shomayaton ahuun ifofoan oincaquin shinannifo, —¡Ohua! Nocon yonotical afanan yoshin chaca afu icama. Afanancai inon pacoai cuscan yoitiroma. Ascan tsoancai afanan ahuunshon noco pui inainmaran, —ishon yoinifo. Ascashon Pablo yafi Silas achinifo. Achishon aton niaifofoan pushu ano ato sharafonifo.

²⁰ —Nan nocofunu rafutan Israelifoan nocon pushurasi ano yorafo fucash huamacoin ato shinanchacamacani. ²¹ Noco amapaiyai cuscacai Romano

niaifofoan noco yonomisima. Noncai afanan ascatiromaran, —ishon aton niaifofo yoinifo. ²² Yorahuanrasifoan nannorisi yoinifo. Ascano niaifofoan yonocun aton sahuuti pucashon ihuin ato coshaqui futsanifo. ²³ Man coshaquin futsatan cunu muran ato iquimanifo. —Na rafu cushusharahuu. Chifi ichoafanno non mia rututiroquin, —ishon niaifofoan ranushumua cushumisi yoinifo. ²⁴ Ascan huaifoan nicaquin fasi ocu murancoin ato iquimani. Ihui rafu oyucuruamashon aya ato tsaoni.

²⁵ Ascano yamunacuahuanaino Pablo yafi Silas Upa Dios cufinyanan fanainnifo. Ascaiton atofu iquiafoan nicanifo. ²⁶ Ascatanaino fasicoin mai nayanaiyainacahuani. Ascaino a cunu ahuun quishifo tsucu tsucusini. Ascatanaino cunu fupotifo afincoin fupucui futsuni. Ascatapaiyaino cunopan ato munushafo afincoin oshoriquitan mushorimuni. ²⁷ Ascaino ranushumua moinacahuaquin oian a cunu fupotifo man fupucui futsua ini. Ascaiton oin ahuun nopu tsitsucumutan afiri chachipaini. ²⁸ Ascaiton Pablonun oi ashcafinin yoini,

—Ascayamahuu. Mifiri rutuyamahuu. Tsoa raqui caamaquin, —huani.

²⁹ —Chi otashon ua fushoriscahuun, —ranushumuaton futsa huani. Otafurani Pablo yafi Silasqui ichoni ato naman tsitsaotoshini. Fasi tari tari yanani. ³⁰ Funinaca huan ato rafu chifi caimani.

—¿Ahuuscashomun uhuun chaca un shatutiroquin Upa Dios fu ipashquin? —ishon ato yocani.

³¹ —Nocon Ifo Jesucristo icoinra huashu min non min yorafori man Dios fu ipatiroquin, —ishon Pablo futan Silaspan yoinifo.

³² Asca huacatan nocon Ifo Jesús ahuun tsain a yoifain pushu anoafori ato yoini. ³³ Asca huacashon unu fi-

tan coshafo ano puchoquin futsafoanno a pushu muran icafoti ato unu muran iquimapacuni icoinra huacashon ismanonfo. ³⁴Asca huano ranushumuaton ahuun pushu muran iquimani ato pimashquin. A yafi ahuun yorafoti Dios icoinra huashu aton nomuran fasi unimanifo.

³⁵Ascano man shafano ahuun niaifooan aton niaifo patasharifo aqui nichinifo, —Pablo yafi Silas caimanonfo ato yoitacahuun, —ishon ato nichini.

³⁶Ranushumuaton Pablo yoini, —Niaifooan yonoa natian man casharatiroran, —ishon ato yoini.

³⁷Nicaquin Pablonun ranushumua niaifoo yoini, —Norifi non Romanofoiacu noco yocashoma yorafoan ointaifi noco coshamanafo. Non ahua chaca huayamafiacu ascan natian tsoa yoishoma noco caimapaicani. Ma. Noncai ascaran tapipaimaficain. Niaifoo aafi funonfo noco caimashquin. Nannori ato yoitacahuun —Pablonun ato huani.

³⁸Yoiaifo cuscan ranushumuafoan aton niaifooqui chaninifo. Pablo yafi Silas Romanofori nicacani niaifoo fasi ratucoinnifo. —¡Ohuashta! Nocon niaifooan anori nicacaquin noco asca huatiroran, —ishon yoinifo. Musucani. ³⁹Ascano ato ano fonifo ato yoisharapai focani. —Nocon pushurasi anoashu fosharatacapun, —ato huanifo. ⁴⁰Ascano cunu murannoashu focani Lidia pushu ano fonifo. Nan anoshon icoinra huafo Jesushuunoa yoisharanifo aton ointi fupi huanonfo. Yoicatan atomaquinoashu fonifo.

Tesalónica anoashu mucanifo

17 Ascatan focani Anfípolis yafi Apolonia mapaifainifo. Tesalónica ano noconifo. Nanno Israelifooan aton ichananti pushu ini. ²Ahuun fuyamisi cuscan iquishon

tunuti rafu non fustitan Pablonun ato Diosin tsain yoini.

³—Cristo noco omitsiscashoni. Naafi-acun funimani. Jesushuunoa un mato tapimai nanfin Cristoquin. Upa Diosin catonni nocoqui nichishquin, —ishon Pablonun ato yoini.

⁴Nicacaquin atirifi Israelifooan ato futan icoinra huanifo. Griego ichapafo non ainfooanri nicacoinpainifo afoanri icoinra huanifo. ⁵Ascano Israelifooan aton niaifooan Pablo yafi Silas nicacoiainfoan oincani fasi ato rafuqui sinacoinnifo. Ascashon a inanmitsamisifo anoa focashon nocofunu shanishunifo fuchinifo. —Pablo yafi Silasqui tsain chaca huatacahuun yorafoanri nicashon afori atoqui sinanonfo, —ishon ato yononi. Asca huacatan fonifo yoifocani. Ascashon Pablo yafi Silasqui tsain chipunifo. Yorahuanrasi fasi mucanifo. Mucacatan nocofunu ahuun anu Jasón pushu ano fonifo Pablo yafi Silas achipaifocani. Yorahuanrasi muran caimapaicaquin ato asca huanonfo. ⁶Ato fuchiyamacaquin Jasón yafi icoinra huaa futsafo achinifo. Achicashon niaifoo ano ato iyonifo. Iyoshon isca huanifo,

—Pablo futan Silaspan manifoti anofo shinanchacamamisifo. Natian nuno nocon mai anori man fuafo. ⁷Nan Jasón ahuun pushu muran ato iquimana. Nan rafu nocon niaifo Cesari noco yonomisi cuscan nicacasmanifo. Ascashon yoiafo, “Nocon niaifo futsan. Ahuun anu Jesusran,” ishon nan rafutan yoiaforan, —ishon oi ashcafinin yoinifo.

⁸Nicacani niaifoo yafi yorahuanrasiton aton nomuran fasi shinanchacanifo. Ascashu mucanifo. ⁹—Noco pui inancahuun mato nichinonran, —ishon niaifooan Jasón yafi futsafo yoinifo. Ascaiton ato inainfoan ato nichinifo.

Pablo yafi Silas Berea ano ini

¹⁰ Ascacashon icoinra huaa futsafoan Pablo yafi Silas yamutan ato Beria ano nichinifo. Nococatan nan rafu Israelifoan aton ichananti pushu muran iquinifo. ¹¹ Iquicaintan ato Jesushuunoa tapimani. Bereafocai Tesalonicafo cuscarafoma. Pablo futan Silaspan ato yoiai cuscan fasi nicapainifo. Nicacatan shafatifi Diospan tsain oinnifo iconmain Pablonun ato yoiakin. ¹² Ascano Israelifoan icoinra huanifo. Griego ainfofoanri nicacoinpainifo afoanri icoinra huanifo. Griego nocofunufaoanri icoinra huanifo. ¹³ Ascaifoan Pablonun Bereafo Diosin tsain tapimani Tesalónica ano nan Israelifoan icafo nicacani. Berea ano focashon aqui tsain chaca huanifo. Yorahuanrasi nicacani aqui tsain chaca huaa. Ascano aton nomuran shinanchacamanifo Pablo nicanonfoma. ¹⁴ Ascano Jesús tanamisifo nanno musucaquin Pablo unuhuan cusumunri nichinifo chaca huanonfoma. Cafiahu Silas yafi Timoteori Berea ano nituyonifo. ¹⁵ A fu focani Atenas ano iyonifo. Nannoashu afanan nasofainifo. Pablonun ato cunu inanno Silas yafi Timoteo inanonfo, —Uqui furiscacahuun, —ishon ato cunushoni.

Pablo Atenas ano ini

¹⁶ Nannoshon ato manaquin oian Atenas anoafoan ahuafoasi fasi ichaparasi rami huacashon, —Nocon diosiran, —huaifoan. Oinquin ahuun ointi fucash huariapaoni, —¡Ohua! Ahuuscaquin Diosicoimnifo icoinra huacanimumun, —ishon ahuun nomuran shinanni. ¹⁷ Ascaino Israelifoan aton ichananti pushu muran iquini ahuun caifo yafi Griegofoan Diosin icoinra huapayiafoan Jesushuunoa ato yoini. Ichananti pushu murannoa fustima

chifinoa inanmitsamisifori shafatifi nan nicapayiafiori ato yosini.

¹⁸ Ato yoiaino futsafo aqui noconifo afu fochishmanantanancani. Atirifoan shinannifo non apaiyai cuscafin non huatiroquin noco unimamanon. Nanfoan anu tuqui huani Epicureofo. Atirifoanri shinannifo ahuaa ahuuscarafaino non tunutiroran ishon shinannifo. Nanfo anu tuqui huani Estoicos. Nan rafu Epicureofo non Estoicofori Pablo fu fochishmanantanannifo. Yoinifo,

—Nan tsainmisi fahua cuscara. Raquiri noco yoipaimun, —ishon atirifiton yoinifo.

—Dios futsafo noco icoinra huamapairan, —ishon atirifoanri yoinifo. —Pablonun noco Jesushuunoa yoia. Naafiahu funini noco yoiaran, —ishon yoinifo.

¹⁹⁻²⁰ Yoificashon Areópago ano Pablo iyonifo. Nanno ichananmisifo ahuafoasi futsahuunoa nicamisifo. —Min noco tapimapaiyai cuscan tsoa nicamisima. Non tapipaicain. Min yoiai cuscan funacoin. Tsoacai anori nicayomisima. Ascan afanan noco yoihuu nonri tapinon, —ishon yoinifo.

²¹ Nantifi nan Atenas ano icafo non yora futsafori ichananmisifo yoinanshquin. Ahuafoasi tsoan anori nicayomisima yoipaicani. Atirifiton nicashon atirifi yoinifo. Ahua futsacai huanifoma.

²² Ascaifoanno nan ichananmisifo ahuun anu Areópago anoashu Pablonun aton ointaifi ninacahuan ato yoini.

—Atenasfoan ua nicacahuun un mato yoinon. Mun oian manfin Diosihuunoa fasi tapipaimisifoquin. ²³ Nuno man icano un cahuacacainquin mun oian man cufimisi anoshon man cunuquin isca huaa,

“Dios futsa tsoancai onanmisima non cufipairan”

ishon man cunua. Mancai nan Dios onanmisima. Ahuunoa natian un mato tapimaicain.

²⁴Diosin nantifi mai anoafoti non nai murannoati onihuaniquin. Aton ifon inon. A yorafoan pushu huaa murancai Diosin icama. ²⁵Atofin yorafoti nimafain noco shacaimaquin. Asca acai ahua yopaimaquin. Non yorafoancai non ahua Dios ashotiroma ahuat si yopaiton.

²⁶Diosin nocofunu onihuaquin tau huani. Na nocofunuhuunoashu manifesti caicani. Aafin yononi raquifomain icanicain. Ahuuti farimain itirofoquin arusu fusti tapia. ²⁷Nantifi asca huani manifesti afu ipainonfo. A funaquin fuchishcaquin. Ascafia nocoti chai huaama. ²⁸Ahuunoashu fusti non nitiro. Noco nimayamainocai non ahuscатиroma. Arusu noco nimatiro. Maton tapimamisifoan cununi cuscan, “Non Diospan facuforan,” ishon cununi.

²⁹Iconcucain nocofununcain afin Dios oni huatiroma. Cuno chashna faca fa-caitsa iyamarai cuno oshopa iyamarai toquiri nocofunufocan rami huafiatirocai Diosin ascarama. ³⁰Ascapaonifiashocai Dios onanmisifoma. Ascafiaifoan ato onaintimapaonima. Ascafia natian nantifi manifesti anoafoti ato yonoa aton chaca shatushon icoinra huanonfo. ³¹Jesús naafiacun funimani. Ascancunfin non tapitiroquin Upa Diosin a catonni nantifi yorafoti cayacafi shara yoinon afu ipaiyamarai omitsispacunacafo muran focani. Upa Diosin inonpacoai cuscan shinanni ahuatianmain iquicain, —nicacaquin ato huani.

³²Jesús nafiahu funini nicacani atirifi shuchinifo. Atirifoanri yoinifo isca huaquin,

—Shafa futsan afanan noco yoihuu non nicanon, —ishon Pablo yoinifo.

³³Ascatan ichananmisifo anoashu Pablo cani. ³⁴Nocofunu fustirasiton

Jesús icoinra huacashon Pablo tanacoinnifo. Futsan ahuan anu Dionicio. Nan Areópago ano atofu ichananmisi ato yoi. Ainfo futsa ahuan anu Dámaris. Futsafoanri icoinra huanifo.

Pablo Corinto ano ini

18 Ascano chipo Pablo Atenas anoashu Corinto ano cani.

²Nocoano nocofunu yafi ahuan nantianri mai futsariashu noconifo. Nocofunun ahuan anu Aquila. Israeli Ponto anoashu cainni. Ahuin Priscila arifi Israeli shafo. Nan rafu Italia ano imisifo. Ascan Italiafoan aton niaifon ahuan anu Claudio potani isca huaquin, —Nantifi Israelifo Roma anoashu fotacahuun, —ato potani. Ascانofin Aquila yafi Priscila Italia anoashu Corinto ano ramashta noconifo. Pablonun atohuunoa nicafaini aton pushu ano cani. Ato onaincai. ³Nan rafutan pano pushu icushaino. Pablonunrin ato futan icushpaoni. Ascano nanno nituyoni ato futan yonoi. ⁴Asca huacatan tunutitiantifin Israelifo aton ichananti pushu muran iquini Jesucristo icoinra ato huamapai.

⁵Ascano Silas yafi Timoteori Macedonia anoashu aqui funifo. Nocoafono Pablonun Israelifo Jesushuunoa yoifoan-fafaini. Nan fusti yoini. Ahua futsan yoinima. —Jesús Diosin catonni, nanton ahuan facuran, —ishon ato yoini. ⁶Ascafia Pablonun ato yoifiaino nicatimanifo. Aqi tsain chaca huanifo. Ascaifoan aton ointaifi ahuan sahuuti pucatan tatan ani aton fuyamisi cuscara ato oinmaquin. Diosin tsain nicacasmaifoan ato oinmaquin.

—Man ua nicacasmai. Ascan man omitsiscainocai uhuun nuama. Matohuunfin nuaquin. Diosin ua yonoa cuscan un mato yoifiaino man ua nicacasmai. Ascan un afanan mato yoitamarocon un

nocon caifoma un yoi cairan, —ishon ato yoini.

⁷Yoitan aton ichananti pushu murannoashu chaimashta Ticio Justopan pushu ano caní. Nanton Upa Dios noicoinquin cufipaoni. ⁸Ascan ichananti pushu niaifoan ahuun anu Crispo arifi Jesús icoinra huani. Nantifi ahuun yorafoanri icoinra huanifo. Corinto anofoanri icoinra huaifoan ato unu muran iquimanifo. ⁹⁻¹⁰Ascano yamu futsan Pablo ahuun namapan nocon Ifo Jesús yoini, —Ratuquima uhuun tsain ato yoifoanfafaíncahuun. Shatuquima. Un mifu icaquin. Tsoan mia ahuusca huanonma. Nuno nan pushurasi ano uhuun yorafo ichaparan, —ishon yoini. ¹¹Ascano nanno Corinto ano nituyoni. Fari fusti yafi nushmancayan Diospan tsain ato yosipaoni.

¹²Ascatan Acaya mai anoa Galión aton niaifo. Nantianri Israelifo ichanan-nifo Pablo achishcaquin. Achishon ato niaifo ano iyoshquin.

¹³—Na nocofunun yorafo amaquiri yosifoanfaini. Nocon shunifoan noco yononi cuscan ato anorima shinanmaniran, —ishon yoinifo.

¹⁴Pablonun cumapaifiaino niaifo Galión ato yoini,

—Israelifoan man ua yoicun na nocofunumain onanshta chaca iyamarai fasi chaca huacoinnamainquin un mato nicacuana. ¹⁵Ascatamarocon maton shunifoan yosini cuscahuunoa ua yoifain maton caifoan aton anuhuunoa yoifain maton caifo yonoa cuscan ua yoipai. Uncai afohuunoa nicapaima. Mafin man afo arotiro. ¹⁶Umaquinoashu fotacahuun, —ato huani.

¹⁷Foaifoan Sóstenes ichananti pushu ifo achinifo. Achicashon niaifofoan aton ointaifi sutunifo. Asca huafiaifoanno ni-

aifon Galión ato pusanima. Atohuunoa tapipainima.

**Pablo Antioquía ano nasoni.
Nannoshon afanan Jesushuunoa ato
yoifoanfaini, cai rafu non fustini**

¹⁸Ascatan Pablo Corinto mai ano shafa ranan nituyoni. Nanno iyoano Upa Diosin yoyoni cuscara a cushusharanon ahuun caifoan aton fuyamisi cuscara ahuun fo marucuni. Upa Diosin cushusharano cataima marucuyoni. Ascatan Priscila yafi Aquila fu Pablo caní. Icoinra huafoamaquinoashu Corinto anoashu shasho nanufaini fonifo. ¹⁹Efeso ano nococatan Priscila yafi Aquila shasho naqui nichifaini cai Israelifoan aton ichananti pushu muran Pablo iquini ahuun caifo fu yoinanshquin. ²⁰⁻²¹—Cariyamahuun. Nuno nituyohuun noco Jesushuunoa paratama yoiyoshquin, —ishon yoinifo. Ascaiton ato yoini. —Ma, Uncai natian nitutiroma. Ascacia Upa Diosin ua nichipaiyaino un matoqui afanan otiroran, —ishon ato cumani.

Yoitan Efeso anoashu shasho nanucaini caní. ²²Cesarea ano mapufaini anoashu Jerusalén ano caní. Icoinra huafo fu ichanain ato yoisharani. Ascatan ato anoashu Antioquía ano caní. ²³Nanno nituyoni. Ascatan nannoashu cahuancaiquin ato Jesushuunoa yoini. Galacia yafi Frigia mai ano cahuanca-caini Jesús tanamisifoti ato yoisharai Jesús tanaqui finasharanonfo.

**Apolos Efeso anoafo
Jesushuunoa ato yoini**

²⁴Israeli futsan Alejandría anoashu cainni ahuun anu Apolos. Nantianri Efeso ano oni. Diosin tsain fasi tapi-coinni. Tsain fasi shafacafi yoimisi. Yorafoan nicapainifo. ²⁵Nocon Ifo Jesushuunoa Apolos nicapaoni. Tapini cuscan fasi cayacafi yosini. Jesushuunoaai

atirifi tapishara inima. Juanpan yosini cuscan fusti tapini. —Maton chaca shatucahuun. Diosin icoinra huacahuun, —ishon. Nan fusti ato yoini. ²⁶Ascatan ichananti pushu muranshon ato ranotama yoisharani. Ascaiton Priscila futan Aquila nicacoinnifo. Ascashon, —Nocon pushu ano ohuu, —huanifo. Oano Jesushuunoa fasi paratama yosinifo.

²⁷Ascano Apolos Acaya mai ano capaini ato Jesushuunoa yoipai. Icoinra huafo nicacani, —¡Aicho! Min shinan cuscan shara. Non Jesús tanamisifo ano cunu fomatiro mia nicasharanonfo, —ishon yoinifo. Ascatan atoqui nocoshon Diosihuunshon ato Jesushuunoa yoisharapaoni. Ascaiton nicacaquin icoinra huafoan aton ointi unimacoinnifo. ²⁸Ascafia atirifi Israelifoan, —Jesuscai Diospan furunma. Upa Diosincai nichinima. Nocon Cristomafinquin, —ishon yoinifo. Ascaifoan —Man shinain cuscacai anorima. Un mato tapimai Diospan tsainhuunshon Jesusfin Diospan Furunquin. Aafin nocon Cristoquin, —ishon Apolos yorafoan ointaifi shafacaficoi ato yoini. Ascaitocai tsoan cumanima.

Pablo Efeso ano ini

19 Ascatan Apolos Corinto ano iyoashu Pablo machi fai tapiaton cai afanan Efeso ano noconi. Nocoshon Jesús tanamisifo fuchini.

²—¿Man icoinra huashon man ahuun Yoshin Shara fiamun? —ishon Pablonun yocaiton. —Ma. Noncai ahuunoa nicayomisima, —huaifoan.

³—¿Ascashon man unu muran iquipaunitian man raquiri yoiamun? —ishon ato yocaiton.

—Juanpan noco yosiaino noco unu muran iquimani cuscan non yoiaran, —ishon yoinifo.

⁴—Juanpan yoini isca huaquin, “Maton chaca shatucahuun Diosin tanasharashquin un mato unu muran iquimanon.” Ascatan yoiari “Chipo Jesús oshquiquin icoinra huacahuun,” ishon Juanpan noco yoiniran, —ishon Pablonun ato yoini.

⁵Nicacatan —Norifi nocon Ifon Jesús non icoinra huairan, —ishon yoinifo. Yoiaifoan ato unu muran iquimani.

⁶Ascashon Pablonun ato manmainno Diospan Yoshin Sharapan ato imaino tsain futsanman inifo. Diospan tsainri yoipacunifo. ⁷Doce icuana inifo.

⁸Ascano Pablonun Israelifoan ichananti pushu muran iquishon ranotama ato Jesushuunoa yoini. Oshu rafu non fusti ato yoipaoni. Upa Diosin ato iquihuunoa ato yoipaoni. Nicacaquin atirifoan icoinra huanifo. ⁹Ascafaiaino atirifoanri nicacasmanifo. Icoinra huacasmacaquin, —Jesushuunoashucaí non Upa Dios fu ipatiromaran, —ishon yoinifo. Ascaifoan nicai Pablo atomaquinoashu cani. Afanan atofu ichanannima. Pushu futsa ano tapimamisifo ano cani. Nan pushu anu tuqui huanifo Tiranoran, huanifo. Jesús tanamisifo afu iquini ato shafatifi tapimanon. ¹⁰Fari rafutan nan pushu muranshon ato Jesushuunoa tapimani. Ascano Israelifo futan yora futsafoan Asia mai ano icafoan nocon Ifo Jesús tsain nicanifo.

¹¹Nantianri Upa Diosin Pablohuunshon tsoan oinyomisima cuscara ato ismani. ¹²Isinin imisifo yafi yoshin chaca atohuun nuufafaina ahuun panuela iyamarai ahuun sahuutifo muncanashu cayariscatanifo. Yoshin chacafo atomaquinoashu cuyofoni.

¹³Ascaifono Israelifo futsafoan nicacani Jesús icoinra huayamafiamisishaqui pushurasiti foanfafaínnifo Jesús ahuun anuhuunshon yoshin chaca atomaquinoa potapaicani. Isca

huanifo, —Pablonun Jesushuunshon yoimisi. Ahuunshon un mato yonoi atomaquinoashu fotacahuun, —huanifo.

¹⁴Nocon yorafohuunshon Dios cufimisi niaifo futsan ahuun anu Esceva ahuun facufo sieteton asca huapainifo. —Jesushuunoashu amaquinoashu catahuun, —huanifo.

¹⁵⁻¹⁶—Jesús onanfain. Pablori mun onan. ¿Manmun tsoaquin? —yoshin huani. Yoshin chacapan yoiano nocofunu yoshin chacayaton ato achini. Ato fasi sutupacuni aton sahuuti fashnufain ato imi tohuuni. Ascaino pushu murannoashu chitoria ichonifoquin. ¹⁷Atohu-unoa Efeso anoafu Israelifo non yora futsafori nicacani ratui futsunifo. —Nocon Ifon Jesús fasi shararan, —huanifo.

¹⁸Ascashon Jesús icoinra huafoan aton ointaifi chaca huafo cuscan yoinifo. ¹⁹Yofufoan aton yofu shatushon Jesús ifoannifo. Aton libro murannoa cununifo cunufu ahuuscashomain yoshin chacannun yonotiroquin cunupaoni. Ascan nan cunufu ichanan huacashon aton ointaifi coanifo. Shinanniquin nan cunufu nantifi fasi chicoin. Cincuenta mil aton pui nuua ini. Ascafiacun coanifo. ²⁰Asca huacashon maifoti anofoan nocon Ifo Jesús tsain nicanifo. Ahuun tsainhuunshon finacoinnifo icoinra huafoan Jesús tanacoinnifo.

²¹Ascatan Diosin ahuun Yoshin Sharan Pablo shinanmanaino yoini, —Un natian Efeso anoashu Jerusalén ano cai. Caquin un Macedonia yafi Acaya ano un mapufainicai. Jerusalén ano nituyoshquin un anoashu un chipo Roma ano cairan, —ishon shinanni. ²²Ascano afu yonomisi rafu Timoteo yafi Erasto Macedonia ano nichiyoni. Afincuin Asia muran nituyoni.

Efeso anoafu mucanifo

²³Nantianri Efeso anofoan Jesús fustihuunoashu Apa Dios ari nocotiro

nicacani atirifo fasi mucacaquin tsain chipunifo. ²⁴Isca huaquin. Nanno nocofunun ahuun anu Demetrio. Ahuun yono ahuarafu rami huapaoni. Cuno oshopafu huapaoni. Nan cuno oshopari ainfo ointsam rami huani. —Nan nocon diosiran, —ishon, —Ahuun anu Artemisa, —huanifo. Futsafori afu cuno oshopa ainfo ramihuafo uhuapamafori, —Artemisa ointsaran, —huanifo. Ascan inanmitsashon ahuun rafanan pui finonfo.

²⁵Ascano Demetrio nantifi ascaran yonomisifo ichanan huani ato tapimashquin. —Uhuun yoramishtichin, man man tapia non nocon dios Artemisa rami huaa non inan mitsashon ahuun rafanan pui ichapa non fimisi. ²⁶Ascafia man man nicamisi na nocofunu Pablonun noco yora ichapafo Efeso anoafu amaquiri shinanmana. Non rami huafocai diosima. Ahuamafinquin ato huamisi. Ascan yoimisi cuscan atirifiton icoinra huafo. ²⁷Pablonun yoiai cuscan musucuin. Nocon yorafoan icoinra huacashocai afanan rami huafo rafanancai non pui fitiroma. Non funotiro. Nocon pui fusticai non funoima. Tsoancai afanan nocon dios Artemisa pushu muran ichananpaitiroma. Nantifi manifoti Asia muran natian Artemisa cufiafo. Ascan Pablonun yosian cuscan icoinra huafoan yoitirofo, “Artemisacai ahua. Nocon diosimafinquin,” ishon yoitirofo. Ascano nocon dios Artemisa non funotiro, —ishon Demetrio ato yoini.

²⁸Nicacatan fasi sinacaquin oi ashcafinin yoinifo, —Artemisa tsoa futsa cuscarama. Nonfin Efesofo nocon diosinran, —ishon oi ashcafinin yoirianifo.

²⁹Ascaiton pushuhuanrasi anofoan nicanifo. Samamashta fasi mucanifo fucash tapinifo. Ascashon Pablo fu foanfainmisi rafu Gayo yafi Aristarco achinifo. Ichananti pushu

uhuapa ano ato iyoriscanifo. ³⁰Nicatan Pablo nan pushu uhuapa muran iquipaifaiton Jesús tanamisifo futsafoan a iquimacasmanifo. Pabloqui musucaquin. ³¹Nan Asia mai anoa aton niaifofoanri Pablo noicaquin cunu fomanifo, —Pablonun ichananti pushu uhuapa muran iquiyamapun mia asca huatirofoquin, —ishon cununifo.

³²Ascaino yorahunrasi ichananti pushu uhuapa murannoashu fasi mucai futsunifo. Atirifoan futsanori shinainno fasi shinanquin futsanifo. Atirifi yorafoan, —¿Ahuuscainun non ichananti pushu uhuapa muran non iquiyamaquin? —huanifo. ³³Israelifoan ahuun anu Alejandro fuchicashon putsiqui putsiqui anifo. —Ato yoihuu matsipacunonfo, —huanifo. Ascaifoan ato mushanshon inacahua ato yoini, —Pusiyamacahuun. Un mato cayacafi yoisharanon, —ishon Alejandron ato yoini. ³⁴Ascafia, —Nan nocofunu Israeliran, —huacashon tsoan nicapaima. Tsain chipuquin hora rafu oi ashcafinin oi fusti nicatsa yoirianifo, —Nonfin Efesofoquin. Nocon dios Artemisa ahumamishti huatiroan, —ishon oi ashcafinin yoirianifo.

³⁵Ascaifoan niaifo futsan ato, —Tsainyamacahuun, —mushanshoquin huani. Ascaino pusinifoma. —Efeso nocofunifoan ua nicacahuun. Nantifi manifoti anoafoan tapicani nonfin Efesofoquin. Non Artemisa pushu cushushomisi. Ahuun rami huati nai murannoashu pacuaran inifo. Nanrifi non cushushomisiquin.

³⁶Tsoancai, “Arimaran” huatiroma. Ascacun ahuuscain man mucaín. Puusiyamacahuun. Man mucaquin man chaca huatiroquin. ³⁷Nan nocofunifoancai ahua chaca huamisima. Ahua onuyamafain nocon dios Artemisaqui tsain chaca

huayamafiamisifoan ato nuno ihuua. ³⁸Demetrio yonomisifo futan tsoan tsain chaca futsaqui huapai. Nocon niaifofo yoicahuun nicanonfo. Atoqui yonotiro. ³⁹Ahuara futsan yoipaiqui niaifocoinfo yoitiro afoan arotirofo. ⁴⁰Man natian chaca huua cuscan niaifofoan nicashon noco asca huatirofo. Na yorafoan ahua chaca huayamafiamisishaquin man tsain chipuquin man mucai. Ascan niaifofoan noco yocaifoan ahuuscain mucacanimun noncai raquiri huatiroma, —ishon niaifoan ato yoini. ⁴¹Anori yoitan niaifoan ato nichian fonifo.

Pablo Macedonia yafi Grecia ano cani

20 Ascano mucacani matsiaifoanno Pablonun Jesús tanamisifo cunani aqui funonfo. Aquí fuaifoan ahuun tsainhuunshon aton ointi fupi huamani. —Natian un mato shinan fainicairan, —ishon ato yoitan atomaquinoashu Macedonia ano cani. ²Caashon tsain shara Jesushuunoa atoti yoiacuni aton ointi unimanon. Asca Grecia mai ano nocotoshini. ³Nanno oshu rafu non fusti nituyoni. Ascatan Siria ano pocufaini capaifiquin nica ahuun caifo Israelifoan rutupaiyaifoan nicai shinan futsashu Siria catamarocon Macedonia ano nasocainicani. ⁴Futsafo afu fonifo. Aton anufo futsan Sópater Berea anoa apa Pirro caino futsanfori Aristarco yafi Segundo Tesalónica anoafo foaino Gayo Derbe anoa caino rafunon fustiri Timoteo non Tíquico non Trófimo Asia anoashu afu fonifo. ⁵Nanfo rucun Troas ano fonifo nannoshon noco manacani. ⁶Ascainofin fusititian misi faranshashoma pinifo. Nan fusititian anaititan non Filipos anoashu pocufaini focani mucu fustiti oshan finontan non atoqui Troas ano noconi. Nocoashu siete oshatan nanno oshayoni.

Troas ano oinmitsaicaí Pablo caní

⁷Ascano Domingoaino non ichanan Jesús noco nashoni shinantani non misi torupacuashu pashcanain futsunon. Ascaino Pablonun ato Diosin tsain yoini. Iyoconaino cashquin yamunacucahuaino ato yoiquin ununi. ⁸Nan pushu cuyacoin ahuun osa rafu non fusti. Nan osa manaon ichananni. Atirifoan aton otatifo funifo. Fomancayanri otai futsuni. ⁹Ahuun cunu pushfan ano tsoashu pushcohuai ahuun anu Eutico. Pablonun fasi chai ato yoiraino oshani. Fasi osha muranshu pacuni. Cuyacunoashu osa rafu non fusti anoashu pacuni. Pacuashu naani. ¹⁰Ascaino Pablonun aqui fotoshon icoancufoanni. Icoacufaoan ato isca huani,

—Na pushcohuaihuunoo shinanchacayamacahuun. Man niaquin, —ishon ato yoini. —Yoiái cuscan icon afanan man niaran, —inifo.

¹¹Ascatan afanan Pablonun inacaitan misi torupacushon ato inan pacuni ato futan piishquin. Ascatan afanan ato yoiquin shafa huani. Shafaino atomaquinoashu caní. ¹²Ascano nantifi anofo fasi unimaquin pushcohuai ahuun pushu ano iyonifo.

Troas anoashu Mileto ano caní

¹³Ascatan Pablonun noco yoini, —Manfin shashon pushurasi ahuun anu Aso ano foicai. Unfin fain caicain matoqui chipo nocoshquin, —ishon noco yoini. ¹⁴Aso ano nocotan no fu shasho naqui nanupacucahuani. Nannoashu non Mitilene ano fonifo. ¹⁵Iyoconaino anoashu pocufaini non Quío cusumunri noconi. Shafa futsari non Samos cusumunri nocoshon nannoashu non Mileto pushurasi ano noconi. ¹⁶—Non Efeso ano rutiatiroma. Non Jerusalén ano nocoriscapai fusititian ahuun anu Pentecostés

icaitian non nocopai. Asca Asia ano non Efeso anori non rutiatirómaran, —ishon Pablonun ato yoini.

Jesús icoinra huafo aton cushumisifo Efeso anofo Pablonun aton tsain shara yosini

¹⁷Mileto anoshon Pablonun nocofunifo Efeso ano nichini icoinra huafo aton cushumisifo ihuunonfo. ¹⁸Nocofoan Pablonun ato yoini isca huaquin, —Un mato muran nocoi tauashu un caní cuscan man man uhuunoo tapian. ¹⁹Nocon Ifo Jesús un yonoshona. Nocon caifo Israelifoan ua asca huapaifiaifoanno un mato muran isharamisi. “Pablo tsoa futsan cuscamarancai,” un mato huamisima. Uncai mato anori shinanmapaimisima. Uaiyananrocon Upa Diosin ua yonoo cuscan un mato tapimapaoni. ²⁰Ranotama un Diosin tsain mato tapimapaoni man Jesús tanasharanon. Ichananti pushu muran non pushufoti un mato tapimapaoni. ²¹Nocon caifo non nocon caifomari un tapimapaoni isca huaquin, “Maton chaca shatucahuun Dios shinanshquin. Nocon Ifo Jesús icoinra huacahuun,” un ato huapaoni.

²²Ascano natian Diospan Yoshin Shara ua yonoo cuscan un Jerusalén ano cai. Anoashumain un ahuuscai caicain uncai tapiama. ²³Diospan Yoshin Sharapan ua yoiái pushurasiti anoshon ua cunu muran iquimanaifo ua omitsiscamashcani. Nan fusti mun tapia. ²⁴Ascafia un nocon Ifo Jesús yonoshoyamaino un nipaitiroma. Ua yonomapaiyai cuscan nan fusti un shinain. “Nantifi yorafoti Upa Diosin atohuun ramapai atohuun noicoín nan tsain shara ato yoitacahuun,” ua huani. Ua yononi cuscan un anaitipai.

²⁵Upa Diosin ato iquina anomain ahuu cuscarquin un mato tapimamisi.

Un mato tapima cuscan nicafiashocai man afanan ua oinnacama. ²⁶⁻²⁷ Nantifi Diosin mato amapaiyai cuscan un mato yoimisi. Uncai shatumisima. Ascacun un mato Diosin tsain yoimisi cuscan nicacasmamisifo omitsiscapanacafo muran fotirofiacai uhuun nuama. Mun ato yoiyomisi.

²⁸ Diospan Yoshin Shara matori yonoa Jesús iconra huafo yoisharanon. Ascan oinfain. Isharacahuun. Diospan yorafo cushusharacahuun. Jesús ato nashoaino ahuun imi foni ahuun yorafo inonfo.

²⁹ Mun tapia un matomaqui caano amaquiri yosimisifo matoqui fucani mato funomacani. Masharo pofupan inafu cuyopaitiro cuscan. Nanscarifi aquin afoanrifi mato funomapaicani.

³⁰ Mato muranshonri mafin ranan chipo Diosin tsain iconquin amaquiri yoitirofo aton tanamisi inonfo. ³¹ Ascacun ¡Oinfain! Un mato yosimisi cuscan ointiaquimayamacahuun. Fari rafu non fusti un mato shafatifi yosifafainpaoni Jesús tanasharanon. Uaiyanan un mato yosifafainpaoni man funononfoma.

³² Natian un Upa Dios cufin mato cushusharanon. Mato noiai cuscan ahuun tsain maton nomuran tapimanon. Nanfohuunshon ahuun curushu mato inantiro ahuun tsain tanasharanonfo. Asca huatan Diosin ahuun yorafo catonni cuscan ahuunari man inon. Ato inansharapaoni cuscan matori nanscarifi huatiro man afu ipanon.

³³ Tsain futsari mato yoinon. Uncai maton pui yafi maton sahuutifo un fipaimisima. ³⁴ Man man tapia un non u futan yonomisifo yopamisi cuscan unfin yonocain ahuun rafanan fishquin un yonomisi.

³⁵ Man man tapian mato muran icashu un curushcai yonopaoni mato oin-mashquin marifi curushcai yonoshon ahuun rafanan fishon ahuuomafoya isin-inaifori man inantiro. Nocon Ifo Jesús

yoini cuscan un ointiaquimama. Yoiri isca huaquin “Futsan noco ahuaara inainno non unimafiatiro non futsafo inainno non mimacai unimatirotan,” ishon nocon Ifoan yoini. —Nannori Pablonun Efesofo ahuun tsain unutaqui yoini.

³⁶ Ahuun tsain yoiquin anaititan ato futan ratoconun mai chachishon Upa Dios cufinifo. ³⁷ Cufincatan uaiyanan Pablo icoacufuannifo. ³⁸ —Mancai afanan ua oinnacamaran, —ato huaiton shinannifo. Fasi aton ointi noconifo. Ascashu afu unu cusumun fonifo. Pablo shasho naqui nanucainaino.

Pablo Jerusalén ari cani

21 Ascano atomaquinoashu pashcapaiyamafiai non atomaqui pashcani. Shashon unuhuan pocufaincani non cayacafi pushurasi Cos ano non cani. Nannoashu iyoco futsaino pushurasi Rodas ano fonifo. Anoashu foi pushurasi Pátara ano noconi. ² Nannoa non shasho uhuapa futsan fuchini Fenicia ari caiton. Ascano ahuun nanufainifo non atofu cani. ³ Caquin non oian mai nushmancayan toomanhuan ahuun anu Chipre. Fari oai patashari finonfaini non Siria mai ano noconi. Nanno unuhuan cusumunri pushurasi ahuun anu Tiro. Ascano shasho naquishon aton mafo mapumanifo. ⁴ Mapuinfoan non Jesús tanamisifoqui noconi. Non atofu osha siete nanno non nituyoni. Nanfoan Diospan Yoshin Sharahuunshon Pablo yoinifo, —Jerusalén ano cayamahuu, —huanifo. ⁵ Jesús tanamisifo aton ainfofo ya aton facufori no fu pushurasi murannoashu unuhuan cusumunri fonifo. Nannoshon non nantififain ratoconun mai chachishon Upa Dios cufini. ⁶ Ascatan —Non mato shinanfainnicairan, —ishon yoicatan munininantannifo. Ascatan shasho

nanufainifo. Ascaino aton pushu ari nasofainifo.

⁷Ascatan Tiro anoashu foi non pushurasi Tolemaida ano noconi. Nanno non Jesús icoinra huaa futsafo fuchitan non atofu osha fustiyoni.

⁸Iyoco futsaino non Cesarea ano noconi. Felipe pushu ano non afu iyoi. Siete nan futsan catonni Felipe ato futan tushu pashcanan huafafainon. Ascafia ahuun yono cuyoano Felipe Jesushuunoa yoifoanfainmisi inon. ⁹Ahuun facu shomaya rafu non rafuri Diospan Yoshin Sharahuunshon ahuun tsain yoipaonifo. Nanfo funuomafo ini.

¹⁰Nanno non shafa ranan ini. Ascano Diosin tsain inonpacoai yoimisi ahuun anu Agabo Judea anoashu nocoqui noconi. ¹¹Nocotan Pablonun ahuun nanushumuti fiantan ahuun munushumucain onushumushon yoini, —Nan nanushumuti Ifofin Israeli niaifofoan isca huashcaniquin. Ascashon niaifo futsafoanno iyoshcani. Anorifi Diospan Yoshin Shara ua yoiacquin, —Agabo ato huani.

¹²Noco yoiyai cuscan nicacaquin non Pablo yoini, —Jerusalén ano cayamahuu, —non huani. ¹³Noco cumani,

—¿Ahuuscain man uaiquimun? ¿Uarifi man uaimapaimun? Ua munushfain ua onushtiro. Jerusalén anofoan ua rutufiatiro uhuun Ifo Jesushuunoashu mun itishara apaiyaifo cuscan ua huatirofo. Munfin itisharaquin uhuun Ifohuunoashu nashquin, —ishon Pablo noco yoini.

¹⁴Noco nicayamaitocai non afanan ahuua yoitiroa.

—Nocon Ifoan mia amapaiyai cuscan min huatiroran, —ishon non yoini.

¹⁵Ascatan iyoco futsaino itishara huatan non Jerusalén ano cani. ¹⁶Jesús tanamisifo Cesarea anofo no fu fonifo. Mnasón pushu ano noco iyonifo. Nan

Chipre mai anoa ini. Nannoshon Mnasón futsafo futan Jesús icoinra huaquin tau huani. Ahuun pushu muran non iyoni.

Pablonun Santiago oincái caní

¹⁷Non nocoaino Jesús icoinra huafocoqui fasi unimanifo. —¡Aicho! Man man oquin, —noco huanifo. ¹⁸Iyoco futsaino non Pablo fu Santiago icano cani. Icoinra huafoco aton cushumisifori nanno inifo. ¹⁹—Uhuun yoramishtichin non fasi unimai matoqui nocoashu, —ishon Pablonun ato yoini. Ascano Diosihuunshon aton caifoma muranshon ato ashomisi cuscan ato tapimani.

²⁰Ascaiton nicacani, —¡Aicho nocon Diosin shararan! —huanifo. Ascano Pablo yoinifo, —Nocon yorashta non mia yoisharapai. Man min oian nocon caifo Israelifo ichapafoan Jesús icoinra huafoco. Nocon shuni Moisés noco yononi cuscari fasi tanasharapaicani. ²¹Futsafoan ato yoiayo min nocon caifo Israelifo mai futsa ariayo min ato amaquri yosi. Min ato yosian Moisés yononi cuscan afanan tananonfoma. “Nocon caifoan fuyamisi cuscara afanan tanayamacahuun. Maton facufo afanan aton foshqui rupa shatuyamacahuun,” ishon min ato yoiayon nicacani miqumusuafoco. ²²Min nocoqui noco nicashcani. ¿Ascán non ahuuscatiromun?

²³Non shinain cuscan acahuun. Nocon nomuran non shinain isca huaquin. Noco fonu rafu non rafuri Dios yoiayo isca huaquin, “Upa Diosin min noco yonoa cuscan non airan,” ishon yoiayo.

²⁴Ascano na noco fonufo Dios fu tsainti pushu muran ato iyotahuun. Nocon fuyamisi cuscara ato futan huahuu nantifi chaca soanon. Min pui inanhuun nocon fuyamisi cuscan ato maruhuun. Min ato asca huaiton oincashon tapinonfo, “Iconma min Moisés yononi cuscan pota. Ascatarocon Moisés nocon

shunifo yononi cuscan mirifi min tanairan,” ishon shinanonfo. ²⁵ Tsain futsari Jesús icoinra huafo nan nocon caifomahuunoa mia yoinon. Non ato yoia, “Moisés noco caifo yononi cuscan marifi acahuun,” noncai anori ato huaama. Non ato cunu fomani isca huaquin, “Dioscoinma aton diosiran huacashon tamanchinafo. A oincaquin tushu piyamacahuun. Man ascara piyaino futsafoanri mato oincaquin shinantiro marifi ato futan dioscoinma man fuchipai cufishquin. Ascan chaca itiro. Imi ayayamacahuun. Yoia yafi ina tumosishon ahuun imi foamano ahuun nami piyamacahuun. Maton ahuinmari chotayamacahuun. Maton funumari chotamayamacahuun,” ishon non ato cunushoniran, —ishon Pablo yoinifo.

Pablo Dios fu tsainti pushu muranshon achinifo

²⁶ Ascan man yoia cuscan Pablo nan rafu non rafuri nocofunufu Dios fu tsainti pushu muran iyonni ato futan ahuun caifoa fuyamisi cuscan anon. Aton chaca soashcaquin. Dios fu tsainti pushu niaifofo yoini, —Siete oshatan non nuno nituyoi nocon chaca soanon. Anaititan non Dios inanpacushquin. Non Upa Diosin yoita cuscan non anon, —ishon Pablonun ato yoini.

²⁷⁻²⁹ Siete oshano man anaiticuanaino Israelifo Asia anofoan Dios fu tsainti pushu murannoa Pablo yafi nocofunu rafu non rafuri fuchinifo. Fuchicashon aton caifo cunanifo, —Noco caifomishtichin noco futan acapun. Nan nocofunun Pablonun manifoti ano cahuacacainquin noco yorafoqui tsain chaca yoifain nocon shuni Moisés noco yononi cuscan nicayamacahuun ato huafain nocon Dios fu tsainti pushuhuunoari tsain chaca huamisi. Natian iquia nocon

caifoa nmari iquimana nocon Dios fu tsainti pushu chaca huairan, —ishon oi ashcafinin yoinifo. Nan Trófimo Efeso ano ini. Pablo futan pushurasi ano oinnifo. —Nocon caifomafiacun Pablo nanton Dios fu tsainti pushu muran iquimanaran, —ishon shinannifo. Ascafiacai Trófimo ano inima.

³⁰ Ascano nantifi nanno ichanacashon ato Pabloqui tsain chaca huanifo. Fasi tsain fucash huanifo pushurasi anoafoti mucacaniquin. Nicacatan pushufotifi aqui maconifo. Pablo achicashon Dios fu tsainti pushu muranshon chifi ninifainifo. Ascatanaino fupoti fuporiscatani. ³¹ Pablo rutupaifiaifono Romano ranushumuafu niaifoa mucaifoa nicani. Nantifi Jerusalén ano icafo mucaifoa nicani. ³² Nicaquin niaifo patasharifo non ahuun ranushumuaforifi mucaifoa ichonifo. Niaifo yafi ranushumua futsafo fuchicatan Pablo sutufiacuquin unuriscatanifo.

³³ Niaifoa ahuun ranushumuafu yonoano Pablo cuno pono rafutan munushnifo. —¿Na nocofunun tsoaquin? —ato yocani. ³⁴ Oi ashcafinin futsan futsa anori yoiafano futsanori yoinifo. Fasi mucaifoa noca niaifoa Pablohuunoa ahua tapinima. Ascano ahuun ranushumuafu yononi Pablo aton pushu muran iyononfo. ³⁵ Paiti ano nocotoshiaifoa ahuuscashoma achipaiquin cufuntoshinifo rutupaicaquin. Ascaifoa ranushumuafoa Pablo finifoanni atomaqui iyai inifoannifo atoqui musu huaquin rutunonfoma. ³⁶ Mufaincatan, —Ruturiscahuun, —oi ashcafinin huarianifo.

Pablonun yoini ahuunoa shinanchacanofoma

³⁷ Aton pushu muran iquimapaiyaiton Pablonun niaifo yoini,

—¿Un mia yocatiromun? —huaiton.

—¿Min Griego tsain tapiamun?
³⁸¿Minmun Egipcio ma? Nan nocon niaifo potapai 4,000 rutumitsamisifo tsoan istaipama ano iyon. ¿Nanmun min? —ishon yocaiton.

³⁹—Uncai aamafinquin. Unfin Israeli-foquin. Un Tarso anoashu pushurasi uhuapa Cilicia murannoashu un caini. Natian ua yoipun un nan yorahunrasi yoinon, —huaiton.

⁴⁰—Ato yoihuu, —niaifoa huaiton. Pablo paitinin mapuinifoantan ato mushashoni. Ascaino mucafian nishmapacufoannifo. Ascano aton tsainman ato yoiniquin.

22—Uhuun yoramishtichin ua nicacahuun un mato yoinon. Ua chaca huafo cuscan un mato cayacafi yoipai afanan uqui chaca shinanonfoma, —ishon ato yoini.

²Nan Hebreo tsainman ato yoiatton nicacani fasi puusinifoma. Ascano afanan ato yoini,

³—Unrifi un Israeliquin. Un Tarso pushurasi Cilicia murannoashu un caini. Ascano nuno Jerusalén anoashu un pushconi. Nocon yorashtan Gamaliel ua yosipaoni. Nocon shunifoa noco yonopaoni cuscan nanti ua yosipaoni. Manfin fasi Dios tanapaisharai cuscan urifi nansca huapaipaoni. ⁴Un Jesús tanapaiyaifo fuchishon un ato omitsiscamapaoni namapaiquin. Un nocofunufu non ainfofori achimapaoni ato cunu muran iquimashquin. ⁵Un mato yoi ai cuscan nocon yorafohuunshon Dios cufimisi niaifocoin non nocon Dios fu tsainti pushu cushumisifoan mato yoitiro iconquin. Ua cunu inanni ahuun yorafo Damasco ano inannon Jesús icoinra huafo anoashu Jerusalén anoa ihuushon ato cunu muran iquimanon.

Pablonun Jesús ifoa cuscan ato tapimani

Hch 9.1-19; 26.12-18

⁶Ascashu un Damasco fain caino fari masafinin racano nocoti chaima samamashta nai ariashu chashariscatani.

⁷Chashamanhuan acucahuanaino un pacuni. Pacuquin un ahuun oi nicani. “Saulo, Saulo, ¿Ahuuscaquimun mian omitsiscahuaicain?” ua huaiton. ⁸“¿Min tsoamun, I fon?” un huaiton. “Unquian. Jesús. Un Nazaret ano iyopaoni. Min ua omitsisca huairan,” ua huaiton.

⁹U fu foaifoancai chashamanhuan oinfiacaquin ua yoi ai cuscan tsoan nicanima. ¹⁰Ascaino un isca huani, “¿Ifon, un ahuacai huaimun?” ishon un yocaiton. “Funihuu. Damasco ano cayotahuun. Nannoshon min ahua huaimancain futsan mia tapimanon,” ua huani. ¹¹Chashamanhuanun ua fuiconacai un catiro inima. Un fu fomisifoan ua mutsoshon Damasco ano iyonifo.

¹²Non nocoano nocofunun ahuun anu Ananías ua oin oni. Nanton nocon shuni Moisés noco yononi cuscan tanamisicoi. Nantifi nocon caifo Israeli fo nanno icafoan yoimisifo, “Ananías nocofunu shararan,” huamisifo. Ahuun noiafo.

¹³Uqui nocoshon ua yoini, “Uhuun yorashtan Saulo, afanan oinhuun,” ua huani. Yoiaino un fupuinacahuani. ¹⁴Ascashon ua yoini, “Nocon shunifoa aton Diosin mia catoan mia amapaiyai cuscan min tapitiro. Ahuun Furun shara oinfain ahuun tsain nicashquin. ¹⁵Min oian cuscan huafain min nicai cuscari yorafoti min ato yoishquin. ¹⁶Ascacun afanan manayamahuu. Funihuu mia unu muran iquimanon min chaca soashonon nocon Ifo Jesús icoinra huashon ismashquin,” ishon ua yoini.

Upa Diosin caifo futsan muran Pablonun ato tapimani

¹⁷⁻¹⁸ Ascatan Jerusalén ano nasocurani nocon Dios fu tsainti pushu muran iquini. Dios cufinquin namapan cuscara un nocon Ifo oinni. “Nuno afoan min ato uhuunoa yoiái cuscan mia icoinra huacanimaquin. Nuno Jerusalén anoashu cariscatahuun,” ua huani. ¹⁹ “Ifon, nuno icafoan tapiafo un mia icoinra huafoti omitsiscamapaoni. Un ichananti pushufo ano cahuan-scapaoni ato cunu muran iquimani ato coshaquin futsunonfo. ²⁰ Ascarifitan Esteban minhuunshon rutuaifono unrifi nannorisi shinanquin un ato yoini. Futsafoan Esteban rutuaifono un aton sahuutifo cushushoniran,” ishon un nocon Ifo yoini. ²¹ “Cayotahuun. Un min caifo futsa muran mia nichí uhuunoa ato yoinon,” ishon ua yoiniran, —ishon Pablonun ato yoini.

Romano niaifoa Pablo cushuni

²² Nicasharayonifo. —Un caifo futsan muran cairan —ato huaino afanan nicapainifoma. Oi ashcafinin cunanifo, —Nan nocofunun chacashuni. Rutucahuun afanan ninoma. Nanon, —ishon tsain fucashni huanifo. ²³ Asca huacatan aton sahuutifo foman caya potainifoancatan mapori foman caya saanifo. Fasi mucainifoannifo. ²⁴ Ascaino ranushumuafoan aton niaifoa yonoano Pablo aton cunu muran iquimanifo, —Iquimacahuun. Coshaqui futsashon. Fichin coshaquin yocacahuun isca huaquin “¿Ahuuscain miqui fasi sinacanimun?” ishon yocahuun nonri tapinon, —ishon niaifoa ato yoini. ²⁵ Asca huatan mushanhuanshon puchi coshapaiyaifoa Pablonun ranushumua niaifo patashari yoini,

—Unfin Romanoquin. Ua chaca huati huaafishocai tsoan ua yocama icon-mainquin. ¿Ascan isca huaquin min niaifoa mato yonoamun ua man isca huanon? —ishon yoini.

²⁶ Nicatan ahuun niaifo ano cariscani, —¿Ahuuscain min na nocofunu coshamamun? Nanfin Romanoquin, —ishon yoini.

²⁷ Nicatan niaifo Pablo ano cani, —¿Iconmun. Min Romanomun? —ishon yocaiton.

—Ainfain, Unfin Romanoquin, —huaiton.

²⁸ —Unfin Romano ipaiquin un pui ichapa niaifo inanni ua Romano imanon, —huaiton. —Ascafiashu uncai tsoa pui inanmisima. Unfin Romano cainniquin, —ishon Pablonun yoini.

²⁹ Nicacani ranushumuafoan fichin coshapaiyacani amaquinoashu foriscanifo. Niaifo arifi ratuni. —¡Ohua! Na nocofunu Romanofiacun un cuno pono rafutan munushua, —ishon shinanni.

Israelifoa niaifoa aton ointaifi Pablonun yoini

³⁰ Ascaino Israelifo Pabloqui sinaquin aqui tsain chaca huanifo ahuuscaimun iscaiquin ishon ranushumua niaifoa tapipaini. Ascaino iyoco futsaino Pablo ahuun cuno pucashon nocon yorahuunshon Dios cufimisi niaifoa yafi Moisés cununi cuscan tapimamisifo yononi, —Ichanancahuun Pablo maton ointaifi man yocanon, —ishon ato yoini. Asca huatan Pablo ato ano iyonifo.

23 Ato oinquin Pablonun ato yoini, —Uhuun yoramishtichin, Upa Diosin ua yonoa cuscan facuashu un tauni cuscan natianri un ascamisi. Un mato yoiái cuscaoin uhuun nomuran un icoinra huai, —ishon ato yoini.

² Ascaiton aton yorafohuunshon Dios cufimisi niaifocoin Ananiasin

futsafo Pablo chaimashta niafo yoini, —Apasihuun, —hwaiton,

³—Min fuparapaimisi. Upa Diosin mia coshatiro. Min futsafo shinanmapai Moisés yononi cuscan un aamaran ishon. Ascan mincairocon ascama. Moisés yononi cuscacai chaca huua tapishoma non yora onaintimatiroma. Asca ahuascacai min futa min yonoamun ua apasion, —ishon Pablonun niaifo yoini.

⁴Chaimashta niafoan yoinifo, —Ahuuscaimun min nocon yorafohuunshon Dios cufimisi niaifocoin min tsain chaca huaquin, —huaifoan.

⁵—Uhuun yoramishtichin, un onanma nanton nocon yorafohuunshon Dios cufimisi niaifocoin. Diospan tsain cunuquin isca huani, “Maton niaifofo ato tsain chaca huayamacahuun,” —ato huani.

⁶Ascano Pablonun samamashta shinan futsani. Ahuun caifo nanno ichananfo atirifi Saduceofo non atirifi Fariseofo. Ascano ato yoini,

—Uhuun yoramishtichin, unfin Fariseoquin. Uhuun upa non uhuun shuniforifi Fariseofoquin. Yora naashu funicun un icoinra huaicain. Ascan uhuunoa tsain chaca huai na shafatan ua asca huapaicaniran, —ishon ato yoini.

⁷Ascaiton nicacanasu Saduceofo non Fariseofo fochishmanantanannifo. Niaifofoancai anorisi shinannifoma. ⁸—Non naashucacai non funitiro. Nocon yoshin yamai. Diosin oinmati afu nai muran icafori yamairan, —ishon Saduceofoan yoinifo. Ascafiaino Fariseofoan yoinifo, —Non naashu non funitiro. Nocon yoshin nipanaca. Upa Diospan ahuan oinmati afu nai muran ica icha-parasiran, —ishon yoimisifo. ⁹Ascano nanno ichananshu fasi mucanifo. Fariseo futsanfoan Moisés yononi cuscan tapimamisifoan nishon yoinifo,

—Na nocofunu Pablocai ahua chaca huama. Noco ahua chaca yoiama. It-sairaca yoshin shara iyamarai Diospan nai oinmatinin Damasco fai anoshon Pablo yoiniran, —ishon yoinifo.

¹⁰Ascaino fasi mucariacaquin. Pablo achitan nininain futsunifo. Ascaiton ranushumua niaifoan oin Pabloqui musuni, —¡Ohuashta! Pablo nininain futsucani un numaiyamaino rututirofoquin, —ishon ahuan ranushumuafu yononi. —Numanon. Nocon pushu muran iyocahuun, —ato huani.

¹¹Nan yamutan nocon Ifo Jesús Pabloqui noconi. —Pablon shinanchacayamahuu. Jerusalén anoafu min ato uhuunoa yoimisi cuscan huafain Roma anoafori nanscarifi huaquin yoihuu, —huani.

Pablo rutushquin itisharanifo

¹²Ascan iyoco futsaino Israelifo ichanancashon yoinifo, —Non Pablo rutuataima non piqui tunufain non ahua ayaima. Non asca huayamaino Diosin noco asca huanonran, —ishon yoinannifo. ¹³Cuarenta nocofunfoan anori yoinifo. ¹⁴Asca huacatan nocon yorafohuunshon Dios cufimisi niaifofo non Dios fu tsainti pushu cushumisifo ano fonifo chani huai focani,

—Non yoiia non Pablo rutuataima non piqui tunufain non ahua ayatiroma. Non asca huayamaino Upa Diosin noco asca huanon. Non nantiffain anori yoi. ¹⁵Ascan natian niaifofo patashari matofu ichananfatafo aton ranushumuafu niaifo fuparashocahuun. Yoicahuun isca huaquin, “Noco Pablo ihuushotacahuun non afanan yocasharonon cayacafi ahuanoa tapicoinnon,” ishon yoihuu. Ascaiton oinquin cahuanaiton achishon non rutunon, —ishon yoinifo.

¹⁶Ascano yoiiafo cuscan Pablonun ahuan pican nicatan ahuan cocaqui

chanini. ¹⁷ Nicashon Pablonun ranushumua niaifo patashari cunani, —Uhuun piacan ahuara min niaifo yoipai. Ascan min niaifo ano iyoriscahuun, —huani.

¹⁸ Ascano niaifo ano iyon. Nocoano, —Niaifoan, Pablonun ua cuna. “Uhuun piashtan, min niaifo ano iyoriscahuun ahuara yoinon,” —ishon ua yoia.

¹⁹ Ascashon niaifoan pushcohuai mutsoinifoan chaimashta iyon, —¿Ahu min ua yoipaimancain? Ua yoihuu, —huiton.

²⁰ —Uhuun caiffo nan Israelifoan mia fuparapai fucani. Mia isca huacani,

“Noco Pablo ihuushotahuun non afanan yocapaicai ahuunoa cayacafi non tapinon,” mia huai fucani.

²¹ Ato icoinra huayamahuu. Uhuun coca atoqui iyoyamahuu. Cuarenta nocofunifoan fai cusumunshon cushuafoqui uhuun cocan ato finoanton achishon rutushcaquin. “Non Pablo rutupaiyachaincai non ahua piyamafain non ahua ayayoima. Non asca huayamaino Upa Diosin noco rutupainonran,” ishon yoiafo. Natian samamashta miqi fucani mia yocai fucaniran, —ishon furonanfacun yoini.

²² Nicatan ranushumua niaifoan, —Mian yoia cuscan tsoa futsa tapimayamahuu, —huatan furonanfacu nichini.

Pablo niaifo Félix ano nichinifo

²³ Nichitan niaifo patashari rafu cunani, —Doscientos ranushumuafo nichifain setenta ranushumuafo caballo camaqui nichifain doscientos ranushumuafo ashin ya un nichicain. Ato yoicahuun itisharanonfo Pablo na yamu a las nueve Cesarea ano iyocaniquin.

²⁴ Pablari caballo inanyohuu niaifo Félix ano iyosharanonfo, —ishon ato yononi.

²⁵ Yoitan ranushumua niaifoan ahuun niaifo cunu fomani isca huaquin,

²⁶ —Unquian Claudio Lisias. Un mia cunu fomai min tapinon.

²⁷ Un nocofunu ahuun anu Pablo miqi nichishquin. Ahuun caifoan Israelifoan achicashon rutucuanaf. Mucaifoan nicaquin uhuun ranushumuafo futan un Pablo numaita.

²⁸ Ahua chaca huamainquin tapi-paiquin Israeli niaifofo ichanain ano un iyoa. ²⁹ Afoan yoiai cuscan nicashton mun tapia na nocofununcai ahua chaca huama. “Nocon caifoan yononi cuscaicai Pablo amisima,” ishon nan fusti ahuunoa yoiafo. Ascan ahuaicai chaca huamafinquin iquimafain rutupananfoan.

³⁰ Futsa uqui chania Israelifoan ua fuparapaicani Pablo rutushcaquin. Tapishon un miqi nichirisca. A chaca huafori un yonoo miqi focani Pablomain ahua chaca huaquin mia yoinonfo. Nanti uhuun niaifon Félix, —ishon cunushoni.

³¹ Ascano aton niaifoan ato yonoo cuscan yamu Pablo Jerusalén anoshon Antipatris ano iyonifo. ³² Iyoco futsaino atirifi aton pushu ano naso furanifo. Ranushumuafo caballo ya fusti Cesarea ano iyonifo. ³³ Cesarea ano nococashon Pablo niaifo ano iyonifo. Ranushumua niaifo ahuun cunuri niaifo Félix inanni. ³⁴ Cunu oinquin yocani, —¿Min rani icamun? —huiton. —Unfin Cilicia anoquin, —Pablonun huani.

³⁵ —Mia chaca huafo nocoafotian un mia cunashquin non ichananon man ua yoinon, —ishon yoini. Yoitan nan Herodes niaifo icano nichini, —Pablo cushusharacahuun, —ahuun ranushumuafo yononi.

Pablonun Félix niaifo yoini ahuunoa shinanchacanoma

24 Ascatan osha mucu fustiti finontan Israelifo aton niaifocoin Ananías Cesarea ano cani. Aton

ichananti pushu niaifofori afu fonifo. Nocofunu futsa ahuun anu Tértulo arifi atofu cani. Nanton Romano niaiffo yononifo cuscan fasi tapicoinni. Nococashon niaifo Félix nanfo yafi Pablo ichanan huani aqui tsain chaca huafoan nicanon. ²Ascatan Tértulo yoini isca huaquin,

—Nocon niaifoan, min noco iquina fasi sharacoin. Min niaifo iyopaonitian non natianri noco tsoan fucash huaama. Min niaifoataimacai non isharamisima. Natian ascatamarocon mihuunoashu non fiananan non ahua yopaima. ³Ascano non mia aicho huai. Nantifi uhuun caifoti miqúi unimacoin. Min noco shara huamisi.

⁴Ascafia un mia chai yoiriapaima min fucashnonma. Un mia ichapama yoipai noco nicayopun, niaifoan. ⁵Nan nocofunu Pablonun fasi nocon caifo Israelifo fucash huamisi. Icafoti muca-mamisi. Nocon caifo amaquiri shinan-mapaiyaifoan aton anufo Nazarenonfo. Pablo aton niaifo. ⁶Nocon Dios fu tsainti pushu chaca huapaiyaiton non achitan. ⁷Nocon caifoan yononi cuscan non on-aintimacuanita ranushumuafu aton niaifoan Lisias cushuyamacun curushcain yonoano nocomaquishon numaita. ⁸Mifi yocashon min tapitiro ahuunoa chaca non yoia cuscan iconcoiran, —ishon yoini.

⁹—Niaifoan. Nocon yora Tértulo Pablohuunoa yoia cuscan iconcoiran, —ishon Israelifo nannofoan yoinifo. ¹⁰Yoicatan niaifoan mushashonaiton Pablonun a yoini,

—Niaifoan, uhuun caifo futsa chaca huapaiyaifoan min nicamisi. Fari ichapa min ato nicamisi. Icon iyamarai iconma min yoimisi. Ascan ranotama uhuunoa un mato yoi min tapitiro un-cai ahua chaca huamisisima. ¹¹Futsafoan mia yoitiro osha doce finontan un Jerusalén ano caita nocon Dios fu tsainti

pushu muranshon Upa Dios cuficai. ¹²Nunoshon ua chaca huapaiyaifoan-cai Dios fu tsainti pushu murannoashu un tso fu fochishmanantanamisima. Un nocon ichananti pushu muranshon yorafo mucamama. Jerusalén anofoan-cai un yorafo mucamama. ¹³Afoancai ahua oinmatirofoma un chaca huacun.

¹⁴Icon, un ranotama mia yoitiro nocon shunifoan aton Dios urifi noiquin un cufimisi. Nocon Ifoan noco yosipaoni cuscan un tanamisi. Un non futsafoan tana cuscan amaquiran man huamisi. Nocon shuni Moisés yononi cuscan nantifi un icoira huaiquin. Nocon caifon Diosin tsain yoimisifoan cununi cuscan nanfori un icoira huaicain. ¹⁵Diosin yoini cuscan yora sharafo yafi chacafori funimashquin uhuun caifo nuno nanfo icoira huaifo cuscan urifi un icoira huamisi. ¹⁶Ascacun un isharpaimisi cuscan uhuun nomuran un tapin un Dios yorafo chaca huamisisima.

¹⁷Fari ranan un Jerusalén ano icama. Ascan natian un nasoita uhuun yora ahuuomafo pui inashquin Upa Dios fu tsainti pushu muranri un iquita Upa Dios ahuarafo inashquin. ¹⁸Nocon Diosin tsain noco yononi cuscacoin un huua. Un Upa Diosin ahuun ointaifi chaca huatarocon un iisharaqin. Nanscara uhuun caifofoan Dios fu tsainti pushu muran ua fuchiafo. Yorahuanrasicai ufu icafoma. Tsoacai mucama.

¹⁹Uhuun caifo Asia anofoanraca un ahuara chaca huaiton oianfo ahuuscain miqúi fuafomamun mia yoishcaquin. ²⁰Uhuun caifo nunofoanri ua oianfo nocon niaifofoan aton ointaifi un ato yoiaiton. ¿Ahuuscain afoanrifi uhuunoa ahua chaca yoiafomamun? Uncain ahua chaca huama. Ascan uhuunoa ahuacai chaca yoitirofoma.

²¹Ahuara fustishta nocon caifo niaifofoan ointaifi un ato yoia, Oi ashcafinin un ato yoita, “Yorafoti naa-

canashu afanan funishcani.” Ascacun ua miqui ihuuafo min ua nicanon. Afoanri mia yoipaicani mian asca huanon, —ishon Pablonun niaifo yoini.

²²Nicaquin Félixpan nantifi nanno ichananfo ato yoini. —Natian non unuyonon, —ishon ato nichini. Arifi Jesús icoinra huafaan amisifo cuscan tapisharamisi.

—Ranushumua niaifo Lisias nocoai- fono un mia ahuusca huaimancai mia yoitiro, —ishon niaifoon Pablo yoini.

²³Ascacun niaifoon ranushumua yoini, —Cunu muran Pablo iquimafashon ahuusca huanonma. Ahuun yorafoan oinpayaiton ato iquimahuu Pablo pimasharanonfo. Yopai cuscan inanonfo, —ishon Félixpan ranushumua niaifo yoini. Yoitan Cesarea anoashu mai futsa ano cani.

²⁴Shafa ranan finontan Cesarea ano nasocurani. Ahuun ahuin Drusila afu oni. Nan ainfo Israeli shafu. Noco- cashion Pablo cunanifo nicashquin. Ahu- uscashomain Jesucristo icoinra huatiro- foquin Pablonun Félix yafi ahuin yoini. ²⁵Futsafoanri ahua futsa ato yoini. Upa Diosin noco imasharatiro yoifain ahuuscashomain non chaca huapaiyai cuscan non potatiroquin yoifain Upa Diosin nantifi noco yoishquin ratofom- ain afu ipatiroquin atrifi omitsis- capanacafo muran focani. Pablonun afo- huunua yoini. Nicaí Félix fasi ratuni.

—Nanscanon. Nanti. Min natian catiro. Un ahua futsa huayamaquin un mia afanan cunatiro, —ishon yoini.

²⁶Yoiaifono ahuun nomuran shinanni, —Pablo cunu murannoashu cainpaiquifin ua pui inantiroquin un caimanon, —ishon shinanni. Ascacun cunafafainpaoni afu tsaishquin. ²⁷Israelifoon ahuunua shinansharanonfo ishon Félixpan Pablo cunu muranno caimapaínima. Fari

rafu nanscan huapaoni. Ascan fari rafu finonmani niaifo futsa tuquihuani, ahuun anu Porcio Festo.

Pablonun Festo niaifo fu fusoiquinanshu yoinanni

25 Ascain Festo nocotoshitan ni- aifoni. Nocoashu osha rafu non fusti finontan Cesarea anoashu Jerusalén ano cani. ²Nocoano nocon yorafohuun- shon Dios cufimisi niaifoon non Israeli ni- aifo futsafoan aqui funifo Pabloqui tsain chaca huai fucani. ³Festo fuparapaiquin yoinifo, —Niaifo Festo, ranushumuafo yonohuun Pablo nuno ihuunon. Noco ashopun, —huanifo. Fai pochinshon Pablo cushupainifo rutushquin. Rutu- paicaquin niaifo fuparapainifo. ⁴Ato cumani, —Pablo cunu muran Cesarea ano ica. Urifi samamashta un ari cai.

⁵Ahuara chaca huacun maton niaifoon yoitacahuun ufu canon. Nannoshon na nocofunu man yoiti huatiroquin, — huani.

⁶Ascain huatan atofu osha mucu ra- futi iyonni Cesarea ano nasocurani oni. Iyoconaino ato ichanan huani. —Pablo uqui ihuucahuun, —ishon Festopan ato yononi. ⁷Nococun ahuun caifo Israeli- foan Jerusalén anoashu fucashon yoiti huanifo. Yoifaitocai tsoan ismacoin- nima iconmainquin. ⁸Ascain Pablo- nun ato cumani isca huani,

—Arima. Uncai ahua chaca huama. Uhuun caifo Israelifo nocon shunicaifoon yononi cuscaí un potamisima. Nocon Dios fu tsainti pushu un a muranshon ahua chaca huayamafain Romanofoan yonomisi cuscaricai un yoitima imisima, —ishon Pablonun yoini.

⁹Ascain niaifo Festopan Israelifo ahuunua shinansharamapaiquin Pablo yoini,

—¿Min Jerusalén ano catiromun min caifofoan mia yoitihuai cuscan nan-

noshon uhuun ointaifi min cumatiro? — huaiton.

¹⁰—Ma. Nuno Romanofo aton niaifoan yoitiro un chaca huua iyamarai un chaca huama. Minfin tapisharaquin uncai uhuun caifo Israelifo un chaca huamisima. ¹¹Un ahua chaca huacun ua rututirofo. Ascafiashucaí uqui chaca huafo cuscan iconyamaino tsoancai ua atoqui nichitiroma ua rutunonfo. Unfin niaifocoin Cesar ano capaícaín uhuunoa yoishquin, —ishon yoini. ¹²Nicatan Festopan afu niaifofo patashari yoinan-nifo. Tsainquin anaititan yoini,

—Mihuunoa min niaifocoin Cesar yoipai. Ascacufin min Cesar ano catiro-quin, —ishon niaifoan Pablo yoini.

Pablonun Agripa niaifo fu fusoiquinanshu yoinanni

¹³Ascano shafa ranan finontan niaifo futsan ahuun anu Agripa yafi ahuun chico Berenice Cesarea ano funifo niaifo Festo oinfucani. ¹⁴A futan shafa ranan finoanno Festopan niaifo futsa Pablohuunoa tapimani.

—Nocofunun futsa nuno ica. Nan Félixpan cunu muran iquimani. ¹⁵Un Jerusalén ano cayamua Israelifoan ahuun yorafohuunshon Dios cufimisi niaifofo non Dios fu tsainti pushu cushumisifo uqui fucashon nan nocofunu ahuun anu Pablo ua yoitihuamanonfo. “A onaintimahuu,” ua huayamufo.

¹⁶Un ato yoia non Romanofoan nocon fuyamiscái ascarama. Nocofunu ahua chaca yocashomacái non onaintimatiroma. ¹⁷Ascano ufu fuyamufo nuno Cesarea anoshocái un ato manayamuama. Iyoconaino un ato ichanan huama. Nocofunun ahuun anu Pablori un iquimani. ¹⁸Ascaiton ahuun caifofo un yoia, “¿Natian ua yoihuu ahua chaca huamun?” un ato huua. Uhuun nomuran un

shinan na nocofunun ahua chaca huua. Ascafiacái ua anori cumacanima. ¹⁹Ascataamarocon atofu Diosihuunoa fochismanantanancani yoifain nocofunun Jesushuunoiari ua yoiafo. “Nan Jesús naafiashu man funini,” Pablonun yoia. ²⁰Afohuunocái un tapiama. Un mun ahuuscaícaín uncai tapitiroma. Ascacun un Pablo yocan, “¿Min Jerusalén ano ufu catiro min caifofo muran mia chaca huafo cuscan min ato cumanon?” ishon un yocan. ²¹“Ma. Unfin niaifo Cesar ano capaícaín uhuunoa yoicái,” ua huaita. Ascan un yonoo Pablo cunu murannoo ranushumufo cushunonfo Cesar ano un nichiaítian, —ishon ato huani.

²²Nicatan, —Urifi na nocofunu nica-pairan, —ishon Agripaun Festo yoini.

—Funamanri min nicái, —huani.

²³Iyoconaino niaifofo ichanancashon niaifocoinchi Agripa yafi ahuun chico Berenice pushu muran iquiafono manutifo chaan chaan acaino nantifi funinifo nan niaifo tsaóaitian. Ascan Festopan yonoo Pablo iquimani.

²⁴Iquishon Festo yoini,

—Uhuun niaifo Agripa yafi no fu ichananfo na nocofunu ahuun yorafonon Israelifo Jerusalén anofo non Cesarea anofoan ua yoiafo, “Nan Pablo rutuhuu,” ua oi ashcafinin yonoofo. ²⁵Asca huafiaínfonocái un ahunoo un tsain chaca yoiaífoan un nicama. Ascashon ahuun tsainri un nica. Tsain chaca huafo cuscan yafi ahuun tsainri nicashon un shinan ahua chaca huamafinquin naashquin. Un cunu muran nichipaífia, “Un niaifo Cesari yoipai uhuunoa tapinon,” ishon ua yoia. Ascan un Roma ano nichicain. ²⁶⁻²⁷Ascafia ahua chaca huayamacucai un ahunoo Cesar niaifo cunushotiroma. ¿Nocofunucai ahua chaca huua non yoitiroma? ¿Ahuuscaí non niaífon Cesar ano nichitromun? Un shinan un asca

huacai sharama. Ascan mato ointaifi un na nocofunu iquimani man non nocon niaifo Agripa man nicaiton man yoitiro ahuarafa raquirimain un niaifo Cesar un cunushonicain, —ishon Festopan ato yoini.

Pablonun Agripa niaifo yoini cuscan

26 Ascatan niaifo Agripan Pablo yoini,

—Min noco yoipaiyai cuscan noco yoihuu, —huaiton. Ascano Pablonun mushainacahuan ato yoini ahuunoa shinanachanonfoma.²—Niaifo Agripa un unimai uhuunoa un mia yoitiro. Uhuun caifo nan Israelifoaan ua chaca huafo cuscan un natian mia yoitiro uhuunoa yoirafo cuscan min icoinra huanonma.³Min uhuun caifo imisi cuscan nocon shunifoaan noco yonopaoni cuscan nanfo min tapicoian. Ascan niaifoaan funaquima ua nicasharapun un mia yoinon.

Pablo Jesús ifoatama ipaoni cuscan

⁴Un furonanfacu ipaonitian natianri uhuun caifoaan uhuunoa tapi sharafo. Un cainni anoafaan yafi Jerusalén anoafaanri un icai cuscan tapisharafo.⁵Fari ichapa ua onanmisifo. Nocon shunifoaan noco yononi cuscan un tanasharapaoni. Uhuun caifoaan Diosin tsain tanasharacun Fariseoran, huamisifo. Urifi Fariseo ipaoni. Un mia yoiyai cuscan uhuun caifoaanri tapiafo. Unmain icon yoicain mia yoipaiyai fo cuscan mia yoitirofo.

⁶Upa Diosin nocon shunifo yoyotiani cuscan un icoinra huamisi. Ascancunfin ua chaca huafoquin maton ointaifi na shafatan ua ihuuafo.⁷Uhuun yorafa nan shoco doce maniafo shafatifi yonofafaincani Diosin nocon shunifo yoyoni cuscan fishcaquin. Uhuun niaifoaan, uarifi fuchipaifiaiton, “Na nocofunun chaca huaran,” ishon uhuun caifoaan ua chaca

huafo.⁸Yora naashu funitiro un icoinra huaa. ¿Nan un icoinra huaino chacamun? ¿Marifi shinanmamun Diosin nan ahuamamishti huatiro ahuun curushhuunshon naafo funimatiro? ¿Man icoinra huatiromamun Upa Diosin naafo funimatiro?

Pablonun Jesús icoinra huafo omitsiscamapaoni cuscan

⁹Ipaoni urifi Jesús Nazaret anoashu pushconi ahuun tanamisifo un fasi chaca huapaoni.¹⁰Jerusalén anoashu un ascapaoni. Nocon yorafohuunshon Dios cufimisi niaifoaan ua yonoai cuscan un Jesús icoinra huaafo cunu muran iquimapaoni. Ato rutuaifono, “¡Aicho! Ato rutuhuu,” un huapaoni.¹¹Nocon ichananti pushuti muran un iquipaoni Jesús tanamisifo omitsiscamai. “Jesús sharamaran,” un ato huapaoni. Anori yoyamaifoaan un ato omitsiscamapaoni Jesús afanan tanapaimaran inonfo. Nocon caifoma anori un capaoni Jesús tanamisifo omitsiscamai.

Jesús ifoan cuscan Pablonun afanan yoini

Hch 9.1-19; 22.6-16

¹²Un Damasco ari cani ato omitsiscamaicai. Nocon yorafohuunshon Dios cufimisi niaifoaan ua cunu inanni un ato achimashon cunu muran iquimanon.¹³Uhuun niaifoaan, un Damasco fain caino fari masafinin racano nai murannoashu fasi chashariscatanaiton un oinni. Fari chashatiromaquian fasi chashacointani. U fu foainfoanno chashariscatani.¹⁴Un pacuriscataquin un ahuun oi nicani. Uhuun tsainman Hebreo ua yoini, “Saulo, Saulo. ¿Ahuuscaquimun mian omitsiscamaquin? Mifi min omitsisca huamuaquin,” ua huaiton.

¹⁵“¿Ifon, min mun tsoaquin?” huaiton. “Unquian Jesús. Mian

omitsisca huamamisi. ¹⁶Funihuu. Un mia oinmanaquin. Un mia catoan uhuun oinmati min inon. Min uhuunoa natian oian cuscan futsafo yoifain chipo mia oinmai cuscari min ato yoitiro. ¹⁷Min caifoa mia rutupaishquin. Yora futsafo muran un mia nichí. Afoanrifi mia rutupaifiaino un mia cushusharatiro. ¹⁸Uhuunoa min ato yoishquin. Natian faquish muran ica shinantsa. Uhuunoa min ato yoishquin afanan faquish itamarocon shafa muran inonfo. Natian Satanás aton ifon ato iquina. Uhuunoa min ato yoishquin afanan ato ifo itamarocon Diosin ato Ifo inon. Ascano ua icoindra huacashon aton chaca rauhuatiro Diosin ato catoan ahuun yorafo fu ipanonfo,” ishon ua Jesús yoini.

Upa Diosin ahuun namapan cuscara yoini cuscan Pablo man aa

¹⁹Asca huatan, niaifon Agripa, ua nai muranshon yoini cuscan cai un yoitimamisima. ²⁰Maton chaca shatucahuun Diosiquiri shinanshquin. Isharashcaquin mato icoindra huanonfo maton chaca shatucainshon Dios tanacahuun. Nannori un Damasco anoafo yoifain Jerusalén anoafo yoifain Judea mai anoafoti yoifain uhuun caifomari un ato nantifi yoimisi. ²¹Ascano uhuun caifoa Dios fu tsainti pushu muranshon ua achiafo ua rutushquin. ²²Ua rutupaifiaino Upa Diosin ua cushusharamisi un natian nia. Ascano un nantifi yoifoaanfainmisi. Nocon shuni Moisés yafi Diosfin inonpacoai cuscan yoimisi foan yoipaoni cuscan urifi nannoricoin un yoimisi. ²³“Nocon Cristo omitsiscái. Naafiashu funi tauniquin. Funiashon uhuun caifo nan Israelifo yafi Israelifoma yoishquin ahuuscashumain Upa Dios fu ipatirofoquin,” ishon ato yoipaoni. Urifi nannorisi un yoimisiran, —ishon Pablonun yoini.

Pablonun Agripa shinanmapaini arifi Jesús icoindra huanon

²⁴Yoiaiton Festopan Pablo tsainfiaton shutinifoanni.

Yoiquin, —Pablon, min fari ichapa cunu tapifafainmisi. Ascacun natian min nison cuscara, —ishon Festopan yoiaiton.

²⁵—Ma. Niaifo Festo uncai nison cuscarama. Un mato yoia cuscan iconcain. Yorafoan shinansharaifo un mato yoia cuscan icoindra huatirofo. ²⁶Un mato yoia cuscan niaifo Agripa nicamisi. Ascacun un shafacafi afohuunoa yoitiro. Un shinan arifi afohuunoa nicamisi. Man onan. Un mato yoia cuscacai onutirofoma. Nantifiton nicacuanifo. ²⁷¿Niaifo Agripa, min Diosin tsain inon pacoai yoishomisifo icoindra huaimun? Mun tapia min ato icoindra huairan, —ishon Pablonun yoini.

²⁸—¿Man min shinain min samamashta ua Criston ahuun yora imatiro-mun? —niaifoa huaiton.

²⁹—Samamashta iyamarai chipo un icai cuscan min non futsafo nuno ua nicaifori ua cuscara ipainonfo munushumutama. Nannori un mato Dios cufishonaran, —ishon Pablonun yoini.

^{30–31}Nicashon niaifon Agripa futan niaifo patashari non Berenice cunu murannoashu cainfurantan yoinannifo,

—Na nocofununcái ahua chaca huama cunu muran iquicain napanan.

³²Na nocofunun, “Un Cesar ano capairan,” iyamaiton non nichisharacuanaran, —ishon Agripan Festo yoini.

Pablo niaifoa Roma ano nichini

27 Ascano niaifoa yononi noco shashohuan muran Italia mai ano nichinon. —Pablo yafi afu cunu muran iquiafo Italia ano iyotahuun, —niaifoa afu niaifo ranushumua ahuun anu Julio yononi. ²Ascaiton

non Adramitio anoashu nanufaini Asia mai ano fonifo. Nocofunu ahuun anu Aristarco no fu cani. Nanton ahuun mai Tesalónica Macedonia muran. Unuhuan non pocufaini. ³Cai iyoco futsaino non Sidón ano noconi. Nocoshon ranushumua niaifo Julionun Pablo shara huapaiquin yoini, —Min nuno maputiro min yorahuan nuno icafoan min yopai cuscan mia inantiroforan, —ishon yoini. ⁴Ascatan chipo Sidón anoashu non unuhuan pocufaini. Fuuhuanun noco catima huaino mai nushmancayan toomanhuan ahuun anu Chipre turocomucaini non cani. Ocuma futsan fuuhanun noco catima huani. Noco mushquihuuri fonifo. ⁵Ascatan Cilicia mai cutanfoicai Panfilia mai futsari cutancuicai Mira pushurasi ano non noconi. Nan Mira Licia muran ini.

⁶Nanno ranushumua niaifoan shashohuan fuchini. Alejandría anoashu shasho muran noconifo Italia ano focani. Ascano ranushumua niaifoan shashon ifo yocani. —Non shashohuan muran mifu Italia ano capai. ¿Min noco iyotiromamun? —huani. ⁷Non caino fuuhuanun noco catima huaino funainquimashta non cafoni. Fasi man shocunashu non Gnido cusumunri nocopaifiai non nocotiroma. Ascan fuun afoforinnoashu fuaino mai nushmancayan toomanhuan ahuun anu Creta ahuun mushquiori noco catima huani. Salmón pushurasi finonfaini cusumun non foyacuni cusumunri non foyacupaiyaino fuun noco catima huani. ⁸Ascatan noco catima huafiaino fasi yonocoin cai non pushurasi ahuun anu Buenos Puertos ano noconi. Nan Buenos Puertos pushurasi futsan Lasea pushurasi chaima ini.

⁹Non nanno osha rananyoni. Oi pacutian capaifiaino fasi unuhuan fuchomanhuain musunicoinni. Ascano Pablonun shasho niaifofo yoini,

¹⁰—Niaifofoan, mun tapia non natian caino musucoin itiro. Noco mafo non nocon shashori non funotiro. Norifi non asai futsutiroran, —ishon ato yoini.

¹¹Yoifiano shasho ifo non chiatamisiton yoinifo, —Ma. Musuma. Non nocosharatiroran, —huaifoan. Nicatan ranushumua niaifoan Pablonun ato numapaiyai cuscan nicatamarocon shasho ifoan non chiatamisi nicani. ¹²Oi pacutiancai Buenos Puertos ano itiro. Unuhuan cusumun fuchomanhuatiro. Shasho chacana huatiro. Atrififoan yoinifo, —Non pushurasi Fenice ano canon. Nanno mahua ocu rafu ahuusca huatacai fuchomanhuantiroma. Shara itiro. Ascano non oi pacutian ari nituyotiroran, —ishon yoinifo. Nan pushurasi Fenice Creta mai ano ini.

Unuhuan fuchomanhuanni

¹³Funainquimashta fuu nocoaino, —Non casharanon. Nan fuu sharapan non casharatiroran, —ishon yoinifo. Ascaino Buenos Puertos anoashu non pocufaini Creta cusumunri cutan acuni. ¹⁴Samamashta fuuhuan furani. Fuuhuan furanquin. —Nocachiorinoashu fuuhuan furan, —huaniquin. ¹⁵Ascafia non cusumunri capaifiaiton noco catima huani. Ascano fuuhuanun noco iyoai ari non cani. ¹⁶Mai nushmancayan raca uhuapamashta ahuun anu Claudia finonfain. Nanno finoainfono non fasi yonocain non shasho uhuapama chinutamua shashohuan muran naratainifoannifo. ¹⁷Asca huashon shasho pinushusho finifoannifo. —Furo itama shara canon. Sumucainicai non Sirte ano minhuanmanhuanquin mai tsacanonna nanno musuni non suotiroran, —inifo. Ascashu nan, —Fuun noco iyoai ari non catiroran, —inifo. ¹⁸Iyoco futsaino afanan fasi fuuhuan curushpacoin nocon shashohuan fuchomanhuaquin

iquimapaiyaiton mafo potaquin futsunifo. Shashohuan shacatanon ishon. ¹⁹Afanan puna futsan fuuhuan nishmayamacaiyaiton shashohuan murannoa aton ahuamamishti potaquin anaitinifo aton rusfiffo ya. ²⁰Ascfaiainocai fuuhuan nishmanima. Shafa rananun nai faquishihuancoin fari punaiyamaino fishiforicai cainnifoma. Fuchomanhuan unuyamacaiyaino, —Man non nai futsuiran, —icashu ratucoinnifo.

²¹Man non piqui tunuqui ranan- huan. Ascashon Pablonun ninacahuan- tan yoiquin,

—Uhuun yoramishtichin ua nicayoc- ahuun. Un Creta anoshon un mato yoiaiton man nicafin shara icuanakin. Ahuuscacuanama. Ascainocai ahuarafnocon shashoricai funocuanama. Manri- cai omitsiscacuanama.

²²Ascfafia ratuyamacahuun. Man naimacai. Shashohuan fusti funocoin.

²³Un mato yoiyai cuscan Diospan oinmati afu nai muran icaton ua yamu tapimana. Unfin Diosin ahuun yoraquin. Un ahuun oinmati. Yamu ahuun oinmati nai muranshon uqui nichian ua yoinon.

²⁴“Pablon, ratuyamahuu. Min niaifo Cesar ano nocotiro mia chaca huafo cuscan min cayacafi cumasharanon. Upa Diosin min cufiain cuscan mia nica. Na mifu rafuafocai nan shashohuan murannoashu ahuuscaina,” ishon ua yoiya.

²⁵Ascano uhuun yoramishtichin, ratuyamacahuun. Upa Diosin ua yoiya cuscan aiquin un icoinra huai. Tsoacai asaimafinquin. ²⁶Ascfafia mai nushmancayan toomanhuan racani anoashu nocon shasho toshacaishquiran, —ishon Pablonun ato yoini.

²⁷Quince osha finontan nan ununhuan ahuun anu Adriático anoshon fuuhuanun noco iyofoi cai.

Yamu nacucahuanaino shashohuan muranshon yonomisifoan yoicaquin, —Man non mai ano nocoiran, —icashon yoinifo. ²⁸Anori shinancanashu unuhuan ahuun noa tapipai caquin rusfinquin plomo tuchishon potanifo. Ahuun noa treinta seis metros. Ascashon afanan ori futsa ano ahuun noa tananni veinte siete metros ini.

²⁹Ascaino man non toquirinin huaquin non nocoicairan ishon. Ratucaquin ahuun cuno ihuu rafu non rafuri rusfipan nushashon rusfipan shashoqui nushashon noa muran potanifo. Nanno shasho nitunon. —Toquirininhuan tsacatani shasho toshatiroran, —icashu. Ascashon ratucoinaquin cufinifo samamashta shafanon. ³⁰Ascaino shashohuan murannoa yonomisi futsafoan shasho uhuapama naratamua fotomapaiyaifoan. —Shasho nitunon. Non cuno ihuu potapairan, —ishon yoinifo. Fuparapaquin. Fopaicaquin.

³¹Pablonun ato fuchishon ranushumua niaifo yoini,

—Na shasho uhuapama man nitu huayamafin nantifi man asai futsutiro- quin, —ishon yoini.

³²Anori yoitan ranushumuafoan ahuun rusfin shatuafono shasho nonocaini cani.

³³Ascatan man shafano Pablonun ato yoini, —Man osha quince piqui tunua. Man ratucaquin. ³⁴Ascan pii fucapun. Man piafin shara itiroquin. Non ahuus- caimaran, —ishon yoini.

³⁵Asca huatan misi tsmashon aton ointaifi Apa Dios cufiyoni, —Upa Diosin, ¡Aicho! Min noco cushusharamisi, — huatan misi pini. ³⁶Ascashon piyaino afanan ratunifoma oincaquin shasho murannoafoanri piinifo. Pablonun oin- caquin ato ointi afanan ratunima. ³⁷Nan shashohuan muran non dos cientos se- tenta y seis yora. ³⁸Ascano nantifi misi

piciani mayancoinnifo. Ascashon ushufo forusafo muran finifo shashohuan muranshon unu muran potaquin futsanifo. Shasho shacainacahuanon.

Shashohuan iquini

³⁹ Shafacuaino mai fuchifiashocai tsoan onannima. Ascashon unuhuan patontana nannori mainfin fuchicatan ano nocopainifo. —Catiro oinquifin non tanafaintiroquin, —ishon aton nomuran shinannifo. ⁴⁰ Tanapaicaquin shinancatan, —Rusfinquin tuchiaquin nushua rafu non rafuri non shatunon cacoinni canon, —icashon shatuafono aton shashohuan nonoinacahuanaino fooshaquin. Ahuun chifishtatinin rusfi shoshan huanifo. Ascatan afanan panomanhuan futsa rushtiquiriri afanan rotanifo. —Fuun iyo sharanon, —icashon. Ascatan tanafainifo. ⁴¹ Chaicushon oianfo unu tapia ointsacun tanafaipaicaquin mai tsacatoshinifoquin. Shasho rushti fasi coraintoshini. Man fuchomanhuanquin chinahuaquin shasho tsispaquiri cuaquin futsani.

⁴² Ascaino ranushumuafoan shinannifo, —Na shasho murannofo ichotirofoquin Non ato rutunoncahuun, —ishon yoinifo. ⁴³ Ascanfianton aton niaifoan Pablo rutupaiquima. Ascacun ato nitun huani rutunonfoma. Shasho murannoafoti niaifoan yonoa, —Atiriton man topiqui tapiaquin topifaifafaincahuun maiqui nocotacahuun. ⁴⁴ Atirifiri ihui sapafo yatacanashu maiqui nocotacahuun. Ahuara futsafo shasho muran notiro nonofaifafaincahuun mai ano nocosharashcaquin, —ishon ato yononi. Ato yonoa cuscan nanscasi anifo. Nantifi cusumun nocosharai futsunifo.

Pablo toomanhuan ahuun anu Malta ano ini

28 Ascashon nantifi non unuhuan cusumun nocosharani. Nanno icafoan, —Nocon mai nushmancayan toomanhuan ahuun anu Malta, —icashon yoinifo. ² Noco fasi shara huanifo. Nannori oi furiapaoni fasi yotanmahuanquin. —Fucahuun chi cutu huashu yooshaquin, —noco huanifo. ³ Ascano Pablonun caro ya iconfurantan chi cutu huapaiyaiton shana muuqui a muranshon shano cuscaraton mucun nasani. Munastan aya rono inacahuani. ⁴ Ascaiton oincani, —¡Uru! Na nocofunu rutumitsamisiraca. Unuhuan ariashu nocosharafiaiton Diosin onaintimanan, —unu tupusumuni anoashu yoinannifo.

⁵ Ascaino mutashquiri itaquin chi muran potani. Isinin inima. ⁶ Ascashon, —Farashinacahuantan nairan, —icashon oinquin futsanifo. Manariacaquin paunyamacaiyaiton oinquin yoinifo, —¡Oincapon! Nacai rutumitsamisimafinquin. Naafin dios futsaquin, —ishon yoinifo.

⁷ Ascatan nanno chaimashta niaifo Publio ahuun mai. Ahuun pushu muran noco iquimani. Noco pimasharafain noco shara huani. ⁸ Apa isinin icoinni yonacain imi chishoi. Oshati muran racani. Tapitan Pablonun ahuun cunu muran iquicaini Upa Dios cufishonici. Cufishotan ahuun mucuman mamanni cayanon. Ascaino cayariscatani. ⁹ Nan mai anofoan nicacani nan isinin icaifoti aqui funifo ato caya huamanon. Nantifi ato caya huapacuni. ¹⁰ Ascatan noco ahuara ichapa inancoinnifo. Non itisharaquin ato anoashu shashohuanun cashquin non yopai cuscan noco inancoinnifo.

Pablo Roma ano noconi

¹¹ Oshu rafu non fusti finontan non afanan shashohuanun Malta anoashu cani. Shashohuan anunifo Rafanacaran ishon anunifo. Dios rafuran huashon shinnannifo. Ascashon ato rafu anu futsanifo. Futsan ahuun anu Cástor huafain futsan ahuun anu Pólux. Ascan shashohuan rushtiquiri aton ointsa rami huani. Alejandría anoshon shashohuan onihuanifo. Oi pacutian Malta ano nan shashohuan iyoni. Nanuinfoan non unuhuanun non cani. ¹² Focani non Siracusa pushurasi ano noconi. Nanno non osha rafu non fustiyoni.

¹³ Anoashu focashon unuhuan cutafain non Regio pushurasi ano noconi. Iyoco futsaino fuaifoquirinoashu fuuhuan furani. Afanan iyoco futsaino non Puteoli pushurasi ano mapuinifoanni. ¹⁴ Nannoa Jesús icoinra huafo non fuchini. —No fu osha siete iyopun, —noco huanifo. Ascano non chipo atomaquinoashu Roma ano cani. ¹⁵ Jesús icoinra huafo Roma anofoan Pablo oaiton nicacani nocoqui funifo. Atirifi pushurasi Foro de Apio nocoqui noconannifo. Atirifiri pushurasi futsan Tres Tabernas anoashu nocoqui noconannifo no fu Roma ano foshcaquin. Pablonun ato oinquin, —¡Aicho! Upa Diosin, min ua yorafoqui nichiaran, —huani. Ahuun ointi fasi fupihuacoinni. ¹⁶ Ascano pushurasi ichapacoin ahuun anu Roma ano nocoafono niaifoan yononi Pablo arusu pushu futsan muran isharatiro. Ranushumua fustiton cushusharanon.

Pablo Roma ano ini

¹⁷ Ascatan osha rafu non fusti finontan Pablonun ahuun caifoan aton niaifofo cunani aqui funonfo. Aquí ichafoan ato yoini.

—Uhuun yoramishtichin, ua nicasharacahuun un mato yoisharanon. Uncai nocon caifo Israelifo chaca huamisima. Nocon shunifoan aton fuyamisifori un chaca huayamafiacun ua Jerusalén anoshon achicashon Romanofu ano ua nichinifo. ¹⁸ Nanfoan ua nicacani ahua chaca huamaran, ishon shinannifo ua nichisharapainifo.

¹⁹ Ascafiaino nocon caifofoan yoinifo, “Nichiyamacahuun. Onaintimahuu,” ua huafiainfoan copiquiri uhuun caifoqui un tsain chaca huama. Ascatamarocon un Romano niaifo patasharifo yoini, “Unfin maton niaifo Cesar ano capaicaín uhuunoa cayacafi yoishquin un ahua chaca huama tapinon,” ishon ato yoini. ²⁰ Ascacun un mato cuna matofu tsainshquin. Nocon caifo Israelifoan non Diospan facu nan nocon Numamisi non manamisi. Unrifi icoinra huamisi. Un icoinra huahuunshon nocon caifo ua Romanofu ano nichini. Ascashon man oiain cuscan ua munushuafoquin, —ishon Pablonun ato yoini.

²¹ Nicacashon cumanifo, —Mihuunoa tsoan noco cunu fumama. Jerusalén anoashu funifo tsoancai mihuunoa tsain chaca yoimisima. ²² Non nicamisi manifoti anofoan Jesús icoinra huafoqui tsain chaca huafo. Ascan min icoinra huai cuscan non tapipairan, —ishon yoinifo.

²³ Ascatan —Non chipo mifu ichanantiroran, —huanifo. Ascano yora ichaparasi Pablo icano funifo nicacani. Funamanri yoitiashon ato yamu huani. Upa Diosin iquinaino ato yoifain Moisés cununi cuscan yafi Diosin ahuun yoishomisi futsafoanri Jesushuunoa cununifo cuscan ato icoinra huamapainquin. ²⁴ Nicacatan atirifiton icoinra huaino atirifoan icoinra huanifoma. ²⁵ Tsoancai nannorisi shinannifoma. Ato yoiai cuscan fochismanantanannifo.

Amaquinoashu foataifoma Pablonun ahuun tsain unutaquin ato yoini isca huaquin,

—Nocon shuni Isaiás nanton inonpa-coai yoimisi Diospan Yoshin Sharahuunshon nocon shunifo iconquin yoini isca huaquin,

²⁶ “Min caifo nan Israelifo ano catahuun ato yoiquin isca huatahuun, ‘Man nicafaifaiaquicai man tapinacama. Ahuara sharafo man oinfiaquicai maton nomuran man nanucoiantaima.’ ²⁷ Aton ointi mutocoianfo. Iconcoin nicafiaquicai nicacoianfoma. Oinfiaquicai tapipaicanima. Iconcoin oinfain iconcoinri nicaifoa un ato chaca soashocuana ufu nipanonfo,”

ishon Diosin Isaiasihuunshon nocon caifo yoini. ²⁸ Ascaino marifi Upa Diosin noco numapaiyai cuscan man nica-paiyamaino un caifo futsafo ahuun tsain yoicain. Afoanfin nicacaniquin, —ishon Pablonun ahuun caifo yoini. ²⁹ Yoitan amaquinoashu focanashu fasi fochishmanantanannifo.

³⁰ Ascatan Pablo nanno fari rafu iyoni. Pushu ifo pui inanni a muran iishquin. Ascatan tsoa ahuun pushu ano fuafoan ato iquimani yoisharashquin.

³¹ Upa Diosin iquina cuscan huafain nocon Ifo Jesucristohuunoa ranotama ato yosini. Tsoancai ahuun tsain shatumanima. Nanti.

Pablonun Roma Anoafu Cunu Fomani

Jesús icoinra huafo Roma anoafu Pablonun cunu fomani

1¹⁻³ Uhuun yoramishtichin, Roma anoafuan un mato cunu fomai man tapinon. Unquian Pablo unfin Jesucristo ahuun oinmatiquin. Ua catonni un afu rafumisi un inon. Upa Diosin ua nichini ahuun tsain shara Furunhuunua un yoinon. Jesús David ahuun funa ini. Caiantaima Diospan tsain shara inonpacoai cuscan ahuunua cunushonifo.

⁴ Ahuunua cununi cuscan Diospan Yoshin Sharapan ahuun curushhuunshon nocon Ifo Jesucristo maiya anoa funimani. Funimashon noco tapimani nan Diospan Furun Shara nocon Ifoan ahua-mamishti huatiro. ⁵ Non ahua shara huahuunshocai Upa Diosin noco caton-nima. Ahuun Furunhuunua noco-huun ramapaiquin noco catonni afu rafumisi inon. Noco nichini nocon caifomari non ahuun tsain yoinon ahuun Furun Cristo icoinra huanonfo. ⁶⁻⁷ Upa Diosin manifoti icoinra huamapai. Mato Roma anoafori noiquin mato catonni maton chaca man shatunon Furun Jesucristo ahuun yorafo man inon. Upa Diosin nocohuun ramapaiquin nocon ointi shinansharacoinon. Furun futan Apamain mato asca huashopainon.

Pablon Roma ano oinmitsai capaini

⁸ Tau huaquin un mato yoisharapai. Man Jesucristo icoinra huacun manifotiton nicamisifo. Ascacun un mato shinanquin un Jesucristohuunshon —¡Aichoran! Upa Diosin, —ishon un yoimisi. ⁹⁻¹⁰ Upa Diosin ua yonomapaiyai cuscan un curushcain yonoshomisi ahuun tsain shara

Furunhuunua un ato yoinon. Upa Diosin ua oinquin un mato shafatifi cufishofafainaiton. Nan un cufiain cuscamain Upa Diosin mato muran ua nichu huuati ishon un cufifafaini. ¹¹⁻¹² Un fasi mato oinpai mato Diosin tsain yoipaiquin. Ahuun Yoshin Sharahuunshon man icoinra huanon man yoinonansharanon Jesús tanasharashquin. Un icoinra huaino marifi man icoinra huainofin non unimanantanantiroquin.

¹³ Uhuun yoramishtichin tapicahuun. Uhuun caifomari ato Jesushuunua yoimisi tanasharanonfo. Nanscarifi un mato huamapai. Mun catacatamisi ifiacuanano ahua futsa huai un camisima. ¹⁴ Jesús ua yonoa ahuunua manifoti un yoinon. Ua yonoa cuscan ayamai un yoitima itiro. Ascan nantifi un yoipai. Uhuun caifomari yoifain nahuafori yoifain cunu tapiafori yoifain cunu tapiamafori un yoinon. ¹⁵ Ascashori un mato tsain shara Jesushuunua Roma anoafu yoi capaimisi.

Nan tsain shara Jesushuunshonfin ahuamamishti huatiroquin

¹⁶ Nan tsain shara Cristohuunua Upa Diosin ahuun curushhuunshon icoinra huafoti ato numatiro afu nipanonfo. Uhuun caifo Israelifan nicaquin tauhuanifo. Natiarifi mani futsafoan nicacani Upa Dios fu nipashcaquin. Ascacufin un ranotama manifoti ahuun tsain shara un ato yoicain. ¹⁷ Nan tsain sharafihuunua Upa Diosin noco tapimana ahuuscashumain non isharatiroquin ahuun tsain tanasharashquin. Nan non Jesús Ifo huaquin tau huanitian non Upa ari caitianri nanscasi huaquin non icoinra huatiro isharacoishquin. Diospan tsain cununi isca huaquin, —Nan Diosin

aton chaca soashonafoanfin icoinra huamisifoquin, —ishon cununi.

**Upa Diosin icoinra huamafo
ato onaintimashqui**

¹⁸ Ascaciai atirifo ascarafoma. Diosihuunoacai shinanpaicanima. Icoinra huapaicanima. Chacasi shinanmisifo. Chaca fustisi tanapaicaniquin. Diospan tsain iconcoin tapificashon nicascamamisifo. Nantifi nanscarafosi Upa Diosin atoqui sinacoinquin. Nai muranshon ato onaintimaquin finacoishquin. ¹⁹Upa Diosin ahuu cuscaramainquin tapipaiquifin tapicuanafokin. Upa Diosin ato shafacafi ismani. ²⁰Nantifi onihuaquin tau huanitian natianri ato shafacafi ismamisi. Mai yafi nai onihuanu cuscan nantiffain oinmisifo. Diosin ahuamamishti huatiro oinmisifo. Ascacun, —Uncai tapiama ahuu cuscaramain Diosiquin, —itirofoma. Nan tapiamafofin atohuun nuaquin.

²¹Ahuunoa tapificashon yoicasmanifo. —Min nocon Diosin. Min fasi shara. Non mia noi. ¡Aicho! Min noco shara huafafainiran, —ishoncai yoinifoma. Ascacun ahuunoa amaqiri ipaitsi shinannifo. Aton nomuran afanan ahuunoa shafacafi shinantamarocon nisopan shinantiro cuscan shinannifo. ²²—Nonfin fasi tapisharaquin, —ificatan tatimashunifo.

²³Nocon Diosincai nanacama. Ifiacashocai isca huaquin yoinifoma, —Upa Diosin, tsoa futsacai mia cuscara shara imisima. Min ahuamamishti huatiro. Non mia noiran, —ificashon anori yoitama ahuara futsafo rami huanifo. Na nocofunufu naashu payocofiafo nan ointsa rami huafain puiyafu rami huafain yoinafo rami huafain rono cuscarafori rami huanifo. —Nanfo nocon Diosiran, —ishon yoipaonifo.

²⁴Ascacun Upa Diosin ato potaquin futsani aton nomuran chaca huapaiyai cuscan huanonfo. Afanancai ato numanima. Afi ranan chaca huaa tanannifo futsan namanno ainfo fucashni huaifoan. Ainfofori ascariiaifoanno. ²⁵Upa Diosin tsain icoinra huatama chani fusti catonnifo. Diosin nantifi onihuanu. Nan Diosicai cufitama nan onihuafo cufinifo. Ascataka Diosin shararan ishon yoipacupainonfo.

²⁶Ascacufin aton nomuran chaca huapaiyaifoan tapishon Upa Diosin ato potani. Afanan ato numanima. Upa Diosin noco onihua cuscan nocofunufu ainfo ya icaino ainfofori nocofunufu ya inonfo. Ascataamarocon ainfofo afiranan fuchinanpaicani. Aforanansi iquinannifo. Chaca huatanannifo. ²⁷Nanscarifiai nocofunufu ainfo tanatama afi ranan iquinanpaicani. Ascashu chaca huantanancatan aton nomuran aton cayari omitsisca huapaonifo.

²⁸Ascatari Upa Dios onanpainifoma amaqi inifo. Ascacurifi arifi ato potani aton nomuran afiranan shinanpaiyaifo cuscan chaca huan tananonfo. ²⁹Chaca fustisi shinancani chaca huan tananonfo aton ahuinma ya icaifoanno ainfofori ato funumafo yari ipaonifo. Aton namari fipaifain. Fasi chacafo icain mafo noiriamisi icain futsafoqui shinanchacamisifo icain fashimitsamisifo icain rutumitsamisifo icain fochishmanantanancatan sinaisi fuyamisifo icain paramitsafoanfaimisifo icain noimati huamitsamisifo icain yoiti huamitsamisifo icain ³⁰futsafo yoiti huafain Dios noicasmafain roanmitsamisifo icain cacapaimisifo icain aton nomuran chaca fustisi shinanmisifo icain aton apa yafi ahua nicacasmafain ³¹ahuara shara shinanpaimisifoma icain

tsoashtacai ato icoindra huatirofoma icain tsoanshtahuun noiyamacain chaca huapaimisifo icain rauhuaquin tapiamafo icain tsoanshtahuunca ramapaimisifoma icain. ³²Upa Diosin ahuun tsain shara yoiquin isca huani, —Futsafoan ascaran chaca huaiton un ato namairan, —ishon. Yoini cuscan man tapificashon aton chaca shatupainifoma. Ascarifitan futsafoanri nan acaifo cuscan huaifoan oincaquin, —¡Aichoran! Nanscarocon chaca huatanacahuun, —ato huanifo.

Upa Diosin ato iconquin onaintimai

2 Ascano man shinanraca, —Nan cuscara yora fasi chacacoin. Upa Diosinmain ato onaintimainonran, —ifiashon marifi man asca huamisiquin. Ascashu, mafiri man yoimui cuscaracoin. Matori onaintimatiro. ²Nan non ahua chaca huamisi cuscan nantifi Upa Diosin man tapicoian. Ascan man non tapian nan chaca huamisifo iconcain ato onaintimai.

³Mancai Diosin cuscarama. Marifi man nocofunufiashon man yoiquin isca huamisi, —Nan chaca huamisifomain Upa Diosin ato onaintimainonran, —ifiakin marifi man asca huamisi. ¿Ascacun man shinanmun Upa Diosin matori onaintimaimaquin? ⁴Upa Diosin matohuun noiquicai mato funa ahuusca huarima. Man chaca huafiaiton mato shara huafafaini. Mato funa onaintimaima. ¿Man tapiamamun matohuun ramapaiquin maton chaca shatupapai man tanasharanon? ¿Nanfohuunoamun man shinanpaimacai? ¿Diosiqui man ointi mutoimun?

⁵Upa Diosin mato shara huafiain-tocai man shinan futsapaima maton chaca shatushquin. Diosiquiricai man shinanmisima. Man chaca huacuscun Upa Diosin ointiaquimaima. Ascac chaca huaquin man unuyamaiton

Diosin sinaitian mato onaintimashqui. ⁶Upa Diosin nan niyoshon amisifo cuscan atoti inanpacushquin. ⁷Nan tsoaran Diosin ato imapaiyai cuscan amisiton futsafo shara huafafaini tsain shara Upa Diosin atohuunoa yoisharaiton nica-paicani. Isca huaquin, —¡Aicho! Un mia yonoa cuscan min amisi. Un miqi unimai. Min ufu ipasharatoran, —ishon nicapaicani. Afu ipashquin. Nan cuscarafu Upa Diosin aya ato imapacunaca. ⁸Ascafiata ratoranfoan afi apaiyai cuscan fusti shinainfoan aton nomuran fucash huamisifo icain Diospan tsain iconcain tanatama ahua chaca-fosi tanaifoan. Nan cuscarafu Upa Diosin ahuun nomuran sinacoinquin ato onaintimashqui. ⁹Nan ratoran futsa Israelifo iyamarai mani futsafoan chaca huamisishaquin fasi aton nomuran omitsiscacai finacoinshecaini. ¹⁰Ascacun ratoran futsa sharamisicun Diosin sharanpan ato yoishquin, —Mian nicamisicun. Un miqi unimairan, —ishon ato yoishquin. Aton nomuran unimacain ahua fucash huanonfoma. Israelifo iyamarai mani futsafo isharaifoan Upa Diosin ato shara huaiquin. ¹¹Ascacun Diospan nantifi noco nanscarafosi oin.

¹²⁻¹⁵Nantifiton chaca huamisicun ato onaintimashqui. Uhuun caifo Israelifoanma atirifiton Upa Diosin tsainquin cununifo cuscan oinyamafiamisishaquin ahua shara aton nomuran tapiafo. Tapificashon shara huamisifoma. Chaca huafiactan aton nomuran shinanquin isca huamisifo, —Un chaca huaran, —iyamarai, —Uncai chaca huaran, —ishon shinancani. Ascacun chaca huaifoan ato onaintimashqui. Ascashu omitsiscapanacafo muran foshcaini. Ascan uhuun caifo Israelifoan Upa Diosin yononi cuscan noco cunushoni cuscan non aya. Tsoan man tapificashon chaca huaiton nan yononi cuscan huaquin ato onaintimaicain nan omitsis-

capanacafo muran foshceni. Diosin tsain cununi cuscan nicafishucaí ascacoianfoma ato imasharanon. Ascano Diosin yononi cuscaín ato yoishquin, —Min shararan, —ishon ato yoishquin. ¹⁶ Nantififain aton nomuran shinanmisifo cuscan Upa Diosin tapicoian. Nan shinanmisifo cuscan fomanfiainfoan nocon lfoan nantifi ato puashoshquin. Upa Diosin ahuun Furun Jesucristohuunshon ato onaintimashqui. Nannori Diospan tsain sharahuunoa un mato yoi.

**Diosin yononi cuscan
Moisés Israelifo tapimani**

¹⁷ Uhuun yoramishtichin, Upa Diosin yononi cuscan noco cunushopaoni. Nan noco cunushonicun man shinanraça, —Upa Diosin non Israelifo noco fusti catonni futsafocai catonnima. Non fustifin ahuun yoraquin, —ishon man shinanmisiquin. ¹⁸ Mato amapaiyai cuscan man man tapia. Tapimamisifoan ahuun tsain mato tapimana. Ascán ahuara shara nicashon, —Iconran, —ishon man yoimisi.

¹⁹ Man yoiquiri isca huaquin, —Nocon caifoma fusho cuscarafó. Ahuuscashomain Diosin tsain tanasharatiroquin tapiafoma. Nonfin ato tapimatiroquin. Faquish muran ica shinantsa aafó. Nonfin chashamati cuscara ato chashashotiroquin Dioshuunoa tapinonfo. ²⁰ Upa Diosin noco yononi cuscan iconcoin. Ahuun tsainhuunshon non tapicoian. Ascacun tsoa futsacai tapiataima aton chaca shatushcaquin non aton facufo ya tapimatiroran, —ishon man shinanmisi.

²¹ Man futsafo tapimamisi ¿Ahuuscain mafiri man tapimamuimanmun? Futsafo man yosimisi, —Ahuá onuyamacahuun, —man huamisi. ¿Marifimun man onumisima? ²² —Maton ahuinma fu iyamacahuun. Maton funuma furi iyamacahuun, —man ato huamisi. ¿Ascafiahu

marifi maton ahuinma fu man icamun? —Ascán Diosicoínma cufiyamacahuun. Dios fusti noicoíncahuun, —man ato huamisi. ¿Manmun Upa Dios fusti tanacoincai? ²³⁻²⁴ —Upa Diosin noco yononi cuscan man non tapicoian, —nan cacapaimisi cuscara man tsainfafaini. Man futsafo yoifiatacai marifi Diosin yononi cuscan man aima. Ascán matohuunshon nocon caifomafoan yoiquin isca huamisifo, —Diosin ahuun yorafocai isharafo. Ascán arificai sharamaran, —ishon yoimisifo. Ascán matohuunshon Dios chaca huafo. Nannorifi Diospan tsainquin cununi.

²⁵ Upa Diosin noco yononi cuscan non aafin nan Israeli sharafo cuscara noco imatiroquin. Ascafia noco yononi cuscan ayamashu nan yora chaca cuscarafó non itiro. ²⁶ Yora futsafo Diosin yononi cuscan amisicun Upa Diosin noco shara huashopaiyai cuscan atorifi shara huashotiro. Noco inanpaiyai cuscarai atori inanshquin. ²⁷ Nanfo Israelifomafishon Diosin tsain nicasharacoinceni. Manfin Israelifoquin. Diosin mato yononi cuscan tapicoínfiashu man yoitimamisi. Ascán nanfo isharaifiainocai man isharamisima.

²⁸ Diospan yoracoinin ahuun tsain tanasharatiro. Nanfofin Israelicoínfoquin. Futsafo Israelicoínfo cainfianishaquin Diosin yononi cuscacoin acanima. Afocai Diospan yoracoinfoma. Ascafiahucaí Israelifocoinma. Nocon fuyamisi cuscara furonanfacu rama caian non foshqui rupa shatumisi. Ascán tapitirofo nanfo Israelicoín. Ascafia noco yononi cuscan non ato foshqui rupa shatufiacai ahuun tsain icoinra huafomacai Diospan yora itirofoma. ²⁹ Diospan Yoshin Sharahuunoashu nocon nomuran fiananantiro non Diosiquiri shinansharanon. Ascáshu Diospan yoracoin iishquin. Non ascaino yorafoan

noco huunoa yoisharayamafiaino Upa Diosin noco huunoa yoisharashquin.

3 Ascan nonfin Israeliri cainniquin. Ascan non ahuaraya cuscacai futsafo ayama. ¿Non amisi cuscan nocon facufo non aton foshqui rupa shatuainomun shara itiro? Ainfain. ²Uhuun yoramishtichin, shinancapon. Upa Diosin manifoti yoipaiyai cuscan nocon caifo yoiqui tau huani. Noco tapimani cuscari non mani futsafori tapimanon.

³Icon, atirifi nocon caifocai Upa Diosin yononi cuscacoin acanima. ¿Icoinra huayamafishon Upa Diosin noco yoini cuscacun noco ashoimacai? ⁴Ma. Ascapacunacama. Nantifi yorafoan noco paratirofiancai Upa Diosin noco parapacunacama. Nanfin iconcoin fustiquin. David cunuquin isca huani,

“Yorafoan Upa Diosin tsain icoinra huayamafishon ahuun tsain cayacafi iconcoin manifoti ato tapimashcaniran,”
ishon cununi.

⁵Futsan shinanquiraca, —Upa Dios fustifin sharaquin. Noncai ascaranma. Ascan non chaca huaiton futsafoan noco oinquin Upa Dios noco cuscarama aafin sharacoinquin. Ascan tapi-tirofo Upa Dios mimacai sharacoincun. Nocon chacahuunshon futsan tapi-tiro Dios sharacoincun. Diosincan iconquin noco onaintimatiromaran, —ishon anori shinantirofoquin. ⁶¿Ohua! Fasi amaquiri shinancani. Upa Diosicai non chaca huua cuscan ointiaquimatiroma. Non chaca huafiaiton Upa Diosin noco onaintimayamaitocai ahuuscashon non tapitiroma afanan asca huashquima. Diosin chacafo onaitimayamaino ahuuscashomain yorafoti yoitiroquin afu ipayamarain omitsiscapanacafu muran focanicai.

⁷Ascan futsafoanraca shinancani, —Un chani yoimiscun futsafoan tapi-tirofo Upa Diosin iconcoin fusti yoimisi. “Upa Diosin sharacoinran,” ishon yoishcani. Ascan uhuun chanihuunshon futsafoan mima huaquin Dioshuunoa shinansharashcani ¿Ascan ahuuscain, “Min chaca huamiscun un mia onaintimairan,” ua Diosin huatiromun? —Nannori man shinanraca. ⁸Nan cuscara yorafoan fasi amaquiri chaca shinanpaicani. Isca huaqui yoipai, —Non chaca huanoncahuun. Ascan Dioshuunoa shinansharatirofoquin, —ishon yoipaicani. —Pablonunri anori yoimisiran, —ishon yoicani. Chanimisifo. Uncai anori yoimisima. Upa Diosin iconquin na cuscarafu onaintimashqui.

Tsoa futsacai non isharamisima

⁹¿Ascan yora futsafo chacafiaino noncai ato cuscaramamun? ¿Norus fustimun non shara? Ma. Anorima. Un mato tapima cuscan nantifi yorafocai nocon caifomafoan norifi non Israelifoanri man non chaca huamisi. ¹⁰Nunorifi Diosin tsain cunuquin isca huaniquin,
“Diosin noco yononi cuscacai tsoashta amisima. ¹¹Diosin noco yononi cuscan tsoancai tapicoimisima. Mancai Upa Dios onanpaicoinma noco yononi cuscan tapishquin. ¹²Manifoti anofoan Upa Dios cachiquiri huaafo ato isharamapaiyai cuscan atamarocon chacacoin tapiafo. Tsoacai shara tapimisima. Tsoa fusticai isharamisima. ¹³Yora naacun mai huashon non fupuaino pisin tohuutiro cuscan nanscarifiai aton ashfan muranshon tsain fasi chacacoin yoimisifo. Nan rono paupaton noco nasa non mutiro cuscan aton tsainmanri noco omitsiscamatiro.

¹⁴Roanmitsamisifo icain tsain isininpaton yoimisifo. ¹⁵Sama-mashta yora rututirofo. ¹⁶Nan cahuancacainaitishon yora chaca huafoanfainmisi ato omitsisca huafoanfainmisi. ¹⁷Diosin nocon ointi shinansharamapaiyai cuscacai afoan mumisima.

¹⁸Dioshuunoa shinanmisifoma. ‘Aacai ahuamaran,’ ishon shinansimisifo. Aquicai ratucanima,”

ishon Diosin tsain inonpacoai cuscan yoimisifoan cununi.

¹⁹Man non tapia Upa Diosin yononi cuscan Moisés noco cunushoni. Noco yononi non chaca huanonma. Noco yononi cuscacai non amisima. Ascan tsoancai yoitiroma isca huaquin, —Diosin yononi cuscan un amisiran, —ishoncai yoitiroma. Iconquin nantifi noco onaintimatiro. ²⁰Ascacucui Upa Diosin tsohuunoa yoitiroma isca huaquin, —Un mato yononi cuscan man amisi. Man ahua chaca huamisimaran, —noco huatiroma. Diosin noco yononi cuscan man non tapicoinfiashon nanhu-unshon non shinantiro, —¡Ohua! Upa Diosin yononi cuscacoincai un amisima. Urifi un chaca huamisiran, —ishon non shinantiro.

Jesús icoinra huaashu non Dios fu ipatiro

²¹⁻²²Upa Diosin noco yononi cuscan Moisés noco cunushoni. Noco cunushoni cuscan non apaifiai non itiroma Diospan yora iishquin. Ascacia ahuuscashomain nocon chaca noco soashotiroquin a cuscara shara non inon Upa Diosin nati-an noco tapimana. Nannori Moisés yafi Diospan tsain yoimisi futsafoanri cununifo. Ratoranfo nocon caifo Israelifo iyamarai nocon caifoma non Jesucristo icoinra huacun nocon chaca noco soashotiro a cuscara noco imasharashquin. ²³Manifoti anofoan nantifi-

fain man non chaca huamisi. Upa Diosin noco imapaiyai cuscacai tsoa acoinmisima.

²⁴Ascaciaun Jesucristo noco nashoni nocon chaca soashoshquin. Non icoinra huacun afanan chaca nocon ifo itama Jesucristo acoin nocon Ifo inon. Non ahua shara huahuunshoncai noco numanima. Ahuun Furunhuunshon noco-huun noiquin noco numani.

²⁵Ahua chacacai Upa Dios fu itiroma. Ascan Furun nichini nococairocon onaintimatama Furun onaintimani nocohuunoashu nashon nocon chaca soashonon. Ascan ahuun imi foyanan noco nashoni non icoinra huaiton Upa Diosin noco onaintimaima. Ascan Furunmun noco nashoantaima iyopaonifoanri chaca huapaonifo cuscan. Tapiyonifo chipo Furun atohuunoashuri nashquiai. Ascana icoinra huafoan aton chaca iconquin Furunhuunshon soashotiro afori afu ipanonfo. ²⁶Natianri Diosin ato ismapai chaca huafiamisishaquin Jesús icoinra huacun ahuun yorafo ato imatiro. Man raca shinain, —¿Ahuuscain chaca huamisifo ato onaintimama Upa Dios fu ipatirofomun? —ishonraca shinancaniquin. Anorimafinquin. Furunmun ato nashoni aton chaca soashoshquin. Ascan nan icoinra huacatan Upa Dios fu ipatirofo. Iconquin ahuun yorafo ato imatiro.

²⁷⁻²⁸Non ahua shara huahuunshoncai nocon chaca noco soashonima. ¿Ascan tsoancai yoitiroma isca huaquin? —Upa Diosin noco yononi cuscan un nantifi amisi. Ascacufin un afu ipatiroquin, —ishon tsoancai anori yoitiroma. Ascarafo shinainno cacapaimisi itiro. Upa Diosin noco yononi cuscan non nicamisihuunshocai noco numanima. Furun icoinra huaiton noco numatiro. Nannori non mato yoimisi. ²⁹¿Upa Dios nocon caifo Israelifoan nocon Dios fus-

timun? Ma. Caifo futsanfoanri aton Diosiri.

³⁰Upa Diosin noco nanscarasi huai. Nocon caifo yafi nocon caifomari Jesús icoinra huaiton nocon chaca noco soashotiro afanan noco chacahuunoo shinanonma. ³¹¿Ascano non Jesús icoinra huacun Diosin Moiséshuunshon noco yononi cuscan non yopaimamun cununi cuscan aquin? Ascata non Jesús icoinra huaiton Upa Diosin noco yononi cuscan non atiro. Jesushuunshon fusti non atiro.

Abrahamhuunoo Pablo noco ahuara futsa tapimani

4¹⁻²Ascatan natian un nocon shuni Abrahamhuunoo mato yoi. ¿Diosin yononi cuscan aimun ahuun chaca soashoni sharacoin inon? Ma. Anorima. Abraham asca huaiton yoicuana, —Unfin Diosin yononi cuscan un amisiquin, —ishon yoicuana. Ascafiashu nanoricai yoimisima. Upa Diosin ahuun ointaificai ascatiroma. ³Ahuunoo Diospan tsain cununi isca huaquin, —Abraham Upa Dios icoinra huamisi. Ascaino Upa Diosin ahuun chaca soashona a cuscara isharanon, —ishon cununi.

⁴⁻⁵Non yonaino ifoan noco cashman inainma. Noco nifishon noco inantiro. Nanscarifiai non ahuara shara huatiroma Upa Diosin noco nifinon nocon chaca noco soashonon non afu ipanon. Nonfin chaca huamisifoquin. Ascafiashon non Jesús icoinra huacun Upa Diosin noco yoishquin, —Un maton chaca soashona. Man uhuun facuhuunooashu isharanon, —ishon noco yoishquin. ⁶Nannori nocon shuni David yoini. Noncai ahua shara huatiroma Upa Diosin noco unimamanon. Afin noco yoitiro, —Un min chaca mia soashona. Ascan min ua cuscara shara iquiran,

—ishon noco yoiaino non unimatiro.

⁷David isca huaquin yoini,

“Tsoan ahuun chacafo Upa Diosin rau huaa afanan afohuunoo shinanyamaino fasi unimatiro.

⁸¡Aicho! Upa Diosin isca huaquin yoishquin, ‘Min chaca huaa cuscan un afohuunoo afanan shinanpacunacama. Natian min chaca huamisima cuscara min itiroran,’ ishon yoiaino fasi unimacointiro,”

ishon David yoini.

⁹¿Upa Diosin Israelifo fusti unimamatiromun? Ma. Israelirifomari aton chaca soashotiro a cuscara shara imashquin. Abraham Diosin icoinra huacun ahuun chaca soashona a cuscara shara imashquin. Nannori non mato yoimisi. ¹⁰Foshqui rupa shatuataima ahuun chaca soashoni a cuscara shara imashquin. ¹¹Abraham foshqui rupa shatuataima Upa Dios icoinra huaqui tau huani. Ascacun ahuun chaca soashoni a cuscara shara inon.

Ascaino chipo fari ranan finoanno Upa Diosin Abraham yononi, —Min non min yorafori foshqui rupa shatuhuu. Nan foshqui rupa shatushonfin min shinantiro isca huaquin, “Icon Upa Dios un icoinra huacun uhuun chaca ua soashona ua shara huapanaca Upa Diosin ua yoiyoniran,” —ishon Diosin Abraham shinanmani. Ascacufin tsoafo foshqui rupa shatuataima Dios icoinra huashu Abraham ahuun upa cuscara itiro. Afin foshqui rupa shatuataima Upa Dios icoinra huaquin tau huani. Ascacun ahuun chaca soashoni a cuscara shara inon. ¹²Foshqui rupa shatufori Abraham cuscara itirofoquin. Aafin foshqui rupa shatuataima Dios icoinra huaniquin. Afoanri arifi Jesús icoinra huacanashu Diospan yora itirofoquin. Ascan Abraham aton upa cuscarari itiro.

Abraham Diosin yoiyoni cuscan icoinra huashon ahuunoa fini

¹³Upa Diosin Abraham yoini isca huaquin, —Min non min funafori nan maitio un mato inannon matonna inon, —ishon yoiyoni. Upa Diosin icoinra huacun aton chaca soashona a cuscara shara inonfo. Ascacufin ato yoiyoni cuscan ato inanshquin. ¹⁴Futsafoan icoinra huayamafishon shinanquin isca huaa, —Diosin yononi cuscan un aiton uqui unimatiro noco inanpaiyai cuscan ua inanshquiran, —ishon shinantirofo. Nanfo Diosin yoyotiani cuscan fiaino non ipaitsi icoinra huaa. ¹⁵Ascacifacai anorima. Diosin noco yonoyamaino tsoacai yoitima icuanamafinquin. Ascafia noco yononi cuscan apaifiaicai tsoa ascamisima. Diosin chacafoqui sinai yoitimamisifo onaintimashqui.

¹⁶Ascan non ahuara shara huaacucacai Upa Diosin noco yoyotiani cuscan noco inainma. Non icoinra huaiton noco cashman inanshquin. Ascan nan Israelifo yononi cuscan tanaifo iyamarai nan tanaifoanmari Upa Dios icoinra huacanashu ahuun yorafo itirofo. Ato yoyotiani cuscan cashman inanon. Abraham icoinra huani cuscan afoanri icoinra huashu ahuun funafo cuscara itirofo. ¹⁷Nannori Diosin tsain cunushoni isca huaquin, —Manifoti min aton upa cuscara. Un mia imashquinran, —ishon Upa Diosin Abraham yoiyoni. Abraham tau huaquin Upa Dios icoinra huani. Ascan norifi non chipo icoinra huaashu nocon upa cuscara itiroquin. Upa Diosin noco oin non Abraham ahuun facufo cuscaracun. Diosin yora nacun funimatiro nionon. Icataima rufofo Upa Diosin yoiqui tau huani.

¹⁸Ascano Abraham anifoshta afanan facu atiromafishon Dios icoinra huacun. —Min chipo facu yashquin. Min funafori ichaparasi cainshquiran, —

ishon Upa Diosin yoiyoni cuscan icoinra huani. Ascan yora ichapafaoan aton upa cuscara ica. ¹⁹Tapini anifoshtacoin cien fari aqui caa. Ahuin Sararifi noventa fari aqui caa afananricai facu nanutiroma. Ascan man tapifishon Diosin yoiyoni cuscan icoinra huani. Icoinra huaa cuscaicai afanan amaqui ipainima.

²⁰⁻²¹—Un anifocoinno uhuun ahuinri yoshafofishon Upa Diosin ua yoiyoni cuscan ua facu inantiroran, —ishon shinnanni. Mimacaiquin icoinra huani. — ¡Aicho! Upa Diosin, mian yoiyoni cuscan mian inanshquin. Min curushhuunshon mian yoiyoni cuscan mian ashotiroran, —ishon yoini. ²²Icoinra huaiton Upa Diosin ahuun chaca soashoni a cuscara shara inon. ²³⁻²⁴Upa Diosin tsain yoini isca huaquin, —Abraham Upa Dios icoinra huani. Icoinra huahuunshon ahuun chaca soashoniran, —ishon cununi. Abraham fustihuunshocai cununima. Norifi nan icoinra huafoti noco cunushoni. Nocon Ifo Jesús naacoinfiacun Upa Diosin funimani nipanon. Nan non icoinra huaiton nocon chacari noco soashonon a cuscara shara non inon.

²⁵Nocon Ifo Jesús namani nocon chaca noco soashonon. Nantori funimani Upa Diosin noco rau huanon a cuscara shara non iishquin.

Tsoan nocoqui patatiroma

5 Upa Diosin nocon Ifo Jesucristohuunshon noco rau huaa nocomaqui afanan iquima no fu ipashquin. Ascano nan icoinra huashu non afu isharapacutiro. ²Non icoinra huacun Upa Diosin noco noiaino non afu shafatifi rafutiro. Ascano unimacoinquin non tapitiro noco imapaiyai cuscan shara non atiro.

³Ascatari non Jesushuunoashu omitsiscafiaquin non shinanchacaquima Jesús tununi cuscan non tunucointiro. Ascatan non unimatiro. ⁴Non tunuaino Upa Diosin nocoqui unimatiro

non Jesús cuscara isharashquin. Non isharaquin non tapitiro non chipo afu ipasharashquin. ⁵Upa Diosin ahuun Yoshin Shara nocoqui nichini. Ahuunshon non tapitiro noco fasi noicoin. Nan tapishocai non shinanchacatiroma. Noncai iscatiroma, —¡Ohuashta! Un ipaitsi Jesushuunoashu un omitsisca. Ua yoiyoni cuscan ua ashoshquimaran, —ishoncái non anori shinantiroma.

⁶Shinancapon. Noncai ahuuscashon nocon chaca soatiroma Upa Dios cuscara isharashquin. Non ascara chaca icaino nantianri Cristo oni noco nashoshquin. ⁷Non isharafiatiro tsoan noco nashotiroma. Itsairaca yora sharahuunoashu fustirasi noco nashotiro. ⁸Ascafiacun non Diosquiri chaca huafianton nantianri Cristo nocohuunoashu nani. Ascano Upa Diosin noco ismani fasi nocohuun noicoinquin.

⁹Ahuun imi foyanan Criston noco nashoni Upa Diosin noco rau huanon a cuscara shara non inon. Ascacun icoinra huamafoqui Upa Diosin sinaquin ato onaintimaitian noco mimacai huaquin numashqui non omitsiscapanacafo muran canonma. ¹⁰Non Upa Dios noicasamayopaonitian Furunmun noco nashoni noco numano non afu ipanon. Natian Jesús niahuunshon mima huaquin noco numanon Upa Dios fu non ipasharanon. ¹¹Ascano natian nocon Ifo Jesucristo noco Apa Dios ya imapacushquin non ahuunoashu unimacoinon.

Adán yafi Cristo

¹²Ascatan tapicahuun. Adán chaca huaqui tau huani. Chacahuunoashu nani. Ascacufin ahuunshon nantifi manifestifain chaca huamisifoquin. Ascano nantifi nai futsushquin. ¹³Moisés huunshon Upa Diosin yorafo yonoataima nantifi manifesti

anoafoan chaca huapaonifo. Moisés yononi cuscan tapishoma Diosin nanfohuunshoncái ato onaintimaitian nannonfo. ¹⁴Ascafiacun Adán niyopaonitian non Moisés tianri yorafoti nai futsunifo. Upa Diosin Adán yonofia nicayosmani chaca huani. Adán Dios chaca huani cuscan futsafoan huayamafiacanashu nai futsunifo. Adán onihuaquin tau huani. Chipo Cristo arifi mai ano oni Adán cuscara nocofunu ishquin. Ascafiashucaí Adán cuscaracoinma.

¹⁵Nan nocofunun Adán ahuun chacahuunoashu nantifi yorafo nai futsucani. Ascan nan nocofunun Jesucristo fusticai ascanima. Ahuunshon yorafohuun ramapaiquin Upa Diosin ato rau huatiro aton chaca soashquin. ¹⁶Adán chaca huaahuunshon Upa Diosin nantifi namaqui futsai. Ascafiacun Cristohuunshon aton chaca soashotiro natamarocon afu isharapacunonfo. ¹⁷Adán ahuun chaca fustihuunoashu nantifi namisifono mimacaiquin Jesucristo fustihuunshon Upa Diosin noco rau huatiro. Noco rauhuano non afu ipasharanon a cuscara shara iishquin.

¹⁸Ascano Adán chaca huanihuunoashu fusti nantifi namisifo. Nanscarifiai Jesús ahuun sharahuunoashu fusti nantifi aton chaca soashotiro ato omitsisca huatamarocon ato nimapacunon. ¹⁹Nan nocofunun Adán Diosin nicacasmaquin tau huanino ahuunshon chaca huapamisifo. Nanscarifiai nan nocofunun Jesucristo fusti Apan yoini cuscaín. Ascano Apa nicacoinshon ahuunshon yora ichapa imasharatiro Apa fu ipanonfo.

²⁰Upa Diosin yorafo yonopaiyai cuscan Moisés cunushoni a chaca huamisifo cuscan tapinonfo. Nanhuunshon non tapitiro non fasi chaca huamisi. Mimacaiquin non tapitiro Upa Diosin nocohuun ramapaiquin noco rau huatiro no-

con chaca soashoshquin. ²¹ Ipaoni chaca fustisi yorafoan aton ifo icaino ato namaquin futsani. Ascafiashu natian Upa Diosin nocohuun ramapaiyaino nocon Ifo itiro. Nocon Ifo Jesucristohuunshon nocon chaca noco soashotiro a cuscara shara non inon afu ipashquin.

**Non Cristo fu nani cuscaracoin
afanan chaca nocon ifo inonma
Cristo nishon nocori nimapacunon**

6 Ascán atirifoanraca shinanquin isca huacaniquin, —Non chaca huafafainfiainoraca Upa Diosin nocohuun ramapaiquin. Nocon chaca noco soashonaran, —ishon amaquiri shinanmisifo. ² ¿Ai timafin! Ascayamapacushapainonran. Jesús noco nashoni nocon chaca afanan nocon ifo inonma. Yoran nashocai afanan futsa nicatiroma a furicai afanan rafutiroma. Futsan ahuun iforicai itiro. Nanscarifiai non Jesús fu naa cuscaracoin chaca afanan nocon ifo inonma. ³ ¿Man tapiamamun man nonfin unu muran iquimamuaquin Jesucristo ahuun yorashon ato oinmashquin? Ascacun Jesús noco nashoni nocon chaca soashoshquin. Norifi afu naa cuscaracoinshon non afanan chaca huanonma. ⁴ Ascano Jesús maini cuscan norifi non chaca huapaoni afu nani cuscaracoin. Ascashon Upa Diosin ahuun curushhuunshon Furun funimani afu ipasharanon. Nanscarifi aqui nocorifi funini cuscaracoin non afu ipasharanon non chaca huapaoni cuscan afanan non anonma.

⁵ Naino non ahuun yoracoin ini afu yora fusti cuscara iishquin. Nacun afincoin funimani isharapacunon. Norifi ahuun yoracoianshu a cuscara funa shara non itiro. ⁶ Jesús mastaifono norifi afu masta cuscaracoin. Non chaca huapaoni cuscan cuyonon. Non Jesús ifoatama chaca nocon ifo ipaoni. Non

afu masta cuscaracoin afanan chaca nocon ifo inonma. ⁷ Shinanapon. Tsoan nashocai afanan chaca huapaitiroma. Marifi Jesús fu naa cuscaracoinshocai man afanan chaca huapaishquima. Afanan chacapan mato yonotiroma mato chaca huamapaiyai cuscan anonma.

⁸ Non Cristo fu naa cuscaracoinshon non icoinra huashu non afu ipasharatiro. Nanri non icoinra huai. ⁹ Man non tapia iconcoin Cristo funimani afanan nanonma. Ahuashatocai afanan Cristo namatiroma. Ahuun ifo itiro ma afanan namanonma. ¹⁰ Nai fustinishaquin nocon chaca noco soashoni afanan chaca nocon ifo inonma. Ascano natian Apa Dios fu isharapacunaca.

¹¹ Nanscarifi aquin natian man shinantiro isca huaquin, —Un chaca ipaoni cuscan man cuyoa. Afanan ua ahusca huatiroma. Natian un Jesucristohuunoashu Upa Dios fu rafucacaini ua amapaiyai cuscan aashquin, —ishon anori shinanahuun.

¹² Ascacufin afanan chaca maton ifo imayamacahuun mato chaca huamapaiyai cuscan ayamacahuun ¹³ Isca huaquin shinanahuun, —Yoshin chacan, mian chaca huamapaiyai cuscacai mian amatiroma. Uhuun cayacai minama mian chaca huamapanan, —ishon yoicahuun. Man chaca ipaoni cuscan man naa cuscaracoin. Ascafiashu natian man funa cuscaracoin Upa Dios fu ipashquin. Ascano Upa Dios yoicahuun isca huaquin, —Upa Diosin, unfin minaquin. Mian shara huamapaiyai cuscan ua huamahuu. Uhuun caya non uhuun nomuranri mina mian amapaiyai cuscan ua huamahuu, —ishon yoicahuun. ¹⁴ Moisés yononi cuscacai non atiroma Upa Dios fu ipashquin. Nocon ifocai itiro non nipanon. Ascata ma Upa Diosin matohuun ramapaiquin arusu

mato numatiro mato ifo iishquin. Ascano chaca afanan mato ifo itiroma.

Upa Diosin mato shara huamapaiyai cuscan man ahuun oinmati inon

¹⁵ Moisés yononi cuscacai non atiro ma noco imasharanon Upa Dios fu ipashquin. Ascan Diosin nocohuun ramapaiquin noco imashara. Nan fusti nocon ifo itiro noco numanon. ¿Ascanocai non chaca huafafaintiromun Diosin nocohuun ramapainon noco chaca soashonon? Ascayamacupainon. ¹⁶ Man tapian mafi man catontiro ratofomain mato ifoquin. Upa Dios man nicacointiro ahuun oinmati ishquin iyamarai chaca catontiro ahuun oinmati ishquin. Chaca catoanshu man omitsiscapashquin. Ascan man Upa Dios nicacoianshu man afu isharapacunaca. ¹⁷ Man chaca catonpaoni ahuun oinmatiflashon natian Upa Diosin mato yoimisi cuscan maton nomuran man nicacoian. ¡Aicho! Upa Diosin mato imasharamisi. ¹⁸ Ascanocai chaca afanan maton ifo itiroma mato yonoshquin. Natian ahuara shara fusti maton ifo itiro. Manfin ahuun oinmatifoquin.

¹⁹ Man oinmati yafi ifohuunoa man tapicoian. Ascan atohuunoa un mato yoipaiyai cuscan un mato yoi man shafacafi tapinon. Chaca futsa futsatapafo man huapaoni. Ascacun chaca mato ifo ipaoni. —Ua chaca huamapaiyai cuscan un aashquin. Fasi finacaiari un chaca huairan, —ishon man shinanpaoni. Afanan asca huayamacahuun. Natian Upa Diosin yoicahuun man ahuun oinmatifo. Afanan chaca huatama ahuara shara fusti ahuun oinmati man itiro.

²⁰ Ipaoni chaca maton ifo icaino mancai ahuara shara shinanpaonima maton ifo inon. ²¹ ¿Man ipaoni cuscan sharamun? ¿Mato imasharamun? Ma. Ipaoni

cuscacai afanan afohuunoa man shinanpaima. Afohuunoa man shinainno man rafitiro. Nan chacafo shatuyamaino man naitian man omitsiscapanacafo muran man catiro. ²² Ascafia natiancai chaca afanan maton ifoma Upa Diosin maton ifo. Manfin ahuun oinmatifoquin. Man ahuun oinmatifocun mato shara huafafaini a cuscara shara man inon man afu ipanon. ²³ Tsoa chaca ahuun ifono ahuunshon ato omitsiscapanacafo muran potashquin. Ascafia nocon Ifo Jesucristohuunshon Upa Diosin noco cashman numano non afu ipanon.

Nocofunu fu ainfo fiananfohuunoa cuscara ahuara futsan ato tapimani

7 Uhuun yoramishtichin, un mato yoipaiyai cuscan man man tapi-coian. Moisés noco yononi cuscan man man tapia. Non niyoano noco yonotiro. Non nano noco afanan yonotiroma. ² Iscara un mato tapimapai. Ainfo funun fianocai nocon caifoan yononi cuscan funu niyoano unutiroma. Ascacun funu nanocai afanan tsoan afanan yonotiroma. ³ Funu nano futsan fitiro. Asca huaquicai chaca huatiroma. Ascafia funu niyoanocai futsa fu fianantiroma. Futsan fiaino furoma chaca itiro. Nannori nocon caifoan yononi.

⁴ Uhuun yoramishtichin, nanscarifi aquin Moisés yononi cuscan maton funu cuscara nan maton ifo ipaoni. Ascafia Jesús mastanifotian marifi man afu naa cuscaracoin. Naashu afanan Moisés yononi cuscan maton funu cuscara itiroma. Cristo naafiashu funini cuscan marifi afu funini cuscaracoin funa cuscara iishquin. Natianfin man Cristonaquin maton ifo inon a cuscara shara ishcaquin. ⁵ Jesús man Ifo huataima chaca maton ifon ipaoni. Moisés mato yonopaiyai cuscan atama yoitimacoinshon man fasi chaca huapaoni. Nan chacafohuunoashu non

natiro omitsispacunacafo muran noco imatiro. ⁶Non ascafiapaonishaquin non Jesús fu naa cuscaracoin.

Ascanocai Moisés cununi cuscan nocon ifo afanan itiroma. Nococai shinanmatiroma isca huaquin, —Min Moisés cununi cuscan ayamashu min nipatiromaran, —ishoncai noco yonotiroma. Noncai afanan ahuun oinmatima. Natian non Diospan Yoshin Sharahuunoashu non unimacoincain non Upa Dios yonoshotiro.

Chacapan ua ifoahuapai

⁷¿Ascano Upa Diosin Moiséshuunshon yononi cuscan chacamun? Ma. Anorima. Amaquiri shinaryamacahuun. Moisés cununi cuscan un oinyamashon un chaca huamisi un tapicuanama. Uhuun nomuran un chaca fuchipaipaoni cuscan uhuun ointi un noconi. Moisés cununi cuscan un oinyamashon uhuun ointi muran un shinancuanama. ⁸Ascafia Moisés cununi cuscan oinfiaquicai un chaca shatutama un finacaipaoni. Fasi finonmafain un chaca noipaoni. Upa Diosin noco yonoyamanicai non yoitima icuanama.

⁹Diosin noco yononi cuscan un tapipaonima un chaca huafiaquicai un mupaonima. Ascafia Diosin noco yononi cuscan un nicacoinshon un ahuunshon tapini unfin chaca huamisiquin. Un tapiniri chaca huamisifo omitsiscapanacafo muran focani. ¹⁰Un shinanpaoni isca huaquin, —¡Ohuashta! Upa Diosin noco yononi cuscaai un aima. Ua yononi cuscan un aiton ua nimapacucwana. Un ascayamacun ua omitsiscapanacafo muran ua camashquinran, —ishon un shinanpaoni. ¹¹Chacapan ua parapaoni. —Upa Diosin noco yononi cuscan un airan, —ishon un amaquiri shinanpaonima ascafiaqui un apaonima. Ascacun un tapipaoni uhuun chacahuunoashu un nai

omitsiscai. ¹²Man non tapia Upa Diosin noco yononi cuscan shafacafi sharacoin.

¹³Sharafiacucai un ascamisima. Ahuunshon ua tapimapaoni non chaca huamisi cuscan fasi chacacoincun. Upa Diosin yononi cuscan sharacoinfiacun ahuunshon mun tapini un ascayamashu un omitsiscacaini nai.

¹⁴Man non tapian Moisés cununi cuscan Diosin ahuun Yoshin Sharapan shinanmani. Nan sharafianocai un sharama. Chaca uhuun ifo. Unfin ahuun oinmatiquin. ¹⁵Ahuuscain un iscamisimun uncai tapiama. Un shara huapaiyai cuscaai un aama. Un asca huapaiyamafiaquin un amisi. ¹⁶Un asca huafiaquin uhuun nomuranshon un shinan, —Upa Diosin Moiséshuunshon noco yononi cuscan sharacoinran, —ishon un shinain. Moisés yononi cuscan nannoricoin un shinain. ¹⁷Nannori shinanfiaquicai un chaca huai cuscan un shatutiroma. Uficoin un apaiyamafiaquin chaca uhuun ifono uhuun nomuran ua shinanchacamamisi.

¹⁸Mun tapia Upa Diosin ufu iyamaino un chacacoin. Diosimaisicai un ahuara shara shinantiroma. Un sharapafiaicai un itiroma. ¹⁹Un sharapaiyai cuscan atama un chaca huamisiquin. Un chaca huapaiyamafiaquin un amisi. ²⁰Ascano un tapitiro uficoin un chaca huapaiyamafiaquin chaca uhuun ifon icaino ua yonomisi cuscan un shatutiroma.

²¹Ufi amisi. Un sharapafiaiton chacapan ua amaquiri shinanmapai un shara shinanonma. Un ascamisi. ²²⁻²⁵Uhuun nomuran, —¡Aicho! Upa Diosin ua yonoa cuscan shararan, —ishon shinanfiai un nicayosmamisi. Ua yonoa cuscan mun tapifiashu un nicayosmamisi. Chaca uhuun ifono ufi sharapaiyain cuscan un atiroma. Uncai chaca shatutiroma. Ascano un tapitiro uhuun nomuranshon un Upa Diosin oinmati ipai ua yononi cuscan aashquin. Ascafia un

Dios ifo huayamaino un chacapan ahuun oinmati itiro ua yonomapaiyai cuscan aashquin. ¡Ohuashta! Uhuun nomuran un omitsiscai. Unfin chacaquin. ¿Tsoan ua numatiromun chaca afanan uhuun ifo inonma? Nocon Ifo Jesucristohuunshon Upa Diosin noco numani chaca afanan noco ifo inonma. ¡Aicho! Upa Diosin, min noco shara huamisi.

Diospan Yoshin Sharahuunoashu non ica

8 Ascano Jesucristo nocon Ifono nonfin ahuun yoraquin. Ascacucui Upa Diosin —Min chacaquin un mia onaintimanon. Umaquinoashu omitsiscapanacafo muran catahuun, —noco huapanacama. ² Jesucristohuunshon Diosin ahuun Yoshin Sharapan ahuun curushhuunshon noco nimashara afanan chaca nocon ifo inonma non omitsiscapanonma.

³ Moisés yononi cuscan non tapificai aton noco isharamatiroma nocon chaca soashquin. Ascan Upa Diosin shinanni cuscan ahuun Furun nai muran-shon mai ano nichini arifi noco cuscara yora inon. Noco cuscarafishocai non chaca huamisi cuscan huamisima. Noco nashoni afanan chaca nocon ifo inonma. ⁴ Ascano natian non Diospan Yoshin Shara tanashu Moisés yononi cuscan non atiro. Nocon nomuran chacapan noco shinanmapaiyai cuscan non afanan nicayamashon non Diosin tsain tanasharatiro.

⁵ Non chaca shatuyamashu nan chacapan noco amapaiyai cuscan nan fusti non shinantiro. Ascan Diospan Yoshin Shara noco iquinano noco amapaiyai cuscan nan fusti non shinantiro. ⁶⁻⁸ Diospan Yoshin Shara nocon nomuran iquinano nocon ointi fasi unimacointiro. Ascashu non Upa Dios fu ipasharatiro. Asca ratoranfo chacapan aton ifo icaino

Diosihuunoa shinansharatiroma. Aton nomuran shinanchacamisifo Upa Dios noicasmaifoan. Ascan ato yonomapaiyai cuscan nicascasmamisifo. Chaca shinancaquin Diosin tsain nicatirofoma. Nicayamashu Upa Dios fu ipatamarocon omitsiscapanacafo.

⁹ Ascfia mancai aton cuscarama. Chaca afanan maton ifoma. Diosin ahuun Yoshin Sharafin mato fuqui. Nantofin mato yonomisiquin. Ointiaquimayamacahuun. Tsoan Jesús ahuun Yoshin Shara fu iyamaino ahuun yora itiro. ¹⁰ Jesús matofu rafufiaino chacahuunoashu maton caya naashquin. Maton caya nafiacun maton yoshin Criston fiananan huai shara man inon afu ipashquin. ¹¹ Jesús naafiacun Upa Diosin Yoshin Shara funimani. Nan Yoshin Shara matofu rafuaino matori funimashquin maton caya afanan nisharanon.

¹² Ascacun uhuun yoramishtichin, Diospan Yoshin Shara no fu rafuaino Upa Diosinhuunoa non shinantiro noco amapaiyai cuscan aquin. Non chaca huamisi cuscacai non afanan shinanpaitiroma noco amapai cuscan aquin. ¹³ Chaca nocohuun nuano non omitsiscapanaca nai. Ascfia Diospan Yoshin Sharahuunshon non chaca huamisi cuscan non shatuaino afanan chaca nocohuun nutiroma non Upa Dios fu nisharapacunon.

¹⁴ Diospan Yoshin Shara ato amapaiyai cuscan nicasharamisi. Nanfofin Diospan yorafoquin. ¹⁵ Ahuun Yoshin Shara noco shinansharamapai non afanan ratunonma. Nonfin Diospan Yoshin Shara fiacun nanton ahuun facufo noco ima. Ahuunshon non yoitiro isca huaquin, —Upa Diosin min uhuun Upashtaran, —ishon non yoitiro. ¹⁶ Nocon nomuranshon Diospan Yoshin Sharapan noco yoi isca huaquin, —Min Upa Diosin facucoinran, —ishon

noco yoi. ¹⁷Non ahuun facufocun Apan ahuun facucoin inantiro cuscan nocori inanshquin. Criston ahuun Furuncoinin noco fasi omitsiscashoni. Omitsiscafianishaquin natian Apa Dios fu isharapacunaca. Nantifi Apanari ahuuna. Ascano norifi ahuunoashu natian non omitsiscafiai norifi chipo non afu Upa Dios ano isharapacunaca. Apan Cristo inan cuscari norifi non ahuun facufocun nocori inanshquin.

Chipo norifi Upa Dios yafi Cristo fu nisharapacunaca

¹⁸Shinacapon uhuun yoramishtichin. Natian non ahuunoashu omitsiscafiaquin non shinanchacanonma. Non aqui nocoaino a cuscara shara noco imai. Non omitsiscai cuscan cuyoshquin. Ascan noco imashara cuscacai unupacunacama. ¹⁹Upa Diosin ahuun facufo funimashquin a cuscara sharacoin imashquin. Ascan nan onihuanifoan manacani fasi oinsharapaicaquin ahuu cuscaramain non chipo ishquicain. ²⁰⁻²¹Onihuanifocai payocopaiyamafiai Diosin yononi cuscan payococani. Ascfaiaquicai Upa Diosin noco funimanaitiancai onihuaniti afanan payoconacafoma. Nantianri non afu isharamisi afanan ahua chaca finontama. Nanscarifiai onihuanifoti sharashtacoin icani afanan chacanatiroma.

²²Man non tapia ainfoan facu cainquin isin mui pashapaitiro. Nanscarifiai nan Diosin onihuanifo omitsiscacaini nashcaini. Natianri nanscasi acani. ²³Norifi non Diospan facufo ahuun Yoshin Shara no fu rafuaino non tapitiro non chipo Dios fu isharatirofiashu natian non isinin itiro pashapaicain. Ascaquin non manasharatiro Upa Diosin icano noco ihuonon non ahuun facufocun a cuscara shara noco imanon. Natianri nocon caya funa sharacoin afanan isinin

iyamacain nonricai afanan natiroma. ²⁴Noco a cuscara shara imai cuscacai icataima. Ascafia non icoinra huaiton noco numatiro a cuscara shara non inon. Icoinra huashon unimayanan non manasharatiro funaquinma non aqui no-coaitian. Aqui nocoshocai non afanan manatiroma. Manmain oinquifin. ²⁵Ascafia noco ihuiataima funaquinma non manasharayotiro.

²⁶Nanscarifi aquin Upa Diosin ahuun Yoshin Sharapan noco ashosharafanfainni. Ahuuscashomain non Upa Dios cufisharatiroquin noncai tapiama. Ascan ahuun Yoshin Shara nocohuunshon noco cufishotiro. Nocohuun rama-paiquin noco cufishonai cuscan sharacoin tsoancai aaton cufiai cuscan huatiroma. ²⁷Ahuun Yoshin Sharapan shinain cuscan Upa Diosin onancoian. Nantifi nocon nomuranri non shinain cuscan tapicoian. Upa Diosin noco amapaiyai cuscan nannori ahuun Yoshin Sharapan icoinra huafoti cufishomisi.

Jesushuunshon non nantifi finoncointiro

²⁸Ascano non tapia Upa Diosin noco catonni noco amapaiyai cuscan non anon. Non Upa noiaino ahuarafu ahuscara afiaino afohuunshon Upan noco shara huashoin. Norifi non icoinra huai. ²⁹Non Jesús Ifo huataima Upa Diosin tapiyoni ratofoanmain icoinra huaicain. Icoinra huaafotaima shinanni isca huaquin, —Nanfo uhuun facu cuscara un ato imashquinran, —ishon shinananyi. Ascashon Furun Jesús funimaqui tau huani. Ascashon nocorifi funimashquin a cuscara non inon ahuun chipo facufo inon icai. ³⁰Onanyoni non ahuun facufo ishquinon. Ascano noco nomuranshon noco yoini, —Uhuun facu icoinra huahuu. Tsoan amori yoiaiton un ato chaca soashoni isharononfo, —ishon Upa Diosin yoini. Aton chaca

soashonano ahuun Furun sharashtacoin cuscara inonfo.

³¹ ¿Noco asca huasharaino non raquiri yoitiromun? ¿Upa Diosin noco shara huafafainaino futsafoan noco raquiri huatiromun? ³² Upa Diosin nocohuun noiquin Furun numanima noco nantifihuunoashu nashonon. Ascanishaquin ahuaara futsa non yopai cuscan nanfori noco inanshquin. ³³ Upa Diosin noco catonni nocon chaca soashonano Furun cuscara shara non inon. ¿Ascano tsoanmun, —Min chacaran, —noco huatiroquin?

³⁴ Jesucristo noco nashocun Apan funimani. Apa Dios icano ato nantifi iquinon. Natianri Upa Dios noco cufishofafaini. Nan iconcucaïn tsoan, —Min chaca huamisiquin. Asca omitsiscapanacafo muran mia potanon, —noco huatiroma. ³⁵ Tsoancai noco Cristomaqui imatiroma noco noïnnonma. Non omitsiscacain nocon nomuran fucash huafain non Jesushuunoa yoiaton noco omitsiscamafain non fonicain nocon sahuuti yopacain noco musumafain noco rutupaifain noco huafiaquicai noco Cristomaqui imatirofoma noco noïnnonma. ³⁶ Diosin tsain cununi isca huaquin,

“Upa Diosin, shafatifi non itisharai mihuunoashu naashquin. Chashoanfo yosicun Ifoan ato rutumamisi. Nanscarifi aquin nocori rutupaicaniran,”

ishon cununi. ³⁷ Noco asca huafafainfi-aifoan Jesús noco noiaino ahuunshon non ato finoncointiro. ³⁸⁻³⁹ Jesucriston nocon Ifoancai ahuashtaton Upa Diosmaqui noco pashcamatiroma noco noïnnonma. Nan un icoinra huacoinni. Upa Diosin nocohuun noiainocai ahua ahuuscatiroma nocohuun afanan noïnnonma. Non nafiancucai amaqui noco pashcamatiroma. Non niyo anoricaï amaqui noco pashcamatiroma.

Ahuun oinmatifoanricai amaqui noco pashcamatiroma. Yoshin chacafoanricai noco amaqui pashcamatirofoma. Ahuaarafo natian icai cuscaricai noco amaquinoa pashcamatiroma. Inonpacoai cuscaricai noco amaqui pashcamatiroma. Ahuaara chacafo aton niaifoanri amaquinoa noco pashcamatiroma. Nan nai ariafo yafi mai anofoanricai noco amaqui pashcamatiroma. Upa Diosin nocon Ifoan Jesucristohuunshon nocohuun noi. Ascano nantifi onihuafoanricai amaqui noco pashcamatirofoma afanan noco noïnnon.

Upa Diosin Israelifo catonni ahuun yorafo inonfo

9¹⁻³ Uhuun yoramishtichin un Cristo-huunshon iconquin un mato yoi. Un muai cuscan mun tapia uncai mato paraima. Un mato iconquin yoi. Diospan Yoshin Sharan ua shinanmanai cuscan un iconquin yoicain. Uhuun caïfo Israelifoancai nocon Numamisi icoinra huafoma. Ascacun uhuun nomuran un atohuunoashu omitsiscacaini. Un ato fasi shinanconimisi. Uhuun caïfo uhuun nomuran un ato shinanmisi isca huaquin, —Upa Diosin uhuun yora Israelifo un ato numapai mifu nipanonfo. Ascano ato Cristomaqui omitsiscapanacafo muran potatamarocon uacai potahuu un ato numanon, —ishon un anori shinanfiainocai Upa Diosin ascatiroma. ⁴ Upa Diosin ato catonni ahuun yorafo inonfo. Ato fu iyoshon ato ismapaoni ahua cuscamain aaquin. Ato shara huapayai cuscan ato yoïyoni. Ascashon ato yononi isharanonfo. Ato yosini ahuuscashomain ichanashon cufitirofoquin. Ascariï atan ahuaara sharacoin ato ashoain cuscan yoïyoni. ⁵ Maton shunifofoan Upa Dios tanasharafafainpaonifo. Nocon Ifo Cristo arifi Israeliri ini. Nocon shuni Abra-

ham non Isaac non Jacobori aton funa. Aafin natian nantifiton aton ifoquin ato iquina. Ascan Upa Dios fasi shararan non huapanon. Amen.

⁶Upa Diosin noco yoisharayoni cuscan uhuun caifo Israelifoa icoinra huayamafiafoan ahuun tsain iconcoin. Ahuun yorafo yoiyoni cuscan ashquiquin. Ahuun yorafo shara huafaiinocai atirifi Israelifo Diospan yorama. ⁷Nanscarifi aquicain Abraham acai cuscan ahuun funa atirifoa icoinra huamisima. Afocai Diospan yorama. —Abraham ahuun facu futsafoyafiacun Diospan tsain cununi cuscan ahuun facu Isaac yafi ahuun funafo nanfosi Upa Diosin yoiyoni cuscan fitirotan, —ishon cununi.

⁸Ascano non tapitiro atirifi Abraham funafocai Diospan yorama. Diosin Abraham yoiyoni ahuun facu chipo cainshquiain. Yoiyoni cuscan Abraham icoinra huani. Nan icoinra huafosi Diospan yoraquin. Abraham facu cuscarafu. ⁹Abraham ahuin Sarapan facu nanuataima Upan Diosin yoiyoni isca huaquin, —Fari futsan un miqiu nasoshquin. Nantianri min ahuin Sarapan facu furonanfacu cainshquiran, —ishon yoini.

¹⁰⁻¹³Ascano man fari ichapa finontan Sarapan facu Isaac ahuin Rebeca rafanacani. Caiantaima Upa Diosin yoini isca huaquin, —Min facu Esaú cain tau. Afu rafanaca Jacob. Chipocuton oinmati cuscara iyoa ishquiran, —ishon yoini. Caiantaimacai ahua chaca huafain shara huatian inima. Ascafian Diosin yoiquin, —Jacob un noiquin un ashoin. Un iyoa Esaucai un noiquin asca huaima, —ishon Diospan tsain cununi. Ascano non tapitiro Diosin inonpacoai shinanyoni cuscan atiroquin. Esaú futa Jacob amisifo cuscacai shinanyonima. Aafin apaiyai cuscan yoiyoni.

¹⁴¿Ascano Upa Diosin shinancoinmumun? Ma. Anoricai non shinantiroma.

¹⁵Upa Diosin yoini isca huaquin, “Nan un noipaiyaifin un noitiroquin. Nanscarifiai nan un ahuun ramapayaihuurifi un ramapaitiroquin,” ishon Upa Diosin Moisés yoini.

¹⁶Ascano non tapitiro futsan shinanquin, —Diosin ua shara huashopainon, —ishon shinantiro iyamarai, —Un Upa Dios yonoshosharatiro ahuun rafanan ua inansharatirotan, —ishon non shinantirocaai anorima. Upa Diosin afin noco huun ramapaiquin noco catontiro non ahuun yorafo non inon noco inansharashquin. ¹⁷Ascano Upa Diosin Egipciofo aton niaifo yoini, —Un mia niaifo imashquin nantifi manifoti anofoan un ahuamamishti huatiro minhuunshon tapinonfo, —ishon yoini. ¹⁸Ascacun non tapitiro Upa Diosin futsa ahuun ramapayaihuunri ramapaitiroquin. Nanscarifi aquin futsan chaca huafafaina cuscan shatuamashu ointi mutocoin imatiro.

¹⁹Man futsan ua yoiraca isca huaquin, —Ascacun non chaca huaiton noco shatumanama nocon ointi mutocoin imashquin. ¿Ascafia ahuuscain Upa Diosin nocohuun nuamun? Afin apaiyai cuscacai tsoan atima huatiroma, —itsairaca amaquiri yoiquin. ²⁰Ma. Asca huayamacahuun. ¿Ahuuscain min Upa Dios tafipaimun? Minfin nocofunuquin. Aafin Diosiquin. Ahuara onihuamatuocai yoiqui isca huatiroma, —¿Ahuuscain mian iscara onihuamun? —huatiroma. ²¹Cutin onihuamisiton mapo nan apaiyai cuscara shara cutin huatiro. Futsa amuran ahua chaca nanuti huafain futsa amuran ahua chaca nanuti huatiro.

²²Nanscarifiai Upa Diosin nantifi yora onihuafiacun atirifoa ahuun tsain nicacasmamisifo. Funainquimashta ato yoyofiaiton nicayamacaiyafoan inoncai atoquei sinaquin. Ato potatiro

chacani fustisi tapiaifoan. Asca huaquin ato ismatiro ahuamamishti huatiro cuscan. ²³⁻²⁴Ascafiacai non ato cuscarama. Noco huun ramapaiquin noco tapimamisi. Ascatari noco itisharamai unimacoincai non afu ipanon. Noco Israeli fusti catonnima non afu ipanon. Mani futsafori catonni. ²⁵Oseas nan inonpacoai yoimisiton Diosin tsain cununi isca huaquin,

“Futsafo Israelifomari un catonshquin uhuun yorafori inon. Tsoancai ato noiyomisimafiacun un ato yoishquin. Un mato noiran,”

ishon Upa Diosin yoini cuscan Oseas cununi. ²⁶Afanan ato yoini iscahuaquin,

“Mancai uhuun yoramaran,’ ishon Diosin mato yoiaran, huanifo. Ascafia chipo atohuunoa yoishcaquin, ‘Upa Diosin niaton man ahuun facuforan,’ ishon yoishquicani.”

²⁷Isaías nocon caifo Israelifohuunoa yoini,

“Israelifo ichaparasi ishquicani tsoan ato tanan huatiromafiashu fustirasiton icoinra huashquicani Upa Dios fu ipashcaquin. ²⁸Yoini cuscan iconcoin. Yoiyoni cuscan manifoti anoafoan nan icoinra huafoma nocon lfoan ato onaintimariscashquin. Afanan ato manashquima,”

ishon Isaías cununi. ²⁹Ascashon Isaías afanan yoiyoni cuscan nanscacoian. Isca huaquin,

“Upa Diosin ahuamamishti huatiro. Nocon caifo Israelifo fustirasi numani atifi cuyononfoma. Asca huayamaino non Sodoma yafi Gomorra cuscarafa icuana. Nonrifi non cuyocuanaran,”

ishon Isaías cununi.

Israelifo yafi nan tsain shara Jesushuunoa

³⁰¿Ascano afohuunoa non raquiri yoitromun? Nan Israelifomacai aton chaca shatucasmamisima Upa Diosin icoinra huashquin aton chaca soashonon. Ascafia natian atirifonon Jesús icoinra huaifoan Upa Diosin aton chaca soashona a cuscara shara inonfo.

³¹Ascafia uhuun caifon Israelifoan Upa Diosin Moisés huunshon ato yononi cuscan sharapaicaquin. Ascafiacai Moisés yononi cuscahuunoashu shara inonfoma. ³²¿Ahuuscain iscaimun? Un mato yoinon. Nanfoancai Diospan Furun Jesús icoinra huaafoma aton chaca soanon. Ascatamarocon Moisés ato yononi cuscahuunoashu isharapaaifo aton chaca soashquin. Un mato ahuara futsa nicamapai. Toquiri fasi uhuapa fai naqui raca finonpai aqui oroshcomutiro.

³³Nanscarifi aquin Jesús finonpaiyaifoancai icoinra huacanima nipashcaquin. Nannori inonpacoai cuscan Isaías Diospan tsain cunuyoni isca huaquin,

“Un Israelifo aton fai naqui toquirin-inhuan ratain. Ahuunoashu yorafo pacunonfo,”

ishon cununi.

“Nanscarifi aquin Upa Diosin Jesús Israelifiqui nichini tsoan icoinra huayamashu funocoinceni nipashcaquima,”

ishon cununi isca huaquin,

“Ascafia tsoan icoinra huacoinshon shinanchacanacamaran,”

ishon Diospan tsain Isaías cununi.

10 Uhuun yoramishtichin, uhuun nomuran uhuun caifo un fasi shinain. Un atohuunshon Dios cufifafaini Jesús icoinra huanonfo Dios fu nipashcaquin. ²Mun tapia nanfoanfin Upa Dios fusti fasi tanapaisharafiaquin amaquiri

shinanfoquin. ³—Nonfin Moisés noco yononi cuscan non aino Upa Diosin no-coqui unimatiro noco numanonran, —ishon shinanpaonifo. Ascano Upa Diosin ato Jesushuunshon imasharapaiyai cuscan afu ipashcani. Ascafia nicacasma-paonifo. ⁴Moisés yononi cuscan Criston mai ano niyoshon nantifi apaoni. Ascano Moisés noco yononi cuscaai non afanan yopatiroma nocon chaca soanon Upa Dios fu ipashquin. Tsoan Cristo icoinra huaiton aton chaca soashotiro afu ipasharanon.

⁵Moisés isca huaquin cununi, —Upa Diosin noco yononi cuscan nantishon tapiquin non chaca huayamashu Upa Dios fu non nipatiroquin, —ishon cununi. ⁶Ascafia non Jesús icoinra huashon non isca huaquin yoitiro, —Maton nomuranshocai man isca huaima, “¿Tsoamun nai muran catiroquin Cristo fotomashquin noco numayonon?” ⁷Iyamarai, “¿Tsoamun mai muran catiroquin Cristo funishquin?” —ishon yoiyamacahuun. ⁸Anorimaquin. Man Cristo icoinra huaiton mato numatiro. Nannori non mato yoimisi. —Mancai raqui cayotiroma Cristo fu ishquin. Natian man Cristo yoitiro matofu rafunon. Maton nomuranri man icoinra huacun matofu rafutiroan, —ishon Moisés cununi. ⁹Ascano, —Jesús uhuun Iforan, —huafain man shinanquin isca huai, —Jesús nafi-acun Apa Diosin funimaniran, —ishon maton nomuran man icoinra huaiton maton chaca soashotiro afu man ipanon.

¹⁰Ascan maton nomuranshon man icoinra huacun Upa Diosin maton chaca soashotiro man isharanon. Man futsafo, —Jesucristo uhuun Iforan —ishon yoiaiton mato imapacunaca. ¹¹Nannorifi Diospan tsain cununi, —Tsoan Criston Diospan Furun icoinra huaashucaí rafipacunacafoma, —ishon cununi. ¹²Israelifo iyamarai mani futsafoan icoinra huaifoan aton Ifo itiro.

Diosinacai ahua rafuma. Nanscarafosi. Nan icoinra huafoti aton Ifon. Fasi atohuun noiquin ato ya imapacunon. ¹³Ratoran nocon Ifon icoinra huashon yoiqui isca huaiton, —Ifon, ua numahuu, —huaiton afu ipatiroquin.

¹⁴¿Ascafia ahuuscashocon, —Jesús ua numahuu, —huatirofomun icoinra huacatama? Ahuunoa nicamishamashucaí ahuuscashon icoinra huatiroma. ¿Futsan Jesushuunoa ato yoiamaino ahuuscashocon nicatirofomun? ¹⁵¿Ahuuscashocon yoifotirofomun futsan ato nichiamaino? Nannori Diosin tsain cununi isca huaquin, —Nan tsain shara futsafo yoifononfo nan fasi sharacairan, —ishon Isaías cununi. ¹⁶Ascafia nan tsain shara atirifi Israelifoan icoinra huacanima. Nannori Isaiasin afanan cununi isca huaquin, —¿Ifon, non ato yoia cuscan tsoan icoinra huamun? —ishon yoini. ¹⁷Ascano tsain shara nicaquin icoinra huatirofo. Nan tsain shara Jesucristohuunoa.

¹⁸¿Uhuun caifo Israelifoan nan tsain shara Jesushuunoa nicamisimun? Ai, man nicamisifo.

“Manifoti anoafoan nan tsain shara man nicafo,”

ishon David cununi. ¹⁹¿Uhuun caifoan tapinimamun nan tsain shara Cristohuunoa nicacasmaifoan Upa Diosin caifo futsafo yoitiro ato numaquin? Ai, man nicamisifo. Moisés niyoshon ato Diosin tsain yoini isca huaquin,

“Uhuun yora Israelifoan un afanan ato uhuunoa shinanmapai. Ascan un caifo futsafo uhuunoa un shinanmai Cristohuunoa shinanonfo ato numanon. Nan oincani Israelifori uqui nasopaitiroan,”

ishon Diosin yoini cuscan Moisés cununi. ²⁰Chipo Isaías ranotama yoini isca huaquin,

“Mani futsafoan ua funayamafiacaquin ua icoinra huafo. Uhuunoa yocayamafiamisishaquin un ato uhuunoa onanmanaran,”

ishon Diosin yoini cuscan Isaías cununi.

²¹ Ascafia uhuun caifohuunoa yoini,

“Un shafatishon un ato cuna uqui fucahuun. Un ato huafiacai uqui fupaicanima. Yoitimamisiforan,”

ishon Upa Diosin yoini cuscan Isaías cununi.

Ascan Upa Diosin Israelifo catonni

11 Ascano un mato yocanon. ¿Upa Diosin ahuun yora Israelifo potapacunacamun? Ma. Anorima. Unrifi Israeliquin. Abraham non Benjamín uhuun shunifo. ²Upa Diosin ahuun yora inonpacoai cuscan onanshocai ato potamisima. Shinanapon. Nocon shuni Elías Israelifohuunoa Upa Diosin yoini isca huaquin, ³—Ifon, min tsain inonpacoai cuscan yoimisifo rutuafo. Mia a muranshon cufiti choquiaquin futsafo. Uru fusti un tushufiacun uari rutupaicaniran, —ishon Elías Upa Diosin yoini.

⁴¿Ascan Upa Diosin raquiri Elías cumanimun? Isca huaquin cumani, —Ma. Mirus fusticai min tushuama. Siete mil min yora futsafoanri ua noiafo ahua futsacai ifoanfoma. “Baalcai uhuun diosiran,” huamisifomaran, —ishon Diosin Elías cumani. ⁵Nanscarifi aquin natianri Upa Diosin uhuun caifo fustirasi catoan atohuun ramapaiquin. ⁶Ahuara shara huua rafaancai ato catoanma. Atohuun noiquin ato catoan. Dios non yonoshonaitocai noco catoanma. Ahuara yonoshomacai non cashman fitiroma. Ascanfiacai non Upa Dios yonoshotiroma noco catanon. Noco cashmancoino catoan.

⁷Ascano uhuun caifo Israelifo Moisés yononi cuscan apainifo aton chaca

soanon Diospan yora ipaifiashucai ahuun yorafo icafofoma. Diosin catoanfosi aton chaca soashona ahuun yorafo inonfo. Nan futsafoan aton ointi mutonifo. ⁸Nannori Diosin tsain cununi isca huaquin,

“Upa Dios nicacasmafo. Ascan ato oshamana cuscara shinantsa afo ahuunoa shinanonfoma. Oinfiacani fusho cuscarafo. Nicapaicoinnifoma. Ascaiton ahuun tsain shara ato tapimanima. Natianri nansacani,”

ishon Moisés cununi. ⁹Nannori nocon niaifo shuni ipaoniton David yoini isca huaquin,

“Nan nicacasmamisifo onaintimainon. Tushu ichapayafu futan mafo ichapayafufoanriraca shinanfo Upa Diosin atoqui unimai. Ascarama. Amaquiri shinanshu omitsiscapainonfo. ¹⁰Ato fusho cuscara imapainon. Ato cacoapainon aton ointi ihuu ipainonran,”

ishon David Dios nicacasmamisifohuunoa yoini.

Israelifoanmari Jesús icoinra huacanashu afu nipanonfo

¹¹¿Ascano uhuun caifo Israelifoan nicacasmamisifoquin Upa Diosin ato potapacunacamun? ¡Ma! ¡Anorima! Chaca huafoan Jesús nicacasmacani. Ascacun mani futsafo Jesushuunoa yoi icoinra huanonfo afu ipashquin. Nanfoan Jesús icoinra huaiton uhuun caifo Israelifoan oincashon shutitan ifoanpaitirofo. Nannori Upa Diosin ato shinanmapai. ¹²Uhuun caifofoan chaca huapaonifo Jesús ifoanpaiquinma. Ascano Upa Diosin manifoti anoafu Jesushuunoa tapimanano icoinra huashu nipanonfo. Ascano isharafafo. Diosin ato shara huashoan. Ascafia uhuun caifori chipo Jesús icoinra

huacanashu nantifi manifoti anoafo mimacai unimashcani.

¹³Man uhuun caifoyamafiacun Upa Diosin ua mato muran nichini Jesushu-unoa un mato yoinon. Un Jesús fu rafumisi. Ascashon un ahuunoa mato yoi. Un fasi unimai Upa Diosin ua catonni un mato yoinon. ¹⁴Uhuun caifori un yoimisi Upa Diosin ua matoqui nichini. Man unimaiton oincani afoanri mato shutipaitirofo Jesús icoinra hupaicaquin. ¹⁵Shinacapon. Afoan Jesús ifoanpaiyamaifoa. Mani futsa anoafo Upa Diosin ato tapimani. Nicacashon Jesús ifoannifo. Nan sharafishu uhuun caifoaanri Jesús icoinra huaifoanno fasi sharacoin iishquin. Yora naashu funia cuscara itiro. ¹⁶Uhuun caifoaanri Jesús icoinra huaquin tau huanifo. Ascan nocon funafori chipo Diospan yorafo iishcani. Fanafo ahuun tapo sharano ahuun poyanfori shara itiro. Nanscarifi aquin Upa Diosin Israelifo catonni ato shara huaquin. Ascano aton funafori catonshquin aforifi imasharashquin ahuun yorafo inonfo.

¹⁷Un mato iscara tapimapai man tapinon. Israelifo ihui fana poyan cuscarafu. Abraham Dios icoinra huaquin tau huano. Ahuun funafori Diospan yorafo ipaonifo. Nanfofin ihui fana poyan cuscarafuquin. Natian Upa Diosin ihui fana poyan fimioma poshtushon potani. Nanscarifi aquin Israelifoan Jesús icoinra huayamaiton ato pota. Manfin nan ihui poyan futsa cuscarafuqui. —Ihui olivoran, —ishon anuni. Nan ihui fana olivo ahuun poyan futsaqui tuchia. Abraham fana futsa poshtushon futsaqui tuchia cuscara. Nanscarifi uhuun caifoaanri man icoinra huayamaiton Diosin mato ihui ahuun facufo man inon. Diosin Abraham yoini cuscan natian marifi man ahuun yorafo inon.

¹⁸Ihui fanacai ahuun tapomaisi nitiroma. Tsasitiro. Ihui fana ahuun poyanfo non ahuun tapohuunoashu nipatiro. Poyafoancai ahuun tapo nimatiroma. Nanscarifi mancai Jesús nimapacutiroma. Nantocai fin mato nimapacutiroma. —Noncai futsafo cuscarama. Nonfin Diospan yorafoquin, —iyamacahuun. ¹⁹Man shinanra. Fana poyan chacaran ishon man poshtushon potatiro. Nanscarifi aquin Israelifoan icoinra huayamaifoa ato potani. Ascano non ahuun yorafo inon. Ascacun, —Non shararan —ishon man shinanquin. ²⁰Nan iconfiashu oinfain. Nan Israelifoan icoinra huayamaifoa Upa Diosin ato potani. Man icoinra huashufin ahuun yorafo man iquicai. Ascan cacapaimisi itama, —Non Jesús icoinra huayamashu non funotiroan, —ishon shinanahuun. ²¹Israelifoan icoinra huaquin tau huafianishacaquin chipo aton funafoan icoinra huayamaifoa Diosin ato potani. Manrifi man icoinra huayamaiton matori potatiro.

²²Ascacun shinacapon. Upa Diosin matohuun ramapaiquin ahuun yorafo mato imai. Israelifoan icoinra huayamaifoa ato onaintimaquin ato potani. Ascan matohuun ramapaiyai cuscan shinanfafaicahuun. Icoinra huafafaincahuun. Man ascayamaiton matori potatiroquin. ²³Uhuun caifofoan afanan chaca shinainyamaifoa Jesús icoinra huaifoan afanan ahuun yorafo Upa Diosin ato imatiro. Fana poshtushon afanan poyan tuchitiro cuscan atorifi huatiro ahuun yorafo inonfo. ²⁴Ifoancai ihui olivo fanamisima ahuun poyan shatushon fana futsaqui tuchini foaisharanon. Nanscarifi aquin man Diospan yora ipaonima. Ascan natian Upa Diosin mato ihuia man ahuun facufo inon.

Ascacun mimacaiquin uhuun caifo afanan ihuitiro ahuun yorafo inonfo. Jesús icoinra huaifoan ahuun yorafo ato imatiro.

Upan Diosin Israelifo numashqui ahuun yorafo inonfo

²⁵⁻²⁶ Uhuun yoramishtichin, tsain futsanhuuinoa man shinanmisima un mato tapimai maton nomuran man shinanon. Nan tapianshu cacapaimisi man inonma. Icon natian uhuun caifo Israelifoan aton ointi curushu Diospan tsain shara Jesushuunoa nicacasmacani. Ascafia uhuun caifomafoan ahuun unutaqui Jesús icoinra huaifoan Upa Diosin ahuun yorafo imashquin. Nantianricai afanan uhuun caifoan nicacasmamisi ishcanima. Ascano nantifi Israelifoan Jesús icoinra huaifoan Upa Diosin ato numai ahuun yorafo inonfo. Nannori nocon shuni Isaías cununi isca huaquin, “Nocon Numamisi Sión ano icaquin.

Afin Israelifo numai oi afanan chaca huanonfoma. ²⁷ Nantianri un yoini cuscan un aton chaca soashoshquiran,”

ishon Diosin yoini cuscan Isaías cununi.

²⁸ Uhuun caifofoan tsain shara Jesushuunoa nicacasmacani. A noicasmacaquin. Ascacun Upa Diosin mato shara huashoan. Ahuun tsain shara Jesushuunoa man icoinra huanon. Mato shara huafiano uhuun caifoan nocon shunifo Abraham non Isaac non Jacob yoini cuscan ointiaquimama. Ascacun atohuunshon aton funa Israelifori ato noi. ²⁹ Upa Diosin nocon caifo inanonpacoai cuscan yoiyonishaquin afanan shinan futsanpacunacama.

³⁰ Mancai Upa Dios nicapaipaonima. Ascafiacun Upa Diosin uhuun caifo shara huapayai cuscan ato shara huatamarocon matohuun ramapaiquin mato shara huai. ³¹ Nan man nicacasmaoani

cuscarifi uhuun caifofo nanscarafosi. Ascafiano matohuun ramapayai cuscan aforifi chipo Upa Diosiqui nasoshcani atohuun ramapainon. ³² Upa Diosin yoini cuscan nantifi maniafotiton chaca huamisifo. Ascafiacun atohuun ramapaiquin ato numanon.

³³ ¡Aicho! Nocon Dios fasi sharacoin.

Nantifi yorafohuun ramapai unupacunacama.

Aafin apayai cuscan tapicoianquin.

Nantifi tapicoian inonpacoai cuscan tapifain aafin noco ashoai cuscan tapicoian.

Ahuun nomuran yorafohuunoa shinain cuscan non tapipaifiaquicai tsoanshta tapitiroma.

Aaton acai cuscan tsoan tapitiroma.

³⁴ ¿Tsoamun nocon Ifoan shinain cuscan tapitiroquin?

Tsoancai Dios tapimatiroma ahuun tapimamisi inon.

³⁵ Tsoancai Dios ahuara inantiroma ato nifinon.

³⁶ Arusu ahuun nomuran shinain cuscan nantifi onihuani.

Ahuun curushhuunoashufin nantifi itiro. Nantifi ahuuna.

Nantifi onihuafofiton ahuunoa yoisharapacunacafo.

Ascacun, —Diosin sharacoinran, —huapanonfo.

Amen.

Ahuuscashumain Diospan ahuun yonomati non itiroquin

12 Uhuun yoramishtichin un mato yoisharapayai cuscan acapun. Upa Diosin matohuun ramapaiquin mato shara huamisi. Ascacun marifi matohuunoa inancahuun mato ifo inon ahuun yonomati ipashcaquin. Man ascaino afanan chaca maton ifo itiroma ahuunacoin man inon. Shinancapon. Man cayacafi shinansharacoinquifin matohuun noiai cuscari marifi man

ahuun noitiroquin. Man ascaino Upa Diosin fasi matoqui unimacoin. ²Ahuarafoan Upa Diosimaqui mato imapaiyaifo cuscan atama shinan futsancahuun Diosin mato imapaiyai cuscan aashquin. Man shinanpaoni cuscan afanan shinanyamacahuun. Natian Diosin maton nomuran shinan futsama sharapaiyai cuscan shinancahuun. Man ascaquin man tapitiro Upa Diosin mato imapaiyai cuscan sharacoin. Mato imapaiyai cuscan man aino matoqui unimacointiro. Ahua futsacai man yopatiroma.

³Upa Diosin uhuun ramapaiquin ua maton muran nichini un mato tapimanon. Ascan un nantifi mato yoisharapai. Cacapaimisi iyamacahuun. Diosin mato imapaiyai cuscan fusti shinancahuun. Ahua futsa ipaiyamacahuun. Man Dios icoinra huatiro cuscan afin mato shinanmanaino cayacafi shinan-sharacahuun. Man icoinra huua cuscan nan fusti Upa Dios ashocahuun. ⁴Un mato ahua futsa yoipai isca huaquin. Nocon cayan fustifiano non pashcoi futsua. Afocai ascarafosima. ⁵Nanscarifiai nocon Ifo Jesús fusticoi. Nonfin ahuun yorafoquin. Non ahuun cayan cuscarafoshu non yopanonainquin.

⁶Upa Diosin nocohuun noi qui cashman noco imapaiyai cuscan non ahuunshon futsafo ashosharatiro. Noco imapaiyai cuscaai non ascarafosima. Upa Diosin man atirifi catoan ahuun shinanhuunshon icoinra huua futsafori ahuun tsain yoinon. Mato catoncun man icoinra huashon mato yoia cuscan futsafori ahuun tsain yoicahuun. ⁷Ratoranfo catoncun ahuun shinanhuunshon futsafori ashosharanon ato shara huashofafaincahuun. Ratoranfo catoncun ahuun shinanhuunshon ahuun tsain ato tapimasharacahuun.

⁸Ratoranfo catoncun ahuunshon futsafo ointi fupi huamafafaincahuun. Ratoranfo catoncun yopaifo inanquin ato unimacain inansharacahuun. Ratoranfo ahuun shinanhuunshon futsafo yononon Diosin shinanma cuscan ato yonosharacahuun. Nan mato catoncun ahuun shinanhuunshon omitsiscaifoahuun ramapaiquin unimaquin ato ashosharacahuun.

Futsafohuun noicoincahuun

⁹—Un mato noiran, —ificatan parayamacahuun. Atoqui shinanchacayamacahuun. Yorafohuun noicoincahuun. Ahuara chacafo noicasmacahuun. Ahuara shara fasi noicahuun. Afo potayamacahuun. ¹⁰Nan man icoinra huafoti noinancahuun. Maton yoracoinfo man noimisi cuscan huafainri futsafo ya noinancahuun. Yoinansharatanancahuun. ¹¹Nocon Ifo yonoshoni shaniyamacahuun. Diospan Yoshin Sharahuunshon unimacain yonoshosharacahuun. ¹²Upa Diosin mato shara huashoshquiai cuscan shinancahuun. Nanfo shinain unimacahuun. Ascan omitsiscafiain funayamacahuun. Upa Dios cufinquin unuyamacahuun. ¹³Diospan yorafo yopai cuscan ato inancahuun. Futsafo pimasharacahuun. Pushu yopaifoan maton pushu muran ato iquimacahuun. Ato cushusharacahuun.

¹⁴Mato omitsiscamaifoan ato copiyamacahuun. Ato roayamacahuun. Asca huatama ato shara huacahuun. —Upa Diosin mia shara huairan, —ishon ato yoicahuun. ¹⁵Unimaifo ya unimacahuun. Uaicaifo ya uaicahuun. Omitsiscaifoan ato shinancahuun. ¹⁶Ahuu iquinan tananquima. Upan Diosin mato shinanmapaiyai cuscan nanorisi shinancahuun. Oinanmitsapaimisi iyamacahuun.

Niaiffo yasi rafucaquima. Ahuumafo yari rafucahuun. —Un tapia cuscacai futsafoan tapiafomaran, —ishon anori shinanyamacahuun. Curafiyamacahuun.

¹⁷Mato chaca huafiainfoan ato copiyamacahuun. Aton ointaifi isharacahuun. ¹⁸Nantifi yorafo ya rafupaisharacahuun. Man asca shara huapaifiaino futsan matofu isharapaiyamainocai matohuun nuama. ¹⁹Uhuun yoramishtichin, futsan mato chaca huafiainfoan ato copiyamacahuun. Upa Diosin yoini,

“Mato chaca huaifofin unfin ato onaintimaicai,”
ishon Diosin yoini. Diosifin chacafo ato onaintimashquiin. Mancai ato onaintimaima.

²⁰“Ato copitama nan mato noicasmaifo fonaincaifoan ato piimacahuun. Nonmaincaifoan ato ayamacahuun. Man ascaiton oincani noco copimaran,”

icashu rafipainonfo. ²¹Ascan futsafoan mato chaca huapaiyaifoan marifi copiquiri ato chaca huayamacahuun. Chaca ifo huayamacahuun. Ascatama shara huafafaincahuun. Asca huaquin man chaca potatiro.

13 Upa Diosin yononi cuscan manifoti anofo niaiffo catononfo. Ascan nantifi niaifo uhupafo yafi patasharifori nicacoincahuun. ²Tsoan ato nicacasmaquin Diosinri nicacasmacani. Nan nicacasmaifoan ato onaintimashqui. ³Non isharashucai non niaifoqui musutiroma. Chaca huashufi non atoqui mustitiroquin. Niaifoqui musushquinma isharacahuun. Man ascaiton mato chaca huatama matohuunoa yoisharanonfo. ⁴Niaifofofin Upa Diosin oinmatifo cuscarafokin mato shara huashcaquin. Ascacia chaca huaashu ratucahuun afocai cashman niaifoanma. Yorafo

onaintimatirofo. Nanfofin Diospan oinmatifo cuscarafokin chaca huaifoan onaintimashcaquin. ⁵Asca mato yonoaifoan nicacoincahuun mato onaintimanonfoma. Maton nomuran isca huaquin shinannonfoma, —¡Ohuashta! Upa Diosin yononi cuscan un aamaran, —ishon shinanshcaquima.

⁶Diospan oinmatifo cuscara mato shafatifi yonoshcaquin man isharanon. Ascacun mato pui yocaifoan ato inancahuun ahuunshon mato shara huashononfo. ⁷Man ato nifian cuscan inancahuun. Atohuunoa shinansharafain yoisharacahuun.

⁸Tsoa nifiyamacahuun. Ascatama noinancahuun. Noinain unuyamacahuun. Nantifi non noiquin Upa Diosin yononi cuscacon non huatiro.

⁹Noco yoiqui isca huani, —Maton ahuinmafo ya iyamacahuun. Ainfofori mato funuma furi iyamacahuun. Rutumitsapaiyamacahuun. Ahuara onuyamacahuun. Futsana fipaiyamacahuun, —ishon noco yononi. Ahuara futsafori noco yoini. —Non yorafo noifin Upa Diosin noco yononi cuscan non aicain, —ishon noco yononi. ¹⁰Non futsafo noicoishocai non ato chaca huatiroma. Ascan non nantifi noicoishofin Diosin yononi cuscan non atiroquin.

¹¹Un mato yoi ai cuscan acahuun. Nocon Ifo Jesús oti chaima. Non icoinra huaquin tau huani chain. Oshapaimisi cuscara iyamacahuun. Oshapaicai non yonosharatiroma. Nanscarifiai shanicaquima. Jesús yonoshosharacahuun itisharashcaquin. ¹²Shafacuaino samamashta shafatiro. Nanscarifiai man chaca huai cuscan cuyocuanaino natianri nocon Ifo man oti chaimaquin. Ascashu faquish muran ica shinantsa ayamacahuun. Chaca shatucocincahuun. Jesús ica

cuscan marifi shafacafi icahuun. Chaca huaquima.

¹³Isharacoincahuun. Shafatan non oinsharatiro pacushquima. Nanscarifi aquin Jesús tanashu non isharatiro chaca huatama. Ascan futsafo monoaifo muran atoqui foyamacahuun chaca huashquima. Chaca futsa futsatapafo huayamacahuun. Paunyamacahuun. Ascatari maton ahuinma chotayamacahuun. Ainfofoanri maton funuma chotamayamacahuun. Ahuara chaca futsafo shinanyamacahuun. Fochishmanantananyamacahuun sinashquima. Futsa shutipaimisi iyamacahuun. ¹⁴Ascatama nocon Ifo Jesucristo icai cuscan acahuun. Ahuarafoan mato chaca huamatiro afohuunoa shinanyamacahuun chaca huashcaquima.

Jesús icoinra huaa futsafo tsain chaca huayamacahuun

14 Tsain futsari un mato yoi. Tsoan Jesús Ifo huafishocai ahuun tsain shara atirifi tapisharataima matofu ichanainton, —¡Aicho! No fu ichananhuun, —huacahuun. Man shinain cuscan shinanyamaiton afu fochishmanantananyamacahuun. Aquí tsain chaca huayamacahuun. ²Mato muran ishon futsan yoitiro isca huaquin, —Un Jesús icoinra huashon nantifi tushu shara un pitiroran, —ishon yoitiro. Ascan futsan yoiquin isca huatiro, —Unfin Jesús icoinra huaquin uncai nami pitiroma. Yonosifin un pitiroquin, —ishon yoitiroquin. ³Man nantifi pitiroquin a yonosi pitirohuunoa shinanchacayamacahuun. Nanscarifi aquin man yonosi pimisiquin a nami pimisihuunoa isca huaquin shinanyamacahuun, —Atofin chaca huaiquin, —ishon yoyamacahuun. Upa Diosin nantifi nanscarafosi noco imani

non ahuun facufo non inon. Ascacun futsaqui tsain chaca huayamacahuun.

⁴Jesús icoinra huafocai maton oinmatima. Upa Dios fustina. Ascacun atoqui tsain chaca huayamacahuun. Upa Diosin ato tapimatiro cayacafi shinanyamaraquimain amaquiri shinancaniquin. Afin ato tapimatiroquin isharanonfo.

⁵—Moisés nocon caifo yononi rato shafatamain non ichanantiroquin Upa Diosihuunoa shinanshquin, —atirififain Jesús icoinra huafoan anori shinancani. Ascfafia atirififain anorisi shinancanima. Shafatifi ichananfo Upahuunoa shinanshcaquin. Ascacun nantifiton maton nomuran man shinain cuscan acahuun. ⁶Atirifoan shinanfo rato shafatamain ichananti shafa shara itiroquin Upa Diosihuunoa shinanshquin. Nanfoanri nocon Ifon Jesús shara hupaicani. Ascan futsafoancai anori shinancanima. —Shafatifi nanscarafosi non Diosihuunoa shinantiro. Ascatari nan ratoran shafatafin non nami pitiroquin. ¡Aicho! Upa Diosin min noco nami inanquin non pinon, —ishon shinantirofo. Nanfoanrifi nocon Ifo Jesús shara hupaicani. Ascashon futsafoan nami piyamaifoan yonofosi pitiro. Nanfoanri noco Ifo Jesús, —¡Aicho! —huatirofo. Nan rafutan Dios shinansharapaicani.

⁷⁻⁸Non niyoshocai nofin non apaiyai cuscan fusti non shinantiroma. Upa Diosin noco amapaiyai cuscan non shinantiro. Nonfin ahuunafuquin. Nanfin nocon Ifonquin. Noncai nofin catontiroma rato shafatamain non naicain. Ascan niyoshon iyamarai non naitianri non nocon Ifonna. Niyoshon non nocon Ifo tanasharapai nocoqui unimanon. Non naitian non nocon Ifo shinantiro non ahuunacoin.

⁹Criston noco nashoni. Maia murrannoashu funicainshquin. Ascan naitian man nia. Non niano yafi non nano nocon Ifo iishquin. ¹⁰¿Ahuus-

cain icoinra huaa futsan ahuun ifo man ipaiyai chaca huayamaraquin shara huairan huashquin? ¿Ahuuscain fut-sahuunoa man shinanchacamun? — Aacai ahuamaran, —ishon man shinan. Ointiaquimayamacahuun nantifi non chipo Dios icano aqui nocoicaicain. Nantian noco yoishquin nonmain shara huayamaraquin non chaca huamisiquin.

¹¹ Nannori Diosin tsain Isafas cununi isca huaquin,

“Iconcoin un niaquin. Iconcoinri nantififain manifoanna anoafu uqui nocoshcani ua ratoconun mai chachishon yoishcani, ‘Diosin, icon min Diosinran,’ ishon nantififain ua yoishcaniquin.”

¹² Ascan nantififain non Upa Diosin ointaifi non amisi cuscan noco yoifain non shinanmisi cuscari noco yoipacushquin.

Futsafo chaca huamayamacahuun

¹³ Ascacun afanan icoinra huafohuunoa tsain chaca huayamacahuun. Noncai ahua chaca huaima noco oincashon arifi chaca huanonfoma.

¹⁴ Jesús uhuun Ifocun un mato yoisharapai. Mun icoinra huacoinna nantifi yonosharafo non nami sharari non picucai noco chaca huaima. Ascafia tsoan ahuun nomuran shinanquin isca huai, —Un na tushu piquin un chaca huatiroran, —ishon shinanquin atocai tushu pitiroma. —Un pishon uhuun nomuranshon un shinanchacatiro, —ishon yoitiro.

¹⁵ Mi futan Jesús icoinra huaton ointaifi a nami min pitiroma piyamacahuun ahuun nomuran shinanchacanoma. A noishocai min ahuun ointaifi min pitiroma. Nocon Ifon Cristo ahuunoashuri nani. Ascan a pitiroma piquin min futsa shinanchacamatiro. Ascacun ahuun ointaifi piyamacahuun Jesús cachiquiri huanonma funoshquima.

¹⁶ Man acai cuscan man shinanra sharacoin. Ascan futsafoan oinquin shinanchacanonfoma shaturiscacahuun matoqui shinanchacanonfoma.

¹⁷ Ascano shinancapon. Non pifain aqui ayafain non huatocai nocon nomuran noco shinansharatiroma. Upa Diosin noco iquinano non ahuun Yoshin Sharahuunshon Jesús cuscara isharacain nocon ointi non unimacointiro. ¹⁸ Nocon Ifo Jesús non yonoshosharaino Upa Diosin nocoqui fasi unimasharatiro. Yorafoanri nocohuunoa shinansharatirofo.

¹⁹ Ascacun icoinra huaa futsafo ya icoinsharacahuun. Jesushuunoa shinanmatanancahuun a cuscara shara iishcaquin. ²⁰ Icoinra huaa futsafoan tushu futsa piyamaiton aton ointaifi a tushu piyamacahuun. Diosin yoini nantifi tushu sharafiacun aton ointaifi piyamacahuun. Man piquin aton nomuran man shinanchacamatiroquin. Ascaquin man ato pacumatiroquin afanan Jesús tananonfoma. ²¹ Ascan icoinra huaa futsafoan shinanquin isca huaquin, —Diosin yononi cuscan un nami pitiroma. Un ahuara pauri ayatiromaran, —ishon shinanquin shatucahuun ato pacumashquima. Ahuarafoan ato pacumatiro shatucahuun pacunonfoma. ²² Ascano afohuunoa man icoinra huaa cuscan marusu maton nomuran shinancahuun. Upa Diosin fustifin man yoitiroquin. Man man tapian nantifi man acai cuscan nanfo sharacoin. Ascafiagai atirifoan tapisharataicanima. Ascano pifain ayafain huaquin mato nomuran man shinantiro man chaca huaa cuscan. Ascafia shatucoianshufin maton nomuran man unimatiroquin. ²³ Ascashon tsoan ahuun nomuran shinanquin isca huai, —Afo piquiraca un chaca huaicati, —anori shinanfiaquin piriaquin chaca huatiro.

Tapishoma shara iyamarai chacafiacun un pia. Ahuara futsan tapishoma aquiraca, —Un chaca huaicati, —ishon shinantiro. Tapishoma aaqi chaca huai.

Mafin man apaiyai cuscan huatama futsan apaiyai cuscan huashocahuun

15¹⁻² Non icoinra huaitin Diosin noco yoini non nantifi tushu pitiro. Ascan icoinra huaforma non ato funaiquimashta yositiro atofu fochishmanantanantama. Nofin non apaiyai cuscan fusti non atiroma. Nan icoinra huaa futsafohuuri non ramapaitiro shinansharanon nocon Ifo non ato tanamasharatiro.³ Shinancapon. Nocon Ifon Cristo afin apaiyai cuscan fusti shinanpaonima. Ascano ahuunoa Diospan tsain cunuquin isca huani, —Upan, un mia nicacoin. Ascan mia chaca hupaicaquin uari roacaniran, —ishon cununi.⁴ Nantifi Diosin tsain cunupacuni noco tapimashquin. Cununiri non icoinra huashon ahuara chaca finonfi-aquin non tunucoinnon. Ahuun tsainhuunshon nocon ointi non fupi huamashon non tapitiro nocon Ifo fu nai muran chipo afu ipashquin afanan ahuara chaca finonshquima.⁵ Upa Diosin non chaca finoanton noco mutsismatiro nocon ointi unimacain nocon Ifon Jesucristo man tanasharaino mato nannorisi shinanmatiro.⁶ Ascano nannorisi shinanquifin non nocon Ifo Jesucristo ahuun Apa nan oi fusti nicatsa non ahuunoa yoisharatiro.

Nan tsain shara Jesucristohuunoa Israelifoma yoini

⁷ Criston nocoqui unimaquin noco iquina ahuun yorafo non inon. Ascan marifi futsafo ya yorahuatanancahuun. Man ascaino Diosihuunoa futsafoan shinansharatiro.⁸ Un mato yoicain Jesucristo mai ano oni Israelifohan aton

oinmati cuscara iquiyoi. Ascano Upa Diosin nocon shunifo yoini cuscan iconcoincun non tapitiro.⁹ Mani futsafoanri icoinra huashon yoishceni isca huaquin, —¡Aicho! Upa Diosin noco huun ramapaiquin ahuun Furun nocoqui nichini. Noco numanon. Upa Dios shararan, —ishon mani futsanfoan yoishceni. Nannori Diosin tsain cununi isca huaquin, “Ascan un mani futsafo mihuunoa un yoisharashquin. ¡Aicho Dios shararan!” ishon un mihuunoa ato yoishquin. “Un mihuunoa shu fanainsharashquiran,”

ishon cununi.¹⁰ Afanan Diosin tsain cunuquin isca huani,

“Mani futsafoan nan Israelifo ya unimanancahuun. Marifi man atofu Diospan yora iishquicai,”

ishon cununi.¹¹ Afanan cununi isca huaquin,

“Mani futsanfoan, nocon Ifohuunoa yoisharacahuun. Nantifi manifoldi anoashu nanscasi aqui fanain ishocahuun,”

ishon cununi.¹² Isaías arifi isca huaquin cununi,

“Nocon shuni Isaías ahuun funapan manifoldi ato iquishquin. Shinanquin isca huashquin, ‘Nan fusti nocon Numamisi inonran,’ ishon yoishquicani,”

ishon Isaías cununi.

¹³ Ascan Upa Diosin fustiton maton nomuran imasharafain mato unimanmatiro man afu ipanon icoinra huashu. Ascano ahuun Yoshin Sharapan ahuun curushhuunshon noco yoini cuscan nantifi noco ashonon, ishon man fasi icoinra huapainon.

¹⁴ Uhuun yoramishtichin, un icoinra huai un oianfin man noinantanancoianquin. Jesushuunoa tapishara futsafoanri ato tapimashquin.¹⁵⁻¹⁶ Ascacun un ranotama afanan afohuunoa un mato shinansharamana. Diosin uhuun rama-

paiquin ua catonni Jesucristo ahuun oinmati un inon nan tsain shara ahu-
 unoa un mato tapimanon. Ascan ua
 nichini un mato Jesús icoinra hua-
 manon. Diospan Yoshin Sharahuunshon
 maton chaca man shatua a cuscara shara
 iishquin. Ascano Upa Diosin matoqui
 unimacoinqui ahuun yorafo mato imai.

¹⁷ Ascacun un fasi unimaicai nocon
 Ifo Jesucristo ua catonni Upa Dios un
 yonoshonon ahuunua uhuun caifomafori
 un ato yoinon. ¹⁸ Criston ahuun cu-
 rushu ua inan uhuun caifomafoan Diosin
 tsain nicacoinon. Un ato yoimisi cus-
 can Upa Dios nicacoinmisifo. Un Cristo
 yonoshona cuscan fusti un tapia. Fut-
 safoan Criston yonoshonahuunua un-
 cai tapiama. ¹⁹ Ahuun Yoshin Shara-
 pan ahuun curushhuunshon tsoan oiny-
 omisima cuscara un ato isma. As-
 can un nan maitio Jerusalén anoshon
 yoifainquin Iliria ano un nantifi nan
 tsain shara Jesucristohuunua yoiquin
 rupian. ²⁰ Uncai futsan Jesushuunua
 yoimisi anori un capaimisima. Tsoan
 Jesushuunua nicayomisima anorifi un
 capaimisi ato tapimashquin. ²¹ Nan-
 nori Isafás Diospan tsain cununi isca
 huaquin,

“Tsoan ahuunua nicayomisima nica-
 caquin tapinonfo,”
 ishon cununi.

Pablonun Roma ano cashquin shinanni

²² Ascacun un mato ari capaimisi.
 Ascafia un mato oin capaifaiin un
 camisima. Ahuara futsan finoanshu un
 nituri niturimisi.

²³ Ascafia natian mun cashcu futsa
 ato Jesushuunua yoiqui anaitian. As-
 can mun itishara mato ari cashquin.
 Un fari ichapa camisima. Nantishon
 tapiquin un mato ari capaimisi. ²⁴ Un
 España ari caquin mato ano rutiacashu
 un matofu tsainshquin. Non yoinonan-

sharanon. Mato anoashu un caiton
 ua tushu inanshcaquin un España ari
 nocosharanon.

²⁵ Ascafia natian un Jerusalén ano
 cayoicai. Jesús icoinra huafoan ua
 nichini icoinra huua futsafo un ato
 pui inanon. ²⁶ Macedonia yafi Acaya
 anoafo unimacain icoinra huua ahuu-
 mafo Jerusalén ano ato pui inanpainifo.
²⁷ Unimacaquin ato inanpaiquin. Yoinifo
 isca huaquin, —Jerusalén anoa Jesushu-
 unoa yoimisisifoan nocoqui nichini. Noco
 nichiamacun na tsain shara non nicacua-
 nama. Ascacun nan non aya cuscan
 nofiri non ato inanpai ato shara huaquin,
 —ishon yoiainfoan. ²⁸ Ascan un ato inan-
 faini un España ari caquin un mato
 oinfaini cai. ²⁹ Mun tapian un mato
 ano nocoshon nocon Ifohuunshon un
 mato yoisharashqui maton nomuran
 man unimanon.

³⁰ Tsain futsari un mato yoipai.
 Man nocon Ifo Jesucristo noishon
 ahuun Yoshin Sharahuunshon uari
 noiquin ua Upa Dios cufishocahuun
 un yonosharashonon ahuaton ua
 nitun huanonma. ³¹ Ua cufishocapun
 Upa Diosin ua cushunon Judea
 anoa icoinra huamafoan ua ahuusca
 huanonfoma. Ua cufishocahuun un
 icoinra huafo Jerusalén anoafo pui
 un ato inainno unimacoincai finonfo.
³² Nan ato inanquin anaititan Upa
 Diosin ua nichiano un unimacoin
 matoqui nocotiro. Ascashu non
 yoinonansharatiro nocon ointi non
 unimatananon. ³³ Diosin nocon
 ointi noco shara huashomisi matofu
 isharanon. Nanscarari ipainon.

Pablon ato tsain shara fomani

16¹⁻² Nocon yorahuan Febe
 Cencrea anoashu matoqui
 nococun shara huacahuun. Nan ainfoan
 nocon Ifo tanasharacoianquin. Cencrea
 anoa icoinra huaafo shara huamisiquin.

Yorafo shara huamisiquin. Uari shara huamisi. Fasi nocon Ifohuunoashu yonosharamisi. Ascacun yopai cuscan ashocahuun.

³ Priscila futan Aquila u futan Jesucristo yonoshosharamisifo. Ua ato yoisharashocahuun. ⁴ Futsafoan ua rutupaiyainfoan nan rafutan ua numaifoan ato rutuqui rashquinifo. Uhuun caifomari Jesús icoinra huafoan ichanancashon yoimisifo isca huaquin, —Priscila yafi Aquila non fasi atohuun noiran, —ishon yoimisifo.

⁵ Ato pushu ano ichananshori ua ato yoisharashocahuun.

Uhuun yorashta Epeneto ua yoishocahuun. Nantofin Asia anoshon Jesús icoinra huaquin tau huani.

⁶ María mato yonosharashomisiri ua yoishocahuun.

⁷ Uhuun yoran rafuri Andrónico yafi Junias ua yoishocahuun. Nan rafu ufu cunu muran iquinifo. Jesús fu rafumisifoan atohuunoa yoisharamisifo. Un Jesucristo icoinra huataima nan rafutan icoinra huaquin tau huanifo.

⁸ Ampliatohuun un noi. Arifi nocon Ifon catonni. Ua yoisharashocahuun.

⁹ Urbano u futan Jesús yonoshomisi nanrifi ua yoisharashocahuun uhuun yorashta Estaquiri ua yoisharashocahuun.

¹⁰ Apeles fasi nocofunu shara. Upa Diosin aqui unimai. Atori Jesús yonoshosharamisi. Nanrifi ua yoisharashocahuun.

Aristóbulo yafi ahuun yorafori ua yoisharashocahuun.

¹¹ Uhuun yorashta Herodión ua yoisharashocahuun.

Narcisco yafi ahuun yorafoan nocon Ifo icoinra huafo atorifi ua yoisharashocahuun.

¹² Trifena yafi Trifosa non nocon yorashta Pérsida ua yoisharashoc-

ahuun. Nan ainfofoan nocon Ifo fasi yonosharashomisifo.

¹³ Nocon Ifoan Ruforifi catonni. Ahua uhuun uhuacoin cuscara. Ua cushusharamisi. Nan rafuri ua yoisharashocahuun.

¹⁴ Asíncrito non Flegonte non Hermes non Patrobas non Hermas non icoinra huaa futsafo atofu icafo ua yoisharashocahuun.

¹⁵ Filólogo non Julia non Nereo yafi ahuun poi non Olimpas non nantifi icoinra huaa futsafo atofu icafori ua yoishosharacahuun.

¹⁶ Nantifi noinancanashu munininantanacahuun. Nantifi Jesús icoinra huafoan ichananshon maifoti anoashon mato yoisharanonfo.

¹⁷ Uhuun yoramishtichin oinfain. Mato fu ichananmisifo futsafoan mato shinanchacamapai afanan Jesushuunoa man nannorisi shinanonma. Non mato cayacafi tapima cuscan nanfoan anorima mato tapimapai. Mato amaqiri shinanmapai afanan icoinra man huanonma. Atomaqui icahuun.

¹⁸ Afoancai nocon Ifo Cristohuunshon yonomisifoma. Nanfoan ahuara fipaiyaifo fustisi shinanfo. Diosin tsain tapisharafoma aton tsain fustihuunshon ato parapaicani ato amaqiri shinanmashcaquin.

¹⁹ Nantifiton nicafo man nocon Ifo tanasharacoincun. Asca un matoqui unimacoinni. Ahuara sharafohuunoa tapicoincahuun. Manmain ahuara chacahuunoa tapiyamapainon. Afohuunoa shinanyamacahuun.

²⁰ Upa Diosin nocon ointi isharamai cuscan nanton samamashta matomaquinoa Satanás anaiticoin mato afanan ahuusca huanonma. Nocon Ifo Jesús mato shara huashopainon.

²¹ Timoteo un futan Jesús yonoshomisiton mato yoisharapai.

Lucio non Jasón non Sosípater nanfo uhuun yorafoan mato yoisharacani.

²²Unquian, Tercio, un natian Pablo cunushoni. Urifi nocon Ifohuunshon mato yoisharapai.

²³Un Gayo pushu muran icun ua cushumisi. Icoinra huaa futsafori ahuun pushu muran ichanamisifo. Afoanri mato yoisharafo. Erasto yorafoan aton pui cushushomisi nocon yorahuan Cuartori mato yoisharapai.

**Ahuun unutaqui
Dioshuunoa yoisharani**

²⁴Nocon Ifo Jesucristo matohuun ramapai. Nansari ipainon. ²⁵⁻²⁶Upan Diosin mato cushusharanon. Un Jesushuunoa mato yoimisi cuscan

afi ahuun curushu mato inantiro man tanasharanon. Ipaoni tsoancai Jesucristohuunoa tapiyopaonifoma. Natian nantififain tapitirofo Upa Diosin nan nipanacaton noco nichini Furun Jesucristohuunoa non yoinon. Ishquiai cuscan Upa Diosin ato yononi cuscan nannoricoin cununifo. Manifoannatifoan Jesús icoinra huafain nicasharanonfo. ²⁷Nocon Diosin fustitofin nantifi tapicoianquin. Nocon Ifon Jesucristohuunshon nantififain ahuunoa yoisharapacunonfo. Nansasi ipanon. Amen. Nanti uhuun tsain unutaqui un mato yoi.

Pablo

Pablonun Corinto Anoafu Cunu Fomani

Pablonun Jesús icoinra huafo Corinto anoafu ato cunu fomani

1¹⁻² Uhuun yoramishtichin un mato cunu fomai. No futan Jesús tanamisi Sóstenes u futan mato cunu fomai. Upan Diosin ua catonpaiquin ua catonni Jesucristo fu rafunon ahuun tsain Jesucristohuunooa un yoifoanfainon. Ascan Jesucristo ua nichini un ahuun tsain shara nantifi manifoti un ato yoifoanfainon. Corinto anoafu manfin Diospan yorafoquin. Man ichananfainmisi Diospan tsain tapisharashquin. Diosin mato catonni Jesucristohuunooashu man ahuun yora sharafo inon. Ascacun un mato cunu fomai. Mato fustisima un futsafori cunushoni. Nocon Ifo Jesucristo Ifo huacun un atorifi na cunu un ato tapimapai. Nan nocon Ifofin aton Iforiquin.

³ Un fasi mato shinain. Diosin matohuun ramapaicain, maton nomuran shinamasharanon. Upa Diosin futan Furun Jesucristo nanfo mato ashoni.

Cristo ahuara sharafo noco ashotiro

⁴ Mun tapian Jesucristo matohuun noiquin ahuarafo mato tapimani ahuun ointi cuscara shara man inon. Nanscara tapishon un Upan Dios cufinquin isca huafafainni, —¡Aicho! Upa Diosin, min Corinto anoafu ahuara sharafo Jesucristohuunshon min ato tapimanan, —ishon un cufifafainni. ⁵ Icon Cristo matofu rafuaino ahuunshon man tapisharacoian. Ascan ahuun shinanhuunshon shafacafi man yorafo Cristohuunooa yoisharatiro. ⁶ Non mato Jesushuunooa yoini cuscan Diosin maton ointi fi-ananan huaa ahuun ointi cuscara shara

man inon. Ascacun man Jesús icoinra huashon man oinmana.

⁷ Ascashu Upa Diosin Yoshin Sharahuunshon mato imapaiyai cuscan man man iquina. Icoinra huaa futsafoan iquina cuscan marifi man man iquina maton nomuran Diosin shinansharamanon. Natianri nocon Ifo man fasi oinpai afanan oaiton. ⁸ Aquí nocoaitian mato cushusharayoshquin. Ahuun curushu mato inanyoshquin man tanasharanon. Ascano nocoshon ratofomain afu ipacanicain yoifain ratofomain omitsiscapanacafo muran focanicaí nantifi yoipacushquin. Nantiantari mato yoishquin isca huaquin, —Un maton chaca soashoni. Ascano tsoancai “Manfofin chacaforan,” mato huatiroma. Ua cuscara shara un mato imairan, —ishon Jesús mato yoishquin. ⁹ Upa Diosin mato catonni Furun nocon Ifo Jesucristo fu man rafunon. Upan noco yoia cuscan man aicain.

Jesús icoinra huaa Corinto anoafuancái anorifosi shinancanima

¹⁰ Uhuun yoramishtichin un mato yoisharapai. Nocon Ifo Jesucriston ua yonoaino un mato yoi nannorifosi man shinanon. Shinan futsacaquima Jesucristo mato shinanmapaiyai cuscan nannorifosi shinancahuun.

¹¹ Uhuun yoramishtichin Cloé ahuun yorafo uqui fucashon ua tapimanafo man fochishmanantananfainaiton. ¹² Atirifoan yoirafo, —Nonfin Pablon tanamisifoquin non shinain cuscafin cayacaficoinquin. Futsafoancai cayacafi shinancanimaran, —ishon man yoia. Futsafoan yoiafari, —Nonfin Apolos tanamisifoquin, —ishon yoiarifono. Futsafoanri, —Nonfin Pedro tanamisifoquin, —ishon yoiarifonori. Futsafoanri, —Nonfin

Cristo tanamisifoquin, —ishon man yoifafaini.

¹³ Uhuun yorafoan ascacai sharama. Cristocai nocon ointi rananya imapaima futsa futsa huaquin non shinanon. Cristo tsain cayacafi fusti. Mato pashcanan huaima futsa futsa huaquin man shinanon. Uncai ihui coyan iquinanhuunoashu mato nashonima. Man unu muran iquimamupacunitian Jesús tanacoishon man futsafo ismashquin chaca shatushon Jesús Ifo huashquin. Uncai tsoa unu muran iquimanama ua tanafain ua ifo huanon.

¹⁴ Un unimai. Uncai tsoa futsa unu muran iquimanama. Crispo yafi Gayo nan rafusi un unu muran iquimani.

¹⁵ Ascacucacai tsoan yoitiroma isca huaquin, —Un unu muran iquimamua Pablo tanamisi ishquiran, —ishoncai tsoan yoitiroma. ¹⁶ ¡Aira! Nantian mun shinain. Estéfanos yafi ahuun yorafori un ato unu muran iquimani. Un shinanfin un tsoa futsa unu muran iquimanamaquin. ¹⁷ Cristocai ua yononima un yorafo unu muran iquimamapacunon. Ua yonoa un ahuunoa tsain shara yoinon. Ufin shinanfaincai un mato yoiama. Ufi shinanfaincai un mato Jesucristo icoinra huamatiroma. Uhuun shinanpan mato yoiaiton nancai Diosin ahuun curushma Jesucristo mato ihui coyan iquinanhuunoashu nashoni maton chaca soashoshquin. Nan tsain fustihuunshon Upa Diosin ahuun curushhuunshon mato numatiro.

Upan Diosin nantifi tapicoian

ahuara futsa apaiquin atiro

Cristohuunshon noco oinmapacumisi

¹⁸ Ascashon Jesús ato nashoni nicanani a icoinra huaamafoan isca shinancani, —¿Tsoanco icoinra huatiro-mun Jesús ihui coyan iquinanqui noco nashoni nocon chaca soashoshquin? Na tsaincai ahuama, —ishon yoicani.

Ascashu nanfo funocoinceni. Omitsis-capanacafo muran focani. Ascan non-fin icoinra huaicai. Ascano noco nimapacunaca non afu ipanon. Diosin ahuun shinanhuunshon Jesús noco nashoni nocon chaca soashoshquin. Ahua futsacai noco nimapacutiroma non afu ipanon.

¹⁹ Diosin tsain cunuquin isca huani, “Nan ua icoinra huamafoan shinancaquin isca huacani, ‘Non tapicoian. Nocon mapon shinansharafain non ahuara huatiro nonfin tapisharaquin,’ ishon shinancani. Ascafashon ahua tapiafoma. Unfin un ato oinmanicain. Afoan shinainfo cuscacai un ato huaimaima. Ipaitsi shinanforan,”

ishon Diosin yoini.

²⁰ Ascan cunu tapisharafiashon Diosin shinain cuscacai huacanima. Nanfofin Diosin atoti oinmaniquin amaqiri shinainfo cuscan. —Nonfin ahumamishti tapisharaquin, —ifiaifoan Diosin ato ismai afoancai ahuashta tapiafoma. ²¹ Tsoanshtacai aton shinanpan Dios onantirofoma. Diosin fustitofin nantifi tapisharacoianquin. Icoinra huamafoan yoiquin isca huafo, —Jesús icoinra huafoan ahuunoa yoirafo fasi amaqiriran, —ishon yoifiafo Diosin nocon chaca soashona non afu nipanon nonfin icoinra huaicai. ²² Ascano uhuun caifo Israelifo iscamisifo, —Diosin nai muranshon noco ahumamishti oinmanaiton Jesushuunoa yoirafo cuscan non icoinra huatiroran, —ishon shinancani. Nan Israelimafori iscamisifo, —Noco Jesucristohuunoa yoirafo cuscacai non tapitiroma. Ascacun non icoinra huatiroma. Nan ahuara non tapiafin non icoinra huatiroquin, —ishon yoimisifo. ²³ Anori ifiainfoanno non isca huamisi, —Jesucriston ihui coyan iquinanqui noco nashoni nocon chaca

soashoshquin, —ishon non yoimisi. Ascafiacun uhuun caifo Israelifoaan yoiquin isca huaafo, —Ihui coyan iquinanqui mastancai nocon Cristo itiromaran, —ishon shinancani. Israelimafoan Cristohuunoa nicacani aqwi cashupaicani, —Tsoancai nanscara icoinra huatiroma. Futsan noco nashoni nocon chaca noco soashoshquin, —ishon yoimisifo. ²⁴ Ascafiainfona nan icoinra huafoti Diosin noco catonni. Israelifo yafi mani futsafo Cristohuunshon nocon chaca soashonano non afu ipanon. Non tapia Cristohuunshon Upa Diosin ahuamamishti huamisi. Ahuun curushhuunshon noco numani. Atofin nantifi tapicoianquin. Cristohuunshon noco numani non afu nipanon. ²⁵ Icoinra huamafoan yoiqui isca huafo, —“Jesucristo noco nashoni,” ishon noco yoifiacaquin fasi amaquiricoi icoinra huafo. Yora mapo sharayatoncai anori shinantiroma, —ishon icoinra huamafoan yoimisifoquin. Anori yoifi-afono Diosin ahuan shinanhuunsho Jesucristo noco nashoni. Diospan ahuan shinancai a icoinra huamafoan aton shinan cuscarama. Atonfin fasi cayacafi shinamisiquin. Icoinra huamafoan yoimisifo isca huaquin, —Non fasi tapicoianran, —ishon yoifiacaquicai icon yoicanima. Fasi amaqiri shinancani. —Non ahuamamishti huatiroran, —ifiamisishacaquin afocai afin numatiroma. Ascafiatan aforicai afin chaca soamutirofoma. Upa Diosin fustiton ahuamamishti huatiro.

²⁶ Uhuun yoramishtichin shinancapon. Diosin mato catoantaima ahuu cuscaramain man iyomisiquin. Man fustirasiton man cunu tapiaino maton muranri niaifo fustirasi. Nan Jesús icoinra huamafoan yoiquin isca huafo, —Afocai ahuamaran, —ishon matohuunoa yoicani. ²⁷ Nanfoan

shinancai man ahuama. Ascafia Diosin mato catoan tapicanashu chipo rafipaitirofo. Shinanfo isca huaquin, —Nonfin ahuamamishti huatiroquin. Jesús icoinra huafon futsa futsa huaquin shinantiroforan, —ishon shinanfo. Ascatari yoirafo isca huaquin, —Non shinantiro cuscacai afoanri shinantirofoma, —ishon yoirafo. Anori shinanfiacashon chipo tapitirofo Dioshuunshon non ahuamamishti huatiro cusan. Tapicanashu rafipaitirofo. ²⁸ Ascafiacatan shinancaquin isca huafo, —Afocai sharamafinquin non ato oinpaamaran, —ishon matohuunoa yoifiainfona Diosin mato catonni. Mancai ahuashtamaran mato huafiaifono Diosin mato catoan man ato oinmanon afocairoconfin ahuamaquin.

²⁹ Ascana tsoanshtacai Diosin ointaifi, —Un tsoa cuscaraman, —ishon yoitiroma. ³⁰ Dioshuunsho Jesucristo ahuan yorafo man inon. Cristohuunshon noco cayacafi tapimafain ahuan ointi cuscara noco imashquin noco nashoni nocon chaca soashoshquin non afu nipanon. ³¹ Ascashon non Jesús icoinra huashucaí non cacapaimisi itiroma. Diosin tsain cunuquin isca huani, —Tsoancai yoitiroma isca huaquin, “Un ahuamamishti un tapiaran,” ishoncai yoitiroma. Anori itamarocon, “¡Aicho! Nocon Ifo Jesús ua numa. Ascacun natian ahuanshon un tapisharatiroran,” —ishon yoitiro.

Cristo ihui coyan iquinanqui mastanifo cuscan yoinifo

2 Uhuun yoramishtichin un matoqui noco funashon Cristohuunshon Upan Diosin mato ashoni cuscan unfin shinansharafaincai un mato yoiama. Diosin ahuan shinan fustihuunshofin un mato yoiakin. Diosin ua shinanmanaino un mato yoiara. ² Un matoqui no-coatima un shinanquin isca huani, —

Uncai ahua futsa ato yoishquima. Jesucristo noco ihui coyan iquinanhuunoashu noco nashoni cuscan. Nanhuunoa fusti un ato yoishquiran, —ishon un shinanni.³ Ascano matoqui oshon uncai shinanqui isca huama, —Unfincoïn un ato cayacafi yoitiroran, —ishoncai un shinanma. Diospan Yoshin Sharahunshon un mato yoiamaquicai un mato cayacafi yoisharacuanama. Un ahuun Yoshin Shara fasi yopacoïain cuscan un mato cayacafi yoinon. Ascano un ratuyamua ua Diosin yonoo cuscan un ayamaishafain marifi man funocuana. Uhuun nomuran un shinanchacatana un ayamai shafain.⁴ Ascashon un mato Jesucristohuunooa yoimisi cuscan uhuun mapon shinanfainsi un mato yoitamaron Diospan Yoshin Sharapan ua shinanmapaiyai cuscan un mato yoiã. Un mato yoiãino ahuun curushhuunshon man icoinra huani maton ointi fiananahuashquin ahuun ointi cuscara iishquin.⁵ Ascã nocofunun shinanpancai man icoinra huama. Diosin shinanhuunshon man icoinra huã.

Diosin Yoshin Sharahunshon non shinansharatiro

⁶ Ascã Diospan tsain nicasharaïfoan man tapiãfo non Diospan Yoshin Sharahunshon cayacaficoïn yoiãiton. Ascã futsafoanri cunu tapisharafiashon Diosin shinain cuscaï tsoã anori shinainma. Aton shinanpancai non mato yoiãma. Aton niaïfofoan shinainfo cuscaricai non mato yoiãma. Ascashufi afo funocaniquin. Nan shinainfo cuscan man cuyoi futsui. Ipaitsi shinancani.⁷ Non mato Diosihuunshon yoimisi cuscan huafaincai tsoan tapiyopaonima. Cristo yorafotihuunoashu nashoshquicai cuscan Diosincai ato tapimayopaonima. Diosin mai onihuataïma shinanquin isca huani, —Uhuun Furumun ato chipo nashoshquin nan a icoinra

huafoti ato nimapacushquin, —ishon shinanyoni.⁸ Un na tsain mato yoiã cuscaï niaïfofoan tapiyopaonima. Ascashon Jesús rutunifo. Tapicashocai tsoan nocon Ifo Jesús Diospan furun sharacoin masta cuanifoma.⁹ Ascã Diospan tsain cunuquin isca huani, “Tsoan Dios noicoïainton ahuamamishti shara ato ashoin, tsoan oinyomisima cuscara sharafo ato ashofain tsoan nicayomisima cuscarari ashofain. Tsoanshta aton nomuran shinanyomisifoma sharashtacoin ato itishara huashoan,”

ishon Diosin tsain cununi.¹⁰ Ascashon non Dios noïaiton ahuun Yoshin Sharapan noco tapimai. Ahuun Yoshin Sharapan nantifi tapicoïan. Upa Diosin shinain cuscan ahuun Yoshin Sharapan tapicoïan.¹¹ Yorafoan aton nomuran shinainfo cuscaï tsoã futsan tapi-tiroma. Arusu fusti tapitiro. Nanscarifai Upa Diosin shinain cuscan ahuun Yoshin Shara fustiton tapicoïan.¹² Nan Upa Diosin ahuun Yoshin Shara nocoqui nichini noco tapimapaiyai cuscan noco tapimanon. Nan icoinra huãmafoan Diosin tsain shinancanima. Ascashori afoan shinain cuscaï Diosin noco tapimanima.

¹³ Ascashon yorafoan noco tapima cuscan non mato yositamarocon Diosin ahuun Yoshin Sharapan nocon nomuran noco tapimana cuscan huafain non mato tapimai. Ahuun tsain iconcoïn fusti. Ascã norifi ahuunshon non mato iconcoïn tapimai.¹⁴ Ascãno ratoranfon Diospan Yoshin Shara atofu iyamaino nanfoanfin Diosin Yoshin Sharapan yoiã cuscan nicacasmacani. Ascashu iscatirofo, “Tsoantsi nan tsain icoinra huaiquin.

Nan tsain fasi amaquiran,” ishon shinancani. Diosin Yoshin Sharapan shinain cuscaï tsoan tapiãma. Nanscacun atofu iyamainocai yoiã cus-

can tapiafoma. Diosin Yoshin Shara fustiton ato tapimatiro. ¹⁵Ascaino ratoran futsa Diosin Yoshin Shara afu icaino Diosin ato tapimapaiyai cuscan tapitirofo. Ratocaimain chaca iyamarai sharaquin Diosin Yoshin Sharanan ato tapimai. Ascafiashu Diosin Yoshin Shara fu rafuamatocai a Jesús icoinra huafo onantiroma. ¹⁶Diosin tsain cunuquin isca huani, —Tsoancai nocon Ifoan ahuun nomuran shinain cuscan huafain tapitiroma. Tsoanricai Dios tapimatiroma, —ishon cununi. Ascafia nan non icoinra huafo Criston shinain cuscan huafainri noco tapimana.

Nonfin Diospan oinmatifoquin

3¹⁻³Facu rama caiantocai tsain tapiama. Yosishon tsain nicatiro. Nanscarifi aquin Jesús rama icoinra huafofin facu rama caian cuscarafokin. Diosin aton Upafiacucai tsoan ahuun tsain atirifi tapisharataima. Manfin nanscarafokin. Rama Jesús ifo huayamafishu man nanscasi aamisiquin. Diosin tsain man man nicafiaicai a yoia cuscan man aama. ¡Ohuashta! Uhuun yoramishtichin manfin Diospan tsain nicamisima cuscarafokin. Rama Jesús icoinra huafo cuscara. Nan Diospan Yoshin Shara ato iquinafoanfin ahuun tsain nicasharatirofo. Mancai ascarafoma. Ascan un mato Diosin tsain yoipaiyai cuscacai atirifi un mato yoitiro. Facushtan shoma fusti aiyotiro namicaipiyotiro. Nanscarifiai atirifi Diosin tsain man nicafiaquicai ahuun tsain man tapiyotiro. Nanscacun un ichapamashta mato yoyotiro. Ahuun tsain futsafori un mato yosipaifia mancai tapisharataima. Ascano mancai itisharama paratama nicashquin. Manfin Diospan Yoshin Shara fu rafuama cuscarafokin. Ascashu futsafo ahuaraya cuscan man ato

fuchipaifain fochishmanantanainsi man ica. Nanscarafocai Diosin tsain nicacanima. Marifi man nanscarafocai. Ascashufin Diospan yorama ointsa man aquin. ⁴Atirifi isca huafo, —Nonfin Pablo tanaquin. Ascan noncai Apolos non tanama, —ishon anori yoiaifoanno. Atirifiton yoicaquin, —Nonfin Apolos tanaquin. Ascan noncai Pablo tanama, —ishon anori yoiafo. Anori yoiquin man ato oinmanaquin nan Diospan Yoshin Shara matoya rafuama cuscarafocai.

⁵Ahuuscaimun atirifiton man isca huaquin, —Non Pablo yafi Apolos tanairan, —man ica. Apolos fucacai un ahuama. Nonfin nocon Ifo Diosin ahuun oinmatiquin. Nocoahuunshonfin man Jesús icoinra huaniquin. Diosin noco catonni noco yonomapaiyai cuscan noco yonoshquin Furunhuunoa man tapinon.

⁶Un mato isca huaquin yosipai. Futsan tauhuaquin shuqui fanatiro. Futsari amaqui orotiro foaisharanon. Ascafiashocai nan rafutan shuqui foaimatiroma. Diosin fustitofin shuqui foaimatiroquin. Nanscarifi aquin un mato tauhuaquin Jesucristo icoinra huamani. Chipa Apolos Cristohuunoa mato yosini ahuun tsain man tanasharacoinon. Non asca huafiaino Diosin fustitofin maton nomuran mato shinansharamatiro ahuun tsain man tanasharacoinafainon.

⁷Ascashon un mato yoiaicuscacai un Apolos fu ahuama. Diosin fustitofin yorafo aton nomuran shinanmasharatiro ahuun tsain tanasharacoinonfo.

⁸Tsoaran futsan tauhuaquin ato Jesús icoinra huamafin nan chipa ato yosiaitori ato tsain nannorifosi ato tanamasharanon. Nan rafutan nannori shinancani. Ato Jesushuunoa yoishcaquin a tanasharanonfo. Ascacufin Diosin a yonoshonaifo cuscan futsa paratama inanfain futsa ichapama

shara inanshquin. Ahuuscamain yonoi aafuquin.

⁹Manfin Diosin ahuun mau cuscaruquin. Ahuun pushu cuscararifi. Mau ifo fustifiano futsafoanrifi yonoshotiromoquin. Aafin maton ifoquin. Nonfofin ahuun yonomatifoquin a futan non mato yonoshotiromo. Nanscarifiai pushu ifo fustifiano futsafoanri yonoshotiromo. Nanscarifiai manfin Diosin ahuun mau cuscaracoquin. Ahuun pushu cuscararifi. Diosin fustifin maton Ifoquin. Nonfofin ahuun yonoshomisiromoquin. Noco yonoa cuscarari non maton nomuran non mato shinansharamatiromo ahuun tsain man tanasharanon.

¹⁰Pushu yonomisiton iquisi quishi mutsisipa shara fitiromo. Chipo futsafoan pushu anaitiromo. Nanscarifiai Diosin ua catonpai ua cashman catonni. Ascashon ua tapimashara cuscan un tau huaquin cayacaficoquin un mato Jesushu-unoa tapimamisi. Un mato tapimayoni cuscan futsanfoan natian nannoricoquinri paratama mato yosicani. Ascaiton futsafo un yoishquin isca huaquin, — ¡Oinfain! Ato cayacaficoquin yosisharacahuun, —ishon un ato yoishquin. ¹¹Un mato yoiquin tau huani cuscacai tsoa futsan mato yositiroma isca huaquin, — Un mato tsain futsa tapimai man Dios fu ipanon, —ishocai mato icon yoiromo. Jesucristo fustitofin noco imasharatiromoquin non Dios fu ipanon.

¹²⁻¹⁵Nocofunun ahuun pushu samamashta coatanfin amurannoashu ichocaintiromoquin naashquima. Ascan ahuun pushu coaino amurannoafu ahuun cuno shara cotiroma. Ascan ahua cunomafo coi anaitimui futsutiromo. Pushu huaquin iquisi quishi curushu shara nichishon ahuun oro amuran nutafain atirifi cuno futsa oshopa sharashta non chicoquin cuno mapash faca facaitsa nanfo fasi

chicoquin ahuun pushuhuun nutatiromo. Ascafia coainocai afo cotiroma. Nanfo cotamarocon nuifutsutiromo. Ascashon pushu huaquin cano mapofain shupa shuhuafoan pishin nutacuano pushu coaino afo cotiromo. Afo munoi futsutiromo.

Nanscarifiai nantifi Jesús icoinra huafo futsafo yonosharaifoanno atirifi yonosharamisima. Jesús icoinra huafofi nantifi noco ichanan huaitian noco ismaicai non ashomisi cuscan ipayamarain cuyoriscatiromoquin. A yonoshosharafocai aton yono funopacunacama. Ascan a yonoshosharafoama aton yono cuyoi anaitimui futsutiromo. Tsoan yonoshoshara ato inansharacointiromo. Asca nan yonoshosharama ato inainma. Afu ipatirofociacanasu man maitsisi yonoi futsucani. Man funocani.

¹⁶¿Asca man tapiamamun man Diosin pushu cuscaracoquin? Ahuun Yoshin Shara matofu ica. ¹⁷Diosin icanocai ahua chaca itiroma. Mato fu ipashquin Diosin mato catonni ahuun yorafo man inon. Nan icoinra huafofi ato imasharai. Ascan futsan ato amaqiri yoiaiton Diosin copiqui ato onaintimashqui.

¹⁸Mafiri paramuyamacahuun. Icoinra huamafoan ahua tapiafo cuscaraca marifi man tapishara. Anori shinanyamacahuun. Icoinra huamafoan shinanqui isca huafo, —Nan Jesús icoinra huafoan fasi amaqiri shinanfo. Fasi nison cuscaracoinforman, —ishon nocohuunoa yoisimifo. Matohuunoa anori shinanfiaifoanno Diosin mato cayacafi shinansharamapaiyai cuscan man shinantiromo.

¹⁹Nan Jesús icoinra huamafoan shinanquin isca huafo, —Non cayacafi shinanshararan, —ifiaifoan Diosin yoi, —Afoancai cayacafi shinansharacanima. Ipaiti shinanforan, —ishon Diosin atohuunoa yoini. Ascashon futsafo shinanmapaicani isca huaquin, —Afoanfin

tapisharaquin, —ishon ato shinanmapai. Ascafia afoancai Dios paratiroma. Ascan aton chanihuunshon ato onaintimai funononfo. ²⁰Diosin tsain cunuqui isca huani, —Nonfin fasi tapisharaquin, —ifiainfoan nocon Ifo Diosin ato onancoinshon yoiquin isca huatiro, —Nafonancai ahua cayacafi shinantirofoma. Ipaitsi shinancaniran, —ishon ato yoitiro.

²¹Ascacun afanan yoiquin isca huayamacahuun, —Na nocofunon nocon tapimamisi ahuun tsain fusti cayacaficoiran, —ishon afanan yoyamacahuun. Diosin ato shinanmayamainocai tsoan cayacafi shinancuanama. Diosihuunshonfin non mato cayacafi yositiroquin. Ascan Diosin mato inan nantifi man yopai cuscan huafain. ²²Un non Apolos non Pedro nonfin Jesushuunoashu ahuun oinmatifoquin ahuun tsain non mato yosishquin man nicoinsharanon. Naashu man afu ipanon. Nantifi ahuunafin matonariquin. Ahuara icai cuscan afohuunshon Diosin mato shara huashoi. Nan chipo icaifori mato shara huashoi. Nantifi Diosin onihuani cuscan mato shara huashoshquin. ²³Manfin Cristonafokin. Cristofin Upa Diosinaquin.

Cristo fu rafumisifoan a yonoshomisifo

4 Ascashon man nocohuunoa shinanquin isca huatiro, —Nafonfin Cristo oinmatifoquin, —ishon nocohuunoa shinancahuun. Tsain Cristohuunoa tsoan nicayomisima cuscara Upa Diosin nocon nomuran noco tapimana cuscan non matori tapimanon. ²Ascan non Cristo oinmatifocun Diosin noco yononi isca huaquin, —Un mato yoiai cuscan huafain ato yoicahuun. Yoyamacaquima, —ishon noco yononi. ³Diosin fustitofin tapicoianquin nan ua yonoa cuscamin un aaqin.

Man uhuunoa shinain cuscacai un shinainma. Futsafoanri uhuunoa shinain cuscacai un shinainma. Unricai tapiama. ⁴Uhuun nomuran un shinain isca huaquin —Ua Diosin yononi cuscan un airan, —ishon un anori shinain cuscan nocon Ifo fustiton ua onancoian. Ascashon yoitiro, —Nan un yonoai cuscacoin airan, —ishon ua yoitiro.

⁵Jesús icoinra huafoti Upan Diosin noco ichanan huataima. Ascan isca huaquin yoyamacahuun —Nacai Diosin yonoa cuscan aimaran, —ishon anori shinanyamacahuun. Oinyocaquin. Nocon Ifoan noco ichanan huaitian nantifi noco puashoshquin nantifiton ointaifi ratofoanmain icoinra huua iyamarai icoinmaran huuaquin. Ascatari nan non ichanaintian nantifiton ointaifi nocon nomuran non shinanmisi cuscan huafain nocon Ifon Jesucristo noco puashoshquin. Afanancai nantiantan non ahuashta fomantiro ishquima. Diosinmain nantifi onancoincufin. Nan non ahuara futsa shara huashopaifain onushta ahuara non chaca huafiamisi nanfori Diosin noco puashoshquin. Nantianri non shara huacun Diosin yoiquin isca huashquin, —¡Aicho! Un mia yonoa cuscan min amisi. Min shara huamisiran, —ishon noco yoishquin.

⁶Uhuun yoramishtichin uhuunoa yafi Apoloshuunoa un mato tapimana ahua futsa man tapinon. Un mato yosipai man iscanonma, —Pablonun noco tapimana cuscan Apoloscai tapiamaran iyamarai Apolos noco tapimana cuscacai Pablonun tapiamaran, —ishon yoyamacahuun. Diosin tsain noco cunushoni non anori yoinonma. Nan tsain nicaquicai non shinanquin isca huatiroma, —Na nocon yosimisi fasi sharacoin. Futsafocai a cuscaramaran, —ishon non shinantiroma. ⁷Diosinfin nantifi noco onihuaniquin. Ascanofin Diosihuunshon non ahuara huatiroquin. Ascasho —

Un acai cuscaai tsoan huatiromaran, —iyamacahuun. Ascashu curafiapaimisi iyamacahuun.

⁸Manfin shinanquin isca huaquin, —Non Diosin tsain tapicoian. Non futsafo fasi finoncoian. Ascan noncai tsoa futsa yopaima noco tapimanon. Nonfin niaifo cuscarafuquin, —ishon man shinan. Iconpainon. Man niaifocoin icaino nantian norifi non matofu niaifo icuana. Asca tsoatsi niaifocoin. Nonmaquian. ⁹Cunu uhuapa cunu acua muran iquimanifo ato rutunonfo. Yora ichapafoan ointaifi rutumatiro oinonfo. Nanscarifiai norifi non Jesús fu rafumisifo non ato cuscarafuquin. Diosin noco yonoa non Jesushuunoashu omitsiscafiaino nantifi yorafo non ahuun oinmati afu nai muran icafoanricai oincani. ¹⁰Nonfin Cristo fu rafumisi. Ascacun noco isca huamisi, —Nanfoanfin fasi amaquiri shinanmisifoquin. Mutsisipamaforan, —ishon nocohuunoa icoinra huamafoan yoimisisifoquin. Asca matohuunoaicai yoiquin asca huamisifoma. Matohuunoaafin man shinanquin isca huaquin, —Non fasi tapicoian. Nofifin non isharamisiquin. Tsoan noco finontitromaran, —ishon maton nomuran man shinanmisiquin. Man non tapia non Jesús maisishocai non ahua huatiroma. Ascafia man shinanquin isca huamisi, —Ufifin un ahua huatiroquin, —ishon man shinanmisiquin.

¹¹Ascan nonfin foniyanan nomicain sahuuti chocacoin sahuufain noco coshafain pushuomacainri Diosin tsain fusti yoi non cahuancaaimisi. Natianri non omitsiscai. ¹²Ascashu non curushcai yonotiro non yopai cuscan ahuun rafanan fiishquin. Ascarifiatan yorafoan noco tsain chaca huafiaiton copitamarocon non isca huamisi, —Jesús mia shara

huapainonran, —ishon non yoimisi. Noco omitsisca huafiafoan non tunuointiro. ¹³Ascashori noco roafoan rahuinmafain non tsain shara ato yoitiro. Ascacun natianri noco chaca huafoquin. —Manfin nan tanama cuscarafuquin, —ishon nocohuunoa yoimisisifoquin.

¹⁴Ascacuai un matoqui cunuai cuscan un mato rafimapaima. Ascan manfin uhuun facuquin cuscarafuquin. Un matohuun fasi noi. Ascacun un mato yoi afanan man amaquiri shinanonma. ¹⁵Yorafoan mato Cristohuunoa tapimatirofia ascan unfin tauhuaquin mato Cristohuunoa tapimaniquin. Ascanofin man Cristo icoinra huaquin. Uhuunoashuri man Diospan facufoquin. Ascatan un maton upa cuscaracoin. Futsafoan Cristohuunoa mato tapimatirofia afocai maton upa cuscara itiro. Urus fustifin un maton upa cuscaracoinquin. ¹⁶Ascacun un mato yoi ua cuscara icahuun. Un Dios tanashara cuscan nanscarifi acahuun. ¹⁷Ascacun un Timoteo matoqui nichicai. Un Timoteo Cristo icoinra huamaquin tau huani. Ascafin nan uhuun facu cuscarafuquin. Un fasi ahuun noi. Nocon Ifo Jesús yonoa cuscaicoian. Un Jesucristo tanai cuscan Timoteon arifi mato tapimashquin man ointiaquimanonma. Nan icoinra huafo pushufoti anofo un ato tapimai cuscan nannori Timoteo matori tapimai.

¹⁸Mun tapia man atirifiton shinanquin isca huua, —Pablonun Timoteo nocoqui nichicai. Ascan afinmain nocoqui musuifin. Ascashufin afincoquin nocoqui oamaran, —ishon man shinan. Manfofin curafiapaimisisifoquin. ¹⁹Anori man shinanfiaino uficoquin samamashta un mato ari caicain. Diosin ua yonoaino un samamashta mato ari cai. Nan un nocoaitian un topicashquin nan curafiapaimisisifoquin Jesús ahuun curushhuun-

shon yoiyamarain afincoimain yoiicanicai. Ipaitsi yoiicanimainquin. ²⁰Diosin nocon Ifo icaino non tsain fustimansi ipaitsi yoitamarocon ahuun curushpan non isharatiro.

²¹Ascashu un nocoaitian ahuun curushpan un matoqui nocoshquin. Ascashofin man ica cuscan huafain un tapitiroquin. Man chaca shatuyamacun Diosihuunshon un mato onaintimatiro. Asca maton chaca man shatucun un matohuun fasi noiquin un oi tsi huasharafain mato yoishquin. Ascans mafi catontiroquin ratocaimain un aquicai. Maton tsainhuunshon onaintimai iyamarai oi tsi huasharafain mato yoishquin.

Jesús icoinra huafiashon chaca huafo

5 Mun nicamisi mafi ranan man fasi chaca huua tanancun. Apa ahuin ahua futsafia afu icacaini. Nanscara chacafocai nan icoinra huamafoan tsoa ascamisima. ²¡Ai timafin! Nan tapiashu man curafiapaimisi. Nan nocofunun mato muranshon chaca huai ahuun rafipaitama, —Non sharacoinran, —man ica. ¿Ahuun rafitama man man tapifiashon nan nocofunun chaca huamisi ahuuscai matofu ichanainton man potamamun?

³⁻⁵Un matofu iyamafiashon un mato fasi shinain. Un anoyamafiano nan nocofunu ahuusca huaimancai mun tapicoian. Un mato anoshon yoiquin isca huacuana, —Afanan ichanainfoanno Jesucristo ahuun shinanhuunshon na nocofunun apa ahuin ahua futsa fu imisi matomaquinoa potacahuun. Ascacucacai afanan Diosin cushuima. Satanás a amapaiyai cuscan aashquin. Man asca huaiton Satanás nan nocofunu omitsiscamatiro. Ascashon omitsiscamaiton mui ahuun chaca shatupaitiro Jesusqui nasoshquin afanan omitsiscashquima.

Ahuun chaca man shatuano ahuun yoshin Jesús fu ipatiroran, —ishon un matofu ishon un mato yoiucana.

⁶Timafin man iscamisi, —Non shararan, —man ifiamisi mancai na nocofunun chaca huamisi mato murannoa man potataima. ¿Man tapiamamun fustiton maton muranshon chaca huaiton man shatamayamaino nanhuunoashu nantifi man chacai futsutiro? ⁷Ascaiton mato anoshon nan nocofunun chaca huai potacahuun. Ascansofin afanan Jesusqui nasotiroquin tanasharacoinshquin. Cristo Upan Diosin ahuun chashoan cahuashara cuscara noco nashoni non afanan chaca huanonma a cuscara shara non inon.

⁸Ascashon non chaca huapaoni cuscaicai afanan non shinantama Cristo ahuun ointi cuscara shara non iishquin. Ahuun tsain shara non shinanon. Futsaqui afanan shinanchacayamafain tsoa afanan parayamafain tsain iconcoim fusti non yoinon.

⁹Ascacun un matoqui cunui tsoa ahuun ahuinma fu icain ainfofo nanscarifiaifono aton funuma fu icaino afanan ascarafu fu rafuyamacahuun. ¹⁰Jesús icoinra huamafohuunoacai un cunuima. Nanfodin Satanás aton ifoquin. Ascashocai aton chaca shatuafoa. Chaca futsa futsatapafo huamisifoquin. Ascashon aton ahuinma fu imisifo. Ainfofo nanscarifiaifoanno aton funuma furi imisifo mafo ichapa fusti fipaifain. Atonama fipaicoimififo yomutsofo non nan diosicoimafodin, —Nocon diosiran, —icafoquin. Noncai atofu pashcanantiroa. Non icoinra huamafo fu pashcananpai nan maitio non cuyofotiro. Icoinra huamafoan acai cuscaicai non ato futan atiroa. Ascafiacun non atofu imisiquin.

¹¹No futan icoinra huafokuunoa un mato cunushoni. Tsoan yoiquin isca huai, —Urifi matofu Jesucristo

ahuun yoraran, —ishon anori yoifiatan ahuun ahuinma fu icaino ainfori nanscarifiaifoanno aton funuma fu icaifoanno mafo ichapa fusti fuchipaifain atonama fipaimisifo icain diosicoinma tanapaifain yora futsa chaca huamisi icain paunmisi icain yomutso icain. Ascarafo fu rafuyamacahuun. —Un Jesús icoinra huairan, —ifiacatan ahuara chaca huariaifo fu rafuyamacahuun.

¹²⁻¹³Nan icoinra huamafo non ato yonotiroma aton chaca shatunonfo. Ascarafocai Diospan yorama. Diosifin ato onaintimashquiin. Ascafiaino Diosin noco yonoa nan icoinra huafo futsan chaca huacun non ato yoitiro aton chaca shatunonfo. Ascashon nan nocofun mato muranshon chaca huamiscun yoicahuun afanan matofu ichananonma ahuun chaca shatucoiaintian matofu afanan ichanantiro.

**Jesús icoinra huaa futsan
mato chaca huaiton nahua
niaifo ano iyoyamacahuun**

6 Ahuuscainun mafi ranan fochishmanantanafiashon man shara huapimacain. Mafi ranan shara huatanantama nan icoinra huamafoan aton niaifo ano man iyopai, —Noco shara huashononran, —ishon. ¡Ai timafin! Ascara cai sharama. ²¿Ascan man tapiamamun nonfin Diospan yorafoquin? ¿Ascashon a futan non nantifi yora manifoti chipo yoishquin ratofoanmain chaca huamisi foquin ascashon ato onaintimanon? ¿Ascan ahuuscain ichapama man fochishmanantanafiashon mafi ranan man shara huatanantromamun? Man nanscasi amisi. ³Man tapiamamun non Dios futan yoishquin ahuun oinmati afu nai muran icafomain chaca huafo iyamarai shara huafoquin. Non asca huainofin nuno mai anofo fasi mimacai yoiquin finatiro ratofomain chacafo yafi sharafo-

quin. Nanscacufin non fochishmanantananshon nofin ranan non arotiroquin.

⁴Ascacufin man fochishmanantanain cuscan mafiranan arosharacahuun. Ascacun ratoran futsafo catoncahuun a mato futan icoinra huama aquima. Nan mato futan icoinra huaa acahuun mato arosharashonon. Nan ahua yamafiacun man catontiro mato arosharashonon. ⁵¡Ohuashta! Un mato rafimapai man afanan ascanonma. ¿Manmun ratoran futsacai shinansharatiro mamun a fochishmanantanainfo cuscan arosharashononfo? ⁶Ascaquimarocan mafi ranan man fochishmanantananshon man shara huatananyamacun. Ascashu ranushumuafoan aton niaifoqui man chani. Nan ahuama ointsa man aa. Nan icoinra huamafoan aton ointaifi man Jesús ahuun yora futsa man chaca huaa. ¡Ai timafin! Nan fasi chacacoin.

⁷Mafin ranan man yoiti huatananshu ranushumua niaifoqui man chani. Man ascafin ato ointaifi man ato oinmana mafi ranan noinantama. Ascashofin man Jesús tanasharamaquin. Man funociaifo. Nan Jesús icoinra huaa futsan mia chaca huacun ranushumua niaifoqui chaniyamacai man puusicama shara icuana. Jesús icoinra huaa futsan ahuara mato onunshon nasocasmaiton man ranushumua niaifoquin chaniyamacain man puusicama shara icuana. Futsan mia chaca huafiacun icoinra huamafoan ointaifi min ahua chaca oinmanama. ⁸Man ascaquifin mafi ranan onunonanquin man chaca huaa. Ascan matofu Diospan yorafi acun man chaca huatanan.

⁹Man tapiamamun a yora chaca huamisifo Diosin niaifo ari itirofoma. Mafiri paramuyamacahuun. Nan maton ahuinma fu man icaino ainfori aton funuma fu icaifoanno diosiyamafiacun fuchipaifain nan nocofununri

afu nocofunu futsa fu icaino nanscarifiai afu ainfo fu futsa fuchinanpaiquin chaca huatananashu ainfofosi afo ranan iquinainfo icain ¹⁰yomutsofo icain aton nama fipaifain paunmisi icain roanmitsamisi icain yoiti huamitsamisi icain ahuun ahuara futsan fiatiashon futsa sutufain. Ascarafocai Dios icano noconacafoma. ¹¹Atirifi man ascafiapaonishacaquin natian Jesucristo yafi Upa Diosin ahuun Yoshin Sharahuunshon maton chaca soashona. Maton chaca soashonano a cuscara shara mato ima. Ascasho ahuun ointi cuscara shara mato ima. Chaca huamisifoma cuscara man inon.

Mafiri chaca huamuyamacahuun

¹²Ascan man yoiaraca isca huaquin, —Cristo uhuun Ifono un apaiyai cuscan un huatiroquin, —ishon man yoiyai. Ai. Nannori. Ahuara sharafoti non huatirofificun ahuara futsacai ua amatiroma nan un acai fusti un atiro. Uncai ahuara futsahuunoashu aton oinmati un ishquima.

¹³Man futsan raca yoiquin isca huaa, —Diosin nocon shaqui onihuashoan non tushu pinon. Ascashon tushuri onihua nocon shaqui muran non huanon, —ishon yoimisifo. Iconfiashu non piyanhuanshuni itiro. Chipo Diosin tushu yafi nocon shaquiri cuyoi. Icon Diosin noco onihuani non afu rafupacunon. Diosicai nocon ahuinma fu non inon ishoncai noco onihuanima. Ainfofori aton funuma fu inon ishoncai ato onihuanima. Ascata Diosin nocon caya noco onihuashoni non afu rafupacunon.

¹⁴Nocon Ifo Jesús man nafiacun Upan Diosin ahuun curushhuunshon funimani. Nanscarifi aquin ahuun curushhuunshon nocori funimashquin.

¹⁵¿Man tapiamamun non Cristo icoinra huashu non ahuun yoracoin? Non Jesús ahuun yora mumacoin cuscara. Ascano non ainfo furoma chotashu

Cristocai afin aca shinantsan non huamatiro. Asca huapayamacahuun. ¹⁶Diospan tsain cunuquin isca huani, —Nocofunu ainfo fu icaino nan rafu yora fusti cuscaracoin, —ishon cununi. ¿Man tapiamamun man ainfo furoma fu icaino afu yora fusti cuscara itiro? Fusti cuscaracoin. ¹⁷Ascafiatan tsoan nocon Ifo fu rafuaino nan rafu fusti cuscara itiro. Diosin Yoshin Shara ahuun shinanpan ahuun nomuran nanumashquin.

¹⁸Ascacun maton ahuinma iyamaraiyainfofori maton funuma fu ipaiyamacahuun. Ascara shinanyamacahuun. Man ascapaiyamai ichoriscatacahuun asca huashquima. Maton ahuinma fu iyamarai maton funuma fu man icun nan chacapanfin. Maton nomuran fucashuni huafain matori omitsiscamatiro. Nan chaca futsafocai un yoiyai cuscarama. Man ascashufin maton yora mumacoin caya yafi maton nomuran maficoïn man chaca huamuaquin.

¹⁹¿Man tapiamamun Diospan Yoshin Shara no fu ica? Nocon cayafi ahuun pushu cuscaracoinquin. Nanno ica. Upa Diosin ahuun Yoshin Shara matoqui nichini. Nan pushu ifofin fusticoïn. Nanscarifiai Diospan Yoshin Shara fusti maton Ifo. Mafincoincai man ifohuamutiroma. Manfin ahuunafoquin. ²⁰Jesucristo mato nashoni maton Ifo iishquin. Ascan manfin ahuunafoquin. Ascano Diosifin nocon Ifoquin. Ascashu nocon caya ahuunari. Nan mato yoiyai cuscan acahuun. Maton cayahuunshon Diosin shara huamacahuun. Man ascaiton futsafoan oincaquifin, —Diosin shararan, —huatirofoquin.

Ahuuscashumain funu fu ahuin isharatirofoquin

7¹⁻²Man ua cunu fumaita ua yocashquin. Ascacun man ua yoca cuscan nanfohuunoa un mato

yoisharapai man tapinon. Nocofunun ainfo fiyamashu shara ifiatiro chaicushosi ainfo fu ipaiquin chaca huatiro. Ascashufin nan nocofunuti ahuiyatiroquin. Ainfori funuyatirofo. Nanscafin sharaquin.

³⁻⁴Nocofunun ainfo fiainocai afanan ahuun caya ahuuna fustima. Ahuun caya ahunnari itiro. Nanscarifiaiainfon fununfiainocai afanan ahuun caya ahuuna fustima. Ahuun caya fununari itiro. Ascataricai ahuinin funu afu ipaiyaitocai funu ranintiroma. Nanscarifiai funu afu ipaiyaitocai ahuinin ranintiroma. ⁵Raninonanyamacahuun. Ascashon man chipo shinanquin isca huatiro, —Natian non Upa Dios cufiyonon. Shafararan non iyoimacai. Chipo afanan non inon, —icashu man unuyotiro. Ascashiashon chai manariyamacahuun. Man ascariaino Satanás mato chaca huamatiroquin. Funu ainfo futsa fu ipaitiro. Nanscarifiai ahuin nocofunu futsa fu ipaiquin chaca huatiroquin.

⁶Un mato, —Fianacahuun, —ishon un mato yoiama. Ascan man fiananpaifin man fianantiroquin. ⁷Ascatan un shinanquin isca huaa. Nantifi nocofunufu ua cuscara ahuiionmafo shara icuana. Diosihuunoashu un ahuiionma isharatiro. Un shinanchacaima. Un unimatiro. Ascafia Diosin ua ima cuscacai atifi ato imama. Futsafoan Diosihuunshon ahuin fitiro. Futsafori ahuiionmafiashu nan un icai cuscari unimatirofo. Non yopai cuscafin Diosin tapiaquin. Ascashon noco inantiro.

⁸Ascatan natian un funuomafo non ahuiionmafo yafi ainfofoan aton funufo atonmaqui namisifoahuonoa un mato ahuara futsa yoipai man tapinon. Ua cuscara icafo shara icuana. Nocofunun afanan ainfo fiyamainocaiyainfoanri afanan funu fiyamashu shara icuana. ⁹Ascafia

man fasi fiananpaimancaiyainfoanri nocofunu fipai fianansharacahuun. Man ahuiionmafiashu fasi ainfo fu man ipai ascaracai sharama. Man ahuiyina shara icuana. Nanscarifiai man funuomafiashu fasi nocofunu fu ipai ascaracai sharama. Ascacufin man funuya shara icuanaquin.

¹⁰⁻¹¹Ascan natian un funuyafuhuonoa yafi ahuiyafori un mato yoisharapai. Ufi un mato yonoima. Nocon Ifohuunshon un mato yonoi isca huaquin, —Ainfoancai funu unutiroma. Fununricai ahuin unutiroma. Ascashon funun unuano afanan futsa fu fianantiroma. Afanan funucoin aqui nasoano shara itiroran, —ishon un mato yoi.

¹²Ascacun natian un mato yoisharapai. Nan na tsain un mato yoiainfocai Diosin ua yonoyamafiacun unfi cayacaficoi shinanfain un mato yoi. Asca man Jesús icoinra huaa futsacai maton ahuinin Jesús Ifo huataiyamafishocai funu potapaima. Ascatan rahuinmafain funu noi. Nanscarifiai fununricai ahuin potatiroma. ¹³Nanscarifiaiainfoan Jesús Ifo huafishocai funun Ifo huayamafiacun ahuin potapaiyainocaiyainfoanri funu potatiroma.

¹⁴Nocofunun icoinra huayamafiano ahuinin icoinra huashon ahuiinhuunshon Diosin nan nocofunu shara huamatiro. Ascashon funun ahuin oinquiraca ahuiunshon Jesús icoinra huatiro. Nanscarifiaiainfoan icoinra huayamafiano funun icoinra huashon funuhuunshori Diosin nan ainfo shara huamatiro. Ahuinin funu oinquiraca a ahuiunshon Jesús icoinra huamatiro. Ascan nan rafu ununainno aton facufoancai Jesús Ifo huaima. Ascafia nan rafu ununanyamaino aton facufoanri icoinra huatiro Diospan facu sharafo iishcaquin.

¹⁵Ascashon nocofunun Jesús icoinra huayamacun ahuinin

icoindra huashon unupaicoinquin unutiro. Capaicoinyaiton ato nitu huayamacahuun. Catanon. Man nitu huaino fucashni tapitiroquin. Nanscarifiyaiainfoan Jesús icoindra huayamacun funun icoindra huashon unupaicoinquin unutiro. Capaicoianton nitu huayamacahuun. Catanon. Man nitu huaino fucashni tapitiro. Diosin noco catonni nocon nomuran ahuashaton fucash huatamarocon nocon ointi noco imasharacointiro. ¹⁶ Ainfoan Jesús icoindra huacun ahuun funu man Jesushuunoa yoiaitocai tapitiroma fununmain icoindra huaicai. Nanscarifiyai funun Jesús icoindra huacun ahuun ahuinin man Jesushuunoa yoiaitocai tapitiroma ahuininmain icoindra huaicai. Ascan mato potapaiyaiton inonquin ishon. Shinanchacayamacahuun.

¹⁷ Nan nocon Ifo Jesús mato yononi cuscan nanscasi acahuun. Jesús mato yonoaitian Upa Diosin mato catonni. Ascantari nan icoindra huafoti Dios fu tsainti pushurasi anoafo yafi maifoti nanscaracoin un ato yononi. ¹⁸ Isca huaquin. Israelifo Diosin ato yononi cuscacoin aton furonanfacufo foshqui rupa shatupacunifo. Ascatan furonanfacu yosishon Jesús Ifo huatan chipo shinanquin isca huaraca, —Natian un Jesús Ifo huaa. Nan fusti un yopai uhuun chaca ua soashonano un ahuun yora iishquin. ¡Ohua! Un foshqui rupa shatumuyama shara icuanaran, —ishon shinaryamacahuun. Asca mia foshqui rupa shatufiani nanscanonquin. Shinanchacayamacahuun. Ascatan man Jesús Ifo huaa man foshqui rupa shatumumisima. Ascashon shinanquin isca huayamacahuun, —Un Israelifo aton shunifoan ato yononi cuscan un yopai. Un foshqui rupa shatumutiro Moisés yononi cuscan un airan, —ishon anori shinaryamacahuun. Mancai ascara yopaima.

¹⁹ Man foshqui rupa shatumisi iyamarai man shatumisima nanscara rafufinquin. Man ascaitocai mato shara huamatiroma. Man asca huayamaricai mato chaca huamatiroma. Nan Israelifo imisi cuscacai man yopaima. Ascaquimarocon Diosin mato yononi cuscan aashu nan fusti man yopacoin.

²⁰ Nan Diosin mato catoaintian man ini cuscan nanscascocoin acahuun. ²¹ Diosin mato catonnitian man futsan ahuun oinmati icashu shinanchacayamacahuun. Ascafiatan maton ifoan mato nichipaiyaino amaquinoashu fotacahuun afanan tsoan oinmati ishquima. ²² Man ratoran futsa Diosin mato catoaintian futsafoan aton oinmati man iquin. Ascafiashucai afanan Satanás maton ifo itiroma mato chaca huamashquin. Atiri mato catoaintian tsoan oinmaticai man imisima. Ascanfiashu natianfin man Jesús ahuun oinmati.

²³ Upa Diosin Furun Jesucristo nichini noco nashonon noco Ifo iishquin. Ascashufin manfin ahuunaquin. Nan fusti maton Ifocoin. Nan fustiton mato cayacafi shinanmatiro. Ascacun futsafoan oinmati iyamacahuun mato yonononfoma. Jesús fusti tanacahuun maton Ifo inon. ²⁴ Ascatan uhuun yoramishtichin Diosin mato catoanno ahuara man yonopaoni cuscan nanscasi acahuun. Upa Diosin mato futan aashquiquin.

²⁵ Ascacun natian afanan ahuara futsan un mato yoipai. Ainfofo nocofunu fu imisifomahuunoa un mato yoi. Un mato yoiai cuscan nocon Ifoan ua yonoyamafiacun uhuun ramapaicain ua yononi cuscan un amisi. Ascashon un mato yoiai cuscan man icoindra huatiro. ²⁶ Natian ahuara ahuuscaraqui noco omitsiscamai. Nanscacun man ahuionmafo ica shara icuana. Icoindra huamafoan noco omitsiscamatirofo. ²⁷ Ascacun ahuinyacashon mato ahuin unuyamacahuun.

Ascafiacatan ahuionmashon ainfo funayamacahuun fipaiquin. Nanscanon.²⁸ Ascafiacaiyainfo finquin man chaca huaima. Ainfori funuya iyamafiamisishacaquin funuyainocai ahua chaca huaima. Ascafia man funuyafo yafi ahuinyafoan manfin fucashni tapiquin. Nan funuomafo yafi ahuionmafo ica finonmafain man ahua futsa finoin. Nanscacun un mato yoisharapai man fucashni tapinonma.

²⁹ Ascatari uhuun yoramishtichin un mato isca huaquin yoipai. Nocon Ifo Jesús otichaima. Nocon Ifo yonoshoquei non chai huaima. Nanscacun non nocon Ifo yonoshosharacoinpai. Ascacun maton ahuin shinanfiaquin Jesuscairocon fasi finonmafain shinancahuun. Nocon Ifo yonoshosharacahuun.³⁰ Ascatari ahua futsafoan mato omitsiscamafiaiton nocon Ifo yonoshoquei unuyamacahuun. Omitsiscacaquima nanscasi unimacai nocon Ifo yonoshosharacahuun. Ahua yopayamafiaquin nocon Ifo cachiquiri huayamacahuun. Yonoshosharacahuun.³¹ Nocon Ifo Jesús otichaima. Ascacun nuno mai anoshon yonosharafaincahuun man yopai cuscan fiishcaquin. Ascashon mafo fustisi shinancaquima. Nocon Ifocairocon finonmafain shinancahuun. Nantifi mai anofo ica cuscan cuyoshquin. Nanscacufin Jesús shinanquin non finatiroquin noco yonopaiyai cuscan ashquin.³²⁻³⁵ Un mato anori yoi maton nomuran ahuaton fucash huanonma. Un mato ahuinyacain funuyayamacahuun huaima. Un mato cayacafi imapai nocon Ifo fusti finacoinquin man shinanfafainon. Ahuaton maton nomuran fucash huanonma.

Un mato yoisharapai. Un mato yoi maton nomuran omitsiscamashquimaquian. Ascaquimarocon

un mato shara huapai Dios fusti man yonoshosharanon. Man ahua futsa shinanonma. Ascashon un mato yoia cuscan nocofunun ahuionmaton ahuun Ifo unimamapaishquin. Ascacun nocofunun ahuinyashon ahuinri unimamapai. Nan ahuinin ahua yopai cuscan huafain fununri nannoricoin shinantiro. Nanscarifi aquin ahuun Ifo fustitocai shinantiroma. Ascashofin ahuun Ifo unimamapaifain nantianri ahuinri unimamapai. Ascacun ainfo funuomaton ahuun Ifo Jesús fusti yonoshosharapai. Ahua futsacai shinainma. Ahuun Ifo fusti tanashquin. Diosin imapaiyai cuscan huafain nan fusti shinainquin. Ascacun ainfon funuyashon ahuun funuri unimamapaiquin ahua futsafori shinantiro ahuun Ifo fustisima.

³⁶ Ascacun nocofunun ainfo fu iyamafiamisishaquin fasi afu ipaiquin. Ascashu afu fianantiro. Ascaquicai chaca huacanima.³⁷ Ascafia nocofunu futsan shinanquin isca huai, —Uhuun Ifo Jesús un yonoshosharapaiyai cuscan un ainfo fishon un huatiroma. Nanscacucacai un ainfon fiimaran, —ishon anori shinanshara. Tsoancai curushcai ascacahuu huama. Afincoi nannori shinansharashu ica.³⁸ Ascacun nan ainfo tsoacai afu iyomisima nan nocofunu finquin shara huua. Ascaquin nan ainfo fucacai tsoa afu iyomisima nocofunu fiananyamafi nanscaquirocofin fasi shara huaquin ahuun Ifo Jesús yonoshoquei finacointiro.

³⁹ Ascacun tsain futsari un mato yoi. Ahuun funu naamanocaiyainfoan funu unutiroma futsa fu fiananshquin. Ascacahuu funu naano futsa fu fuchinanpai afu fianantiro. Ascafiacacun ainfoan Jesús Ifo huashon nocofunun a Ifo huacumacacai fitiroma.⁴⁰ Ascatari un shinanquin isca huua. Funu naano afanan futsa fiyamano nanscarafin fasi sharacoin itiro.

Un shinain cuscan huafain Diosin Yoshin Sharapan a nannoricoin mato yoi.

**Diosicoima onihuacashon
cufipaonifo. Nanscarafu yora ointsa
iyamarai ahuara futsa cuscara
ramihuacashon tushu inanpaonifo.
Nanfohuunoa Pablon ato yosini**

8 Ascatare tsain futsa mato yoinon. Nan nocofunufuan Diosimafiacun yora ointsa iyamarai ahuara futsa cuscara ramihuacashon, —Diosiran, —icashon tushu inanfo. Ascashon piyamaiton oinquin afanan nan tushu ficashon inanmitsamisifo. Ascacun natian un mato yosi nan tushu inanmitsafo non pitiroma iyamarai non pitiroquin. —Nantifi man non tapiaran, —ishon man yoimisi. Ascan nan man icoinra huaa futsafoan man yoiquin isca huamisi, —Unfi tapiaquin. Nan un shinain cuscafin un cayacafi shinainquin, —ishon shinancani. Ascarafo shinancanifin curanfiapaimisi itirofoquin. Ascara non shinancucai noco imasharatiroma. Ascaquimarocon non yorafohuun noishonfin non ato Jesús tanamasharacointiroquin a cuscara shara inonfo.

²Ascan tsoan shinanquin isca huai, —Unfi ahuamamishti tapisharaquin, —ishon anori yoifiaquicai atirifi ahua tapiataima. ³Asca tsoan Dios noicoincunfin nanscarifi aquin Diosin ahuunoa yoitiroquin isca huaquin, —Un na onancoian, Nanfin uhuun yoraquin, —ishon yoitiro.

⁴Ascashofin non Dios noicoiainton noco tapimatiro nan ahuara futsa ramihuacashon tushu inanfo non pitiromainquin. Ascacun man non tapia ahuara futsan ramihuafocai ahuama. Acai Diosincoinma. Nan aafin ramihuafocanai ahua tapiama. Acai ointiya iyamacain ahuun maponricai ahua shinantiro. Nanscarafocai Dios itiro. Diosfin nan fustiquin. ⁵Jesús icoinra huamafoan

yoiquin isca huamisifo, —Dios ichaparasi. Nai murannoa yafi mai ano Dios ichaparan, —ishon yoimisifo. ⁶Anori yoifiamisifocai anorima. Man non tapia nocon Upa Diosifin fustiquin. Futsa yamai. Nantonfin nantifi onihuani. Nocofoi onihuani non ahuun facufo inon. Ascashu non Ifo fustiya. Jesucristo fusti. Futsa yamai. Ahuunshon nantifi onihuani. Ahuunoashu non nitiro.

⁷Nan un mato yoiai cuscan atirifi yorafoan tapiafoma. Shinanfofin nan ahuarafo futsa ramihuafo niaquin. Niamafiacun nannori shinanfo. Nan facushtashon nicainifoannafo nan ahuara futsa ramihuafo nicun. Ascatan isca huaquin shinanfo, —Nan tushu ahuara futsafo ramihuashon inanfo. Ascacun un na tushu piatoraca un Diosicoim chaca huairan, —ishon shinantirofo. Ascatan pishon, —Un chaca huaran, —ishon afi aton nomuran shinanchacatirofo.

⁸Anori shinanfiafonocai non ahuara piatocai Diosimaqui noco imatiroma. Nan tushu ahuara futsafo ramihua-cashon inanfo non piamatocai noco imasharatiroma. Ascatare non piatocai noco chaca huamatiroma. Nanscara rafu.

⁹⁻¹²Ascafia oinfain. Man shinanquiraca isca huaa, —Unfin nantifi pitiroquin. Ahuara ramihuacashon Diosicoimma tushu inanpaiafo nanfori un pitiroquin. Un piquicai un Dios chaca huaima, —ishon man shinan. Man anori shinanfiaino Jesús icoinra huaa futsafoan anori tapiataima. Nan tushu min piaiton oincaquin mihuunri caocani. —Nantori Jesús icoinra huafishon ahuara ramihuacashon tushu inanfo pitiro. Asca urifi un pitiroquin, —ishon shinantiro. Asca man tapifishon man piaiton oinquin arifi man acai cuscan huaquin pishon nanscarifi huatiro. Ascan man pishonfin chipo ahuun nomuran shinantiro isca

huaquin, —¡Ohua! Na tushu mun pishon uhuun Ifo Jesús chaca huaran, —ishon shinantiro. Ascashonfin ahuun nomuran afin shinanchacatiroquin. Man acaiton oinquin arifi aca. Ascacufin matohuun nuuaquin. Man man tapia ahuara ramihuacashon tushu inanfo nan pishocai man chaca huama.

Ascano futsafoancai tapiafoma. Afoan shinanfin nan tushu pishon man chaca huatiroquin. Jesusri ahuunoashu nafian-icun. Ascan matohuunshon shinanchacaquin. Man piamainocai arifi picuanama. Shinanchacacuanama. Man man tapian piquin man chaca huai shafain futsa arifi shinantiro pishon man ahuun noicoianma shinantsain. Ascan man na tushu piyama shara icuana. Pishon man futsa chaca huamatana. Man asca huaquin Cristorifi man chaca huamai. ¹³Ascacufin un tushu futsa piquiraca un Jesús tanamisi futsa un chaca huamatiro uncai na cuscara tushu afanan pinacama futsa chaca huamashquima. Un aca cuscan huaquin un tsoa chaca huamashquima. Un futan Jesús tana futsa un ahuun noiquifin un ahuara chacashta shinanmapaima.

Jesús fu rafumisifoan atirofo cuscan Pablonun ato yosini

9 Dios fustifin uhuun Ifoquin. Nan ua yonopaiyai cuscan un atiro. Tsoanricai aton shinanpan ua yonotiroma. Jesús ua catonni un afu rafumisi inon. Nocon Ifo Jesús oincoinfain nan ua yonoo cuscan un mato yoimisi man Jesucristo icoinra huanon. Ascacun nocon Ifo yonoshonahuunshon man icoinra huaa.

²⁻³Futsafoan shinanquiraca isca huamisifo, —Diosincai Pablo nichinima Jesushuunshon noco tapimanon, —ishon anori raca shinanfo. Anori futsafoan shinanfiamisicuncai man anori shinanyamapainon. Uhuunshon man nocon Ifo icoinra huaa. Ascacun

nantifiton tapitirofo Jesús ua catonni un afu rafunon.

⁴Uhuun yoramishtichin shinancapon. Unrifi Jesús fu rafumisi. Ascan Jesús fu rafumisi futsafoanri amisifo cuscan urifi asca huapaiquifin un acuanaquin. Afoan Jesús icoinra huaa futsafo ato Jesushuunooa yosiaiton nicacaquin cashman ato pimamisifo. ⁵Pedro non nocon Ifo Jesús ahuun chipocufu non atirifi Jesús fu rafumisi futsafoanri ainfo Jesús icoinra huafo fu fianancashon Jesushuunooa ato yoifoanfafainaifono aton ahuinfofori atofu foanscamisifo. ¿Nanfoan ainfo Jesús icoinra huafo fu fianan cuscariyai urifi ainfo Jesús icoinra huaa fu un finantiromamun unfu cahuacacainon? ⁶¿Ascan ahuuscain Bernabé futan non mato yosifain nofin yonocain ahuun rafanan non yopai cuscan non fia? Ascan atirifoan mato yosiquicai ahua yono futsa acanima. Mato yosiaifoan man yopai cuscan ato inancoian. Ascafiacun non yopai cuscacai man noco cashman inanmisima. Nan non ahuara yopaitihuunshon non yonomisi fiishquin.

⁷Un iscara mato tapimapai. Ranushumua futsacai cashman yonomisima. Ahuun caifo cushucufin nan yorafoan aton pushurasihuunooa pui niaifoan ato inanmisiquin. Nanscarifi aqui mau fanamisiton ahuun mau foaisharanon afin ahuun yono pitiroquin. Chashoanfo cushumisitorii ahuun chashoanfoan shoma ayatiro.

⁸Un mato yoiai cuscacai noco funufoan aton tsain fustisima. Nannorifi Diospan tsain cununiquin. ⁹⁻¹⁰Moisés Diospan tsain cunuquin isca huani, —Moipan tarati huayacuquin mato yonosharashotiro. Shuqui roro cuscara machi acuaino atiri ahuun chacafo fuutan potaino shuqui roro cuscara ahuun shaca nanno manitiro. Ascaiton maton moi runushuyamacahuun nanno

tarati huayacuquin acafiri pinon, —ishon cununiquin. ¿Diospan nannori yoiaino moihuunoa fusti yoinimun? Ma. Nan yonoshonaifohuunoa yoifain nocohuunoari yoini. Ratoranfoan mau chituquin shinantiro isca huaquin, —Un chitutan un yopai cuscan fitiroran, —ishon shinantiro.

¹¹ Nanscarifiai non mato Jesushuunoa cashman tapimafainaiton copiquiri non yopai cuscan man noco cashman inantiroquin. ¹² Futsafoan Jesushuunoa mato yosiaiton nicaquin nan yopaifo cuscan man ato inanmisi. Ascacun un mato tau huaquin yosimisi. Nanscacufin nococafin finonmafain iconquin man noco inantiroquin. Man noco inantirofiacuncai non mato ahua yocamisima. Ahuarafoan noco ahuusara huafiaino non tunucoinmisi man Jesushuunoa nicasharanon. Un mato yosiain rafanan un pui fiaitonraca ua afanan nicapaicanimaquin. ¹³ ¿Man tapiamamun nan Dios fu tsainti pushu muran tushu fuafo nan murannoa yonomisifoan nan tushu cashman pimisifo? ¹⁴ Nanscarifi aqui Diosin yononi isca huaquin, —Tsoan uhuun tsain shara futsafo yosiaiton nicaquin nan nicafoan ato pimatiroran, —ishon Diosin yononi.

¹⁵ Diosin ua yononi cuscan urifi mato ahua yocapaiquin un mato yocacuaquin. Nannori Diosin yononifiacun un mato ahuashta yocamisima. Mato Diosin tsain yoifafainfiaquin, —Un ato cunu fomai ua pui inanonforan, —ishoncai un shinanmisima. Ascarifi atacai tsoan yoiquin isca huatiroma, —Pablonun aton pui fianpaiquin ato Jesucristohuunoa yoimisiran, —ishoncai tsoan uhuunoa anori yoitiroma. Ascan tsoan uhuunoa anori yoiaino un naafin shara icuanaquin. Nanscacufin tsoanshtacai uhuunoa anori yoinacama.

¹⁶—Un mato ahua yocatama Jesushuunoa yoimisishaqui un sharaquin, —ishoncai un yoitiroma. Diosin ua catoncun ua yononi un Jesushuunoa yoifafainon. Asca un Jesushuunoa yoifafainyamaidon Diosin ua onaintimatiro. ¹⁷ Un yoiquin isca huafiacun, —Upan Diosin, min Furunhuunoa un yoipairan, —ishon un yoicun Upa Diosin ua inantiroquin. Ascafiagai anorima. Diosifin afi ua catonquin tauhuashon ua yononi Jesushuunoa un yoinon. Nanscacufin nan ua yononi cuscan un aicai.

¹⁸ ¿Asca un Diosin tsain yoimisishomun ahua un fiiquin? Ato yoishocai un ahua ato yocamisima. Ascashoricai un ato yoimisima isca huaquin, —Diosin mato yonocun Jesushuunoa un mato yoifafainaiton un yopai cuscan ua inanforan, —ishoncai un yoimisima. Nonri yoipaiquin un yoisharacuana. Ascafiagai un anori yoipaima. Jesushuunoa yoiquin un tsoa ahua yocamisimashaquin un fasi unimai. Un Diosin tsain yoiquin ahua un mato yocashma un unimai. Ahuun rafananri Diosin fasi uqui unimacoin. Nanscarifi aqui ua unimamafaini.

¹⁹ Uncai tsoa futsan oinmatima. Jesús fustifin uhuun Ifoquin. Uhuun Ifo futsa yamai. Ascafia nantifi yorafo un ato shara huapai ato Jesús icoinra huamashquin. Nanscacufin un nantifi yorafoan aton oinmati cuscaraquin. ²⁰ Uhuun caiffo Israelifo ya un icashu nan icafo cuscan unrifi un ato cuscara ica afoan Jesús icoinra huanonfo. Nocon shuni Moisés nocon caifo yonopaoni cuscaicai natian afanan yonotiromafia Moisés yonopaoni cuscan nicamisifo fu icashuri urifi ato futan Moisés yononi cuscaicai ato Jesús icoinra huamashquin.

²¹ Nanscarifiai nan Moisés yononi cuscan tanafoma fu un atofu icaino un ato cuscararifi un Moisés yononi cuscan

aima ato Jesús icoinra huamashquin. Un nanscafiamisicun Criston ua yononi cuscain un nicasharafaini. Nan fusticai un cachiquiri huatiroma. ²² Jesús icoinra huafo atirifi Jesús yononi cuscacai tsoan tapisharataicanima. —Non Jesús tanasharaino non na cuscarafato atioraman, —ishon shinancani. Ascafiaacucai Jesús noco anori yonoama. Un atofu icashu un ato cuscarari itiro. Jesús noco tapimana cuscan paratama un ato tapimashquin. Ascano ratoran futsafo fu un icashu un aton cuscarari itiro. Nanscashon un ratoran futsafoan uhuunshon Jesús icoinra huashu nipasharacani.

²³ Un asca huaquinfin un ato Jesucristohuunoa tapimasharashquincai. Icoinra huaifono urifi un atofu finacai unimacointiro.

²⁴⁻²⁵ Man man tapiari nan pushcoaifo nannorasi ichofiaquin fustiton shonontiro. Ascaifoanfin yorahuanrasiton ato oiainfono pushcohuaifo ichocani. Shonononpaicani. Nan shonoanfin aqui unimaqui ahuara shara futsa niaifoan inanmisi. Ascacufin nantifi curushcai ichocaniquin futsafo shononpaicani. Tsoa ichoataima tauí afi ranan ichoyofafainafo fuyahuashcaquin sumu ichosharashcaquin atsanashcaquima. Nanscarifi acaquin nocon Ifo Jesús curushcai yonoshosharacahuun. Ahuara chacafo huayamafain Diosin mato yonoama cuscan ayamacahuun Jesús tanaquin fuyahuashcaquin man aqui nocoaitian mato ahuara shara inanshquiquin.

Ascatari nan ichoaifoan niaifoan ato inan cuscan cuyotiro. Asca Diosin noco ahuara inancai cuyopacunacama. ²⁶ Ascacuncai un Jesús yonoshoni un cuparamuima. Un ipaitsi cashman yonoshonima. Pushcohuaifo ichocani shonononpaicani cayacaficoín ichotirofo. Nanscarifiai un cayacafi ica. Uhuun Ifoan ua yonoa cuscacoian

aqui nocosharashquin. ²⁷ Ufin un apaiyai cuscacai un aama. Uhuun Ifoan ua amapaiyai cuscan un aqui. Un tunupaifiaquin un tunuima Jesús tanasharashquin. Un atsanafiaquin un tunuima Jesushuunoa yoifafainquin. Jesús fustitofin ua yonotiroquin. Nanscacufin un futsafo yoifafainicai Jesús Ifo huashon yonosharashononfo. Ascafiafashon Diosin ua yonoa cuscan un ayamai ufiri un funotiro. Un afanan Dios yonoshotiroma. Diosin afanan ua yonomatiroma. Un funopaima. Nanscacufin un apaiyai cuscan un aima. Uhuun Ifoan ua amapaiyai cuscan nan fustisi un aqui.

Israelifoa Dios chaca huapaoni cuscan ayamacahuun

10 Uhuun yoramishtichin tapicahuun. Nocon shunifo Egipto anoashu fonifo. Ascatari Dios atoqui nai coinmahuan cuyama shara fotomapacufoanni tapinonfo atofu ica. Nantifi nocon caifo Israelifo nai coincai cuscan acho fonifo. Diosin nan coinhuunshon ato iyopaiyaiquiri ato iyoni. Ian mahuanun ahuun anu Oshin ano nocotoshinifo. Ascashori nantifi nocon caifo Israelifo Diosin ato ian mahuan nushmancayan rafu ocuma rafu unufiano nan nushmancayan mai muto huatanaino ahuun pocufainifo. ² Moisés ato rucun tanashoni. Nantifi nocon caifo Israelifo Moisés acho fonifo. Nan Moisés icoinra huacashon nantififain tanacoinnifo. Nantianri tauí Moisés aton niaifoanno nantififain tanacoinnifo.

³⁻⁴ Ascatari Diosin nai muranshon ato tushu potashoni nantififain pinonfo. Nannoshori unu yamacoinyaino Moisés toquirininahuan ahuun poquitinin tsacaino unu tsosia sharacoin tohuashu furani nantififain ayanonfo. Ascano Cristo ahuun Yoshin Shara

atofu caino ahuunshon ayanifo. ⁵Asca huafaiainfoanno Upa Diosicai atifiquicai unimanima. Ahuun tsain nicapayamaifoan. Ascashufin tsoan istaipama foanfaincanisi nicayosmacani nai cuyonifoquin. Nan tsoan istaipama ato mai huaquin futsanifo. Diosin ato namaquin cuyoano.

⁶Ascashofin nanfoan chaca fuchipaipaonifoquin. Ascacufin nanfohuuano Diosin Yoshin Sharapan noco tapimaniquin chacafo fuchipaipaonifo cuscan norifi non ascaran fuchipainonma inifo cuscan omitsiscashquima. ⁷Afoan chaca huapaoni cuscan huayamacahuun. Ascashon nanfoanri ahuaara futsan ramihuacashon, —Nocon diosiran, —ishon yoipaonifo. Asca huacashon fuusi huashofain aqui pifain ayafain icashon ahuaara futsan ramihuafoan ointaifi chaca huacaquin pauncain mononifo.

⁸Ascan oinfain. Ato cuscara iyamacahuun. Atirifi aton ahuinma fu inifo. Nanscarifiayainfofori aton funumafo fu inifo. Ascaifoan oinquin Diosin veintitres mil ato namariscatani. Nan shafatan fusti ato namariscatani. ⁹Aton cuscara chaca huayamacahuun. —Diosincai nocoqui funa sinatiroma. Ascan un chaca huafiucacai ua onaintimaimaran, —ishon anori shinanyamacahuun. Nocon shunifoan Dios chaca huariainfoan Diosin afanan tunuyamacaiquin ato onaintimani. Ascashori rono paupafo ato muran nichini nanfoan ato nasano atirifinani. Ascacun ¡Oinfain! Man Dios chaca huariaiton afanan tunuyamacaiquin matori onaintimatiro. ¹⁰Ascashon nanfoanri tsain chipuriaifoan Diosin nai oinmatinin atirifi ato namani. Ascacun oinfain marifi tsain chipuyamacahuun matori onaintimanonma.

¹¹Nan nocon shuni Israelifoan chaca huapaonifo cuscan noco cunushoni norifi non aton cuscara inonma omitsiscashquima. Natianri nocon Ifo Jesús oti chaima. Ascacun non itisharanoncahuun nocon Ifo nocoaitian non aton cuscara chaca inonma.

¹²Asca tsoan shinanquin isca huai, —Uncai aton cuscara chaca huatiroma. Unfi cayacafi fusti itiroquin, —ishon anori shinainno oinfain. Marifi man Jesús tanasharayamaino aton cuscara chaca man itiroquin. ¹³Satanás mato chaca huamapayai cuscaai marus fusti man mumisima. Man muai cuscaro nantifi icoinra huafoan man mumisi. Ascacufin Diosin mato yoimisi cuscan man icoinra huatiroma. Matori cushusharatiroma man chaca huanonma. Satanás mato chaca huamapayai cuscan Dioshuunshon mato atima huatiroma man chaca huanonma. Ascashori Diosin mato tapimai ahuscashomain man chaca huanonma.

¹⁴Ascacufin uhuun yoramishtichin ahuaara futsa ramihuacashon, —Noco diosiran, —icashon icoinra huaifono atomaquinoashu pashcafaintacahuun. ¹⁵Man shinansharatiromanquin un mato yoiai cuscan shinancahuun. Un mato iconma yoiamaraquin iconcoin un mato yoicai. ¹⁶Man man tapia non Diospan tsain nicashquin ichananmisitian nan non ayai cuscan non shinanmisi Jesús noco nashonicun. Nan cucho fustiquino non ayapacumisi. Nantifiton ayaquin non shinantiro Jesús noco nashocain ahuan imi foni non afu nipanon.

Ascacun non yoitiro isca huaquin, —¡Aicho! Upa Diosin, min Furunmun noco nashoni non afu min facufo inonran, —ishon non yoitiro. Nanscarifi aqui misi torupacushon nofi ranan non uhuapamashta inanonanpacumisi Jesucristo ahuan caya nocoahuunshon

mastanifo non afu rafupacunaca shinanshquin. ¹⁷Misi fusti torupacushon nantifiton pimisifo cuscan. Nanscarifiai Cristo fustifiano nantifi icoinra huaafo non ahuun yora fusti cuscara ishquin.

¹⁸Ascashon nocon caifo Israelifohuunoa shinancahuun. Nanfoan aton inafo rutucashon Dios inanmisifo aton chaca soapaiquin. Aton ichananti pushu murannoa yonoshomisifoan nan nami pimisifo. Asca huacanifin nan fusti shinantsa acaniquin. Piyanan Dios cufimisifo. ¹⁹Ascacun un mato yoi nan ahuara futsa ramihuafocai nancai ahuama. ¿Ascatari ahuara futsa ramihuacashon tushu inanfomun ato shara huamatiro? ²⁰Ma. Anorima. Jesús icoinra huamafoan Diosicoin inantamarocon ahuara futsa ramihuacashon tushu inanpaicaquifin yoshin chaca inanpaicaniquin. Nanscacuai un mato yoshin chaca ya imapaima.

²¹Man nocon Ifo Jesús fu rafupaicain a yoshin chacafo fu man rafutiroma. Ascashuri nan rafu man ositiroma. Man Jesús icoinra huafo fu ichanancashon man ato futan ayafain Jesús noco nashoni cuscan shinanshquin. Man asca huatacai nantianri aa Jesús icoinra huamafo fu man ichanantiroma nan yoshin chacafo shinanshquinma. ²²Nocon Ifo Jesús fu rafupaifiatan non yoshin chaca fu rafupai non asca huaquinfin nocon Ifo Jesús non sinamatiroquin. Non asca huaiton noco onaintimatiro. ¿Asca nonmun Jesús curushcai finontromun noco onaintimanonma? Ma. Anorima. Jesús noco onaintimaitian tsoan noco numatiroma.

Jesús icoinra huafo non noicoianshu nan fustiton yonoa cuscan non atiro

²³Icon non Jesús icoinra huashon Diosin noco yononi cuscan nantifi non pitiroquin. Nantifi nami shara

non pitiro. Nan tsain iconfiacun Jesús icoinra huaa futsafoan shinantiro isca huaquin, —Un na cuscara nami pitiromaran, —ishon shinaintonfin ato ointaificali nan cuscara nami non pitiroma ahuara chaca shinanshquima. Non nantifi yorafo Jesusquira shinanmapai. Non ato shinamashara fustipai. ²⁴Ascacun man apaiyai cuscan fusti shinanyamacahuun. Futsafohuunoari shinansharacahuun. Ato shara huafafaincahuun.

²⁵Ratoran futsan mato nami inanpaiyaiton man fitiro piishquin. —¿Rania min fiamun? —ishon yocayamacahuun maton nomuran shinanchacashquinma. Diosin tsain yoia isca huaquin, —Nantifi man pitiroquin, —ishon noco yoini. ²⁶Nocon Ifoan nantifi onihuan. Nantifiri ahuuna nan onihuaniti noco inanpai norifi non unimacai non aya inon.

²⁷Ascan Jesús icoinra huamaton mato pimapaiyaiton a futan picahuun. Ascashon isca huaquin yocayamacahuun, —¿Rania na nami min fiamun? Ahuara ramihuacashon, “Nocon diosiran,” ishon ato nami inanfo. ¿Nan cuscara nami mian pimapaimun? —ishon yocayamacahuun. Man yocayamaiton unimacai pinon.

^{28–29}Ascafiashon ratoran futsafoan mato yoiquin isca huai, —Un na nami mia pimai ahuara ramihuacashon inanqui tau huafo. Un chipo fiaran, —ishon mato yoiaiton nan nami piyamacahuun. Ascashon piquin isca huaquin aton nomuran shinantiro, —¡Ajaa! Na nocofunun Jesús icoinra huafiashon ahuara ramihuacashon aton diosin nan nami inanqui tau huafo man piaran. Asca nanton Jesús tanasharamaran, —ishon ahuun nomuran shinantiro. Marifi man pishonraca ahuun nomuran shinan, —Mun chaca huaran, —ishon. Manfin tapiaquin nanfo non pitiro.

Ascan futsafoancai tapiataicanima. Afoan shinanraca ascaquin non chaca huatiro. ³⁰Man yoiquiraca isca huaa, —Un nantifi tushu pishon Dios, “¡Aichoran!” un huatiroquin. Un asca huacun ahuuscain futsan uhuunoa shinanchacatiromun, —ishon man shinanraca. ³¹Un mato tapimasharanon. Ahuara man pifain ayafain man ahuarashta futsa huai cuscari acafiri futsafoan Diosihuunoa shinansharanonfo.

³²Ascacun man acai cuscan huaquin tosa shinanchacamayamacahuun. Nicon caifo Israelifo iyamarai mani futsafo nantifi Jesucristo icoinra huafo ato shinanchacamayamacahuun matohuunshon nocon Ifohuunoa shinanchacanonfoma. ³³Nanscarifi aquin urifi nantifi yorafo un ato shara huashopai unimanonfo. Ascacuncai un apaiyai cuscan fusti un huaima. Futsafoan apaiyai cuscan un ato huashopai Jesucristo man icoinra huacashon chaca shatucanashu afu ipanonfo.

11 Un Cristo tanai cuscan marifi ufu-tan tanacahuun.

—**Ichananshon non Diosquiri
shinainno nocofunu yafi
ainfomain ahuuscatirofoquin,
—ishon Pablon ato yosini**

²Man ua shinanfaimisicun. Un mato aicho huai. Un mato yosimisi cuscan huafain man nicaafaini. ³Natian uhuun yoramishtichin un ahuara futsa mato shinanmapai man tapinon. Cristofin nantifi yorafoan nocon Ifoquin. Ascatai ainfofoan aton ifofin aton funufoquin. Ascan Cristo ahuun Ifofin Upa Diosiquin. ⁴Ascashu man icoinra huafo ichananmisitian ratoran nocofunun Dios cufifain ahuun tsain yoipaiquin iquisi ahuun maiti pucatiro. Ascashon maton fuyamisi cuscan ismashcaquin Diosihuunoa shinansharaquin. Ascacun

maiti mapacumutan ismatiro Cristo fusti ahuun Ifofocun. Ahuun maiti mapacumuyamacun futsafoan oinquin shinantiro, —Natocai Cristo Ifo huapaima, —ishon shinantirofo.

⁵Ascatai ainfoan Dios cufipai yamarain ahuun tsain yoipaiquin iquisi maiti nutatiro ismashquin nocofunu ahuun ifocun. Ascaqui maton fuyamisi cuscarai ismashcaquin aton funuhuunoa shinansharashcaquin. Ahuun maiti nutancasmaquicai funu ifoancoinnama cuscara itiro. ⁶Nan ainfoan Dios cufipaiquin maiti nutancasmacun nocofunu cuscara marucumutiro. Ascashiashu ainfo marucumuashu rafipaitiro. Nan yorafoan oinquin yoitirofo isca huaquin, —Na ainfoan chaca huaran, —ishon yoitirofo. Ascacufin ainfoan Dios cufipaifain ahuun tsainri yoishquin maiti nutantiroquin.

⁷⁻⁹Ascashiashu nocofunun Dios cufifain ahuun tsain yoishquin maiti nutantiroma. Diosin nocofunu onihuania cuscara inon. Ascacun uhuun yoramishtichin non Dios nicacoianshu ahuun ointi cuscara shara non itiro. Nanscarifiyaiainfofoan aton funu nicacoinkanashu Diosin ointi cuscara sharari itirofoquin. Diosifin nocofunu onihuaquin tauhuaniquin. Chipofin ainfo onihuaniquin. Nocofunuhuunoa Diosin ainfo onihuania. Ainfohuunoacai Diosin nocofunu onihuanima. Nocofunuhuunoa nan ainfo onihuania afu rafucain afu yonosharapacunon unimayanan.

¹⁰Ascacun nocofunufoan ainfo iquintiro. Ainfofoanri aton funu nicacointirofo. Ascashu icoinra huafo ichanainno ainfoan ahuun maiti nutatiro ahuun funu nicacoinshon ismashquin. Man asca hwaiton Diosin oinmati afu nai muran icafoan oinquin yoitiro isca huaquin, —Diosin yononi cuscan nan na ainfoan

ahuun funu nicashara. Nanfin sharacoinquin, —ishon yoitirofo.

¹¹ Ascashon Diosin noco onihuani ainfofo yafi nocofunufu yopanonanonfo. ¹² Diosin tau huaquin nocofunufu ahuun anu Adán onihuani. Ascashon ahuunoari ainfoan ahuun anu Eva onihuani. Ascataannaino ahuunoashu nocofunufu yafi ainfofo cainpacumisiquin. Ascafia nan ainfofo yafi nocofunufori nantifi Diosin onihuani.

¹³ Nanscacun mafin shinacapon iconmainquin. ¿Ainfoan matofu ichananquin Dios cufipaiquin maiti nutashoma Dios cufia ascara sharamun? Ma. Ascaracai sharama. Man ascaquicai ato ifo nocofunufu oinmapaicanima. ¹⁴ Man man tapiari nocofunufu aton fo fasi chai huaa chaca itiro. Nannori nantififain non shinanmisi. Nanscaifin rafipaitiroquin. ¹⁵ Ascataama ainfofoan aton fo chai huafin maiti sharashta ointsa itiroquin. ¹⁶ Un na mato yoiái cuscafin ratoran icoinra huaa futsa ua fochishmapaiyaitocai un ahua futsa yoipaima. Ascashocai non ahua futsa yosimisima. Nan un mato yoimisi cuscari Jesús icoinra huaa futsafo afi ranan ichanancashon nanfori nannori fusti yoimisifoquin.

Nocon Ifoan noco nashonihuunoa shinain ichanancashon nantianri Corinto anofoan ahuafoa chaca huaifo cuscan Pablonun ato yosini afanan ascanonfoma

¹⁷ Ascashon ahua futsari un mato yoipai. Un nica man atirifi ichanansharama. Ascataamarocon man fasi chaca huai. ¹⁸ Futsafo mato anoashu uqui fucashon ua yoiáfo nan man ichanainticai man futsa chaima man tsaopaitiroma. Man ichananshon nocon Ifo Jesús mato nashoni shinanpaifain mafi ranan man noinancasmatanain. Ascacufin un mato huunoa nicai cuscan un shinan atirifiracafin iconquin.

¹⁹ Man shinanraca, —Nan man fochishmanantanquin man tapitiro ratofoanmain cayacafi shinancanicai, —ishon man shinan. ¡Ohuashta! Anorima. Man fasi amaquiricoín shinan. ²⁰ Man ichananshoncai Jesús mato nashoni man shinainma. Nan shinantamarocon man pifain ayafain nan fusti man shinain. ²¹ Un nica man ichananshon pifaquincai a tushuomafoi man pashcashomisima. Ato pashcashotama mafi ranancarocon ayafain ahuun man paunmisifo. ¡Ai timafin! Ascafin fasi chacaquin. ²² Pipaiquin ichananti ano man cataima iquisi maton pushu anoshon piyocahuun. Ascataamarocon Dios fu ichananti pushu ano oshon man ichapa pifafainmisi. Tushuomafo man rafimaiquin. ¡Ai timafin! ¿Unmun mato huunoa yoisharaiquin? Ma. Uncai mato huunoa yoisharatiroma. Nan mato futan icoinra huaa futsafo man chaca huacun. Ascaracai sharamafinquin.

Jesús noco nashoni cuscan pifain ayaquin non shinantiro

^{23–24} Ascataari nocon Ifo Jesús afincoín ua yoini cuscan un afanan mato yoinon. Ua tapimani cuscari un mato tapimai. Nocon Ifon Jesús Judaspan ato achimanataima afu rafumisifo fu ichananni. Ascashon ato futan piquin. Misi finifoantan Apa Diosin yoini isca huaquin, —Upa Diosin min fasi sharacoin. Mirifi min nantifi tapicoian. ¡Aichoran! —huatan misi torupacushon atoti inanni. —Naafin uhuun caya cuscaracoinquin. Unfin mato huunoa chipo naicain. Nan man ichanaintian man misi piati u shinanfafaicahuun, —ato huatan.

²⁵ Ascashon piyaifoan afanan cuchori finifoantan ato ayamapacuquin yoini, —Na ayatihuunoa ahua funa shara un mato yoiquin isca huai. Uhuun imi foyanan un mato huunoa huai nai man

ufu Upa Dios ari ipanon. Nan na non acai cuscan chipo nan man ichanainti ua shinanfafaicahuun, —ishon ato yoini. ²⁶Ascashori man ichanancashon Jesús mato nashoni cuscan shinancahuun. Misi pifain ayafain huacashon nanscasi huacaquin, —Nocon Ifoan noco nashoniran, —ishon shinanfafaicahuun. Nan Jesús afanan oaitian nanscasi huafafaincahuun.

Ahuuscashomain Jesushuunoo nani cuscan shinantaqui non pitiroquin

²⁷Ascacufin nan man ichanain anoshon misi pifain ayaiti ayafiaquicai maton chaca shatucasmafain manri chaca huaa. Nocon Ifoan noco nashoni ahuun caya fasi omitsiscacain imi foyanan noco nashoni. Nanscarafoman tapiflashocai nocon Ifohuunoo shinantamarocon chaca huaquin man afanan nocon Ifo omitsiscamai. ²⁸⁻³²Ratoranfoan misi pifain ayafain nocon Ifo omitsiscacain ato nashoni cuscan shinanyamaiffoan Upa Diosin ato onaintimashquin. Atirifoan nan na un yoia cuscan asca huacani.

Ascashufin nanfo iramannashtafo atirifi isinin icain atirifi onihuanifotifain. Nanscacun man ichanaintian oinfain. Misi pifain man ayataimari ahuaara chaca huashon iquisi Upa Dios yoiyocahuun maton chaca soashonon mato onaintimanonma. Jesús icoinra huamafo Diosin ato onaintimai cuscaicai noco onaintimaima. Afocai ahuun facufoma. Ascacun nanfo ato omitsiscapanacafo muran potashquin. Ascacun nonfin ahuun facufoquin. Nocon Ifoan noco oinmafiquicai noco omitsiscapanacafo muran potatamarocon noco tapimashquin non afanan chaca huanonma. Nanscacufin man ichanaintian Jesús noco nashoni shinanshquin pifain man ayataimari iquisi maton nomuran shinancahuun manmain chaca man fomaincai.

Ahuara chaca huashon shinanquin Upa Dios yoiyocahuun maton chaca mato soashonon. Ascashofin man pifain ayatiro Jesushuunoo shinansharashcaquin.

³³Ascacufin uhuun yoramishtichin man ichananshon Jesús noco nashonihuunoo shinancaquin oinyocaquin atirifi icafofiacun. Ascashon misi torumishti yafi aqui ayaquin man shinantiro Jesús noco nashonihuunoo. ³⁴Ratoran futsa man fonainquin iquisi maton pushu anoshon ichananshoma man piyotiro. Man ascaitocai Diosin mato onaintimaima. Ascacun un matoqui nocoshon ahuaara man fucashniaiton un mato shara huashoshquin.

Diosin Yoshin Sharapan icoinra huafoti ato amatiro ahuunshon icoinra huaafo futsafo shara huanonfo

12 Uhuun yoramishtichin natian ahuaara futsa un afanan mato yoisharapai. Nan non ahuaara Diosin Yoshin Sharahuunshon non atirohuunoo un mato tapimai. Nanfohuunoo iconcoin man tapinon. ²Man manfin tapiaquin Jesús man icoinra huataima ahuaarafo rami huashon man icoinra huapaoni. Ascafia afoancai ahua shinantiroma. Ascashocai ahuashta mato yoitiro. Nanscaquin nanfohuunoo man amaquiri shinanpaoni.

³Ascacun futsafo matoqui nocoshon yoishquin isca huaquin, —Un mato Diosin tsain yoi oaran, —ishon mato yoiquin. ¿Ahuuscashomun man tapitiroquin Diospan Yoshin Sharahuunshon mato yoiyamaquin afin shinanfain mato yoiaiton? Nanscacun un mato tapimai ahuuscashomain man tapitiroquin. Tsoan Jesusqui tsain chaca huafin acai Diospan Yoshin Sharahuunooashu tsainquima. Ascashon, —Jesusfin uhuun Ifoquin, —ishoncai

tsoanshta afin yoitiroma Diosin ahuun Yoshin Shara fustihuunshon yoitiro.

⁴Upa Diosin nan icoinra huafoti ahuun Yoshin Sharapan ato amapaiyai cuscan huaquin futsa futsa huashon arusu fusti noco shinanmatiro non ahuunshon icoinra huaafo futsafo shara huanon. ⁵Ahuunshon futsa futsa huaquin afiaquin nocon Ifo fusti non ashotiro. ⁶Ascano Diosin nan icoinra huafoti nocon ointi muran futsa futsa huaquin noco tapimai ahuunshon non ahuara ashonon. Ascatan nan Diosin fustiton nantifi nocon nomuran noco tapimafafaini non a cuscara inon.

⁷Ascano Diosin Yoshin Sharapan ahuun yono ismatiro isca huaquin. Icoinra huafoti ato amatiro futsafo shara huanonfo. ⁸Futsan Diospan Yoshin Sharahuunshon tsain fasi cayacafi shara noco yoiaino futsanri Diospan Yoshin Sharahuunshon Diosihuunoa noco yoisharaino. ⁹Futsanri Diospan Yoshin Sharahuunshon finonmacafain icoinra huaquin finacoiyainno. Futsanri Diospan Yoshin Shara fustihuunshon yorafo caya huamaino. ¹⁰Futsanri Diospan Yoshin Shara fustihuunshon tsoan atiroma cuscan atiro. Futsanri Diospan Yoshin Shara fustihuunshon nan Diosin yoiyai cuscan noco yoiaino. Futsanri Diospan Yoshin Shara fustihuunshon tapitiro futsamain noco Diospan Yoshin Sharahuunshon yoiyamaraquimain yoshin chachahuunshon noco yoicain. Futsanri Diospan Yoshin Sharahuunshon nan tsain futsanman yoifain nan tsain futsaman yoiyai cuscan huafain futsan nicayoyamafiamisshaqui Diospan Yoshin Sharahuunshon nan tsain yoiyai cuscari noco tapimatiro. ¹¹Nanfofin Diosin Yoshin Sharapan ahuun yonoquin. Nan icoinra huafotifin Diosin Yoshin Sharapan ato amapaiyai

cuscan acaniquin. Naantofin nan noco amapaiyai cuscan noco huamatiroquin.

Nonfin nocon caya fusti cuscaraquin

¹²Nocon caya fustifiano non pashcoi futsua. Nanscarifiai Cristo fustifiano nonfin ahuun yora ichapaquin. ¹³Cristo fustifiano nonfin nantifi ahuun caya cuscarafoquin. Atirifi non Israelifo non mani futsafori non nocofunufaoan aton oinmatifo non atirifi nocofunufaoan tsoa aton ifoma icaino. Nan non Cristo icoinra huafoti Diosin Yoshin Sharapan nocon ointi noco fianananhuano Cristo ahuun yorafo non itiroquin. Non ahuun caya cuscara. Ascafia Diosin Yoshin Sharahuunshon nan icoinra huafoti ahuun cayacoin cuscara noco ima.

¹⁴Nocon caya fustifiano non pashcoi futsua. ¹⁵Ascatari nocon taunca iyoiqui isca huai, —Uncai mucuma. Ascan uncai cayan pashcoi futsutiroma, —anori yoifaino nocon cayahuu nuua. ¹⁶Ascataricai nocon pafinquinin yoiquin isca huai, —Uncai furoma. Ascan uncai cayan pashcoi futsutiroma, —ishon yoifiai nanri nocon cayahuu nua. ¹⁷Nocon cayahuu furo fustiacumun ahuuscashon non nicacuanquin. Nanscarifiai nocon cayahuu pafiqui fustiacumun non ahuuscashon shutucuanquin. ¹⁸Ascafiaicai Diosin noco ascara onihuanima. Nanfin apaiyai cuscan noco onihuaniquin. Ascashon nan noco tuchipaiyaino nocon cayahuu noco tuchiQUI futsani. ¹⁹Nocon caya ahuara fusti ya icainocai shara icuanama. ²⁰Nan iconcoin. Nocon caya fustifiano non pashcoi futsuaquin.

²¹Ascan furoncai mucu isca huatiroma, —Uncai mia yopaima, —ishon yoitiroma. Maponricai tau isca huatiroma, —Uncai mia yopaima, —ishoncai yoitiroma. Ascan isca huaquin shinanyamacahuun, —Un

mia yopaimaran, —ishon futsa yoiyamacahuun. Diosifin nan icoinra huafoti noco noicoinquin. Nanscarifiai nofi ranan non noinanoncahuun.²² Nocon caya pashcoi futsuafu mutsispamafiashu nanfori non fasi yopacoin.²³ Nan raniran futsan non pashcoashta nan non musu huatiro futsafoan oinonfoma. Nanfori non ihuasharatiro rafishquima.

²⁴ Diosin nocon caya noco onihua cuscan huafain fasi non cushushara. Ascashon non yoitiro isca huaquin, — Un na yopacoinran, —ishon. Nanscarifi aqui ratoran Diosin yorafofiacun nacai ahuamaran huafiafo nancaifin Diosin ahuun fasi noiquin. Ascacun atohuunoo non yoisharafain non ato yopacoin.²⁵ —Diosifin noco onihuaniquin nan icoinra huafoti nantifi non yopanonan-coinran, —ishon shinanonfo. Ascacun nantifi non cushunonansharatiroquin isharashquin. Nannorisi shinanshquin. Nantifi cushunonansharacani.²⁶ Nofiri raniran non moshahui chachishon non mutiro nantifi nocon caya non omitsiscai nanhuun non isincointiro. Nanscarifiai Jesús icoinra huaa futsa omitsis-caiton nantifi nan non icoinra huafoan ahuunshon non mutiro afu omitsiscai shinantsa. Nanscarifiai Jesús icoinra huaa futsan futsafori shara huacun non nantifi afu icoinra huafori non afu unimacointiro.

²⁷ Ascashufi non Cristo ahuun caya cuscaracoinquin. Nantifi non ahuun caya pashcoi futsua cuscarari. Nantifi non Diosin yoracoinfo.²⁸ Ascun nantifi nan Jesús icoinra huafoti Upan Diosin noco catonni ahuunshon ahuara futsa futsa huaquin non ashonon. Cristo nuno mai ano niyoatian futsafo catonni afu rafunonfo. Ascashori ato nichini ahuun tsain ato yosifoanfainonfo. Cristo afu rafumisifo catonquin tau huani. Ascashon chipo Diosin

tsain yoimisifo catonfain Diosin tsain tapimamisifo catonfain tsoan oinyomisima cuscara ahuunshon atirofo catonfain Jesushuunshon isinincaifori cayahuamafain futsafo ashofafainmisifo catonfain futsafo yonosharamatirofori catonfain futsafoan nan tsain futsaman ahuun Yoshin Sharahuunshon yoitirofo nanfori Diosin ato catonni. Nantifi catoan ahuunshon yorafo ashonsharanonfo.

²⁹ Diosincai atifi noco yonoama non ascarasi huanon. Nantificai yonoama ahuun tsain yoifoanfainnonfo. Ascashoricai nantifi yonoama tsoan oinyomisima cuscara ahuunshon atirofo.³⁰ Nantificai yonoama Jesushuunshon isinincaifo cayahuamanonfo. Nantificai yonoama nan tsain futsaman ahuun Yoshin Sharahuunshon yoinon. Nantificai yonoama nan tsain futsaman noco tapimanonfo.³¹ Ascacun Diosin mato imapaiyai cuscan huafain nan icoinra huaa futsafo man shara huafafainon. Diosin Yoshin Sharapan noco amapaiyai cuscan nanfo fuchipaicahuun. Ascun nanfo sharafia un ahuara fasi shara finacaia natian un mato yoinon. Ua nicas-haracahuun fasi shara finacaia Diosin noco imapaiyai cuscan huafain un mato tapimanon.

Non Diosinhuunshon futsafo noiafin nancai shara finacaiquin

13 Un mani futsafoan tsainman yoifain Diospan oinmati afu nai muran icafoan yoia huaquin un yoifiatiro Diosihuunshon un futsafo noiamashucai un ahuama. Ascashu uhuun tsain achacoin nicatsa itiro. Futsafo fucashni huai cuscara itiro.² Diosin futsafo yoipaiyai cuscan un tapicoinshon yorafoan ahuara tapipaifiaquicai tsoan tapiamaifoan un tapishon un fasi Dios icoinra huaquin finacoian un na machi shucucaitahuun

un huaino shucucaitiro un asca huafiashocai un futsafo noiyamainocai nancai uhuuna ahuama. ³Nantifi un aya cuscan un ahuuomafo un inancoinfiaquicai un nan futsafo noiamashu nancai uhuuna ahuama. Un Diospan tsain shara yoiaiton nanscacun nicacasmacaquin ua coaifoanno un naafiashucai un futsafo noiyamashu nancai uhuuna ahuama. Un ipaitsi natiro.

⁴Non futsafohuun noicoincal non funatiroma. Non ahuun ramapaitiro. Ascatan futsafohuun non noircal non futsafo shutiacufoanpaitiashu non sinamisi iyamacain cacapaimisi iyamacain nonricai curafiapaimisi itiroma. ⁵Non futsafohuun noicoinquircal futsafoan ahuara huapaifiaiton non ato shutiacufoantiro. Ascaquicai non ato rafimapaima. Ascashoricai nofin apaiyai cuscan fusti non shinantiro. Fushnuicamitsamisi iyamacain futsan noco chaca huafiacun non shinanfafaityroma. Afo shinantamarocon rahuinmafain non ahuun noitiro. ⁶Non futsafohuun noicai ahuara chaca oin non unimatiroma. Ahuara icon shara nicai non unimacointiro. ⁷Ascatan ahuara ahuuscarafaino Dios noiquicai nocon nomuran non shinanchacatiroma. Ascashon non tunucointiro. Futsahuun noicoinquicai ahuunoa ahuara chaca nicafiaquin non icoinra huatiroma. Futsafohuunoa chaca nicafishon non tapiyoshomacai non icoinra huayotiroma. —Ascayamapainonran, —ishon non shinantiro ahuun noiquin. Non Diosin noicoinquicai ahuara ahuuscarafaiton non tunucointiro.

⁸Noinain unupacunacama. Ascafianocai Diosin tsain yoimisifoancai ratoran shafatan afanan tsoan yoishcanima. Ascashori tsoancain ascara tsain nicayomisima afanan yoipacunacama. Tapimamisifoanri afanan noco tapimapunacama.

Nanfocai nocon Ifo oaitian non afanan yopashquima. ⁹Ascacun natian Diosin noco tapimapaiyai cuscacai atirifi non tapisharataima. Diosin tsain noco yoimisifoan tapiafo cuscan noco tapimasharafiatirocail atirifi tapiafoma. ¹⁰Ascaino Jesucristo nocoaitian non a cuscara shara iishquin. Afifin nantifi tapiaquin. Afin tapia cuscan nocori tapimashquin. Ascaino ahuara futsa futsa huaquin Diospan yorafoan noco ashomisi cuscan non afanan yopapunacama. Man nanfo cuyoshquin.

¹¹Ascaino un facuashu uhuun tsain facu tsain cuscara iyopaoni. Facufoan mutiro cuscan unrifi un muyopaoni. Facufoan shinantiro cuscan unrifi un shinantiro. Ascafia un yosinishaquin facufoan shinantirofo cuscan un afanan shinainma. Facufoan ichapama tapia. Ascaino un nocofunuaityian facufo itiro cuscan un afanan aama. Natian nocofunuaityian shinain cuscan un aaqui. Facufo itiro cuscan mun cachiquiri huacoinna. ¹²Fuisiti matacoiannocai nocon fuso cuscaracoin non ointiro. Nanscarifiail natian Jesús icai cuscacoincail non onancoiantaima. Chipa aqui nocoshon ahuun fusocoin non oincointiro. Nantiantari aficoimain ua onancoiainfoin urifi un onancoinyaino.

¹³Ascashon non Dios icoinra huai cuscacai cuyopacunacama. A icoinra huashucail non amaqui ipanacama. Nanricail cuyopacunacama. Nanrafu sharacoinfia Dioshuunshon non futsafo noicoiainno nancaifin shara finacaiquin. Nanricail cuyopacunacama.

Diosin Yoshin Sharapan noco yonopaiyai cuscan Pablonun yoini

14 Ascaino Diosin noco noiail cuscan huafairi futsafohuun noifafaincahuun. Nancairocon fuchipaicahuun as-

cashcaquin. Ascashon Diosin Yoshin Sharapan futsa futsa huaquin mato yonopaiyai cuscan nanfori fuchipaicahuun. Diospan Yoshin Sharahuunshon nan Diosin yoia cuscan fasi fuchipaicahuun iconra huaa futsafo yoishcaquin. ²Ascatan futsan tsain futsaman yoiaitocai nicatirofoma. Dios fustitofin nicatiroquin. Diosin Yoshin Sharahuunshon yoifiaitocai tosa futsan nicatiroma. ³Ascashon tsoan Diosihuunshon ahuun tsain shara yoiquin noco tapimasharashon Jesús cuscara noco imafain nocon ointiri noco shara huashotiro ahuuscarafiaquin nocon ointi non unimacointiro. ⁴Ratoranfoan tsain futsaman yoiquin afiri nicamutiro Diosin imapaiyai cuscan aquin. Ascafia nan ratoran futsan Diosihuunshon ahuun tsain yoiaiton nantifi Jesús iconra huafoan nicatirofo Diosin noco yoipaiyai cuscan nicasharashu Jesús cuscara shara itirofo. ⁵Manmain nantifiton nan tsain futsaman Diospan Yoshin Sharahuunshon man yoipainon. Nanscara sharafishu tsoan Diosin tsain mato tapimasharai nancain fasi shara finacaiquin. Nantifiman man ascapainon. Ratoran futsa nan tsain futsaman yoiaiton. Ascashon ichananshon futsan maton tsain futsaman yoifiaitocai man nicatiroma futsan mato yoiyamaiton. Acai ahuama. Ascfiaiton yoia cuscan futsan tapimaino nantifi unimatirofo. Diosihuunoa shinancani.

⁶Ascacun uhuun yoramishtichin un matoqui nocoshon tsain futsaman un mato yoiai cuscan man nicayamacai acai matona ahua itiroma. Ascacun Diosihuunshon un mato tsaincoinman un mato yoi Diosin mato yoipaiyai cuscan man nicanon. Maton tsainman un mato tapimanaiton man nicacointiro. Ascashon Diosin mato imapaiyai cuscan man tapitiro. ⁷Un iscara mato tapimai. Manuti amaquiri manuaiton

non nicasharatiroma ratocaimain shafacafi manuicai. ⁸Ranushumua futsan aton cushumisiton ahuun manuti manutiro ato chani huaqui afu ranushumua futsafo itisharanonfo ato noicasmaifoan ato rutunonfoma. Ascafia manuti cayacafi manuyamaiton tsoancai tapitiroma itisharashcaquin ato rutunonfoma. ⁹¿Nanscarifi aqui nan tsain futsaman man futsafo yoiaino ahuuscashotsi man yoiai cuscan tapitirofo? Man ascara tsain yoiqui ipaitsi man ato yoi. ¹⁰Icon nan maitio tsain futsa futsatapafo. Nantifi tsain shara. Ascafia nan aton caifoansi aton tsain nicatiro. ¹¹Ascacun uhuun caifoan ua tsain futsaman yoiaitocai un tapitiroma. Nan uhuun caifoma cuscaracoin itiro. Un ahuun tsain nicayamaino un ahuun caifoma cuscaracoin itiro. ¹²Ascacun Diosin Yoshin Sharahuunshon man futsa futsa huaquin mato yonopaiyai cuscan nanfo man fasi fuchipai. Man fuchipaiyaifo nan man Diosin Yoshin Sharahuunshon iconra huafo aton ointi fupi huamatiro Jesús fasi tanasharanonfo. Nan cuscarafasi fuchipaicahuun Dios yonosharashoshcaquin.

¹³Ascacufin nan tsain futsaman yoiquin Upa Dios cufihuun man yoiai cuscan mafiri tapifain ichananshon ato tapimashquin shafacafi nicasharanonfo. ¹⁴Ascashon un Upa Dios cufinquin ahuun Yoshin Sharahuunshon nan tsain futsaman uhuun nomuran cufiaiquicai un cufia cuscan un tapitiroma.

¹⁵¿Ascacun unmun ahuuscaicain? Un isca huai. Un tsain futsaman Diospan Yoshin Sharahuunshon Upa cufifain nan tsain nantifiton nicanonfo un cufiaiton. Ascatari un nan tsain futsaman Diospan Yoshin Sharahuunshon urifi fanainshquin. Nan tsain nantifiton nicatirofoanri un fanainshquin. ¹⁶Man Diospan Yoshin Sharahuunshon nan tsain fut-

saman Upa Diosihuunoa man yoifiaiton ahuuscashocai matofu ichananfoan yoiquin, —Ascapainon, —mato huatirofoma nicatsi huacani. ¹⁷ Man Dios, —¡Aichoran! —huasharafiaquicai futsanfo nicasharatirofoma aton ointi unimashquin. Maton tsaintsi nicaifoan.

¹⁸ Uhuun yoramishtichin un Upa Dios aicho huai. Ascashon un yoi, —Upa Diosin, min Yoshin Sharahuunshon tsain futsaman un yoia cuscan atirifiton yoifiaquicai asca huafoa cuscan. Un minhuunshon tsain futsaman un ato finoinnifoan yoimisi, —ishon un Dios yoimisi. ¹⁹ Ascafia icoinra huaa futsafoya ichananshon un aton tsainman ichapamaton ato yoiaiton nicatirofo. Nanscafin sharaquin. Un ato ichapa tsain futsaman yoiaitocai nicatirofoma. Nanscaquin nicafo.

²⁰ Uhuun yoramishtichin, un mato tapimai cuscan tapisharacahuun. Facushtan ahua tapisharataima. Ascashon nanfoan shinain cuscan marifi shinanyamacahuun. Cayacafi shinanchahuun. Ascafia iyoafoan shinanchacatiro cuscaicai facufoan shinanchacayotiroma. Nanscashu ato cuscara icahuun. Chaca tapipaiyacahuun. ²¹ Isafas Diospan tsain cununi isca huaquin,

“Nan Israelifo un ato yoifiaiton ua nicacasmamisifo. Ascacun un ato ipaitsicoin yoimisi. Ascaifoan caifo futsafo un ato muran nichishquin uhuun tsain ato yoishquin nicanonfo. Ato yoifiaifoancai ua nicayoshcanimaran,”

ishon Diosin yoini cuscan Isaías aqui cununi.

²² Ascashon tsainmansicai a icoinra huaafo non ato yoima Diosin ahumamishti huatiro cuscan tapinonfo. Ascatarocon icoinra huamafo non ato yoitiro Diosin ahumamishti huatiro cuscan huafain tapinonfo. Ascatan ichanancashon futsan aton

tsainman Diosin tsain yoiaino nanfin man icoinra huafoansi Diospan Yoshin Sharahuunshon nicasharatirofoquin. Ascan nan icoinra huamafoancai tsoan nicasharataicanima. ²³ Ascashu ichanancanashu tsain futsa futsatapafoan tsaincafo man icoinra huamafo iyamarai man tapia cuscan tapiataifoan matofu ichanancashon shinantirofo isca huaquin, —¡Ohuashta! Na yorafo nisoncoinforman, —ishon yoitirofo.

²⁴⁻²⁵ Ascafiaquin man ichananshon mato tsainman Diosin tsain yoipacuaino icoinra huaama futsan iyamarai man tapia cuscan tapiataifoanmari mato nicacashon shinantirofo isca huaquin. —¡Ohua! Urifi Diosin tsain cununi cuscaicai un aama. Diosin nantifi tapicoian. Nocon nomuran non ahuarashta fomanpaimisi nanfori Diosin man tapian. Chipu ua puashoshquran, —ishon shinantirofo. Ascashon shinainfono aton nomuran nocotiro. Nannori shinancatan ratoconun mai chachitiro Upa Dios cufinquin isca huashquin, —Upa Diosin min fasi sharacoin. Min na icoinra huafo fu ica. Urifi mia yopacoinran, —ishon cufitiro.

Man ichanainno nicatimayamacahuun

²⁶ Uhuun yoramishtichin, un mato tapimapai isca huaquin. Man ichanainno futsan mato fanainmafain futsan mato Diosin tsain yosifain futsan Diosin ahuun nomuran yoia cuscan mato tapimafain futsari Diospan Yoshin Sharahuunshon tsain futsaman mato yoia cuscan huafain futsanri Diospan Yoshin Sharahuunshon mato tapimatiro a yoia cuscan huafain. Ascashon nan un yoi ai cuscan non nansca huapaitiro nantifi nan ichananfoanno Diosin mato amapaiyai cuscan man huanon. Ascashu a cuscaracoin man inon. ²⁷ Man ichanainno yora rafutan iyamarai rafu non fusti-

fain tsain futsaman mato yoitirofo. Ascaiton nan futsan maton tsain futsan man yoia cuscan huafain futsan maton tsainman mato shafacafi tapimatiro Diosin mato yoipaiyai cuscan man nicasharanon. ²⁸Nan tsain futsaman man yoipaiqui tsoan mato tapimayamaino a ichananfo murannoashu man pusitiro. Ascatan maton pushu anoashu marus fusti nan tsain futsaman man Upa Dios fu tsaintiro.

²⁹Ichananshon rafutan iyamarai rafu non fustifain Diosin aton nomuran shinanmanai cuscan huaquin mato yoitirofo. A yoiai cuscan nicashon nan Jesús icoinra huafoan shinantirofo isca huaquin, —Diospan Yoshin Sharahuunshon noco yoiaran, —ishon shinaryamaraquin. —Afin shinanfain noco yoia. Diosicai anori noco yoiamaran, —ishon shinantirofo. ³⁰Ascashon futsan mato Diosin tsain yoiaino futsan ahuun nomuran Diospan Yoshin Shara nanumanaino futsan yoiai cuscan tsaoshon nicayotiro. Ascan na yoiquin tau huatan anaititiro futsan acafiri a ichananfo yoinon.

³¹Asca huacashon fustirasiton Diosin Yoshin Sharapan ato shinanmanai cuscan futsan yoicun futsan yoicun huapatirofo. Nan ichananfoan nantififain tapinonfo. Ascashon aton ointi fupuanonfo. ³²Nan Diosin tsain yoimisiton ato yoipaiyai cuscan man ahuun tsain yoiquin anaitishon afin ahuun nomuran shinantiro isca huaquin, —Natian un ununon. Futsanri Diosin tsain yoipaiquin un manatiro. Aton yoiqui anaitiano unrifi ato yoitiroran, —ishon ahuun nomuran shinantiro. ³³Ascashu ichanainfo anoshon futsan ahuun tsain chai yoiriaino futsa mato tsain futsaman yoiai cuscan tsoancai mato tapimaima ipaitsi aton ointi fucash huacani. Ascaracai Diosin fuchipaima. Diosin

fuchipai nan ichananfo anoshon aton ointi unimanonfo.

³⁴Ascatan ahuara futsari un mato tapimasharapai. Nantifi icoinra huaa futsafo ichanainfono ainfofo tsaintiroma. Diospan tsain cununi isca huaquin. Nan ichanainfotiancai Diospan tsain futsan yoiaiocaiyainfofo pusitiro. Tsaintamarocon Diosin tsain yoimisiton yoiai cuscan nicacointiro nan yoiai cuscan aashquin. ³⁵Nan nica cuscahuunoa yocapaiquin manatiro nan aton pushu ano nocoshon funu yocatiro funun tapimanon. Ascacun ¡Ai timafin! Man ichanaintian man tsaincacai sharama.

³⁶¿Nantifi icoinra huaa futsanfoan ichanancashon amisi cuscan marifi man asca huapaimamun? ¿Man shinanmun Upa Diosin yoipaiyai cuscan mato fusti tau huaquin tapimani? ¿Ascan manraca marus fusti Diosin tsain mato fusti tapimanamun? Ma. Ascashon amaquiri shinaryamacahuun. ³⁷Ratoranfo man futsan yoiquin man isca huatiro, —Non Diospan tsain yoimisi ascayamarai non Diospan Yoshin Sharahuunshon icoinra huaafo non ahuara ashotiroran, —man icun. Nanscarifi aquin man tapitiro nan nafo un mato cunushonai cuscan nocon Ifoan mato yonoi. ³⁸Tsoan anori shinanpaiyamai afu ipaiyamacahuun.

³⁹Ascacufin, uhuun yoramishtichin man ichanain anoshon Diosin tsain ato yoipaicahuun. Nan fasi shara. Ascafia futsan tsain futsaman Diospan Yoshin Sharahuunshon mato yoipaiyaiton shatumayamacahuun. ⁴⁰Ascatan man ichanannoshon futsan yoicun futsan yoicun huacahuun man yoiai cuscan nicasharanonfo. Man asca huaino ato ointi fucash huatirofoma.

Cristo nafianishaquin afanan funini

15¹⁻²Uhuun yoramishtichin natian tsain shara Jesushuunoa un mato yoimisi cuscan un afanan mato shinan-

mapai. Un mato Jesushuunoa yoiaino man icoinra huani. Man icoinra huaiton Jesús maton chaca soashona man afu ipanon. Ascan un mato yoini cuscan mancai nan cachiquiri huamisima. Man cachiquiri huashon nanscaquin ipaitsi man icoinra huacuana.

³⁻⁷Diospan tsain yoini cuscan Cristo noco nashoni nocon chaca soashoshquin. Yoiari Cristo osha rafu non fusti maiyoni. Ascatan afanan funini. Funiashu Pedroqui nocoi tauni. Chipu afu rafumisifo docequi noconi. Ascayotan chipori quinientos icoinra huafoqui noconi. Ascan natian nantificuana niyoafo. Fustirasi naino. Ascashu chipori Santiagoqui noconi. Ascashu chipu afanan afu rafumisifo doce noconi. Nannori ua tapimani cuscan urifi matori tapimayoni.

⁸Ascashu ahuun unutanu uqui Jesús noconi. Uncai ahuunoa ahua nicatia-mano afu rafumisi futsafoan icoinra huaquin tauhuanifo. Facu cainyama cuatan caintirofo cuscan un afiaiton. Ascashon uncai icoinra huacuanima. Samamashta ua icoinra huamariscatani.

⁹Icoindra huua futsafoancai un acai cuscan chaca huacaicaimisifoma. Un Jesús icoinra huafo omitsis-camayopaoni. Un Diospan yorafo chaca huayopaonifiacun Jesús uhuun ramapaiquin ua catonni un afu rafumisi inon. ¹⁰Diosin uhuun ramapaiyaino unrifi un afu rafumisi. Ascashon ua imapaiyai cuscacai un ayamama. Mun aca. Un nanscaquicai ua ipaitsi catonnima. Un ascashu un afu rafumisifoan yonoshonaifo cuscan uncaifin fasi yonoshoshquin finacoinshonaquin. Ascafia uficai un ahuun yonoshomisi icama. Uhuun ramapaicai ua catonni un ahuun yonoshomisi inon. ¹¹Ascacun un iyamarai Jesús fu rafumisi futsafo futan nannorisi non mato Jesushuunoa

yoimisi. Non mato yoimisi cuscan man icoinra huua.

Nan naafo funishquiai cuscan

¹²Non mato yoimisi isca huaquin, —Cristo noco nashofianishaquin man afanan funiniran, —ishon non mato yoimisi. ¿Ascan ahuuscai atirifiton man yoimisimun? —Yora naashu afanan funitromaran, —ishon man yoimisi. ¹³Yora naashu funiyamanicuncai Cristori funicuanama. ¹⁴Cristo funiyamanicun non mato ahuunoa ipaitsi yoicuana. Funiyamanicun marifi man ipaitsi icoinra huacuana.

¹⁵Ascatan Cristo funiyamanicun non mato Dioshuunoa paracuamisi. Non yoimisi isca huaquin, —Upa Diosin Furun Jesús funimaniran, —ishon non mato yoimisi. Yora naashu funiyamainocai Cristoricai Upa Diosin funimacuanama. ¹⁶A naafo funiyamainocai Cristori funicuanama. ¹⁷Cristo funiyamainocai man ipaitsi man icoinra huacuana. Maton chaca mato soashocuanama. ¹⁸Ascashu Cristo funiyamainocai nan icoinra huafo nacanashu funocani. Omitsiscapashcaquin. ¹⁹Nuno mai ano niyoshon non shinanquin isca huamisi, —Un naashu Cristo funini cuscan uari Diosin funimashquiran, —ishon non shinanfiashu iconyamaino non fasi funocuana. Ascashon non ipaitsi icoinra huacuana. Cristo funini iconyamacun tsoanmamishti aca finonmafain nocohuun ramapaitiro.

²⁰Ascafia anorima. ¡Aicho! Iconcain Cristo funini. Aafin funi tauniquin afanan nashquima. Ascan nantifi icoinra huafo funitirofo afu ipashcaquin. ²¹⁻²²Ascashon nocofunu Adán Diosin onihuaquin tauhuani. Adán tauhuaquin chaca huani. Ahuun chacahuunoashu nani. Ascan nan nocofunuhuunoashu nantifi napamisifo. Nanscarifiai

nan nocofunu Cristohuunoashu nantifi icoinra huafo funitirofo afu nipashcaquin. ²³Ascashu Cristo funi tauni nipashquin. Afanan mai ano nasoaition nantifi ahuun yorafo funimashquin afu nipanonfo.

²⁴Ascainocai ahuara chacafoan afanan noco fucash huatirofoma nantifi cuyopacunaca. Nantianri nantifi Cristo noicasmamisifo yafi Satanás yoshin chacafoan aton niaifo non nantifi yoshin chacafo ato omitsiscapanacafo muran potai afanan tsoashta yonononfoma. Ascaiton Criston Apa Dios yoiquin isca huashquin, —Upan, natian min yorafo nantifi min ato yonomatiro. Afanancai tsoan mia nicacasmacpacunacama. Ato iquipacuhuun, —ishon Criston Apa yoishquin.

²⁵Ascashon Criston nantifi nan noicasmamisifo ato finoaintian afanancai a noicasmamisifocai ahuashta ishcanima. Nantifitsi ato iquiyamaiton. ²⁶Nan ahuun unutaqui a noicasmamisifo ato namaqui cuyoshquin. Ascashucal afanan tsoa nanacama. ²⁷Ascacufin Diosin Furun Cristo yononi cuscan nantifi ato iquinon. Apa Dios fustical Furunmun iquinama. Apahuunshon nantifi ato iquina. ²⁸Man nansca huatan Furunmun Apa yoishquin isca huaquin, —Upan uarifi mian yonotiroran, —ishon. Ascaiton Apa yoiyai cuscan fustisi nicapaicoin. Ascashon Apa Diosin fustiton nantifi iquinaquin.

²⁹¿Ascashu yora naashu funiyamaifoannocai ahuuscain futsafo atohuunoashu unu muran iquimamumisishaquin? ¿Ascain ahuuscain huacaniquin? ¿Ascashu yora naafo afanan funinacamanocain ahuuscain futsafoan ato unu muran iquimamisifomun? ³⁰Ascacun nocohuunoari natian non shinanon. ¿Naafu funiyamainocai ahuuscainun

shafatifi Cristohuunoashu non musuni tapiaquin?

³¹Ascacuri un futsafo matohuunoa yoisharamisi man nocon Ifo Jesucristo tanasharaino. Uhuun yoramishtichin iconcoini ua Cristohuunshon shafatifi rutupaicani. ³²Nocofunufu Efeso anoafoanri ua rutucuanifo. Un naashu funiyamaicai un ipaitsi nacuani. Un nuno mai ano niyoai chain Jesús ua imasharai ahu musunicai uqui nocoama. Ascatan un naashu afanan funiyamainocai acal uhuuna ahuama. Non naashu non afanan funinacama non apaiyai cuscan non huanoncahuun. Ascatacal chipo non afanan ahu ahuusca huanacama. Noncai tapiama ahuutian non naimancai. Ascashon futsafoan yoia isca huaquin,

“Non pifain aqui ayafain non Dios shinantama non apaiyai cuscan non nataima non unimanoncahuun,”
ishon shinanfo.

³³Asca anorimafinquin. Ascashon amaqiri shinanfaiyamacahuun. Tsoa anori shinanfainaifo fu rafuyamacahuun. Yora chacafo fu non rafuaino nocori chaca huamatiro.

³⁴Man amaqiri shinanmisi cuscan afanan anori shinanyamacahuun. Cayacafi shinancahuun. Chaca huaquin shatucahuun. Timafin man atirifitocai man Dios onansharataima. Ascashu man rafipaitiro.

**Non naashu afanan
non funiaitianmain nocon
caya ahuu cuscara ishquicain**

³⁵Ascashon futsanraca yoishquin, —¿Ahuuscashumain man naashu non afanan funitiroquin? ¿Afanan funiashurimain ahuu cuscara yoraya non afanan iquicain? —ishon yoicaniraca. ³⁶Anori yocaino fasi amaqiri shinantiro. Non ushu fana payocoyotiro. Chipu ahuun ushu

foaifiashuquin payocoyamashu foaitiro. ³⁷Non ahuara fanaquicai non ahuun cayafoya fanatiroma. Ahuun ushushta fusti non fanatiro. ³⁸Ascashon non ahuun ushu fanafia Diosin foaimatiro. Afi apaiyai cuscan fana futsa futsatapafo huaa. Nanscashori ahuun tashofo yafi ahuun caya cuscarafu ato onihua.

³⁹Nanscarifiai nocon cayacai yoinaton caya cuscarama. Nocon caya futsa cuscarafu. Yoinana futsa cuscarafono. Puiyafonari futsa cuscarafono. Shiman nafari futsa cuscarafono. Nanscarafosicai Diosin noco onihuanima.

⁴⁰Nai murannofoan ahuun caya futsa cuscarafono. Nuno mai ano non niyoano nocon cayari sharafiacai nan nai murannofo na cuscarama. Nanri fasi sharashta finacoiyain. ⁴¹Nanscarifiai fari non oshu non fishifori sharashtafiashu ascarafosima.

⁴²Nanscarifiai yorafo naino aton caya payocotirofo. Afanan non funiashucui nocon caya payoconacama. Nanscara sharasi non ipanaca afanancai non nanacama. ⁴³Nocon caya maiyaino chacacoin ishquin. Ascan non funiaitian sharastacoin ipanaca. Non nuno mai ano niyoashu non iranmannapacuashu non natiro. Non afanan funiashucui non ascara itama mutsisipa shara non ipanaca. ⁴⁴Non naanocai nocon caya nai murannofo nan cuscara itiroma. Ascan funiashu norifi Dios fu icafoanri non iishquin. Upa Diosin Yoshin Sharapan nocon caya mutsisimafain noco iquipacusharanaca. Non nuno mai ano niyonon ishon Diosin nocon onihuanima. Ascatan non aqui nocoaitian noco caya futsa cuscarafu onihushofain nocon furo yoshin afu ipanon. ⁴⁵Ascan Diospan tsainhuunoa cunuquin isca huani,

“Nocofunun Adán Diosin onihuaquin tau huani. Ahuun cayaqui Diosin ashain tanaino nocofunun ninacahuani. Arifi ninon,”

ishon. Ascan Cristo arifi Adán cuscarafiacun ahuun Yoshin Sharapan noco nimapacutiro. ⁴⁶Diosin nocofunun Adán onihuaquin tau huani arifi ninon. Chipo Cristo cainmani ahuun Yoshin Sharahunshon noco nimanon. ⁴⁷Diosin nan nocofunun Adán onihuaquin tau huani. Mai mapohuunoa onihuanima. Cristori nocofunufiacun afin nai murannoashu nocoqui fotoni. Tsoancai onihuanima. ⁴⁸Nantifi nuno mai anoashu non caianshu nocon caya Adán caya cuscarari. Ratoranfoan Jesús arifi Ifo huacanashu nan cuscarari ishcani. ⁴⁹Non nuno mai anoashu caini non Adán cuscaracoinfo. Ascan Jesucristo nanton Dios icariashu fotoni non a cuscaracoin inon.

⁵⁰Uhuun yoramishtichin un mato tapimai nonmun ahuuscashquicain. Non noco yora mumacoin Diosin niaifo icano non afu itiroma. Nocon caya paiyocotiro. Ascacufin non na cuscara yora yashucui Dios fu non itiroma. ⁵¹Tsoancai nicayomisifoma cuscara tsain shara un mato yoi. Tapipaiquin ua nicasharacahuun. Asca noncai atifi naima. Ascafia non nantifi fiananain futsushquin. ⁵²Ascatan non fianananriscashquin. Futso itani cafiscui non fianananriscatashquin. Nocon mai cuyoaitian Diospan nai oinmatinin ahuun manuti chaan chaan acaino Jesús icoinra huaashu namisifo funiriscatanonfo. Ascashucui afanan nanacafoma. Nantianri nantifi icoinra huafoti fianananriscatashquin. ⁵³Non natian naino nocon caya payocotiro. Ascafia Diosin nocon caya fiananan huashoshquin non afanan naima non afu ipanaca. ⁵⁴Diospan tsain cununi cuscan iconcain iishquin.

“¡Aicho! Afanancui Diospan yorafo nanacama. Cristohuunoashu non afu isharapacutiro,”

ishon cununi. ⁵⁵Ascashu afanancui ahuaton noco namatiroma. Afanancui

non nai omitsiscatiroma. ⁵⁶Non chaca huamisihuunoashu non nai non omitsiscatiro. Noco fiananan huatiancai afanan non chaca huatiroma. Non afanan chaca huayamafain nonricai afanan nashquima. Diospan tsainhuunshon non tapitiro non chaca huamisi. Ascantan non fianananshu Jesús cuscara shara non ishquin afanancai non chaca huatiroma. Diospan tsain afanan noco yoishquima isca huaquin, —Min chaca huaracai, —afanan noco huashquima. ⁵⁷Noco asca huaiton non yoitiro, —¡Aicho! Upa Diosin, nocon Ifo Jesucristohuunshon nocon chaca non shatutiro a cuscara shara ishquin. Ascashucai afanan non nanacama, —ishon non yoitiro.

⁵⁸Ascacun uhuun yoramishtichin futsa futsa huaquin shinanyamacahuun. Diosin noco imapaiyai cuscan nan fusti shinansharacahuun. Jesús tanasharacahuun. Nocon Ifo Jesús yonoshosharafaincahuun. Man man tapia nocon Ifo futan yonoicai ipaitsi non yonoshotiroma.

Nan icoinra huafoan pui ichanan huashon icoinra huaa futsafo fomani

16 Natian ahuara futsanhuunoa un mato yoi. Diospan yorafo Jerusalén anoafo ahuuoma. Atohuun ramapaiquin man ato inansharapai. Ascan nan icoinra huafo Galacia anoafo un ato yoia cuscan marifi nanscarifi acahuun. ²Yonoshon ahuun rafanan pui fishon nan man fia cuscan ahuutiran Domingotifin ichananti muranshon pui huafafaincahuun. Chipo un Jerusalén ano nocoshon nan pui un ato foshotiro man ato inanon. Diosin mato inan cuscari atirifi inancahuun. Mato ichapamari inancun atirifi ichapamari man inantiro. Ascan mato ichapa inancun paratamari inancahuun. Ua manaquima pui ichahuafafaincahuun.

Asca huafafainshocai un nocoaino man afanan fipaitiroma.

³Ascashon mafin nocofunu sharafo catoncahuun aya pui fomashcaquin. Ascan un matoqui nocoshon ufoicin un ato cunushoshquin man ato foshotanon. Ascano Jerusalén anoafoan man tapinon tsoan puimain mato foshoafoquin. ⁴Diosin ua nichipaiyai no nan nocofunufu man catoanfo unfu fotirofo.

Pablon cahuacacainna cuscan ato tapimani

⁵Macedonia finonfaini cai un matoqui Galacia ano nocoicai. ⁶Itsairaca un matofu iyotiro. Ascayamarai uraca oipacutian un mato muran iyonon. Ascashon un caiton un aya catanon un yopai cuscan man ua inanqui futsanon. Ascatan man ua nichian un casharanon. ⁷Un mato atsamaiyofainnicai. Diosin ua nitumayopaiyai un matofu iyotiro.

⁸Ascafia un nuno Efeso ano iyoi nan nocon fuyamisi ahuun anu Pentecostés icaitian. ⁹Nunoa yorafoan nocon Ifohuunoa nicapaicani. Ascacun un nunoshon nocon Ifohuunoa yoisharai yoi. Ascano icoinra huanonfo. Un ascfaiiton nantianri atirifiton ua shatumpaicani un Jesushuunoa yoinonma.

¹⁰Ascano un nocon Ifo yonoshona cuscari arifi Timoteo yonoshona. Ascan matoqui nocoaiton cushusharacahuun. Nocoaino aqui unimacahuun. Man ascaiton tapinon a man fuchipaiyai. ¹¹—Acai ahuamaran, —huayamacahuun. Caiton nichisharacahuun unimai uqui noconon. Icoinra huaa futsafo fu uqui nocoyoi. Un afanan atofu rafusharanon.

¹²Ascatari natian nocon yorahuan Apoloshuunoa un mato yoi. Un yoia isca huaquin —Corinto anoafo oinyotahuun, —un Apolos huamisi. Ascafia ua yoimisi, —Un natian cayotiro. Diosin ua nichipaiyaitian un catiroran, —ishon ua yoia.

**Pablonun ahuun tsain unutaquin
Corinto anofo ato tsain fomani**

¹³ Oinfain. Jesús shinanfafaicahuun chaca huacaquima. Nocon Ifo icoindra huacahuun. Cachiquiri huayamacahuun. Jesús icoindra huashu ahuara ahuusara afiaiton oincani ratuyamacahuun. Diosihuunoashu fupuinfoancahuun.

¹⁴ Ahuarafo man acai cuscan nanfohuun noiquin ashosharacahuun.

¹⁵⁻¹⁶ Estéfanas ahuun yorafo Grecia mai anofoan Jesús icoindra huaquin taucoin huanifo. Man manfin ato oinmisiquin. Man man tapia nanfoan Diosin ahuun yorafo shara huamisifo. Nan cuscarafu nicasharacahuun. Nan atofu yonoafori nicasharacahuun.

¹⁷ Un fasi unimacoin Estéfanas non Fortunato non Acaico afo uqui no-coafono. Mancai ashotiroma man fasi chaicoin ica. Man ua ashotiroma cuscan nan rafu non fustifain ua ashoanfo.

¹⁸ Nan rafu non fustifain uhuun ointi ua fupuamafo. Maton ointi man fupuaca cuscan uari fupuamafo. Ascatan atohu-unoa yoisharacahuun.

¹⁹ Nan Jesús icoindra huafo ichanan-misifo Asia anofoan mato yoisharapaicani. Nocon Ifohuunshon Aquila futan ahuin Priscila mato yoisharapaicani. Fasi mato shinancani. Aton pushu muran atofu ichananfoanri mato yoisharapaicani. ²⁰ Nantifi icoindra huafo ufu nunoafoan mato yoisharapaicani. Ascacun yoinonnansharacahuun.

²¹ Unfin Pabloquin uhuun tsain unutaquin rafushtacoin uhuun mucucoin-nin un mato cunushoni man tapinon un-fincoin un mato yoisharashquin.

²² Tsoan nocon Ifo noiyamashon afin shinantiro, —Ufin un apaiyai cuscan un acai. Ua Diosin amapaiyai cuscan nanscanonquin, —ishon shinantirofo. Nanscarafu Diosin ato onaintimapainon. Omitsiscapanacafo muran potashquin.

Ifo Jesús nocoqui ohuu. ²³ Nocon Ifo Jesús matohuun noiai cuscan mafi rananri man noinanpainon.

²⁴ Un nocon Ifo Jesucristohuunshon un nantifi matohuun noi. Nanscasi ipanon. Amen. Nanti.

Pablo

Pablonun Corinto Anoafu Afanan Cunu Fomani

Pablonun Corinto anoafu yoisharani

1 Uhuun yoramishtichin un mato cunu fomai man tapinon. No futan Jesús tanamisi Timoteo futan un mato cunu fomai. Upan Diosin ua catonpaiquin ua catonni ahuun tsain Jesucristohuunua un ato yoifoanfafaion. Un Jesucristo fu rafumisi. Nantori ua nichini.

Icoira huafo Corinto anoafuan yafi Diospan yorafo Acaya mai anoafori un mato nantifi yoisharai. ²Nocon Upa Diosin futan nocon Ifo Jesucristo matohuun ramapaicain maton ointi unimamanon.

Pablon omitsiscani cuscan

³⁻⁴Non Upa Dios yoisharanon. Isca huaquin, —Upa Diosin, min noco shara huafafaini. ¡Aichoran! —ishon non Upa yoinon. Nanfin nocon Ifo Jesucristo apaquin. Nanrifi nocohuun ramapai. Non omitsiscafiaiton nocon nomuran shinamsharatiro. Ascano non mua cuscan huafain futsa omitsiscaiton non ahuun ramapaiquin ahuun nomuran non shinamsharatiro. Ahuara futsan omitsiscamai cuscan non yoisharatiro ahuun nomuran shinamsharanon. ⁵Nocon Ifon Cristo no fu rafuano nan omitsiscani cuscan norifi non omitsiscatirofiashu nanton nocon nomuran noco shinamsharatiro. ⁶Ascacun non mato yoisharapai nocon Ifo Jesús icoinra huashu afu ipanon. Ascacufin noco omitsiscamafiaifoan noco Ifo Jesús nocon nomuran shinamsharatiro. Man manfin oinquin Diosin nocon nomuran shinamsharamisi. Ascacun man man oian nocon nomuran non shinansharaiton. Nansacun norifi non maton nomuran shinamacoian. Ascan non omitsisca cus-

can marifi man omitsiscafiaquin man funaquima tunucoian. ⁷Man non tapia non omitsisca cuscan marifi man nofu omitsiscafiaiton Upa Diosin nocon nomuran shinamshara cuscan matona shara huaa man shinansharanon. Ascan non matohuunua shinanmisi cuscan nannoricoin. Man omitsiscafiaquin tunuaiton maton nomuran shinamshara.

⁸⁻⁹Uhuun yoramishtichin non Asia mai anoashu omitsisca cuscan un mato yoi man tapinon. Nocon ointi fasi ihuu ica. —Noncai tunutiroma. Non omitsiscai nairan, —ishon nocon nomuran non shinanni. —Nofincai non numatiroma. Upa Diosin fustitofin noco numatiroquin. Nantofin yora nacoinna funimatiroquin, —ishon nocon nomuran non shinanni. ¹⁰⁻¹¹Ascashu non fasi omitsiscai nacuaafiaiton Upa Diosin noco numani. Afananri noco numashqui. Man non icoinra huacun noco numafafainshquin. Noco nansca huaino icoinra huaa futsafoan nocohuunua shinanquin isca huashcani, —¡Aicho! Upa Diosin, min Pablo yafi afu rafumisifo min nica ato numashqui. Min fasi shara-coinran, —ishon ichapafoan Upa Dios cufishcani.

Pablon shinan futsashu Corinto ano canima

¹²Man non tapia manifoti iconcoin yoimishashaquin nocon nomuran non unimacoinni. Non mato murannoashu isharacoinmisi. Non Dioshuunoashu a cuscara sharacoin non imisi. Noncai mato paramisima. Icon fusti non mato yoimisi. Icoira huamafoan shinanmisi cuscaici non mato ismamisima. Upa Diosin noco shinamshara cuscan huafain non mato oinmana. ¹³⁻¹⁴Un mato cayacafi icon fusti cunushomisi. Un mato cunushona cuscan nannoricoin. Uhuun tsaincai rafuma. Mancai

uhuunoa atirififain tapisharataima. Ascashiashon chipo ua onancoinshon man ua shinansharapainon. Ascatan nocon Ifo Jesús nocoaitian man yoitiro isca huaquin, —¡Aicho! Pablonun noco shara huamisiran, —ishon man yoitiro. Nanscarifi aqui un matohuunoa nantianri yoisharashquin.

¹⁵⁻¹⁶ Un shinan man ua icoinra huaishafain Jesús ua nichini un mato tapimanon. Ascashon un shinanquin isca huani, —Un Macedonia ano un caitian un mato ano mapuyoshquin afanan un mato yoisharashquin maton ointi man unimamanon. Ascatan afanan Macedonia anoashu un nasoaitian afanan u mato ano maputiro matofu iyoshquin. Chipo ua Judea ano nichitiroforan, —ishon un shinanni. ¹⁷ Nannori un shinanfiacun man shinanquiraca isca huaa, —¿Pablonun nannori shinanfiashu asca ahuuscai noco icon yoiashuma oamamun? Noco ahuaara yoifiashu ahuun nomuran man shinan futsashon ahuaara huatiro. Icoinra huamafoan noco foman cuscan arifi nanscarifi huaquin noco fomain. Ointi rananyaran, —ishonraca man uhuunoa shinan.

¹⁸ Ascacun anorimafinquin. Man Upa Dios icoinra huaa cuscarifi un mato yoimisi cuscan man icoinra huatiro. Uhuun tsaincai rafuma. Un mato yoimisi cuscan cayacaficoin. Ahuacai un mato parayomisima. Uricai ointi rananyama. ¹⁹ Timoteo yafi Silas futan un mato Jesucristo Diospan Furunhuunoa un mato yoimisi. Nanton tsaincai rafuma. Ahuun tsain cayacaficoin. Icon fusti. ²⁰ Upa Diosin noco yoiyotiani cuscan nantifi Cristo man noco ashomisi. Ascacun non nantifi yoimisi isca huaquin, —Non Jesús icoinra huashon. Noco yoia cuscan aquin non yoitiro. ¡Aicho! Nocon Ifo fasi sharacoinran, —ishon non yoimisi.

²¹ Ascatarifi Upa Diosin mato yafi ua mutsismana non Cristo tanasharanon. Ahuun Yoshin Shara noco ya rafumana. ²² Ratoran futsan aton mafohuun aton anu nutatirofo nanfo ahuunacun futsan tapinon. Nanscarifi aqui Upa Diosin ahuan Yoshin Shara noco ya rafumacun nanhuunshon yora futsafoan noco ointirofo non ahuan yorafocun. Nannain nocon Ifocun. Noco yoiyotiani cuscan ahuan Yoshin Shara noco ya rafumaquin tau huani. Ascacufin non tapitiroquin ahuaara futsa noco yoiyotiani cuscan iconcoin noco inanshquin.

²³ Ascacun man tapitiro Upa Diosin iconmisiquin. Nanscacun urifi un Diosin oinmaticun man tapitiro un mato icon yoimisi. Un mato yoiamua cuscan mato ari un capaifiain un cataima. Upa Diosin ua onancoiainton un iconyamacun ua onaintimatiro. Un mato ari cacuana. Ascafia un shinan, —Un ato ari cashon un fasi ato asca huatiro, —ishon un shinan. Ascashon un mato ointi ihuumpaima un mato ari caama. ²⁴ Un mato asca huapaitama urocon mato unimama-paisharai. Uncai maton ifo ipaima man mantsi a icoinra huayamacun. Icoinra huashon man man Jesús tanashara. Ascacun un mato futan Jesús yonoshopai man mimacai unimanon.

2¹⁻² Ascacun uhuun nomuran shinanquin un isca huayamua, —Un Corinto ari capaifiain un caima. Un cashon, “Man chaca huai cuscan shatucahuun,” ishon un ato yoiquicai un ato unimamatiroma unrocon aton ointi ihuumatiroman, —ishon un shinanyamua. ¿Un maton ointi ihuumaiton tsoan futsancaimun ua unimamatiro? Marus fusti Corinto anofoan man ua unimamatiroquin. Ascafia un mato ointi un ihuumaiton tsoa futsacai ua unimamatiroma.

³ Ascacun un mato cunushonai cuscan un matoqui nocoataima man chaca

shatunon man afanan uhuun ointi ihuumanonma. Man ua noiquicai uhuun ointi man ihuumaima uarocon man unimamatiro. Iconcoinquin un shinan, —Un unimaino marifi man unimatiroquin, —ishon un shinan. ⁴Un mato cunushonaino un muyamua uhuun ointi fasi ihuucuin. Uaiyanan un mato cunushoni. Ucai maton ointi ihuupainima. Ascata un mato cunushoni un fasi matohuun noicoiain cuscan man tapinon.

Tsoan noco chaca huaiton non rau huatiro

⁵Nan nocofunun chaca huatacui ua fusti uhuun ointi ua ihuunmanama. Nantifi man icoinra huafoti matori mimacai maton ointi ihuumanana. Ascafia uncai nan nocofunu onaintimaquin finapaima. ⁶Ascafia man nantificuanaton man tapipaima nan nocofunun a chaca huua cuscan. Nanscacun man man onaintima. Nanscanon. Man man acaquin. ⁷Ascatan man aca cuscan afanan huacaquima rau huacahuun. Ascashon yoisharacahuun. Ahuun ointi unimamashcaquin afanan omitsiscanonma. Man yoisharayamaino afanan fasi ahuun nomuran omitsiscui finacaitiro afananca shinansharatiroma.

⁸Ascashon un mato yoiacai cuscan ua nicasharacahuun. —Non mia noicoiran, —ishon afanan yoicahuun tapinon. ⁹Nantifi un mato cunufoma cuscamain ua nicacoincai. Tapishquin un mato cunu fomayamua. ¹⁰Man futsa rau huacun unrifi un nan rau huatiroquin. Un nantori chaca huaiton Cristohuunshon urifi un rau huatiro. Un asca huaino marifi man unimanon. ¹¹Non ascainocai Satanás noco fuparatiroma. Ascatan non asca huayamaino nocohuunoashu nan nocofunu funoi omitsiscacuana. Satanás noco amaqiri shinanmapai nan nocofunu rau huanonma. Non rau huayamaino fasi omitsiscatiro.

Pablo pushurasi Troas ano nocoflashon ahuun ointi unimanima

¹²Ascán un mato uhuunoa afanan tapimai. Un pushurasi Troas ano tsain shara Cristohuunoa ato yoicai un cani. Ahuunoa nicapaicoinnifo. Ascano nocon Ifoan nanno ua atoqui nichini un ato yoinon. ¹³Ascafia no futan Jesús icoinra huua noco yora Titocai anoa un fuchinima. Fuchiyamashu uhuun ointi un unimanima. Ascashon un fasi shinanni. Ascatan, —Mun cairan, —ishon Troas anoa icoinra huafo un ato yoita oi Macedonia ano un noconi.

Cristohuunshon non nantifi finontiro

¹⁴¡Aicho! Upa Diosin, mihuushocai ahuafoano noco shatumatiro ma min noco amapaiyai cuscan non anon. Un shinanfiaquin uhuun nomuran un shinanni Upa Diosin noco iyofanfainai cuscan non Cristo fu rafumisi. Ascatan Jesús noco Ifono ahuun curushhuunoashu non isharatiro futsafori ahuunoa yoishquin. Ascashon nocohuunshon manifatifain nocon Ifo Cristo onantirofo.

¹⁵Upa Diosin nocohuunoa shinanquin isca huua, —Nafu uhuun facu Cristo cuscarafu. Ascashon nanfohuunshon uhuun facu Cristo onantirofoquin, —ishon shinan. Non nantifi Cristohuunoa ato yoimisi. Atirififain nocon tsain icoinra huafoan Jesús ato numa Dios fu nipanonfo. Atirifiton icoinra huayamashu funoshcani omitsiscapanacafu muran fooshcani. ¹⁶Ascashon icoinra huamafoan noco nicaquin yoitirofo isca huaquin, —¡Ohuashta! Nan na tsainmun iconcati non omitsiscapanacafu muran catiro, —ishon shinancani. Ascafia nan icoinra huafoan noco nicaquin yoitirofo isca huaquin, —¡Aicho! Noco yoiacai cuscan non icoinra huashu non Upa Dios fu nipatiroran, —ishon shinancani. ¿As-

cacun tsoan Diospan tsain Jesushuunoa futsafo yoisharatiromun?

¹⁷Futsafoan Diospan tsain yoiahuunshon puisi fipaicani. Ascan noncai ato cuscarama. Man non tapia non ahuun tsain yoiaiton Upa Diosin noco shafacafi oincoin. Nantofin afincoïn noco nichiniquin. Ascan non ahuun tsain yoiquicai non tsoa fuparamisima. Non ato icon fustisi yoimisi.

Jesús ato tsain funa yoyotiani cuscan

3 ¿Ascan uhuunoacai un mato isca huaquin shinanmapaima? —Pablo fasi nocofunu shara. Fasi tapishararan, —ishoncai un mato anori shinanmapaimisima. Noncai ato cuscarama. Man manfin noco oinmisiquin non matofu itiani. Ascan nan cuscara cunucai man nocohuunoa yopaima. ¿Iconmun? Non mato anoashu caitianricai non nan cuscara cunu yopaima futsafo ismashquin. ²Ascan manfin nocon cunu cuscarafuquin. Ascashufin matohuunoa noco nomuran cunua cuscara. Nantififain oinonfo non mato tapima cuscan man aiton. ³Ascacun futsafoan mato ointirofo man nan Cristo aficoïn cunua cuscarafu. Ascashon mato tapitirofo non mato tapima cuscan Jesús cuscara man inon. Toquiri sapaqui cunuahuunshoncai ato oinmanama. Maton nomurancai ahuaton cunua. Upa Diosin nipamisiton ahuun Yoshin Sharapan mato imashara nantifiton mato oinonfo.

⁴Cristohuunshon non Dios icoinra huashon non mato yoiai cuscacoin man ai. ⁵Ascafiaшон uncai mato isharamatiroma. Uncai anori shinanmisima. Upa Diosin ahuun curushhuunshonsi un futsafo tapimatiro isharanonfo. ⁶Ahuun curushu noco inanno nan tsain funa Jesucristohuunoashu Dios fu nipatirofo non ato tapimatiro. Moisés cununi cuscahuunoacai non ato

tapimamisima isharanonfo. Asca nonfin Diospan Yoshin Sharahuunoashu non isharatiroquin. Moisés cununi cuscan fusti tanashu non funotiro. Naashu omitsiscapanacafo muran non catiro. Ascan Diosin Yoshin Sharapan noco nimapacutiro non afu nipanon.

⁷⁻⁸Shinancapon. Upa Diosin nocon caifo Israelifo ato yonopaiyai cuscan toquiri sapaqui ato cunushoni. Ato yononi cuscan nicayamacanashu natirofo omitsiscapashaquin. Upa Diosin ato yononi cuscan Moisés ato yoiaino Diosinhuunoashu ahuun fuso fasi chashaqui nocon shuni Israelifo ointima huani. Chashafiaшu funainquimashta nishmapacuni. Ascatan Upa Diosin Moisés yononi cuscan fasi sharashtacoinfiashu natianfin ahuun Yoshin Sharapan noco yonoai cuscan fasi finacaia ahuun yono sharashtacoin man noco ismaquin.

⁹Ascacun Moisés yononi cuscan fasi sharafiacun nicayamacanashu natirofo. Ascan natian Furun Cristohuunshon nocon chaca soashotiro non afu isharanon. Nan fasi shara finacaia. Ahua futsacai nan cuscara sharama. ¹⁰Upa Diosihuunshon Moisés noco yonoquin tau huani cuscan fasi sharashta. Ascafia natiancai nan ahuama. Upa Diosin Jesushuunshon noco ashoni cuscan fasi shara finacaia. ¹¹Upa Dioshuunshon Moisés yononi cuscan sharafiaшu itiashmashtafi man cuyoa. Ascano Upa Diosin Jesushuunshon noco ashoni cuscaai cuyopacunacama. Ascan nan fasi shara finacaia.

¹²Ascacufin man non tapia Upa Diosin Jesushuunoa yoini cuscaai cuyopacunacama. Ascacun ranotama non Jesushuunoa yorafo yoitiro. ¹³Moisés ahuun fuso fasi chashatanaino fufopomuni nocon shuni Israelifoan oinonfoma. Ascashu fufopomuaino itiashmashtafi ahuun fuso chashai nishmapacuni. Noncai Moisés cuscarama. ¹⁴Moisés fufopomuni cuscan

uhuun caifofo nanscarafori. Ascashocai Diospan tsain oinsharatirofoma. Cristo fustitofin ato shinanmasharatiroquin afanan fufopomua cuscara inonfoma.

¹⁵Natianri futsan ato Moisés cununi cuscan yoiaino nan fufopomua cuscarafa. Ato ointi curushu anocai tsoan shinansharatiroma. Ascashon isca huaquin shinancani, —Moisés noco yononi cuscan non Upa Dios fu nipatiroran, —ishon shinancani. ¹⁶Ascacia tsoancai natian afanan Moisés cununi cuscan shinantama nocon Ifo icoinra huashon ahuunoa tapisharatiro. Afanan fufopomua cuscara iishquima.

¹⁷Nanscacufin nocon Ifoan Yoshin Sharapan noco nimapacutiro. Nan nocon Ifoan ahuun Yoshin Shara no fu icanocai ahua futsa nocon ifo itiroma noco yonoshquin. ¹⁸Ascan noncai fufopomua cuscarama. Nocon Ifoan tsain non oinsharatiro. Nonfin fuisiti cuscarafokin. Futsafoan noco oinquin nocon Ifo Jesús fasi shara ointirofo. Ahuun Yoshin Sharapan nocon nomuran noco iquifain nocorifi fiananan huua non nocon Ifo cuscara shara non inon.

4 Ascashon Upa Diosin nocohuun ramapaiquin noco yononi non ahuun tsain shara Jesucristohuunoa yoifoanfafainon. Non ascaicain nocon ointi ihuu icama. ²Noncai tsoa fomanmisima. Ascara chacafocai non tapipaima. Diosin tsain yoia cuscan fustisi non mato yoimisi. Noncai ahuun tsain amaqiri yoimisisima. Cayacaficoin non mato yoimisi. Ascan Upa Diosin noco oincoin maton nomuran non nocohuunoa mato shinanmapai isca huaquin, —Diosin tsain cununi cuscan Pablonun nantifi noco cayacaficoin yoimisisiran, —ishon mato nomuran non mato shinanmapai. ³Nan tsain shara Jesushuunoa non yoimisi cuscan tsoan nicapayamainocai nafoan icoinra huafoma. Nanfofin nan

fufopomua cuscarafokin. Ascashu omitsiscapanacafo muran focani.

⁴Nanfofin yoshin chaca Satanás aton ifoshofin ato yonomisiquin. Ascashon aton nomuran fufopomua cuscara ato huamano tsain shara Jesushuunoa tapinonfoma. Jesús ato oinmapai arifi Apa Dios cuscaracoin icoinra huanonfo. Nan tsain fasi shara iconconfiacuin Satanás ato fusho cuscara huama aton nomuranshonri icoinra huanonfoma.

⁵Ascan noncai nofiri nocohuunoa non mato yoimisisima. Ascatamarocon non mato yoimisi Jesucristo maton Ifo inon. Noco Ifocun non ahuun noishon a yonoshosharapai. Ascan nonfin maton oinmati cuscaracuin Cristohuunoa mato tapimashquin. Nannori non mato yoimisi. ⁶Diosin shafa oni huataima yoiquin isca huani, —Faquishcun shafan inonran, —ishon yononi. Nanscarifiai non Jesús ifoantaimano nocon ointi nan faquish cuscara chaca ipaoni. Ascan Diosin Jesucristohuunshon nocon ointi muran chashamana non ahuunshon tapinon ahuu cuscara sharamainquin.

Non Jesús icoinra huashu non isharatiro

⁷Nan Diosin sharacoianshu no fu icaquin. Mai cuticai ahuashu ahuun nuama. Samamashta moshifiatiro amuran ahuaa chicoin non nanutiro. Nanscarifiai noncai mutsisipamafia Jesús mutsisipashu no fu rafua. Nanscano Diosin ahuun curushpan futsafo ismatiro ahuamamishti huatiro cuscan. Ascan nan curushcai noconama ahuuna fustifinquin.

⁸Ascashon non imisi cuscan natian un mato yoi man tapinon. Noco fucash huafafainfiaifono non unumisima. Non finoain cuscaicai non tapiama ahuusca-main non aiquin. Noco asca huafiaifoan-cai non shinanmisima isca huaquin. —

¡Ohuashta! Noncai ahuuscatiroma. Man non funoarancai, —non imisima. ⁹Noco omitsisca huafiainfoancai Upa Diosin noco potapacunacama. Noco rutupaifi-aifoanri Upa Diosin noco numa non nanonma.

¹⁰Jesús niyoano rutupaipaonifo cuscan nocorifi nanscarifi rutupaifafaincani. Non ascaiton nantifiton noco ointirofo Jesús nocon muran ica. ¹¹Non Jesús yonoshonaiton shafatifi noco rutupaicani. Icon nanscacun non Jesushuunoashu nai. Non ascaiton ointirofo Jesús ahuun curushhuunoashu non nicun. ¹²Ascacun Jesushuunoa non mato yoiaiton futsafoan noco rutupaifiaifoanno non mato yoimisi man icoinra huashu afu nipanon.

¹³—Un icoinra huai. Ascashon un matori yoiran, —ishon nannori Diospan tsain cununi. Nanscarifi aqui norifi Diosin tsain icoinra huashon non matori yoimisi. ¹⁴Ascashon man non tapia nocon Ifo Jesús man nafiacun Upan Diosin afanan funimani afu ipanon. Ascacun Apan Jesús funimani cuscan mato yafi nocori funimashquin non afu ipanon. ¹⁵Nanscacufin norifi non omitsiscacai mato icoinra huamaicain. Man icoinra huashon paratama man tapinon Upa Diosin nocohuun ramapaicain noco numani. Non mato yoiái cuscan tapis-hon yoitirofo isca huaquin, —¡Aicho! Upa Diosin, min noco shara huamisiran, —ishon yoitirofo. Nanscashon Diosihu-unoa shinansharatirofo.

¹⁶Ascacun non omitsiscafiaquicai non shinanchacaima. Nocon Ifocai non cachiquiri huamisima. Icon non isinin ipashu nafiaiton nocon Ifoan nocon nomuran fiananan huafafaini ahuun ointi cuscara non inon. ¹⁷Non natian niyoashu omitsiscái cuscan fasi curushcoinma. Samamashta finontiro. Ascan non Jesushuunoashu omitsiscaiton noco

fasi sharacoin imai cuscan tsoancai ascaran shara oinyomisima. Nanfori cuyopacunacama. ¹⁸Ascano natian noco omitsisca huai cuscan non shinantamarocon nan non oinyomisima cuscara non shinain. Diosin icanoshon noco unimamapacunon non shinain. Ahuaraton noco omitsisca huai cuscan samamashta cuyotiro. Ascan Diosin chipo noco imai cuscan noco unimamai cuscaí cuyopacunacama.

5 Ascano man non tapia non naashu Diosin noco caya funa onihuai. Is-cara un mato tapimai. Pushu shuniaino paon icashu payocotiro. Nanscarifiai no-con caya non naino cuyotiro nocon yoshin afanan amuran itiroma. Asca tsoa futsacai noco caya funa oni huatiroma. Diosin icarishofin caya funa sharacoin afanan noco oni huashoshquin. Nan cay-acai cuyopacunacama. ²Natiancai no-con cayari fiananantaima. Nanscacun afohuunoa shinain non shacaina cahu-atiro. Ascashon shinanquin non isca hu-atiro, —¡Ohua! Diosin ua imapaiyai cus-cacai un ataima. Un fasi Dios ari ca-paicoin afanan omitsiscashquima caya funa sharacoin ua onihuanon, —ishon non shinantiro. ³Non Dios ari nocoashu-cai non yoshin fustia ishquima. Diosin noco caya funari noco oni huashoshquin.

⁴Natian non mai ano niyoashu non omitsiscatiro. Ascafia noncai noco yoshin cayaoma ipaima. Non Jesús ari nocoriscapai ahuun caya cuscara iishquin. Non niyoano nocon caya isinin itiro. Non naino nocon caya payocoi cuyoshquin. Ascafia Diosin noco caya funa shara chipo noco inanshquin. Nancái cuyopacunacama. Isharapacunaca. ⁵Upa Diosin noco onihua non afu ipanon. Non caya funa yaitian Jesús cuscaracoin non inon. Noco yoiyotiani cuscan ahuun Yoshin Shara noco inan. Ascashon non tapitiro

ahuara futsafori noco yoiyotiani cuscan noco chipo inanshquin.

⁶Nanscacufin non shinansharafafaini non nuno mai ano niyoashu nocon Ifo Jesús icari non nocoataima. Nan man non tapia. ⁷Icon Jesús icano non oiantaimafiaquin nuno mai anoshon non icoinra huafafaini. Ascashon non chipo oinshquin. ⁸Man non tapia naashu nocon Ifo fu non ipashquin. Nanscaifin sharaquin. Ascacufin non naicain non ratuima.

⁹Ascano nuno mai ano non niyoashu iyamarai Upa Dios icari non nocoaitian nocon Ifoan noco yonopaiyai cuscan non aiton oin nocoqui fasi unimacoinshquin. Nanfin non fasi ashopaicai. Non asca huashoaiton oinfin nocon Ifo nocoqui unimaiquin. Nanquiri fustisi non shinain. ¹⁰Ascan nan non icoinra huafoti Cristoqui non nocoshquin. Nantianri noco yoipacushquin non mai ano niyoshon shara huayamaraquinmain non chaca huamisiquin. Non ahuara shara huamiscun ahuara sharacoin noco inanshquin. Asca non ahuarashta chaca huamiscun ahuara shara noco inanpaifiaquicai noco inantiroma. Ascashu funoshcani.

Cristohuunoashu non Dios fu rafutiro

¹¹Ascacun Diosin noco yonoa cuscan non ayamashu non ratutiro. Ascatan futsafori non yoipai Diosin ato yonoa cuscan anonfo. Diosin noco onancoian non-main cayacafi yoiaitofin. Noncai tsoa futsa fuparapaima. Marifi man man noco onancoian. Nonricai mato paramisima. Nocon tsain cayacafi fusti. Manmain nocohuunoa maton nomuran nannorifosi shinanpainon.

¹²Ascan noncai afanan mato shinanmapaima isca huaquin, —Pablo yafi afu yonoafo fasi sharaforan, —ishoncai non mato nocohuunoa

yoimapaima. Non mato cayacafi fusti yoimisi. Man man tapia. Futsafoancai mato yoicoianma. Mato fuparapaicani. Mato yoia cuscacai amisifoma. Ascashon aton nomuran shinanchacamisifo. Cacapaimisifo. Nonfin mato icon fusti yoimisiquin. Ascan man man noco onancoimisi man nocohuuri noiquin man ato nocohuunoa yoisharatiro. ¹³Icon Dios noiquifin un curushcai yonoshofanfafainmisiquin ahuunoa futsafoan shinansharanonfo.

Ascan futsafoan nocohuunoa yoiafo isca huaquin, —Pablon yafi afu yonoafo nison cuscaraforan, —ishon nocohuunoa yoiafo. Man manfin tapiaquin non matohuun noiquin cayacaficoin shinanfain non Diosin tsain mato yoimisiquin marifi man cayacafi shinanon. ¹⁴⁻¹⁵Cristo nocohuun noiquin noco yonoi non ahuun tsain shara mato yoinon. Cristo nantifi yorafohuunoashu naani. Ascashu nantifi non afu nai cafiscas afanan non ipaoni cuscan aashquima. Cristo nafiashu afanan nocohuunoashu noco noi funinaca huani. Norifi naashu ahuunoashu non afanan funitiro a cuscara iishquin. Ascan nofin non apaiyai cuscan fustisicai afanan non shinantiroma. Cristo noco amapaiyai cuscan nan fusti non shinantiro nocoqui unimanon. Nanfo non icoinra huamisi.

¹⁶Ascacufin icoinra huamafoan futsafohuunoa shinainfo cuscacai un afanan atohuunoa anori shinanpacunacama. Unri anori shinanpaonifiashuca i un afanan ascapacunacama. Cristohuunoari un amaqiri shinanpaoni. Uncai afanan ahuunoa anori shinainma. ¹⁷Ratoran Cristo ifohuaashu afin fiananancoian yora funacoin ishquin. Ipaoni cuscacai afanan aima. Nantian Cristo ahuun nomuran afanan funacoin cuscara huai.

¹⁸ Ascano Upa Diosin Cristohuunshon noco fiananan huaa afanan non noicasmanonma. Ascan natian Cristohuunoashu non ahuun yorafo inon. Ascatan noco yonoa norifi ahuunshon yorafo yoiquin isca huanon, —Cristo Ifo huacahuun. Afanan Diosimaqui iyamacahuun ahuun yorafo iishcaquin, —ishon non yoitiro. ¹⁹ Upa Diosin Cristohuunshon afanan nantifi yorafo a ya rafumapai afanan amaqi inonfoma. Cristo noco nashoniano Upa Diosin nocon chaca afanan shinainma. Nocon chaca soashona non afu ipanon. Upa Diosin noco yonoa cuscan nannoricoin non mato yoimisi.

²⁰ Nanscacun Cristo noco nichini non ahuun tsain mato yoinon. Non ahuun tsain mato yoiquifin nan Upa Diosicoinin mato yoia huaquin. Upa Diosifin nocohuunshon mato yoiquin. Cristo mato yoipaiyai cuscari non mato yoi. Ascacun noco nicacoincapun. Cristo mato nashoni chacafo mato soashoshquin. Ascacun maton chaca shatucahuun afanan Upa Dios fu rafushcaquin. ²¹ Cristocai ahua chaca huayamafiamisicun Apa Diosin nocon chacafo amuran cuyoimani. Ascan ahuunoashu nan cuscara shara non inon.

6 Ascashon non Dios fu yonoi mato shara huamashquin. Nanscacun nicacoincahuun. Diosin matohuun ramapai. Cristohuunshon man maton chaca soashoni a cuscara shara inon. Diosin matohuun noicoinfaiiton potayamacahuun funoshcaquima. ² Nan Diosin tsain yoimisi Isafas ahuun tsain inonpacoai cuscan cunuquin isca huani, “Noco numahuu,’ ishon man ua yoia. Un mato nicafain un matohuun rama-

paicai un mato numaran,” ishon Diosin yoini cuscan Isafas inonpacoai cuscan cununi. Ascacun nicas-

ramapaiquin. Cristohuunshon mato numanon. Natian nicasharacahuun.

³ Noncai tsoan chaca ismamisima Diosin noco yonomapaiyai cuscan shinanchacanonfoma. ⁴ Ascatamarocon non nantifi Dioshuunshon non aca cuscan huafain non mato oinmana nonmain ahuun oimatifoshon. Ahuara ahuuscarafaiiton non tunucoinmisi. Noco shinanchacamapai noncai tapiama ahuuscaquimain noco chaca huacanica. Ascafaiiton non tunucoin.

⁵ Ascashon noco coshafain cunu muran noco iquimafain noco huamisifo nan sinamisifo nocoqui fucashon noco chaca huashcaquin nanscamisifoquin. Ascan nonrifi curushcain yonoi atsanacain yamu ichapa oshayamacai foniyanan non ascamisiquin. ⁶⁻⁷ Noco asca huafaino chaca huatamarocon nocon nomuran non ahua chaca shinainma. Non Cristo fu rafuaiton noco yosimisi cuscan man non tapia. Noco chaca huafainfoancai non atoqui sinayamacai funaquima non tunucoinmisi.

Ascashon futsafohuun ramapaicain non ato shara huafafainmisi non Diospan Yoshin Sharahuunshon non ato nansca huamisi fuparatama non atohuun noicoinmisi. Non icon fusti yoimisi. Non Diospan curushhuunshon Jesús yonoshomisi. Non nanfo nansca huafafainquin non mato nantifi ismatiro nonmain Diospan oimatifoshon. Satanás noco chaca huamapaifaiiton Upa Diosin ahuun Yoshin Sharapan nan Dios cuscara noco imaino ahuun curushhuunshon non ahua chacafo potatiro.

⁸ Ascashon futsafoan nocohuunoa tsain shara yoifiaino futsafoan nocohuunoa tsain chaca yoimisifo. Ascan futsafoanrifi, —Pablon nocofunu shararan, —ua huafiainfono futsafoan noco roamisifo. Un iconcoin yoifiamicun, —Pablofin fuparamitsapaimisiran,

—ishon uhuunoa futsafoan yoimisi.
⁹—Pablocai ahuama. Noncai na nocofunu oinpaima, —ua huafiaifono Diosfin ua onancoinshon ua noiquin. Futsafoan ua namapaifiaifono un nia. Ua rutuquirashquifiacaqui ua tsoan rutucoianma. ¹⁰Uhuun nomuran un omitsiscafiai uhuun Ifo Jesushuunoashu un unimamisi. Un ahuuomafiafashu un Dioshuunshon futsafo un imasharamisi. Un ahuuoma shinantsa afiai nantifi Diosinari uhuunari.

¹¹Uhuun yoramishti Corinto anoafoan uhuun nomuran un muai cuscan un mato tapimamisi. Un mato fomanma. Nantifi uhuun nomuran un muai cuscan mato tapima man tapinon. ¹²Ascacun uncai matoqui ointi mutomisima. Manfin uqui ointi mutomisiquin. ¹³Nanscacun un mato yoi. Manfin uhuun facu cuscaracoinfoquin. Ascacun uqui ointi mutoyamacapun. Un mato noiai cuscan uari noicapun.

Icoinra huafoma fu rafufafainyamacahuun

¹⁴Icoinra huafoma fu rafufafainyamacahuun. Sharafoan shinainfo cuscacai chacafoan anorisi shinancanima. Shafa yafi faquishcai osinantiroma. ¹⁵Nanscarifiai Cristo futan Satanascai anorisi shinantirofoma. Cristo icoinra huafon fuchipaiyaifo cuscacai nan icoinra huafon fuchipaicanima. ¹⁶Cristo icoinra huafon ichanancashon Upa Dios cufitirofo. Nantianricai icoinra huafafo atofu ichanantirofoma ahuara ramihua-cashon cufishecaquin. Nan rafucaai ositirofoma. Futsafoancai Upa Dioscoin cufipaicanima. Ascan nonfin Diosin pushu cuscaracuin. Nocon Diosfin natian ni-aquin. Diosin yoini isca huaquin, “Unfin atofu iquicai. Ato fu rafuca-caishquin. Un aton Dios icano. Nanfo uhuun yorafo inonfo. ¹⁷Ascano icoinra huafafo icaifo cuscan

ayamacahuun. Ato fu rafufafainyamacahuun. Ahua chaca huayamacahuun. Man ascaino un matofu iishquin. ¹⁸Ascatan un maton Upa inon. Man uhuun facu nocofunufu yafi ainfofo inon,”

ishon nocon Ifo Diosin yoini. Nan oni-huafoti ato iquinaquin.

7 Uhuun yoramishtichin Upa Diosin noco nannori yoiyotiani cuscan shara. Ascashu non isharanon. Nantifi nocon chaca non shatunon. Ahuarafoan nocon caya iyamarai nocon nomuran noco chaca huamatiro nanfo non shatucoianshu nan cuscara shara non itiro. Non Upa Dios noicoianshu a cuscara shara fusti non ipainon.

Corinto anoafo Jesushuunoashu fiananansharafo cuscan

²Noncai mato chaca huamisima. Ascashori non mato chaca ismamisima marifi man chaca inon. Ahuara matona fipaiquicai non mato fuparamisima. Ascan maton ointinin nocohuunoa shinansharacapun. ³Uncai nan un mato yoiai cuscan un matoqui tsain chaca huashquin yoimisima. Urocon matohuun noicoi un matofu ipapai nan un naitian. Nannori un mato yoimisi. ⁴Unfin mato icoinra huaicain nan un mato yoiai cuscatsi man ayamaiton. Un matohuunoa nantifi yorafo yoisharapai matohuunoa shinansharanonfo. Man uhuun ointi ua fupuashoan. Un omitsiscafiai matohuunoashu un unimacoinni.

⁵Non Macedonian ano nocoshocai non tununima. Nannoshon noco fasi fucash huanifo. Fochishmanantanacaquin. Nocon nomuran non ratucoinni man Jesús tanasharatama man funoaiton oin. ⁶Ascafia Upan Diosin nan nomuran ihuuaifo aton nomuran shinanmasharatiro. Ascacun noco Tito nichishoni nanton nocon nomuran shinanmasharanon. ⁷Nocoqui nocoshon

nocon nomuran shinanmashara. Noco yoia isca huaquin, —Corintofoan uhuun ointi ua unimamaran, —ishon Titopan noco tapimana. Ascara un nicaquin nocon ointi unima. Noco yoiari man uhuunoa yoia isca huaquin, —Non Pablo fasi noi. Nocoqui samamashta nocopainon. Noco cayacafi cunushoni nanton nocon chaca shatumanon. Ascashori nocon ointi non noco. Icon non chaca huua. Noncai afanan asca huapaima. Non fasi Pablo shinainran, —ishon man yoia cuscan Titopan ua tapimana. Un nanscara nicaino uhuun ointi fasi finacai unimacoian.

⁸Un mato cunushona cuscan maton ointi ihuuman. Un mato cunu fomaqui tau huua mato ointi ihuu huamapauquima. Cahuanquisi un mato ointi ihuuman. Ascafia uhuun cunu oinquin man chaca shatua. Ascacun un mato cunu foma cuscacai un ramapaima.

⁹Maton ointi ihuuaite nicaicain uhuun ointi unimaima. Man Diosqui afanan nasoaiton nicaifin un fasi unimacoianquin. Upa Diosifin maton ointi ihuuman man chaca shatunon. Nansacoinfin man man aaquin. Ascan un mato cunushoni cuscahuunshocai un mato funomanama.

¹⁰Ascashon non shinanqui isca huai, —¡Ohua! Un chaca hua cuscan Diosirifi un chaca huaran, —ishon shinanquin non nocon chaca shatupaitiro Upa Diosqui nasoshquin. Non ascaiton Upa Diosin noco numatiro non afu rafupacunon. Ascashocai chipo non shinantiro ma isca huaquin, —¡Ohua! Uhuun chaca un shatuyamashu shara icuana. Un Diosqui nasoyamari shara icuana, —ishoncai non anori shinanpacunacama.

Ascacun icoira huamafoan non shinain cuscacai tsoan anori shinanfoma. Isca huaquin shinanfo, —¡Ohua! Un chaca huaran, —ishon shinanfiacaquin aton ointi ihuu itirofiacai Diosquiri shi-

nanpaicanima. Ascashu naashucaí Upa Dios fu nipatirofoma.

¹¹Ascan mancai ascarama. Shinancapon. Man maton ointi ihuunao man Diosqui nasoshon. Shinanqui man isca huua, —Non fasi Diosqui nasopai afanan a cuscara shara ishquin. Noncai afanan asca huaquin chaca huapapacunacama. Ratoran no fu ichananmisiton chaca shatucasmái non potayotiro no fu afanan ichanainyononma. Non asca huayamaino Upa Diosin noco onaintimatiro. Norifi Pablo noicoin. Afanan no fu ipainon. Noco cunushoni cuscan ratoran non futsan chaca shatuataima non onaintimatiro chaca shatunon non isharashquin, —ishon man yoia. Ascan afanancai tsoan yoitiro ma, —Chaca shatuafomaran, —ishon tsoanricai ahua chaca matohuun nutatiro ma.

¹²Ascacun man tapitiro uncai nan apa ahui ahua futsa fu ica nan no-cofunuhuunoashu ointi ihuuhahuunoi-icai un mato cunu fomanima. Upa Diosin ahui ointaifi man nocohuun shinansharamisi. Nansacun un mato cunushoni man tapinon. ¹³Man nocohuun shinansharaiton nicaquin uhuun ointi un fupuasharacoinna.

Nocon yorahuan Tito arifi matohuunoashu unimacoinyamua. Ascan Tito unimaiton oin norifi non unimacoinyamua. ¹⁴Ascano Titopan tapia un matohuunoa tsain shara yoiai cuscan iconcoin. Un matohuunoa yoiai cuscan nansacoin man huua. Mancai ua rafimanama. Nantifi un matohuunoa yoia cuscan iconcoin afi tapitiro. ¹⁵Tito matoqui nocoshon oian man iscaiton, —Titopan noco yoiai cuscan nan Diospan tsain. Non nicacoianmashu non omitsiscatitoran, —ishon man yoia. Yoitimashu man ratua. Man nicacoinpaiyaiton oin Tito matoqui unimacoín. Matohuun noi

finacoin. ¹⁶Urifi un matohuun noicoin. Un natian mato icoinra huacointiro nan un mato yoia cuscan man aiton. Ascano un fasi unimai.

**—Ahuara ashon futsafori
inansharacahuun, —ishon
Pablonun Corintofo yoini**

8 Ascan un tsain futsari mato yoi man tapinon. Icoinra huafo Macedonia anofo Upa Diosin aton nomuran shinanmashara futsafo inansharanonfo. ²Nan ahuuomafo Macedonia anofo fasi omitsiscafiaquin Diosihuunshon unimacoincaquin nan ahuuoma futsafori ato inansharafo. ³Nan un oian cuscan un mato yoi. Nanfoan futsafo inantiro cuscan paratamacoin ato inancoian. Nanfoanfin inanpaiquin ato inanquin. ⁴Yoi fo isca huaquin, —Jesús icoinra huaa futsafo yopaifo cuscan non ato inanpai. Ascacun Judea anofo non ato pui fomaicai noco foshocapun. Non noco nomuran unimacoinquin non ato inainran, —ishon noco yoinifo.

⁵Non shinanyamua noco pui fusti inainfoshafain non Judea anofo foshoicanon. Ascafiaicai ascara iyamuama. Noco pui inantaifoma ichanancashon noco ointaifi cufiyoyiamuafo isca huaquin, —Nocon Ifon, nonfin min yoraquin. Min noco yonopaiyai cuscan min noco yonotiro. Nonfin minaquin, —ishon yoyiamuafo. Nannori yoicatan nocori yoyiamuafo isca huaquin, —Diosin matohuunshon noco yonopaiyai cuscan noco yonotiro. Norifi non mato nicacointiro, —ishon noco yoyiamuafo. ⁶Titopan tau huaquin mato yoyoni isca huaquin, —Maton puifo ichanan huacahuun ahuuomafo Jerusalén anofo ato inanshcaquin, —ishon yoyoni.

Ascaiton non Tito yoyiamua, —Min yoimisi cuscan afanan ato yoihuu nan ahuuomafo Jerusalén anofo ato pui

inanonfo. Man atohuun noiquin ato man inantiro. Corintofo ato yoihuu, —ishon non Tito yoyiamua. ⁷Man fasi finacaiquifin Jesús icoinra huafain Diospan tsain cayacafi yoifain, ahuun tsain tapisharafain iconcoin Jesús yonoshosharafain man nocohuun noishara. Man nanscara sharafo huaa cuscan nanscarifi huaquin nan yopaifori man ato inansharatiro. Diosihuunshon man ato noicoinquin unimacain ato inansharacahuun. Asca huacaquin tapisharacahuun.

⁸Uficai un mato yonoima man ahuuomafo pui inanon. ¿Un tapipai futsafoan ato fasi inanpaiyai cuscan marifi man ato inanpaimun? ¿Tsain fustiton ato inainran ishon man yoyiamaraquin atohuun noicoinquin man ato inanpaimun? ⁹Man man tapiari nocon Ifo Jesucriston nai murannoashu mai ano fotoataima nantifi ahuuna ipaoni. Ahuacai yopaonima. Ascafia nocohuun noicoinquin nantifi ahuunafo potayoni. Ascashu nocohuunoashu ahuuoma iyopaoni non ahuunoashu isharapacunon.

¹⁰Ascan un shinain un mato shara huapaiyai cuscan nanfohuunoa un mato yoi man tapinon. Ascan manfin fari fusti finoanquin tsoa futsacai man afanan pui ichanan huashon man ato inantaima. Tau huaquin man ahuuomafo noiquin man ato fasi inanpaicoinquin ato inanqui tau huati. ¹¹Man tau huaquin unimacoincain ato inanqui tau huati cuscan natianri unimayanan ato inancahuun afanan yopanofoma. Man inanpaiyaito ato inancahuun. ¹²Ascacun man ato paratama inanpaifaiton man Diosin tapia. Man ascaino matoqui unimai man afanan ayashoma man ato inantiro. Ahuatsi ato inanshquin.

¹³⁻¹⁴Uncai mato isca huaquin yoima, —Ato ichapa inancahuunca un mato huaima. Nanfocai ayaino man yopaitiro, —ishoncai un mato yoima.

Ascan natianfin man ichapayaquin. Ascacun yopaifo man ato inantiroquin. Manracafin chipo yopaicain nanfo ichapayashori mato inantirofo. Man ascafin mafiranan cushunonansharashu man ascatiroquin tsoa futsa yopanonma. ¹⁵Nannori Diosin tsain cununi isca huaquin, —Ratoran futsan ahuun yono ichapa chitunfiacai tushushotiroma ratoran futsari yopaimain inaintonfin. Ascan futsan ichapama chitufiashocai afanan yopatiromaran, —ishon Diospan tsain cununiquin.

Tito yafi afu rafufo

¹⁶Un matohuunoa shinansharai cuscar Titopan arifi ahuun nomuranshon matohuunoa shinain. Diosin ahuun nomuran shinanmana cuscan non, —¡Aicho! Upa Diosin min fasi shara min Tito shinanmashararan, —ishon non yoimisi. ¹⁷Ascashon non yoiyamua isca huaquin, —Corintofo afanan ato oinyotahuun ato yoisharashquin, —ishon non Tito yoiyamua. Non nannori yoiano fasi unimayamua. —¡Aicho! Unfin ato ari caicain. Un ato yoisharapai cairan, —ishon noco yoiyamua. Un shinain nocon tsain fustihuunoashuca caima. Afin matoqui capaisharai cai.

¹⁸Ascacun no futan Diosin tanamisi futsan yafi Tito non matoqui nichishquin. Nan nocon yorahuan fasi shara. Jesushuunoa arifi yoipaimisi. Ahuunoa nantifi icoindra huafoan shara yoimisifo. ¹⁹Nan icoindra huafoti ichanancashon nan nocofunu catonnifo no futan nan pui yopaifo non foshonon. Non ato ismapai pui non ato inain cuscan nocon Ifo shararan huanonfo. Non ato shara huapayai cuscan tapinonfo.

²⁰⁻²¹Nan ahuuomafo non ato pui fomasharapai. Ascacun nantifi yorafoan ointaifi non ato oinmasharapai nocoqui shinanchacanofoma. Nan pui paratama

non foshosharapai. Ascano noco isca huanonfoma, —Nocon pui atirifi noco onuanforan, —inonfoma. Ascano nocon Ifoan ointaifi nantifi yorafoan ointaifi non ato oinmapai non cayacafi ica cuscan.

²²Ascacun nan nocon yorahuan Jesús tanamisi futsan non mato ari nichishquin. Man nonfin nan nocofunu oinmisiquin fasi Jesús icoindra huacoinnaiton. Noco futan Jesús yonoshosharamisi. Ascashon matohuunoa nicamisi man Jesús tanasharashon man ahuuomafo inansharaiton. Fasi mato ari capaimisi mato futan ato shara huashquin.

²³Man manfin Tito onancoianquin. Nantonfin u futan mato yonoshosharamisiquin. U fu rafumisi Jesús yonoshosharashquin. Nan Jesús icoindra huaa futsafori afu mato ari focani. Nan Jesús icoindra huafo ichanancashon ato catonnifo mato ari fononfo. Nan futsafoan ato oinquin yoimisifo, —¡Aicho! Nan na yoran ahuu cuscaraimain Cristoquin noco oinmana. Atohuunshon man non tapia Cristo fasi shararan, —ishon yoimisifo. ²⁴Ascacufin matoqui nocoifoan man ato ismatiro man atohuun noicoinquin. Man asca huaino un matohuunoa yoisharamisi cuscan iconcain icoindra huafotifain tapitirofo.

Icoindra huafo Corinto anoafoan nan icoindra huaa futsafo ahuuomafo ato pui fomanifo

9¹⁻²Mun tapia Jesús icoindra huaa futsafo yopaifo cuscan man ato inanriscapai. Nannori un Macedonian anoafo matohuunoa yoia isca huaquin, —Corinto anoafo fari fusti iquisi itisharafa Jerusalén ano ahuuomafo ato inanshacaquin, —ishon matohuunoa un ato yoia. Man unimayanan ahuuomafo ato inanpayaiton nicacaquin arifi ato inan-

shquicaniquin. Ascacun mancai uhuun cunu fusti yopaima nan pui yopaifo ato fomashquin.

³Ascaciaquun un Tito yafi afu rafuafori matoqui nichishquin un matohuunoa un yoisharamisi cuscan iconcoin tapinonfo. Uncai matohuunoa tapinonfo ipaitsi yoimisima. Un ato yoimisi isca huaquin, —Corinto anoafo man iquisi itisharafo. Man atoqui nocoaiton mato pui inanshcani nan ahuuomafo man foshonon, —ishon un matohuunoa ato yoia. Ascacun itisharacahuun maton pui inantaifoma.

⁴Ascan Macedonia anoa futsa ipaishoma ufu focaquin non mato oian man pui ichanan huayamacun un mato iconra huashon un ato yoita cuscan man pui itishara huacuma un matohuun rafipaiyaino marifi man rafipaitiro. ⁵Nanscacun un shinan Tito yafi afu rafua rafu iquisi rufofo un mato ari ato nichiqui tau huai pui ichanan huashon nan ahuuomafo fomashquin iquisi man itishara huanon. Ascan un chipo ufoico un matoqui nocoshon ufu foafoan tapitiro tsoan curushcai mato yonoama man ato pui inanno ishon. Ascatama man ato inanpaisharaquin man ato inan.

⁶Ascacun ointiaquimayamacahuun. Tsoan fimi ushu fustirasi fana fustirasiri ahuun fimi fitiro. Tsoan ushu ichapa fana yono ichapari fitiro. Nanscarifiai tsoan futsafo ichapama inancun nanrifi Diosin ichapama inanshquin. Ascan tsoan unimaquin ichapa futsa inainton ichapari arifi fitiro. ⁷Nantifiton aton nomuran shinainfo cuscan huafain futsafo inantirofo. Ascashocai yoitiroma isca huaquin, —¡Ohua! Un paratama inanpaiyamafiaiton ua yocariaiton un inain.

Ascan un inanyamaino uqui shinanchacatiro. Un inain uhuunoa shinanchacanonfomaran, —ishon anori shi-

nanyamacahuun. Asca huatama unimayanan inancahuun. Nan futsafo unimayanan inanmisi nanfin Diosin fasi ahuun noiquin. ⁸Man ascacun nan man yopai cuscan paratama Diosin mato shara futsa futsatapafo inantiro man yopanonma. Futsafo yopaifo cuscan man ato inanon. Diosin nantishon tapiquin mato shara huafafaintiro marifi man ato shara huapanon. ⁹Diospan tsain cunuquin isca huani,

“Nocofunu sharapan ahuuomafo ichapa inansharamisi. Atohuun ramapaiyai cuscan huafain nan nocofunuhuucal Diosin ahuun ointiaquimacuncamaran,”

ishon cununi.

¹⁰Diosin nantifi ushu onihuani. Ascacun yoran ushu fanatiro. Chipo Diosin ahuun yonofo foaimashotiro pisharanon. Nanscarifiai man yopai cuscan Diosin mato inanshquin. Paratama mato inantiro man unimaquin futsafori man shara huafafainon. ¹¹Icon Diosin mato ichapa inanpacui manri futsafo ichapa inanon. Ascan nan yopaifo man ato inain cuscan non ato fomashquin fasi unimaquin yoiqui isca huashcani, —¡Aicho! Upa Diosin min fasi sharacoinran, —huashcani.

¹²Man ato shara huai cuscan nan ahuuomafoan fiishcani. Ficashon unimacai yoishcani, —¡Aicho! Upa Diosin min noco shara huamisiran, —ishon yoishcani. ¹³Man ato shara huac cuscan nan ahuuomafo fasi unimashcani man ato inansharano. Ascashon yoiquin isca huashcani, —¡Aicho! Upa Diosin nan noco inanfoan min tsain nicas-haracoincani. “Jesús nocon Iforan,” mia huamisifo. Min ato yonoa cuscan noco inansharafo. Futsafori nanfoan ato inansharamisifo. Ascancunfin nofico un man non oian iconcoin min Furun Jesús aton Ifocoinran, —ishon nan ahuuomafoan yoishcani.

¹⁴Ascan mato Upa Dios cufishoshceni. Man ato Dioshuunshon shara huaa cuscan. Ascashon yoiqui isca huashceni, —Upa Diosin, minhuunshon nafoan noco shara huaa. ¡Aicho! Upan non fasi atohuun noicoin. Atori shara huahuu, —ishon mato cufishoshceni. ¹⁵¡Aicho! Upa Diosin ahuun Furun Jesucristo noco inansharacoinni. Ascashon nocoqui nichini no fu rafupacunon. Afin fasi sharacoinquin. Paratamari ahuunoa yoipasharafia noncai tapiama ahuuscashomain non yoisharatiroquin.

Pablonun ato tapimana
Diosihuunshon ato yonoshomisi
Jesushuunoa yoishquin

10 Natian un tsain futsari mato yoisharapai. Uhuun yoramishtichin ua nicasharacapun. Cristocai tsain curushpan noco yoima. Noco huun noishon funainquimashta noco yoisharai non ahuun tsain nicasharanon. Nanscarifi aqui un Cristohuunshon mato funainquimashta yoisharapai man tapinon. Man atirififain yoiquin isca huamisi, —Pablon no fu icun non oinmisi ahuun tsain shacashta noco yoimisi. Ascafia noco cunushomisi cuscan ascaracaima ratutama cayacaficoïn noco curushcain cunushomisiran, —ishon uhuunoa yoimisisifo. ²Un matoqui nocoshocai curushcai mato yoipaima man ua nicanon.

Atirififoan shinanqui isca huafo, —Pablonun nan icoinra huamafoan shinainfo cuscan noco yoi. Diosin ahuun shinanpacai noco yoiamaran, —ishon yoirafo. Un matoqui nocoshon un ato ismatiro nan icoinra huamafoan shinain cuscaicai un mato yoimisima. Diosin shinain cuscan fusti un mato yoimisi. Nocoshon un ato tsain curushu yoishquin tapinonfo. ³Icon nuno non mai ano ica. Ascafiahu icoinra

huamafoan futsafo finonmapaiyai cuscan noncai asca huamisima noco noicasmaifo finonshquin. ⁴Nan icoinra huamafoashi futan piyan rutunancani. Ascan noncai ascaraashi non piya non ahuara futsafoyashon nan noco noicasmaifo yoshin chacafo non unumatiro. Ascatama Diospan curushhuunshon nan noco chaca shinanmapaiyai noco ato cuyotiro.

⁵Ahuarafoan nocon nomuranshon noco amaqiri shinanmapai non Diospan curushhuunshon non afo potatiro afanan noco anori shinanmanonma. Nanfoanfin Dioshuunoa noco shinanmapaicanima. Non mato yosimisi cuscan nicacasmaifo. Nanscarafonon fu fochishmanantanampaicani. Noco Dios onanmapaicanima. Cacapaimisifoan Dios finonpaifia non Diosin curushhuunshon nanfo non potatiro afanan ascarafononma. Non nocon Ifo cufitiro isca huaquin, —Nocon Ifo Criston, nantifi uhuun shinanpan aton ifo ihuun. Un shinain cuscan mirus fusti ua shinanmahuu un mia tanasharanon, —ishon anori nocon Ifo Cristo non yoitiro. ⁶Man Jesucristo nicacoinshon afanan ahua chaca huayamaino un afanan oaitian nan yoitimafo un ato oinmapacushquin. ⁷Un mato muran imisi cuscan shinanahuun. Man futsa yoiqui isca huaa, —Pablocai ahuama. Acai mutsisipamaran, —ishon yoirafo. Yoiafori, —Nonfin Cristo ahuun yorafocoin, —ishon yoi. Iconquin shinantirofo urifi Cristo yoracoinran.

⁸Nocon Ifo Jesús ua yononi cuscan un mato yonotiro mato chaca huamatama nocon Ifo un mato tanasharamafain maton ointi fupi huamanon. Un anori mato yoimisifiashucai un cacapaimisi itama un mato shara huamapai. Un mato anori yoicai un rafipaiyama. ⁹Uncai uhuun cunupan mato musumapaima. ¹⁰Atirififoan uhuunoa yoiquin

isca huafo, —Pablonun nocoqui cunua cuscan fasi shafacafi mutsispacoin. Ascacia afincoino no fu icun man non oimisi aacai ahuama. Ahuun tsain ahua-maran, —ishon uhuunua yoimisifo.

¹¹Nannori uhuunua yoimisifofiano un samamashta mato ari cashon uhuunua un mato tapimashquin. Un mato cunushomisi cuscan nannoricoin un nocoshon un mato yoishquin.

¹²Futsafoan mato yoimisifo isca huaquin, —Unfin fasi ahuaa tapicoianquin. Un mato tapimasharatiroran, —ishon yoimisifo. Ascarafo ichanancanashu ari ranan yoinancani, —Tsoa futsacai noco cuscara sharama. Norus fusti non tapisharacoianquin, —ishon nan cacapaimisifo ascamisifo. Nanscashon nanfoan fasi amaquiri chaca shinanmisifo. Uncai yoitiroma un sharacoin. Ascashu un aton cuscara itiro. ¹³Noncai anori yoipaitiroma. Diosin noco yonoa cuscan nan fusti non mato yoitiro. Noco yononi non mato ahuaun tsain shara yoinon. Nan fustisi non shinanmisi. ¹⁴Non yoia cuscan iconcoino. Noncai cacapaimisima. Diosin noco yonoa cuscan nan fustisi non mato yoitiro. Diosin noco yonoqui tau huani non mato ahuaun tsain shara Jesucristohuunua yoinon.

¹⁵Futsafoan mato yonoa cuscacai, —Non mato yonoaran, —ishon non yoimisima. Nonfin mato yoiaquin nan non mato ashomisi fustihuunua. Futsafoan mato ashomisihuunuaocai non yoimisima. Manmain paratamari Jesús icoinra huapainon. Ascan Diosin noco yonoaiton non mato paratama yositiro. ¹⁶Man nanscaino nan tsain shara Jesucristohuunua nan chai icafori yoitiro. Nan chai icafo man futsan ato yoianocai un ato yoieran un itiro. Noncai futsa yono shutipaimisima.

¹⁷Ascan Diosin tsain cunuquin isca huani, —Ascan man ratoran futsa

mafiri yoisharapaitama nocon Ifo Jesushuunarocon yoisharacahuun, —huani. ¹⁸Futsan afiri yoisharaicai acai ahuama. Ascaiton nocon Ifo Jesús ahuaunua yoisharaino non icoinra huatiro na nocofunu shara imisi.

**Pablon Jesús fu rafucoinmisi
futsafoancai Jesushuunua
tapiamafiacashon ahuaunua
futsafo tapimapai**

11 Un mato natian yoi. Nan yoran shinansharayamaiton shinantiro cuscan nannori un mato yoifiaquicai nanscaracoin un yoima. Ascacun man ua nicamisi cuscan natianri ua nicasharacapun. ²Nocofunua ahuaun futsa fu icun fasi fashicointiro. Un Cristo yoiyoni arus fusti maton funu cuscara mato iquinon. Manfin ainfo nocofunu futsa fu imisima cuscaraquin. Cristo fusti mato Ifo itiro-ran ishon un yoiyoni. Man ascayamaino urifi uhuun ointi nocotiro.

³Ascacun un matohuun musui Satanás Eva parani cuscan futsafoan matorifi maton nomuran parapaicani man Jesús afanan tanasharayamafain Cristo fusti man noionma. ⁴¡Ohuashta! Futsafoan samamashta mato parapaicani. Non Jesushuunua mato yoimisi cuscan futsafoan matoqui nocoshon ahuaunua yoicoianmafiafoan mancai ato shatumapaitama manrocon ato icoinra huai. Non Diospan Yoshin Sharahuunshon tsain shara Jesushuunua mato yoimisi cuscan nanfoan yoicoianmafiafoan manfin ato icoinra huaquin. Jesushuunua amaquiri mato yosifiafoan man ato shatumanama. Man ato nicaquin yoimisi, —¡Aicho! Man nocofu ipainon, —man ato huamisi.

⁵Ascacufin nanfori afiri yoisharafiai nanfoancai ua finoanfoma. Ascashon mato isca huaquin yoicani, —Diosin noco nichian non mato yosinon,

—ishon ifiacashoncai ua finoanfoma.
⁶¿Man shinanmun un mato Diosin tsain yoiquin uhuun tsainman mato yoisharatiroma? Ascanfia unfin Diosin tsain tapisharaquin. Nan un mato yoiai cuscan cayacaficoín. Manfin ua onancoianquin. Man man tapián un mato Diosin tsain shafacafi yoimisi. Nanscara un mato ismafafaini.

⁷Un Diosin tsain yoiai chaincai un mato ahuashta yocamisima. Uncai mato ahua fiamisima. Ucai mato pui yocama. Ascan un mato chaca huaraca. Ascafia ascaracaima. Mancai ichananshon nan Diosin tsain yoimiscái man inanqui fuya huamisima. Nanscaracai man tapiataima. Un mato Diospan tsain shara Jesushuunoa yoimisi mato shara huaquin man Diospan facufo inon. Un asca huaquicái un mato ahua yocamisima. ¿Ascan man uhuunoa shinanchacaimun? —Pablocai ahumaran, —ishon man uhuunoa shinanra. ⁸Un matofu icai chaincai nan icoinra huafo mani futsa arishon ua inannifo ahuun rafanan un yopai cuscan un finon. Maficairocon man ua inanshara icuana. Ua inanfo rafanan un yopai cuscan un fia aiyashon un mato Diosin tsain yoishquin. ⁹Un matofu ipaoni chaincai un ahua yopafiaquin un mato fucash huapaonima. Nantianri Macedonian anoa icoinra huafo nocoqui nococashon un yopai cuscan ua inannifo. Un mato ano ica chaincai un tsoa ahua yocamisima. Uncai tsoa ahua yocapacunacama.

¹⁰Ascacufin un mato Cristohuunshon icon fusti yoimisi. Nanscacun ahuun tsain iconcoin uhuun nomuran un nanua. Tsoa Acaya mai anofoancai un mato yoiai cuscan ua shatumatiroma. ¹¹¿Un mato anori yoiquinmun un mato noiama? Ma. Anorimafinquin. Diosin tapián un matohuun noicoin.

¹²Nanscacun un mato yonoshonai chaincai un mato ahua fiapaimisima. Natianricai un mato ahua yocaima. Nanscasi huaquin un mato yonoshoniacai nan paramisifo afanan man icoinra huanonma. Nan un yonoai cuscan futsafoan yoimisifo isca huaquin, —Norifi non Pablon yonoai cuscan non yonoiran, —ifiamisifo nanfocai un yonoai cuscan tsoan yonomisima.

¹³Nanfoan paramisifo. Un icai cuscan apaifiacanicai tsoa ascacoianfoma. —Cristo noco yonoaran, —ishon mato shinanmapaifiacani nanfocai Cristo fu rafumisifoma. ¹⁴Icon Satanás nocoqui nocotiro nan Diosin ahuun oinmati afu nai muran ica shara ointsa. Ascashon yoitiro, —Unfin mato shafacafi yositiroquin, —ishon noco fuparapaitiro. ¹⁵Ascacun Satanás yonoshomisifori nan cuscara itirofo. Chacafofiacanashu Diospan yora shara ointsa itirofo. —Norifi non Dios yonosharashomisiran, —ishon noco shinanmapaicani. Ascafiafoan ahuun unutaquin Diosin ato onaintimaquin finacoinshquin. Nanfoan chaca huacanashu omitsiscapanacafu.

Pablon Jesús fu rafumisi omitsiscani cuscan

¹⁶Un mato yoia cuscan afanan mato yoinon. —Pablonun ahua tapiamaran, —ishon uhuunoa shinanyamacahuun. Ascafia uhuunoa shinanpaiqui ua nicayocahuun. Nan man yora futsa ahua tapiama man nicatiro cuscan uarifi nicasharayocapun. Ufiri un ichapama yoimusharanon. ¹⁷Un mato yoiai cuscan ufiri un yoimuishara cuscaicai uhuun Ifoan ua yonoama. Un mato yoishquiai cuscan nan ahua tapiamafoan yoimisifo.

¹⁸Icoina huamafoan afiri yoimuishara cuscan futsafoanri mato yoimisifo. Ascacun nantian un mato yoi ufiri un yoimuisharai cuscan. ¹⁹Mafi man shinanmun man tapicoian.

Nanscashon nan ahua tapiafoma man ato nicatiro. Mato amaqiri yoifiaifoan mancai ato shatumanama.

²⁰ Nan ratoran futsan mato curushcai yonoai cuscan man nicacointiro. Man ahuan oinmatifo cuscaracun mato nanfoan yonoa. Ascashori mato yonocani man ato cushusharanon. Mato fucash huafain mato roamisifo. Mato asca huamisifo. ²¹ Mato asca huariaquin shinanfo racafi, —Nofin mutsisipafoquin, —ishon shinanmisifo. ¡Ohua! Uncai anori shinanmisima. Ascan uncai icaifo cuscan ufiri yoimuisharatiroma. Man shinanracafin un mutsisipamaquin. Nanfoan mato aca cuscaai un mato asca huamisima. Ascacun un rafipaitiro. Ascafia nanfo afiri yoimushara cuscarifiai nanfoan mato ahua yoiafo cuscahuunoari ufin un yoimuisharatiro. ¡Ohua! Nan ahua tapiafoma cuscan afanan un mato yoi.

²² ¿Nanfoan yoiafomun, —Non Hebreo sharafo, —ishon? Unrifi un Hebreoquin. ¿Nanfosimun Israelifo? Urifi un Israeliquin. ¿Nanfosimun Abraham ahuan funafo? Urifi un ahuan funaquin. ²³ ¿Nanfosimun Cristo ahuan oinmatifo? Uncaifin ahuan oinmati shara finacaiquin. ¡Ohua! Un asca huaquin yoipaiyamafiaquin un mato yoiai cuscan shinancapon. Nan paramisifoan mato yoiquin isca huacani, —Nonfi fasi curushcai Jesús yonoshonaquin, —ishon mato yoiafo. Uncaifin fasi yonoshocui finacaiquin. Nanfoanraca yoiqui isca huamisifo, —Jesushuunshon noco cunu muran iquimanaforan, —ifiamisifo ucaifin cunu muran iquimaquin finacaimisifoquin. Ucaifin fichin coshaquin finacoinmisifoquin. Ua coshafoticaí un tanan huatiroma. Mun nari nari cuamisi.

²⁴ Uhuun yora Israelifoanfin ua mucu fustiti coshaqui huafoquin. Nan ua

coshaifotifi ua treinta nueve huafain ua coshamisifoquin. ²⁵ Romanonfoanri ua coshaquin rafu non fusti huaafo. Ascashon uarifi uhuun caifoan toquirinin tsacaquin fusti huanifo. Shashohuanun non pocufainaino man uqui shashohuan cashcui rafu non fustiaino mun asa cuani. Man shashohuan ua ya cashcuano un yamu fusti non shafa fustiri unuhuan naquinoashu un ahuan naoti yatanni asashquima. ²⁶ Un cahuancacainachain manifoti Jesushuunoa yoishquin nan unu coshicoiain fasi musucuin muran icain ua yomutsofoan achicashon ua musuni tapifain uhuun caifoncoinchí ua musuni tapifain nanscarifi aquin uhuun caifomafoan ua musuni tapifain. Pushurasifo anofoanri ua musuni tapifain tsoan istaipama anofoanri ua musuni tapifain unuhuan musuni muran futsafoan yoiquin isca huafo, —Norifi non Jesús Ifo huaran, —ifiacashon parafo. Nanfoanri ua musuni tapifain. ²⁷ Un isin mufiain un fasi curushcai yonomisi nan un yamu ichapa osha tunufain un foniyanan nomicain piqui tunufain fasi un matsinacain sahuutiamá icain.

²⁸ Ascatarifi nantifi Jesús icoinra huafo ichananti pushu anoshon ahua ato fucashni huai cuscan urifi un atohuunshon uhuun ointi nocomisi. Shafatifi un ato shinanmisi. ²⁹ Un nica futsan Jesús tanasharapafiaín ratuaino urifi un atohuun ramapaitiro. Nan futsan chaca huacun un ahuanshon urifi mutiro. Futsan futsa chaca huamacun urifi uhuun ointi atohuunshon un nocotiro.

³⁰ Ascan un mato rama yoia cuscan un afanan yoimuisharainocai, —Un Jesusmaisi ahua huatiromaran, —ishon man tapinon. Un omitsiscamisi cuscan un mato yoi. ³¹ Non isca huanon, —Upa Diosin min shararan, —non huapanon. Nan nocon Ifo Jesucristo ahuan

Apa nannori non yoipacunon. Nantofin man tapiaquin. Uncai mato paraima. ³²Nan pushurasi ahuun anu Damasco ano niaifoncoinnin Aretas ahuun niaifo patashari yononi nan pushurasi Damasco ano cushushon ua achinonfo. ³³Ascacun nan Jesús icoinra huafoan ua futanmanhayan muran onucashon cunu foman cayashon ua fotomanifo un casharanon.

Pablon ahuun namapan cuscara Diosin tapimani

12 Ufin un yoimuisharai. Ascara tsain uhuunoa un yoimuainocai ahuacoimma. Nanscafiacun nocon Ifo Jesús ua oinmana cuscan un mato yoinon. Ascano namapan cuscara ua oinmana. Tsoan nicayomisima cuscararifi ua tapimana. Nannori un mato yoi. ²Catorce fari man finoan Diosin nai muran icano ua ihuiriscatani. Un Cristo fu rafuaiton oinquin ua ihuiriscatani. Uncai tapiama uhuun yoshin fusti nai muran cani iyamarai uhuun cayafoya un caniraca. Diosin fustitofin tapiaquin nan un ini cuscan.

³⁻⁴Diosin nan icano ua ihuiriscatani. Un mato yoia cuscan afanari un mato yoi. Uhuun yora mumacoin iyamarai uhuun yoshin fustisimain caniquin uncai tapiama. Diosin fustitofin tapiaquin nan un ini cuscan Diosin icano ua ahudara nicamani cuscacai un tsoa futsa yoitiro. Ascashon ua yoiquin isca huani, —Un icano min oian cuscan tsoashta yoiamahuu, —ishon ua Diosin yononi.

⁵Un oian cuscan huafain un futsa yoitiro isca huaquin, —Diosifin ua fusti nan icari ua oinmaniquin, —ishon un yoitiro. Ascafiacucai un anori yoipaima. Asca huaquin yoiahuu un cacapaimisi itiro. Uncai ufiri yoimuisharapaima. Uruscai un ahua huatiroma. Unfin Diosin huunshon un ahudara huatiroquin. Nan-

scacufin nan fusti un yoimisi. ⁶Ufiri un yoimuisharapaifin un yoitiroquin. Un anori yoiquicai yora tapiamafoan yoitiro cuscan un yoima. Un iconcoim uhuunoa yoisharatiro. Ascafi uncái ufiri yoimuisharapaima uhuunoa shinanquin finacoimnonfoma.

⁷Upa Diosin icari ua ismani cuscan tsoa futsacai oimnisima. Ascano Diosin shinanni ua oinmanihuunoa uhuun ufiri yoimuisharaino un cacapaimisi itiro. Ascacufin Diosin Satanás nitun huamaya-maino yoshin chacan uqui nichini ua fucash huariamisi un cacapaimisi inonma.

⁸Ascacun un cufinquin isca huani, —Ifon, ua cayahuapun, —ishon un yocaquin rafu non fusti huani. ⁹Un asca huafaiaton nocon Ifoan ua cumaquin isca huani, —Un mihuun noi. Uhuun curushhuunshon nan pau min tunutiro. Un mifu rafucacaini. Nan fusti min yopai. Min mutsispamafiacun un minhuunshon un ato ismatiro un ahuaamamishti huatiroman, —ishon ua cumani. Ascacufin unimaquin un yoifafainicai isca huaquin, —Un mutsispamafiacun uhuun Ifo ahuun curushu ua inantiran, —ishon un yoishquin. Ascano Cristo ahuun curushu ua inantiro.

¹⁰Ascano un mutsispamafiahuu Cristohuunoa uhuun unimai. Ascashon ua roafain ahudara chaca finoin omitsiscamafain ahudarafoan ua fucashni huafaiaino un unimaquin tunutiro. Un asca huaquifin un mutsispamafiahuu Cristohuunshon un ahuaamamishti huatiroquin.

Pablonun icoinra huafo Corinto anofo fasi shinanni

¹¹Nan yora ahua tapiamafoan yoitiro cuscan un mato rama yoia. Un mato anori yoifafin matohuun nuaquin. Asca ufiri yoimuisharatama mancairocon uhuunoa yoisharain

shara icuanaquin. Nan futsafoan mato paran. —Nonfin Jesucristo fu rafumisisharaquin, —ishon mato parafiamisifo man ato icoinra huamisi. Ascan uacaifin man icoinra huaquin finacaitiroquin. Un ahuamafiacucai afoan ua finoncoianfoma. ¹² Un Jesucristo fu rafumiscoinshofin un mato ismamisiquin. Un ahuunshon mato ahua sharafo isma man Jesús icoinra huanon. Un ahuunshon mato isma cuscan yoirafo, —¡Aira! ¡Oincapon! Diosin ahuamamishti huatiroran, —ishon yoimisifo. Ahuunshori ascapainifo un mato isma Diosin ahuamamishti huatiro tapinonfo. Funaquima un afo mato ismacoinmisi.

¹³ ¿Ascan ahuuscaquimun man isca huaquin shinanquin? —Pablonun icoinra huaa futsafo shara huaa cuscacai nocorifi shara huashoanmaran, —ishoncai man uhuunoa yoitiro. Un icoinra huaa futsafo ato shara huashoan cuscan nanscarifi huaquin un mato shara huafafaini. Uncai mato ahua fianpaimisima. Unricai mato fucash huamisisima. —Ua pimafain ua sahuumacahuuncai, —un mato huamisisima. Ascacun ua rau huacapun.

¹⁴ Munfin mato ano cai rafuaquin. Mun itisharashu natian afanan un mato ari cai. Un amisi cuscacai afanan un mato yocaquin fucash huaima. Uncai matona fipaitama unrocon mato fuchipaico. Shinancapon. Facufoancai apa yafi ahua pimamisisima. Ascan ahua futan apacaifin aton facufo pimamisisiquin. Ascan manfin uhuun facucoinfo cuscaraquin. Ascan uncaifin mato Diospan tsain tapimasharaquin uhuunoa man isharanon.

¹⁵ Ascacunfin nantifi un ahua ya cuscan un mato inanfain ufiri un inanmui man Jesús tanasharanon. Ascacun un mato noiquin finacoinfiatocai man ua noiquin finacoinma. ¹⁶ Atiri-

foan uhuunoa yoiquiraca isca huafo, —Icon Pablon noco ahua yocayamafi-aquin noco paran. Noco ahua fianyamafiashon noco fomanran, —ishonraca man yoimisi. ¹⁷ ¿Nan nocofunfo un matoqui nichini nanfohuunshon unmun mato paran maton pui fianshquin? ¹⁸ Un Tito yoini isca huaquin, —Corintofo ano catahuun, —un huani. Noco futan icoinra huaa futsafo un matoqui nichian. ¿Titopamun mato paran matona fianshquin? Ma. Man manfin tapiquin Titopacai matona fianpaimisima. Un matofu imisi cuscan arifi matofu ica. Non nanscara rafu matohuun noiquin. Mato shara huashopai Diospan Yoshin Sharahuunoa noco rafu non matofu imisi.

¹⁹ —Man shinan raca un mato yoi ai cuscan man uhuunoa shinansharanon, —ishon un mato yoi. Ma. Anoricaima. Upa Diosin nan un yoi ai cuscafin ua nicaquin Cristo ua yoimai cuscan un mato yoiaton. Uhuun yoramishtichin nan un mato yoi ai cuscan un mato shara huapai Jesús shinain cuscan huaquin marifi nannorisi man shinanon.

²⁰ Ascacun un matoqui nocoshon oinpai man chaca shatushon Jesús tanasharanon. Un matoqui nocoshon oian man chaca shatuyamacun uhuun nomuran un omitsiscatiro. Un matoqui chipo no-coaitian manraca fochishmanantanacai futsa finonmapai aqui sinacai samamashta sinacucahuanmisifo icai asca huaquiraca, —Norus fusti tapishara. Tsoa futsafoancai non tapishara cuscan tapiafomaran, —icain. Nannori yoitia-canashu chaca huatanancain yoiti huatanancain cacapaimisi icain man nannorisi shinanquima. Man nansca huainofin un ratuicain. Man asca huaquin chaca shatuyamashu man ua oinpaikai cuscacai un ascatiroma. Man uqui unimaquin ua oinpaifiaquin man chaca huaino un matoqui unimatamarocon un

fasi mato shinain omitsiscatiro. Man nanscaiton un mato oinmanaquin.

²¹Man asca huainofin un matoqui nocoaitian un ratuicain. Maton nomuran man ahuafo shinanchacafain maton nomuranshon man chaca huapaiyai cuscan huariaino. Nocofunfoan aton ahuinma fu icaifoanno ainfofori aton funuma fu icaifoanno. Nanscara chaca futsa futsatapafo huafiain man maton chaca shatuashma Diosiqui man afanan nasoyamaino. Un matoqui nocoshon oian man asca huaino un ratutiro. Maton ointaifi uarifi Diosin matohuunshon ua rafimashquin. Man acai cuscahuunoashu un fasi omitsiscatiro. Ascacun un uaiyanan mato oinmai.

Pablonun afanan chaca huanonfoma ishon ahuun unutaquin ato yoini

13 Mun mato oinqui rafu huaa. Natian un afanan mato oincai. Diospan tsain noco yoiquin isca huani, —Tsoan yoiquin isca huai, “Nanton chaca huaran,” ishon yoiaino. Rafu non fustiton nannorifosi yoiaino iyamarai rafutan nannorisi yoiaino non icoinra huatiro, —ishon Diosin tsain cununi. ²Un matofu iyoshon un mato yoini man chaca huanonma. Natianrifi un afanan mato yoi. Un matoqui nasoshon oian tsoan aton chaca shatucunma un ato oinmashquin. Tsoashtacai un finonmashquima.

³Manraca tapipaicai Criston uhuunshon mato yoiaiton. Iconquifin man tapicai. Man samamashta tapitiro. Un mato shafacafi ismatiro. Uncai mato ipaitsi yoima Cristohuunshon un mato yoi. Cristocai mato fuparanima tapimanama mutsisipacoincain mato tapimai man maton chaca shatunon. ⁴Icon Cristo nocohuunoashu ihui coyan iquinanqui mastafono nocofunu fupashcoinini. Nocohuunoashu naicain afin numanima. Nafianishaquin natian Diosin

ahuun curushhuunoashu man afanan nia. Nanscarifiiai nonricai mutsisipama. Afin omitsiscani norifi omitsiscatirofiashu Cristo mato shara huashoan cuscan norifi Diosin curushhuunshon mato shara huafafaini.

⁵Ascacun maton nomuranshon shinancahuun. ¿Iconmun man man Jesús icoinra huaa maton chaca shatucioianshu Upa Dios fu ipashcaquin? ¿Man tapicioianmun Jesucristo matofu rafua? ¿Man mumisimun? ¿Man mafiri fuparamuamun? —¿Unfin Jesús ahuun yoracoinquin, —ishon man yoifiashucai man ahuun yoracoinmamun? ⁶Man manfin ua oinquin tapiaquin un Cristo ahuun yoracoincun. Nan man icoinra huapainon. ⁷Un mato Upa Dios cufishomisi man chaca huanonma. Nocohuunua shinansharanonfo ishoncai un Upa cufimisima. Isca huaquin futsafoan nocohuunua shinantirofo, —Pablon yafi afu rafuafoancai ato yonoshosharafomaran, —ishon nocohuunua yoifiacanashu. Ascacun marifi man Jesús tanasharaino fasi sharacoin itiro.

⁸Noncai ahuaara iconcain shatumatiro. Non asca huapaitamarocon Diospan tsain iconcain non afohuunua futsafo yoisharapai. ⁹Ascano non ahuaamaran ishon shinanfiacaquin man Jesushuunoashu isharacoianno non fasi unimacointiro. Ascan non mato Upa Dios mato cufishona man nan cuscara sharacoin inon. ¹⁰Ascacufin un mato isca huaquin cunushona cuscan. Un matoqui nocoshon oian man Cristo tanasharacoincun un ointoshinon. Uficoin un mato muran cayamaquin un mato cunushoquin isca huai man nicasharanon. Ascan un matoqui nocoshocai Diospan shinanhuunshocai un mato curushcain yoishquima. Diosicai un mato oimanon ua yonoama. Uroco mato Jesushuunua shinansharamani.

¹¹Uhuun tsain unutaqui un mato yoisharapai. Jesús cuscara shara fusti ipaichahuun. Ua nicasharacapun. Nannorisi shinacahuun. Isharacahuun. Man ascaino Diosin matohuun noico-incain mato imasharanon. Ascashon maton ointi unimamanon matofu ishon. ¹²Nantifi yoinonansharacahuun.

¹³Nantifi Jesús icoira huafo ufu icafoan mato yoisharapai. ¹⁴Nocon Ifo Jesucristo matohuun ramapai. Nocon Diosiri matohuun noicoira. Diospan Yoshin Shara matofu rafupacunon. Nanti.

Pablo

Pablonun Galacia Anoafu Cunu Fomani

Pablonun Galacia anoafu nan icoinra huafoti cunu fomani

1 Unquian Pablo un mato cunu fomai. Unfi Jesucristo fu rafumisi. Un mato ari caitocai nocofunufuan ua nichinifoma Jesucristo futan Apa Diosin ua nichinifo. Man Furun naafiacun Apa Diosin funimani. Nan rafutan ua mato ano nichinifo. ²Nan icoinra huafo nuno ufu icafoan nantififain Jesús icoinra huafo Galacia anoafu mato tsain shara fomai. ³Un mato fasi shinain. Nocon Upa Diosin futan Furun Jesucristo matohuun ramapai. Maton ointi mato unimamanon. ⁴Ascacun non chaca huamisihuunoashu Jesús nani noco chaca soashoshquin. Nan maifoti ano yora chacafo muran non ica. Upa Diosin afin apaiyai cuscan nan chacafo murannoa natian Jesús noco numai. ⁵Ascacun, —Dios sharacoinran, — huapanonfo. Amen.

Jesús fustiton noco chaca soashonano ahuunoashu fusti non Upa Dios ari nocotiro

⁶⁻⁷ Ascan Cristo matohuun ramapaiyaino Upa Diosin mato catonni. ¿Upa Diosin mato catonfianicun tsain futsa nicaquin ahuuscain man samamashta Upa Dios potaimun? Nancai Jesucristohuunooa cuscarama. Nanscaracai tsain futsa sharama. ¡Ohua! Man ascaiton nicai un matohuunshon ointi nocoi. Un shinanraca futsafoan mato amaquiri yoishonafo mato funomashcaquin. Nan tsain sharacai Cristohuunooa cayacafi mato yosiafoma. ⁸Un nan tsain shara mato cayacafi yosimisi. Ascan tsoan mato amaquiri yosiamun

un iyamarai ratoran futsan iyamarai Diospan oinmati afu nai muran icaton amaquiri yosiashu omitsiscapanacafo muran fopainonfo. ⁹Un mato yoimisi cuscan un afanan mato yoi. Un na tsain shara Jesucristohuunooa un mato yoimisi cuscan man man icoinra huua. Ratoranfoan mato amaquiri yosipaiashu omitsiscapanacafo muran fopainonfo.

¹⁰Uncai ufiri curafia huamupaima. Ascata un Upa Diosin uhuunooa shinanmasharapai nanton ua amapaiyai cuscan huaashquin. Un yorafo uhuunooa shinanmasharapaiyaino uncai Cristo oinmati itiroma.

Ahuuscashucon Pablo Jesús fu rafumisi inimun

¹¹Uhuun yoramishtichin un mato shafacafi tapimapai. Na tsain shara Jesucristohuunooa un mato yoimisi cuscaicai nocofunufuan aton shinanma. ¹²Na tsain shara un mato yoimisi cuscaicai nocofunun ua tapimanima. Tsoa futsacain ua yosiamama. Ascataamarocon Jesucristo uhuun nomuran ua shinanmana cuscan un mato yoimisi.

¹³Nocon shunifoan noco yonopaoni cuscan anunifo Judaismon. Urifi nan un tanacoinyopaoni. Nanfin man man nicamisi. Man man tapia nan Jesús icoinra huafo Dios tanasharapaiyaifo un fasi curushcain ato omitsiscampaoni. Un ato cuyopaicoipaoni. ¹⁴Noco shunifo nan Judaismon noco tapimapaiyai cuscan un fasi finonmafain tapifafainpaoni. Uncaifin fasi finonmafain tapifoanfafainpaoni. Uhuun faritiri un ato finonmacoipaoni. Un fasi tapiquin finacoipaipaoni.

¹⁵⁻¹⁷Un caiantaima Upa Diosin ua fasi ramapaiquin ua catonni un ahuun yonoshomisi inon. Upa Diosin ua yoimamapaiyai cuscan uhuun caifoma un ato Furun Jesucristohuunooa tapimanon. Uncai nocofunu futsa

fu tsainnima ua tapimanon. Upa Diosin afin ua catonnitian un Jesús fu rafumisifo ari catama. Unrocon Arabia mai ano caní. Nannoashu un chipo Damasco pushurasi ano nasoni.

¹⁸ Ascano fari rafu non fusti finonyotan un Damasco anoashu ari caní Pedro oinpai. Un quince oshatan un afu iyoni. ¹⁹ Nan Jesús fu rafumisifo docecai un atoquí nocoyonima. Santiago nan noco Ifoan Jesús chipocu fusti un oinni. ²⁰ Uhuun yoramishtichin ua Diosin oiainno un mato icoinra huampaifain un mato cunushonai cuscan nan iconcain. Uncai mato paraima.

²¹ Tapicahuun un chipo Siria yafi Cilicia mai ano caní. ²² Nan Cristo icoinra huafo Judea anofoancai ua oinyomisifoma. ²³ Ua oinyamafiamisishaquin uhuunoa yoiaifoañ nicamisifo isca huaquin, —Na nocofunun Pablonun noco omitsiscamapaoni non afanan Jesús icoinra huanonma ishon. Nacorifi cuyopaipaoni. Ascafia natian arifi man Jesús icoinra huaa. Ascashon futsafori icoinra huamapairan, —ishon yoinifo. ²⁴ Ascashon uhuunoa yoinifo isca huaquin, —Pablonun man Jesús icoinra huaa. ¡Aicho! Diosin fasi sharacoin. Ahuamamishti huatiroran, —ishon yoinifo.

Jesús fu rafumisi futsafoan, —Pablo no fu inonquin, —huanifo

2 Ascano fari catorce finontan afanan un Bernabé fu ari caní. Tito arifi no fu caní. ² Diosin uhuun nomuran ua shinanmanai cuscan un atoquí noconi un nocon caifomari nan tsain shara Jesucristohuunoa un ato tapimani. Atirificai un yoinima. Aton niaifofo fusti un ato yoiyoni. Un ato yocani isca huaquin, —¿Un Jesushuunoa yoimisi cuscan man shinan cayacafimun? ¿Un-raca ipaitsi yoimisi? Man shinain cuscan ua tapimacahuun, —ishon un ato

yoini. ³—Shara. Min ato yoia cuscan cayacaficoiran, —ishon ua yoinifo. Tito ufu oaiton Israelicuma, —Foshqui rupa shatuhuu, —tsoan huanima. ⁴ Futsafoan nannoshon yoinifo isca huaquin, —Norifi non Jesús icoinra huaran, —ifiacashocai tsoan icoinra huacoinaño inima. Nanfoanri yoinifo isca huaquin, —Tito arifi foshqui rupa shatutiroran, —ishon yoinifo. Anori yoiyamafoan-nocai tsoan anori shinan icuanima. Nanfo no fu ichanannifo. —Norifi non mato cuscararan, —ishon noco shinanmapaicani. Ascashon noco fomanpaicani. Non Jesús icoinra huashu noncai ahua futsa yopaima isharashquin. Ascafia nanfoan yoinifo isca huaquin, —Noncai Moisés cununi cuscan ayamashu non Dios fu itiomaran, —ishon noco yonopaicani. Ascashon nanfoan afanan noco oinmati cuscara imapaicani non Jesucristo fustisi tananonma. Moisés yononi cuscan tananonfo ishon. ⁵ Nanfoan noco yonopaiyaifo cuscaicai non ato tsain fusti non nicayoama man iconcain Jesucristohuunoa tapiai cuscan funononfoma.

⁶ Uncai catontan niaifofosi noima ahuaamafori nanscari huaquin un noicoin. Nanscarifi huaquin Diosicai nocon fusohuunshon noco onainma noco shafacaficoin onancoin. Ascacun Jesús fu rafumisifoan ua isca huacani, —Min Jesushuunoa yoimisi cuscan shara tsain futsa yopaimaran, —ishon ua yoinifo. ⁷ Ascan Diosin Yoshin Sharapan Pedro catonni Jesús fu rafumisi inon. Ascashon nocon caifo Israelifo Jesushuunoa ato tapimanon. Nanscarifi aquin uarifi catonni un afu rafumisi inon. Ascashon uhuun caifoma urifi un ato yoinon.

⁸ Ascashon Upa Diosin Pedro catonni afu rafumisi inon. Nocon caifo muran nichini. Jesushuunoa ato yoiaiton Upa Diosin Pedro mutsismani ahuun curush-

huunshon ato yoinon. Nanscarifi aquin ua catonni afu rafumisi inon. Ascan nocon caifoma muran nichini un ato yoinon. Un ato yoiaiton ua mutsismani ahuun curushhuunshon un ato yoinon. ⁹Ascano Upa Diosihuunshon un nocon caifoma yoiaiton nicaquin nan Santiago non Pedro non Juan atishon ua Bernabé yafi muninifo. Ascashon noco yoiquin isca huanifo, —¡Aicho! Non nocon caifo Jesushuunoa yoimisi cuscan marifi futsafo yoitiro. Nocon Ifo yonoshosharatacahuun. Nonfin nocon caifo fusti ano camisi ato yoishquin. Ascan manfin caifo futsafo ari catiroquin. ¹⁰Man nunoashu nasoaitian ahuuomafohuun ointiaquimayamacahuun. Nan pui non mucua foshotiroran, —ishon noco yoirafo. Nicai un unimacoian. Untsi nanscarí huapayamai.

Pablonun Pedro Antioquía anoshon yoini, —Min chaca huairan, —ishon

¹¹⁻¹⁴Ascanfashon Pedro Antioquía pushurasi ano nocotan chaca huatishoni. Noco caifoma futan piyoni. Chipa Santiago fu rafuafu Antioquía ariashu nocoqui funifo. Nocotoshiaifoanno Pedronun afanan ahuun caifofosiyashon pini. Pedronun ahuun nomuran shinanquin isca huani, —Uhuun caifo Santiago anoashu funifo. Ascashocai nocon caifoma futan piinifoma. Ascan uhuun caifoma futan un piyaino uqui shinanchacatirofo. Ascano un afanan ato futan pitiromaran, —ishon Pedronun amaquiri shinanni. Ascacaiton oinquin un nantifiton ointaifi Pedro yoini isca huaquin. —Mirifi min Israelifashu nocon shunifoan yonopaoni cuscan man min aquima. Min nocon caifoma cuscara imisi. ¿Ascan ahuuscain natian min nocon shunifoan yonopaoni cuscan min nocon caifomafo min ato tanamapaiyain? —ishon Pablonun Pedro yoini.

Israelifo yafi Israelimafoan ato chaca shatucanashu Jesús icoinra huacanashu Dios fu nipatirofo

¹⁵⁻¹⁶Ascan noncai mani futsa cainnima. Nanfoanfin chaca huamisifo. Nonfin Israelifo cainniquin. Ascafia man man tapia Moisés noco yononi cuscahuunshocai non nocon chaca soatiroma noco Diosin onaintimanonma. Ascatama non Jesucristo icoinra huaiton nocon chaca soashotiro. Non ascacitocai noco onaintimashquima. Moisés yononi cuscan non aitoncai noco chaca soashotiroma. Ascan non Jesucristo fusti icoinra huaiton noco onaintimashquima.

¹⁷Nonfin Cristohuunshon noco chacan soatiroquin noco onaintimanonma. Nanscara man non tapiflashu nofiri non chaca huamisi. ¿Non chaca shatucoinyamacumun Cristo noco chaca huamapaiquin? Ma. Ascara shinanchacapacuyamacahuun. ¹⁸Moisés noco yononi cuscan man non tapian. Ahuunoashucaí non Dios fu nipatiroma. Jesús fustiton nocon chaca soashotiro non afu nipanon. Nan non icoinra huai. Ascano Moisés cununi cuscan afanan nasopaiashu non funotiro Dios fu ipashquin. Non afanan nasoquin non oinmani non noco chaca shatucoinshoma.

¹⁹Ascan Moisés yononi cuscan ayaquin mun tapini uncai afohuunoashu isharatiroma. Un ascainocai Upa Diosin uqui unimatiroma. Ascacun nanfohuunshon un tapini Cristo fusti un icoinra huaino Upa Diosin uqui unimatiro. Ascashu un ahuun yora itiro. Ascan natiancai un afanan Moisés yononi cuscahuunoa shinanpainacama ua nimapacunon. Afanan ascara shinantama un Dios fusti fu rafui isharashquin.

²⁰Nocon Ifo Cristo ihui coyan iquinanqui mastafuanno nani cuscan urifi un afu

naa cuscaracoin ini. Ascacuai natian un ipaoni cuscan un afanan aima. Un Jesús icoinra huataima un ipaoni cuscacai un afanan aima. Cristo Diospan Furunmun ua noicoin afin ipaiyai cuscan ua nashoni. Ascacun un icoinra huaino natian Cristo unfu rafucacaini a cuscara ua imashquin. ²¹ Ascan Upa Diosin Furunhuunshon uhuun chaca ua soashoni un afu nipasharanon. Uncai ahua futsa shinanmisima nipasharashquin. Nan fusti un shinanmisi. Moisés cununihuunshon nocon chaca non shatutiroanocai Dios fu nipanon Cristo noco nashocuanima. Ipaitsi noco nashoncuani.

Moisés yononi cuscan

tanayamaraquin non Jesús icoinra huacun noco chaca noco soashotiro

3 Uhuun yoramishtichin Galacia anofoan manfin nison cuscarafokin. ¿Tsoan mato amaquri yosiamun? ¡Ohua! ¿Tsoan mato paramun man afanan shinansharanonma? Ascan nonfin mato cayacaficoin yoimisi Jesucristo mastafanno matohuunoashu nani. Non mato tapimasharafiamisicun mancafin tsain amaquri shinanmisi.

² Nan fusti un mato yocapai man ua cumasharanon. ¿Moisés noco cunushoni cuscan tanashon man Diospan Yoshin Shara fia iyamarai nan tsain shara Jesucristohuunoa man icoinra huashon man fiamun? ³ Man Diospan Yoshin Sharahuunoashu Jesús mato imapaiyai cuscan man ayopaoni. Ascaffia natian man shinanqui isca huua, —Moisés noco yononi cuscan aashu non isharatiroran, —man ica. ¡Ohuashta! ¿Ahuuscain nisofoan shinanmisi cuscan man shinainmun?

⁴ Man Jesús tanasharaiton mato omitsiscamapaonifo. Ascashon man Diospan Yoshin Sharahuunshon Jesús tanasharamisi. Natian afanan Jesús fusti tanayamaino man ipaitsi Jesushuunoashu man omitsiscapaoni.

Ascayamapainon. ⁵ Man nicamisi cuscan man man icoinra huua. Ascacun ahuun Yoshin Shara mato inanfain tsoan oinyonima cuscara shara mato ashomisi. Moisés cununihuunshomaquin.

⁶ Nocon shuni Abrahamhuunoa shinancapon. Abrahamfin Diosin yoiyoni cuscan icoinra huaniquin. Ascaiton Diosin yoini, —Mian icoinra huacun un min chaca soashona min ufu ipanon, —ishon yoini. ⁷ Ascacun tapisharacahuun. Nan icoinra huafoti Abraham facu cuscarafu. ⁸ Upa Diosin inonpacoai cuscan tapiyoni nocon caifomafoanrifi Dios icoinra huaifoan aton chaca soashofain ato imasharashquin. Ascaifoanno atoqui fasi unimacoinni. Diosin Abraham yoiyoni isca huaquin, —Un minhuunshon manifoti un ato shara huashquiran, —ishon Diosin tsain cununi. ⁹ Ascashon Abraham icoinra huamiscun Upa Diosin a shara huashomisi. Nanscarifi aquin icoinra huafoti ato shara huashomisi.

¹⁰ Ascan Diosin tsain cununi isca huaquin, —Moisés cununi cuscan ayamacanashu omitsiscai unupacunacafomaran, —ishon cununi. Tsoacai Moisés cununi cuscacoin amisima. Ascacufin ratoran futsan shinanquin isca huai, —Moisés cununi cuscan un aino Upa Diosin uhuun chaca ua soashotiro un afu ipanon, —ishon anori shinanfiaicai ascacointiroma. ¹¹ Tsoan Upa Dios icoinra huaitonfin ahuun chaca soashofain imasharatiroquin. Ascan tsoan Moisés yononihuunshon aton chaca soapaiquin shinantiro isca huaquin, —Moisés yononi cuscan non ainton noco imasharatiroan, —ifiaifoancai Upa Diosicai Moisés yononi ahuunshon ato imasharatiroma. ¹² Ascacun man nonfin tapiaquin Jesús fusti non icoinra huashu non Upa

Dios fu ipatiro. Ascan Moisés noco yononi cuscahuunoacai ascarama. Moisés noco tapimaquin isca huani, —Nantifi Diosin noco yononi cuscan nantishotapiquin non acacainyamai non Dios fu itiromaran, —ishon cununi.

¹³ Ascan Moisés noco cunushoni cuscan non ayamaiton Upa Diosin noco onaintimashqiran ishon cunufiani nococairocon finonmacufoantan Furun onaintimani. Nocoahuunoashu omitsiscani. Diospan tsain cununi isca huaquin, —Ratoran futsa ihuiqui mastaifo nanrifi Upa Diosin onaintimai omitsiscanon, —ishon cununi. Ascan non chaca huamistiano Cristo nocohuunoashu ihui coyan iquinanqui nani. Noco nashoyamanicun non omitsiscapacuana. ¹⁴ Ascan Upa Diosin Abraham shara huani cuscan Israelimafori Jesucristohuunshon ato shara huashquin. Ascacun nan icoinra huafoti ato yoiyoni cuscan ahuan Yoshin Shara ato ya rafumatiro. Ascan Cristo noco nashoni Apa Dios fu non ipanon. Nantifi Diosin Abraham yoiyoni cuscan icoinra huaa Israelimafori ato inanshquin.

Moisés yononi cuscan yafi Diosin Abraham yoiyoni cuscan

¹⁵⁻¹⁶ Ascacun uhuun yoramishtichin natian non amisi cuscahuunoa un mato iscara tapimai man tapinon. Afu nocofunu ahuara yoiyoshocai shinan futsatiroma manmain ahuan anu cunushon. Nanscarifiai Upa Diosin Abraham yafi ahuan funa fusti yoiyoni. Ahuan funa ichapafohuunoacai yoiyonima. Abraham funa Cristo fustihuunoa yoiyoni. ¹⁷ Un mato shafacafi yoinon. Upa Diosin Abraham yoiyoni cuscan cuatro ciento treinta fari finontan Diosin Moisés yononi. Diosin Moisés yonofiani Abraham yoini cuscan ointiaquimama. Nan yoini cuscafin

aiquin. Ascashocai Upa Diosin shinan futsanima. Nan yoiyoni cuscafin man amisiquin. ¹⁸ Upa Diosin Abraham yoiyoni cuscan icoinra huaiton chipo Upa Diosin Abrahamhuun noicoinquin cashman ashoni.

¹⁹ ¿Ascan nanscaracumun ahuuscai Moiséshuunshon Upa Diosin noco yononimun? Un mato tapimanon. Upa Diosin Abraham yoiyoinquin tau huani. Ascashon chipo Upa Diosin yononi cuscan Moisés cununi nantiffain tapinonfo. Ascafia yononi cuscaai tsoa ascamisima. Ascatama yoitimashunifo. Ascafia nan Moisés yononi cuscafin tanamisifoqui nan Jesús oaitian. Nanhuunoafin Upa Diosin Abraham yoiyoinquin. Ascan Upa Diosifin ahuan oinmati afu nai muran icafo tapimaquin tau huani nanfoanrifi Moisés tapimanon. Nan ato yonopaiyai cuscan anonfo. ²⁰ Ascafia Upa Diosicai Abraham ascara yoinima. Ahuan nai oinmatifohuunshon yoiyamafain yora futsafohuunshonricai yoinima. Upa Diosicoinin afi Abraham yoipaiyai cuscan yoini.

Ahuuscashomain Upa Diosin Moiséshuunshon ato yononiquin

²¹ ¿Ascan Upa Diosin inonpacoaifo yoiyoni cuscan yafi Moisés yononi cuscan ascacoin shinainmamun? Ma. Upa Diosin tsaincai rafuma. Upa Diosin Moisés yononi cuscahuunshon noco nimapacutirocun nanfohuunshon nocon chaca soashocuana non a cuscara shara inon. ²² Ascafia Upa Diospan tsain cununi isca huaquin, —Nantifi manifotiffoan man non chaca huamisi. Ascashu nantifi yorafo nocon chacahuunoashu non cunu muran iquia cuscaracoin, —ishon cununi. Jesucristo non icoinra huacun arus fusti noco caimatiro afanan chaca nocon ifo inonma. Nanscaracoinfin cununi.

²³ Ascashon noncai icoinra huayon-ima. Ascacun Cristo oataima Moisés noco yononihuunoashu non cunu muran iquimamua cuscarafo. Ascan nan Cristo oaitian non icoinra huacun noco caimanano afanancai non cunu muran iquia cuscarafo itiroma. ²⁴ Ascacun non tapitiro Upa Diosin apaiyai cuscan Moisés noco yononi nocon Ifo cuscara iyopaoni. Nanhunshonri non tapiyoni non icoinra huacun nocon chaca soashofain noco imasharashquin. ²⁵ Non ascafiapaonianano Cristocoin nocoanocai non afanan Moisés yononi cuscan nocon Ifo itiroma noco iquinon.

²⁶ Natian nantifi Jesús icoinra huafu Diospan facufo. ²⁷ Man manfin unu muran iquimamuaquin maton chaca shat-uashu Jesús cuscara shara iishquin afu ipashquin. ²⁸ Upa Diosin Cristohunshon nantifi manifesti anoafu noco nanscarafosi oin. Uhuun caifo Israelifo yafi Israelifoma non yonomatifo yafi yonomatimafori non nocofunu yafi ainfori nanscarafosi noco oin. Jesucristo noco Ifo icaino non ahuunoashu yora fusti cuscara itiro. Ascan nantifi icoinra huafotifin non ahuun yorafo. ²⁹ Ascan man Cristo ahuun yorashu marifi man Abraham funafo itiro. Ascaino nantifi Upa Diosin Abraham yoiyoni cuscan matonnari itiro.

4 ¹⁻² Ascatan un mato afanan ahuara futsa mato tapimanon. Apa naano furunmun nantifi fitiro. Ascafia facu yosiyocuma iyoafofoan yontirofo. Nantifi apana ahuunarifiacun non facu yonomati cuscara iyotiro iyoafofoan yonomayotiro. Apan mai cushumisifoan facu pushco yonoyotirofo nan apan yoini cuscan ahuun fari nocoano pushcoaitian. ³ Nanscarifi aqui non Cristo Ifo huataima norifi non facu cuscara. Nocon shunifoan noco yonopaiyai cuscan noco yonoyopaoni. Ascashu non aton yonomati cuscara non ipaoni. Nan icoinra

huamafoan amisifo cuscan noco nanscarifi huamapaonifo non aton yonomati cuscara inon.

⁴⁻⁵ Ascatan Upa Diosin nan yoinitian Furun nichini noco cuscara cainon. Ainfoan shaqui murannoashu cainni. Moisés nocon yorafo yononi cuscan arifi nica-paoni. Ascafia nanrifi nuno mai ano oni nocon shunifoan noco yonopaoni cuscan non afanan ato yonomatifo cuscara itamarocon Diosin ahuun facu iyoafofo cus-cara noco imanon. Nanscacufin mai ano oniquin. ⁶ Icon manfin natian Diospan facufoquin. Nanscacun ahuun Yoshin Shara nocoqui nichini ahuunshon nocon nomuranshon Dios yoitiro isca huaquin, —Upashtan minfin uhuun Upacoinquin, —ishon non yoitiro. ⁷ Ascacuai man afanan yonomatifo cuscarama. Natianfin man ahuun facufoquin. Ascan Upa Diosin ahuun facufo inain cuscan matorifi inanshquin. Jesucristohunshon noco inain.

Pablon Jesús icoinra huamisifo ato shinanni

⁸ Man iscapaoni Diosicoin tapiyoashuma. Ahuarafo diosicoin-mafiacun nanfoan aton yonomati man ipaoni. ⁹ Man ascafiapaoni natian man man Diosicoin onancoian. Ascan Upa Diosin finacoinquin mato onancoian. Man man Dios onanfiashu ahuuscain afanan man ipaoni cuscan man afanan aton yonomatifo man ipaicain. Nanfoancai mato imasharatiroma. ¹⁰ Maton shunifoan yononi cuscan man man afanan amisi. Ascashu man aton fusiti shafa fusicain fusiti oshuri fusicain fusititian fusicain aton fusiti fari nocoano atofu man fusimisiquin. Man shinanquin isca huaa, —Non fusititi atofu fusiaton Upa Diosin nocoqui unimatiro nocon chaca noco soashoniran, —ishon man fasi amaquiri shinanmisi. ¹¹ Ascacun ¡Ai timafin! Un

matohuunshon shinancoin. Un mato curushcain yonoshopaoni. Un mato Jesushuunooa tapimafiani unraca ipaitsi mato tapimapaoni.

¹² Uhuun yoramishtichin ua nicasharacapun. Uncai Moisés cununi cuscan afanan tanaima uhuun chaca soanon Dios fu ipashquin. Man Jesús icoinra huaitian Moisés cunushoni cuscacai afanan tanatama Jesús icoinra huaa cuscan urifi nansca huaa. Un Jesús tanai cuscan uhuunri caocahuun. Un matofu ipaoni chaincai man uhuunooa shinanchacapaonima manrocon ua shara huafafainpaoni.

¹³ Un isinin iquin matoqui nocii tauni. Upa Diosin ua nitun huani un mato Jesushuunooa yoinon. ¹⁴ Un isin chacacoin fuchifianocai man umaquin ipainima. —Pablon ahuun isin suyacoin. Noncái afu ichanainmaran, —mancai anori imisima. Ascata ma man ua noicoimisi. Un mato yoiái cuscan man ua nicasharapaoni. Ascashon nan Diosin oinmati afu nai muran ica nan Jesucristocoin noia huaquin man ua shara huamisi manri ua fasi cushusharapaoni. ¹⁵ Un mato yosini cuscan man fasi unimacoinpaoni. Ascan ahuuscaimun natian man ipaoni cuscan man unimaimacai. Man man shinainmun man ua noipaoni. Un ahuara yopaishta man ua inanpaoni. Asca atisharacun maton furo futsucumutan man ua inancuapaoni. ¹⁶ ¿Un mato icon yoifiamisimun non noincasmatanaincai?

¹⁷ Moisés cununi cuscan futsafoan mato yosipaicani. Nanfoan amaquiri shinainfo cuscan fasi matori amaquiri shinanmapaicani man ato cuscara inon. Nanfoan apaiyai cuscacai matona sharama. Ascashon nanfoanri noco pashcanan huapaicani man afanan ua nicatamarocon nanfoan mato yosiafo cuscan man fasi ato tananon. ¹⁸ Ratoranfoan mato shara huaifoanno

shara itiro. Un matofu iyamafiano mato shara huafori fasi sharacoin itiro. Jesushuunshon mato shara huafori sharacoin itirofo.

¹⁹ Uhuun facufoan un fasi mato shinancoin. Ascacun un mato tapimai. Ainfo facu caiantaima isin muyotiro. Ahuun facu caishocai afanan isin mutiroma. Unimai. Nanscarifi aquin man Cristo tanasharacoinyamaiton un matohuunshon isin mutiro. Criston ahuun Yoshin Shara maton nomuran man nanucoianno afanancai un matohuunshon isin mutiroma. ²⁰ Un tapiama ahuuscaquimain man afanan amaquiri shinaincain. ¡Ohuashta! Un matofu ipainon un mato yoipaiyai cuscan cunun yoitamarocon uficoin un mato yoicoinnon.

Agar yafi Sara inifo cuscan atohuunshon ahuara futsan yosini

²¹ Moisés cununi cuscan tanapaimisifoan afanan ua nicacahuun un mato yoinon. ¿Moisés noco cunushoni cuscan man tapiamamun? ²² Isca huaquin cununi. Abraham facu rafuya ini. Futsa ahuun yonomati futan facu ani. Nan futsa ahuincoin futan facu ani. Nan ahuincoincai tsoan yonomati inima. ²³ Nan yonomati ahuun anu Agarcai yoshafotai inima. Nantifi facu cainmisifo cuscari ahuun facuri caini. Abraham ahuincoin yoshafoshtan facu nanutiroma. Ascafiacun Upa Diosin Abraham yoiyoni isca huaquin, —Min ahuinin chipo furonanfacu nanushquin. Ascashu cainsharashquiran, —ishon inonpacoai cuscan yoiyoni.

^{24–25} Diosin ainfo rafuhuunooa noco ahuara futsa yosipai. Ato shara huashononpacoai cuscan ato yoiyoni. Nanscarifi aquin yorafoti shara huashopai. Ascano Moiséshuunshon Israelifo yonopaiyai cuscan ato yononi. Ascashon machi ahuun anu Sinain anoshon ato yononi ahuun

tsain tanasharanonfo. Moisés yononi cuscan tanasharapaifiacani tsoacai ascacoinmisima. Ascashu ahuun yonomatifo cuscara icafo. Nanfo Agar cuscarafu. Nanrifi yonomati ipaoni. Nan machi ahuun anu Sinain Arabiafoan anu futsa tuqui huanifo Agar huanifo. Agar ari icafo ahuun facufo cuscara. Nanfoan Moisés yononi cuscan tanapaifiacai anifoma. Ascashu nanfo ahuun yonomati cuscarafu. Nan pushurasi Jerusalén ano icafoan aton ahua cuscara.

²⁶ Ascafia Upa Diosin icari anuqui futsan Jerusalén funaran ishon anunifo. Nanri Sara cuscara yonomatima. Ahuun facuforicai yonomatima. Nan Jerusalén funafin nocon uhua cuscaraquin. Nonfin ahuun facu cuscaraquin. Non ahuun facufo icaínocai non yonomati itiro. Moisés yononi cuscaricai nocon ifo itiro. ²⁷ Nannori Diospan tsain cununi isca huaquin, “Ainfon minfin toosmaquin. Min facuoma. Miacai facu isin huaiton min mumisima. Ascafia natian min unimatiro. Min oi ashcafinin unimaquin min ato yoitiro. Un chipo mato facu ichapa inanshquin. Nan ainfo yonomati facufoyafia mincaifin finacaia facu ichapayacoin ishquiran,”

ishon cununi.

²⁸ Ascatan uhuun yoramishtichin manfin Isaac cuscaraquin. Upa Diosin Abraham yoyoni cuscan ahuun facu Isaac chipo cainni. Nanscarifiai Upa Diosin yoyoni cuscan man ahuun facufo iishquicai. ²⁹ Nan yonomati Agar yoshafoataima ahuun facu Ismael cainni. Ascano nan toosma Sarapan chipo yoshafoshtafishon Diospan Yoshin Sharahuunshon Abraham facu nanumanano Isaac cainni. Ascafia Agar ahuun facu Ismael iyoafishon Sarapan facu Isaac fucash huaquin

omitsisca huapaoni. Nanscarifiai non Diospan Yoshin Sharahuunoashu non Diospan facufo icaínocai futsafoan Diospan facumafoan noco omitsisca huatirofo.

³⁰ Ascan Diospan tsain cunuquin isca huani, —Min facu Isaac un inanshquiain cuscaai Agarpan facun fitiroma. Ascacacun mato anoshon ahua yafi ato nichicahuun afanan matofu inonfoma, —ishon Upa Diosin Abraham yoini. ³¹ Ascacun norificai non Moisés yononi cuscahuunoashu non ahuun yonomatima. Noncai nan ainfo ahuun yonomati cuscarama. Nonfin ainfo yonomatima nan Sara ahuun facu cuscara. Non Dios icoinra huashu non toa yonomati itiro. Non ahuun facufo itiro.

Cristohuunoashu isharacahuun

5 Ascacun Cristo nocohuunoashu naani afanan Moisés cununi cuscan non tananonma. Ascatacain afanan cununihuunoashu ato yonomatima. Cristo fustihuunoashu non isharatiro. Ascacun Cristo cachiquiri huayamacahuun. Man ipaoni cuscan afanan ayamacahuun. Nocon shunifoan cununi cuscan afanan afoqui nasoyamacahuun ato yonomatifo iishcaquima.

² Un mato yoiai cuscan ua nicasharacahuun. Manraca shinanquin isca huai, —Un foshqui rupa shatucuma uhuun chaca ua soashotiro. Un Upa Dios fu nipanon, —ishonraca man shinan. Man anori shinaintocai Jesús mato chaca soashotiro. Un Upa Dios fu man nipanon. ³ Afanan un mato shafacai yoipai. Ratoran futsa man foshqui rupa shatupaimun Dios fu nipashquin. Tsoan anori shinanquifin nan Moisés cununi cuscan tanacointama onanshta amaquiri shinan tanashucaí Dios fu nipatiro.

⁴ Moisés cununi cuscan fusti man tanaiton maton chacafo soashotiro. Ascashu man afanan Cristo fu ra-

fuima. Upa Diosin mato huun ramapaifi-aino man man Cristo pota. Ascacucái mato ahuusca huatiroma mato chaca soashona man afu ipanon. ⁵Ascátama. Diospan Yoshin Sharahuunshon man non tapia Cristohuunshon nocon chaca soatiro Diosin nocohuun shinansharon. Nan non icoinra huamisi. ⁶Non foshqui rupa shatu iyamarai shatuama nanscara rafu. Afoancai nocon numatiroma Cristo cuscara non inon. Non Jesucristo icoinra huashon non futsafo noicointiro. Nan fusti non yopai.

⁷Man Jesús amanasharayopaoni. ¿Ascan tsoan mato amaquiri shinanmamun un mato iconcain tapimapaoni cuscan man afanan nicasharonoma? ⁸Diosincai mato anori yosiama. Diosin mato yoimana Furun man icoinra huanon isharashquin. ⁹Mato muranshon fustiton amaquiri mato yosiaino nan fustihuunshon nantifi mato shinanchacamatiro. ¹⁰Un Diosin cuffifain Jesús icoinra huaiton marifi un shinain cuscan afanan shinanshquicain. Tsoan mato amaquiri yosiquin fucash huaifin Diosin onaintimashquiquin.

¹¹Uhuun yoramishtichin atirifiton man uhuunoa yoiqui isca huaa, —Nan Pablorigi yosimisiquin non foshqui rupa shatuamashucaí Diosin yononi cuscaí non aimaran, —ishon yoiáfo. Ma. Ascaracaima. Uncái anori yosimisima. Un anori yoiáiton ua omitsiscamacuanafoma. Ascafia un yoimisi Jesucristo ihui coyan iquinanqui mastanifo. Noco nashonihuunshon nocon chaca soashonon Upa Dios fu nipanon ishon un yoimisi. Atirifi nan nicaquin ua omitsiscamamisifo. ¹²Ascan futsafoan mato yoimisifo isca huaquin, —Man foshqui rupa shatuyamashocai man Dios icoinra huaimaran, —ishon mato shinanchacamamisifo. Nannori yoiqui mato fucash huamisifo. Afanan matofu iyamapainonfo.

¹³Uhuun yorafoan Jesucristohuunshon ahuun tsain fusti natian tanacahuun. Ahua futsan mato yonotiroma man yonomatifo inon. Ahua futsan mato yonoyamafaiton chaca huayamacaquin. Jesús mato numafiano, —Natian nofin apaiyai cuscan non huatiroman, —iyamacahuun. Ascan noinancahuun. Ahuun noiquin shara huacahuun. ¹⁴Non yorafo ya noinanshu nantifi Diosin noco yononi cuscan non aicai. Diosin noco yononi isca huaquin, —Mafiri man musu huamuai cuscan nantifihuun noicoincahuun, —ishon cununi. Nan man ascaifin nantifi Diosin yononi cuscan man aicai. ¹⁵Man nantifia noinanyamashu chaca huamisi man iquin. Ascan oinfain. Yoiti huamitsayamacahuun. Chaca huaa tananyamacahuun. Man ascainocai afanan ichananpaitirofoma. Ascashon Jesús cachiquiri huatirofo. Chaca huatanashu man funocointiro omitsiscashquin.

Noco nomuran non chaca huapaimisi cuscan yafi Diospan Yoshin Sharahuunoashu non isharatiro

¹⁶Ascan un mato yoi Diospan Yoshin Shara nicacoincahuun ahuunoashu isharashquin. Afin mato yoitiro raquí cacaimain man ahuuscaicain. Nicacoinshocai afanan man apaoni cuscan maton nomuranshon ahuara chaca huapaifiaquicai man aquima. ¹⁷Non nocon nomuranshon non chaca huapaiyai cuscaí Diosin Yoshin Sharapan anori shinantiroma. Ascashon ahuun Yoshin Sharapan noco amapaiyai cuscan noco nomuranshon non shinanchacafiaín noncái ascapaitiroma. Nocon nomuranshon non shinanpaoni cuscaracai Diosin Yoshin Sharapan ahuun shinan cuscarama. Asca nofin non apaiyai cuscaí non huatiroma. Non chaca shinanpaoni cuscan non

ayamaquin Diosin Yoshin Sharapan nocon nomuran yoia cuscan non nicacointiro. ¹⁸Ascacia Diosin Yoshin Shara no fu rafuaino Moisés yononi cuscan afanan nocon ifo itiroma noco yonoshquin.

¹⁹Noco nomuran non shinachacamisi cuscan nantifi shafacafi ointiro. Nan chacafo non tanashu non chaca huaquin isca huatiro. Furomacoin icain ahuaara chacafosi nocon nomuran shinanfaimisi icain rafitama ahuinma fu icain ainfofori ascarifi ainfono aton funumafo ya imisifo icain ²⁰Diosicoima, —Nan uhuun Diosiran, —ishon yoifain shointi fusti tapifain noincasmamitsacain yoiti huaquisi futsafo pashcaquin futsafain futsafo finonmapaimisi icain ipaitama sinacucahuamisi icai afi apaiyai cuscan fusti shinanmisi icain tsain chipumisi icain tsoa futsacain noco cuscaramaran ishon yoifain futsafo noisharayamafain. ²¹Futsan ahuaara fianpaifain, rutumitsamisi icain, paunmisi icain, monoyanan pauncain nanscarafansifin chaca huacaniquin. Un mato yoiyomisi cuscan oinfain. Ascara chacafocai Upa Diosin nantifi iquina ano nocotiroma afu iishquin.

²²Ascaciai Diosin Yoshin Shara noco Ifo icaino non chaca huatamarocon non ahuunshon futsafo noicointiro unimacoincain ointi isharacain ahuaara ahuscarafiaino non shinanchacata tunufain futsafohuun ramapaimisi icain shara huapaimisi icain yoia cuscacoin amisi icain. ²³Ahuaara tapifiashu afiri curanfia huamuyamacai tso fu iquinanpaiyamacai tsain tsii huafain yoimisi icain futsafohuun shinansharafain afin apaiyai cuscan huatama nan Diosin amapaiyai cuscan fusti huamisi. Diosin Yoshin Shara fustihuunshonfin asca huatirofoquin. Tsoa ascaicai afanan tsain futsan yopaima. Nan Diospan Yoshin

Sharapan yonoa cuscan man aiquin. Ahuatocai afanan yonotiroma. ²⁴Cristo Jesús ahuaun yorafoan chaca huapaonifo cuscan ihui coyan iquinanqui man mastanifo aton chaca nantifi cuyonon. Jesús ihui coyan iquinanqui noco nashoni nocon chacafori afu mastai cafisca non a cuscara shara inon. Non chaca huapaoni cuscacai non afanan asca huapaima. ²⁵Natian non Diosin Yoshin Shara fu rafuaino nanto noco yoiai cuscan non nicasharatiro. Ascashu noco amapaiyai cuscan non anon.

²⁶Ascatan non Diospan Yoshin Shara fu rafuashucai non cacapaimisi iyamacain oinmupaimisi iyamacain non itiroma. Man ascaquin futsafo man shinanchacamatiro. Ascara man chacafo shinainno man finononapaitiro. Ascarafin chacacoinquin.

Futsafoya ashononantanacahuun

6 Uhuun yoramishtichin man futsan chaca huaiton oincaquin. Diospan Yoshin Shara tanasharacaquin ahuaun ramapaiquin oi tsii huafain yoihuu chaca shatunon. Oinfain. Tsain curushu iyamacahuun. Mafiri man chaca huamutiroquin. ²Nantifia noinantantanacahuun. Cufishonantanacahuun. Futsan ahuaun nomuran omitsiscaiton ahuaun ramapaiquin ointi unimamacahuun. Ascashu cushunonacahuun. Futsan omitsiscaiton nan cufishocahuun Jesusquiri shinanmashquin tanasharanon. Man ascaifin nantifi Cristo yononi cuscan man ai cain.

³Ascano futsan yoiquin —Unfin fasi sharaquin. Uncai tsoa futsa yopaima ua Dios cufishonon, —ishon shinain. Nan cuscara yoracai ahuaama. Afiri paramui.

⁴Ascacia nofin nocon nomuran non shinantiro non Jesús yonoshosharaimun. Ascana non yonoshosharai tapiashu non fasi

unimatiro. Ascaquicai non shinanquin isca huatiroma, —Futsan chaca huai cuscacai un huamisimaran, —ishon non shinantiroma. ⁵Nantififain non chaca huamisi. Ascashori nantififain nocon nomuran non shinantiro non amisi cuscan. Tsoa futsacai Diosin noco amapaiyai cuscan noco huamatiroma. Nofin non atiro.

⁶Tsoan mato Diosin tsain yosiaiton nan ahua yopai cuscan inansharacahuun.

⁷Mafiri paramuyamacahuun. Tsoan Diosin tsain potashu, —Diosin ua yoipaiyai cuscan nanscanonquin, —icafin Diosin ato onaintimaiquin. Ahuara non fana nanscaracoin foaicun nan non fitiro. Nanscarifi aquin non Diosin tsain nicasharayamatan non chaca huashu ahua chaca ahuuscaraino non omitsiscatiro. Ascanfia Diosin noco yoia cuscacoin ashu non isharatiro. ⁸Ascan tsoan ahuan nomuranshon shinanchacafainquin chipo chaca huatiro. Ascashu omitsiscacai finacointiro. Ascano Diosin Yoshin Sharapan amapaiyai cuscan tsoan nan fusti afafainni nanfin Diospan Yoshin Sharahuunoashu nisharapacunaca.

⁹Futsafo shara huafafainquin unuyamacahuun. Ascashon isca huaquin shinanyamacahuun, —Mun imafofo shara huayomisi. Natian un ascaima. Afanan un asca huapaima. Nanscanonquin, —ishon anori shinanyamacahuun. Non ascai unuyamacun Diosin afi noco inansharashquin.

¹⁰Ascan ahuuscarai foan oinquin nantifi shara huafafaincahuun. Finonmafain Jesús icoinra huafo shara huafafaincahuun.

**Pablonun Galaciafo yoini
cuscan huafain ahuan tsain
unutaqui tsain shara ato fomani**

¹¹Natian uficoi un mato cunushoni. Maficoi oincapon uhuun cunu funupafo. ¹²Futsafoan mato yosipaicani. Nanfoan mato isca huamisifo, —Man foshqui rupa shatuyamashu Diosin yononi cuscan man aimaran, —ishon mato yoimisifo. Nanfoancai yoipaicanima, —Jesucristo ihui coyan iquinanqui mastanifo noco nashonon. Nan fusti non yopairan, —ishoncai yoipaicanima. Ascashon shinanquin isca huacani, —Non yoiquin Jesús fustiton nocon chaca soashotiro. Ascan noncai ahua futsa yopaimaran, —ishon. Non yoiaiton noco omitsiscamatiro. —Ascacucacai non anori yoima noco omitsisca huanonfoma, —ishon yoimisifo. ¹³Nanfo man foshqui rupa shatufiashucacai Moisés cununi cuscan tsoa ascacoinmisima. Ascafashon matorifi shatumpaicani ato cuscara man inon. Marifi nan huamisifo cuscan man aiton nanfoan futsafo yoitirofo, —Nafon nocon tanamisifoquin, —ishon yoitirofo.

¹⁴Unmain anori shinanpacuyampainon. Unfin tsain shara fustihuunoasi yoipaifainicain. Nan fusti yoisharapaiqui un isca huai, —¡Aicho! Jesucristo ihui coyan iquinanqui ua nashoni. Ahuanshon fustifi un chaca shinanpaoni cuscan afanan uhuun ifo itiroma. Jesús ua nashoaintian nantianrifi uhuun chaca futsa futsatapafo huapaoni cuscan nantifi nan chacafo afu mastani cuscaracoin. Afanancai ua ahuusca huatiroma, —ishon un shinantiro. ¹⁵Jesucristo ahuan yorashucacai non foshqui rupa shatuyamacacai non ai futsutiroma. Ascaracai ahua. Nonricai sharatiroma. Non Jesushuunoashu

fusti non shara itiro. Jesushuunoashu fusti non fiananansharacoin itiro. Nan fustiton noco imasharatiro. ¹⁶Diosin Yoshin Sharapan Jesushuunoa noco yosia cuscan man acun Upa Diosin mato ointi unimamafain matohuun ramapai. Ascashu man Diospan yoracoin.

¹⁷Ascan uhuun tsain unutaqui un mato yoinon. Uhuun Ifo Jesushuunoashu un omitsiscamisi.

Uhuun yoratisho toa ichaparasi oinquin man tapitiro un Jesús yonoshonaiton ua isca huamisifo. Ascacun afanancai tsoan ua fucash huayamacahuun.

¹⁸Uhuun yorafoan nocon Ifo Jesucristo matohuun ramapaiqui mato shara huafafaini. Nanscasi ipanon. Amen. Nanti.

Pablo

Pablonun Efeso Anoafu Cunu Fomani

Pablonun Jesús icoinra huafo Efeso anoafu cunu fomani

1 Unquian Pablo, Efeso anoafuan manfin Diospan yorafoquin. Man Cristo Jesús tanasharamisi. Un mato cunu fomaí man tapinon. Diosin ua amapaiyai cuscan ua catonni un Cristo Jesús fu rafumisi inon. ²Nocon Upa Dios futan nocon Ifo Jesucriston matohuun ramapaiqui matohuunoa shinanquin mato shara huafafaini. Ascashon maton nomuran unimamanon.

Non Cristo icoinra huaiton noco shara huafafaintiro

³Non Cristo ahuun yoracun Upa Dios icarishon a cuscara shara noco imano ahuun ahuara sharafoti nocori inanshquin. Ascano nocon Ifo Jesucristo Apa Dios non yoinon, —Upa Diosin min fasi sharacoin. Non mia aicho huairan, —ishon non yoinon. ⁴Mai oni huataima Jesucristohuunshon Upa Diosin noco catonni ahuun yorafo non inon. Ascacun nantifi nocon chaca soashofain nan Furun cuscara shara non inon. ⁵Nocohuun noicoinqin afin apaiyai cuscan noco huani Jesucristohuunoashu norifi non ahuun facufo inon. Nanscara afi fuchipaiyoni. ⁶Diosin Furunhuun noicoincain nocohuunrifi ramapai. Ascashon noco nimasharapacunaca. Ahua futsahuunoashucaí nocohuun ramapaima. Aficoín nocohuun ramapai. Ascacufi, —Upa Diosin min sharacoinran, —non huaicai. ⁷Jesús noco nashoni ahuun imi foyanan. Ascacunan nantorifi nocon chaca soashonano ahuunshon Upa Diosin noco rau huatiro non afu ipanon. Ascacun non tapitiro Upa Diosin fasi nocohuun ramapaicain noco shinanquin finacoin-

misi. ⁸Non yopai cuscan onancoian. Ascashon Furunhuunshon noco fasi shara huafafaini.

⁹⁻¹⁰Ascano Upa Diosin afi apaiyai cuscaí tsoa tapimayonima. Ascafia noco tapimana nocohuun ramapaiquin nocoqui Cristo nichini. Ascano Upa Diosin afi shinanyoni cuscan Furun Cristo nan nichipaiyaitian afanan nichishquin nantifi ahuun yorafo nai murannoafu yafi mai anoafori ato ichanan huashquin Cristo arus fusti aton Ifo inon.

¹¹Cristohuunshon Upa Diosin nocorifi catonni non ahuun yorafo inon. Nannori nocohuunoa shinanyoni. Afi apaiyai cuscacoin huashquin. ¹²Ascano non Cristo icoinra huaquin tau huashon non yoiquin isca huanon, —Upa Diosin min fasi sharacoin. Min noco shara huamisi cuscan fasi sharacoin. Tsoa futsaí mia cuscara sharamaran, —ishon non yoinon. ¹³Marifi man Israeliyamafishon Diospan tsain icocoin nicaquin man man Cristo icoinra huaa. Ascacun maton chaca soashona marifi ahuun yorafo man inon. Upa Diosin yoiyotiani cuscan huafain ahuun Yoshin Shara matoqui nichini mato onanti huaacoinshquin man ahuun yorafocun tapishquin.

¹⁴Ascano nonfin Diosinafoquin. Ahuun Yoshin Shara no fu rafuaiton non tapitiro ahua futsamain noco yoiyotiani cuscan noco inanshquicain. Ratoran shafatafi nan icari noco ihui oshquiquin. Nannoshon ahuara futsa noco yoiyotiani cuscan noco inanshquin. Ascano afanan Upa Dios non yoiquin isca huanon, —Min noco shara huacoinna. Min fasi shara finacoinran, —ishon non yoinon.

Pablonun cufini cuscan

¹⁵⁻¹⁶Ascano nan un matohuunoa nicaquin tau huanitian man noco Ifo Jesús icoinra huashon man futsafo

noicoinfafainaiton. Ascacun nan un cufiati un matohuunshon noco Ifo aicho huafafaini. ¹⁷Ascan nan nocon Ifo Jesucristo Apa Diosifin nocon Upa Diosiriquin. Afin sharacoinquin. Nanscacun un cufifafainmisi ahuun Yoshin Sharahuunshon man shinansharafain ahuun tsainri man tapisharafain finacoinshon man Jesús onansharanon. ¹⁸Ascan un mato cufishoquin isca huafafaini, —Upa, aton nomuran cayacaficoin ato shinanmahuu mihuunoa tapisharanonfo. Ato tapimahuun min ato catonniqui mifu ipanonfo. Ascashon min yoiyoni cuscan nan mia icoinra huafoti min icaria tsoan oinyomisima cuscara sharacoin min ato inanshquinran, —ishon un mato cufishomisi.

¹⁹⁻²¹Diosin ahuun curushhuunshon tsoan oinyomisima cuscara ahumamishti noco ashotiro. Nan ahuun curushpan Cristo naitian afanan funimani afu nai ariashu niaifocoin inon. Nan Upa Dios icarishon Cristo nantifi niaifofo finoncoian. Nan natian niyoafo yafi inonpacoaifori non nantifi mai anoa icafoti non nai muran icafotiri Jesús ato finoncoianquin.

²²⁻²³Ascan Upa Diosin Furun yononi cuscan nantifi mai anoa manifoti yafi nai murannoafori ato iquinaquin. Ascashon Furun catonni nan icoinra huafoti aton niaifo inon. Nan icoinra huafotin ahuun yoracoin cuscarafokin. Criston aton mapo cuscarakin. Nocon mapon non shinantiro. Nan fustiton icoinra huafoti yonotiroquin. Noco iquina ahuunshon fusti non atiroquin. Nocon mapomaisicai non nitroma. Nanscarifi aqui nocon Ifo Jesusmaisicai tsoa nipatroma. Nantifi icoinra huafoti no fu ica. Ascashu no fu rafucacaini noco imapaiyai cuscan non anon.

Diosin nocohuun noiquin noco nimapacunaca non afu ipanon

2Ascafia mato chacahuunoashuca man Diospan yora ipaonima afu ipashquin. Ascata ma maton chaca soashonataima yora naa cuscarafa. Omitsiscapanacafo muran man focuana. ²Manfin chaca huapaoniquin. Nan icoinra huamafoan chaca huamisifo cuscan marifi man ato tanapaoni. Yoshin chacafo nai muran icafoan aton niaifo Satanás man tanapaoni. Nanton natian nan nicayosmamisifoan ato nomuran ato shinanchacamamisi. ³Nantifi non nicayosmamisi cuscarari ipaoni. Non ahudara chaca huapaiyai cuscan non huapaoni. Non chaca shinanmisi cuscarari non huapaoni. Upa Diosin nantifi nicayosmamisifo ato onaintimacoin omitsiscapanonfo. Norifi non ato cuscara chacacaifia nan icaifo cuscan non aiton nocorifi onaintimacuana.

⁴⁻⁵Non nocon chaca shatuataima non Diosimaqui ifiano Upa Diosin nocohuun fasi noicoincain nocohuun ramapai. Nan Cristo afanan funimani cuscan ahuunshon nocori funimatiro non afu funi cafiscashu non afu nipanon. Non ahudara shara huaa rafanancai noco numaima non omitsiscapanonma. Diosin afin nocohuun ramapaicain noco cashman numa. Ascashon nocon chaca soashona non afu nipanon.

⁶Upa Diosin Cristo funimanitian norifi non afu funini cuscaracoin afu nipashquin. Ascacun non afu rafuano Cristo Jesús Diosin icarifia norifi non afu ica cuscaracoin. ⁷Ascan Jesucristo-huunshon Upa Diosin nocohuun cashman ramapaicain noco noiquin finacoinshon noco shara huamisi. Ascashon nantifi yorafo ismapacushquin fasi nocohuun noiquin noco shara huamisi.

8-9 Asca afanan un mato yoi. Non ahudara shara huahuu rafanancai noco Diosin numaima non omitsiscapanonma. Diosin afi nocohuun ramapaicoishon noco cashman numai noco chaca soashoshquin. Ascan tsoacai iscatiroma, —Ufin Dios shara huamisiquin. Ascashufi un Dios fu ipatiroquin, —ishocai tsoan anori yoitiroquin. Ascatama non Jesús icoinra huaiton Upa Diosin noco numatiro non afu ipanon. ¹⁰Diosin noco onihuani non Jesucristohuunshon yonosharashonon. Noco oni huataima noco amapaiyai cuscan shinanyoni non futsafo shara huashonon.

Cristo nocon ointi shara huashotiro

¹¹Ascan mancai Israelifoma. Uhuun caifoan matohuunoa yoimisifo isca huaquin, —Nafocai nocon caifoma. Nonfin Diospan yorafoquin. Nanfocai Diospan yorafoma. Diosin noco yononi cuscan nantifi furonanfacufo foshqui rupa shatupacunon ishon. Diosin noco yononi cuscan non aiton tapinonfo non Diospan yoracun. Caifo futsafocai foshqui rupa shatupacuafoma. Ascan non tapitiro afocai Diospan yoramaran, —ishon uhuun caifo Israelifoan yoimisifo.

Ascan man Jesús icoinra huataima man ipaoni cuscan ointiaquimayamacahuun. ¹²Shinacapon. Ipaoni mancai Cristo fu iyomisima. Upa Diosin Israelifo catonni cuscan huafainricai mato catoantaima man atofu ahuan yorafo inon. Ahuan yorafo yoyotiani cuscan huafaincai mato yoiataima. Man shinanqui isca huamisi, —¡Ohua! ¿Non ahuuscatiromun noco chaca soashonon non Dios fu ipanon? —ishon man shinanpaoni. Nantianri man icoinra huafoma muran iyopaoni man Dios fu rafuyamacain man onanyopaonima. ¹³Ascashon mancai Diosihuunoa

shinanyopaonima. Ascafia Cristo Jesús matohuunoashu naino ahuan imi foni man afu ipanon.

¹⁴Ascashu Cristohuunoashufin non noinantiroquin. Uhuun caifo Israelifo yafi mani futsafo noco nannorifosi shinanmasharatiro non ahuunoashu noinantanancaim afanan non noincasmatananoma. Ahuatocai afanan noco amaqui imatiroma. Natianfin non Cristohuunoashu yora fusti cuscarafokin. ¹⁵Ascano nocohuunoashu naino noco shunifoan noco yonofain noco cunushoni cuscaim afanan noco yonotiroma non Dios fu ipanon. Ascano Upa Diosin uhuun caifo Israelifo yafi mani futsafori ahuan yorafo noco imashquin non funa cuscaracoinfo non inon. Ascatan afanan non noincasmatananonma. Ascatamarocon natian isharacoinnonfo. Nanscarafi Upa Diosin noco huamapai yora fusti cuscara noco imashquin. ¹⁶Uhuun caifo Israelifo yafi mani futsafori Jesús ato ihui coyan iquinanqui nashoni. Nanscacun Upa Diosin nan rafu man ato raunan huua afanan afu isharanonfo. Ascashu noincasmatananyamacai yora fusti cuscara ato imanon.

¹⁷Ascano mani futsafoancai Diosihuunoa tsoan shinanyopaonima. Uhuun caifo Israelifoan Dioshuunoa shinanmisifo. Ascan Jesús nan noco rafuhuunoashu mai ano oni ahunoashu non Dios fu ipanon. Ato yoipaoni isca huaquin, —Natian Upa Diosin mato rau huatiro man afu ipanon, —ishon ato yoini. ¹⁸Ascano Jesús noco nashonicun ahuan Yoshin Shara fustihuunoashu Israelifo yafi mani futsafori Upa Diosiqui funonfo afu rafupacushquin.

¹⁹Ascacun mancai afanan yora futsafo cuscarama. Natianricai man afanan Dios onanmisima cuscarama. Natianfin man Diospan yorafoquin. Nan mani futsafori

Diospan yorafoquin. Ascacun ahuun facu futsafofin maton yorafoquin. Manfin nanscarafosiquin. ²⁰⁻²²Upa Diosin ahuun yorafofin nan pushu shara huamua cuscarafosiquin. Non pushu tau huaquin quishi mutsisipacoin non yopatiro. Chipó nantifi pushun canofo non ichanan huatiro. Nanscarifi aquin Jesús fu rafumisifo futan Diospan tsain yoimisisforifi nan pushu cano shara cuscarafosiquin. Pushu cano shara yamainocai non ahuuscashon fomancayan shara huatiroma. Nanscarifiai Jesús fu rafumisifo non Diospan tsain yoimisisfoanri noco yoiyamainocai non ahuuscashon icoinra huacuanama Diospan yorafo iishquin.

Ascano Cristo Jesusfin nocon pushu quishi mutsisipacoin cuscaroquin. Pushu quishi yamainocai non pushu huatiroma. Nanscarifi aquin Cristo yamainocai non Diospan yora icuanama. Ahuunoashufin nan pushu shara huamua cuscara non itiroquin. Nonfin nocon Ifohuunoashu pushu mutsisipacoin cuscaroquin ahuashtacai chaca amuran iquitiroma. Pushu yonomisiton ahuafo fitiro pushu huashquin. Nanscarifi aquin natian Upa Diosin icoinra huafoti ahuun Furunhuunshon noco nannorisi shinanmaino non ahuun pushu cuscara shara inon ahuun Yoshin Sharahuunoashu non afu iishquin.

Diosin Pablo yononi mani futsafo Jesushuunooa yoinon

3 Uhuun yoramishtichin unquian Pablo un mato yoinon. Mancai uhuun caifo yamafiacun un mato Jesucristohuunooa tapimamisi marifi man Diospan yorafo inon. Ascaiton oinquin Jesús icoinra huamafoan ua cunu muran iquimanifo. Ascan matohuunshon ua iquimanifo. ²Upa Diosin mato shinanfain matohuun

ramapaicain mato tapimapai. Ascashon ua catonfain matoqui ua nichini un mato yoinon. ³Upa Diosin ua tapimayoni cuscaicain tsoa futsan tapiyomisima. Matoruun noicoiquin ua nichini marifi man ahuun yorafo inon. Ascan nanfohuunooa un mato ichapama cunushoni. Nan man man nicamisi. ⁴Ascan un mato cunushona cuscan oinquin un Cristohuunooa tapia cuscan huafain marifi man tapitiroquin. Tsoashta tapiyopaonima. ⁵Ascacuai Diosin tsoa tapimayonima. Ascan natian Diospan Yoshin Sharahuunshon nan Jesús fu rafumisi sharafo yafi Diospan tsain yoimisi sharafo man ato tapimana. ⁶Ascan nan tsain sharafo tsoan Jesushuunooa tapiyopaonima. Ascan mani futsafo Upa Diosin yorafo itirofo. Ascacun natian matorifi Diosin tapimai. Israelifo yafi mani futsafo Jesushuunooashu Diospan yora fusti cuscarofo. Ascano Upa Diosin uhuun caifo Israelifo yoivotiani cuscan Jesucristohuunshon manifoti nanscarifi huaquin inantiro.

⁷Upa Diosin uhuun ramapaiquin ua catonni ahuun yonomati un inon ahuun tsain shara Jesushuunooa un ato yoinon. Ascashon ahuun curushu ua inanni manifoti Furunhuunooa un ato yoinon. ⁸Shinancapon. Uncai ahuama. Nantifi Diospan yorafoan ua finoncoianfo. Ascafia Upan Diosin uhuun ramapaiquin ua catonni mani futsafo un tsain shara Cristohuunooa un ato yoinon. Aafi ahuun yorafo inain cuscan fasi sharacapacoin. Tsoancai ascara shara oinyomisima. Cristo noco shara huaquin futsai cuscaicai tsoashta tapiyomisifoma. ⁹Upa Diosin nantifi onihuanonpacocai cuscan afin tapiyoni. Tsoashtacai Jesushuunooa tapiataima. Ascacun ua catonni manifoti Furunhuunshon un ato yoinon. Upa Diosin ua tapimani cuscaicai atirifi tsoa tapimayoima.

10-11 Upa Diosin shinanquin tau huani cuscan nocon Ifo Jesucristohuunshon ani. Natian Jesús icoinra huafohuunshon niaifofoan nai muran icafo futan ahuun oinmatifo nan a fu nai muran icafoanri ato tapimashquin. Ascan nicacashon yoishquin isca huaquin, —¡Aicho! Nocon Upa Diosin aca cuscan fasi sharacon. Arus fusti nantifi tapicoian. Nanton ahuamamishti huatiroan, —ishon yoishcani. ¹² Ascashon non Jesús icoinra huashu non ranotama Diosqui otiro afu tsainshquin. Ascashon non tapitiro non aqui oaitocai noco potaima. Ascano ratutama non Dios fu itiro. ¹³ Ascatan un matohuunoashu omitsiscaitian shinanchacayamacahuun. Maton nomuran omitsiscayamahuu. Nan un omitsiscai marifi man afu isharanon.

Cristo nocohuun noi

14-15 Ascan Upa Dios cufishquin un ra-toconun mai chachimisi. Ascacun nantifi icoinra huafo nai muran icafo futan mai ano icafoan nocon Upaquin. Nonfin ahuun facufoquin. Ascacufin ahuunoashu nan Jesús icoinra huafofi non anu yai futsutiroquin. ¹⁶⁻¹⁹ Un mato Upa Dios cufishoquin isca huamisi, —Upa Diosin, nan ahuara sharafofin minaquin. Ascan nan mia icoinra huafo Efeso anoafu min Yoshin Sharapan aton nomuran mutsismainifoanhuun min Furun Cristo icoinra huashu mifu rafufafainonfo. Min fasi atohuun noimisi cuscan huafain ato tapimahuun.

Ihui tapo sharano fana foaisharatiro cuscan Cristofin Efesofoan aton tapo mutsisipa cuscaraquin. Asca nan min atohuun noia tapicanashu nanforifi isharatirofoquin. Cristofin aton ihui tapo mutsisipacoin cuscaraquin ahuunshon futsafo noicononfo. Upa Diosin Efesofo nantifi mia icoinra huafoan aton nomuran ato shinanmasharahuu Cristo atohuun noiconmisi

cuscan tapinonfo. Criston nantifi nocohuun noiconmisi cuscan non tapifiatiro fasi finacoinquin nocohuun noicon. Upa Diosin, un mia cufia cuscan nantifi Efesofo tapimahuun. Ascashon min ato imapaiyai cuscan anonfo nantishotapiquin mifu rafucoinonfo, —ishon un mato Upa Dios cufishofafaini.

²⁰ Non Upa Dios nocon nomuranshon shinain cuscan non yocafiamisi atofin fasi finonmafain noco ashotiroquin. Ahuun curushhuunshon nocon nomuran mutsismainifoanna cuscan huafain ahuamamishti noco ashotiro. ²¹ Ascacun non Upa Dios yoiquin isca huanon, —Upa Diosin, min fasi sharacon. Min Furun Jesucristohuunshon min noco shara huamisiran, —ishon nantishotapiquin non yoifafainon. Nantifi icoinra huayopaonifo yafi natian icafo non inonpacoaifoanri Dios yoisharapacunonfo. Nanscasi ipanon. Amen.

Diosin ahuun Yoshin Sharapan shinain cuscari icoinra huafoan nannorifosi shinannisifo

4 Ascan un nocon Ifo yonoshonaiton ua cunu muran iquimanifo. Ascacun uhuun yoramishtichin ua nicasharacapun. Un mato cayacafi shinanmapai. Upa Diosin mato catonni man Jesucristo tanasharanon. Ascacun nan mato amapaiyai cuscan acahuun futsafoan mato oinquin nocon Ifohuunoa shinansharanonfo. ² Ascashu, —Tsoa futsacai ua cuscaramaran, —ishon shinanyamacahuun. Ascatamarocon icoincain futsafohuun ramapaicahuun tsoa ahuuatama icahuun. Funaquima manasharacahuun. Futsan chaca huamisi cuscan huafiaiton ahuun noiquin ahuun shinanchacayamacahuun. ³ Diospan Yoshin Sharahuunshon Jesús icoinra huaa

futsafo fu isharacahuun. Unimayanan isharatanacahuun. Nantishotapiquin nanscasi huatanacahuun.

⁴Ascano Jesús icoinra huafosi Diospan yorafoquin. Ascan nonfin ahuun caya muma cuscarafokin. Diosin ahuun Yoshin Shara fustiton. Afin noco cuna non Jesús icoinra huacun noco imapaiyai cuscan non tapia. Noco yoyiotiani cuscan Cristo oaitian noco inanshquin. Nan fustifin non manasharamisiquin. ⁵Nanfin nocon Ifo fusti. Nan fusti non icoinra huaiton noco nimapacutiro. Non unu muran iquimamushon non yorafo ismano Upa Dios ahuun furumun Yoshin Shara fustiton noco iquitiro. ⁶Nocon Dios fustifin. Nan icoinra huafoan nocon Upaquin. Arus fustitofin nantifi noco iquimisisiquin. Ascashu nantifi non ahuuna inon noco amapaiyai cuscan non anon. Nantishotapiquin nantifi nocofu rafucacaini. Aafin nantifiton nocon niaifo fustiquin. Ahuunoashu fusti nantifi non itiro.

⁷Ascafiata Criston nantifi nan non icoinra huafoti afi futsa futsa huaqui noco imapaiyai cuscan huafain noco ima non ahuunshon icoinra huashon futsafo non shara huanon. ⁸Ascano Diosin tsain Cristohuunoa cununi isca huaquin,

“Mai anoashu Apa Dios ari nasonitian nan icoinra huafoti ato numani afanan Satanás aton ifo inonma. Ascatama Jesús tanasharanonfo. Nantianri nantifi ahuun yorafo imapaiyai cuscan ato imani ahuunoashu shara huatananonfo,”

ishon cununi.

⁹Ascashon cunuquin isca huani, —Cristo afanan Apa Diosin icari nasoiran, —ishon aqui cununi. Nannori cununi non tapitiro Apa Diosin ari cataima iquisi na mai ano fotoyoni noco cuscara iishquin. Ascashu fasi omitsiscayoni. ¹⁰Apa ariashu mai ano fotoyoni.

Nanton nai ari icafo yafi mai anoafori ato finoinnifoanna. Ascatan nan nai ari-afu futan mai anoafon ato ifo iishquin.

¹¹Nantonfin noco catonpacuni noco amapaiyai cuscan ashu non shara huatananon. Ascashon afu rafumisi futsafo ato imafain nocorifi nichini ahuunoa futsafo non ato tapimanon. Futsafari catonni afin yorafo yoyipaiyai cuscan afohuunshon ahuun tsain shara ato yoinon. Futsafari catonni nan tsain shara ahuunoa yoinonfo icoinra huashcaquin. Futsafari catonni ahuun tsain shara icoinra huafo tapimafain ato cushusharanon ahuun tsain tanasharanonfo.

¹²Nantonfin nantifi ahuun yorafo itisharamanaquin ahuunoashu shara huatananonfo. Ascacufin finonmafain non Jesús tanasharaquin. Nofiri non pima-muaino nocon caya mutsisipa shara-coin itiro. Nanscarifiai non futsafo fu shara huatanaino Dioshuunoashu non mutsisipa sharacoin Jesús cuscara non itiro. ¹³Ascano nannorisi non icoinra huafain non Diospan Furunhuunoa tapinon. Ahuunoa tapitacai non afanan facu cuscara itiroma. Nan noco-funu mapo shara ya Jesús cuscaracoin non itiro. Ascashu nan Cristo noco imapaiyai cuscan sharacoin non itiro.

¹⁴Non ascatacai facufo cuscara afanan non itiroma. Futsan facufo ahuafo yoiaiton icoinra huatiro. Futsan ato yosiaiton icoinra huafain futsari chipo ahuafo yoiya cuscan nanforifi icoinra huatirofoquin. Ascashon futsa futsatapafo icoinra huatirofo. Ascacun noncai paramisifoan noco yosipaiyai fo cuscan non icoinra huatiroma. Noco yoicaquin, —Un mia icon yosiaran, —ishon noco yoyipaiyai fo Diospan tsain anorimacun noncai ato icoinra huatiroma. Noco fuparapaicani.

¹⁵Noncai ascarama. Ascatama nan icoinra huaa futsafo noicoquin non ato icon fustisi yoitiro. Non ascafin

finonmafain nocon Ifo Cristo cuscara non icacainicain. ¹⁶Ahuunoashu non ahuun caya muma cuscara itiro. Afin catontiro nonmain ahuu cuscaraquin. Ahuun curushhuunshon afin noco amapai cuscan non atiro shara huan tananshquin. Non noinainno non shara huan tanantiro.

**Cristohuunoashu non
yora funa shara itiro**

¹⁷Ascano nocon Ifohuunshon un mato shafacafi yoinon. Icoindra huamafo icafo cuscan afanan ascayamacahuun. Nanfoanfin ipaitsi chaca shinanmisifoquin. ¹⁸Ascashu yoitimashunifo. Aton nomuranshocai shinansharatirofoma Diosin ato imapaiyai cuscan aashcaquin. Afocai afu rafumisifoma ato nimapacunon. ¹⁹Ahuara chacafosi huai fuyacanashucaí afanan tsoa rafipaitiroma. Nanscaisiai fuyafa, —Nanscanonquin. Ahuara chaca finonpaiquin finonon, —ishon anori fusti shinanmisifo. Chaca fustisi shinancani. Nocofunufu aton ahuinma fu imisifoquin. Nanscarifi ainfofo aton funumafo fu icaifono. Nanscara chaca futsa futsatapafo huamisifo. Tunuyamacaicani. Fasi finonmafain chaca huapaicani.

²⁰Nanfoanfin nansca huamisifoquin. Ascafia Cristocai mato anori yosimisima. ²¹Ascatama Jesushuunoa mato ahuun tsain iconcoín yosiaiton man man nicamisi. ²²Ascano mato yosimisi isca huaquin, —Marifi man man chaca huapaoni. Chaca fustisi man fuchipaipaoni. Nan chacafoan mato parafafaini. Afanan afo fuchipaiyamacahuun. Afo potacoincahuun, —ishon mato yosimisi. ²³Ascacun man shinanpaoni cuscan afanan shinanyamacahuun. Natian shinansharacoinpacucahuun. Jesús shinain cuscan huafain maton nomuran

marifi shinancoincahuun. ²⁴Diosin sharacoin fusti cuscara funa shara icahuun. Jesús mato nashoni maton chaca soashonano Upa Dios cuscara shara man inon.

²⁵Nonfin Cristo ahuun yorafoquin. Ascacun afanan chaniyamacahuun. Mato fu icafo icon fustisi yoifafaincahuun. Non icoindra huafofin Cristo ahuun caya muma cuscaraquin. Ascano noco murannoashu futsa chanicun ahuunshon nantiffain non mutiro. ²⁶Man mua sinai matsiriscacahuun. Man ascayamaino man chaca huatiroquin. Ascacun fari cataima matsicahuun. ²⁷Man sinai unuyamacaíyaiton Satanás mato yonotiro. Man sinafiai matsiriscaítocai mato chaca huamatiroma.

²⁸Ratoran futsan mato murannoashu yomutsoaiton a yoisharacahuun afanan yomutsononma yonoquinsharacahuun ahuun rafanan fiishcaquin. Ascannan ahuara futsa yopaitonfin man inantiroquin.

²⁹Ahua chaca yoitamarocon shara fustisi yoifafaincahuun. Man ato yoiaiton nicacashon futsafoan nan tsain shara nicaquin nocon Ifo finonmafain tanasharatirofo. ³⁰Diospan ahuun Yoshin Shara matoqui nichini matofu rafupacunon Jesucristo oaitian afu man ipanon. Ascacun ahuunshon tapitirofo non Diospan yorafocon. Ascano man natian icai cuscan aquin Diospan Yoshin Shara ahuun nomuran omitsiscamayamacahuun.

³¹Ascacun futsafohuunoa shinanchacayamacahuun. Tsain isinipaton iyamacahuun. Sinayamacahuun. Sinacani mucayamacahuun. Futsa roayamacahuun. Chaca futsa futsatapafo shinanyamacahuun.

³²Ascatamarocon mafin ranan noinancahuun. Nantifihuun ramapaicahuun. Upa Diosin Cristohuunshon mato

rauhua cuscan huafain nanscarifiai rau huatanacahuun.

**Ahuuscamain Diosin
facufo atirofoquin**

5 Manfin Diospan facufoquin. Fasi mato noicoin. Ascacun Upa Diosihuun caocahuun. ²Cristo nocohuun noicoinquin noco nashoni nocon chaca soashoshquin. Upa Diosin ahuun facuhuun fasi noicoinfia unimani futsafohuunoashu naiton oin. Ascano Criston noco noimisi cuscan marifi nantifihuun noicoinfafaincahuun.

³Ascano ahuara chaca shinanyamacahuun. Ainfofoan maton funuma fu iyamacahuun. Nanscarifiai nocofunufaoan maton ahuinma fu iyamacahuun. Ascatari yora futsan ahuun ahuara fianpaiyacahuun. Diospan yorafocai ascatirofoma. Ascaraya tsainyamacahuun. ⁴Ascari-fiatan tsain mutsama iyamacahuun. Cashu mutsamayamacahuun. Diospan yorafocai ascaraya tsaintiroma. Ascatama Dios yoisharatirofo isca huaquin, —¡Aicho! Upa Diosin min noco shara huafafainiran, —ishon yoitiro. ⁵Natian un mato yoiai cuscan man icoinra huatiro. Ratoran futsan shinanchacamisiton ahuinma fu icaino ainfofori nanscarifiaifono funuma furi icain yora futsana fipaimisi. Nan yora futsana ahuara fianpaiquin nan Dioscoin fuchipaitama ahuara futsahuunsi nuuquin nancai fuchipaifafaini. Afanan un mato shafacafi yoi. Tsoan chaca huaicai Jesucristo Apa fu icari nocotirofoma. Nan Jesús niaifo icaricai ahua chaca afu itiroma. Ascaran chaca huamisifocai Cristo icari noconacafoma. ⁶¡Oinfain! Atirifoan mato amaquiri yosipaicani isca huaquin, —Nanfoan chaca huafiacanifin Dios niaifo ari afu ipatirofoquin, —ishon mato yoipaicani. Ascacun oinfain mato

paracani. Chaca futsa futsatapafu huaquin shatuyamaifoan Upa Diosin atoqui sinai. Yoitimaifoan oinquin. Ato omitsiscapanacafo muran potashquin. ⁷Ascans icaifo cuscan ayamacahuun. Ato fu rafuyamacahuun mato chaca huamatirofoquin.

⁸Nan acaifo cuscan marifi man chaca huayopaonifiashon natian man Diospan facufo. Ascashu ahuunoashu shafacafi isharacahuun. ⁹Ascano Cristo matofu rafuaino icoinsharacahuun. Maton nomuranshon cayacafi shinansharacahuun. Diosin ica cuscan marifi icoinsharacahuun. ¹⁰Diosin fuchipaiyai cuscan huafain tapisharacoincahuun. Nanscacoin acahuun. ¹¹Nan Jesús icoinra huamafoan chaca shinainfo cuscan atofu chaca huatananyamacahuun. Ascatamarocon icoinsharaquifin a chaca huaifo man ato oinmacointiro.

¹²Ascans chaca huaifo cuscarahuunoa tsainyamacahuun. Nan chaca huaifo cuscan yoiquifin marifi man chaca huatiroquin. Ascashu man rafipaitiro. ¹³⁻¹⁴Faquish muran chashamashon non oinsharatiro. Nanscarifi aquin yoran chaca huashon fomanpaifiaiton Diospan tsainhuunshon aton chaca shafacafi tapitirofo. Ascans Diospan tsain yoini isca huaquin,

“¡Oinfain! Man Diosihuunoa shinanyamai man naa cuscaracoinfo. Afanan ascayamacahuun. Oshapacui cuscara iyamacahuun. Funinifoancahuun. Maton chaca shatucahuun Diosihuunoa shinashcaquin. Man ascaiton Criston maton chaca soashofain shafacafi mato oinmatiro Dios man tanasharanon.”

¹⁵Ascacun ¡Oinfain! Icoinsharacahuun. Diospan tsain tapiafoma cuscara iyamacahuun. Nan Diospan tsain cununi cuscacoin acahuun.

¹⁶ Ascano natiantan nan icoindra huamafoan fasi ahuara chaca finonquin finacoincani. Ascacun nan man oiaini Dioshuunshon futsafohuun ramapaiquin ato shara huacahuun ato yoisharacoinfafaincahuun. ¹⁷ Ascacun amaquiri shinanyamacahuun. Ascatarocon Diosin mato amapaiyai cuscan nan fusti tapicahuun.

¹⁸ Ascashu paunyamacahuun. Pauncacaini man fasi chacacoin itiro. Pauncaquimarocon Diosin Yoshin Shara fu rafucain yonoshosharafafaincahuun.

¹⁹ Ascatan Diospan tsain shara ichapa yoinonancahuun. Nocon shuni David fanain ini cuscan fanaincahuun. Diosihuunshon futsafo fanainshocahuun. Maton nomuranshon nocon Ifo shinancahuun. ²⁰ Ahuara ahuuscarafaiton nocon Ifo Dios yoiquin isca huafafaincahuun, —¡Aicho! Noco Ifo Diosin, min ua shara huafafainiran, —ishon Upa Dios yoifafaincahuun. Nocon Ifo Jesucristohuunshon anori Upa Dios yoifafaincahuun.

Ainfofo yafi aton funufohuunoa

²¹ Cristo nicasharapafain mafi rananri nicanonancoincahuun. Nantifi icoindra huafo ya asca huatanancahuun.

²² Ainfofoan man maton Ifon Jesús nicai cuscan huafain maton funuri nicasharacoincahuun. ²³ Nan icoindra huafoan nocon Ifofin Jesucristoquin. Nanton noco iquifain noco cushushara. Nanrifi nocon Numamisi. Nanscarifi aquin Diosin nocofunufu yononi aton ahuinfo iquisharafain ato cushusharanonfo. ²⁴ Nan icoindra huafoan Cristo nicacoianfo cuscan nanscarifi aquin ahuinfoan aton funufu nicacointirofo.

²⁵⁻²⁶ Ascan nocofunufoan maton ahuinhuun noicoincahuun. Cristo noco noiai cuscan huafain maton ahuinhuunri noicoincahuun. Non

icoindra huafoti nocohuun noicoind Criston omitsiscacain noco nashoni nocon chaca soashoshquin ahuun yorafo non inon. Non ahuun tsain icoindra huaiton noco catonni nan chaca huayomisima cuscara noco imashquin. ²⁷ Non ascaiton ahuutiaran nocoshara noco oinshquin non ahuun shinanshara cuscaracun. Nantifi noco chaca soashoshquin. Ascano tsoancai noco yoantiroma Jesús noco imasharano. Ascano Diospan yora sharafo Jesús noco oinshquin.

²⁸ Nan mafiri man musuhumuai cuscan maton ahuinfori cushusharacahuun. Tsoan ahuin noisharashofin afiri noimuaquin. ²⁹ Shinancapon. Tsoacai afiri chaca huamumisima. Non nofiri musu huamutiro. Fonainquin nofiri non pimai. Nanscarifi aquin Jesús ahuun yorafo cushusharamisi. ³⁰ Ascan nonfin ahuun yoraquin. Upan Diosin Furun cushua cuscan huafain nocorifi Furunmun cushusharamisi. ³¹ Ascano Diosin tsain cunuquin isca huani,

“Ascacun nocofunun ainfo fiashucaí afanan apa yafi ahua fu itiro. Apa yafi ahuamaqui pashcatiro ainfo fii. Ascashu nan oshati fusti muran afu itiro. Ascano nan fusti cuscararan,”

ishon cununiquin. ³² Nan na rama un mato Diosin tsain yoia cuscan tsoancai atirifi tapitiro. Ascafia nan un mato yoia cuscan un Cristo yafi nan icoindra huafohuunoa un yoi. ³³ Ascafiahu funufoan mafiri man noiai cuscan maton ahuinfohuun noicoincahuun. Ainfofoan maton funufohuunoi shinansharacoincahuun. Aqi tsain chipuyamafain ato nicasharacoincahuun.

6 Facufoan maton upa yafi uhua nicasharacoincahuun. Nocon Ifon Diosin yononi cuscan maton upa futan uhuan mato iquina. Ascan man ato nicasharacoianshu marifi man icoind-

sharatiro. ²⁻³Ascashon Diosin Moisés yononi yorafo cunushoquin isca huanon, “Maton upa yafi uhuahuunoa shinan-sharafain ato nicasharacoincahuun. Atohuunoa yoisharacahuun,”

ishon cununi. Nan Diosin yonoquin tau huafain yoiyotiani isca huaquin, “Upa yafi uhua man shara huacun urifi un mato shara huai. Nuno mai anoashu man unimayopacunon,” ishon Diosin yoiyotiani.

⁴Natiantan un apafari yoisharapai. Maton facufoqui tsain chipuyamafain curushcain yoiyamacahuun. Man tsain isinipaton ato yoiaino matoqui sinatirofo. Asca huaquimarocon ato tapimasharacahuun chaca huanonfoma. Nocon Ifo Jesús nocohuun noiai cuscan maton facufo yosisharacahuun noco Ifo tanasharanonfo.

⁵Yonomatifoan maton ifofo nicas-haracoincahuun. Nuno mai anoshon maton ifofoan mato yonotirofo. Maton Ifo Criston fuchipaiyai cuscan man samashta ashoriscapaitiro. Nanscarifi aqui maton ifon nantori mato yonopaiyai cuscan shara huashoriscacahuun.

⁶Maton ifoan mato oiainnosi yonoshonsharakuima matohuunoa shinansharanonfo. Mato oianmafiaifono unimacai ato yonoshosharacahuun. Man ascaiton oin unimanonfo. Man mato ifo yonoshosharakuifin nan noco Ifo Criston yonoshoshara man huaicain. Ascan nan nuno mai anoashu mato ifo fusti man unimana cuscan huafainri noco Ifo Diosin mato amapaiyai cuscan ashocahuun. Ascashu noco Ifo Jesús ahuun yonomati iishcaquin.

⁷Ascan mato ifofo fasi unimacain yonoshokuifin nan noco Ifo Dios man fasi unimacain yonoshoshara cuscan. ⁸Ascan man man tapia yonomatifo iyamarai oinmatifomari nan yonoshosharaifoan nocon Ifo Jesús ato inansharacoinshquin.

⁹Nanscarifi aquin ifofoan maton yonomatifo shara huafain ato omismati huayamacahuun. Man man tapia aton Ifo Jesús nai murannoashu nanrifi maton Ifo. Jesús noco oin nanscarafosi yonomatifo yafi ifofori atocai futsa ichapama noifain futsa fasi finonmafain noima. Ascatama nanscarafosi huaquin nantifi nocohuun noiaquin.

**Criston nan icoinra huafo noco
itishara huaa noco noिकासmaifoan
noco ahuusca huanonfoma**

¹⁰Ascano uhuun yoramishtichin uhuun tsain unutaquin un mato yoinon. Nocon Ifo fu rafucahuun ahuun curushu mato inannon. Man ascaifi ahuunoashu man mutsisipa shara itiroquin nan tanasharashu. ¹¹Un ahua futsahuunoa un mato yoi man tapisharanon. Ranushumuafu aton niaifoan ato yonotiro itisharanonfo futsafoan ato ahuusca huanonfoma. Ascashon nan yopaifo cuscan ato inantiro. Aton ashi yafi piafo non ahuun cuno maiti inanfain ahuun cuno shofucumuti sahuufain ahuun cuno sapa ponutamucai ashin iquinonma. Nanscarifi aquin Upa Diosin mato inanpaiyai cuscan nantifi ficahuun yoshin chaca Satanás mato chaca huamapaiyai cuscan aashquima. ¹²Non Jesús tanasharaitocai yorafoan noco unumatiroma. Ascatama nan yoshin chaca Satanás yafi yoshin chaca futsafoanri noco curushcain chaca huamapai. Nanfo non oinyamafiatiro noco asca huapaifafaini. Nanfoan icoinra huafoma yonofafaini chaca huanonfo. Nan yoshin chaca ichapafoan.

¹³Ascacun Upa Diosin ahuun curushu noco inanpaiyai cuscan ficahuun mutsismashcaquin yoshin chacafoan matoqui nocoshon man itisharashu pacushcaquima. Ascano nan yoshin

chacafoan mato chaca huamapaiyaiton Diospan curushhuunshon man finontiro mato chaca huamanofoma. Ascan Diosin mato amapaiyai cuscan nantifi man acoinnashu man isharatiro yoshin chacafo matomaquinao potashcaquin. Asca Jesús fu rafushon man chaca huashquima.

¹⁴Mato yoia cuscan ranushumuafu itishara cuscan marifi itisharacahuun nan yoshin chacafo matoqui nocoshon mato chaca huamapaiyai cuscan huashquima. Upa Diosin mato imapaiyai cuscan fusti acahuun itisharashcaquin. Iquisi ranushumuafu ato nanushumuti yopacani aton camisa nonoaino pacushcaquima. Nanscarifiai man icocoaino yoshin chacanun mato pacumatiroma. Ranushumuafu ahuun cuno sahuuti shofucumua sahuumisifo nan noicasmaifoan aton ashin ahuun ointiqui tsacanoma. Marifi Diosihuunoashu isharacahuun yoshin chacafoan maton ointi chaca huanonma.

¹⁵Ranushumuafu aton sapato shara sahuutirofo aya ichosharashcaquin ahuashta puamashquima. Nanscarifiai marifi itisharacahuun futsafoqui nocoriscashon Diosin tsain shara man ato yoiaino aton ointi unimanonfo.

¹⁶Ascan ranushumuafu sapa nituhuati pia yafi ashi iquinonma tsomatiro nan noicasmaifoan aton piannonma. Nanscarifiai maton nitumati man yopai. Man noco ifo Jesús icoinra huaiton nan yoshin chacafoan maton nomuran shinanchacamapaiyai cuscaai man atiroma. Ascana non Jesús icoinra huaino nan nocon nituhuati cuscara itiro.

¹⁷Ranushumuafu ahuun cuno maiti sahuutirofo aton mapo cushusharashcaquin nan noicasmaifoan ato mapoqui ahuusca huanonfoma. Nanscarifiai marifi man Jesús icoinra huashu Upa Dios fu man nipatiro. Man ascaito-

cai yoshin chacanun mato ahuusca huatiroma. Ranushumuafu aton nopo fitirofo nan ato noicasmaifo ahuun rutushcaquin. Nanscarifiai Diospan Yoshin Shara ahuun nopo cuscara ficahuun. Nan nopo cuscarafin Diospan tsainquin. Nanrifi man yopacoin nan yoshin chacafo matoqui nocotima huashcaquin.

¹⁸Ascacun Diospan Yoshin Sharahuunshon Dios unutama cuffafaincahuun. Aqi mutoi futsucaquima. Ahuara futsa ahuuscarai cuscan Upa Dios cufficahuun. Ointiaquimacaquima. Upa Dios cuffifaincahuun. Nantifi Jesús icoinra huafo ato cuffishofaincahuun.

¹⁹Ascashon uarifi cuffishocahuun Diospan Yoshin Sharahuunshon ahuun tsain shara ranotama un ato yoifafainon. Nan uhuun caifomafohuunoashuri Jesús ato nashoni un yoinon. ²⁰Ascashon nan un mato yoiai cuscan huafain un yoimisi. Ascacun Cristo ua nichini ahuunshon nantifi yorafo un yoifoanfainon. Ascacun ua cunu muran iquimanifo. Ua Upa Dios cuffishocahuun un ranotama Diosin atohuun noiai cuscan huafain un ato yoinon.

Pablonun tsain shara ahuun unutaquin Efesofo ato fomani

²¹Ascan nocon yorahuan Tiquicoahuun un fasi noicoi. U futan nocon Ifon Jesushuunoa yonoshomisi. Ascacun Tiquico un mato ari nichishquin. Un icai cuscan huafain urimain ahuuscaiquin mato nanto tapimai. ²²Ascacufin un mato ano nan nichicai nonmain ahuuscaicain matorifi tapimafain maton ointi unimanon.

²³Ascana nocon Upa Diosin futan nocon Ifon Jesucristo maton ointi unimanon Jesús icoinra huashu man nantifi noinain futsutiro. ²⁴Man nocon Ifon Jesucristo nantishon tapiquin man ahuun noi unupacuyamaino Upa Diosin nantifi

matohuun ramapai. Unquian Pablo un
mato cunushoni. Nanscari inon. Nanti. *Pablo*

Pablonun Filipos Anoafu Cunu Fomani

Cunu muranshon Pablonun nan icoindra huafo Filipos anoafu cunu fomani

1 Uhuun yoramishtichin Filipos anoafuan manfin Diospan yorafoquin. Un mato yafi mato niaifono non mato cushumisifori cunu fomai man tapinon. Timoteo natian ufu nuno. Nantori mato yoisharapai. Ascan nonfin Cristo Jesús ahuun yonomati rafuquin. ²Nocon Upan Dios futan nocon Ifon Jesucristo matohuun ramapaiqui matohuun shinansharaicai mato shara huafafainpainon. Ascashon maton ointi unimamapainon

Icoindra huafo Pablonun ato cufishofafainpaoni

³⁻⁵Un mato fasi shinain. Nan un matohuunua shinaintifi unimacain un mato Upa Dios cufishomisi isca huaquin. —¡Aicho! Uhuun Upan Diosin, Filiposofoan min Furun icoindra huaquin tauhuanifotian yafi natiantan u futan min Furunhuunua futsafo tapimpaifafaincaniran, —ishon un matohuunua Upa Dios cufifafaini. ⁶Ascano un icoindra huai man Jesús Ifo huaquin tau huanitian Upa Diosin maton ointi fianananshara huani cuscan natianrifi shafatifi mato fiananan huariai cuscan nan Jesucristo oaitian man nanscasi anon.

⁷Ascacun un fasi matohuun noiquin. Uhuun nomuranshon nannori un mato shinanfaini. Upa Diosin noco shara huamisi cuscan marifi man man u futan mumisi. Ascacufin ua cunu muran iquimaifotian Upa Diosin ua shara huafain uhuun ointi ua shara huashoni. Nan uhuun ointi ua shara huashoan cus-

can marifi man man muumisi. Ascan futsafoan Jesushuunua amaquiri yoifaiton un amaquiri aton yositamarocon shafacaficoin un ato yoi tapisharanonfo. Un ato yoimisi isca huaquin, —Jesús noco nashoni nocon chaca soashonano non afu ipanon, —ishon un ato caya-cafi yoinon. Upa Diosin ua shinansharamani marifi u futan un muai cuscan man munon. ⁸Jesucristo nocohuun noiai cuscan huafain urifi un matohuun noi. Ascacun un mato fasi shinain. Urifi un matofu ipaicoinquin. Un icon yoiai cuscan Diosin ua onancoian.

⁹Ascacun un mato cufishoni man Dios onancoinfain ahuara iconcoin fusti man tapisharaquin finacoishon futsafo man noicoionnon. ¹⁰Ascashon man tapitiro ahuamain shara iyamarai chacaquin. Ascano man Jesús fu rafuashu nan cuscara sharacoin man itiro. Tsoanshtacai matohuunua ahua chaca ointirofoma nan Cristo oaitian. ¹¹Nanscashu marifi nan Jesucristo shara huafafainai cuscan man huatiro. Man ascaiton futsafoan mato oinquin yoitirofo isca huaquin, —¡Aicho! Nafu icoinsharamisifo. Upan Diosihuunuaishu isharamisifo. Ascan Diosin fasi shararan, —ishon yoishquicani. Un nannori matohuunshon Upa Dios cufifafaini.

Un Cristo fu rafupaipacunaca nan fusti un shinain

¹²Uhuun yoramishtichin un afanan mato yoinon. Ua cunu muran iquimanifo un afanan ato Diospan tsain shara Jesucristohuunua ato yoiamaisafain. Ascafiaino yora paratamafain Jesús icoindra huafafaincani. Nan ua chaca huafiacashon nanfoanri uhuunshon nan tsain shara Jesushuunua nicacaquin man icoindra huafo. ¹³Ascano nantifi ranushumuafu futan nunua yorafoanri man tapiafu un Cristohuunua yoiaiton

ua cunu muran iquimanifo. Un ahua chaca huayamafiaiton. ¹⁴Ascatan ua cunu muran iquimafiafocai un funamisima. Ascatarocon ranotama futsafo Cristohuunoo un ato yoifafaini. Un ascaiton oincani Jesús icoinra huafo paratamafain ranotama Diospan tsain shara futsafori ato yoifafainonfo.

¹⁵⁻¹⁷Ascato atirififain ua noicoinquin uhuunoo shinanmisifo isca huaquin, —Pablon cunu muran iquimafiafocai Upa Diosin tsain yoiai cuscan toan shatumanima ato Jesushuunoo yoiai cuscan nicasharononfo, —ishon uhuunoo shinansharacani. Nannori Jesushuunoo shinainfoan yoimisifo. Icon atirififain nan tsain shara Jesushuunoo un yoiai cuscan yoifiacashon nanfoan ua shutipaicani. Un icai cuscan ranotama Jesushuunoo yoipaicaquin. Nanfoancai Cristo noicoianfoma. Ascashon shinanqui isca huafo, —Pablon cunu muran iquifiashon Jesushuunoo yoimisiran, —ishon non yoiaiton nicaquin, —Ahuun ointi non isinmatiroran, —ishon uhuunoo shinanchacamisifo. ¹⁸Nannori uhuunoo yoifiafonocai un shinanchacatarocon un fasi unimai man futsafo Jesushuunoo yoimisi cuscan. Ascashon futsafoanri shinansharafain cayacafi yoimisifo cuscan man rafucainta Jesushuunoo yoiai cuscan un fasi unimacoinni.

¹⁹Ascacun mun tapian man ua cu-fishonai cuscan yafi Jesucristo Yoshin Sharapan ua ashoain cuscan un fasi unimai. Ascatan nan ahua ahua cuscararan un finonfiashucain un shinanchacaima. Ascatarocon nan un finon huain cuscan ua shara huashoin. ²⁰Upa Diosin ua amapaiyai cuscan un fasi hupaicoincan un rafitiroma. Un rafitamaron un niyoashu iyamarai un naicain un ratuima. Un ascaiton oinquin futsafoan Jesushuunoo shinansharanonfo.

²¹Cristo fustihuunooashu un afu ipapai. Ascashu un nairifi shara finacoin itiro unmain nanriashu afu fasi unimacoin cayamaifin.

²²Ascafia un nataima iquisi futsafo Jesús icoinra huamayotiro afu ipanonfo. ¿Ascun ratocaimun sharaquin? ¿Niyoashu iyamarai un naamun shara? ¿Ascacun ratomun un catontiroquin? Uncai tapiama. ²³⁻²⁴Nan rafu shara. Asca uncai catontiroma. Urifi un Jesús ari capaicoincain afu ishquin. Nan fasi shara finacoinfiashu un shinan man ua fasi yopacoin un mato ahuan tsain shara yoinon. ²⁵Ascato man fasi ua yopaifin mun tapiquin. Ascatarocon mun tapi un nayoataima un matofu iyoano man Jesús icoinra huaqui finacoianshu man fasi unimacointiro.

²⁶Ascato un afanan matofu iyoaiton oin Cristo Jesushuunooashu man fasi unimacoinshquin. Ascashon man yoiquin isca huashquin, —¡Aicho! Jesucriston min afanan nocoquin Pablo nichian nocon cayacafi tapimasharonon, —ishon man yoishquin. Ascanshu man uhuunooashu fasi unimai finacoinshquin.

²⁷Ascacun isharacahuun. Man isharaiton oinqu yoitirofo isca huaquin, —Jesús icoinra huafo isharacoinmisifo. Ascashon nan tsain shara Jesushuunoo iconcain, —ishon yoishquicani. Ascun un matofu iyoano iyamarai un chaicushon matohuunoo nicaquin un tapitiro man Jesús tanashara. Man nannorisi shinainton Diospan Yoshin Sharahuunshon futsafo man ato Jesús icoinra huamashquin. ²⁸Icainra huamafoan mato tsain shatumpaiifaino mancai atoqui ratushquima. Rahuinmafain man ato Jesushuunoo yoifafainshquin. Ascashu man atoqui ratuyamaiton oinquin tapitirofo mato Upa Diosin numa. Ascashu nanfo funofiainocai man funotama man Dios fu ipanaca.

²⁹Upa Diosin mato shara huashoan man Cristo icoinra huafain marifi man ahuunoashu omitsiscanon. ³⁰Un nocon Ifo Jesushuunoashu un omitsiscamisi. Man man maficoïn ua oïnpaoni natianri man ua nica ahuunoashu un omitsiscaiton. Un ahuunoashu omitsiscasai cuscan marifi nanscarifiai man omitsiscasai.

**Cristo nocohuunoashu
omitsiscafianishaquin natian Apa
Dioshuunshon nantifi finoncoian**

2 ¿Man Cristo fu rafuaiton mato unimamaimun? ¿Matohuun noiquin maton ointi isharamamun? ¿Diospan Yoshin Shara matofu rafuimun? ¿Cristo matohuun shinaincain matohuunri ramapaiyaiton man man mumisimun? Icon nanfo man man mumisi. ²Nanscacun ua unimamaquin finai cuscari Cristo maton nanscarifi huaquin shinanmapaiyai cuscan nannorifosi mato nomuran shinancahuun. Ascashu noinancahuun Jesús mato amapaiyai cuscan fusti aashcaquin.

³—Ufin un apaiyai cuscan fustifin un huaicain. Ascan futsafoan apaiaifo cuscacai un shinanpaima. Ascano un acai cuscamun futsafoan uhuunoa shinansharapainonforan, —icashu cacapaimisi iyamacahuun. Anori itamarocon futsafohuunoa shinansharacahuun. Ascashon atohuunoa yoiquin isca huacahuun, —Nanfoanfin ua finontirofoquin. Ascan uncai ahuama. Jesús fustiton ua imasharatiroan, —ishon futsafo finonmapaiyamacahuun. ⁴Ascashon mafin man apaiyai cuscan fusti shinanyamacahuun. Futsafoan apaiaifo cuscari shinanshocahuun. ⁵Ascashon nocon Ifon Jesucristo shinain cuscan marifi nannori shinancahuun. ⁶Aafin Dioscoïnquin. Apa Dios imisi cuscan arifi onihuafiacun. Ascashocai yoiquin isca huapaonima,

—Urifi un Diosquin. Nantifi uhuun Up-anari uhuuna. Ascano uhuun Upan nai murannoashu ica cuscari un nuno mai ano itiroquin. Un ascaitocai ahuaton ua chaca huatiromaran, —ishoncai Jesús anori shinanpaonima. ⁷Arifi Dioscoïnfiashon nan Apa Diosin ahuun curushu yafi ahuun ahuamamishti potayoni mai ano oshquin. Ascashu nocofunucoïn noco cuscara ipaoni. Arifi nocofunu caintiro cuscan cainni yorafoan aton oinmati cuscara iishquin mai ano ftoni. ⁸Ascano nocofunucoïn cainfi-anishaquin nancaifin fasi omitsiscasai finacoinquin. Nanscaiton Apa yoini isca huaquin,

—Nantifi yorafohuunoashu min ato nashoshquiran, —ishon Apa yoini. Ascashon Apa nicacoianshu ihui coyan iquinanhuunoashu noco nashoni. Ahuashta chaca huayamafiamisishaquin nai nan chaca huamisi ointsacai omitsiscacaini naani. ⁹Ascafiacun Upan Diosin Furun afanan funimani afu niaifocoin inon. Ascacun tsoa futsacai Jesús finontiroma. Asca Upa Diosin Furun yoiquin isca huani,

—Mirus fustifi min ua cuscara. Nantifiton aton Ifo. Ascan minfin uhuun Facu Jesucristoquin. Tsoa futsancai mia finontiromaran, —ishon Apa yoini. ¹⁰⁻¹¹Ascanishaquin natian Jesús nantifi finoncoian. Nai muran icafo yafi mai ano icafo non naamisifo non yoshinfoanri. Aqui oshon nantiffain ratoconun mai chachishon yoishquicani isca huaquin,

—Jesucristo minfin nantifiton noco Ifoquin, —ishon yoishquicani. Nannori Furunhuunoa yoicaquin nantianri Apa Diosihuunoa yoisharashquicani.

**Jesús icoinra huafoan a icoinra
huamafo muranshon ato ismatiro
ahuuscashumain isharatiroquin**

¹² Ascacufin uhuun yoramishtichin un matofu iyoshon un mato yoiyopaoni cuscan man nanscasi huaquin nica-coinmisi. Natianri un matofu iyamafi-ashon nan un mato yosipaoni cuscan unutama finacoinquin nicasharafafainc-ahuun cachiquiri huacaquima. Jesús mato numafain maton chaca soashona man afu nipanon. Ascashon nunori shinancahuun, —Nan ua yonopaiyai cuscan un ayamafin musuquin. Ascashu un funotiroran, —ishon shinancahuun.

¹³ Diosin maton nomuran mato shinan-sharamafaini mato amapaiyai cuscan man anon. Afin apaiyai cuscan huafain matorifi nannori shinanmatiro.

¹⁴ Ascacun Diosin mato amapaiyai cuscan fusti huacahuun. Nantifi man acai cuscan huaquin tsain chipufain fochishmanantananyamacahuun.

¹⁵⁻¹⁶ Man ascaiton oiniquicai Jesús tanamafoan matohuunoa yoitirofoma isca huaquin, —Nan Jesús tanamisifofiashon tsain chaca yoisiforan, —ishocai matohuunoa yoitirofoma. Man ascaitocai mato tsoan ahuashta rafantiroma. Ascatarocon man isharaiton ointirofo man Diospan facucoinfoshon. Man ahua chaca huamisima. Nan Jesús icoinra huamafoanfin ahua chaca huamisifoquin. Ascashon shinanchaca fustimisifo. Ascasi acani man funofo. Ascashu faquish muran icafo shinantsafo. Mancai ato cuscarama. Ato cuscara itamarocon Dioshuunooasi ato yoifafaincahuun icoinra huacanashu Jesús fu nipanonfo. Ascan manfin ato muranshon nan chashamatinin chasha huaiquin ato ismashcaquin a chaca huamisifoan mato oinnonfo. Man ascaino Jesús afanan oaitian unfi

unimashquicain. Ascashon uncai ipaitsi mato Diosin tsain yoimisimaran, un nantifi yoitiro.

¹⁷⁻¹⁸ Un mato yoisharamisi man Jesús icoinra huacoinnon. Asca Upa Dios un yoitiro isca huaquin, —Upa Diosin, mian yononi cuscan un Filiposofo min Furun Jesushuunoa yoimisi. Nan icoinra huanonfo min ato yoiyai cuscan acoinonfo. Un ato mia icoinra huamahuunshon ua rutushquicaniran, —ishon un Upa Dios yoitiro. Ascano ua rutufiafo uhuunshon man Jesús icoinra huano un unimatiro. Ascacun marifi ufu unimacahuun Diosin ua shara huaino un matohuunooashu natiro.

Timoteo yafi Epafrodito

¹⁹ Jesucristo apaiyaiton un matoqui Timoteo samamashta nichipai. Chipu u ano nasoaitian matohuunoa ua tapimanon. Nocoshon matohuunoa ua yoiyaiton nicai un fasi unimacointiro.

²⁰ Timoteo mato noicoinquin matohuunoa tapipai man isharacaimain man Jesús tanasharaquin. Asca tsoa futsacai Timoteo cuscarama. Ascashu un matohuun noiai cuscari arifi matohuun noicoin. ²¹ Nantiffain afin apaiaifo cuscan fusti shinanmisifo. Jesucristo ato yonomapaiyai cuscacai shinanmisifoma.

²² Ascan Timoteocai ascarama. Mafico-coin man man onan. Nan uhuun facu cuscaracoinshofin. Timoteo u futan Jesushuunoa yoimisiquin. ²³ Ascacufin un Timoteo mato ano nichiriscapaicain. Un-main ahuuscaicain un tapiataima. Ascan nan un tapiaintian un mato ari Timoteo nichiriscatiro uhuunoa mato tapimanon. ²⁴ Un nocon Ifon icoinra huai uatsi mato ari nichiyamaiton. Ua nichia-aino un samamashta un mato ari caicain.

²⁵ Ascano manfin uqui Epafrodito nichiniquin un yopai cuscan ua ashonon. Ascacun nanfin uhuun ushto

cuscaracoinquin. U futan Diosin tsain yoi-fafaini. Afin fasi mato shinain. Ascan un shinanracafin afanan un mato ari nichishquin. ²⁶ Epafrodito isinincai mato tapimapaiyamafiano man man tapian nicaquin matohuunshon shinanqui ahuun ointi nocoita. Ascashon yoiyamua isca huaquin. —Tapienmapainonforan aton ointisin ihuutirofoquin, —ishon matohuunoa yoiyamua. Ascashu natian matofu fasi ipaicoin. ²⁷ Iconfinquin Epafrodito fasi isininqui man naqui rashquiyamua. Ascafia Diosin ahuun ramapaicain uhuunri ramapaiyaino man cayayamua. Ascan naanofin un fasi shinain omitsiscain finacuanitaquin.

²⁸ Ascacufin un mato ari nichipaicain. Matoqui nocoaino man aqui unimanon. Man ascaino urifi un unimashquin. Mato ari Epafrodito nocoanocai un afanan shinain omitsiscashquima. Muma sharamain matoqui nocoyamaiton. ²⁹⁻³⁰ Cristo yonoshoni man naqui rashquiyamua. Ascan man chai icashucaí uqui man oyamaino matohuun rafanan Epafrodito uqui oyamua. Ascafia matoqui nocoaiton fasi unimacain nocon Ifohuunshon ihui sharafain ahuun noiquin a ismasharacahuun.

Ahuara iconcain shara finacoian

3 Uhuun yoramishtichin uhuun tsain unutaqui un mato yoi. Manfin nocon Ifo Jesucristo ahuun yorafoquin ascacun unimacahuun. Un mato cunushoni cuscan afanan un mato yoi. Man poshtutanonma nicafafainafin sharaquin. Nan tsain shara man tanacucai yora futsafoan mato amaquiri yositirofoma.

² Ascacun ¡Oinfain! A yora chaca huaifo fishtayamacahuun. Pashna pofu cuscarafokin. Nan yora chacafian mato amaquiri yosipaicani isca huaquin, — Man foshqui rupa shatuyamashucain

man Dios ari nocotiomaran, —mato huamisifo. ³ Asca non foshqui rupa shatuhuunshocai nocon chaca non soatiroma. Jesucristo noco nashoni nocon chaca soashoshquin. Arus fustifin nocon chaca soashotiroquin. Nan Furuhuunshori Diosin noco ahuun facufo imatiro. Ahuun Yoshin Sharahuunshon non Dios yoitiro isca huaquin, —Non mia fasi noi. Min sharacoinran, —ishon non yoitiro. Jesucristo noco nashoni nocon chaca soashoshquin. Ascacun non aqui unimacoinni. Arus fusti noco numatiro. Man non tapia non foshqui rupa shatuhuunshocai noco ahuusca huatiroma.

⁴ Futsafoan yoiquiraca isca huafo, — Unfi shara fustisi huamisiquin. Ascashufin un Dios fu ipatiroquin, —ishon shinanfiaifono urifi un nannori shinanpaiquin un nannori shinanquin finacuana. ⁵ Un caintan ocho oshatan ua foshqui rupa shatunifo. Asca unfin Israelifian caifoquin. Urifi un Benjamín nami. Uncai osiama. Unfin Israelicoquin. Diosin Moisés yoini cuscan urifi un nicacoianquin. Ascatarifi unfin Fariseoquin. ⁶ Diosin tsain tanasharapacoinquin nan Jesús tanamisifo un ato chaca huapaoni. Unfi nantifi Moisés tsain tanasharapacoinquin. Tsoancai uhuunoa yoiqui isca huatiroma, —Pablonuncaí Moisés tsain nicacoianpaonimaran, —ishocai tsoan yoitiro. Ascashon un shinanquin isca huapaoni —Nanfoan ua imasharatiroan, —ishon un fasi amaquiri shinanpaoni.

⁷ Ascafia natian mun tapia afocai ahuama. Afoancai ua imasharatiroma. Nanfo mun potacoian Jesús fusti iconra huashu afu ipashquin. ⁸⁻⁹ Ascano uncai afanan un ipaoni cuscan apaima. Nantifi un ipaoni cuscan mun potacoinni. Un ascai un funocoinpaoni. Ascacun natian un shinancai nanfo ahuama. Nan ahuara chaca potamua cuscarafu. Natian uhuun Ifo Jesucristo

fusti un onanpaicoïn. Nancaïfin shara finacaiquin. Arus fusti ua imasharatiro. Moisés tsain yonopaoni cuscacai un afanan ascatiroma ua imasharanon. Ascatarocon un Cristo icoinra huaino Upa Diosin Furunhuunshon ua imasharatiro a cuscara shara un inon. Ascan Diosiqui nocoaitian uqui unimatiro un Cristo fusti icoinra huacun ua imasharanon.

¹⁰ Un Cristo onanpaisharacoin afu rafushquin. Diosin ahuun curushpan Cristo afanan funimani cuscan urifi nan curushu un mupai a cuscara shara ua imanon. Cristo omitsiscapaoni cuscan urifi afu rafushon un mutiro. Unrifi ascapai nan cuscara ishquin. Ascashon ua nashoni un chaca huapaoni cuscan ua soashoshquin. Ascacufin un ipaoni cuscacai afanan ascapaima. Ascafia un nan Cristo fu naa cafiscapaoni. Ascashu natiian a cuscara shara iishquin. ¹¹ Ascano unrifi nan funini cuscan un funipai. Cristo naafiashu afanan funini. Ascanishashquin afanan nanacama. Nanscarifiai urifi un afu funi cafiscapai. Nuno mai ano niyoshon afanan chaca huatama nan cuscara shara iishquin.

Un fasi Jesús tanaqui tapicoïnpai un aqui nocoaitian afu ipashquin

¹² Un ipaiyai cuscacai un acoïnataïma. Un Jesús cuscaracoin ipaïfaïcai un icataïma. Jesucristo uhuun ointi fiananan huani a cuscaracoin ua imashquin. Ascacun un Jesús tanasharafafaini a cuscarasharacoin ishquin. ¹³ Uhuun yoramishtichin un Jesús cuscaracoin icataïyamafiaïcai un ipaoni cuscan afanan un shinainma. Un Jesús cuscara ipaiyai cuscan nan fusti un shinain. ¹⁴ Ascashon uncai ahua futsa shinainma. Nan Jesucristo fusti un tanapaicoïn. Nan fusti un shinanfafaini. Ascano Diosin ua catonni un afu ipanon. Jesucristohuunoashu

Upa Dios ari un nocotiro. Nocoashu a cuscarasharacoin un itiro.

¹⁵ Man Jesús tanasharai nan un mato yoia cuscan marifi nannori shinancahuun. Un shinain cuscan futsan shinanymaiton afincoin Diosin ato caya-cafi tapimatiro. ¹⁶ Ascashu Cristohuunoa man tapia cuscan nanscacoïncahuun.

¹⁷ Uhuun yoramishtichin un Jesús tana cuscan marifi uhuun caocahuun. Non icai cuscaïfori oincatan nanfohuuri caocahuun. ¹⁸ Un mato yoïmisi cuscan nannoricoïn natiïantan afanan uhuun nomuran uaiïanan un mato yoï. Jesucristo noco nashoni nocon chaca soashoshquin non ipaoni cuscan afanan non shinanonma. Futsafoancaï nan na un mato yoïai cuscan nicapaïcainima. Ato chaca shatucasmacani. Ascaïfin Jesús noïcasmafain icafoquin. ¹⁹ Jesús ato amapaiyai cuscacai shinantama nan afin apaïaïfo cuscan fusti shinancani. Pïfain ayafain huacaquin. Nan fusti shinancani. Ascashon nan nocofunufoan aïnfofohuunoa fusti shinancani. Nanscarifi aïnfofo aïfono nocofunu futsafo yasi icaïfoanno. Nanscara chacafoï huacani. Nanscaïï tapiaïfo. Non chacaforan itama noncaïfin sharaquin icafo. Afanancaï tsoa rafipaitirofoma. Nanscarafo nacanashu omitsiscapanacafo muran focani.

²⁰⁻²¹ Ascafia noncaï ascarama. Ascatarocon nonfin Diospan yorafoquin. Nonfin naï muran afu ipanacaquin. Noncon numamisi Jesucristo nanno ica. Nanfin non fasi manaïcai. Unimayanan afanan Jesús nocoqui oaitian nocoqui nocoshon ahuun curushpan a cuscara sharacoin noco imashquin. Ascashu non nacun nocon caya chacanafiaino Jesús nocon caya fiananan huashotiro non afanan ahuuscatama isharacain funa sharacoin ahuun caya cuscara non inon. Nanscarifi aqui ahuun curushpan nantifi noco iquina.

Nocon Ifo Jesushuunoashu unimafafaincahuun

4 Ascacun uhuun yoramishtichin un fasi matohuun noicoin. Un mato fasi oinpaisharai. Nan un matohuunoa shinaintian un mua fasi unimacoinna. Un mato Jesushuunoa yoimisi cuscan natian man man icoinra huasharacoian. Man ascaino un fasi unimacoinni uhuun yonoricai funoima. Ascacun uhuun facufoshtan Jesús cachiquiri huacaquima tanasharacahuun.

²Ascatari un nica Evodia yafi Síntique fochishmanantanafainaifoan.

Ascacun un ato yoi achishta rafutan, Evodia yafi Síntique un mato yoisharapai. Ahuuscai man fochishmanantanafainai. Cristohuunshon nannori rafu shinansharacahuun. Afanan ascayamacapun. ³Uhuun yorashtan min u futan Dios yonoshomiscun un mia yoi. Nan ainfo rafu ato yosisharapun. Afanan rau huatananshu yorahuan tananonfo. Nan rafutafin u futan Jesushuunoa futsafo yoipaonifoquin. Ascano Clemente arifi u futan Jesushuunoa yoipaoni. Ascan natian yora futsanfoanrifi u futan Jesús yonoshonafo. Ascacun nanfofin Diosin ahuun libroqui nai muranshon aton anufo man cunuaquin afu nipashquinonfo. Nantifi ahuun yorafo Diosin aton anu cunua afu nipanonfo.

⁴Ascacun Jesús mato Ifoquin unimacahuun. Afanan un mato yoi futsai unimacahuun. ⁵Nocon Ifo oti chaimaquin. Ascacufin isharacahuun. Futsafohuun noicoincahuun. Man ascaiton yorafoan mato oincaquin, —Isharaforan, —ishon matohuunoa yoinonfo. ⁶Ascano shinanchacayamacahuun. Ascatarocon ahua ahuecarafiaino Upa Dios cuficahuun. Man yopai cuscari a yoicahuun. Man cufiaino Upa Dios yoicahuun isca huauquin, —¡Aicho! Upa, min ua nicas-

haramisi un yopai cuscan min tapishton min ua ashosharamisiran, —ishon cuficahuun.

⁷Man ascaitofin maton nomuran Diosin maton ratufo potafain mato ointi isharamaiquin. Ahuara ahuecarafiaino Diosin nocon ointi isharamatiroqui. Ascan noncai tapitiroma ahuecashomain nocon ointi noco shinansharamatiroquin. Ascafia Jesucristo non icoinra huacan nocon ointi yafi nocon nomuran noco shinansharafafaini.

Ahuara sharafosi shinancahuun

⁸Ascano uhuun yoramishtichin mun cunuquin anaiticuana. Un afanan mato yoi futsapai. Ahuara icon fusti shinanfain ahua sharafosi shinanfain ahua cayacafi fusti shinanfain ahua noco shinansharatiro nan fustiri shinanfain ahua yorafoan shara huaifo cuscan shinanfain Diosin noco ashoin cuscan nanfo fusti shinansharafafaincahuun. Ascashon nocon Ifo —¡Aichoran! —huacahuun. ⁹Ahuara un mato yoia cuscan huafain un mato tapimana cuscan huacahuun. Ascashon ahua futsan un acaiton man oian cuscan macafiri acahuun. Man ascaiton oinquin Diosin maton nomuran isharamatiro. Ascashu matofu ipashquin.

Filipos anoafoan pui ichanan huacashon Pablo fomanifo

¹⁰Un unimacoin man ua shinanfaiquicai man ua pui fumayomisima. Man ua pui inanfiapaonishaquicai afanan man ua fumayomisima. Ua pui fumapaimisifishuca ahuecashuco ua fumatiroma. Ascafia natian man man afanan ua fuma. Ascacun natian un nocon Ifo, —¡Aicho! —huai. Uarifi afanan man ua cushusharamisi. ¹¹—Ascano un ahua yopafiaquicai man ua ahua inanmaran, —un mato huamisima. Ahuarafo

ahuuscarafiainocai shinanchacatamarocon un unimacointiro. Diosifin nannori ua tapimanaquin. Ascashu un ahuara ichapaya iyamarai un ichapama ayafishuri un unimatiro.

¹² Ascano mun tapiarifi ahuuscashu-main ahuuoma non isharatiroquin. Nanri mun mumisi. Ascatan ahuuscashumain ahuara ichapayashuri non isharatiroquin. Nanrifi mun mumisi. Ascatan ahuara ahuuscarafiainori un unimacointiro. Ascacun uncai shinanchacamisima. Un pii manyashu iyamarai foniquiri nanscara un mutiro. Raniran futsanoashu ahuara ahuuscarafiainorikai un shinanchacatiroma. Ascatarocon un unimacointiro. ¹³ Cristo ahuun curushu ua inainton nan curushhuunshon ahuara ahuu cuscararan futsan un atiroquin.

¹⁴ Ascafiacun nan shara man uhuun ramapaicain ua shinan. Ascan manfin ua shara huaquin un omitsisca cuscan marifi man ua shinanquin ua shara huaa.

¹⁵ Man Filipos anoafoan man rama Jesucristohuunoa nicaquin tau huantian Macedonia anoashu un caiton un yopai cuscan marus fusti man ua inanni. Ascan nan icoinra huaa futsafoancai tsoan ua pui yafi ahuara futsa fumanifoma. Nan man man tapia. ¹⁶ Un Tesalónica ano icun un yopai cuscan man ua fumafafainpaoni. ¹⁷ Ascafia ufcain un maton pui fianfafainmisima. Man ua inanshara cuscan Upa Diosin oinquin matorifi ahuun rafanan shara

huafafainshquin. Mato shara huaino urifi unimacoinshquin.

¹⁸ Ascano natiancai afanan un ahua yopaima. Munmain ayashufin. Epafrodito uqui nocoshon man ua fuma cuscan ua inantoshiyamua. Un yopai cuscan finonmafain man ua fumayamua. Nan man Diosihuun noiai cuscan huafain uhuunrifi noiquin man ua fumayamua. Man ua inainton oian cuscan Diosin matoqui unimacoinni. ¹⁹ Uhuun Diosin man yopaiti mato inanshquin. Upa Diosin ahuun ahuara sharacoinfo aya cuscaicai ichapa cuyopacunacama. Furun Jesucristohuunshon mato inanshquin. ²⁰ Ascacun nan nocon Diosifin nocon Upaquin. Nan fasi sharacoin. Arus fustifin sharacoinquin. Tsoancai a finontiroma. Nan, —Nocon Ifocoinran, —non huapanaca. Nanscari inon.

Pablonun ahuun tsain unutaquin Filiposofo tsain shara fomani

²¹ Nantifi Jesucristo icoinra huafo ua yoisharashocahuun. Nan icoinra huafo ufu icafoanri mato yoisharapaicani. ²² Nunoa nantifi Jesús icoinra huafoan mato yoisharapaicani. Nan niaifocoin Cesar ahuun pushu anoa yonomisifoanri mato yoisharapaicani.

²³ Nocon Ifo Jesucristo matohuun ramapaicain maton nomuran mato shara huapanon. Nanscasi ipanon. Amen. Nanti.

Pablo

Pablonun Colosas Anoafu Cunu Fomani

Pablonun Jesús icoinra huafo Colosas anoafu cunu fomani

1¹⁻² Uquian Pablo Diosin afin apaiyai cuscan ua catonni Jesucristo fu rafushon ahuun tsain un yoifoanfainon. Timoteo futan un mato cunu fomai. Arifi Cristo ahuun yora. Colosas anoafuan manfin Cristo tanacoianshu Diospan yorafoquin. Nocon Upa Diosin matohuun ramapaiqui matohuunoa shinanquin mato shara huashofafainpainon. Ascashon maton nomuran maton imasharapainon.

Pablonun Jesús icoinra huafo cufishofafainpaoni

³⁻⁴ Un mato fasi ichapa shinain. Nan nocon Ifo Jesucristo Apa Dios non mato cufishofafaini. Ascan man non nica man Jesús icoinra huacoicun. Ascashon nan Jesús icoinra huua futsafohuun man noicoianri man non nicamisi. Ascacun non nocon Upa Diosin yoiquin isca huamisi, —¡Aicho! Upa Diosin Colosas anoafuan min Furun Jesús man tanasharaforan, —ishon mato cufishofafaini. ⁵ Nan tsain shara iconcoin Jesushuunoa cayacaficoi man man nicamisi. —Jesucristo icoinra huashu Dios icari man afu ipasharatiroran, —ica man man nicamisi. Nan tsain icoinra huashu man futsafohuun noicoimisi. ⁶ Nan tsain shara Jesushuunoa nicaquin tau huaquin man icoinra huani. Ascashon nicaquin man tapini nan iconcoin. Diosin matohuun ramapaiquin Jesucristohuunshon maton chaca soashoni man icoinra huanon. Ascacufin nan tsain sharahuunoa

man fiananan. Niacani arifi manifoti nanscarifi amisifo. ⁷ Nan Epafras nocofunu fasi shara. Un ahuun noicoi. Arifi no futan Cristo yonosharashomisi. Noncai matofu itiro ipaonima. Ascacun afincoi mato Jesushuunoa tapimayopaoni. ⁸ —Colosasfoan Diospan Yoshin Sharahuunshon futsafo noicoiran, —ishon matohuunoa Epafras noco tapimana.

⁹ Ascacufin nan un matohuunoa nicaquin tau huaitian natianri un mato Upa Dios cufishoquicai unumisima. Ascacun un mato cufishoquin isca huafafaini, —¡Aicho! Upan Diosin, Colosas anoafu min Yoshin Sharahuunshon min ato tapimapaiyai cuscan huafain ato tapimahuu. Min ato tapimanai cuscan aton nomuranshon tapicoinfain mia tanasharanonfo, —ishon un mato cufishomisi. ¹⁰ Ascashon nan mato amapaiyai cuscan man aiton oin Dios matoqui unimacoinshquin. Ascatan nan mato yonomapaiyai cuscan acai man isharashu ahuun facu cuscaracoin man itiro. Ascano man futsafo shara huashofafainquin. Man Dios onanquin finacoinfafaintiro. ¹¹ Ascan Upa Diosin ahuamamishti shara huatiroquin. Ahuun curush mutsisipacoin mato inantiro ahuara ahuuscarafaino marifi ahuunshon man tunucoinnon. Nanscafiacuin man tunutiro funaquima unimasharacain.

¹² Ascano unimacain man Upa Dios aicho huatiro. Nantofin noco imasharafain ahuun yorafo inanpaiyai cuscan huafain nocorifi inain. Norifi non ahuun yorafo-cun noco inanshquin. A icano shafa fusti faquishicai imisima. ¹³ Ascacun noco numa non afanan faquish muran inonma. Ascan nan Satanás icanofin fasi faquishcoinqin. Nannoashu funocani. Upa Diosin nannoa noco numa ahuun Furun shara fu non ipanon. Nanto Furun

fasi noicoin. ¹⁴Nocon chaca soashona ahuunshon Upa Diosin noco rau huatiro afu non ipanon.

**Jesús noco nashonihuunoashu
non Dios fu isharapacunaca**

¹⁵Ascan noncai Upa Dios non ointromafiano Furun Jesús mai ano oni. Ascashon Furunmun noco tapimani ahuu cuscaramain Apa Diosiquin. Ascan Furun Jesusfin nan Apa cuscaracoin. Ahuun ointi cuscarari. Ahuashtacai oniataima Apa Dios fu nai muran iyopaoni. ¹⁶Ascan Criston nantifi onihuani. Nai murannofo yafi mai anofofori ato onihuapacuni. Nan non oinmisifo yafi non ointromafori ascashon nantifi onihuani. Ahuun oinmatifo nan afu icafo onihuafain yoshinfoan aton niaifofori onihuani Upa Dios Furun Cristohuunshon nantifi onihuani. ¹⁷Ahuashtacai oniataima Cristo iyopaoni. Ahuun curushpan nantifi cushusharamisi. Ascashon fishifo cushufain fari cushufain oshuri cushufain nocon mai cushufain. Ascan nantifi cushuyamaino cuyoi futsucuanafu. Nai yafi mai choquiqui futsucuanafu. ¹⁸Tsoancai Jesús finontiroma. Ahuashta oniataima nantifi finonyopaonishaquin. Natianrifi nantifi finoncoian. Aafin ahuun yorafa nan icoindra huafo ato Ifocoinquin.

¹⁹Ascacun Upan Diosin yoiquin isca huani, —Un imisi cuscacon nanscarifi uhuun facu imisiquin. Ascashu arifi ufu Dioscoin. Nonfin nanscara rafuquin, —ishon unimacain Upa Diosin yoini. ²⁰Jesús ihui coyan quinanqui mastafanno ahuun imi focain noco nashoni nocon chaca soashoshquin. Ascacufin ahuunoashu non Upa Dios fu afanan isharatiro. Ahuunoashu nantifi mai anofo yafi nai murannofofori afu isharatirofo.

²¹Maton nomuranshon man Dios noicasmafain man fasi chaca huapaoniquin. Ascashucai man Dios fu rafuyamacai marificai man ahuun yorafa ipaonima. ²²Ascasiacun Furun Jesucristo nai muranshon mai ano nichini nocofunucoin iquiyonon. Ascashu ihui coyan quinanhuunoashu noco nashoni. Ahuunoashu natian Diosin matofu rafucain maton chaca soashotiro a cuscara shara man inon. Ascano man aqui nocoaitian matohuunoacai ahuashta chaca shinantiroma. Ascashocai mato yoitiro ma isca huaquin, —Min chaca huamisiran, —ishoncai mato yoipacunacama. ²³Ascano nan tsain shara Jesucristohuunoa icoindra huashon man ahua futsa shinanyamaitocai Upa Diosin matohuunoa yoipacunacama isca huaquin, —Min fasi chaca huamisiran, —ishoncai yoipacunacama. Ascatarocon man icoindra huaquin unuyamaiton oinquin nan mato yoyotiani cuscaino mato ihuishquin man afu ipanon. Man Jesushuunoa tsain shara nicaquin tau huani cuscan nannoricoin un manifoti ato tapimani. Ascacun unquian Pablo un Upa Diosin tsain yoifoanfainmisi Jesushuunoa ato yoishquin.

**Diosin Pablo yononi Jesús
icoindra huafo yonoshonon**

²⁴Ascacun un fasi unimai un matohuunoashu omitsiscamisi marifi man ahua ahuuscarafaino Cristo tanasharanon. Cristo nocohuunoashu omitsiscani cuscan urifi afu rafumisifo nan Diospan yorafuhoashu omitsiscamisi. Un matohuunoashu omitsiscain nantianri un Cristohuunoashu omitsiscainquin.

²⁵Ascacun Diosin ua catonni maton oinmati cuscara un inon. Ahuun tsain shara un mato yoinon. Ascashon ua

yonoquin isca huani, —Nan manifoti anoa yorafo uhuun tsain shara Jesu-cristohuunoa ato yoifoanfainhuun, —ishon ua yononi. Ascashon nan uhuun caifomafoma muran ua nichini.²⁶ Nan tsain Jesucristohuunoa noco shunifoan tapiyopaonifoma. Diosin tsoa tapimayopaonima. Natiantan Diosin rama shara noco tapimani. Non ahuun yorafocon.²⁷ Upa Diosin Cristohuunoa yoiyotiani cuscan nantifi matori tapimashquin. Uhuun caifo fustisicai tapimanima nan uhuun caifomaforifi ato tapimai isca huaquin, —Uhuun Facu Cristo matofu rafucacaini. Ascacufin man icoinra huatiroquin un icano man unfu iishquin. Ascashu Cristo shara fustisi ica cuscai urifi un mato nanscara imashquinran, —ishon mato tapimai.

²⁸ Ascano Jesucristohuunoa non yoifoanfainmisi. Diosin ahuun shinanpan un ato yoifoanfainmisi. —Ascacun Diosin tsain nicasharacoinc-ahuun man funoshcaquimaran, —ishon un ato yoimisi isharanonfo. Ascan nan non Cristo icoinra huamisifo nantifain Diosin ointaifi non oinmapai a cuscara shara iishquin.²⁹ Ascacufin un Dios fasi yonoshofafaincain. Ahuun Yoshin Sharapan uhuun nomuran ua yosiain cuscan huafain un mato yonoshofafaini. Man Cristo cuscaracoin icai Upa Dios ari man nocoshquinon.

2 Uhuun yoramishtichin, un mato tapimapai. Matohuunshonfin curushcain un mato Upa Dios cufishofafaini Laodicea anofo futan futsafoanri ua oianmafiamisifoan nanfori un ato Upa Dios cufishofafaini.² Ascashon un mato cufishomisi mato nomuranshon man shinansharafain mafiranan man noinancoinon. Asca huatananshu man Upa Dioshuunoa shafacafi tapisharatiro. Ipaoni tsoancai Cristohuunoa tapiyopaonima. Ascacun natian ahuunoa mato shafacafi

tapimapai man onancoinsharanon.³ Nantofin nantifi onancoinfain tapicoianquin. Apa Diosin tapia cuscan arifi ahuun nomuranshon tapicoianquin. Ascan Upa Dios ahuarafa shara aya cuscan Cristohuunshon marifi man tapitiroquin.

⁴ Un mato nannori yoi futsafoan mato paranonfoma. Isca huaquin, —Non mato shafacafi tapimaniran, —ifianashu nanfocaifin chanimisifoquin. Ascashon mato shafacafi yoicafiscamisifoquin fasi amaquiri mato yosipaicani.⁵ Ascacun un matofu iyamafashon shafatifi fasi un mato shinain. Mun nica matohuunoa man nannorifosi Jesushuunoa cayacafi shinanfain man Jesús icoinra huafafainaiton nicai un fasi unimacoinni.

Cristo mato funa cuscara shara ima marifi man nan cuscara shara inon

⁶ Man Jesucristo icoinra huaquin tau huashon man Ifo huacoinna. Ascacun shafatifi afu rafufafaincahuun. Ahuun tsain nicacoincahuun.⁷ Ahuara fimi fanano ahuun tapo chaicoi foanno cai fana tucuitiroma. Mutsisipacoin itiro. Nanscarifiai Jesusfin nan tapo cuscara sharaquin. Ascacun afu rafufafaincahuun chaca huatamarocon a cuscara shara ishcaquin. Epafra mato tapimamisi cuscan shafatifi finacoinquin Jesús icoinra huafafaincahuun. Ascashon shafatifiri Upa Dios aicho huacahuun.

⁸ Oinfain futsafoan mato paranonfoma. Amaquiri mato tapimashcaquin. Man cayacafi Jesús icoinra huai cuscacai mato ascara tapimapaicanima. Ascashon nan mato yosipaiyafifo cuscan man ato nicashu ipaitsicoi man icoinra huatiro. Ascan nanfoancai Diospan tsain Cristohuunoa yoicoianfoma. Ascashon nan aton fuyamisi cuscan mato tapimapaifain nan icoinra huamafoan

shinainfo cuscan fustisi mato icoinra huamapaicani.

⁹Ascano Cristo yafi Apa Dios nanscara rafu. Cristo noco cuscara noco-funucoinfiashu Dios imisi cuscan arifi nanscamisi. ¹⁰Aafin nantifiton aton ni-aifocoinquin. Nantifi niaifofo yafi yosh-infori ato finoncoian. Ascashon ato iquimisi. Ascacufin man Jesús fu rafushocai man ahua futsa yopaima. Nan isharamisi cuscan marifi man nanscatiro. ¹¹Man Cristo Ifo huaitian maton nomuran mato fiananan huashoni man chaca huapaoni cuscan afanan man ascanonma. Ascan nocofunufuon aton fuyamisi ipaoni. Ascafia man cunotinin foshqui rupa shatutocai maton chacan soashotiroma. Cristo fustitofin maton ointi fiananan huashotiroquin. Ahua futsanmaquia. Nan fustitofin maton chaca soashotiro afanan man chaca huapaoni cuscan man atama nan cuscara shara man inon.

¹²Ascano man unu muran iquima-muaitian maton chacafo man chaca huapaoni cuscan nanfo mai huamua shinantsai. Ascan non Jesús mainitian man chaca huapaoni cuscan nan chacafori mai huamua shinantsatiro. Man unu muran iquimamuashu funinaca huanni man Jesús fu funi cafiscatiro a cuscara funa shara iishquin. Diosin ahuan curushhu-unoashu Jesús afanan funini nan non icoinra huaa. Ascano Jesús mai murannoashu funitian marifi man afu funi cafiscatiro a cuscara funa shara iishcaquin.

¹³Man Jesús Ifoataima nan yora naa shinantsa man apaoni. Ascashon man chaca huapaoni. Ascafia Upa Diosin Cristo funimani afu nipanon. Nanscarifi aqui matorifi ahuanonshon nimapacutiro. Ascashon nantifi nocon chacafo man rau huaa. ¹⁴Shinancapon. Nantifi non chaca huamisi cuscan noco chacafo Upa Diosin noco soashoni. Afanan

afohuunoa Diosin shinanonma. Ascano Diosin yononi cuscan nicatama ahua futsa non chaca huapaoni. Nanfo nantifi non chaca huamisifo cuscari cunupacua. Ascafia nan cunupacui cuscan ihui coyan iquinan ano Jesús mastanihuunshon nanfo noco soashoni. ¹⁵Ascano Jesús ihui coyan iquinanhuunoashu noco nashonishaquin Satanás yafi nantifi yoshin chacafo finoncoian. Ascacuai afanan noco ahuasca huatirofoma. Nanforicai afanan noco ifo iyamacain noco iquitirofoma. Ascacufin Jesús ihui coyan iquinanhuunoashu naiton Diosin manifoti ismani nan yoshin chacafocai afanan ahuashta ahuan curushu ayamaran ishon ato ismani.

Jesús icaria sharacoin nan fustisi fuchipaicahuun

¹⁶Ascacufin ratoran futsan mato yosipai isca huaquin, —Nocon shunifoan yononi cuscan nantifi nanscacoicahuun. Ahua futsa piyama-fain ahua futsari ayayamacahuun. Fuusitian fuusiyamashu man chaca huai. Ascan nan oshu ina funatianri fuusicahuun. Tunutitian fusti noco shunifoan yononi cuscan man atiroran, —ishon mato amaqiri yonopaiyaifo cuscan ato nicayamacahuun. ¹⁷Cristo nocoataima nanfohuunoa noco tapimayopaonifo. Ascafia afincoian mai ano oanocai non afanan nanfo yopaima. Nan Cristo fusti non yopai.

¹⁸Oinfain. Futsafoan mato shinanma-paiyaifo cuscan man ato nicashu nan Upa Diosin mato inansharapaiyai cuscan man funotiro. Ascacun ato nicayamacahuun. Mato amaqiri yoipaiquin isca huacani, —Uhuun namapan cuscara Diosin ua isma cuscan fasi sharacoin. Uncai ahuyamafiacun Diosin ua isma cuscan tsoa futsacai oinyomisima. Ascan un oian cuscan miarifi Diosin oinmanaino shara itiroran, —ishon caca-

paimisiton mato amaquri yoipaicani. Mato yoipairi isca huaquin, —Non Diospan oinmati afu nai muran icafo cufitiroran, —ishon mato parapaicani. Nanfoan aton nomuranshon futsa futsa huaquin shinainfo cuscan fusti matorifi yosipaicani ato cuscara cacapaimisifori man inon. Diosin shinan cusca-cain shinantama afin shinantirofo cuscan fusti shinancani. Nanscashu nanfo curafiapaimisifo.

¹⁹ Nanfocai Cristo fu rafuyamacai aton ifomari. Cristofin nan nocon mapo cuscarariquin. Nonfin ahuun caya nato cuscarariquin. Nocon caya nofiri non cushumusharashu non mutsisipacoin itiro. Ascan nocon nami pono uhuapafo yafi nami pono futsafo nocon cayahuu nannorasi ichanantirofo. Nanscarifi aquin Criston ahuun yorafo cushusharacoinmisi. Ahuuscayamacain isharacain mutsisipa non inon. Noco nannorifosi shara noco shinanmamisi. Non Cristo fu rafucoincun Upa Diosin finacoinquin Furunhuunshon ahuu curushu noco inantiro a cuscara non inon. Nanscarafin noco Diosin ashopaiquin.

²⁰ Cristo mato nashonitian marifi man afu naa shinantsapaoni. Ascan natiancai man chaca huapaoni cuscan afanan man ascaima. Ascatamarocon man isharacoinmisi. Man ascanocai nan icoindra huamafoan mato yonotirofoma. ¿Ascacufin ahuuscain man ato nicamun mato yonopaiyaifo cuscan aashcaquin? Ascacun ato nicayamacahuun. ²¹ Ascashon nanfoan mato yonoquin isca huapaicani, —Mato tushu inainfo cuscan fiyamafoan nanrifi piyamacahuun, —ishon mato yonopai. ²² Ascano nanfoan mato yosipaiyaifo cuscaicai Diosin ato yonoama. Nan nocofunufocan shinainfo cuscan fusti mato yonopaicani. Ascan nan mato

yonopaiyaifo cuscan nanfo cuyoi futsushqui afanancai ascashquima. Ascacun ato nicayamacahuun. ²³ Icon yorafoan shinanquin isca huacaquin, —Nanfoan ato yosiainfo cuscan shararan. Ascano nanfoan fasi tapicoianfo. Diosin noco yonon cuscaicai fasi tapicoianfo. Ascashon Diospan nai oinmatifo cufifafaincain. Ascacashu tsoashtacai raquiri huamisima cuscafo. Ascataricai aton caya afiri musu huamuafoma. Ascashu nanfo fasi sharacoinran, —ishon atohuunoa shinanmapaicani. Ascafiyafocai isharacoinmisifoma. Ahuarafo chaca huaifo cuscaicai shatutirofoma. Icon nanfofin cacapaimisi shunifo.

3 Upa Diosin Furun Cristo funimani cuscan nanscarifi matori afu funimani cafisca huai man funa shara icain a cuscara shara icashu man afu rafunon. Cristo natian Apa fu ica a futan nantifi iquina. Ascacun ahuunoa shinanfain mato amapaiyai cuscan nanfohuunooari shinancahuun. ² Ascacun Diosin fuchipaiyai cuscan nan fusti shinancahuun. Nanscacoinshecaquin. Ascan nuno mai ano yorafoan chaca huapaiyaifo cuscan marifi asca huapaiyamacahuun.

³ Afanan un mato yoi Cristo noco nashoni. Ascan manfin afu naa shinantsayoniquin. Natianfin man Cristo fu rafucain Upa Dios furi man icacaini. Nanscarificai mato furi Upa Dios icacaini. Man ascafiatocai tsoanshta ointirofoma man Cristo fu rafuai cuscan afu isharashcaquin. ⁴ Ascano Cristo afanan mai ano oaitian nantifiton ointirofo non afu rafumisifo noco nimapacunaca. Ascashu Cristo shara fusti ica cuscaicain norifi non a cuscara sharacoin iishquin nantifi yorafoan oinshquicani.

**Non chaca iyopaonifiashu
natian non funa sharacoin
Jesús cuscara man non ica**

⁵Ascacun man chaca huapaoni cuscan afanan asca huayamacahuun. Ascarafo shinanyamacahuun. Ascatari maton ahuinma furi iyamacahuun. Nanscarifaiyaiinfofoan maton funuma furi iyamacahuun. Ascashon shinanchacayamacahuun. Nocofunufaoan maton ahuinma fuchipaiyamacahuun. Ainfofoan maton funumari fuchipaiyamacahuun. Ahuara chacafo fuchipaiyamacahuun. Mafin man fuchipaiyai cuscan fusti fuchipaiyamacahuun. Man ascaquicain Dios man noicoioma ahuara futsa fusti man noicoi. ⁶Nanscara chacafocai Diosin oinpaima. Ascacun nanscara chacafoqui Diosin fasi sinacoin. Nan yoitimamisifo ato onaintimashqui. ⁷Ascano marifi man Dios nicacoiantaima man nanscara chacafo huapaoni.

⁸Man nansca huapaonifiashon natian nan chacafo shatucoincahuun. Ascatari afanan sinayamacahuun. Tsain fushnuicamitsamisi iyamacahuun. Futsafo noicasmacani aqui sinayamacahuun. Ascashon futsafori roayamacahuun. Tsain mutsama yoiyamacahuun. ⁹Man chaca huapaoni cuscan man man potacoian. Ascashu paranonanyamacahuun. ¹⁰Man ipaoni cuscan afanan atanma natian man Jesucristo catoan a cuscara shara iishquin. Ascan Upa Diosin mato nomuran onihua funa. A cuscara shara finacoinquin mato imafafainshquin ahuunoa finonmafain onansharanon. ¹¹Non Cristo ifoacun Diosin nantifi nanscarasi huaquin noco oin. Israelifo yafi Israeli-foma cunu tapiafo yafi cunu tapiamafori onicoinfo yafi nahuafonon yonomatifo yafi yonomatifomari Diosin nanscarafosi

noco oin. Nantifi non Jesucristo ahuun yorafoquin. Nan fusti non yopai.

¹²Ascashon matoahuun fasi noiquin mato catonni ahuun yorafo man inon. A cuscara shara mato imashquin. Ascacun futsafohuun ramapaicain ato shara huafafaincahuun. Iquisi futsafohuunoa shinanfain nan mafi man apaiyai cuscan shinantamarocon futsafoan apaiyaifo cuscari shinanshocaahuun ato oi tsii huafainri yoifafaincahuun.

¹³Futsan mato chaca huafaiaton ato copitamarocon yoisharafain rau huariscahuun. Nocon Ifoan mato rau huaa cuscan huafain futsafo ya rau huatanancahuun. ¹⁴Ascano un mato yoia cuscacoin acahuun. Nanfo sharafishu non nantifihuun noiainofin fasi shara finacayaquin. Ascatan non noinanshu non isharacointiro. Ahuara futsa sharafori nocon Ifoan yononi cuscan non noinanshu non nanscointiro.

¹⁵Ascacun Cristo nicacoisharacahuun maton ointi sharamanocai man fochishmanantanantiroma. Ascatarocon ahuunoashu isharacoincain ahuun yora fusti cuscara man itiroquin. Ascacun Upa Diosin mato catonni ahuunoashu isharacain futsafoqui man shinanchacanonma. Ascaquin man Upa Dios yoitiro isca huaquin, —¡Aicho! Upa Diosin min uhuun ointi shara huashoran, —ishon yoifafaincahuun.

¹⁶Cristo noco tapimani cuscan huafain maton nomuran nanucoincahuun. Nantofin mato iquinaquin. Ascan ahuun tsain tapisharashon futsafo yari tapimatanancahuun isharashcaquin. Mato nomuranshon Diosin aicho huafain David fanainni cuscan fanain ishocain ahuun tsainhuunoari fanaincahuun. ¹⁷Manfin nocon Ifo Jesús ahuun yorafoquin. Ascano nantifi man yoiai cuscan

huafain man acai cuscan nantifiri yorafo ato ismacahuun matohuun caononfo. Ahuunshon Upa Dios yoinonfo isca huaquin, —¡Aicho! Min ua shara huashomisiran, —ishon yoifafaincahuun.

Non Jesús icoinra huafomain non ahuunoashu non ahuuscatiroquin

¹⁸ Ainfofoan nocon Ifoan mato yononi cuscan maton funufoan maton yoiyai cuscaoin acahuun.

¹⁹ Nocofunufaoan maton ahuinfohuun noicoincahuun. Ato tsain curushcain yoiyamacahuun.

²⁰ Facufoan maton upa yafi uhua nicasharacoinfafaincahuun. Man ascaino Diosin matoqui unimacoinon.

²¹ Upafo yafi uhuafaoan maton facufo tsain isininpaton yoiyamacahuun. Ascain maton facu man tsain isininpaton afafainnaino shinanquin isca huatiro, —¡Ohua! Uncai ahuuscatiroma uhuun upa yafi uhuun uhua uqui unimanon. Ua tsain isininpaton afafainnaino, —ishon facu shinantiro. Ascaino upafo futan uhuafaoan asca huaquifin mato facufo man aton ointi ihuumatiroquin.

²² Ascaino yonomatifoan maton ifofo nicasharafain atori parayamacahuun. Ascain mato oiainfono fusti ato yonoshocaquima. Mato oianmafiaifono ato yonoshosharacahuun. Nan maton Ifocoin Jesucristohuun man noianoino matoqui unimanon ato yonoshosharacahuun. ²³ Ahuarashta yonocaquin nocon Ifoan curushhuushon yonoshosharacahuun. Nocofunufaoan fustihuunoashucaí man yonoima. Nocon Ifo Jesús nantifi noco oin. Ascain nocon Ifo yonoshosharacahuun. Anori shinanfain yonosharacahuun.

²⁴ Ascashu ointiaquimayamacahuun nocon Ifo Cristo man yonoshosharaino afin chipo nocoqui nocoaitian mato inansharashquin. Nan aya

cuscan huafain mato inain. Aafin maton Ifocoinquin. Ascain manfin nan yonoshoniquin. ²⁵ Man chaca huaiton Diosin mato onaintimai. Diosin nanscarafosi noco oin. Ascain ratofaoanmain chaca huaiquin nanfo ato onaintimai.

4 Ascain ifofoan maton yonomatifo inansharafain ato parayamacahuun. Man man tapia marifi man ifoya. Maton Ifoan nai muranshon matori oinfafainni.

² Ascacun Upa Dios cufinquin unuyamacahuun. Cufinquin ahuaara futsa shinancaquima. Upa Dios iconcain fusti cufinquin isca huafafaincahuun, —¡Aicho! Upa Diosin min ua shara huafafainiran, —ishon cuficahuun.

³ Ascashori nocori cufishocahuun Upa Diosin mani futsafoanri noco nichiano non Cristohuunooa ato yoinon. Nannooa icafoancai tsoan Cristohuunooa nicayomisima. Ascain un Cristohuunooa tsain shara un yoiaiton ua futsafoan cunu muran iquimanifo. ⁴ Ua fasi cufishofafaincahuun Jesucristohuunooa shafacaficoín un yorafo ato yoinon.

⁵ Ascashon Jesús icoinra huamafo fu icaquin ato ismasharacahuun man ishara cuscan. Ascashon man atoqui nocoaitifi Jesushuunooa yoisharafafaincahuun. ⁶ Ato fu tsaincaquin shara fusti ato yoifafaincahuun. Cayacaficoín ato yoicahuun aton nomuranshon shinan-chacanonfoma. Man ascaquifin nantifi yorafo cayacaficoín man cumasharatiro.

Pablonun ahuun tsain unutaquin Colosas anoafó tsain shara fomani

⁷⁻⁸ Ascaino nocon yorahuan Tiquicohuun un fasi ahuun noicoín. Nanton u futan nocon Ifo Jesús yonoshomisiquin. Ascacun un Tíquico mato ari nichicain un icai cuscan mato tapimafain urimain ahuuscaiquin mato tapimanon. Ascashon mato yoiaino shinansharafain maton ointi man unimanon. ⁹ Ascain

uhuun yorahuan futsarifi Onésimo nanrifi mato ari nichí. Nanfin matofu ipaoniquin. Ahuunrifi un fasi noi. No futan nocon Ifo Jesús yonoshocuai un-umisima. Nan rafu matoqui nococashon nonmain nunoashu ahuuscaiquin mato tapimanonfo.

¹⁰Ascano noco yora Aristarco yafi ua cunu muran iquimanifo. Nantonrifi mato tsain shara fomai. Ascan Marcos arifi mato yoisharapai. Nanfin Bernabé ahuun chaiquin. Ascacun nan Marcos matoqui nocoaiton un mato yoia cuscan ihuisharafain cushusharacahuun.

¹¹Ascan nocon yorahua futsan ahuun anu Jesús nanrifi ahuun anu futsa Justo atorifi mato yoisharapai. Nanfoan uhuun caifo Israelifo u futan Dioshuunooa yoimisifo. Nanfoanri ua unimamamisifo. Ascan uhuun caifo futsafoancai u futan nunoshon Dios yonoshomisifo. Nan un mato yoiaifo futan Dioshuunooa un yoimisi.

¹²Epafras matofu iyopaoniton arifi mato yoisharapai. Nanrifi nocon ifo Jesucristo ahuun oinmati. Ascashon nanton mato Upa Dios cufishoqui isca huafafaini, —Upa Diosin min ato amapayai cuscan nantifi ato amahuu ahua futsa shinanonfoma. Ascashu min Furun Jesús ointi cuscara shara inonfo, —ishon nannori un mato Upa Dios cufishoquin huafafaini. ¹³Ascacun un

mato yoiaí cuscan man icoinra huatiro. Epafras matofu yafi Laodicea anoafon Hierápolis anoaforifi mato fasi Upa Dios cufishofafaini. ¹⁴Ascano nan nocon yorahuan Lucaspan yorafo cayahuamamisi. Nanhuunrifi un fasi noicoin. Nan Lucas futan Demaspan mato yoisharapaicani.

¹⁵Jesús icoinra huafo Laodicea anoafon ua ato yoisharashocahuun. Ascashon nan icoinra huua futsafo Ninfapan pushu muran ichananmisifori ua ato yoisharashocahuun.

¹⁶Ascun un na cunu mato fomai cuscan oinquin tau huashon nan icoinra huua Laodicea anoafon ato fomacahuun arifi oinonfo. Ascan nan un ato cunushona cuscari marifi oincahuun.

¹⁷Ascashon Arquipo ua yoiquin isca huaquin, —Upa Diosin mia yonooa cuscan acoihuun, —ishon nannori ua yoishocahuun.

¹⁸Unquian Pablo un mato cunu fomai. Futsan ua cunushofiamisi natian uficoín ahuun unutaquin un mato cunushoni. Ascacun uhuun ointiaquimayamacahuun. Man man tapia ua cunu muran iquimanifo. Diosin matohuun ramapaicain matohuunooa shinansharapainon. Nanti.

Pablo

Pablonun Tesalónica Anoafu Cunu Fomani

Pablon futan Silvano Timoteo nan rafu non fustifain Tesalónica anoafu tsain fomani

1 Uhuun yoramishtichin Tesalónica anoafuan unquian Pablon un mato cunu fomai. Manfin Upa Diosin ahuun facufoquin Jesucristo maton Ifo. Ascan nuno Silas yafi Timoteo ufu icafo nan rafutan mato tsain shara fomai. Ascashon nocon Upa Diosin matohuun ramapaicain maton ointi shara huashonon.

Tesalónica anoafuan Jesús icoinra huacoinnafo cuscan ato ismani

²⁻³ Un matohuunua shinaintifi Upa Dios cufinquin un isca huafafaini, —¡Aicho! Upa Diosin Tesalónica anoafu min ato shinanmashara. Ascan mia icoinra huacashon mia fasi noicoianfo. Ascashon mia yonosharashomisifo. Ascatan nocon Ifo Jesús funaquima manasharamisifo nocoqui afanan nasoshquiran, —ishon un shafatifi un mato Dios cufishofafaini. ⁴ Uhuun yoramishtichin Diosin matohuun fasi noicoinquin mato catonni man ahuun facufo inon. ⁵ Ascan noncai nocon tsain ipaitsi mato yoimisima. Ascatarocon Diospan Yoshin Shara futan ahuun curushhuunshon non mato Jesushuunua tsain yoimisi. Ascacun man man icoinra huacoinni. Ascashon marifi man man tapian non mato muran matofu isharapaoni. Ascaiton marifi man Jesús icoinra huacoinni.

⁶ Asca noco Ifohuun nocohuunri man caomisi. Mato futsafoan fasi omitsiscamafiaino non mato nan tsain shara Jesushuunua yoiaiton

Diospan Yoshin Sharahuunshon man unimacoincain nicasharapaipani.

⁷ Asca huacanashu nantifi icoinra huafo Macedonian anoafu non Acaya anoafori man ato oinmashara matohuun caotiro nocon Ifo Jesús tanasharanonfo. ⁸⁻⁹ Macedonia anoafu futan Acaya anoafuan matohuunshon nocon Ifoan tsain nicaquin tau huanifo. Non matohuunua ato yoiataima noco yoimisifo isca huacaquin, —Tesalónica anoafuan nocon Ifo Jesús fasi icoinra huacoinafo. Ascan Pablo yafi afu rafafo fasi ato shara huafain yoiaino cuscan ato nicasharapaicani. Ascashocai afanan ahuara futsa rami huacashon cufitirofoma. Nan Dios natian niacoin icoinra huafain man manayanan yonoshosharatiro. ¹⁰ Ascan nantian Apa Diosin nan chaca huamisifo manifoti ato onaintimaitiancai nan chaca huamisifo acai cuscan noco asca huaima. Ascatarocon nocon numai norificai non atofu omitsiscaimaran, —ishon matohuunua nantififain yoiaino.

Pablonun Tesalónica anoshon Jesús yonoshoni cuscan

2 Uhuun yoramishtichin man man tapia noncai ipaitsi matofu ipaonima. Non mato Jesushuunua tapimasharapaoni. ² Man man tapia non matoqui nocoataima Filipos anoafuan noco omitsisca huafain noco roapaonifo. Ascashon noco shatumpaiifaquicai Upa Diosin ahuun curush noco inanno non ranotiroma nan tsain shara Jesushuunua un mato yoini cuscan noco tsoan shatumanama. ³ Ascano man man tapia un mato iconcain Diospan tsain yoiquicai un mato fuparamisima. Ascashon unricai mato yoimisima isca huaquin, —Uhuunshon Tesalónica anoafuan shinansharaforan, —ishocai un yoimisima.

⁴Ascatarocon Upa Diosin ua catonni un ahuun tsain shara Jesushuunoa mato yoinon. Ascacun noncai yorafo nocohuunoa shinan-sharamapaitiroma. Ascatarocon Dios fusti nocohuunoa non unimamapai. Nan fustiton nocon nomuranshon non shinain cuscan nantifi tapicoian. ⁵Man man tapia uncai matohuunoa tsain shara yoimisima marifi man uhuunoa shinansharanon. Unricai mato fuparamisima ua ahudara inansharanonfo ishon. Un mato iconcoin yoimisi cuscan Upa Diosin tapicoian. Nanto ua oinfafainni.

⁶Noncai tsoa futsafo curafia huamapaipacunacama. ⁷Ascafia non Cristo fu rafumiscun noco nichini ahuun tsain mato yoinon. Ascacufin non mato yonopaiquin non mato yono cuamisi man noco nicasharafain non yopai cuscan man noco inanon. Ascafiacai non asca huapaipaonima. Non matofu ipaoni nan facu yomushta ahuan cushusharatiro cuscan nanscarifi non mato huapaoni. ⁸Non mato fasi noicoinquin unimacain non mato Diosin tsain shara yoifiai nan fusti non mato inanmusharapaoni fasi matohuun noiquin. ⁹Uhuun yoramishtichin manmun ointiaquimamanmun un mato murannoashu curushcain yonopaoni. Ascafiacai un ahudara yopaifiaquicai cashman un mato yocaquin fucash huapaonima. Ascatarocon mato Diosin tsain shara yoianan shafatifi yafi yamuri un yonopaoni un yopai cuscan fiishquin.

¹⁰Ascano man Jesús icoinra huaa muran un matofu icai chain man man oinyopaoni. Jesús cuscara isharacain unricai ahua chaca huapaonima. Un ascaiton maficoin uhuunoa man man oinpaoni. ¹¹⁻¹²Apan ahuun facufo noicoinquin ato yoisharatiro isharanonfo. Nanscarifi aquin un mato yoisharapaoni man

isharacain maton ointi man unimanon. Ascashon Upa Diosin mato imapaiyai cuscan a cuscara man inon. Nantorifi mato catonni afu man Jesús cuscara shara ipanon.

¹³Un mato Diospan tsain yoianoin man yoini isca huaquin, —Nan tsain shara min noco yoiai cuscaai nocofunon tsainma. Nan Diospan tsainran, —ishon man yoini. Icon non mato Diospan tsaincoin yoimisi. Ascaiton ahuun tsain nicaquin man icoinra huaiton mato fiananan huaa Jesús cuscara man inon. ¹⁴Uhuun yoramishtichin Diospan yorafo nan Dios fu tsainti pushu anofo ichananmisifoti Judea anofohuun man man caoa. Ascano matorifi maton caifoan mato omitsisca huamisifo cuscan nanfoanrifi Jesucristo icoinra huaifoan oinquin aton caifo Israelifoan ato omitsisca huamisifo. ¹⁵⁻¹⁶Ascashon nocon Ifo Jesús rutufain ahuun tsain yoimisifori rutunifo. Ascano nocorifi atomaquishon potanifo. Noco asca huaifoan oincai Upa Diosin atoqui unimaima. Nantifi yorafo chaca huapaicani. Nocori shatumapaicani non nocon caifoma Jesushuunoa yoinonma ato numapaiquin Dios fu ipanonfo. Ascashocai Dios chaca huaquin unumisifoma. Ascaifoan oinquin Diosin afanan tunuyamacaiquin ato fasi onaintimai.

Pablonun afanan Tesalónica anofo oinpaini

¹⁷Uhuun yoramishtichin non matomaquinoashu canishaquin non mato fasi shinanfaini. Afanan matofu ipaiquin. Ascan afanan non mato oincapaifiain non catiroma. ¹⁸Un mato ari fasi capaicaifiain Satanás noco catima huamisi. ¹⁹Non mato yosimisi Jesús cuscara shara man inon. Ascano Jesucristo nocoaitian nantififain tapitirofo man Jesús tanacoinmisi.

Nantian Jesús ahuun ointaifi non matohuunoashu unimacoinshquin non mato yosipaoni cuscan man nicacoinmisi. ²⁰Icon nocohuunshon man Jesús icoinra huacoincun non unimai. Ascano Upa Diosin arifi noco aicho huatiro.

3¹⁻³Un fasi matohuun noi. Mato ari fasi capaifiaquicai un tapinima ahuuscashumain un mato ari catiroquin. Fasi un mato ari capaifiaquicai afanan un tunutiroma matohuunoa tapipai. Ascan un shinan uficoïn Atenas ano un nituyoi. Ascashon Timoteo un matoqui nichishquin. Arifi no fu Diospan facu. Ascashon no futan Upa Dios yonoshokin tsain shara Cristohuunoa yoifoanfainmisi. Ascacun un Timoteo matoqui nichini mato yoisharanon man Jesús tanasharaqin finacoianshu man omitsiscafiaquin man tunucoinnon.

⁴Asca tsoa futsan omitsisca huataima non mato yoini isca huaquin, —Non Jesús tanasharaiton nan Jesús noicasmaifoan noco omitsisca huashquiran, —ishon non mato yoiyoni. Non mato yoifafainpaoni cuscan man nanscacoian. Nantian man man tapia non icocoin Jesushuunshon noco omitsisca huamisifo. ⁵Ascacun un matohuunoa fasi tapipaifain. Un mato fasi shinancoinpaoni. Ascashon un Timoteo mato ari nichini man Jesús icoinra huapaoni cuscan nantiarifi man nansca huamun ua tapimashquin. Uhuun nomuran un ratuni Satanás mato chaca huamapaiyai cuscan man nansca huaimainquin. Ascashon man Satanás tanaino non mato ipaitsi yosipaoni itiro.

⁶Ascacia ascarama. Timoteo afanan mato anoashu nocoqui nocotoshishon matohuunoa tsain shara noco yoia. Man Jesús icoinra huafain man nantifihuun noicoin. Ascatan nocohuunoiari man shinansharafain fasi nocorifi man oinpaicoian. Nanscarifi aquin norifi non

mato fasi oinpaicoïn. ⁷Ascacufin uhuun yoramishtichin noco Jesushuunshon omitsisca huafain ahua futsafoanri noco fucash huapaifiaifono man Jesús icoinra huacoinnaino non shinansharatiro. ⁸Ascan man manfin Jesús tanasharaqin. Mancai ahua futsan afanan shinainma. Nan non tapiaitian non fasi unimacoincain non isharatiro. Ahuara ahuuscarafaino non tunutiro. ⁹Non matohuunoa shinanquin non Upa Dios cufiaitian nocon nomuran non fasi unimacoincain. Non matohuunshon Dios cufinquin aicho huafafaini. ¹⁰Shafatifi yafi yamutifi non mato Dios cufishofafaini noco mato ari nichiano non mato afanan oionon. Ascano man ahuafo tapisharatayamaiton un mato tapimashquin man Jesús icoinra huaquin finacoïn.

¹¹Asca nocon Upa Dios futan nocon Ifo Jesucriston matoqui afanan noco nichipainon. ¹²Nocon Ifoan mato shinanmasharaino man noinain finacoinshcaquin. Futsafo man noisharanon. Non matohuun noicoian cuscan marifi nantifi yorafo man finacoinquin noisharapainon. Non mato noiai cuscan man nantifiri noicoinnon. ¹³Man ascaiton Diosin maton nomuran mato mutsismai Jesús tanasharafain man ahua chaca huanonma. Ascaino nocon Ifo Jesús ahuun yorafoya oaitian marifi man a cuscara shara Upa Dios ointaifi man ishquin.

Ahuuscashumain non isharatiroquin Upa Diosin nocoqui unimanon

4 Uhuun yoramishtichin uhuun tsain unutaqui un mato yoinon. Non mato yosipaoni ahuuscashumain man itiroquin Diosin matoqui unimanon. Nan non mato yosipaoni cuscan man man nanscacoian. Ascacun afanan non mato yoi noco nicacoincapun. Man Dios

tanashara cuscan nocon Ifo Jesushuunshon fasi finacoinquin tanasharacahuun.

²Man man tapian nocon Ifo Jesús noco yononi cuscan nannoricoin non mato tapimapaoni. ³⁻⁵Ascano noco Upa Diosin mato a cuscara shara imapaia man maton ahuinma fu iyamacain ainfofori aton funuma fu inonfoma. Ascay man ascaino nan Jesús icoinra huayamafain Dios onanmisimafoan chaca huamisifo cuscaai huatamarocon nan Diosin yononi cuscan maton ahuin fusti fu man isharatiro. ⁶Nannori Upa Diosin yononi, —Futsafoan aton ahuin fu ipaiyamacahuun. Tsoa fomanyamacahuun futsan ahuin fu ishquin, —ishon Diosin yononi. Ascay non mato yosini cuscan tsoa ascayamaquin chaca huaiton Upa Diosin ato onaintimacoin. ⁷Upa Diosicai noco catonnima non furoma inon. Ascatarocon noco catonni non a cuscara shara inon. ⁸Ascacufin tsoan un mato yosimisi cuscan nicayamai atocai nocofunu fustisi nicacasmaima. Dioscoinrifi nicacasmamisi. Nanton ahuun Yoshin Shara mato inan mato amapaiyai cuscan man tapinon.

⁹Uhuun tsaincai man yopaima noinanshquin. Upa Diosifin afin mato tapimaicain man noinanon. ¹⁰Man non tapia man nantifi icoinra huafo Macedonia anoshon man noicoian. Ascacufin non mato yoisharapaicain fasi finacoinquin man ato noicoionnon. ¹¹Ascacun isharacahuun maton nomuran ahuaton fucash huanonma. Futsan acai cuscahuunoa shinanchacashoyamacahuun. Diosin mato amapaiyai cuscan fustisi acahuun. Nannori non mato yoimisi. ¹²Man asca huaiton icoinra huamafoan mato oinquin matohuunoa shinansharatirofo. Man yopai cuscan mafi man fitiroquin. Ascay mancai futsafona ato yocaima.

Jesús afanan oaitian

¹³Uhuun yoramishtichin, un mato yosiain cuscan huafain nicasharacahuun. Jesús icoinra huafo naashumain ahuuscacanimainquin un mato tapimai icoinra huamafoan ahuun yora naacun manafo cuscan marifi man ato cuscara iquima. Afoan shinancani ato yora naacun non afanan ato oinnacamaran icashu. ¹⁴Jesús nafishu afanan funini. Nan non icoinra huai. Ascay Jesús afanan oaitian icoinra huafo nan namisifo Upa Diosin atorifi funimashquin afu inonfo.

¹⁵Non mato yoia cuscan nan Diosin tsaincoin. Nocon Ifo nai ariashu oaitian nan niyoafocai nocon Ifoqui nocoli tau canima. Ascay Jesús icoinra huacanashu nan niyoafo yafi namisifo nannoranan nocon Ifoqui nocoshcaini. Nanscafin anonpacoiquin. ¹⁶Ascay non noco nai muran ichanan huashquin. Tau huaquin Diosin ahuun manuti fasi chaan chaan aashquin. Chaan chaan acaino Diospan oinmatifo nan a fu imisifo aton niaifoan oi ashcafinin cunashquin isca huaquin, —Nan man Jesús icoinra huafoti nan namisifo yafi niyoafori fucahuun. Jesús fu nai muran ichananshquin, —ishon ato yonoshquin. Nanscatapaiyaino nocon Ifo Jesús nai murannoashu fotoriscashquin. Ascay nan Jesús icoinra huashu namisifo funitaushcaini.

¹⁷Ascay non nuno mai ano niyoafori non atofu funi caishqui nai coin muran nocon Ifo Jesús fu ichananshquin. Ascay nantishotapiquin non afu ipanaca. ¹⁸Ascacun nan tsain shara futsafo ya yoinacahuun maton nomuran unimashcaquin.

5¹⁻³Uhuun yoramishtichin ahuutianmain Jesús oshquicain tsoashtacai tapiama. Ascacun nanfohuunoa un mato tapimayoi. Man

man tapia yomutson pushu muran iquiataimacain pushu muran icafo ato tapimayotiroma. Rato yamumain iquiriscatoshinicaí tsoancaí tapitiroma. Nanscarifiai nocon Ifo Jesús mai ano oaitiancaí tsoan tapiyotiroma. Nocoti chaima icoinra huamafoan isca huashcni, —Nonfin isharacoianquin. Ahuatocai noco ahuusca huatiromaran, —ishon yoishquicani. Anori yoiiaifono nantianri samamashatocoin omitsiscariscatashcni. Ascan ainfoan facu nanuashu caiyaintian isin muriscatiro. Nanscarifiai omitsiscái nocoaitian tsoan futsancaí nan omitsiscái finontiroma. Raquiricai onutiroma omitsiscashquima.

⁴Ascafia uhuun yoramishtichin mancaí icoinra huamafo cuscarama. Man man shafacafi tapia nocon Ifo nocoriscaí cuscan. Ascacun man iquisi itisharatiro. Ascashucaí nan nocoaitian man mustair-itiroma. ⁵Icoinra huamafo faquish muran icafo cafiscaí. Ascashon ahuarafó chipo iishquiai cuscacái tapiafoma. Ascan mancaí ato cuscarama. Marificai man faquish muran icafo cafiscaíma. Ascatamarocon manfin nan shafa muran iqui cafiscaíquin. Jesús inonpacoai noco yoipaoni cuscan man man tapia.

⁶Ascacun noncaí itisharafoma cuscarama. Nanfoan niyoashu nan oshan muran cuscarafó. Jesús oaitianhu-unoacái shinanfoma itisharashquin. Ato cuscara iyamacahuun. Nantishotapiquin Diospan tsain nicasharacahuun Jesús oaitian man itisharashcaquin. Ahua chaca shinantamarocon afin mato amapaiyai cuscan fusti shinancahuun. ⁷Icoinra huamismafoan yamu ifafainaífo cuscara. Nan oshamisifo yamu pauncani. ⁸Ascafia noncaí nan cuscarafoma. Nonfin yora nan shafatoca ishara cuscarafóquin. Ascano Diosin mato amapaiyai cuscan shinanfafaicahuun. Jesús

icoinra huacoincahuun. Futsafohuun noicoincahuun. Man ascainocai yoshin chacafoan mato chaca huamatiroma. Jesús noco numani afanan chaca nocon Ifo itamarocon afin noco Ifo inon non afu ipaishquin. Nanfo man tapicoian cuscan huafain shinancahuun. ⁹⁻¹⁰Diosicai noco catonnima nocoqui sinaquin omitsiscapanacafó muran noco potashquin. Ascatamarocon noco catonni Jesucristohuunshon nocon chaca soashoshquin non afu nipanon. Ascano nan noco nashoni oaitian non niashu iyamarai naashu non afu ipanon. ¹¹Ascacufin futsafoan aton nomuran unimamacahuun. Mun tapian manfin nanscacoimisiquin. Ascashon nanscasi huariacahuun. Jesús tanamatanacahuun.

Pablonun ahuun tsain unutaquin ato yosisharani

¹²Uhuun yoramishtichin un mato yosisharapai. Ua nicasharacapun. Upa Diosin nan tapimamisifo catonni ahuun tsain mato yosinonfo. Nanfoan mato curushcain yonosharashomisifo nocon Ifo man tanasharanon. Ascan atohuunoa shinansharafain ato nicasharacahuun. ¹³Nocon Ifohuunshon mato yonosharashomisifo. Ascacun atohuunoa shinansharafain ato noicoincahuun mafiranan fochishmanantananyamacain isharacoincahuun.

¹⁴Uhuun yoramishtichin ua nicasharacapun. Nan shanimsifó yoicahuun shaninonfoma yonosharashcaquin. Aquí tushcuimisifori yoisharacahuun nocon Ifo mutsisipa tanasharanonfo. Nan samamashta chaca shinanmisifo ato oinmasharacahuun man atohuun noiquin man ato cufishotiro chaca huanonfoma. Nantifihuun noicoincáquin ato oitsii huasho yoisharacahuun. Ascatan ahua

ahuuscarafiaino atohuun patsicain ato yoisharacahuun.

¹⁵Futsan mato chaca huaiton ato copiyamacahuun. Ascatarocon nantishotapiquin shara huatanancahuun. Nantifi yorafo shara huacahuun.

¹⁶Unimafafaincahuun. ¹⁷Dios fu tsainfafaincahuun. ¹⁸Ahuara ahuuscarafiaino yoiquin isca huacahuun, —¡Aicho! Upa Diosin, min ufu icacainiran, —ishon yoicahuun. Manfin Cristo Jesús icoinra huamisiquin. Ascan Upa Diosin nannori mato shinanmapai. Man asca huaiton Diosin fuchipai.

¹⁹Diosin Yoshin Sharapan mato amapaiyai cuscan shatuyamacahuun.

²⁰Futsafoan Dioshuunshon mato yoiaiton, —Nanton yoiai cuscaai ahua-

maran, —ishon shinanyamacahuun.

²¹Ahuara futsan mato yosipaiyaiton Diospan Yoshin Sharahuunshon a yocacahuun nan tsain yoiai cuscamain icon iyamarai iconmaquin. Ascano nan tsain icon fusti tanasharacahuun. Tsain iconma icoinra huayamacahuun.

²²Ahuara chaca fishtayamacahuun.

²³Diosin fustiton nocon nomuran isharamatiro noco fucashhuanonma.

Nantofin mato imasharacoinquin ahuun ointi cuscara man inon. Ascashon maton cushusharafain maton nomuranri cushushara ahua shara fusti man shinanon. Upa Diosin mato nansacoin huaino nocon Ifo Jesucristo afanan oaitian matoqui shinansharashquin. ²⁴Diosin mato catonni man icoinra huanon. Diosin noco ahua yoiai cuscaai noco paratiroma. Noco ashoshquin.

Pablonun ahuun tsain unutaquin ato cunushoni

²⁵Uhuun yoramishtichin noco Upa Dios cufishocahuun.

²⁶Nantifi yoinonansharacahuun.

²⁷Ascashon Upa Diosin mato yonoa cuscan nicasharacahuun. Nan man icoinra huafoti un mato cunu fomaicai ato nicamacahuun.

²⁸Nocon Ifo Jesucriston mato shara huamayai cuscan mato asca huampainon. Nanti.

Pablo

Pablonun Tesalónica Anoafu Afanan Cunu Fomani

Pablonun Jesús icoinra huafo Tesalónica anoafu cunu fomani

1 Unquian Pablo un mato cunu fomaino Silvano futan Timoteo mato yoisharapaicani. Nan rafu nuno ufu icafo. Ascacun uhuun yoramishtichin Tesalónica anoafuan manfin Diospan facufoquin. Ascano Furun Jesucristo mato Ifocoin. Man ichananmisi ahuunoa shinanshcaquin. ²Apa futan man yopai cuscan mato inantiro ahuun Yoshin Sharapan matohuun ramapaiqui mato nomuran mato shinansharamatiro. Mato asca huanon.

Cristo nasoaitian nan icoinra huamafo Upa Diosin ato onaintimashqui

³Uhuun yoramishtichin man Jesús icoinra huaquin tau huani cuscan natian man fasi finacoinquin icoinra huashu fasi man noinancoinna. Ascan un mato Dios cufishonaitian un cufinquin isca huafafaini, —¡Aicho! Upa Diosin min yorafo Tesalónica anoafuan fasi mia tanasharacoianforan, —ishon un mato cufishomisi. ⁴Ascacun un mai futsafo ari cashu nan icoinra huafo fu un ichanaintian matohuunoa un ato yoisharamisi isca huaquin, —Nan icoinra huafo Tesalónica anoafu ahuun caifo futsafoan ato omitsisca huamisifo. Ascafia ahuara chaca futsa finonfiacaquicai aton nomuranshon shinanchacatarocon Jesús icoinra huacashon tunucoianfo, —un yoimisi. ⁵Ascacufin Jesushuunoashu omitsiscaquin man tapitiro Diosin cayacafi shinanquin mato itishara huaa afu man ipanon. Ascashu natian

man omitsiscashiashu chipo man afu isharapacunaca.

⁶Diosin iconcoin fustisi. Ascacufin ahuunoashu man omitsiscaquin nan mato omitsisca huaifofin aafin aton chipo onaintimaquin omitsiscamacoinshquin. ⁷⁻¹⁰Ascashu nocon Ifo Jesús mai ano nasoaitian noco numai oshquin non afanan omitsiscapanonma. Nan oaitianri ahuun oinmati mutsisipafori nai ariashu afu fotoshcani. Ascaino nantifi ahuun yora nan cuscara sharacoinfo aqui unimacaquin ahuunoa non yoiquin isca huashquin, —¡Aicho! Nocon Ifo Jesús tsoa futsacai mia cuscarama. Min nantifi finoncoian. Min sharacoin. Non mia noiran, —ishon non yoishquin. Ascan non mato Jesushuunoa yoipaoni cuscan man man icoinra huaa. Ascashu nan Jesús nocoaitian marifi man noco futan yoisharashquin. Ascan nantianri Apa Dios icoinra huayamafain ahuun tsain shara ahuunoa yoiainfo cuscan nica-casmamisifo omitsiscapanacafo muran ato potashquin. Anoashuca tsoa raqui fopanacama. Nocon Ifo Jesús icanoricai nocopacunacafoma. Ahuun curush shararicai tsoan oinnacama.

¹¹Ascacufin non mato cufishoquin isca huafafaini, —Upa Diosin min ato imapaiyai cuscan ato imahuu. Mia icoinra huashon futsafori shara huapaiyai cuscan min curush ato inahuun, —ishon Upa Dios un nantishon tapiquin mato cufishomisi. ¹²Non mato nannori Upa Dios cufimisi futsafoan mato oinquin arifi nocon Ifo Jesushuunoa yoisharanonfo isca huacaquin, —Jesús ahuamamishti huatiro. Ascashon ahuun yorafo nan cuscara sharacoinfo ato imaran, —ishon ahuunoa yoisharanonfo. Ascano Upa Dios futan noco Ifo Jesucriston matohuun ramapaiyaino mato nanscara shara huatiroquin.

Na nocofunu chacahuunshon Dios nicacasmamisifoquin ishon ato yoi

2¹⁻² Ascan nocon Ifo Jesucristo afanan oaitian nantian nan icoinra huafoti non aqui noconain futsui afu ipashquin. Ascafia futsafoan maton parapaicani isca huaquin, —Jesús man oshon inonpacoai cuscan ua tapimanaran, —ishon futsan mato yoiaraca. Ascan futsanriracan mato yoi isca huaquin, —Man non nica Jesús man oaran, —ishon futsan yoiaino futsanri yoi Pablonun noco cunu fuma, —Jesús man oaran, —ishon mato yoifiashucaí icoinma. Ascacun mustairiyamacahuun. Un mato yoinon. Jesús mai ano nocoaino nantifi icoinra huafo afu ichananshquin. Ascashu afu ipanaca. Mato yoisharapaiyaiton nicasharacahuun. ³Nan chanimisifo icoinra huayamacahuun. Jesús oataima iquisi nan manifoti anoshon Upa Diosin tsain potacani afanan nicapaicanima. Fasi finacaia yoitima ishcaquin. Nantianri nocofunun chaca finacoian yorafoan ointirofo. Nantocaifin Diosin yononi cuscan nicacasmacoinquin. Nanfin Satanás yoraquin. Ascafia chipo omitsiscapanacafo muran caashquin. ⁴Ascan niyoshon nan nocofunun chaca yoishquin isca huaquin, —Un nantifi finoncoian. Nan man yoia, “Nocon Diosiran,” ishon cufimisifo. Ascan nancái Diosimaran, —ishon ato yoishquin. Ascatan Dios fu tsainti pushu muran iquishon ato yoishquin isca huaquin, —Ahuara futsa cufiyamafain ahuara futsari noiyamacahuun. Unfin Diosiquin, —ishon ato paranshquin.

⁵¿Man ointiaquimanamanmun un matofu iyoshon nanfohuuoa un mato yoipaoni? ⁶¿Ascan man shinanmamun un mato yoini isca huaquin, —Nan nocofunu chacacoin Upa Diosin nitumayoi. Ascashon nan Upa Diosin

nitun huayamaino caashquin yorafoan oinonfo, —ishon un mato yoini? ⁷Nan noicasmamisi nitumayoicai oataima. Chipo Upa Diosin afanan nan nocofunu Satanashuunshon chaca huamisi nitun huayamaino nocoshquin. Acai nocoataimafia nan Satanashuunshon natianri chaca huafiacaquin fomanpaicani. ⁸Chipo nan nocofunu chacacoin Satanashuunoashu yonomisi nocoshquin. Ascaiton nocon Ifo Jesús ahuun tsainman rutushon omitsiscapanacafo muran potashquin. ⁹Nan rutuataima Satanás curushhuunshon nan nocofunu chacacoinni tsoan oinyomisima cuscara Satanás yonopan nanscarafo huashquin yorafo parashquin. ¹⁰Nan nocofunun icoinra huamafo aton parashquin. Ascashon chaca futsa futsatapafo huaiton oinquin nan icoinra huacanashu arifi nanfo omitsiscapanacafo muran foshquicani. Nanfoancai Diosin tsain iconcoín nicapayamafain tsoanricai nan tsain shara noimisifoma Dios fu ipashcaquin. Ascashu omitsiscapanacafo muran foshceni. ¹¹Ascacufin Diosicai afanan aton nomuran nitun huaima nan paramisifoan ato yoiáfo cuscan icoinra huanonfo. ¹²Ascashon nanfoanricai Diospan tsain iconcoín fusti icoinra huayamafain tsoanri noipaimisima. Ascatarocon chaca fustisi fuchipaiyaifoan Upa Diosin ato omitsiscapanacafo muran potashquin nan paramisi futsafo fu ipanonfo.

Diosin noco catonni nocon chaca soashu afu non ipanon

¹³Ascafia uhuun yoramishtichin mancai ascarama. Nocon Ifo matohuun noicoínquin Upa Diosin mato catonni. Ascano mancai omitsiscapanacafo muran catamarocon ahuun Yoshin Sharan ahuun tsain iconcoín man man

icoinra huaa. ¹⁴Ascano ahuun tsain shara Jesucristohuunoa non mato yoiai cuscan nocohuunshon man man tapian. Ascashon marifi man icoinra huaiton Furun Jesucristo funimani cuscan matorifi funimashquin a icano man afu ipanon.

¹⁵Ascacufin uhuun yoramishtichin, non mato iconcoin yosimisi cuscan nan fusti tanasharacoincahuun. Ascan man oian ahua futsa ascarayamacun afo tanayamacahuun. Non mato yoipaoni cuscan nan fusti icoinra huafain non mato cunushoni cuscan nanrifi shinanchahuun. ¹⁶Nocon Ifo Jesucriston futan nocon Upa Diosinri nocohuun noifain nocohuun ramapaiquin. Nocon nomuran noco unimapacunaca. Ascacun non tapitiro nococai potapacunacama non afu ipanon. ¹⁷Ascacun maton nomuran unimafain ahuun curush mato inapainon ahua ahucarafiaino man yorafo yoisharafain ahua man ato ashosharafafainon.

Noco Upa Dios cufishocahuun

3 Ascan uhuun yoramishtichin uhuun tsain unutaqui un mato yoinon. Ascano noco Upa Dios yocashocahuun nocon Ifoan tsain shara man nica cuscan huafain noco Ifohuunoa nantifi futsafori yoicahuun arifi onihuafoanricai futsafori samamashta yoiaifoan icoinra huanonfo. ²Ascano atifitocai nocon Ifo Jesús icoinra huacanima. Ascacun noco Upa cufishocahuun noco numanon nan yora shinanchacamisifo futan nan isharamisifoanmari noco ahusca huanonma. Ascashon Jesushuunoa non tsain shara yoiai cuscan noco shatumanonfoma.

³Ascafia nocon Ifo no fu icacaini. Ascashon nocon yoimisi cuscan noco huashoshquin. Nan yoshin chaca Satanás noco omitsiscamapafiaiton nocon Ifoan noco mutsismafain noco cushusharafafaini. ⁴Non matohuunoa

shinansharamisi cuscan non icoinra huai. Ascashon non mato yononi cuscan man nanscasi amisi. Natianrifi man nanscasiariai. Nan non icoinra huai. ⁵Upa Diosin fasi matohuun noiai nocon Ifoan mato tapimapaion. Cristo ahua ahucarafiaino tunucoinni cuscan marifi ahuunshon man tapisharapaion.

Nantififain non Jesús yonoshosharanon

⁶Uhuun yoramishtichin nocon Ifo Jesucristohuunshon un mato yonoi. Icoinra huaa futsanfoan noco nicacasmatan yonocasmái shanimisifo fu rafuyamacahuun. ⁷Man man tapishara non maton muran icashu non shanitamarocon non yonosharapaoni. Non yonoai cuscan marifi nocon fu yonosharacahuun. Nocohuun caoncahuun. ⁸Non matofu icai chaincai maton tushu non cashman mato pianpaonima. Ascatarocon nantishotapiquin curushcain non yonopaoni ahuun rafanan pui fishon norifi piishquin. Ascano marifi marus fusti maton pui man ichapa potanonma. Non yonoi nanscapaoni.

⁹Diospan tsain yononi isca huaquin, —Nan mato Diosin tsain yoimisisfo yopaifo cuscan ato inancahuun, —ishon cununi. Ascan un mato yocapaiquin iconcoin un mato yocacuana. Ascafia non mato oinmasharapaiquicai non mato ahua cashman yocamisima. ¹⁰Man man shinainmun non mato muran ishon non mato yoini isca huaquin, —Tsoan yonoshomacai pitiromaran, —ishon mato yoini.

¹¹Ascashon matohuunoa noco yoiafo isca huaquin, —Atirifi onihuanifoti yonocasmacani. Ascashu cahuascaquin chani fusti yoifoanfafaicaniran, —ishon matohuunoa noco tapimanafo. ¹²Ascano nocon Ifo Jesucristohuunshon non mato na cuscarafa non yoi

man afanan ascanonma. Uncai uhuun tsain fustiton un ato yoi fustima. Unrifi mato yonoi. Ascacun afanan ascayamacahuun. Afanan foanfafainyamacahuun. Ascatamarocon yonosharacahuun ahuun rafanan pui fishon man yopai cuscan fishcaquin.

¹³Ascacun uhuun yoramishtichin nan man yonosharamisifo un mato yoisharapai. Man futsafo shara huamisi cuscan unupaiyamacahuun.

¹⁴Ascan tsoan un mato yonoa cuscan nicacasmaiton oin afu rafuyamacahuun. Man ascaino rafipainon Diosin tsain nicacasmashu. ¹⁵Nanscara yora fucai tsoan rafutiroma. Ascafia shinanqui isca huayamacahuun, —Un noicasma cuscararan, —ishon anori shinanyamacahuun. Ascashon nan mato

yoracoinhuun man shinain cuscan atohuurifi shinancahuun.

**Pablonun ahuun tsain
unutaquin ato cunushoni**

¹⁶Nocon Ifoan arus fusti nocon ointi unimamatiro. Shafatifi ahuara ahuuscarafiaino maton ointi mato unimapainon. Nocon Ifo nantifi matofu isharanon.

¹⁷Unquian Pablo nantian ufcoin uhuun mucupan un mato cunushoni. Ascano oinquin man tapitiro ufcoin un mato cunushoni. Ascan nan un cunuaity un nansca huamisi. ¹⁸Nocon Ifo Jesucriston nantifihuun matohuun ramapai. Nanti.

Pablo

Pablonun Timoteo Cunu Fomani

Pablonun Timoteo cunu fomani

1 Unquian Pablo un mia cunu fomai min tapinon. Upan Diosin ua catonni Furu fu rafunon ahuun tsain Cristo Jesushuunoa un yoifafainon. Nan nocon Numamisi Jesucristo futan ua yononi manifoti isca huaquin un yoinon, — Jesucriston noco nashonishaquin arus fusti noco Upa Dios ari iyoshquinran, — ishon un ato yoinon. ²Ascano un mia Jesucristohuunoa yoiaiton min icoinra huani. Ascacun min icoinra huahuunshon min uhuun facu cuscaracoin. Un mihuun fasi noi. Nocon Upa Diosin futan nocon Ifo Cristo Jesús mia noiquin mia cushusharafain mihuunrifi rama-paia. Ascashon min ointi mia main huamanon.

Futsan amaquiri mato yosiaiton icoinra huafo yoihuu ato nicanonfoma

³Ascan un Macedonia ano caquin un mia yoini isca huaquin, —Efeso anoashu cariyamahuun. Anoa futsafoan ato Diospan tsain amaquiri yosimisifo. Ato yoihuu afanan asca huaquin yosinonfoma, —ishon mia yoini. ⁴Non Diosin tsain yosiquin futsafo non yoitiro Jesús icoinra huanonfo. Ascan nan amaquiri yosimisifoan asca huatamarocon shunipafo yafi aton shunifohuunoari yoirafo. Non yosiqui asca huaitocai Diosin noco icoinra huamapaiyai cuscan tsoan tapitiroma. Nicafiacani afohuunoa fochishmanantanantirofo. Ascashon ato yoihuu afanan shunipafo yoinonfoma. Aton tsain shatumahuu.

⁵Un nannori yonoa noinanfo. Ascashucaí non nocon ointi muran ahuashta shinanchacatarocon

shinanshara fustifain nocon nomuranshori non nocohuunoa ahuacai chaca shinanyamafain non Jesús icoinra huacoinnai cuscan non futsafo noicointiro. ⁶Atirififaincai asca huacanima. Ascatarocon Diosin yonoa cuscan man cachiquiri huaafo. Ascashon tsain ahuama ipaitsi yoimisifo. ⁷Ascashon Moisés nocon yononi cuscan futsafo tapimapaicaqui nanfoan yoimisifo isca huaquin, —Moisés yononi cuscan man non fasi tapicoiran, —ishon yoifiamishacaquicai yosipaiyaifo cuscan tapicoianfoma.

⁸Man non tapia Moisés yononi cuscan shara yosimainquin cayacaficoín futsafoan nicasharatiro isharashcaquin. ⁹Man non tapia tsoa isharamisi Diospan tsain fusti tanasharashucaí Moisés yononi cuscan yopacanima isharashquin. Ascan nan Diosin yononi cuscan nicacasmamisifo tapimapai chaca huamisifo cuscan shatuyamaifoan ato onaintimashqui.

Ascashu nanfo isca huamisifo. Diosin yononi cuscan nicacasmamisifo icain Diosin ato shinanmapaiyai cuscan shinancasmafain chaca futsa futsatapafo huamisi icain aton apa yafi ahuacha huafain rutumitsamisi icain. ¹⁰⁻¹¹Aton ahuinma non aton funuma fu icain nocofunfo yafi ainfofo chaca huatananmisi icain futsa curushcain aton yonomati imafain chanimisifo. Ascacashu ahuara futsa Diosin noco sharacoin yononi cuscan nicacasmacani. Nanscarafu Diosin ato nicamapai nan yononi cuscacon anonfo. Ascafia chaca huamisifo cuscan shatuyamaifoan ato onaintimashqui tapinonfo. Upa Diosin ua yononi cuscan ahuun tsain sharacoin nantifi yorafa un ato yoinon. Nocon Dios fasi sharacoincun.

**Diosin ahuun ramapaicun
Pablonun aicho huani**

¹²⁻¹⁴ Noncai Diospan Furun onanyopaonima. Ascashon un yoipaoni isca huaquin, —Jesuscai Diospan facuma. Aafin chanimisicoinquin, —un huapaoni. Ascashon ahuun yorafori un fasi ato omitsisca huapaoni. Un nocofunu fasi musucuin ipaoni. Un tapipaonima un Diospan Furucuin chaca huafiaquin. Un asca huafiaiton uhuun ramapaiquicai ua onaintimanima. Cristo Jesús ua noiquin ua shara huashofain ua tapimani ahuuscashomain un icoinra huatiroquin.

¹⁵ Un natian mato icon yoiai cuscan man icoinra huatiro. Cristo Jesús nai ariashu mai ano fotoni yora chacafo numashqui afu ipanonfo. Ascan unfi chaca huaqui finacaimisiquin. Tsoa fut-sacai asca huamisima. ¹⁶ Ascacun uhuunshon Upa Diosin nantifi yora ismatiro nan chaca finacaia ahuun chaca soashotiro afu ipanon. Isca huaquin shinantirofo, —Shinancapon, Pablonun fasi chaca huapaonifiacun Jesucristo fasi Pablo noiquin. Jesús uarifi noitiro. Pablo numaquifin uarifi numatiroquin un afu nipanon, —icashon shinantirofo. ¹⁷ Ascano nocon Dios Niaifocuin nipanaca. Arus fusti Dios futsa yamai. Tsoancai Dios ointiroma. Nantififain non ahuunoa yoisharapacunaca isca huaquin, —Mirusu fustiton nantifi tapicoian. ¡Aicho! —ishon non yoipacunon.

¹⁸ Timoteon min uhuun facushtan. Un mia yoiai cuscan nicasharahuu. Min Dios yonoshonataima mihuunoa iquisi inonpacoai cuscan yoisharayoni. Ascan natian afanan un mia yoisharai. Mihuunoa yoisharani cuscan nanscasi huafafainhuun. Satanás noco chaca huamapaifaiton a nicatamarocon Dios fusti tanasharafafainhuun chaca huashquima.

¹⁹ Min Jesús icoinra huacoinmisi cuscan unuyamahuu. Ahuunoa shinanfafaahuun. Ahuara chaca huashon Upa Dios yoiriscahuun min nomuranshon ahua chaca afanan shinanshquima. Atrifiton chaca huafiacashon Upa Dios yoimisifoma arus fusti shinanfacaquin shafacafi cainmacasmacaquin. Ascashon tsoan Dios yoipaimisima aton chaca soashonon. Asca chaca huariaifoan afanan icoinra huacanima. ¡Ohua! Afancai aton nomuran shinansharamisifoma. ²⁰ Noco yora rafu nanscara rafuquin. Himeneo yafi Alejandro un ato Satanás inan ato onaintimanon. Ascashon tapinonfo afanan noco Ifo Jesús chaca huanonfoma.

**Ahuuscashomain non
Dios cufitiroquin**

2 Natian tsain futsa un mia yoinon. Ua nicasharapun. Upa Dios cufifafaihuun. Nanfin fasi shara finacoianquin. Ahua futsacai ascarama. Nantifi yorafohuunshon Upa Dios cufihuun ahuun Yoshin Shara yopaifo cuscan ato cufishohuun. Diosin atohuun ramapainon cufishofain Diosin ato amapaiyai cuscan cufihuun nanscasi huanonfo. Atohuunoa Upa Dios yoihuu isca huaquin, —¡Aicho! Upa Diosin min na yorafo shara huashoshquiran, —ishon cufinquin nannori yoihuu. ² Nannoricuin nan niaifocuin yafi ahuun niaifo patasharinoafori ato Upa cufishohuun noco iquisharanonfo ahuaraton noco fucash huanonma. Ascano Dioshuunoa non shinanfafaaitiro a cuscara sharacuin iishquin.

³ Ascacun nan nocon Numamisi Dios noco oian non isharaiton oin unimacointiro. Nanscara fuchipai. ⁴ Nantofin nantifi yorafo numapaiquin. Ascashon aton chaca soashona afu ipanonfo. Cristohuunoa iconcain tapisharanonfo.

⁵⁻⁶ Iconcoïn Diosifin fustiquin. Futsa yamai. Afin sharacoïnquin. Yorafocai a cuscara foma. Nantififain man non chaca huamisi. Ahuara chacacai Dios fu itiroma. Nan Jesús nocon cuscara nocofunuquin. Arus fustitofin noco nashonquin nocon chaca soashoshquin non Dios fu ipanon. Nantifi yorafo numapainquin noco nashoni. Upa Diosin yorafo tapimapaiquin Furun Jesús mai ano nichini noco nashoshquinon. ⁷ Ascacun Upa Diosin ua catonni Jesús fu rafucain ahuun uhuun caifomafo un yoinon. Atorifi un Jesushuunoa icon yoiatton icoïnra huanon. Ascan uncaï mia paraima. Icon fustisi mia yoi.

⁸ Ascano nantifi manifestifainmain Upa Dios cufipainonfo. Ahuara chaca yoiçani fochishmanantananyamacain sinatamari Jesús tanasharaquin mushainacahuan Dios cufipainonfo.

⁹ Ainfori un yoisharapai non ichanaintian isca huaquin shinanonfoma, —Uhuun saya sharashtacoin sahuufain fusoqui cunucain uhuun foo shara huafain nantififain ua oïnonforan, —ishon ascacain man icai cuscan matohuunoa futsafo shinansharamapayamacahuun.

¹⁰ Ascatarocon ato futan ahua futsa shinancaquima Upa Dios fusti shinancahuun. Man yoisimi isca huaquin, —Non Dios noicoïnran, —ishon. Manmain icoïncaïn futsafo shara huashofafaincahuun. Un ainfofo anori yoisharapai.

¹¹⁻¹² Ascano Diospan tsain nicashquin man ichanantiro. Ascacun mun yoisimi ainfofoancaï nocofunufo yonotiroma. Diospan tsain yoisimiton yoiatton puusiquima ainfoan nicasharatiro yoiçai cuscacoin tapifain nan yoiçai cuscacoin aashquin. ¹³ Diosin Adán onihuaquin tau huani. Chipa Evari onihuani. ¹⁴ Ascacufin Satanascaï Adán parayonima. Eva paraquin tau huani. Nanto chaca

huaquin tau huani. Diosin ato yononi cuscacai nicanima. Ascano ichanainfofian ainfofoan nica fustitirofo. ¹⁵ Ascacufin ainfofoan facu caiyaintian isin muyotiro. Ascacufin Jesús icoïnra huashon noifain a cuscara shara icanashu Dios fu ipatirofo.

Ahuu cuscaramain ichananfo cushumisifo itiroquin

3 Icon tsoan Diospan yorafo cushumisi ipaiquin yonoshorafafainpaitiro. ² Nan nocofunu cushumisi shara fusti itiro.

Ascano ahuaara chaca ahuunoa shinainfocain cushumisi itiroma.

Ahuin fusti ya icain

pau fuchipaimisi iyamacain

ahuara ahuuscarafaino shinansharamisi icain

ahuara shara fustisi shinanpaimisi icain
ahuun pushu muran yora
iquimasharamisi icain

futsafo Diospan tsain tapimasharatiro
icain.

³ Paumisi iyamacain

sutumitsapaimisiri iyamacain

futsafo yoisharapaimisi icain.

Ascataricai fochishmanantanapaimisi
iyamacain

pui noipaimisiri iyamacain.

Nan cuscara nocofunu catonhuun
icoïnra huafo ato cushumisi inon.

⁴ Ahuin yafi ahuun facufori ato
ismasharaiton

ahuun facufoan ahuunoa shinansharafain nicasharanonfo. ⁵ Ascano ahuin yafi ahuun facufo nica-masharayamaino ahuuscashomun nan Diospan yorafo ichananmisifo ato nicamasharatiroquin.

⁶ Ascacun nocofunun rama Jesús Ifoatocai ichananmisifo cushumisi itiroma. Nan cuscara man catoanfin shinanqui isca huatiroquin, —¡Aicho! Unfin fasi sharaquin.

Ascan ua samamashta catoanfo un ato cushumisi inon. Ascan uncai futsafo cuscarama. Un ato finoncoianran, —icashon cacapaimisi itiro. Nannori Satanás noco shinanchacamapai.

⁷ Ascacun isharaiton oinmisishacaquin nan icoinra huamafoanri ahuunoo shinansharacashon catontirofo nan ichananmisifo cushumisi inon. Nanscara iyamaiton Satanás ahuun nomuran shinanmatiro nan chaca huamisi cuscan. Ascashon nan chaca huamisifohuunoo shinanquicai a ichananmisifo tapimasharatiroma.

Ahuu cuscaramain ichananfo shara huashomisifo itiroquin

⁸ Nanscarifiai ichananfo aton shara huashomisifo isharamisifo futsafoan atohuunoo shinansharafain icon fustisi yoimisifo. Nan cuscarafu ichananfo aton shara huashomisifo itiroquin. Iscarari itirofo.

Paumisi iyamacain

pui noimisiforicai itiroma. ⁹ Ascashon tsoancai Jesushuunoo tapiyopaonima.

Natian ahuunoo Diosin noco tapimanai cuscan tsoan nan icoinra huafoan shara huashomisi itiroquin. Ascano fasi finacaiquin Jesushuunoo tapi-paicoian nan cuscarafin ichananfo aton shara huashomisi itiroquin.

¹⁰ Tsoan ichananfo ato shara huashomisi ipaiyaiton iquisi oinsharayotirofo. Isharacoincaimain ahua chaca huamaquin. Ascan oianfo isharacoin-cacainaiton nan cuscara ichananfo shara huashomisi itiroquin.

¹¹ Aton ahuinfori isharacoinmisi icain yoiti huamitsapaimisi iyamacain paunmisiricai itiroma. Ahuara shara futsa aquifin Jesushuunshon asharamisi itiroquin.

¹² Nan ichananfo aton shara huamisifori ahuin fustiyafa itirofo.

Ascashon ahuin yafi ahuun facuforifi onihuaniti. Nanfoanri Jesús tanasharanonfo.

¹³ Nanscara shara huashomisi ichananfoan ahuunoo yoisharatirofo. Ascashon nanton nocon Ifo Jesucristo icoinra huaquin finacointiro.

Tsoan Jesucristohuunoo nicayopaonima cuscan Pablonun cunushoni

¹⁴⁻¹⁵ Uhuun facushtan Timoteo un mi ari cariscapaifiai un funa caiyamaquin un mia tapimai ahuuscashumain ichananmisifo isharatirofoquin. Uhuun cunuhuunshon un mia tapimayoi. Jesús icoinra huafo ichananmisifo nanfofin Diospan yorafoquin. Ascan nan Dios ipanaca. Ahuun tsain iconcoin ahuun yorafo nan ichananmisifohuunshon fut-safori tapimaiquin. ¹⁶ Icon atirifitocai tsoan Diospan tsain tapiataima isharash-caquin. Ascafia Jesushuunooashu non isharatiro.

Aafin Apa Dios icariashu mai ano ftoni nocon cuscara yoracoin iishquin.

Ascatarifi Diosin Yoshin Sharapan ismapaoni Jesuscai ahua chaca huamisima icon fustisi imisi.

Diospan oinmati afu nai muran icafoanri oinnifo.

Ahuunooashu manifoti futsafoan yoiqui isca huamisifo, —Jesús Upa Diosin facu. Ascashon arus fusti maton chaca soashotiroran, —ishon yoifoanfainmisifo.

Yoiaiffoan nicacanashu atirifi manifoti anoshon icoinra huacani.

Ascashu Jesús naafiashu mai muranooashu funini.

Chipo afanan Apa icano nuinacahuani arifi nantifiton aton niaifocoin iishquin.

**Atiriffain afanan Jesús icoinra
huayamafiacashon
futsafo iconma yoipaicani**

4 Diosin Yoshin Sharapan noco cayacafi tapimayoni atirifiton Jesús potaifo cuscan. Ascashocai afanan icoinra huapaitama nan yoshin chacafohuunshon ato yoipaiyaifo ato tanacani funoshcaquin. ²Nan paramisifoan chanihuunoasi shinanfafaimisifo cuscan nannorifi futsafori tapimashcani. Nanfoan chani fustisi yoifafaincaquicai afanan ahuara iconcoin shinantirofoma. Chani fustisi tapiafo.

³Ascashon fasi amaquiri futsafo yosicaquin isca huacani, —Mancai fianantiroma. Atirifi tushu man pitiromaran, —ishon ato parapaicani. Anori yosipaifiaifoan Upa Diosin nantifi tushu onihuani cuscan non nanfo unimacain pitiro. Ascashon piquin non Upa Dios, —¡Aicho! —huatiro. Ascan non Diospan tsain icoinra huashon ahuara iconcoin non tapitiro.

⁴Ascan nantifi Diosin onihuani cuscan sharacoin. Non ahuara potatiroma. Nantifi Diosin onihuafo non piquin, —¡Aicho! —huatiro. ⁵Diospan tsainhuunshon non Upa cufiaino nantifi Diosin onihuani cuscan sharacoin itiro.

Jesucriston yonoshomisi shara

⁶Uhuun facushtan Timoteo un mia tapimanai cuscan min icoinra huaa futsafo mirifi min ato tapimashu min Jesucristo yonomati shara itiro. Nan tsain shara Jesushuunoa min icoinra huamisi. Facushon min Diospan tsain icon nicamisi cuscan nanscacoin min tanasharacoinmisi. Shafatifi nan tsain shara min nomuran nanuhuun futsafori tapimasharashquin.

⁷Ascacia futsafoan shunipafo cuscara ato tapimapaicani. Ascan

nanfocai Diospan tsainma. Ascacun ato nicayamahuu. Aton nicatamarocon Diospan tsain fusti oinsharahuu a cuscara shara iishquin. ⁸Non ejercicio huaino noco caya non shara huatiro mutsisipa iishquin. Nanscarifiai non Dios cuscara ipaiquin ahuun tsain nocon nomuran non nanuaiton ahuun curushu noco inanshquin. Nancaifin shara finacoianquin. Natian noco shara huatiro. Ascashon non Jesusqui nocoaiton noco imasharapacunaca. ⁹Nancaifin min icoinra huatiroquin. ¹⁰Ascano non fasi curushu yonoshofafaincain man non omitsiscamisi futsafo nan tsain shara icoinra huanonfo. Nonfin tapia nocon Dios nipanacaton nocori nimapacutiroquin. Afin nantifi yorafo nashoniquin. Ascacia icoinra huafoti afu nipatirofo.

¹¹Nanfo un mia tapimanai cuscan huafain un mia yonoai cuscari futsaforifi tapimafain ato yonohuun Diospan tsain icoinra huanonfo. ¹²Timoteo icoinra huaa futsafo ato ismahuu min Jesushuunshon ato yoisharafain mirifi isharacain min Jesús icoinra huashon atohuun min noitiro. Ascacun ahua chaca huapaitama Jesús cuscara isharahuu. Pushcofiashu min ascaitocai mihuunoa tsoa ahua chaca yoitirofoma. ¹³Un miqui nocoaitian atofu min ichananshon Diospan tsain yoia cuscan ato anushoquin yoisharafain yosisharahuu. ¹⁴Ichananfo ato cushumisifoan mia manmanshon cufishonaifono nantianri Diosin mia amapaiyai cuscan mia ashoni min icoinra huaa futsafo tapimasharafain min ato cushusharanon. Ascan Upa Diosin mia cashman tapimani cuscan huafain futsafori shara huashofafainquin shatuyamahuu.

¹⁵Un mia yonoa cuscan nantifi huafafainhuun ato ashosharashquin.

Ascaifin min shafatifi itisharatiroqui. Ascaquin ahua futsa shinantaquima nan min acai fustisi asharafafainhuun. Min ascaiton oinquin yoitirofo man min fasi itisharacoian. ¹⁶Ascacun oinfain. Nantishotapiquin min isharacain min ato cayacafi Diospan tsain tapimasharanon. Min ascaiton Diosin mihuunshon ato numatiro afu ipanonfo chaca huashcaquima. Mirifi min Jesús fu rafucacaintiro. Ascaquin min nomuran unimashquin.

Ahuuscashumain icoinra huaa futsafo fu non isharatiroquin

5 Ascashon nocofunu iyoafo tsain curushu yoiyamahuu. Ascatama min upa min yoisharatiro cuscan huafain iyoafo futsafo yoihuu. Min ushtocoinfo min yoisharatiro cuscan huafain nanscarifi chipocu futsafo yoihuu. ²Ainfo mustufori min uhuacoin min shara huatiro cuscan huafain atorifi shara huahuun. Ascashon min chico yafi chipi min shara huamisi cuscan huafain shomayafori shara huahuun. Ato furi ipaiyamahuun. Ascatama atohuunoa shinansharahuun.

³Ainfo funuomacoin facuomacain fafaomacai nan icoinra huafo ichananfoan cushusharatirofo. ⁴Ascafiacun funuoma futsan facufo ya iyamarai fafayashon nanfoan cushusharatirofo. Jesús tanasharapaiyaifoan nansca huatirofo. Diosin nanscara fuchipai. ⁵Ainfo funuoma ahuan yoraomashon Dios fusti shinanquin. Isca huaquin cufitiro, —Upa Diosin ua cushusharahuu, —ishon cufitiro. Shafatifi yafi yamutifiri Upa Dios cufifafaintiro.

⁶Ascacia funuoma futsafocai ascatiroma. A futsan shinain cuscan huaquin shinantiroma. Futsa afin apaiyai cuscan fusti shinanfafaftiro. Ascaquicai Dioshuunoa

shinansharatiroma. Ascashon pushuti chani yoifanfafaitiro. Nan cuscarafoan chaca huafafainicai Dios fu nipatirofoma. Ascashu nifiashu man naa shinantsafo. ⁷Timoteon nanti un mia yoi ai cuscan funuomafohuunoa ichananmisifori tapimahuu. Min ato tapimanai cuscan icoinnaifoan tsoancai atohuunoa yoitiroma isca huaquin, —Timafin. Nafoa aton funuomafu cushusharayamaifoan ato chaca huacaniran, —ishocai atohuunoa tsoan yoitiroma. ⁸Tsoan ahuan yorafo cushusharayamaifoan ahuan afocoinri cushusharayamaicai Diosin tsain cununi cuscan aima. Nancaifin Jesús icoinra huafoma cuscara finacaiquin.

⁹Ratoran funuoma futsa ahuan fari sesenta nocoataima ahuan funu niyoano furoma ipaonicai. Nanscaracai ichananfoan cushutiroma. ¹⁰Ascan funuoma isharamisi futsafoan ahuan isca huaquin yoitiro, —Nan ainfo funuomaton futsafo shara huafafainiran, —ishon ahuan yoifain ahuan facufo tapimasharamisiran huafain futsafo ahuan pushu ano nococun ato shara huamisi icain Jesús icoinra huafo shara huafain futsafoan ahuan chaca finoan atori shara huamisi icain futsafo ato shara huamiscain ascara funuomafu ichananfoan ato cushusharatiro.

¹¹Ascacia funuoma yoshafotaime nan ichananfoan cushutirofoma. Rucun yoiyomisi, —Cristo fustihuunoa shinanquin un yonosharashopairan, —ishon. Ascacia chipo anori afanan shinanyamaquin fasi nocofunu fipaiquincai a yoiyoni cuscan afanan shinainma Jesús yonoshosharashquin.

¹²Ascacanashu Jesús yoiyoni cuscan ayamashu omitsiscaquin. Aton nomuran shinantirofo isca huaquin, —¡Ohua! Un Jesús yoiquin tau huani cuscaicai un aama. Natiancai uqui unimaimaran, —ishon shinantiro. ¹³Ascashon pushuti

chani yoifoanfaini. Yonotama shafatishon funocointiro. Nanscara man fuyamisi. Chaca yoimisi cuscan yoiana shara icuana. ¹⁴Ascacufin ainfofo yoshafaotafoma un ato yoisharapai isca huaquin, —Man afanan shara itiro. Ascan man mato facucoin ayashon cushusharafain maton funuri pichasharashon man shara huashotiroran, —ishon un ato yoi. Man ascaitocai yoshin chacafoman matohuunoa tsain chaca yoitiro. ¹⁵Ascfia atirifoan Jesús potayoni Satanás tanashcaquin.

¹⁶Ratoran ainfoan Jesús tana amaqui funu nacun nan ichananfoan cushuamarocon ahuun yoracoinfoan cushusharatiro. Ascan nan ainfo tatuoma ahuun yorafomacun nan Jesús icoinra huafoan cushusharatiro.

¹⁷Ichananfoan cushumisifo ato inansharatiro. Nanfoanrifi tanasharamisifoma yonosharashomisifo. Nan Diospan tsain yoimisifo non ahuun tsain yosimisifori inansharatiro yopai cuscan finonfo. ¹⁸Nannori Diospan tsain cununi isca huaquin, —Moipan trigo camaqui puamafoanfaini ahuun shacafoman tsoaiton a runushcaquima shara huacahuun. Ahuuscashon pitiromaquin. Asca huaquima piimacahuun, —ishon cununi. Ascashon cununi isca huaquin, —Tsoa yonosharaiton oinqui ahuun rafanan inansharacahuun, —icashon Diospan tsain cununi. Cununiri isca huaquin, —Mato cushumisifo non mato shara huashofafainmisifori ato inansharacahuun yopaifo cuscan finonfo, —ishon cununi.

¹⁹Futsan cushumisi yoiti huaiton a nicayamahuu. Ascano yora rafutan iyamarai rafu non fustifain nannorisi fut-sahuunoa yoiafoan man icoinra huatiro.

²⁰Ascan chaca huaa iconcun nan ichanaintian nantiffain ointaifi yoihuu.

Man ascaiton nicai ratucani ahuun caononfoma.

²¹Timoteon nocon Upa Diosin futan Furun Jesucristo non ahuun oinmati shara afu nai muran icafoan noco oin. Ascacun aton ointaifi un mia yoinon. Nanti nan un mia yonoo cuscan ahuu. Nannorisi nantifi yoihuu. Isca huaquin shinanyamahuu, —Nan uhuun yoracoinfoan chaca huafo cuscaai un futsafo yoima. Ascashon cushumisiton chaca huacucaai un tsoa tapimaimaran, —ishon anori shinanyamahuu. Ascaquima nantiffihuunoa nannorisi shinanhuun.

²²Ascano ichananfo aton cushumisi catonriscayamahuu. Iquisi oinsharayohuu Jesús tanasharamisi iyamarai tanasharamainquin. Tsoan ahuun chaca fomanpairiai cushumisi catonyamahuu. Ascaran min catoanfin mirifi min ahuun chaca fomanshonni cafiscaquin. Ascacun ascayamahuu. Jesús cuscara isharacoinhuun. Ahua chaca huayamahuu.

²³Natian tsain futsa un mia yoisharapai. Min shaquipan imisi. Ascacun unu fustisi ayaquima ichapama pau fata ayahuun cayasharashquin.

²⁴Ascano atirifi yorafoan chaca huamisi cuscan nantifiton tapishocai. Tsoan nanscarafo catontiroa cushumisi inon. Ascan atiriffain chaca huamisi cuscan tsoan tapicuma. Nanscarafoan fomanmisifo. Ascfia chipo Diosqui nococun a chaca huamisi cuscan puashoshquin nantiffain ahuunoa tapinonfo. ²⁵Nanscarifiai futsafoan futsafori shara huamisi cuscan nantiffain nanhuunoa man tapiafo. Ascan futsafoan arus fusti oianmafiano futsa shara huaquin ashomisi cuscan nanforifi chipo Diosin puashoshquin nantiffain tapinonfo.

6 Ascan tsain futsa afanan un mia tapimanon. Nan yonomati Jesús icoinra huafoan aton ifo yonosharashofain ato

nicasharacoinon. Asca huaifoan oin-
quicai icoinra huamafoan atohuunshon
Diosqui shinanchacatirofoma. Ascashon
non Jesushuunoa yosimisi cuscan shi-
nanchacanofoma. ²Rato yonomatini
Jesús icoinra huano ahuun ifoan ar-
ifi Jesús icoinra huacun nicasharacoin-
tiro, —Nicayosma iyamacahuun. As-
catamarocon nicasharapaifafaincahuun,
—ishon ato yoihuu. Nanscara yono-
mati yafi afo Diospan facufo. Ascashu
yora huatananfo. Yonomatini ahuun
ifo noiquin yonoshosharaino nan Upa
Diospan facu sharacoin yonoshosharai.

Ahuaraton noco imasharacointiro

Ascacun un mia tapimanai cuscan
huafain futsafori tapimasharahuun.
³⁻⁴Un mia tapimana cuscan cayacafi
sharacoin. Nannorifi nocon Ifo
Jesús yosipaoni. Ascan tsoan anori
yosiyama nanton amaquri yosia.
Nan cuscara cacapaimisi. Aatocai
ahua tapiama. Ahuun nomuranshon
shinanchacaquin samamashta futsa fu
fochishmanantanapaitiro. Ascatacai
unimatiroma. Ascaquin futsafo ahua
ya cuscan fuchipaifain futsahuunoa
tsain chaca huafain futsahuunoa
shinanchacamisi. Futsan aqui oshon
futsahuunoa yoiyai cuscan samamashta
icoindra huashon ahuun nomuran
shinanqui isca huamisi,

—Nanto ua chaca huaaran,
—ishon shinanchacafainmisi.

⁵Nan cuscara yorafoan chaca
fustisi shinanfaimisifo. Ascataci
fochishmanantanafainmisifo.

Ascashon afanancai tsoan ahua
icon yoitirofoma. Chani fustisi tapiafo.
Ascashon isca huaquin shinanmisifo,
—Non nan tsain shara Jesushuunoa
tanaicai non afanan ahua yopatiroma.
Non fasi ichapayatiroran, —ishon
amaquri chaca shinanmisifo.

⁶Ascano non aya cuscan ichapaya iya-
marai non ahuuomafashori non uni-
macain Diosihuunoa shinanfaini nan-
caitofin pui finoan shara finacaiquin.
Nanfin iconquin unimacai non isharaino
nocon nomuran non unimatiro. ⁷Non
caincai non pui yafi mafo ya cainmai.
Ascataca ahuuoma non caini. Nanscar-
ifiai non naacur noco mai huaifotian-
cai non ahuaa fotiroma. Nantianri no-
con furo yoshincal ahua fotiroma. ⁸As-
cacufin non tushu yafi sahuutiyashu non
unimatiro. ⁹Ascafia tsoan pui yafi mafo
ichapa fipaiquin samamashta shinan-
chacatirofo. Pui ichapa fipaiquin futsafo
chaca huaiton pui fiishquin. Ascashon
Satanás ato chaca huamaino amaquri
shinanchacafain atorifi omitsisca hu-
atiro. Ascatan ahuun unutaqui omit-
siscapanacafo muran nocoshceni. ¹⁰As-
catan pui noicaquin chaca futsa fut-
satapafo huatirofo. Atirifi fasi pui fi-
paicaquin Jesús cachiquiri huacoinceni.
Asca huacanashu aton nomuran omitsis-
cai finacoinmisifo.

Pablonun Timoteo yononi cuscan

¹¹Ascafia Timoteon Upa Diosin mia
catonni min ahuun yora inon. Ascacufin
nanfoan pui fusti yafi chaca fustisi
shinanfo cuscan shinanyamahuu ato
cuscara ishquima. Ascatamarocon Upa
Diosin mia imasharapaiyai cuscan nan
fusti fuchipaihuu. Ascashu Jesús cuscara
shara ipaicain a icoinra huafain Dios yafi
futsafori noicoinhuun. Ascashon ahua
ahuuscarafiaino Jesús icoinra huashon
min tunutiro. Ascatan nantifi yorafo-
huun ramapaihuu.

¹²Ichananfo ano min ato cayacafi
shara yoini isca huaquin, —Un Jesús
icoindra huai. Afin uhuun Iforan, —
ishon min ato yoini cuscan yora icha-
pafain mia nicanonfo. Ascacun ahua
ahuuscarafiaino nantishotapiquin Jesús
icoindra huacoinhuun. Ahuafoan mia

shatumapaiyai cuscan nicatama Jesús fusti icoinra huafafainhuun. Ascashu shafatifi Jesús fu rafuhuun. Jesushu-unoashu min Dios fu nipatiro. Ascano natian nan min naitianri ahuaara chacafo potahuu Jesús onancoinshquin. ¹³Nan oni huati Upa Diosin nantifi ato nimai. Ascano Romanon niaifoan ahuun anu Poncio Pilato yocaiton Jesús ahuunoa yoisharani. Nan Dios futan Furun Jesusin ointaifi un mia yonoi.

¹⁴Un mia yonoai cuscacoin fusti acacainhuun. Ascashon ahuashta chaca huaquima un mia yonoa cuscan fusti noco Ifo Jesucristo oaitian huahuun.

¹⁵Upa Diosin nichipaitian nocon Ifo Jesucristo afanan nocoqui nocoshquin. Nantianri non oinshquin. Nocon Diosin arus fusti nantifi iquisharafain nantifi niaifofoan aton niaifocoinri. Ifofoan aton ifocoinri. ¹⁶Arus fusti niaifocoin ipanaca. Nancai napanacama. A icarifi chashacoianquin. Ascano tsoacai aqui nocotiroma. Tsoanricai ointamari ointiroma. Ascacun non ahuunoa yoisharanon. Aafin curushcoin ipanacaquin. Nanscasiai.

¹⁷Nan pui ichapayafo yoihuu cacapaimisi iyamacain isca huaquin shinanonfoma, —¡Aicho! Un pui ichapayashu nantishotapiquin un isharacoincai, —ishon yoinonfoma. Ato yoihuu ascanonfoma. Tsoancai tapiama ahuu-

tiamain aton mafo yafi ato pui cuy-oriscaicai. Ascataka Dios fusti non icoinra huacun noco nimapacusharatiro. Nanton ahuaarafo non yopai cuscan noco inan non afoqui unimanon. ¹⁸Ato yoihuu futsafo fasi shara huafafainonfo. Yopaifo ato fishcoyamafain unimacoincai ratoran shafatan ato cashman inansharanonfo. ¹⁹Ascashu chipo Diosiqui nocoafotian ato inain cuscaicai cuyopacunacama. Ascatare Dios fu isharapacutirofo.

Pablonun ahuun tsain unutaqui Timoteo yononi

²⁰Ascano Timoteon Diosin ahuun tsain sharanan mia tapimani futsaforifi min ato yoinon. Ascacun oinfain. Ahuun tsain oinsharayohuu futsafo cayacafi tapimashquin. Futsafoan Diosin tsain amaqiri yoimisifo. Afiranan yoinonancaquin ipaitsicoin yoicaquin. Nanfoan yoimisifo non tapicoianran ifiacashocai tapiafoma. Ascacun atofu iyamahuu. ²¹Atirififain nanscara shinanfo, —Non fasi tapicoianran, —ishon. Ascacanashu Jesús noco icoinra huamapaiyai cuscan afanan tsoan icoinra huacanima.

Upa Diosin mihuun ramapainon. Nanti.

Pablo

Pablonun Timoteo Afanan Cunu Fomani

Pablonun Timoteo yoisharani

1¹⁻² Uhuun facushtan Timoteo unquian Pablon afanan mia cunu fomai min tapinon. Un Jesucristo fu rafumisi. Apa Diosin ua nichipaiyai cuscan ua nichini manifoti ato tapimashquin ahuunshon Furun icoinra huashu non Dios fu ipatiroquin. Nannori Upa Diosin yoiyoni. Nocon Upa Diosin futan nocon Ifo Jesucristo mihuun noiquin mia cushusharafain mihuuri ramapaia. Ascashon min nomuran mia unimamanon.

Pablonun Cristohuunoo yoini

³ Ascan uhuun shunifoan Upa Dios yonoshonifo cuscan huafain urifi nansca huamisi. Uhuun nomuranshon ahuashta uhuunoo chaca shinantama un yonoshoni. Ascashon un Upa Dios mihuunoo cufinquin un, —¡Aicho! Upa Diosin, —huafafaini. ⁴ Un mimaqi pashcaino min uaini. Ascan nancai un ointiaquimamisima. Ascacun un mia fasi shinain mia afanan oinpai uhuun ointi unimashquin. ⁵ Ascan min nocon Ifo Jesús icoinra huacoinna cuscan min chichi Loida yafi uhua Eunice nannoricoin icoinra huamisifo. Ascano nan rafutan icoinra huaqui tau huani cuscan mirifi min chipo icoinra huacoinni. Nanfohuunooacai un ointiaquimamisima.

⁶ Ascacun un mia afanan shinanmapaiyai cuscan fusti shinanhuun. Un mia mayatasho Upa Dios cufishoni nantianri afin mia amapaiyai cuscan min huanon. Ascashon min ahuun Yoshin Sharapan ahuun tsain yoisharafain min ato cushumisi inon. Ascacun aqui tushcuyamahuu. Upa Diosin mia amapaiyai cuscan fusti unimacain

ahuu. Non chi cutu huasharayamaino nocatiro. Nanscarifiai Upa Diosin noco amapaiyai cuscan non huayamai non funotiro. Ascashocai non afanan ahuun tsain yoisharaima. Ascafia non chi cutu huasharaino afanan urutiro. Nanscarifiai Diosin noco amapaiyai cuscan non afanan acaino non ato yoisharatiro.

⁷ Ascafia Diosin ahuun Yoshin Shara-pacai noco nichinima non rafipainon. Ascatarocon ahuun Yoshin Shara futan ahuun curushhuunshon ranotama ahuun tsain shara yoicai non yoraqui ratuyamacain atohuunrifi non noitiro. Ascashon norifi non shinansharatiro.

⁸ Ascacun noco Ifohuunoo futsafo yoi rafipaiyamahuun. Un cunu muranfiano uhuun rafipaiyamahuun. Un ahuun tsain shara yoiaiton ua omitsisca huashcaini. Ascafia Diospan curushhuunooashu min ufu ahuunooashu omitsiscashotiro. ⁹ Ascano Upa Diosin noco numani non ahuun Furun cuscara shara inon. Non ahuaara shara huaa rafaanacai noco numanima. Afin apaiyai cuscan noco numani. Noco huun noiquin noco numani. Ahuarafo oni huataima Jesucriston noco huun ramapaicain noco huun noia. ¹⁰ Ascano nocon Numamisi Jesucristo noconi. Ascacun natian ahuunshon non tapitiro fasi noco huun noi ahuatoncai noco namapacutiroma. Ascacun ahuun tsain sharahuunshon non tapitiro nocon chaca soashonano non afu ipanaca.

¹¹ Upa Diosin ua catonni Jesucristo fu rafumisi icain ahuun tsain shara Jesushuunoo un futsafo yosinon. ¹² Ascan nan ua yononi cuscacon un huamisi. Ascacun ua omitsisca huamisifoquin. Un omitsiscafiai un rafiamama. Rafitamarocon un Jesús onancoinfain un icoinra huai. Ascan un Jesús yoini isca huaquin, —Ifon ua cushusharahuu. Un chipo mifu isharpacunon, —ishon un yoini cuscan

natian nan oaitian ua ashoshquin. Nan un icoinra huacoinna.

¹³Un mia cayacafi tapimana cuscan icoinra huacoinhuun funoshquima. Nocon Ifo Jesucristo icoinra huafain ahuunri noicoinhuun. Ascacun ahuunshon nantifi noicoinhuun. ¹⁴Upa Diosin min nomuran ahuun tsain shara mia nanumana cuscan afohuunoa shinanfaihuun funoshquima. Ascano ahuun Yoshin Shara nantishotapiquin no fu rafui. Ahuunshon Diosin mia tapimana cuscan min nomuranshon min mucusharatiro funoshquima. Futsafori tapimashquin.

¹⁵Man min tapian nantifi icoinra huafo Asia mai anofoan ua potafo. Ascashocai tsoan afanan ua oin fupaicanima. Ascano Figelo futan Hermógenes nan rafutari ua potafo.

¹⁶⁻¹⁷Onesiforocai ato cuscara inima. Acai uqui oi rafipainima. Ascashu Roma ano noconi. Nanno nocoshon funafafainquin cunu murannoa ua fuchini. Ascashon ua oinyoi ocacainmisi. Ascacun ahuun afofohuunrimain Upa Diosin ramapainoran. ¹⁸Man minrifi tapishara un Efeso ano ipaonitian nanton ua shara huafafainpaoni. Ascano nocon Ifoan noco ichanan huaitianmain Onesiforo shara huacoinpainon.

Jesucriston ahuun yorafo nan ranushumua shara cuscara itiro

2 Timoteon uhuun facushtan Jesucristo ahuun curushhuunooashu min isharatiro chaca huashquima. ²Un futsafori Jesucristohuunoa yoimisi cuscan mirifi man min nicamisi. Ascano nocofunfoan min icoinra huaa cuscan arifi icoinra huafoan ato catonhuun. Min nicamisi cuscan atorifi tapimahuun nanfoan futsaforifi cayacafi tapimasharanonfo.

³Ranushumua shara omitsiscatirofia ahuun niaifoan yoiai cuscan nicasharatiro a yoia cuscacoin aashquin. Nanscarifiai mirifi min no fu Jesucristohuunooashu omitsiscatiro.

⁴Ranushumua sharapan ahuun niaifo ahuunoa unimamapaitiro. Ascana afu ranushumuafoma nucai yonotiroma. Ascashon ahuun niaifoan yonopaiyai cuscan fustisi nicatiro. Nanscarifiai Jesús fusti nocon Ifo icaino arus fusti noco yonotiro. Ascashon noco amapaiyai cuscan non aashquin.

⁵Afanan un iscara un mia tapi-mai. Tsoa futsafo fu cashupai iquisi yonoaifo cuscan nicafain itisharatiro. Ascana itisharayamashocai atirifi shon-ontiroma. Nanscarifiai Upa Diosin noco inansharapaiyai cuscan fipaiquin iquisi ahuun tsain non nicasharatiro noco yoiai cuscacoin aashquin. Ascano itisharashu chipo non aqui nococun noco inansharapaiyai cuscan non fitiro.

⁶Mau yonomisiton fasi curushcain ahuun mau yonoshon ahi ahuun yono finquin tau huashon chipo futsafo inantiro. Nanscarifi aquin mirifi nocon Ifo Jesús curushcai yonosharashohuun mia inansharapaiyai cuscan fiishquin. ⁷Un mia yoiai cuscan shinanhuun. Ascana min shinainton nocon Ifoan min nomuran mia tapimashquin.

⁸Ascacun ointiaquimayahuu Jesucristo naafiacun Upa Diosin funimani. Nan David ahuun funa. Nannori nan tsain shara Jesushuunoa un yoimisi. ⁹Nan un yoiaiton ua omitsisca huamisifo. Ua cunu muran iquimaquin ua yoimisifo isca huaquin, —Min chaca huamiscun non mia cunopan munushiran, —ishon ua asca huamisifo. Ascafiacai Diospan tsain tsoan munushtiroma. ¹⁰Ascashon Diospan tsain nicasharatirofo. Ascaifoan atorifi Diosin catonshquin. Ascacufin nuno cunu muranshon un tunuicain

futsafoan Jesucristo icoinra huanonfo afu ipashcaquin.

¹¹ Un mia yoiyai cuscan iconcain.

Non Jesushuunoashu naashu non afu nipashquin.

¹² Non ahuunoashu omitsiscail.

Ascafia non chipo a futan futsafo iquimashquin.

Non yoiquin isca huaiton, —Jesuscail uhuun ahuamaran, —ishon non yoiaiton

arifi yoishquin norificail non ahuunama.

¹³ Non afanan Jesús icoinra huayamafiaitocail acaail ascarama.

Noco yoiyomisi cuscan afanan shinan futsatiroma.

Yoiyoni cuscan iconcain fusti. Atocail chani yoitiroma.

Ahuun tsain iconcain fusti.

Acaail ointi rananyama.

Afu yonoa cuscan aiton oin Diosin unimail

¹⁴ Nan un mia yoiyai cuscan mifu ichananfo yoifafainhuun nicasharafain ointiaquimanonfoma. Nocon Ifohuunshon ato yoihuu tsain mutsamayamacain fochishmanantananonfoma. Ascailon tsain mutsama yoicaquin ato shinanchacamatirofo. ¹⁵ Uhuun facushtan, Diosin tsain shafatifi oinsharahuu Dios yonosharashoshquin miqui unimanon. Min ascailfin ahuun yonoshomisi shara min iishquicain. Ascailon ahuun tsain iconcain cayacail shara futsafo min tapimatiro. Min ascacun Diosin mia oiainnocail min rafitiroma.

¹⁶ Ascano yorafoan Dioshuunoa yoicoinyamafiaquin ipaitsi tsain mutsama yoiailfoanno atofu iyamahuu. Nan cuscarafoan aton nomuranshon fasi shinanchacaquin finacointirofo.

¹⁷ Nanfoanri futsafo tapimapaiyai cuscan fasi chacacoin. Ascano yorafoan ato nicacanashu aton ointi fasi isincointirofo. Nocon caya

muran coo ichapacoinyashu nantifi nami payocotiro. Nanscarifiai tsain amaquiri futsan yosiahuunoashu yora ichapafoan aton nomuran fucash huatirofo. Ascailshocail afanan icoinra huapaitirofoma. Nan Himeneo yafil Fileto nanscara rafu. ¹⁸ Nan rafutan fail shara funofo. Afanancai Diospan tsain iconcain yoiailfoma. Ascailshon yoimisisifo isca huaquin, —Upa Diosin noco funimanail cuscan man finoan. Afanancai icoinra huafu funitirofomaran, —ishon amaquiri yosiafo. Anori yoiailfoancail nicaquin atrirififain afanan icoinra huacanima. Ascailshon man cachiquiri huafo.

¹⁹ Ascailfa Diosin tsain iconcain. Toquirininhuancail tsoan rafutiroma. Diospan tsain nanscarari tsoancail fiananan huatiroma. Icon yoimisi cuscan nannoricoin. Toquirininhuanqui yora cunuacail tsoan soatiroma. Nanscarifiai Diospan tsain cununi isca huaquin, —Nocon Ifoan ahuun yorafo onancoian. Ascano ahuun yoracoinfoan chaca huamisifo cuscan potatiroforan, —ishon cununi.

²⁰ Nocofunun pui ichapayatun pushu uhuapa shara huaa. Amuran puratofu yafil cuchofo sharashtacoinfo. Ascano futsafo ahuun pushu ano nococun pushu ifoan nan purato yafil cucho sharashtaqun ato pimatiro. Ascailfa ahuun pushu muranri nanno ahuun shihuati aqui chaca potati itiro. ²¹ Ascano mirifi min chaca potacoinyashu nan shihuati chaca aqui potati cuscara itamarocon min nan purato sharashtacoin cuscara itiro. Ascail min Jesús cuscara shara icaino Upa Diosin mia yonosharamapaiyai cuscan min ahuunshon ahuaa futsafo shara huatiro.

²² Ascail pushcofoan chaca huapaimisi cuscan mirifi asca huayamahuu. Nan chacafu huaifoan oin atomaquinoashu ichoriscatahuun chaca huashquima.

Chaca huapaiquimarocon iscarafu fuchipaihuu. Jesús cuscara shara ipaiquin nan icoinra huafain futsafo noicoinfain isharacoinhuun. Futsaforifi Jesús aton chaca soashona aton nomuranshon shinansharaifoan Diosin tanasharapaiyaifo. Nanscarafo fu rafuhuun.²³ Ascataari futsafo tsain mutsama yoitiacanashu fochishmanantanancain samamashta sinatirofo. Ascarafo fu atofu iyamahuu mirifi ato cuscara iishquima.

²⁴Nocon Ifoan ahuun yonomati sharacai fochishmanantanamisi itiroma. Ascataa nantifi yorafo shara huatiro. Ascashon funainquimashta oi tsii huafain nan amaqiri shinainfo ato tapimasharatiro atohuunoa shinanchacanofoma.²⁵ Diospan tsain iconshara nicacasmaifori oi tsii huafain ato tapimasharahuun Diosin aton nomuran shinanma futsaino ahuun tsain iconcoin tapinonfo.²⁶ Ascatacaí afanan amaqiri shinantirofoma. Cayacafi shinantirofo. Ascana Satanasfin nan masharo cunu muran iquimana cuscan ato huamapaimisi ato chaca yonopaiyai cuscan anonfo. Ascafia nan cayacafi Diospan tsain nicaquin finacoianfofin. Nan masharo cunu muran iquimamua cuscara finontirofoquin iishquima.

Jesús oti chaimamain yorafo ahuu cuscara ishquicanicai

3 Un mia tsain futsari yoinon. Ascacun un mia yoiai cuscan min nomuran shinanhuun. Jesús oti chaima ahuara chacacoin finonshquin. Ascana non omitsiscatiro. Ascafia non icoinra huaafo. Noco musu huamapaifainshcani.² Chaca iscarafu huashcani. Futsafo shinantama afiri fusti noicain futsafo noiama icain pui fusti noifain afiri fusti yoimusharacain curafiapaimisi icain roanmitsamisifo icain aton apa yafi ahuua nicacasmamisifo iishquicani fut-

safoan ato shara huashoan cuscan ato, — ¡Aicho! —huayamafain atohuunoa fusti shinanchacaquin. Ascaquicai Diosihuunoa ahuara sharafo shinansharatiroma.

³Tsoa noiamafain futsafoan chaca huaa cuscan futsafo rau huayamai icain pushutifi cahuancacaini yoiti huamitsacahuancacaimisi icain ahuun nomuranshon shinanchacai cuscan shatuyamafain pofucoin icain ahuara sharafo noicasmafain.⁴ Ascataari fuparamitsamisi icain afu rafumisifo fomanquin ato chaca huamisi icain ointi rochitimamisi icain cacapaimisicoin icain ascashofin Dios noicointama afin apaiyai cuscan fustisi shinancani.⁵ Futsafo fu ichananfiaquicai Diosin ahuamamishti atiro cuscan icoinra huacanima.

Ascacun nanscarafo fu iyamahuu.⁶⁻⁷ Ascataari ainfofoan chaca huamisifo cuscaí Dios yoimisifoma ato chaca soashonon. Anoricai itama afananri ahuara chaca futsa futsatapafo huapaicaquin shinanfaimisifo. Ascaquin ato ointi nocofo chaca huamisifo shinancaquin. Ascashon nanscara ainfofoan yoimisifo isca huaquin, —Un tapipai ahuuscashumain un isharatiroquin, —ishon yoifiaquicai Jesucristohuunoa Diospan tsain iconcoin nicafiaquicai tapicoianfoma. Ascana nan yora chacafaan nanscara ainfofo ato pushu muranshon iquimisifo ato tsain shara nicatsa yoiquin. Ascafia ato tsain shara yoiamafiaqui. Ascana ato yoiaífo cuscan fasi amaquiricoín. Ascashon ato iquipaicani.

⁸Nan nocofunufu nan Janes yafi Jambres cuscarafo. Nan rafu Egipcio shointian rafu. Ascana Moisés yorafo Diosin tsain tapimapaiyai cuscan nantianri nan rafutan ato yoini isca huaquin, —Moisés mato yoiai cuscan nicayamacahuun, —ishon yoinifo. Nanscarafoan Diospan tsain iconcoin futsafo nicamapaima.

Ascashon aton nomuran fasi chaca fusti shinanmisifo. Ahua cayacaficai shinantirofoma. Nocon Ifo Cristo icoinra huapaicanima. Ascashon Diosin potacoianfo. ⁹Nan Janes futan Jambres ato amaquiri chaca yosipaiyaifoan tapinifo. Nanscarifi aquin nan chaca huamisifoan ato parapaiyaifoannori tapishquicani. Ascashon tapitirofo nanfoan afi ipaitisicoin shinanmisifocun. Ascacun, — Ahua tapiafomaran, —ishon atohuunoa yoishquicani.

Pablonun ahuun tsain unutaqui Timoteo yononi

¹⁰Ascafia Timoteon min tapia uncai ato cuscarama. Un imisi cuscari man mian tapicoian. Un futsafo tapimana cuscan min nicamisi. Ascashon man min tapia nocon Ifo Jesús ua amapaiyai cuscan nan fusti un apaiyaiton. Min oinmisiri urifi un Jesús icoinra huacoinshon futsafoan amaquiri shinanchacafainocai atohuunshon un shinanchacatamarocon un futsafohuun noicoinquin. Ahuara ahuuscarafiaino un tunumisi.

¹¹Ascashon uarifi omitsiscamamisifo. Un ahua futsa chaca finoainton mificoin man min oinni. Ascaquin uhuun nomuran un nocomisi ua omitsiscahuaifoanno. Ascan un finoan cuscan man min tapian nan Antioquia ano non Iconio ari yafi Listra anoashumain un ahuuscaquin. Ascafia nanfohuunoashu un omitsiscafiaiton nocon Ifoan ua numani. ¹²Icon. Ratoranfo nocon Ifo Jesucristohuunoashu isharapaiyaifo omitsisca huashcani. ¹³Ascano nan yora chaca huamisifo yafi paramisifori chaca finacoinya ishquicani. Futsafo paraifoan atorifi futsafoanri parashcani.

¹⁴Ascafiaifonocai min ato cuscara ishquima. Mia tapimamisifo cuscan yafi min icoinra huacoinmisi cuscan nanscaconrifi huafafainhuun. Nan mia tapimamisifo man min tapicoian. ¹⁵Nan fa-

cushtashon min Diosin tsain shara tapinifoanna. Nanfoan mia shinansharamatiro min Jesucristo icoinra huashu afu ipashquin.

¹⁶Nantifi Diospan tsain cununifo cuscan afin ahuun shinanpan futsafo shinanmana cayacaficoin cunushononfo. Ascano cununi cuscahuunshon noco tapimai ahuamain iconcoin fustiquin. Ascafia non chaca huaiton Upa Diosin tsain cununihuunshon noco tapimatiro non afanan chaca huanonma. Ascan ahua ahuu cuscararan amaquiri non acaitori ahuun tsain sharanun noco cayacafi oinmatiro non tanasharaquin finacoinfain ahuuscashumain non a cuscara shara itiroquin. ¹⁷Ascacun ahuun cunuhuunshonri noco tapimai non itisharashon nantifi ahuun yorafo ahua shara futsa futsatapafo non yorafo huashofafainon.

4Upa Dios futan Jesucriston noco oinfafainni. Nantofin nantifi yora niafo yafi nan namisifori ato yoipacushqui niyoashumain ahuu cuscara imisiquin. Nanrifi chipo nocoqui oshon nantifi yorafo iquishquin. Ascacun un mia cayacafi yonoi ua nicasharahuu. ²Diospan tsain futsafo yoihuu. Ascashuri itisharahuun nantishotapiquin ato yoishquin. A min oian nicapaisharaifoan ato yoihuu. Ascan min oianri nicascaimaifoan nanforifi yoihuu. Ato cayacafi yoisharahuu amaquiri shinanonfoma. Ascashon ahua chaca huaifoan ato shafacafi yoisharahuu aton chaca shatunonfo. Ascatari ato tsain shara yoihuu aton nomuran unimanonfo. Ato oi tsi huashon yoifafainhuun unimasharanonfo.

³Ascacun ato yoisharahuu ratoran shafatacai tsoan afanan Diospan tsain iconcoin nicapaishcanima. Ascatamanfoan nicapaiyaifo cuscan fusti

nicashcani. Ascashon tapimisi ichapafo funafafainshcani Diospan tsaincoinma nicapayai fo cuscan ato yosinonfo. ⁴Ascashocai Diospan tsain cununi cuscan afanan nicapaishcanima. Shunipafo cuscara fusti nicapaishcani. ⁵Asca huafiaifono Diospan tsaincoinma fustisi tanafain. Nan fustiri icoindra huahuun. Min omitsiscaitianri tunuhuu. Diospan tsain yoimisiton ato yoisharamisi cuscacoin ahuun. Diosin mia yonomapayai cuscan nantifi ashosharahuun ahuun yonomati shara ishquin.

⁶Ascano natian uhuunua un mia yoinon. Uncai afanan chai nipatiroma. Ratoran shafata Jesushuunoashu un naicain. Un samamashta mai anoashu Jesús ari cai. ⁷Ascacun nantishotapiquin un Jesús tanasharapaimisi. Ua amapayai cuscacai unumisima. Natian ua yonomapayai cuscan nantifi mun icoinna. Un nantishotapiquin Jesús icoindra huamisi. ⁸Nocon Ifo shara Jesús ua inansharapayai cuscan ua mucushona. Ascashon afin nocohuunua tapicoian. Ascan noco inanshquiain cuscan iconcoin. Nan oaitian afu rafumisifo isharamisifo noco inansharashquin. Ua fusti inanshquima. Tsoan Jesús noicoinquin fasi oinpaifain manasharamisifo atorifi inansharashquin.

Pablonun ahuunua tsain futsa Timoteo yoini

⁹⁻¹⁰Tsain futsari un mia yoi. Demas natian mafo yafi ahuara futsafo yorafo aya cuscan noicoinquin ua potafaini Tesalónica ano man caa. Crescente arifi Galacia ano man caa. Tito arifi Dalmacia ano man caa. Ascacun uqui oriscahuu ufu iishquin. ¹¹⁻¹²Natian Lucas fusti ufu icai. Min uqui oaitian ua Marcosri ihuushohuun. Un Tíquico

Efeso ano nichitan. Ascan min oquin ua Marcos ihuushohuun u futan nocon Ifo yonosharashonon. ¹³Un Troas ano uhuun tsahuuti ashcapari chichia Carpo pushu muran un huayoni. Nantifi oquin ua fushohuun. Uhuun librori un yopai. Ascafia nanfo finonmafain uhuun documentofu un yopacoin. Ua nanfo fushohuun.

¹⁴Asca Alejandro nan ahuun cuno yonomisiton ua fasi chaca huacuscacoin Diosin nan onaintimashqui. ¹⁵Non nocon Ifo Jesushuunua yoimisiton nanto fasi nicacasmamisi. Ascacun mirifi oinfain miarifi chaca huapaitiro.

¹⁶Ascan ua tau huaquin niaifofo ano iyonifo tsoancai uhuunua yoisharanima. Nantifi ratucaquin ua potafaini focaquin. Ascacun Upa Diosin ato onaintimayamapainon. ¹⁷Asca huafiaifoanno nocon Ifo ufu ica. Ahuun curush ua inan un fasi chai ahuun tsain shara uhuun caifoma un yoiaiton cayacaficoin nicasaranonfo. Ascashon nocon Ifoan ua numani masharofu muran ua potanonfoma. ¹⁸Nanscarifi aquin ua chaca huafiaifoan nocon Ifoan nantishotapiquin ua cushusharashquin. Ascashon ahuun unutaqui a icano ua iyoshquin ahuun yorafo fu un isharapacunon. Non ahuunua yoisharapacunon. Nanscari inon.

Pablonun ahuun unutaqui ato tsain shara fomani

¹⁹Ascano Priscila yafi Aquila ua yoisharashohuun. Onesiforo yafi ahuun aforananri ua yoisharashohuun. ²⁰Nan Erasto Corinto ano nituni. Trófimo isinin icaino un Mileto ano nitun huani. ²¹Oi pacuataima uqui ohuu. Ascano Eubulo non Pudente non Lino non Claudia nanfo futan nantifi Jesús icoindra huafoan mia yoisharafo.

²²Nocon Ifo mifu icain. Mia shara huashofafainon mihuun ramapainon. Nanti.

Pablo

Pablonun Tito Cunu Fomani

Pablonun Tito yoisharani

1¹⁻² Unquian Pablo un mia cunu fomai min tapinon. Unfin Jesu-criston ahuun yonomati yafi afu rafumisiquin. Ascashon ua nichini nan Diosin catoanfo un ato tapimanaino Ifo Jesús icoinra huanonfo. Nocon Upa Diosicai chanitiroma. Nantofi ahuara oni huataima yoiyoniquin isca huaquin, —Tsoan uhuun tsain iconcain uhuun facu Jesushuunoa icoinra huaiton unfu ipatiroran, —ishon yoiyoni.

³ Ascan afin yoipaiyaitian nan tsain shara Furunhuunoa ato tapimana. Ascano nocon Numamisi Diosin ua catonshon ua yononi un Jesucristohuunoa futsafo yoinon. ⁴ Tito, un mia nocon Ifo Jesucristo icoinra huamani cuscan min Jesús icoinra huashu min uhuun facu cuscaracoin. Un Jesús icoinra huua cuscan mirifi min nansca huani. Ascacun nocon Upa Diosin futan nocon Numamisi Jesucristo mihuun ramapaicain mia nomuran unimamanon.

Títopan Creta mai ano yononi cuscan

⁵ Un mia Creta mai tomahuan ano nichifaini non ato yonoshoni cuscan min anaitinon. Ascacun un mia yoini isca huaquin, —Nan pushurasifoti cushumisifo catonhuun ichananfo cushusharononfo, —ishon un mia yoini. ⁶ Cushumisi iscarafo catonhuun. Nan nocofunu ishara fusticoimisi cushumisi itiro. Ahuunoa ahuara chaca yoiiaifocai cushumisi itiro. Ahuin fusti ya icain ahuun facufoanri nocon Ifo Jesús icoinra huafo. Ascan tsoancai atohuunoa yoiquin isca huatiroma, —Cushumisiton ahuun facufoan fasi chaca huamisiforan, —ishocai yoitirofoma. Ascanocai ahuun facufo yoitimamisifori itirofoma.

⁷ Ascano nan cushumisiton Diosin yonoshona. Ascashon nan Dios fu tsainti pushu murannofo ahuun yorafa cushushara. Ascacufin nantififain ahuunoa yoisharafa aton cushumisi inon. Ascashu cacapaimisi iyamacain ointi rochitimani iyamacain paumisi iyamacain sutumitsapaimisi iyamacain futsafo parashon ato pui fianmisiricai itiro. ⁸ Ascatarocon iscara cushumisi itiro. Yora shara huashopaimisi icain ahuara sharafo fustisi noifain ahuara ahuuscarafiaino shinanchacatama shinanshara fustimisi icain isharashu Jesús cuscara Diospan tsain shara fusti tanafain. Ascano ahuara amaquirifo futan chacafaan ahuun nomuran shinanchacamapaiyai cuscan atamarocon nan Diosin amapaiyai cuscan fustisi amisi. Nanscarafo cushumisi shara itiro. ⁹ Ascacun Diospan tsain non icoinra huatiroma non iconcain. Non Diospan tsain yoiaiton fasi icoinra huafafainmisi nan cuscara cushumisi shara itiro. Ascashon arifi futsafori nan tsain sharahuunshon aton ointi unimamatiroma. Ascafia futsafoanri Diospan tsain nicacasmaifoan atorifi nan tsain sharahuunshon cushumisiton ato oinmatiroma amaquiri shinainfo cuscan.

¹⁰ Ascashon yora ichapafaan Diospan tsain nicacasmafain nan Dios fu tsainti pushu murannofo cushumisifori ato nicacasmafain. Ascashon tsain mutsama ipaitsi yoiiafo. Nan Moisés yononi cuscan tanamisifo atirififo nanscarafo. ¹¹ Pui fusti fipaicaquin futsafo fasi amaquiri chacacoin tapimacani. Ascacun atohuunshon ahuun yorafoyashon Jesús cachiquiri huafo. Ascacun aton tsain shatumahuu afanan futsafo amaquiri yosinonma.

¹² Nocofunun arifi Creta ano ica, —Nanto inonpacoai yoimisiran, —ishon ahuunoa ahuun yorafa

yomisifo. Ascano nanton yoiquin isca huaa, —Uhuun yorafo Cretafofin chanimisifoquin. Yoina pofu cuscarafu. Piqui fustisi tapiafo. Pitsishunifo icain shanishuniforan, —ishon yoini. ¹³Nan yoini cuscan icon. Ascacun ato cayacafi yoisharahuu afanan chaca huatamarocon Jesús icoinra huacashon tanasharanonfo. ¹⁴Ascatan afanan uhuun caifo Israelifoan aton shunipafo cuscara tanayamafain nan Diosin tsain iconcoin nicacasmamisifoan futsaforifi yonomisifo cuscan nicanonfoma.

¹⁵Ascán ratoran futsa Jesús aton chaca soashona ahuun nomuran shinanshara fustiquin. Nantifi Diosin onihua cuscan shinantiro isca huaquin, —Nantifi ahuarafo sharacoinran, —ishon shinantiro. Ascacia nan icoinra huamafoan aton nomuranshon shinanchacamisifo. Ascashon nantifihuunoa shinanchacamisifo. Aton nomuranshon chacacoin fusti shinanfo. Ascashocai afanan shinansharatirofoma. Tapiafoma ratomain shara iyamarai chacaquin. Ascashon chaca fustisi shinantirofo. ¹⁶—Nonfin Dios tapicoianquin, —ishon yoifiamisifo man acai cuscahuunshon non tapitiro nanfoancai Diosihuunoa tapicoimnisifoma. Ascashon fasi chacacoin fustisi shinancani. Ascaquicai ahua shara huatirofoma.

Pablonun Tito cayacafi shara yosini arifi futsafo yosisharanon

2 Ascano Diospan tsain futsafo yosisharahuu isharanonfo. ²Ascashon nocofunu iyoafofo yosihuu isca huaquin. Ahuara ahuuscarafiaino shinanchacatama shinanshara fustifain isharafo cuscan futsafoan atohuunoa yoisharatirofo icain ascashon cayacaficoin Diospan tsain tapicoinshon icoinra huacoinnafo icain futsafohuun noicoinfain ascatan ahua chaca finoin

omitsiscafiashon tunucoinonfo. Nannori nocofunu iyoafofo yosihuu.

³Nanscarifiayainfo iyoafofori ato yosihuu isca huaquin. Ainfo iyoafofo Jesús tanacoianshu isharanonfo. Ascashucái futsafohuunoari chani yoifoanfainmisi iyamacain paumisi iyamacain. Ascatarocon ahua shara fustisi futsafo tapimashquin. ⁴Ascashon shomayafori yositiro aton funufo yafi aton facufori noisharanonfo. ⁵Ascatancai ahua ahuuscarafiaino shinanchacatama shinanshara fustifain ahua chacafo shinantama aton nomuranshon shara fustisi shinansharatiro icain aton pushu ano yonoshara fustifain futsafo tsain shara fustisi yoiquin ahuun nomuran shinansharatirofo. Ascán nan ainfo iyoafofoan yoiquin isca huaifoannocai atohuunshon tsoan Diosin tsainhuunoari tsain chaca huatiroma.

⁶Ascatarí pushcofori tapimasharahuu ahua ahuuscarafiaino shinanchacatama shinanshara fustinonfo. ⁷Tito mirifi ato ismasharahuu nantifi min acai cuscan shara fustisi huahuu. Min ascaino minhuun caononfo. Min ato yosiaitian cayacaficoin shara ato yosihuu arifi isharanonfo. Ato yosiyanan cashuyamahuu. Cashutama ato yoicoihuun. ⁸Ato cayacaficoin yosihuu isharcainnonfo. Ascano min ato yoia cuscaicai tsoancai min tsain chacacoinran huatiroma. Ascátama mia nicacasmashu rafitirofo. Ascashocai tsoan nocohuunoa ahua chaca yoitirofoma.

⁹Ascán yonomatifo yosihuu aton ifofoan ato yonoai cuscan nantifi nicasharanonfo. Ascashon ato unimamafain ato tafiyamafain. ¹⁰Ahuun ifo ahua onun-tama nansca huaquin ato ifofo oinmatirofo ascaifoan ato icoinra huacoin-

tiro. Yonomatifo ascaifoa futsafoan yoitirofo isca huaquin, —;Oincapon! Nan yonomatifo isharacoinmisi. Nanfoan Jesús ifoacoinnafo. Ascan aton Numamisi Diospan tsain sharacoin. Ascacun norifi ahuun tsain non nicanon, — ishon yonomatihuunshon Diospan tsainhuunoa shinansharatirofo.

¹¹Ascan Upa Diosin nantifi tapimana atohuun ramapaiqui Furunhuunshon yorafoan aton chaca soashotiro afu ipashquin. ¹²Ascano nan tsain non icoinra huaiton nocorifi tapimai non afanan Diosimaisi inonma. Ascashocai non chaca huapaoni cuscan non afanan atiroma. Ahuaraton noco shinanchacamapaiyai cuscacai non afohuunoa shinantiroma. Ascataa ahuara ahuuscarafiaino non isharatiro. Natian Upa Diosin noco amapaiyai cuscan fusti non atiro.

¹³Non nanscara Diospan tsain tanasharashon man non tapia nocon Diosin ahumamishti huamisi nan nocon Numamisi Jesucristo chipo nocoqui oi. Nan oaitian nantifiton oinshquicani nocon Ifon ahuu cuscara sharamainquin nantifi finoncoian. Ascacun non fasi oinpaiquin non manasharai. ¹⁴Nanto noco nashoni non afanan chaca huamisi iyamacain non yoitimamisi inonma. Afanan ahuara chaca nocon ifo itamarocon nan noco imasharacoian cuscan ahuun yorafo non inon. Ascashu norifi a cuscara fasi shara huapaimisi non itiro.

¹⁵Nanfohuunoa futsafo yosihuu. Nocon Ifoan mia yonoa cuscan ranotama min ato cayacaficoi shara yositiro. Ascashon min aton nomuran unimamafain ahuara chaca huaifoa min ato yonotiro afanan asca huanonfoma. Futsan mia yoiquin min ahumaran mia huafiaiton ato nicayamahuu.

Nan icoinra huafoan atirofo cuscan

3Ascano nantifi icoinra huafo ato yoihoo niaifofo nicasharafain yoitimamisifo inonfoma. Ascashon atorifi yoihoo itisharacashon ahuafo sharafo huafafainmisirifi inonfo. ²Ascashon ato tapimahuun futsahuunoa tsain chaca huanonfoma. Ascatan fochishmanantananyamacain futsafohuunoa shinansharafain nantifi yorafo ahuun nomuranfo yora shara huafafainmisi iishquin.

³Norifi nocon nomuranshon non amaqiri chaca shinanpaoni. Ascashu non yoitimacoin icain chaca futsa futsatapafo non huapaiyai cuscan huafain nocon nomuranshon non shinanchaca cuscan nannoricoinri non huapaoni. Nanfo nocon ifo ipaoni. Ascatarifi non iscara ipaoni. Non futsafohuunoa shinanchacafainmisi icain futsafo aya cuscan fianpaitiashu non aqui shinanchacamisi icain non futsafo noicasmafain nofirananri non noicasmatananpaoni. Non nanscara chacafo huapaoni.

⁴⁻⁵Non asca huafiapaonishaqui Upa Diosin nocon Numamisi nocohuun ramapaicain nocohuun noiquin noco numani. Ascashon noco chaca soashoni non afanan chaca ipaoni cuscan inonma. Non ahuara shara huara rafanancai noco numanima. Affin nocohuun ramapaiquin nocon chaca soashoniquin. Noco ointi chocatsa cuscara non funa sharacoin inon. Ahuun Yoshin Sharahuunshon noco ointi oni ocomafain nocon nomuran onihua funa.

⁶Upa Diosin ahuan Yoshin Shara nocoqui nichini noco iquinon. Nocon Numamisi Jesucristohuunoashu nantifi yorafo fu rafucacaini. ⁷Ascano Diosin nocohuun ramapaiquin yoini isca huaquin, —Uhuun facu mia nashoni. Min chaca mia soashoshquin. Ascacufin

natiancai mihuun ahua nuamaran, —ishon yoini. Ascacun norifi non ahuun facufo icaino non afu ipatiroquin.

⁸Nan un mia yoiyai cuscan non icoinra huatiro. Ascan nanfo ato yoifafainhuun. Ascacun un mia yosia cuscan icoinra huua futsafoan futsaforifi shara huashofafainon. Tsoan asca huaifin fasi shara huacoinquin. Ascano aton ointi unimamaquin isharanonfo. ⁹Futsafo tsain mutsama yoitiacanashu fochishmanantanamisifo. Ascatan aton shunifohuunoashuri fochishmanantanainfain Moisés yononi cuscahuunoashuri fochishmamanantanamisifo. Ascacanashu ipaitsi yoinancani. Tsoan anori futsa yoiqui shinansharamatiroma. Afo fu iyamahuu.

¹⁰Ascan futsan ahuun tsainhuunshon icoinra huafo pashcanan huamaiton nan ichananmisifo aton cushumisifoan yoitiro afanan ascanonma. Asca man yoifia afanan ahuun tsainhuunshon ato pashcanan huaiton yoicahuun afanan asca huanonma. Man man yoiqui rafu huafia nicayamafain ato pashcanan huaiton nanscarafo fu afanan iyamahuu.

¹¹Nanscara yoran ahuun nomuranshon

amaquiri shinanchacamisi. Ascashon afiri man tapia a chaca huai cuscan.

Pablonun ahuun tsain unutaqui yoini

¹²Uhuun tsain unutaqui un mia yoinon. Un miqi Artemas iyamarai Tíquico nichiaitian uqi Nicópolis ano oriscahuu. Un nanno oipacutian iishquin. ¹³Ascan Zenas nan abogado yafi Apolos nan min acai cuscan ato ashosharahuun yopaifo cuscan ato inanhuun ahua yopatama fosharatanonfo. ¹⁴Noco yorafo nan icoinra huafo yoihuu shara huafafainonfo. Ascacanashu futsafo yopaifo cuscan ato inansharatirofo. Ascayamaquicai futsafo shara huashotirofoma isharashcaquin.

Ahuun unutaqui ato yoisharani

¹⁵Nantifi ufu icaifoan mia yoisharacani. Nantifi uhuun yorafo nan icoinra huafo mia ari icafo nanfo ua yoisharashohuun. Nocon Ifoan mato nantifi ramapainon. Nanti.

Pablo

Pablonun Filemón Cunu Fomani

Pablonun Filemón cunu fomani

1¹⁻² Uquian Pablo un mia cunu fomaí. Uhuun yorahuan Filemón un fasi mia shinancoin. Man min tapia un Jesucristohuunoa yoifafaini. Ascacun ua cunu muran iquimanifo. Nocon yora Timoteo ufu ica. Arifi mia tsain fomapai. Ascan minfin no futan Jesucristo yonoshomiquin. Nan Jesús icoinra huafo min pushu muran ichananmisifo ua atori yoishohuun. Nocon shafo Apia yafi Arquipori nan Arquipo arifi noco futan Jesucristohuunoa yonoshomisi nan rafuri non ato tsain fomai. ³ Diosin matohuun ramapaiquin. Maton ointi unimamanon. Upa Diosin futan Furumun nocon Ifo Jesucristo mato asca huashonon.

Filemón Jesús icoinra huashu nantifi atohuun noini

⁴⁻⁵ Un nica min nocon Ifo Jesús icoinra huacoinfain min ahuun noicoin. Nantifi ahuun yorafori min atohuun noicoiain-ton un nicaquin un cufiaitian Dios un yoimisi isca huaquin, —¡Aicho! Upa Diosin, Filemón mia tanasharacoianran, —ishon un mihuunoa cufimisi. ⁶ Ascashon un mia cufishomisiri min Jesús icoinra huaa cuscan mirifi min futsafo tapimanaiton arifi icoinra huanonfo. Min asca huaquifin finonmafain Cristohuunoa non aya cuscan min tapitiroquin. Nannori un mia cufishona. ⁷ Uhuun yorashtan min ua noiai cuscan un unimacai unrifi mua uhuun nomuran un fasi unimacoinni. Ascashon min Diospan yorafori shara huafafaini mihuunshon arifi ato nomuran unimanonfo. ¡Aicho!

Pablonun Onesimohuunoa Filemón yocani

⁸ Min Cristohuunoaahu uhuun yorahua. Ascacufin ahuunshon un mia yoipaiyai cuscan ranotama un mia yonotiro. ⁹ Ascafiaquicai un mia yonomapaima. Un fasi minhuun noicoinquin mia yonotamarocon un mia yocai. Ufin Pabloqui natian un anifo. Un Cristohuunoa yoimiscun ua cunu muran iquimanifo. ¹⁰ Ascacun un mia Onesimohuunoa yocai. Nanrifi uhuun facucoin cuscaraquin. Un nuno cunu muranshon un Onésimo Jesús icoinra huamani. Ascashon natian Jesushuunoaahu un ahuun upa cuscara.

¹¹ Ascashon nantocai mia yonoshosharapaonima. Ascafia natian mia yafi ua shara huatiroquin. ¹²⁻¹³ Un Onésimo nitun huanpai ufu inon. Un fasi ahuun noi. Ascashon nichiqui un fasi shinanshquin. Ascan mincai ufu itiro ma nan tsain shara Jesushuunoa futsafo yoishquin. Un nuno cunu muranshon un shinan Onésimo mihuun rafanan ufu itiro u futan yonosharashquin. ¹⁴ Ascafia un mia yocayoataimacai un ahua ra huapaima. Ascashon min ahua ra ua shara huashoain cuscacai un mia curushcain yonotiroma mianmain min apaiyai cuscan fusti min acaitonfin. ¹⁵ Itsairaca Onésimo mimaqui pashcayoni. Ascashu afanan chipo mifu ipashquin. ¹⁶ Un mia yoia cuscan un fasi ahuun noi. Ascano min finacoinquin ahuun noitiro. Ascafia natiancai min yonomati fustisi ishquima. Nanto arifi man Cristo icoinra huaa. Ascacun natian min ahuun yoracoin cuscara.

¹⁷ Ascashon min shinan un mifu Jesushuunoaahu rafumisi. Ascacun Onésimo miqiu nococun min ua shara huacuana nanrifi nanscarifi huaquin shara huahuu. ¹⁸ Mia chaca huacun

iyamarai mia nificun ua tapimahuu un mia inanon. ¹⁹Ascan natian uficoïn un mia cunushoni. Unquian Pablo Onésimo mia nifian cuscan un mia inanshquin. Ascafia man min tapia un mia Jesús icoinra huamani uhuunoashu min Jesús fu nipanon. Ascashu min nifian shinantsa aquin. ²⁰Uhuun yorashtan un mia yoca cuscan ua ashopun. Min Onésimo shara huaa cuscan urifi uhuun nomuran un unimashquin. Jesushuunshon nanscacoïn ua huashopun.

²¹Man min tapia un mia yoca cuscan huafain mian ashoshquin. Paratama min ua ashoshquin. Ascan mia cunushquiain mun tapia min ashquiain cuscan. ²²Tsain futsari un mia cunushoni min tapinon. Min ua Upa Dios cufishomisi afanan un miqúi

nocoshquinon. Ascacun min pushu ano ua cunu futsa itishara huashohuun. Ascan mian cufishona cuscan Diosin nica. Ascashon miqúi ua nichishquin. Ascapainon.

**Pablonun ahuun tsain
unutaquin ato yoisharani**

²³U fu rafumisi nuno cunu muran nan Epafraș mia yoisharai. Nanto arifi Jesucristohuunoa yoiaiton cunu muran iquimanifo. ²⁴Ascano Marcos non Aristarco non Demas non Lucas nanfoan u futan Jesús yonoshomisifo. Ascashon nanfoan mia tsain shara fomapai.

²⁵Nocon Ifo Jesucristo mia cashman shara huashofafainon. Nanti.

Pablo

Jesushuunoa Futsan Hebreofo Cunushoni

Diosin Furunhuunoashu no fu tsainni

1 Uhuun yoramishtichin un mato cunu fomai man tapinon. Upa Diosin noco shunifo yoipaiyai cuscan ahuun tsain yoishomisifo yoiyopaoni ato tapi-manonfo. Namapahuunshon ato yoifain namapan cuscarahuunshon ato yoifain ahuun nai oinmatihuunshon ato yoifain ahuun oicoinin ato yoipaoni. ²Asca hua-paoniflashu natian noco yoipaiyai cuscan Furunhuunshon noco yoia. Furunhuunshon nantifi nai murannofo yafi mai anoafori onihuani. Furun catonni nantifi nai murannofo yafi mai anoafoti ahuuna inon.

³Nanton Apa Diosin cuscaracoin. Noco ismacoin ahuu cuscaramain Apa Diosiquin. Apa shara imisi cuscan arifi nanscaracoin. Furunmun ahuun tsainmansi ahuamamishti huatiroquin. Ascan ahuun curushhuunshon ahuun tsainmansi onihuafofi yonotiro afin apaiyai cuscan anonfo. Ahuun tsainmansi nantifi onihuafofi cushusharafafainmisi. Nanfin nocohuunoashu nani nocon chaca noco soashoshquin non a cuscara shara inon. Ascashu Apa ari cani a futan nantifi iquifafainshquin.

Upan Diosin Furumun ahuun oinmati afu nai muran icafo finoncoian

⁴Afin Apa Dios ahuun Furuncoinquin. Oinmati afu nai muran icafo-cai Upa Diosin furuncoinfoma. Furun Apa Dios fu niaifocoin. Oinmatifocai ascarafo. Ascan ato finoncoian. ⁵Upa Diosin ahuun oinmati afu nai muran icafo-cai yoiqui,
“Man uhuun facunatoncoinforan,”

ato huamisima. Furun fusti yoiqui isca huani,

“Unfin min upaquin. Minfin uhuun facucoinquin,”

ishon Furun yoini. Ahuun oinmati afu nai muran icafohuunoacai anori yoimisima. ⁶Ascashon Furun mai ano nichini yoracoin inon ahuun oinmati nan afu nai muran icafo yoini isca huaquin,

“Nantifi uhuun oinmati ufu nai muran icafoan, uhuun facu Jesús noicoincahuun. ‘Min uhuun Iforan,’ yoicahuun,”

ishon anori ato yoini. ⁷Ascatan ahuun oinmati afu nai muran icafohuunoa yoiquin isca huani,

“Fuu foanriscatiro. Nanscarifiai uhuun oinmati ufu nai muran icafo un ato yoiai cuscan ua ashoriscatirofo. Nanfori chi urumanhuan cuscarafa. Un ato yonoa cuscan yorafo onaintimariscatirofan,”

ishon Upa Diosin yoini. ⁸Ascashon Furu yoiquin isca huani,

“Minfin uhuunfin cacoinnaquin. Mirififin min Diosiquin. Min yorafo iquipacunaca. Min ato niaifocoin icainocai min unupacunacama. Min ato iconcoidin yonosharapacunaca. Min icanori shara fusti ipanaca. ⁹Ascashon minfin ahuara shara fustisi noicoinquin. Ahuara chaca min noicasmái. Ascacufin Diosin, nanrifi min Diosin, nanton mia catonni. Mia unimama cuscaicai tsoa futsan ascara mumisima. Mirus fustiton min nantifi finoncoian. Min ato Niaifocoinran,”

ishon un mia yoini. Uncai mifu rafuafo anori yoimisima. ¹⁰Afanan Upa Diosin Furun yoini,

“Minfin uhuunfin cacoinnaquin. Mirifi min nantififain ato Ifo. Ahuashta oniataima nan maitio yafi nai murannoafoti min onihuaquin tau

huani. ¹¹Sahuuti chocanashucaí afanan shara itiro ma cuyotiro. Nanscarifiaí nantifi maitio yafi nai murannoafori cuyoshceni. Ascafia mincai ascarama. Minfin ipanacaquin. ¹²Sahuuti chocanacun potatirofo futsa funa fiishcaquin. Nanscarifiaí maitio yafi nantifi nai murannoaforan sharafofuma min ato cuyomatiro, afanan mai yafi nai fiananan huashquin afanan funa shara inonfo. Ascan mincai mai yafi nai cuscarama. Mincai fianananpacunacama. Nanscasi min apanacaran,”

ishon Upan Diosin Furun yoini.

¹³Afanan Upan Diosin Furun yoiquin isca huani,

“Min ufu niaifoaitiancai nan mia noicasmafoan afanan mia ahuusca huatirofoma. Minfin nantifi ato iquiniran,”

ishon yoini. Asca anoricai ahuun oinmati afu nai muran icafo yoimisima. Ascashon Furun fusti catonni nantifiton aton Ifo inon. ¹⁴Ascano Upa Diosin nan ahuun oinmati afu nai muran icafo yononi noco cushusharanonfo. Ratoranfoan Jesús ifoancanashu afu ipatirofo. Diosin yononi nanfo ahuun oinmati afu nai muran icafoan ato cushusharanonfo.

Jesús nocohuunoashu nanishaquin noco imapacunaca.

Nanhuunoa shinanfafaicahuun cachiquiri huashcaquima

2 Ascacun nan tsain icocoin shara Diospan Furunhuunoa non nicamisi cuscan noco nomuran non nanucoinfafainon cachiquiri huashquima. ²¡Shinancapon! Diosin nocon shunifo oinmatifo afu nai muran icafohuunshon ato tapimani. Ascafia ato yoini cuscan tsoan nicayamaiton Diosin ato onaintimacoinni. ³Diospan nai oinmatifoan ato yoini cuscan

nicacasmaifoan ato onaintimani. Nanscarifi huaquin Furun nan nocon Ifo Jesús noco yoini cuscan non nicayamacaiyaiton mimacai huaquin noco onaintimashqui. Ascan nantorifi yoini nocohuunoashu chipo nashquiai. Ascashon noco chaca soashonano non afu ipanon. Ascano yoiaiton nicacashon afu rafumisifoan nannori noco tapimani. ⁴Ascatari nanfohuunshon Upa Diosin futsafo ato ismani nanfoan yoinifo cuscan icocoincun. Ascashon tsoan oinyomisifoma cuscara isinincai futsa futsatapafo ahuun curushhuunshon ato caya huapacuni. Ahuun Yoshin Sharapanrifi nanfo ato tapimani yonoshononfo. Ascashon afin ato catonpacuni ahuun yono futsa futsa huaquin yonoshononfo. Ratoranfo catonpai afin ato catonniquin ahuun yono anonfo.

Jesucristo arifi Diosifiashu noco cuscara yoracoin ica

⁵Non mato yoimisi Upa Diosin nantifi oni huanitiacai ahuun oinmatifo afu nai muran icafo yoinima isca huaquin, —Manfin nantifi mai anofoan ato ifo ishquiran, —ishoncai ato yoinima. ⁶Ascacun David yoini isca huaquin, “Upa Diosin, minfin nantifi yorafo onihuaniquin. Ascan noncai ahuama. ¿Ascacun ahuuscai min nocohuun noifain min noco shinanquin min noco cushusharamun? ⁷⁻⁸Ascashon min yononi cuscacoin min oinmati mifu nai muran icafoan noco finonyoni nan min Furun afanan nocoqui nocoaitian. Ascacun min yorafo onihuasharani mia cuscarari inonfo. Ascashon nan min onihuanifotifain ato ifo non iishquin.”

Min anori yonofianicai atirifi yorafoan aton ifo icataima. ⁹Ascan Jesús arifi noco cuscara iyopaoni. Nantian Diospan oinmati afu nai muran icafoan Jesusri fi-

nonyopaonifo. Noco huunoashu omitsis-cacain noco nashoni. Upa Diosin noco huun ramapaiyaino Furun Jesús nantifi manifotihuunoashu nani. Ascano noncai afanan napanacama. Upa Diosin nantifi yorafo yononi ahuunoa

¹⁰Upa Diosin nantifi onihuani ahuunoashu nantifi ica. Ascashon yorafori onihuani ahuun facufo icain afu ipanonfo. Ascacun Furun Jesús nichini nocohuunoashu omitsiscano non afu ipanon. Furun fusti nocohuunoashu omitsiscatiro noco chaca soashoshquin. Nan iconcoin Upa Diosin yononi Furunmun noco omitsiscashoano noco Ifo sharacoin inon. Ascashon Apa Dios icari noco iyoano non afu ipanon.

¹¹Jesuscái ahua chaca huamisima. Ascashon nocori chaca soashona non a cuscara shara inon. Ascashon rafitama nocohuunoari yoiquin isca huai, —Nanfo uhuun yoraforan, —ishon yoitiro. Ascatan Jesús ahuun Apa Dios nanrifi noco Upa. ¹²Nan iconra huafohuunoa Jesús Apa Dios yoiquin isca huani,

“Upa Diosin, mihuunoa uhuun yorafo un yoisharashquin. Un atofu mihuunoashu fanainshquinran,”

ishon yoini. ¹³Ascashon yoiquiri isca huani,

“Uhuun Upa Dios un iconra huairan,”
ishon yoini. Afananri yoiquin isca huani,
“Shinancapon Upa Diosin ua iconra huafo ua inan uhuun facufo inonfo,”
ishon Jesús yoini.

¹⁴Ascano facufo namiyacain imiya. Nanscarifiai Jesús arifi noco cuscara yoracoin cainni. Yoracoin cainnishaquin noco naashoni afanan Satanás noco ifo iyamacain noco namapacunonma. Noco huunoashu Jesús naitian Satanás ahuun curush shatuni afanan noco ahuusca huanonma. ¹⁵Ascano nocohuunoashu nataima yorafo napaicani ratucoinfafainpaonifo. Ascafia nocohu-

unoashu naitian noco numani. Ascano non nashquaihuunoa shinaincai non afanan ratuima. Ascatacai ratu afanan noco ifo itiroma. ¹⁶Ascano man non tapia Jesuscái ahuun oinmati afu nai muran icafo ashoyoi onima. Ascata-marocón Abraham ahuun funafo nan iconra huafofi ato ashoyoi oni.

¹⁷Ascacufin Jesús noco cuscara yorafo ini. Nan non mumisi cuscan arifi muuyopaoni. Ascacun nocohuun ramapaitiro. Nan Apa Diosin yonoa cuscafo amisi noco numashqui. Noco huunoashu nani noco chaca soashoshquin. Ascacun nocohuunoa Apa Dios yoitiro isca huaquin, —Upan, un ato nashoni aton chaca soashoshquin. Ascán nan ua iconra huafo aton chaca soashofain ato rauhuahuu, —ishon Apa yoitiro. Ascashu nocohuunshon Dios cufimisi ni-aifocoin itiro. ¹⁸Nanscarifi aquin Satanás chaca huamapaipaoni. Ascán Jesús omitsiscafiaquicái chaca huamisima. Ascacun nocorifi Satanás chaca huamapayaitian Jesús nocohuun ramapaitiro. Non muumisi cuscan arifi muuyopaoni. Ascashon noco numatiro non chaca huanonma.

Jesufin Moisés finoncoianquin

3 Ascacufin uhuun yoramishtichin matorifi Upa Diosin catonni ahuun yora sharafo icain man afu ipanon. Upa Diosin Furu Jesús nichini no fu ishon ahuun tsain shara noco tapimanon. Ascatan nocon numamisi icain nocohuunshon Apa Dios cufimiscocin. Ascacun maton nomuran Jesushuunoa shinanfafaicahuun. ²Upa Diosin Israelifo tapimapaiyai cuscan tau huaquin Moisés yoiyoni. Ascacun arifi Moisés ahuun caifofo nan yoiyoni cuscan ato tapimani. Ascashu nan Upa Diosin yononi cuscafo Moisés apaoni. Nanscarifi aquin Upa Diosin Jesús catonni ahuunoa ahuun yorafo

tapimanon. Ascashu nan Apa Diosin yononi cuscacoin arifi Jesús acoïnmi.

³Pushu sharahuunoa yoisharatirofofia nan pushu huamisihuunoa finacoinquin yoisharatiro. Nanscarifiai Moisésuunoa yoisharatirofofia nan Jesushuunoaacafin finacoinquin yoisharatirofoquin. ⁴Pushufo ratoran futsan afin oni huatirofia Upa Diosifin nantifi onihuaniquin. ⁵Ascan Moisésfin Upa Diosin oinmatiquin. Upa Diosin ahuun yora nan Israelifo ato yonopaiyai cuscan iquisi Moisés yoiyoni. Ascacun arifi nantifi ato yoinon. Inon pacoai ato yoipaiyai cuscan Moisés tapimayoni ahuun caifori ato yoinon.

⁶Ascacia Jesuscai Upa Diospan oinmatima. Ascata nancairocofin Furuncoinquin. Ascashu ahuun yorafoan ato Ifocoin. Nan Apa yononi cuscan ahuun yorafo cushusharacoinmisi. Ascacun Upa Diosin tapipai nonmain Jesús icoinra huashon noco yoiyotiani cuscan non ratutama manasharaicai nan Jesús afanan oaitian. Ascashu non nanscaoiashu non ahuun facufo ipatiroquin.

**Diospan yorafoan ahuunoashu
aton ointi unimatiro
afanan fucashuni inonma**

⁷⁻⁸Ascan Diosin Yoshin sharapan yoiquin isca huani,

“Upa Diosin mato yoiai cuscan nicasharacahuun. Tsoan istaipama mato shunifo icafotian un atohuunoa tapipaoni uamain nicasharafain ua nicacasmacanicuin. Ascashon nanfoan ua nicacasmaonifo. Ascacun ato cuscara iyamacahuun. Maton ointi mutoyamacahuun. Ascatamarocon Jesús mato yoiai cuscan fusti nicasharafafaincahuun.”

⁹“Maton shunifo tsoan istaipamanoashu icaino yoitimafiafoan funaquima uhuun yono un ato ismapaoni.

Tsoan oinyomisima cuscara shara cuarenta fari un ato ahuamamishi ismasharapaoni.”

¹⁰“Un ato ahuara ismafaiatocai ua tsoan nicapaonima. Uarocon nicacasmaonifo. Ascaifoan oinquin un mato shunifoqui sinapaoniquin. Nantianri un yoini isca huaquin, ‘Nanfoan aton nomuran amaquiri shinanchacamisifo. Ua tanatama. Un ato shinanmapaiyai cuscacai tsoan tapipaonima.’ ¹¹Ascano atoqui sinaquin un yoini isca huaquin, ‘Nan na Israelifoan ua nicacasmacani. Un aton nomuran unimapaoyai cuscacai un ato ashopacunacamaran,’”

ishon Upa Diosin noco shunifohuunoa yoiniquin.

¹²Uhuun yoramishtichin oinfain. Nocon shunifo cuscara iyamacahuun. Maton nomuran man Jesús icoinra huayamashu man chacacoin itiro. Man ascaicai nan Dios ipamisi fu man ipaima. Ascashon man cachiquiri huatiroquin. ¹³Ascatamarocon shafatifi yoinonansharafain noco Ifohuunoa shinanmatanansharafafaincahuun.

Ahuara chacafain noco paratirofo. Ascacia non shinanmasharatanainnocai nocon ointi non mutotiroma. ¹⁴Non tau huaquin Jesús icoinra huacoinni cuscan non nanscasi unuyamashu non afu ipatiroquin. ¹⁵Ascano un rama mato cunushona cuscan afanan mato yoi,

“Upa Diosin mato yoiai cuscan fusti nicasharafafaincahuun. Maton shunifoan Upa Dios nicacasmacani aton ointi mutopaonifo. Ascacun ato cuscara iyamacahuun. Maton ointi mutoyamacahuun. Ascashu yoitimashuni iishcaquima,”

ishon Diospan tsain cununi.

¹⁶¿Ascan tsoafoanmun Dios nicacasmafain ahuun tsain cachiquiri huapaonifoquin? Nantifi nocon shunifo Moisés ato Egipto mai anoashon iyoni.

Nanfoanfin Dios nicacasmaoanifoquin.
¹⁷ ¿Tsoafoquimun Upa Diosin
 cuarenta fari sinaniquin? Ascano
 nanfoanfin Dios nicacasmafain chaca
 huapaonifoquin. Ascaifoan Upa
 Diosin tsoa istaipamashon nantifi
 ato namapacuni. ¹⁸ Tsoacon Diosin
 yoinimun isca huaquin, —Un mato
 nomuran unimamapaiyai cuscacai
 un afanan asca huapanacamaran, —ishon
 yoini. Nan nicayosma shunifo ato yoini.
¹⁹ Ascan Upa Diosicai tsoan icoinra
 huanima. Ascashu Diosin ato iyopai
 anocai tsoa iquinifoma yora futsafoqui
 musucani.

4 Ascano Upa Diosin ato yoini cuscan
 norifi non icoinra huashu non afu ra-
 fucun nocon nomuran unimamatiro. As-
 cacun oinfain. Marifi Diospan tsain man
 icoinra huayamashu mato imashara-
 paiyai cuscan man funotiro. ² Upa Diosin
 nocon shunifo tsain shara yoiquin isca
 huani, —Un mato numai. Mato fu mai
 shara ano ishquin un mato iyoicai. Nan-
 noashu man ufu rafuaitocai afanan tsoa
 futsan mato ahuusca huatiroma. Nan-
 noashu man isharacoinon, —ishon ato
 yoini. Ato yoiyai cuscan nicafishocai
 icoinra huanifoma. Nanscashofin ipait-
 sicoin nicanifoquin. ³ Ascafia non Jesús
 icoinra huacun Upa Diosin nocon ointi
 imasharatiro afu rafucain non ishara-
 non. Ascan nocon shunifocai ascani-
 foma. Ascacun Upa Diosin ato yoini isca
 huaquin,

“Na Israelifoancai ua icoinra huacanima.

Ascaifoanno un atoqui sinaquicai
 mai shara futsa ano ato imapacu-
 nacama anoashu isharanonfo,”

ishon ato yoini. Nannori yoifianishaquin
 Upa Diosin nantifi onihuaquin anaitis-
 hon tununi. Nanscarifiai nantian yafi na-
 tianrifi ahuun yorafo imasharapai afu
 isharanonfo. ⁴ Afanan Diospan tsain cu-
 nuni isca huaquin,

“Siete oshatan Diosin yononi nantifi oni-
 huaquin anaitishon tununiran,”

ishon cununi. ⁵ Ascano Upa Diosin no-
 con shunifo fu rafupaini ato mai shara
 futsa ano imapaiquin anoashu ishara-
 nonfo. Ascafia Diospan tsain afanan cu-
 nuni isca huaquin,

“Un ato imapai aricai un afanan ato ima-
 pacunacama anoashu isharanonfo,”

ishon Upa Diosin yoini. ⁶ Ascano nan-
 nori yoifiani futsafoan chipo icoinra
 huafoan Upa Diosin ato iquimatiro
 afu rafucain aton nomuran unimacain
 isharanonfo. Ascan nocon shunifoan
 icoinra huayamashucan iquinifoma. ⁷ As-
 cano Upa Diosinhuunshon afanan David
 yoini isca huaquin,

“Natian Diosin tsain man nicafiai ma-
 ton ointi mutoyamacahuun. As-
 cashu yoitimari iyamacahuun,”

ishon David yoini. ⁸ Ascashon Josué
 ahuun caifofo aton mai ano iyoni
 nannoashu isharanonfo. Ascafia nan
 maicoihuunoacai Diosin chipo noco
 yoima. Nan Israeli maihuunoa yoiquicai
 isca huacanima, —Natian man ua
 nicasharaquicai afanan man shinancha-
 caima. Ascatarocon maton nomuran
 unimacain ufu man rafucacai shquinran,
 —ishoncai yoi cuanima.

⁹ Ascacufin natiari Upa Diosin ahuun
 yorafo aton nomuran unimamapai
 isharanonfo. ¹⁰ Upa Diosin nantifi
 onihuaquin anaitishon unimayanan
 tununi. Nanscarifiai non Upa Dios
 fu rafuicai non iyopaoni cuscan
 non afanan ascapaitiroma. Non
 ipaoni cuscan nantifi non shatutiro.
 Ascashu non Dios fu rafuaiton nocon
 nomuran unimamanon. ¹¹ Ascacufin
 non Dios nicasharashu a cuscara
 isharacain nocon nomuran unimai
 cuscan non muunon. Ascan nocon
 shunifo yoitimashuni. Diosin ato
 mai shara iquimapaifiaquicai icoinra
 huayamaifoan ato iquimanima. Ascan

noncai ato cuscara ipaima Diosin noco imapaiyai cuscan non funoshquinma.

¹²Upa Diosin nipanaca. Nanscarifiai ahuun tsaincai unupacunacama mutsisipacoin. Ahuun tsainhuunoashu non isharatiro. Nopu cunocoinnin ahuara cashushon amuran non oincointi. Nopu cunocoinfia Diospan tsain mimacaya fasi cunocoin cuscara. Ahuun tsainhuunshon non imisi cuscan yafi non shinanmisi cuscan nantifi noco puashotiro. Ascashon nocon nomuran onancoian. Non shara iyamarai non chaca shinanmisi cuscan ahuun tsainhuunshon noco puashotiro.

¹³Nantifi onihuani Upa Diosin onancoian. Tsoancai otayamafain tsoanricai fomantiroma. Nantifi non amisi cuscan huafain non shinanmisi cuscain Diosin onancoiaiton. Ascan chipo ahuun ointaifi non aqui nocoaitian nantifi non amisi cuscan huafain non shinanmisi cuscan noco puashopacushquin.

**Futsafoan nocon Upa Dios
cufishotiromo. Ascafia Jesuscaifin ato
finoncoianquin. Nantorifi
noco Apa Dios cufishomisi**

¹⁴Ascacufin Jesús Diospan Furun nocohuunshon cufimisi nai muran cani. Nantofin nantifi Upa Dios cufimisifo ato finoncoianquin. Ascashon non yoimisi isca huaquin, —Jesús noco lforan, —ishon non yoimisi cuscacai non cachiquiri huapanacama. ¹⁵Nantifi finoncoian nocohuunshon Dios cufimisi Jesusfin non muai cuscan arifi muyopaoni. Ascan ahuaraton noco shinanchacamapaiyai cuscan arifi nansca huayopaoni. Ascacun nocohuun ramapaitiro. Satanás nan yoshin chacapan noco chaca huamapaiyai cuscan nanrifi chaca huamapaifaitocai anima. Jesuscai ahua chaca huamisima. Nantifi non mutiro cuscan arifi

muyopaoni. Non omitsiscamisi cuscan arifi muyopaoni. Ascacun nocohuun ramapaitiro.

¹⁶Ascacufin Diosiqui ranoquima non yoipaiyai cuscan non yoinon. Non yoiaiton Jesushuunshon Upa Diosin nocohuun ramapaicain noco ashoshquin.

5 Israelifoan aton caifo futsa catonnifo Upa Diosin ato yoipaiyai cuscan ahuunshon ato tapimanon. Ascacun nanfoanrifi Upa Diosin yoipaiyai cuscan nan nocofunhuunshon yoinonfo. Nanrifi ato cuscara nocofunu ini. Ascashon nan catonnifo atohuunshon Diosin yoimisi niaifocoin inon. Nanrifi Diosin yoishomisi futsafoan aton niaifo inon. Moisés ato yononi cuscan Israelifoan Dios fu tsainti pushu muranshon inafo inanpacunifo. Ascashon nan Diosin yoishomisi niaifoan nan inafo ato rutushonaino ahuun imi foaiton oinquin Diosin aton chaca soashoni. ²Nan Israelifoan yorafahuunshon Dios fu cufimisi niaifoan ato asca huashoaitian atohuunri ramapaitiro. Ascafia arifi ato cuscara nocofunu. Ahuun caifofoan amaquiri shinanquin Dios tanasharamisifoma cuscan arifi nansca huamisi. Ascafiaшон chaca huamisifo cuscan nicai arifi atohuun ramapaitiro. ³Ascashon inafo ato rutushotiro Upa Diosin aton chaca soashonon. Arifi chaca huamisi. Ascafiaшон arifi ahuun ina rutuni Upa Diosin ahuun chaca soashonon.

⁴Tsoacai afiri catonmutiroma ahuun caifofoan ato Dios yoishomisi niaifo iishquin. Ascano Upa Diosin Aarón catonni cuscan atorifi catontiro. ⁵Nanscarifiai Cristocai afiri catonmunima yorafahuunshon Dios cufimisi niaifocoin iishquin. Ascataka Apa Diosin catonquin isca huani,

“Min uhuun facucoin natian un mia catoan nantifiton aton Ifo min inon,”

ishon Apa Diosin yoini. ⁶ Ascashon afanan yoiquin isca huani,

“Minfin nan niaifo Melquisedec cuscarauin. Nantofin yorafohuunshon ua yoimisi ipaoni. Ascan mirifi min nanscasi apanacaran,”

ishon Apa Diosin furun Jesús yoini. ⁷ Jesús mai ano iyoashu omitsiscaoni. Ascashu nocohuunoashu naitian oi ashcafinin uaiyanan Apa Dios cufinquin isca huani, —Upashtan, mian numapaiquin mian numatiro un nanonma. Ascafia un apaiyai cuscan huaima nan mian amapaiyai cuscan fusti ua huahuun, —ishon Apa Dios yoini. Ascashon nan Apa amapaiyai cuscan fustisi shinanquin cufiai cuscan nicacoinni.

⁸ Ascashu Diospan facucoinfiashu omitsiscani. Omitsiscafiuquin Apa nicacoinni. Ascashori arifi muyopaoni ahuara ahuuscarafiaino Apa nicacoimpaoni. ⁹ Nocohuunoashu omitsiscafiuquin Apa Diosin yoiyai cuscan nicacoinni. Ascashon yorafo ismani ahua chaca huamisima. Ascashu ishara fustimisi. Ascashu nocon Numamisi sharacoin itiro. A nicasharaifoti Upa Dios fu ipatiroquin.

¹⁰ Ascano Upa Diosin Furun Jesús catonshon yoiquin isca huani, —Minfin nan Melquisedec cuscara iquicai. Ascashon yorafohuunua ua cufimisi niaifocoin min ipatiro ato numashqui. Ascashon nantifi yorafohuunua ua yoimisifo min ato finoncoianran, —ishon Apa Diosin yoini.

¡Oinfain! Man Jesús cachiquiri huaa fasi musucoin itiro

¹¹ Ascan nan rama un mato yoiyai cuscan nanfohuunua un mato paratama shafacafi tapimapaifiainocai man nicasharamisima. Ascashon man funa

tapisharamisima. ¹²⁻¹³ Ascan mancai na rama Diospan tsain nicama. Man man fari ranan nicafiamisishaquicai man tapi sharataima. Man tau huaquin Jesucristohuunua tapini cuscan man man ointiaquimamisi. Ascaquicai man futsafo tapimatiroma. Ascatama mancairocofin futsafo yopaiquin man tau huaquin Jesushuunua tapini cuscan afanan mato tapimanonfo. Ascashufin man facufo cuscarauin. Facushta shoma fusti ayotiro. Shoma fusti acaiton non tapitiro yosiataima. Tushucoincan piyotiroma. Nanscarifiai mancai atirifi Diospan tsain tapisharataima. ¹⁴ Ascan tsoan Diospan tsain shafatifi oinfafainni cununi cuscan aashquin. Nanton tapitiro ahuara shara afainmain ahuara chaca aquimaquin. Nan cuscarafoan fasi paratama Diospan tsain tapi sharatirofo.

6 ¹⁻² Ascan noncai facufo cuscarama. Facufoancan ichapa tapiama. Ascan iyoafofoan paratama tapisharafo. Nanscarifiai non tau huaquin Jesucristohuunua tapini cuscan nan fusticai non shinafainima. Ascasho non tapini non ahuara shara huahuunshoncai noco chaca soashotiroma Upa Dios fu non ipanon. Non tapiniri Dios icoinra huayamashucaí non afu ipatiroma.

Ascatan non unu muran iquimamua nocon chaca soashonano non Jesús ifoashon futsafo ismatirohuunua tapifain nan icoinra huafo futsafo non ato manmanshon cufishotiro Diosin ato yonomapaiyai cuscan anonfo nanrifi tapifain yora naashu funitirohuunuari tapifain icoinra huaforma Diosin ato omitsiscapanacafo muran potashquiai nanfohuunua man non tapiyoni. Ascan afanan noncai tapimamisi yopaima nanfohuunua noco tapimanon. Ascano afanan ascatama noficairocon non paratama Diospan tsain shara tapinon Jesús tanasharashquin. ³ Ascan natian Upa Diosin ahuara futsafo noco

tapimapaiyai cuscan ahuun tsainhuunoa non nicasharon nanscacoïn aashquin.

⁴⁻⁶Tsoan Diospan tsain shara Jesucristohuunoa tapiyoni Furun Jesús aqui nichini ahuun ifo icaino ahuun nomuran mumisi. Ascashori Diospan Yoshin Shara fu rafucain ahuun tsain shara noco cunushoni iconcoïn oinquin ahuun nomuran muumisi. Ascatan Jesús oaitian ahuun curushhuunshon ahua-mamishti tsoan oinyomisima cuscara man aashquaiiri man ahuun nomuran muumisi. Ascan nantifi ahuaara sharafo ahuun nomuran mufiamisishaquin Jesús cachiquiri huacoïnshon nocon Ifo Jesús afanan masta cafisca huai. Ascashon futsafoan Jesushuunoa shinanchacatirofo. Ascaran yorafoancai afanan shinan futsatiroma aton chaca shatushon Jesús ifoashquin.

⁷Shinancapon. Diosin oi fumariaino oian mau fupuatiro yonofa foai sharonon. Ascano mau yonomisifo unimatirofo yono foaisharano pisharashcaquin. Ascacufin na mau Diosin shara huaquin. Nanscarifiai tsoan Diosin tsain nicafafaini isharatiro futsaforifi shara huashoshquin. ⁸Ascafia mau futsan ifoan fanayamaino yono foaitamarocon totoشمoshafosi foaitiro. Nanscara mau chaca foaitiro. Ascashon afanan tsoan fipaiquima coatiro coonon. Nanscarifiai tsoan Diosin tsain nicafafaiyai yoia cuscan atama ahuun tsain cachiquiri huacoïnshon nanscarafo Diosin omitsiscapanacafo muran potashquin.

Non tapitiro non Jesús iconra huashucaï non funotiroma

⁹Uhuun yoramishtichin, un mato na rama cunushona cuscacai un anori matohuunoa shinainma. Ascan mancai ascarama. Un iconra huai mancai nocon Numamisi Jesús cachiquiri huamisima. A tanasharashon nan mato

yoia cuscacoïn man amisi. ¹⁰Upa Diosin icon fustisi. Amaquiri ahuashta shinantiroma. Ascashon mato shinanfaini. Man ahuun noiquin ahuun yorafo man shara huashomisi. Ascaquin man Dios ismai man noiai cuscan. Ascashori man unutama ato shara huafafainmisi. Man ato shara huaa cuscan Upa Diosin mato oiainnocai ointi aquimapacunacama.

¹¹Man yorafohuun noiai cuscan unupacuyamacahuun. Ato shara huafafaincahuun tushcuicaquima. Nan Jesús oai chain natianri Dios yonosharashocoinfaincahuun.

Man ascaifin nan man manamisi cuscan Upa Diosin mato inanshquin. Ascashu man Jesús cuscara shara iishquin. ¹²Ascacun tushcuicaquima nan Diospan yora futsafoan Jesús iconra huacoïnshon ato yoyotiani cuscan manasharamisishacaquin man ahuun Yoshin Shara fiafo aton nomuran unimamanon. Ascan marifi atohuun caocahuun Jesús tanasharacoïnshcaquin.

¹³⁻¹⁴Nocon shuni Abrahamrifi nanscaracoïn ipaoni. Ascashon Upa Diosin yoyoni isca huaquin, —Unfi Diosicoïnquin. Tsoancai ua finontiroma. Urusu fustifin un iconmisisicoïnquin. Uncai chanitiroma. Ascacun un mia shara huaquin ahuaara yoipaiyai cuscan mian iconra huatiro. Ascashon min funafo ichaparasi un mia ato cainmashoshquin. Ascan mincai ato tanan huatiromaran, —ishon Diosin Abraham yoyoni. ¹⁵Ascaiton nicaquin Abraham funaquima mana sharapaoni. Nan yoyotiani cuscan furun Isaac ahua cainni.

¹⁶Ascacufin non tapitiro Diosin nan yoiai cuscacoïn huamisi. Ascan futsan noco ahuaara yoiquin iconra huamapaiyai cuscan nan futsan finoncoiaiton nannoricoïnriifi noco yoiaihuunshon non iconra huatiro. Ascan tsoancai, —

Anorimaran, —ishon fochishmatiroma. ¹⁷Ascacun Diosin noco tapimapai ahuun tsain iconcoin fusti noco yoiquin isca huatiro, —Un mato yoyiotiani cuscan ashofin man ua icoinra huatiroquin, —ishon Diosin yoini. Ascacun non tapitiro noco yoyiotiani cuscan nannoricoincun. Ahuun tsain fiananantiroma. Ascashon yoyiotiani cuscan afanan yoiquin isca huani, —Unfin Diosicoinquin. Tsoancai ua finotiroma. Ascacun un mato yoi ai cuscan man ua icoinra huatiroan, —ishon yoini icoinra huanonfo. ¹⁸Diosin nocon icoinra huamapaiquin nannoricoin noco yoyoni. Ascacun non tapitiro nan shinain cuscan Diosin nannoricoin noco yoiaiton. Man non tapia Diosincai chanitiroma. Noco yoyoni Furun nocoqui nichishquin noco numanon. Ascacun non icoinra huatiro nan yoyiotiani cuscan Furunmun noco numano non afu ipanon.

¹⁹Ascashu fianananyamacain afananricai shinan futsatiroma. Ahuara ahuuscarafiaquicai noco Jesusmaqui imatiroma. Ahuunoashu fusti non nai muran Upa Dios fu ipatiroquin. ²⁰Jesús tauí Apa Dios ari cani. Nannoshon nocohuunoa apa cufishofafaini noco numanon. Ascan Jesusfin nan Melquisedec cuscara noco Dios cufishomisi niaifo ipanacaquin.

Nan Dios yorafohuunshon cufimisi ahuun anu Melquisedec

7 Ascatarifi natian un Melquisedechuunoa mato yoinon. Nanfin Salem pushurasi anofoan aton niaifo iniquin. Nanrifi nantifi yorafohuunshon Dios cufimisi futsafo finoncoian ini. Nanfin Abrahamqui noconiquin. Nan mucu fustiti niaifofo yomutso chacafo ato ichoshon ahuun piaca mafofo yafi futsafoan mafoforifi afanan ato fishotani Abraham oaino nan Melquisedec Abrahamqui fai pochinin noconi ahuun

pushu ano naso curani oaino. Ascashon isca huaquin yoisharani, —Abraham, Diosin mia shara huairan, —ishon yoini. ²Nannori yoiaiton Abraham ahuun mafo yafi ahuun tushuforifi atirifi Melquisedec inancoinni. Tsain futsa *la décima parte* inancoinni. Nan Melquisedec ahuun anu futsafin iconcoin yoifain isharacoinmisiran huanifo. Nan Salem pushurasi muranoa aton niaifocoin ipaoni. Ascano nan Salem onicoinnin tsainmanfin aton nomuran unima sharairan huanifo. Nan Melquisedec ahuun anu futsari nomuran unima sharai niaiforan huanifo. ³Naanfin uhuaomacain upaomari iniquin. Ahuun shunifohuunoacai tsoan tapiyopaonima. Tsoancai cainnitian yafi naitian tapipaonifoma. Aafin Diospan Furun cuscara Dios yorafohuunshon cufinmisi ipanaca.

⁴Uhuun yoramishtichin shinancapon. Nan Melquisedec niaifocoin. Tsoa cuscarama ipaoni. Ascan nan Abrahamfin Israelifoan aton shuni iqui tauniquin. Nocofunu fasi sharacoin. Ascashon Melquisedec ahuun caifoyamafiacun ahuun mafofo yafi ahuun tushu la *décima parte* inancoinni. Ascacun non tapitiro Melquisedec Abraham finoncoian. ⁵Israeli shoco futsafo Leví ahuun funafo. Nanfofin Upa Diosin catonniquin ahuun yorafohuunoa ato cufishomisi inonfo. Nan Levifoansi aton caifohuunshon Dios cufifafainmisi ipaonifo. Ascafia Dioshuunshon Moisés Israelifo yononi cuscan nantifi ato tushufo non ato ahuarafori futsa futsa huaquin nan Leví ahuun funafo la *décima parte* inanpacunifo. ⁶Ascano Diosin Abraham yoyoni ahuun funafo chipo ichapacoin ishquiain. Ascafia Melquisedec Levipan ahuun funayamafiacun Abraham nantifi ahuun ahua futsa futsa huaquin Melquisedec la *décima parte* inancoinni. Ascacun

Melquisedec Abraham yoini isca huaquin, —Abraham, mia Diosin shara huairan, —ishon yoini.

⁷Icon nantifain man non tapicoian tsoan futsafo finoncoinshon ahuun tsainman ato shara huatiro. Ascacun non tapitiro Melquisedec Abraham finoncoian. ⁸Ascacun ahuun caifo Israeli shoco futsafoan. Nan Leví ahuun funafo ahuafo futsa futsa huaquin la décima parte ato inanfianifo nanfo man naamisifo. Ascano arifi Melquisedec Abrahamna futsa futsa huaquin la décima parte fiini. Ascacun Diospan tsain cununi cuscan Melquisedec natian nia. ⁹⁻¹⁰Levipan ahuun funafoan aton shuni Abraham. Ascashon Abraham Melquisedec ahuafo inaintian nantianrifi Levifoan arifi inain cafisca huanifoquin. Nan Abraham Melquisedec inaintiancai ahuun funa Leví caiantai inima. Chipo Abraham ahuun funa Leví cainni. Ascacun non tapitiro Melquisedec fustiton aton shuni Abraham yafi atorifi finoncoian.

¹¹Uhuun yoramishtichin shinan-capon. Upan Diosinhuunshon Moisés noco yononi cuscan yafi Leví funafoan nocohuunshon Dios cufimisifoan noco numatiroanocai Diosin Furun nichicuanima nocohuunshon Apa Dios cufimisi inon. Cristocai Aarón nan Leví ahuun funa cuscarama. Aafin Melquisedec cuscaraquin. ¹²⁻¹⁴Tauí Leví ahuun funa Aarón. Nan Aarónfin yorafihuunshon Diosin cufimisi futsafoan aton niaifo ipaoniquin. Ascan nocon Ifo Jesuscai Leví ahuun funama shoco futsa. Ascashucaí Aarón cuscarama. Nocon Ifo Jesusfin Judápan ahuun funaquin. Nan Levipan ahuun chipocu Judá. Ascano Judápan yorafoanri yorafihuunshon Diosin cufimisifo itiroforan ishoncai Moisés yoimisima. Ascacun non tapitiro Upa Diosin Furun nichini afanan ahuun

yorafo yoi futsanon. Ascatarifi Moisés yononi cuscan fiananan huashquin. Ascashon yononi Judápan ahuun funa Jesús nocon cufishomisi niaifo inon.

¹⁵Ascacun afanan un mato cayacafi yoisharapai. Natian shafacafi man non tapishara Diosin ahuafo futsa yononi cuscan nocon Dios cufishomisi funa Melquisedec cuscara nocoqui noconi.

¹⁶Moisés yononi cuscacoin Leví ahuun funafo fustifin Dios cufimisifo itirofoquin. Ascafia Jesuscai Moisés yononi cuscahuunoashu noco Dios cufishomisi icama. Aafin Diospan curushhuunoashu nipanacaquin. Ascashu noco Dios cufishomisi ica. ¹⁷Nannori David Diospan tsain Jesucristohuunoa cunuquin isca huani,

“Min Melquisedec cuscara yorafihuunshon Dios cufimisi ipanacaran,”

ishon cununi. ¹⁸⁻¹⁹Ascacun non tapitiro Moisés yononi cuscacai non afanan tanaima. Nanfoancai noco ahuusca huatiroma noco imasharanon non Dios cuscara isharashquin. Nanfohuunshoncai nocon chaca soashomisima non Dios fu ipanon. Ascan Jesuscai ascarama. Aafin fasi shara finacoian. Upa Diosin nocoqui nichini ahuunshon non tapinon non afu ipatiro.

²⁰⁻²¹Ascatari Upa Diosin Furun yoini cuscacai Levipan ahuun funafo anori yoimisima. Ascacun Furun Jesús yoiquin isca huani,

“Unfi nantifiton aton ifocoinquin. Un mia yonoai cuscan min nantifi yorafo atohuunshon ua cufimisi ipashquin. Ascashon un mia yoia cuscacai un afanan shinan futsapacunacamaran,”

ishon Furun yoini. ²²Ascan Apa nannori yoinicun non tapitiro Jesushuunoashu non Upa Dios fu ipatiro. Ascano Leví ahuun funafocai ascarafoma. Nanfohuunoashucaí non Diospan yora itiroma. Ascan Upa Diosin Moiséshuun-

shon Levipan ahuun funafo yononi cuscan sharafiashu nan furun Jesús yononi cuscan fasi shara finacoianquin.

²³ Nanfo ichapafofia aton caifohuunshon Dios cufimisifocai ipatirofoma. Nan futsa naitian futsarifi catontirofo arifi aton yorafohuunshon Upa Dios cufimisi inonfo. ²⁴ Ascafia Jesuscai ato cuscarama. Aafin nipanacaquin. Nanrifi noco Upa Dios cufishomisi unupacuyamacain nancasi apanaca. ²⁵ Ascan non ahuunoashu Apa Dios fu ipapaiyaiton nocohuunshon Apa Dios yoifafaini isca huaquin, —Upa Diosin, un ato nashoni aton chaca soashohuun. Ascashon mi ano ato imahuu, —ishon nocohuunoa Apa yoishquin. Ascatan nocohuunoa Apa yoia cuscan nanscacoïn noco huashoshquin non afu ipanon. Ascaicai non funopacunacama.

²⁶ Ascan nan Jesusfin nocohuunoa Dios yoimisiquin. Yoimisi futsafo finoncoian. Aafin Diosin cuscara sharacoïnquin. Tsoancai ahuunoa ahuashta chaca yoitiroma. Aatocai ahua chaca shinanyamafain yora chacafo cuscarama. Ascashon Apa Dios icanoafori finoncoian. Ascashon non yopai cuscarifi noco ashotiro. ²⁷ Yorafohuunshon Dios cufimisi niaifo futsafofiashucaï ascarafoma. Nanfoan shafatifi inafo rutupaonifo Upa Dios ismaquin ato chaca soashonon. Ascashon Upa Diosin aton chaca soashonano futsafohuunoaari nanfoan inafo rutushopaonifo Upa Diosin atori chaca soashonon. Ascafia Jesuscai ato cuscarama. Ato fasi finoncoian. Atocai ina rututiroma aton chaca soashonon. Ascatamarocon nancaïfin nantifi yorafohuunoaashu nashoniquin nocon chaca soashoshquin. Ascano nancaï afanan ahua futsa yopaima noco chaca soashoshquin. Ascashon nan fustiton nocon chaca soashonano non Upa Dios fu ipatiroquin.

²⁸ Ascan Upa Diosihuunshon Moisés yononi cuscan yorafohuunoa Upa Dios cufimisifo non aton niaifofori catonnifo. Ascan nanfofin noco cuscarafokin. Ascashon nanfoanri chaca huamisifo. Shara ipaïfiacaquin samamashta chaca huapaonifo. Ascacun Diosin ahuun tsain yoyoni cuscan Furun Jesús chipo catonni nocohuunshon Dios cufishomisi ipanon. Aatocai ahua chaca huamisima. Aafin shara fusti imisiquin.

**Upa Diosin ahuun tsain futsancaï
anori noco tapimaiyopaonima
cuscan natian noco tapimani Jesús
fustihuunoaashu non afu ipatiro**

8 ¹⁻² Ascan nan Jesusfin Apa Dios niaïfocoin icari afu icaquin. Ascashon non yopai cuscan nocohuunoa Apa yoïpacushquin. Aafin noco yoïshomisi niaïfocoinquin. Nan icaricai tsoa futsan onihuanima. Dios fustiton nanri onihuanima. Nanriashu nocohuunoa Apa fu tsaincaini. Nan ica ari Dios fu tsainti pushu cuscaracoïn. Ascano un mato cunushona cuscan nanfo man shafacafi tapi.

³ Nan nocon yorafohuunshon Dios cufimisi niaïfocoin nantifi ato catonnifo ahuarafo Dios inanfaïn ina rutucashon aton chaca shoashonon. Ascano nocohuunshon Dios cufimisi nan Jesús arifi ahua futsan inanniquin. ⁴ Moisés yononi cuscan Levï ahuun funafosi Israelifoan aton Dios cufimisi itirofo. Nanfoanfin inafo rututirofo aton chaca soashonon. Ascano Jesuscai Levipan funama. Ascashu Jesús nuno mai ano icashucaï nocohuunshon Apa Dios cufimisi icuanama. ⁵ Ascano nuno mai anoshon nan Levï funafoan Dios fu tsainti pano pushu muranshon yonoshopaonifo. Nanoshon ahuun caïfo Israelifo tapimpaicaquin Dios icarimain ahua cuscaroïnquin. Ascafia ascaracoïn tsoan tapiyonima. Ascacun Upa Diosin Moisés

yononi isca huaquin, —Un mia tapi-manai cuscan nansacoin ufu tsainti pano pushu huahuun. Man min shinainmun un mia machi anoshon tapima cuscan nansacoinrifi ufu tsainti pano pushu huahuun. Ascacun yonomisifo tapimahuun nan un mia yoia cuscacoin huanonfo, —ishon Upa Diosin Moisés yononi.

⁶Ascacia Diosin Furun Jesús yononi cuscan nan Moisés yononi cuscan finoncoian. Ascacun Jesús Apa icarishon nocohuunoa Apa cufifafaini nocon chaca soashonano non afu ipanon. Ascacan Levipan funafoancai asca huapaonifoma. Upa Diospan Furun Jesús yoiyotiani cuscacai ato yoimisima. Ascano atorifi yoiyotiani cuscan sharafiashu nan Furun yoiyotiani cuscacainfin fasi shara finacaiquin.

⁷Upa Diosin Moisés yoiyotiani cuscahuunoashu non isharacain ahuara futsa non yopayamatirocucai nan Jesushuunoa ahuara futsa fasi shara finacai noco yoicuanima. ⁸Ascacia Upa Diosin yoini Moiséshuunshon ato yoifianicai tsoa ascacoinmisima. Ascashucaí isharayamacain yoitimacoin imisifo. Ascacun nocon Ifo Diosin yoini isca huaquin,

“Un chipo Israelifo nan Judápan ahuun funafori tsain funa shara futsa un ato yoishquin. Nan un ato sharacoin ashoai cuscan un ato tapimashquin.

⁹Un ato shunifo Egipto anoshon iyoni. Nantianri un ato yoisharani uhuun tsain nicasharaifoan un ato cushusharafafainon. Un ato asca huafiaino uhuun tsain cachiquiri huanifo. Ascaifoan un ato potayoni. Ascacun ato shunifo un yoini cuscacai un ato funafo anori yoishquima. Ascatarocon uhuun tsain shara futsa un ato yoishquin ua nicasharanonfo.”

¹⁰“Un Israelifo yoishquiai cuscacai cunu fustihuunshon un ato tapimashquima. Ascataa aton nomuran uhuun tsain shara nanumafain aton nomuran cunui cafisca huaano. Nan un ato yonoai cuscacoin anonfo. Ascano un ato Upa Diosincoín iishquin. Nanfo uhuun yorafo iishceni.

¹¹Nantiffain ua onancoinshceni. Yora ahuuamafoan ua onainfoanno niaifofoanri nansca huaquin ua onancoinshceni. Ascashon tsoa futsacai uhuunoa aton yora futsafo tapimashquicanima. Aafimain nantifiton ua onancoinyainfoan.”

¹²“Un atohuun ramapaishquin. Chaca huafiainfoan un ato chaca soashofain un ato rau huashquin. Ascashocai chaca huafo cuscan un afanan afo shinanpacunacamaran,”

ishon Diosin yoini. ¹³Ascacun Diosin afanan ato yoini isca huaquin, —Un mato tsain funa shara yoiran, —ishon ato yoini. Ascacan Moiséshuunshon ato yononi cuscacai tsoa afanan yopatiroma. Nan Moiséshuunshon ato yononi cuscan fasi tsain shunicoin. Tsoancai afanan afohuunoa yopaiyaino nan tsain cuyocointiro. Ascashu nanfohuunoa shinanmaquipacunacafo.

**Pano pushu cunu futsa ocu
murancoín Jesús iquitamarocon
Apa Dios icaricoín iquini**

9Upa Diosin Moisés tapimani ahuuscashomain ahuun yorafoan nan na mai anoshon pano pushu muran-shon cufitirofoquin. ²Ascacan amuran-shon Dios cufiti pano pushu cunu rafuya iniquin. Nan cunu taua muran anuqui isca huanifo, —Nuno shara fustisi itiroran, —ishon anunifo. Nan muranrifi faro nia ini. Cuno chashna faca facaitsa tushpacua ahuun shoimishti muran shuni ocapacushon otapaonifo.

Nannori sapa acamaquishon piti ini. Nan sapa camaqui misi sutu huashon huafafainpaonifo. Ascashon Diosin atofu ica cuscan ato oinmashquin. ³Pano cushtopan futsan fupoa cunu ocu murancoin anunifo isca huaquin, —Nuno fasi shara finacoianran, —ishon anunifo. Israelifohuunoo aton Dios cufishomisi niaifo fusti nan cunu futsa muran iquitiro ini.

⁴Nan Dios cufiti cunu muran nantio cuno chashna faca facaitsa sharaishtan puraishica ini. Ascashon nan cufiti camaqui ahuaara coanifo ahuun coin tipoaino nohuu inin sharayacoin inon. Nan coin tipoaino Dios ismapaonifo a cufifafaincaquin. Nannori cashon uhuapa ini. Nan ihui casho cuno chashnanpan puraishacafo faca facaitsa sharacoin ini. Nan cashon muranri tutso chashna faca facaitsa muran misi torumishti anucaquin, —Mananran, —huapaonifo. Nan casho muranri Aarón ahuun poquiti yafi toquiri sapa rafu nanunifo. Nan poquiti casho muran nanuataifoma Upa Diosin charo shachoco onihuariscatani. Ascashon nan toquiri sapa rafuqui Upa Diosin Israelifo yonopaiyai cuscan ato cunushoni.

⁵Ascan nan casho camaqui Diospan nai oinmati ointsa rafu nimanifo. Ato putaon rafutan aton mapo manaon mutiqinanfo. Ascano nan nai oinmati rafuhuunshon Diosin fasi sharacoin ato cushusharamisi ato ismanon. Ascacun nanno anuquin isca huanifo, —Nunoshon Diosin nocon chaca soashonaran, —ishon nan casho anunifo. Ascafia nanfohuunoacai un mato natian paratama yoyotiroma.

⁶Ascashon nan amuranshon Dios cufiti pano pushu ocu murancoin iquisi itishara huacashon nan aton caifofohuunshon atohuunoo Dios cufimisifo cunu umainti cainifo nannoshon Upa Diosin ato yononi cuscan aashcaquin. ⁷Ascano

nan cunu futsa ocu murancoin ahuun yorafohuunshon ato Dios cufishomisi-foan aton niaifocoin arus fusti nan faritifi iqui fustipaoni. Nanno iquicai moipan imimaisi iquipaonima. Ascano moipan ahuun imi foshon ahuaara chaca huamisi cuscan ahuunoo afiri yoimucain ahuun yorafohuunshori yoiaiton Upa Diosin aton chaca soashoni. Ahuaara chaca huafiaquin tapishoma acafo cuscan nanfori soashonon.

⁸Ascacun nanfohuunshon Diosin ahuun Yoshin Sharapan noco shafacafi tapimani nan pano pushu ipaonitian ahuun caifohuunshon Dios cufimisi niaifon fusti cunu osa futsa ocu murancoin iquipaoni Dios fu tsainshquin. Ascano nan cunu ocu murancoin anunifo, —Nuno fasi shara finacoianran, —ishon. Nantiancai tsoan tapiatai inima chipo Jesushuunshon nantifi Diospan yorafo afu tsaintirofo. ⁹Un na rama yoi ai cuscarafohuunoo natianrifi noco nanscara tapimatiro. Ipaoni Moisés ato yononi cuscan Dios fu tsainti pano pushu muranshon ahuaarafo Dios inanfain moifori rutushopaonifo ato chaca shoashonon.

Ascafia afohuunshocai aton nomuran unimapaonifoma. Nanfoancai aton nomuran shinanmapaonima isca huaquin, —Natian Upa Diosin uhuunoo ahua chaca ointiroma. Un natian shara. Un natian Upa Dios fu itiro afu tsainshquin, —ishocai tsoan anori shinantiro ipaonima. ¹⁰Ascan Moisés ato yononi cuscan ahuun caifofohuunshon Dios cufimisifoan ato nansca huashonifo. Ascashon ahuaara futsafori ato tapimanifo. Ahua pifainmain ahuari ayatirofoquin. Ascatan ahuscashurimain muchoquimutirofoquin Diosin ato nicacoinon. Ascafia nanfoancai aton chaca soashocointirofoma. Cristo oataima nannori Diosin ato yoyoni. Nan Cristo naitian ahunoashu man nantifi fianananshara.

Ascanocai Moisés ato yononi cuscan afanan tsoashta yopatiroma.

¹¹Upa Diosin ahuara sharacoin noco yoiyotiani isca huaquin, —Un maton chaca soashoni man ufu isharacoinon, —ishon yoini. Ascano nan Israelifohunshon Dios cufimisi niaifofoancai noco nan yoiyotiani cuscan tsoan ascacoin huatiro ipaonima. Ascafia Cristo mai ano oaitian aficoín nocohunshon Apa Dios cufimisi niaifocoin man ica. Ascashon nantifi ahuara sharacoin noco yoiyotiani cuscan noco ashoshquin. Ascan nan naashu pano pushu ocu murancoin iquitama. Cayacafi Apa Dios icaricoinrocon iquini. Nannocai Diosin mai onihuaní cuscarama. Noco funufoan pano pushu onihuañianifo. Ascan Dios icaricaifin fasi shara finacoianquin. Ahuashatocai ari finontiroma. ¹²Ascan Cristocai chashoanfo futan moipan facufoan aton imi Apa Dios icari fonima. Ascatamarocon afincoín noco nashoaintian ahuun imi foni. Ascanocai Upa Dios icari ahuashta chaca iquitiroma. Ascafia Cristo noco nashoin fustini nocon chaca soashoshquin non Apa Dios fu ipanon. Ascashucaí afanan nanacama.

¹³Ascan ratoran futsa Diosin yoiyoni cuscan ayamashu ahuun yorafohunshon Dios cufimisi niaifo yoitirofo ipaoni. Ascano nanfoan chashoanfo futan moipan ahuun imi fifain iquisi moipan facu coayopaonifo. Ascashon ahuun maapo yafi imi oshon yoraqui fasha fashapaonifo ahuun chaca soashonano Diospan yora shara icashu afu iishcaquin. ¹⁴Nanfo iconfia fasi mimaciaia Cristo noco nashonihuunshon chaca noco soashotiro. Ascashon atocai ahuashta chaca huapanacama. Ascan nan Diosin Yoshin Shara nipamisihunshon Apa yoini isca huaquin, —Upa un atohuunoashu nai. Ascacun uhuunshon min aton chaca soashotiro min yorafo inonfo, —ishon

Jesucriston Apa yoini. Ascan non chaca huamisi cuscan non unuyamashu omitsiscapanacafo muran non cacuana. Ascafia non afanan asca huatamarocon Cristo noco nashonihuunshon non afanan chaca shinanonma. Ascashu nocon nomuran chocatsa shara cuscara itiro. Ascashon Upa Dios nipanaca non yonosharashotiro.

¹⁵Moisés ato yononi cuscan sharafiacucai tsoan nicafafainpaonima. Nantianri nantififain chaca huapaonifo. Ascano nanfoan chaca huapaonifo cuscan Cristo fustiton aton chaca soashotiro. Ascafoancai Moisés ato yononi cuscan afanan ato yonotiroma. Ascacun natian Cristo atohuunoashu nani ato chaca soashoshquin. Nanfin ato Numamisi sharaquin. Ascan Cristo icoinra huafoti Upa Diosin ato yoitiro isca huaquin, —Uqui fucahuun uhuun facuhuunoashu uhuun yorafo iishcaquin, —ishon yoitiro. Nanto noco yoiyotiani cuscan Furunhuunshon noco catontiro ahuun yorafo non inon.

¹⁶⁻¹⁷Natian ahuara futsa un mato tapimapai man tapinon. Noco funun nataima cunutiro isca huaquin, —Un naanomai tsoan uhuun ahuarafo fitiroquin un mato iquisi tapimaiyoiran, —ishon cunutiro. Ascacun ahuun ahuarafo futsa inanpaiyai cuscan nataishoma iquisi nan yoiyomisi cuscan cunushotiro. Ascan nan nocofunu niyoanocai ahuun ahuarafo tsoan fianyotiroma.

¹⁸Nanscarifiai Diosihuunshon Moisés ahuun caifo Israelifo yononi moi yafi chashoanfo rutuaifono ahuun imi fonon. Ascan aton imi foyamainocai ato yoiyoni cuscaoin Diosin ato ashotiroma. Ascacun nan moi yafi chashoanfo rutucashon Dios ismafain tapipaonifo chipo Cristo ato nashoshquiai cuscan. Cristo atohuunoashu nataimacai Diosin aton chaca soashocoinpaonima afu ipanonfo.

19–20 Upa Diosin Israelifo yonoai cuscacantificoin Moisés ato tapimafain ato yononi. Ascashon nantifi ato tapimaqui anaitishon nii uhuapamashta futsan ahuun anu hisopo ahuun ponya uhuapamashta fini. Fishon moipan facun ahuun imi yafi unu osishon nan hisopo ponyamishti pishtanufain chashoanun rani amuran pocotan Diosin yononi cuscacantificoin papio cunuaqui imin fasha fashafain Israelifoquiri imin ato fashacuni. Ascashon ato yoini isca huaquin, —Nan imihuunshon man tapitiro Upa Diosin noco yoyotiani cuscacoin ashunon afu ipatiro. Ascashu non ahuun yorafo itiroran, —ishon Moisés ahuun caifofo yoini.

21 Nanscarifi aqui Dios cufiti pano pushuqui Moisés moipan imi fasha fashafain nantifi amurannofoquiri imi fasha fashani. 22 Nan Upa Diosin Moisés yononi cuscacoin nantificuana ato imin fashacuni ato chaca soashonano isharononfo. Ascan imi foyamainocai Diosin noco rau huacuanama nocon chaca soashoshquin.

Cristo nocohuunoashu nani nocon chaca soashoshquin

23 Dios cufiti pano pushu murannoa ahuarafonnan Dios icaria cuscaracoinfo. Ascan nanfoqui Moisés imin fashacuni shara inonfo. Ascan amuran sharafia nan moifoan aton imifohuunshoncai nocon chaca soashocointiroma. Ascatamaroconnan Cristo nocohuunoashu nai fustinihuunshon nocon chaca soashotiro. Noco nansca huashoano non Dios icari catiro a cuscara shara afu ipashquin. Nannocai ahuashta chaca iquitiroma. Ascatan nannoricai Dios cufiti pano pushu cuscaracoima. Aricairocofin fasi shara finacoianquin.

24 Ascan nan Dios fu tsainti pushufin nocofunufon onihuaniquin. Amurannoa ahuarafonnan Diosin icaria cuscara-

coin. Ascan Cristocai funinaca huatan amuran iquitama. Apa Diosin icaricoironocon cayacafi iquini nocohuunna Apa Dios cufishofafainshquin. 25 Ascan nan ahuun yorafohuunshon Dios cufimisi niaifo pano pushu cunu futsan ocumurancoin arus fusti faritifi iqui fustipaoni amuranshon Dios cufishquin. Ascashon ahuun imicoi ya a muran iquitamarocon inapan imi ya iquipaoni. Ascan Cristocai a cuscarama. Acai faritifi noco nashofafainmisima Dios icari caashquin.

26 Ascamicucui nan Diosin ahuarafonnihuanichain nocohuunoashu omitsiscafafainmisi icuana. Ascafiacai ascarama. Satanás ahuarachacafo aton curush cuyomanaitian Cristofin nocohuunoashu nai fustini nocon chaca soashoshquin afanan chaca nocon ifo inonma. 27 Ascan nantifi yorafo nonnai futsushquin. Noncai nofiri yoitiroma ahuutianmain non naicain. Diosin fustiton yoitiro. Naashu nantifi non aqui nocoaiton niyoshon non amisi cuscacano yoisshquin. Noco yoiano nan Jesús icoinra huafoti afu ipasharatirofo. Nan icoinra huamisifoma ato omitsiscapanacafo muran potashquin.

28 Ascashu Cristo aafiri inanmucain noco nashoin fustini. Yora ichapafohuunoashu omitsiscacai noco nashoni. Ascafia chipo afanan ahuun yorafoqui mai ano nasoshquin. Ascanishaquin nantian afanan nocohuunoashu naima nocon chaca soashquin. Ascatamarocon ratoranfo aqui unimacai manaifoan ato numashqui afu ipanonfo.

10 Diosin Moisés yononi cuscahuunshon non tapitiro Cristocafin noco ahuarashara huashoshquin finacoishquin. Ascacun Moisés ato yononi cuscaicai noco ascacoin huatiroma. Nantorifi ato yononi cuscacannan faritifi ato huunshon Dios cufimisifoan moi yafi chashoanfo rutushomisifo aton chaca soanonfo. Ascano nan Moisés yononi

cuscahuunshoncai ato numayamafain ato imasharamisima Dios fu ipanonfo. ²Ascamicucuai Israelifohuunshon moi yafi chashoanfo ato rutushopaonifo cuscan tsoan unu cuamisima. Ascashon nan Dios tanapaicoimisifori ato chaca soashoshquin fusti huua cuani. Ascashon tsoancai aton nomuran shinanquin isca huaacuanama, —¡Ohuashta! Un chaca huamisiran, —ishocai tsoan anori shinancuanafoma. ³⁻⁴Ascafiacai ascarama. Nan faritifi moi funufo yafi chashoanfo ato rutushonaifotian nan chaca huamisifo cuscan fasi ato shinanmapaonifo. Ascafiarquicai nan inapan imihuunshon tsoan ato chaca soashopacunacama Dios fu ipanonfo.

⁵Ascacufin Criston Apa Dios icariashu mai ano fotoataima iquisi Apa yoiquin isca huani,

“Upan, mincai fuchipaima moipan imihuunshon chaca soanonfo. Ascacun mian chipo yorafoan caya cuscara onihuashoin un mia ufiri inanmunon. Ascashu yorafoti un naashoshquin ato chaca soashoshquin. ⁶Min yorafoan moifo rutucashon cofain ahuara futsafori mia inancaquin. Nan miacoin inain cafisca huamisifo aton chaca soashcaquin. Ascan miancai ascarafo fuchipaima. ⁷Upan, un mi ariashu nuno mai ano fotoa min ua amapaiyai cuscan aashquin. Nannoricoin uhuunoa min tsain cunuyoniran,”

ishon Cristo yoini. ⁸Uhuun yoramishtichin, shinancapon. Cristo Apa yoiquin tau huani isca huaquin, —Upan, Moisés ahuun caifofu yononi cuscacai min afanan nanfo fuchipaima. Ascan nanton ato yonoquin isca huani, “Moi yafi chashoanfo rutuafono aton imi foaihuunshon min ato chaca soashonon,” huani. Ascashon ahuara futsafori mia inanpaifain ina

futsafori rutushon cofain nan miacoin inain cafisca huamisifo aton chaca soashcaquin. Ascano nanfoancai mia unimamatirofomaran, —ishon yoiquin tau huani.

⁹Ascashon afanan yoiquin isca huani, —Upan, un mi ariashu nuno mai ano fotoni min ua amapaiyai cuscan ashquin, —ishon Jesucristo yoini. Ascan Cristo noco nashoni nocon chaca soashoshquin. Ascacun Moisés ato yononi cuscacai non afanan yopaima noco chaca soashonon. Nanfo Jesús man shatumani. ¹⁰Ascashu Apa amapaiyai cuscan Jesucristo afiri inanmucain noco nashoni nocon chaca soashoshquin non a cuscara shara inon. Ascacun noncai afanan ahuara futsa yopaima. Nanton noco nashoin fustini. Ascanishaquicai afanan nanacama.

¹¹Ascan nan atohuunshon Dios cufimisi Israelifoa shafatifi inafu rutupaonifo Upa Diosin aton chaca soashonon. Ascashon nanfoanrifi shafatifi aton yorafohuunshon ahuarafa Dios inanfafainpaonifo. Ascafiarquicai nanfoan ato chaca soashopacunacama. ¹²Ascafiafono nan nocohuunshon Apa Dios cufimisi nan Jesusfin afiri Apa inanmuniquin noco nashoshquin. Ascashu nai fustini. Ascanocai non afanan ahuara futsa yopapacunacama nocon chaca soashonon. Ascan nocohuunashu naacaini Apa Dios ari canu afu nantifiton aton niaifocoin iishquin. ¹³Ascashu nan Apa ari noconitian yafi natianrifi ato manaiyoi nan noicasmaifo Apa Diosin aton curush shatumaitian afanan ahuashta inonfoma. Ascano nantianri Jesús fusti nantifiton aton Ifocoin iishquin.

¹⁴Ascashu afiri Apa inanmuni fusticai noco nashoni nocon chaca soashoshquin. Nan icoinra huafoti non a cuscara shara inon. Ascashocai afanan Diosin nocohuunoa ahuashta chaca

oinpacunacama. Manmain Furunmun noco chaca soashocun. Cristocai ahuashta chaca huamisima. Ascacun norifi non a cuscara sharacoin iishquin. ¹⁵⁻¹⁶Nannori Diosin Yoshin Sharapan yoiquin tau huani isca huaquin,

“Uhuun yorafoan ua icoinra huacun aton nomuran uhuun tsain ato nanumafain aton ointi muranri uhuun tsain cunui cafisca huashquin ua ointiaquimaiyamacai ua tanasharanonfo,”

ishon yoini. ¹⁷Ascashon afanan yoiquin isca huani,

“Man ahuara chaca huamisi cuscan yafi uhuun tsainrifi man nicacasmamisi nanfocai un afanan shinanpacunacamaran,”

ishon Diosin Yoshin Sharapan yoini.

¹⁸Ascashon noco chaca soashofain nanfohuunoa afanan noco shinanshonima. Ascacuai non afanan ahuara futsa inantiroma noco chaca soashonon.

Non Upa Dios fu rafucoinon

¹⁹Dios icaricai ahuashta chaca itiroma. Ascacun Jesús noco nashoni nocon chaca soashoshquin. Ascacun uhuun yoramishtichin, Jesushuunoashu ranotama non Dios fu itiro. ²⁰Ipaoni nocohuunshon Dios cufimisifoan pano cushto pochimua fupuacufaoan nan faritifi iqui fustipaonifo Dios cufishcaquin. Ascafia noncai afanan asca huapacunacama. Natian ahuara futsan funa sharacoin Jesús noco ashoni. Ascashon ahuun caya mastafiotian nan pano cushtopan fashnui cafiscani. Ascacun Jesushuunoashu non Dios icano iquisharatiro. ²¹Nocon Ifo Jesusfin nocohuunshon Apa Dios cufimisi niaifocoinquin. Ascashu aafin nantifi Diosin yorafoan aton Ifoquin. ²²Ascacun non Jesús icoinra huacun nan noco nashonihuunshon nocon ointi funa sharacoin huashotiro. Ascashocai

non chaca huamisi cuscan afanan non shinantiroma nocon nomuran unimacoinon. Ascashon noco nan unu tsosi sharapan nashimana cafisca noco huatiro. Non afanan ahuashta chaca nocon nomuran shinanonma. Ascacan nan iconcain Upa Dios fu rafuashu non afu tsainshquin.

²³Ascac non yoiquin isca huamisi, —Jesús uhuun Ifo. Upa Diosin noco yoiyotiani cuscan noco ashoshquiran, —ishon non yomisi. Nan iconcain. Ascacun ahua futsa shinanyamacahuun. Nan fustirocon shinanfafaicahuun. ²⁴Diosin noco shara huamisi. Ascacun norifi non shinanon ahuuscashumain futsafo non shinanmatiroquin noinantanancain non shara huatananshquin. ²⁵Man man tapia Jesús oti chaima. Ascacun ichanain unupaifafainyamacahuun. Dios cufiyanan ahuun tsainri nicaifain fananshofafaincahuun. Jesushuunoa man shinain cuscan futsafoya yoinonancahuun maton ointi unimashcaquin. Atirificai afanan ichananfafainmisifoma. Ascacun ato cuscara iyamacahuun.

²⁶Ratoran futsafoan tapiafo Jesús ahuunoashu naani ahuun chaca soashoshquin. Nanscara man tapifiashon chaca huariaquin nocon Ifo Jesús cachiquiri huacoincun. Ascarafocai afanan ahuun chaca soashotiro. Jesús fustiton nocon chaca soatirofia nanton man Jesús cachiquiri huacoinna. ²⁷Nanscarafo Diosin ato onaintimacoinshquin. A noicasmamisifocafin fasi onaintimaquin finacoinshquin. Nantianri nan cachiquiri huamisiso fasi omitsiscapanaca. Ascashu Diosin ointaifi nococani fasi ratucoinfiafoan Diosin ato yoiquin isca huashquin, —Umaquinoashu omitsiscapanacafo muran fotacahuun, —ishon ato

yoishquin. ²⁸ Ipaoni yora rafutan iyamarai rafu non fustifain nannorisi futsahuunoa tsain chaca niaifofo yoicaquin isca huapaonifo, —Natocai Moisés noco yononi cuscan acama. Fasi chaca huaran, —ishon yoiaiton niaifoan nicaquin iconcoincun ahuun ramapaitama yononi nan rutumanifo.

²⁹ Ascano nan Moisés yononi cuscan nicacasmamisifo rutumapaonifo cuscan nanscarifi huaquin ratoranfoan Jesús nicacasmamisifocun ato onaintimaquin finacoinshquin. Ascashon nanscarafoan shinanquin isca huanmisi, —Mun nicamisi Jesús ua nashoni. Nan naino ahuun imi foni. Ascashon ua catonni ahuunoashu un Diospan facu inon. Ascan un shinan nanfocai ahuama. Ascacun uncai Jesús icoinra huapaimaran, —ishon anori shinain nantonfin Jesús nicacasmamisicoinquin. Ascara tsain yoiquin Diospan Yoshin Sharaqui tsain chaca huamisi. Ascafia nan Diosin Yoshin Sharapan yorafohuun ramapaiquin Jesushuunshon aton nomuran fianan huashotiro a cuscara shara inonfo. Ascafia nan nicaiyosmashunifocafin fasi ato onaintimaquin finacoinshquiinquin omitsiscapanonfo.

³⁰ Ascan man non tapia Diosin aficoi yoiquin isca huani, —Tsoan futsa chaca huaiton unfin ato onaintimaiquin, —ishon yoini. Afanan Diospan tsain cununi isca huaquin, —Nocon Ifoan ahuun yorafoan chaca huaifoan nanfori Diosin ato onaintimashquiran, —ishon cununi. ³¹ Ascan ratoranfoan nocon Ifo Jesús cachiquiri huashon chaca huari-aifo fasi musucuin. Ascacun nanscarafo nan Diosin nipanacaton achishon ato fasi onaintimacoinshquin.

³² Shinancapon uhuun yoramishtichin. Man tau huaquin Jesushuunoa tapifain man ifo huapaoni cuscari ointiaquimayamacahuun.

Futsafoan mato Jesús tanatima huafiaino manrocon nocon Ifo Jesús man tanasharacoinpaoni. Ascashon mato omitsisca huafiainfono nanscara tunufain man nocon Ifo tanasharacoinmisi. ³³ Ascashon man Jesús tanasharaiton futsafoan ato ointaifi mato roofain mato omitsisca huamisifo. Nanscarifiai man muumisi cuscan Jesús tanamisi futsafo arifi omitsiscaifoan oin atofu rafucain man ato tsain shara yoitiro ato ointi unimamashquin.

³⁴ Jesús icoinra huaa futsafo cunu muran iquimanifo. Ascacun atohuun noicai man atohuunri ramapaiquin cunu muran ato oincai man cani ato shinansharamapaifain aton ointi unimamashquin. Ascan nantianri nan icoinra huamafoan maton mafo onuquin cuyocoinnifo. Mato asca huafiafocai shinanachacatarocon man man tapini Upa Diosin nan icarishon mato ahuara shara finacoianfo mato mucushona nanfocai funopacunacama. Nanscara tapiashu man unimacoinni.

³⁵ Ascacun man Jesús icoinra huaa cuscan cachiquiri huayamacahuun. Man cachiquiri huayamacun Upan Diosin mato fasi shara huashquin. Ascashon mato inain cuscan tsoan ascara shara oinyomisima. ³⁶⁻³⁷ Ascan Diospan tsain cununi isca huaquin,

“Jesús oti chaima. Matoqui samamashta nocoshquin. Nantonfin afin tapiaquin ahuutianmain nocoqui ooshquicain. Ascashu oicai ichaipacushquima,”

ishon cununi. Ascacun man Jesús tanasharai cuscan omitsiscafiain tunucahuun. Unupaiyamacahuun Diosin mato amapaiyai cuscan ashon nan mato yoiyotiani cuscan man fiishquin. ³⁸ Ascashon afanan Diospan tsain cununi isca huaquin,

“Nan un imasharaiton ua icoinra huamisi. Naantofin ua tanasharashquiquin. Ascan tsoan ua cachiquiri huacucui un aqui unimashquimaran,”

ishon Diosin yoini. ³⁹Nanscarafoan Jesús cachiquiri huacoincanashu omitsiscapanacafo muran focani. Ascan noncai ascaina. Ascatama non Jesús icoinra huacoincun noco numa non afu ipanon.

Icoindra huamisifohuunoa

11 Ascan non Upa Dios icoinra huacoinshon noco yoiyotiani cuscan noco ashoataiyamafiacun non icoinra huai. Chipomain noco ashoaiton. Nanscarifiaquin noco yoiyoni cuscan non oiantaiyamafiaqui ahuun tsainhuunshon non icoinra huai. Non nanscara shinanquifin non icoinra huaiquin. ²Ascacun nocon shunifoan Diosin ato yoini cuscan fasi icoinra huacoinpaonifo. Upa Diosin atoqui unimacoinquin atohuunoa tsain shara yoini.

³Ascan icoinra huashon non tapi-tiro Diosin ahuun tsainmansanti nantifi nan mai yafi nai ariafori onihuani. Non ointiro cuscarafohuunocai Diosin ahuafo onihuanima. Ascatama ahuun tsainmansanti nantifi onihuani.

⁴Nocon shuni Abel Dios icoinra huashon chashoanun facu inanquin nan Dioscoin inain cafisca huani. Ascan Diosin aqui unimacoinni. Ascan ahuun ochin Caincai ascara inima. Nan Caín icoinra huayamaitocai nantori inanpaiyai cuscan Diosin fuchipainima. Ascan ahuun ushto Abel icoinra huacoincun ahuunoa Diosin yoiquin isca huani, —Min ua inanshararan, —ishon yoini. Abel man Dios icoinra huashu man naafianicun non ahuun caoaino nocoqui Diosin unimacointiro.

⁵Nocon shuni Enoc arifi Dios icoinra huacoinnashu afu rafucoinpaoni. As-

can nayamafiacun nan icari Diosin ihuiriscatani. Ahuunoa Diospan tsain cununi isca huaquin, —Un Enoc yoiyai cuscan ua nicacoinmisi. Ascacun un aqui unimacoinran, —ishon Diosin yoini.

⁶Ascan non icoinra huayamaquicai non Dios unimamatiroma. Ratoran futsan Dios fu ipaicoinquin icoinra huatiro natian Dios nia. Ascashori tsoan fasi onanpaicoinquin icoinra huaiton naanfin aqui nocoaiton Dios fasi shara huashquiquin.

⁷Nocon shuni Noé arifi Dios icoinra huacoinpaoni. Ascan iquisi Diosin Noé yoiquin isca huani, —Un oihuanrasi fumai faitahuan foran fucuaino asai futsunonfo. Ascacun shashohuan pushu ya huahuun. Min non min ahuin non min facu rafu yafi min fanfanhua rafuya asashcaquima. Un mia yoiyai cuscan huahuun, —ishon Diosin Noé yoini. Ascan tsoancai ascara oinyomisimafia Noén icoinra huafain shashohuan huani ahuun facufo ya asashcaquinma. Nantonfin Dios icoinra huafain isharacoinmisiquin. Ascan nan icoinra huamafocai ascanifoma. Ascatama nanfoan chaca huafafainpaonifo. Ascacun Noéhuunshon non tapitiro icoinra huamisifo isharaifonocai nan icoinra huamafo isharamisifoma. Ascashon Dios fu Noén rafuaiton a cuscara sharacoin imani.

⁸Nocon shuni Abraham arifi Dios icoinra huacoinpaoni. Ascan Diosin Abraham yoiquin isca huani, —Nan un mia iyopaiyaiquiri min catiro. Ascan min cainni anoashu catahuun. Nanno un mia mai inain mina inon, —ishon Upa Diosin yoini. Ascaran tapiataima ini raquiricaimain caiquin. Ascafia nan Diosin yoiyai cuscacoin ani.

⁹Ascashon nan Diosin yoiyotiani cuscacoin icoinra huashu nan Diosin nichian mai ano nocoashu Abraham nan mai futsa aria yora futsa ahuun

caifo cuscarama iyopaoni. Nannoashuri pano pushu tapasi cuscara muran iyopaoni. Ascan ahuun facu Isaac yafi ahuun shota Jacoborifi nanscara muran iyopaonifo. Upa Diosin Abraham yoini cuscan nan rafu nannoricoini ato yoini. ¹⁰Diosin Abraham yononi cuscan nan mai ano iyofiafashon tapipaoni chipo Dios icari afu ipashquiain cuscan. Nanno Diosin nantifi onihuanu sharashtacoinfo nanfori ahuunari ipanaca. Diosin icaricai ahuashta cuyopacunacama. Nanscasi apanaca. Ascacun Abraham manayopaoni chipo nanno afu ipashquin.

¹¹Diosin Abraham yoini isca huaquin, —Min ahuin Sarapan chipo furonanfacu nanushquin. Ahuunoashu min funafo ichaparasi iishquiran, —ishon yoini. Nannori yoifiano Abraham anifoshta ahuin yoshafoshta toosma ini. Ascacun Abraham ahuun nomuran shinanquin isca huani, —Upa Diosin ua yoiyoni cuscan ua ashoshquin. Nantonfin nan yoia cuscacoin huamisi, —ishon Abraham Dios icoinra huani. Ascashu ahuin Sarapan facu caianno Abraham facuya ini. ¹²Ascano Abraham anifoshta afanacai chai nitiromafia ahuun funafo fasi ichaparasicoin. Tsoancai ato tanan huatiroma. Fishifo yafi mai furomishticai non tanan huatiroma. Nanscarifiai Abraham ahuun funafocai tsoan tanan huatiroma.

¹³Nantifi na rama yorafohuunoo mato yoia cuscan afanan atohuunoo un mato yoi. Diosin ato yoiyoni cuscan fiashuma naanifo. Fiataiyamafiaquin Dios icoinra huanifoan chipo fiishcaquin. Ascacun Diosin ato yoiyoni cuscan aton nomuranshon oincain cafiscas unimacoinnifo. Ascashon yoinifo isca huaquin, —Nunocai non ipanacama. Na mai anoashu nan mai futsa aria yora futsa cuscarafu nonran, —ishon yoinifo.

¹⁴Ascan nannori yoiaifoan non tapitiro nanscara yorafu nuno mai ano ipaitama Diosin icari capai afu ipashcaquin. ¹⁵Ascan aton mai ipaoni shinantacani nasopai ari naso cuanifo. ¹⁶Ascan ari nasopaitama Dios icarirocon fasi shinannifo ari nocopaicaquin. Nanfoan tapinifo nanno fasi shara finacoian. Ascashon Upa Diosin nan icari ato itishara huashoano afu ipanonfo. Ascacufin atohuunoo ranotama yoini isca huaquin, —Unfin ato Diosiquin, —ishon yoini.

^{17–18}Afanan Abrahamhuunoo un mato yoinon. Upa Diosin tapipaini Abraham icoinra huafainmain nan yoia cuscacoin aiquin. Ascashon yoiquin isca huani, —Min ina ua rutushotamarocon min facu fustishta Isaac ua rutushohuun, —ishon Diosin yoini. Upa Diosin iquisi tapimani ahuun facu fusti Isaachuunshon ahuun funafo ichapa iishquiai cuscan. Ahuara sharafo Diosin Abraham yoiyoni cuscan ahuun facu Isaachuunshon nantifi ashoshquin tapimaiyoni. Nannori Upa Diosin Abraham yoiaiton ahuun facu fustishtacoinfia rutushon Dios inancuani. Ascano Dios icoinra huacoinshon nan yoini cuscacoin ani.

¹⁹Ascashon ahuun nomuran shinanquin isca huani, —Upa Diosin ua yoia isca huaquin, “Min facu Isaac ua rutushohuun,” ua huaiton un shinan Diosintsii ahuamamishti huatiroquin. Ascan uhuun facu naafiacun Upa Diosin samamashta funimatiroquin, —ishon shinanni. Icon ahuun facu naa cuani. Ascacun Abraham shinanni, —Uhuun facu man naafiacun Diosin funimana shinantsairan, —ishon shinanni.

²⁰Ascan Isaac arifi Dios icoinra huacoinpaoni. Ascacun Diosin ahuun nomuran shinanmani furun rafu chipo ato shara huashononpacoai cuscan icataima yoiyoini.

²¹Nanscarifiai Jacob arifi Dios icoinra huacoinpaoni. Ascacun nataima Diosin

ahuun nomuran shinanmanai cuscan ahuun shota nan Josépan facu rafu Diosin ato shara huashononpacoai cuscan ato yoini. Ato yoitan ahuun poquitiqúi cocusamushon Dios cufini.

²² Ascan José arifi Dios icoinra huacoinpaoni. Ascashon natichaima ahuun yorafo yoiquin isca huani, —Chipo Upa Diosin nocon funafo nan Israelifo Egipto anoshon ato iyoshqui. Focaquin uhuun shaofori foshcaquin. Nan man icaino afanan ua mai huashcaquin, —ishon ato yoiyoni.

²³ Moisés apa futan ahuari Dios icoinra huacoinpaonifo. Moisés cainyaintian apa futan ahua oianfo aton facu sharashtacoin ini. Ascashori tapinifo Moisés nocofunucoiainian Upa Diosin yonosharashoshqui ai cuscan. Ascacun Egipto niaifoan ato yononi Israelifoan aton facu yomumishti nantifi rutunonfo. Ascfaiainocai nan Moisés apa futan ahua ratuquimarocon Diosin icoinra huashon oshu rafu non fustitan aton facu onunifo niaifoan ato Moisés rutumanonma.

²⁴ Ascashon Moisés arifi Dios icoinra huacoinpaoni. Egiptofo futan ahuun caifofo atirififain shinanpaonifo Moisés Faraón ahuun chata. Ascacun Faraón facu shomayatón ahuun facuran, huapaonifo. Ascfafia Moisés nocofunucoiantian Dios icoinra huashon ato yoini isca huaquin, —Uncai niaifon Faraón ahuun chatama. Ahuun facuricai uhuun uhuacoinmaran, —ishon yoini.

²⁵ Ascan Moisés aafin tapini Egiptofo niaifo icashu fasi isharacain arifi ato futan fari ranan unimacain chaca huatiro. Ascfaiacai Moisés ascapainima. Ascapaitamarocon shinanquin isca huani, —Uncai Egiptofo futan chaca huapaima. Ascatama uhuun caifo nan Diospan yorafo omitsiscaifo cuscan urifi un atofu omitsiscairan, —

ishon shinanni. ²⁶ Ascashon tapiyopaoni chipo Cristohuunoashu omitsiscafiashu Upa Dios ari nocoaiton ahua sharacoin inanshquin afu ipanon. Ascacun Egiptofo ato ahua ichapa fiapaiquin ato fia cuani. Ascfaiacai anori shinantama shinanquirocon isca huani, —Un Cristohuunoashu omitsiscacun ua fasi imasharatiro. Ascan un Egipto anoashu ahua ichapayatirofia nanfocai uhuuna ahuamaran, —ishon shinanni.

²⁷ Ascan Dios icoinra huafain Egipto anoashu ahuun caifofoya Moisés cani. Egiptofoan aton niaifo aqui sinafiainocai aqui ratutama nan niaifoan ahuun mai anoashu cani. Dios tsoan ointromafia Moisés mupaoni Dios afu rafucoin. Nan oincoin cafisca huapaoni. Ascashon nan Diosin yononi cuscan huaqui unupaonima.

²⁸ Ascan Egipto anoashu Israelifo foatama iquisi Diosin Moisés yoiquin tau huani isca huaquin, —Min caifofo yoihuu chashohuanun facu rutunonfo. Ascashon ahuun imin aton pushuti ahuun caincanti ocuma rafu yafi amanaonri raishaquin futsanonfo. Man asca huacun Diospan nai oinmatin Egiptofoan aton facu iyoafofo namaitian mato facufo finonmanon nanonfoma, —ishon Diosin yoini. Ascacun Moisés arifi nan Diosin yoiaiton nica cuscan icoinra huashon ahuun caifo Israelifo yononi. Ascanocai Israelifoan facu iyoafofo fustishta naanima.

²⁹ Ascacun Israelifoan Dios icoinra huanifo. Ascan nan unuhuan anunifo isca huaquin, —Unuhuan Oshinran, —ishon anunifo. Ascashon nan unuhuan oshin pocufainifo. Upa Diosin unuhuan nushmancayan mai muto sharacoin ato huashoriscatanaino Israelifoan pocufainaifoanno ato cachiori Egiptofoan ato rutupaiquin ato mufainifo. Arifi ato futan pocupaicaquin. Ascashu man

nushmancayan caiyainfoan Diosin atoqui unuhuan tiiantanaino asai futsunifo.

³⁰Ascashon Upa Diosin Israelifo yononi pushurasi ahuun anu Jericó cachiori siete oshatan tarati huayacunonfo. Nan pushurasi cachiori toquiri cunu fasi cuyacoin masoa cunuacua ini. Ascan Israelifoan ahuun unutani cahuacuainfoanno nantifi toquiri sapa cunuacuafo paoinqiran ishon Diosin ato yoini. Ascacun nan Diosin ato yoia cuscan icoinra huafoan nanscacoian cunufo paoinqi futsunifo.

³¹Ascan nantifi Jericó anofo nai futsunifo. Ascacia nan Rahab ainfo furoma fusti ahuun yorafoya nanima. Ahuun caifoancai Dios icoinra huanifoma. Arus fusti Dios icoinra huacoinni. Ascan Jericó anofoan aton toquiri cunu paoincataima. Israelifoan ato niaifo Josué onanti huamisi rafu Jericó ano ato nichini atohuunoa tapishquin. Nan onanti huanmisi rafu Rahab ahuun pushu muran ato iquimani ato shara huaquin. Ascacuai ahuun caifo rutucaquin Rahab rutunifoma.

³²¿Ascán ahua futsamun un mato yoitiroquin? Yora ichapafoanri Upa Dios icoinra huapaonifo. Nanfohuunoa un mato yoipaifiaquicai un mato yoiqi nocotiroma. Nan Gedeón non Barac non Sansón non Jefe non David non Samuel non Israelifo Dios yoia cuscan yoimisi futsafohuunoari un mato yoipanan uncai yoiquin nocotiroma. ³³Ascashon nanfoan Dios icoinra huacashon ahuun ranushumuafu yononifo ato noicasmaifo rutunonfo. Ascacun ato noicasmaifo rutuqui finconcoinnifo afanan ato ahusca huanonfoma. Atirifi niaifo ishon ahuun yorafo cushusharapaoni isharononfo. Diosin ato yoyoni cuscan fiicoinnifo. Ascano atiri nan icoinra huamafoan ato masharofu muran potafiacun Diosin masharofu cotushcuru imano ato ahusca huanonma.

³⁴Ascan atirifi niaifo chacapan futsafo yonocun ato chi uru muran potamafiafo Diosin ato cushushara coinni coononfoma. Atirifi ato nopun rutupaifiaquicai tsoan ato anima. Ascano atirifi shaca fuacai isininfiaifoan Diosin ato mutsismani. Ascanocai nan ato noicasmaifoan ahuun ranushumuafu atoqui fufiaifoan nanfoancairocon Diosin curushhuunshon ato ichonifo ato ahusca huanonfoma.

³⁵Ainfofoanri Dios icoinra huacun aton yorafo man naafiacun Diosin ato funimani afanan ninonfo. Ascano futsafoanri Dios icoinra huacoinnafoan nan icoinra huamafoan ato omitsisca huanifo nan naifotian. Ascashon ato yoiquin isca huanifo, —Man Upa Dios potaiton non mato ahusca huaima man casharatanon. Asca man Dios potayamaiton non mato rutuiran, —ishon ato yoinifo. Ato asca huafiafoancai tsoan Dios potapainima. Ascacun ato rutunifo. Ato rutuafotaima shinanquin isca huanifo, —Noco rutufiafo Upa Diosin samamashta noco funimatiro non afu ipasharanon, —ishon shinannifo.

³⁶Ascano icoinra huaa futsafoquiri atoqui cashu mutsamacain fichi ato coshafain atirifi cunopan munushfain onushfain ato cunu muran iquimanifo.

³⁷Ascashon atirifi toquirinin tsacaqui ato rutufain atirifi nisatinin ato shatufain nopurifi ato rutunifo. Atirifi ahuuomafoan chashoanun fichi sahuuti huasho sahuunifo. Ato omitsisca huaquin nansca huanifo. ³⁸Ascashu tsoan istaipama ano yafi machi ano non mahua quini muran non mai quini muranri iquifaifainifo. Ascan nan icoinra huafoan icoinra huamafo shara huafiafashon copiquiri ato fasi chaca huafafaipaonifo. Ascan sharafo cutsi Diosin ahuun yorafoya ato ima.

³⁹Ascashu nanfo omitsiscafiacaquin Dios icoinra huacoinpaonifo.

Ascacun Diosin atohuunoa yoiquin isca huani, —Nafaoan ua icoinra huacoinnafo. Ascacun un atoqui fasi unimacoinni. Omitsiscafiaacani fasi isharacoinmisiforan, —ishon Diosin atohuunoa yoini. Ascfiaquicai Diosin ato yoyoni cuscan tsoan fiatai inima. ⁴⁰Ascashon Upa Diosin ato manamayopaoni. Ascacun norifi non icoinra huashu non atofu Jesús icari nocoshquin. Nantianri yora fusti cuscara non iishquin a cuscara shara noco imaino. Ascano unimaquin nanfocai no fu ahua futsa afanan yopapacunacafoma.

Non Jesushuunoa shinanfainon

12 Ascacac noco shuni ichapafohuunoa rama non nica. Nanfoan Dios icoinra huapaonifo. Ascacun norifi non atohuun caononcahuun. Ascashon ahuarashta noco nitumapaiyai cuscan nanfo non cachiquiri huacoinnon. Ascatan ahua chacafoanri samamashta noco curushcain chaca huamapaitiro. Nanfori non cachiquiri huacoinnon Diosin noco amapaiyai cuscan fustisi huashquin. Ascacun funaquima non ashofafainon.

²Ascacun non Jesús fusti shinanfainoncahuun. Nanfin noco Ifocoin noco tapimamiscocoinquin. Ascacac nanton noco ismaquin tau huani ahua ahuuscarafaino non Dios icoinra huacoinnon. Ascashon Apa yoia cuscaquin huacoinpaoni. Ascacun norifi non ahuan caononcahuun. Ascashon nan mastacaquin yorafoan ointaifi rafini huanifo. Asca huafiaifoanno fasi omitsiscafiaquin tunucoinni manmain tapiashu chipo noco Numamisi icain. Nanscara tapiashu fasi unimacoinni.

³Yora chacafoan fasi chaca huafainfoan tunucoinni. Ascashu nocohuunoa omitsiscani cuscan man shinanquicai matorifi omitsisca huafotian man

shinanchacayamafain man ointi mutotiroma. Ascaquicai Diosin mato amapaiyai cuscan man unutiroma.

⁴Curushcain maton nomuranshon man chaca shinanquin man potapaifafainmisi ointiaquimashon chaca huashquinma. Man asca huafafainaino Jesucristo nocohuunoa shu naani noco chaca soashoshquin. Ascacac mancai ascamisima. Ascacamarocon shafatifi curushcain man chaca shatufiashucai Jesús ini cuscan tsoa nataima.

⁵⁻⁶Ascfia nan noco yoia cuscaquin non ayamaiton oinquin Upa Diosin nocohuun noiquin noco onaintimatiro noco tapimashquin. Ahua futsa shinantama nancairocon non tanasharanon. Ascashon nantifi ahuan yorafo ato nansca huashoan. Ascacun nanfoan tapinonfo Diospan facufocun. ¿Man man ointiaquimanamun Diosin maton nomuran unimamapai man ahuan facufocun mato tapinonfo? Ascacac ahuan tsain cununi isca huaquin,

“Uhuun facushtan unfin min Ifocoinquin. Ascacac un mia onaintimati min tapinon afanan mian tanasharanon. Ascacac nan mato onaintimaitian tapicahuun afanan ascashcaquima. Mato asca huaitian mato nomuran shinanchacayamacahuun. Mato cayacafocoin tapimapaiquin,” ishon cununi.

⁷Upa Diosin mato tapimapaiyai cuscan funaquima tapicahuun. Ascashu omitsiscafiaquin shinanchacamarocon tunucoincahuun. Ascacac omitsiscaquin man tapitiro man Diospan facufo. Apafoan ato facu tapimatirofo cuscan nanscarifiaquin Upa Diosin noco cayacafi tapimani. ¿Rato facumun apan onaintimatiromaquin tapimashashquin?

⁸Nantifi facufoan aton apa ato onaintimaiton man muumisifo. Nanscarifiai Upa Diosin noco tapimayamainocai

non ahuun facucoin iyamacain nonricai ahuun yoracoinfo itiro.

⁹Nocon upafoan non facufocun noco onaintimapaoni. Ascacun non atohu-unoa shinansharafain nonrifi ato nicacoinmisi. Ascan nocon Upa Diosin noco onaintimaiton non tunuquin finacoin-tiro. Ascashon noco tapimapaiyai cuscain non fasi unimacain non isharatiro.

¹⁰Nocon upafoan afi shinanshara cuscan aton facufo onaintimamisifo a nicasharanonfo. Ascan non yosiaitiancai afanan noco asca huamisima. Nanscarifi aqui Upa Diosin cayacafi fustisi shinanquin noco shara huapaiquin noco onaintimamisi non a cuscara shara inon.

¹¹Nan icon noco onaintimaitiancai non musharatiroma. Non isincoin mui non pashapaitiro. Ascashiashon chipo ointi nocoshon non shinantiro Diosin noco tapimasharapaiqui nocon nomuran unimamafain Furun Jesús cuscara shara noco imai.

Non Dios nicasmai fasi musucoin

¹²Ascacun ahuara ahuuscarafiaino shinanchacayamacahuun. Upa Diosin mato tapimapaiyai cuscan nan fusti tapicahuun. Ascashon Jesús tanaquin unupaitama nicasharafafaincahuun. Ascadari ahuun tsain sharaquin mutoyamacahuun.

¹³Ascashu cayacafi isharacoincahuun Jesús tanasharashcaquin. Man ascaiton oin nan iconra huasharafoma matohuun caopaitirofo Jesús cuscara shara iisharashcaquin.

¹⁴Ascacun fochishmanantan-paitamarocon nantifi yorafo fu isharapaifafaincahuun. Ascadari Jesús cuscara shara ipaifafaincahuun. Ascan tsoa Jesús cuscara shara iyamaino nantocai nocon Ifo oinnacama. ¹⁵Upa Diosin nocohuun ramapaiquin Furunhuunshon noco shara huafafainmisi. Ascacun oinfain Diosin noco shara

huapaiyai cuscan huafafaincahuun funoshaquima. Ascadari oinfain mato ointi mutoyamacahuun. Ascan mato nomuran man mutocacaiquin futsafori man chaca huamatiro arifi nanscara inonfo.

¹⁶Ascatan maton ahuinma fu iyamacahuun. Ainfofoan maton funuma furi iyamacahuun. Ascashon Diosin mato inanpaiyai cuscan fiicasmaquima nancairocon fiicahuun. Ascashu Esaú ini cuscan ayamacahuun. Aatocai Diosihuunoa shinanpaonima. Diosin Esaú inansharapaifaiton fasi fonicoinquin ahuun ushto inanni ahuun rafanan tushu fiishquin. Nan piai fustihuunshon nantifi Diosin inanpaiyai cuscan funocoinni. Ascacun marifi ascayamacahuun. ¹⁷Man man tapia apa inansharapaiyai cuscan fipaifiaquin finima. Ascashon apa yocaquin isca huani, —Upashta, mian inanpaiyai cuscan ua inanpun, —ishon uaishofiaitocai inannima man main chipocuton fiamacun. Ascacun oinfain Diosin mato inanpaiyai cuscan maton chaca man shatuyamashu marifi man Esaú cuscara itiro. Ascashon Diosin mato inanpaiyai cuscan man funocointiro.

¹⁸Upa Diosin noco shunifo yononi cuscacai mato yonomisima. Ato yoini machi ahuun anu Sinaí tunanman fotanonfo. Nannoshon ahuara futsa ato yoishquin. Ascashu nan ato yoia cuscan nocoafono Upa Diosin oi uhuapacoinin ato yoinquin isca huani, —Nan machi ano mapuyamacahuun. Man mapuashu man nariscairan, —ishon ato yoini.

Nantianri nan machi ano chi urumanhuan oinfain shafatafia nannori faquishi-huancoin icain ninhuunhuan yafi cana piishicain ¹⁹⁻²⁰manuti fasi chaan chaan icain Diospan ahuun oi uhuapacoinin ato yoiyai cuscan nicacani fasi ratu-coinnifo. Ascacun Moisés yoinifo isca

huaquin, —Non afanan Diospan oi nicapaima. Ipaishoma non nariscatiro. Ascan Upa Diosin noco yoiquin isca huua, “Mato inafó machi ano mapuaifoan toquirinin tsacacahuun naanonfo,” ishon noco yoia. Ascacun Dios yoihuu noco yoipaiyai cuscan noco yoitama miarocón yoiquin tau huanon. Min chipo noco yoitiro. Aafin noco yoiaino non nariscatiroquin, —ishon Israelifoan Moisés yoinifo. ²¹ Moisés arifi oian cuscan ato yoini isca huaquin, —Urifi un fasi ratucóin taritari iquinran, —ishon yoini.

²² Ascafia mancai Dios fu tsainpai na machi Sinaí ano man oima. Ascataka nan machi Sión ano man cai. Nan Jerusalén futsa Dios icari. Ascan nan Diosin ipamisi. Nannoashu ahuun oinmati afu nai muran imisifo ichanancashon Dios shararan huafafaincani. Nan ahuun oinmatifocai tsoan ato tanan huatiroma fasi ichapacoinfo. ²³ Nannori nantifi Jesús icoinra huafo afu icafo. Ascan nan Dios icari aton anufo cunupacua afu ipanonfo. Ascacufin marifi man Diosiqui oquin. Ascan nanton yoishquin ratotomain icoinra huacoinnashu afu ipanaca iyamarai icoinra huamisimaquin. Ascashu icoinra huashuma afu ipanacama. Nan icoinra huafotisi ato a cuscara shara imai chaca huamisima cuscara inonfo.

²⁴ Ascan man man Jesusqui fua. Nanton noco nashoantaimacai tsoa futsan noco nashonima. Ascacun natian ahuunoashu non Dios fu ipasharatiro. Noncon shuni Caín ahuun ushto Abel rutuni. Ascacun Upa Diosin Caín yoini isca huaquin, —Cain, ahuuscaquimun min ushto rutuaquin. Natian un mia curushcai onaintimairan, —ishon Diosin yoini. Ascafia Jesús rutuaifotiancai anori yoinima. Afimain nocohuunoashu naiton

noco chaca soashoshquin. Ahuunoashu non Dios fu ipasharatiroan ishon noco yoini.

²⁵ Ascacun ¡Oinfain! Diosin mato yoipaiyai cuscan nicatimayamacahuun. Nan mai anoshon nocon shunifo Moisés ato yoini cuscan nicayamaifoan Upa Diosin ato onaintimani. Ascashu na mai anoashu Moisés noco cuscara cainni. Ascan Jesuscai ascarama. Apa Dios icariashu nocoqui ftoni. Nanton noco yoiai cuscan non nicayamaino fasi musucóin. Ascan non Furun nicayamacaiyaton Upa Diosin noco onaintimaquin finacóin.

²⁶ Ascan Upa Diosin Moisés yafi noco shunifo machi Sinain anoshon ato yoiaitian ahuun tsainmansai mai nayanaiyaimani. Ascashori yoini isca huaquin, —Chipocai un mai fustisi nayanaiyaimaima. Un mai yafi nairifi fasi curushcai un nayanaiyaimairan, —ishon Diosin yoini. ²⁷ Ascacun nan noco yoini cuscahuunshon non tapitiro nan ahuara ipatirofoma Diosin nanfo cuyoriscatashquin afanan ahua inonma. Ascan nan ahuara Diosin imapacunacafo fusti itiro.

²⁸ Ascataricai Diosin icari mai nayanaiyaitiroma. Nannoshocai ahuashta non chaca finontiro. Ascashu nanno non afu ipasharatiro. Ascacun non Diosin aicho huafafainon. Nantonfin ahuamamishti huatiroquin. Ascacun ahuunoa non shinansharafainon non cufifafainon. Ascashon noco amapaiyai cuscan non ashoaino nocoqui Upa Diosin fasi unimacoinshquin. ²⁹ Ascan man man tapiari nocon Diosin nan chi urumanhuan cuscara. Ascan tsoan ahuun tsain shara cachiquiri huacoincun Diosin ato chi urumanhuan muran potashquin amurannoashu omitsiscapanonfo.

**Ahuuscashomain non
Dios unimamatiroquin**

13 Manfin Cristo ahuun yorafoquin. Ascashu noinanfafaincahuun. ²Diospan yorafo mai futsa ariashu matoqui nococun ato shara huacahuun. Ascacun futsafo Diospan yorafo atoqui nococun oinyamafiamisishaquin ato shara huaquin tapinifoma nanfo Diospan oinmati afu nai muran icafofiacun.

³Nan cunu muran iquiafo shinancahuun. Ascashu atohuun ramapaicoincahuun. Marifi atofu cunu muran iquimamua shinantsa acahuun. Futsafo Jesushuunoashu omitsiscacoinnafo nanfohuunri ramapaicahuun. Ascashu marifi atofu omitsiscamuai shinantsacahuun.

⁴Nocofunfoan maton ahuininfoya noinancahuun. Ascashu shinanmasharatanancahuun. Ascadari maton ahuin non maton funu fusti fu icahuun. Ascfia ratoran futsa aton ahuinma non aton funuma fu icafoan Diosin nanscarafo ato onaintimashqui.

⁵Pui noiyamacahuun. Man aya cuscan fustia unimacahuun. Upa Diosin yoini isca huaquin, “Uncai matomaqui ipayamacai uricai mato potanacamaran,”

ishon yoini. Ascacun nan tapiashu non fasi unimacointiro. ⁶Ascacun iconcoino non yoitiro isca huaquin,

“Un ahuara huaiton uhuun Ifoan uari ashomisi. Ascacufin un ratuima. ¿Upa Diosin ua cushuainocai nocofunfoan ua ahuusca huatiromun?” ishon non yoitiro.

⁷Dios fu tsainti pushu muranshon Diosin tsain yoimisifoan mato yosinifo cuscan atohuunoa shinancahuun. Nanfoan futsafo shara huafafainmisi. Ascashon fasi noco Ifo Jesús icoinra huamisifo. Ascacun atohuun caocahuun Jesús tanasharafafainshaquin.

⁸Ascashu Jesucristo ipaoni cuscan natian icai cuscan yafi ishquiai cuscari nancai fiananapacunacama. Nanscasipacunaca.

⁹Ascacun atirififoan mato amaquiri yosipaicani. Tsoancai anori nicayomisima cuscarafo mato yosipaicani. Ascacun ato tanayamacahuun. Mato yosipaicani isca huaquin, —Nocon shunifoan noco yononi cuscan non nami futsafo piaino nocon nomuran noco shinanmasharatiroran, —ishon mato yoimisifo. Ascfiacai tushucaí nocon nomuran noco shinanmasharatiroma. Ascatama Diosin noco noiahuunshon noco imasharatiro non a cuscara inon.

¹⁰Ascacun nan non icoinra huamisi Jesucristo ihui coyan iquinanhuunoashu noco nashoni nocon chaca soashoshquin. Tsoan Jesuscairocon icoinra huatama nan Moisés yononi cuscan fustisi icoinra huafo. Nanfoancai no futan aton chaca soatirofoma.

¹¹Ascacun Moisés ato yononi cuscan ahuun yorafohuunshon Dios cufimsi niaifon fusti nan cunu futsa ocu murancoin iquipaoni. Nan muran inapan imi focun nan imi oinquin Upa Diosin ato chaca soashonon. Ascashon inafon ato caya pushurasi pasoato foshon coapaonifo. ¹²Nanscarifiai Jesús Jerusalén pasoatonoashu noco omitsiscashocai ahuun imi focai ahuun yorafohuunoashu nani nocon chaca noco soashoshquin non a cuscara shara inon.

¹³Ascacun norifi Jesús ipaoni cuscan non anoncahuun. Ascashon ahuun yorafoan nan potanifo cuscan huaquin nocorifi noco yorafoan noco potatiro. Ascashon Jesús roanifo cuscan nocorifi ahuunshon noco roatirofo. Ahuunoari shinanchacamisifo cuscan nocorifi ahuunshon nocohuunoari shinanchacatirofo. ¹⁴Nuno nan mai anoashu non omitsiscafiaquicai non

shinanchacaima. Man nonmain tapiashu nuno nan mai ano non ipanacama. Ascatan man non tapiari chipo Dios icari nocoashu non afu ipashquin. Ascacun nan non manasharamisi.

¹⁵Nocon shunifoan apaonifo cuscacai afanan Diosin fuchipaima. Noncai afanan inafu rutuima nocon chaca soashonano Upa Diosin nocoqui unimanon. Ascatarocon Jesús noco nashonihuunshon non Upa Dios aicho huai. Ascan non yoiquin isca huanon, —¡Aicho! Upa Diosin, min Furun Jesús uhuun Ifo. Ahuunshon un mia aicho huairan, —ishon non yoifafainon. ¹⁶Yoiquin asca huatan yora futsafahuun ointiaquimayamacahuun ato shara huashquin. Ascan Jesushuunshon man yorafo shara huafain man aya cuscan futsan yopaiton man inanquin. Asca huaquifin man Dios unimamacointiroquin.

¹⁷Ichananti pushu anoshon maton Diosin tsain yoimisifo nicasharacoinfafaicahuun. Ascashu mato yoiainfo cuscacoin acahuun. Nanfoanfin mato cushufafainiquin man Jesús tanasharonon. ¿Ascan nanfoanri tapiainfo chipo Diosqui nocoainfoan ato yoishquin isca huashquin, —Man man uhuun tsain ato tapimasharamisimun? —ishon ato yoishquin. Ascacun ato nicasharacahuun man ato nicasharaino unimanonfo. Ascan man ato nicayamaino aton ointi ihuu itiro. Ascashu marifi man funocointiro.

¹⁸Nocori Upa Dios cufishocahuun. Diosin noco amapayai cuscaquin man non huamisiquin. Ascashocai nocon no-

muran non ahua chaca shinainma. Non isharapai fusti. ¹⁹Uarifi Dios cufishocapun matoqui ua samamashta nasomanon.

Ato Dios cufishotan ahuun tsain unutaqui ato yoini

²⁰⁻²¹Upa Diosin nocon ointi unimamamisi nocon nomuranshon non ahuashta shinanchacanonma. Nocon Ifo Jesús nocoahuunoashu man naafiacun Apa Diosin funimani. Nantifi finoan-shu nocon Cushumisi shara inon. Jesús noco nashonihuunoashu non Upa Diosin ahuun yorafo ipashquin. Ascacun man ahua shara yopai cuscan Upa Diosin mato inantiro mato amapayai cuscan man anon. Furun Jesucristohuunshon nocon nomuran noco shinanmasharashu nocoqui unimacoinshquin. Ascacun nantififain non Jesushuunoa yoisharapacuna. Nanscari inon.

²²Uhuun yoramishtichin un mato cunushona maton nomuran mato shinansharamashquin. Un mato chitoshta cunushona. Ascacun funaquima un mato cunushona cuscan ua nicasharacapun. ²³Un mato tapimapai nocon yorashta Timoteo natian man cunu murannoashu man caian. Ascan samamashta uqui nocoashu u afu mato ari cai.

²⁴Nantifi ichananfo maton Diosin tsain yoimisifo non cushumisifo non nantifi Diospan yorafo ua yoisharashocahuun. Italia anoafanri mato yoisharafa.

²⁵Upa Diosin matoahuun noiquin nantifi mato shara huashofafainon. Nanti.

Santiago Icoinra Huafo Cunushoni

Santiago ato tsain shara yoini

1 Uhuun yoramishtichin man manifoti pashcananni. Unquian Santiago un mato yoisharapai. Ascan un mato cunu fomai man tapinon. Upa Dios futan nocon Ifo Jesucriston un ato yonomatifin unquin.

Upa Diosin noco cayacafi shinanmasharatiro

²⁻³ Uhuun yoramishtichin ahuaara ahuuscarafiaino man shinanchacatarocon man Jesús icoinra huaquin finacoinshon funaquima man tunutiro. Man asca huaino Jesús mato imapaiyai cuscan man atiro. Ascan ahuafoan mato chaca huamapaifiaino unimacoincahuun. ⁴ Man ascashu Jesús cuscara ahuun tanamisicoin shara man itiro. Ahua futsacai man yopaima isharaashquin.

⁵ Ratoran man futsan man ahuashta tapishoma Dios yocacahuun mato tapimanon. —Ua fucashni huayamacahuun, —ishoncai mato Upa Diosin yoinacama. Man tapipaiyai cuscan nantifi unimacainrocon mato tapimashquin. ⁶ Ascan man Dios yocafiatan ointi rananya iyamacahuun. Shinanquin isca huayamacahuun, —Un Dios yoca cuscan ua tapimai iyamarai itsairaca ua tapimaimaran, —ishon anori shinanyamacahuun. Ascatama icoinra huacoincahuun. Tsoan icoinra huacoinyamashu nan fuutan ihui focuatiro cuscan. Ascashu fuuhuanquin ihui focuacaiton non tapitiroma raquiricaimain focuaquicai. Nanscarifi aquin tsoan Dios yocafiaquin icoinra huacoinyamashon futsa futsa huaquin shinantiro. ⁷ Man ascaiton, —Nocon

Ifoan noco ahuarashta huashoinran —ishon shinanyamacahuun. ⁸ Ascan, —Uncai tapiama Diosin ua ashoyamaraquinmain ua ashoicain, —ishon shinanyamacahuun. Ascarafocai Diosin ato ahuashta huashoshquima. Nanfoan ointi rananyashon futsa futsa huaquin shinanmisifo.

⁹ Ascan atirifi Diospan yorafo nan ahuuomafohuunoa icoinra huamafoan shinantirofo isca huaquin, —Nan ahuuomafocai ahuamaran, —ishon atohuunoa shinantirofofia nanfocafin Diospan facufoquin. Ascafia nan ahuuomafocan shinantirofo isca huaquin, —¡Aicho! Unfin Diospan facucoquin. Un Jesús yafi Dios fu ipashquiran, —ishon shinantirofo. ¹⁰ Nanscarifi ratoran Jesús icoinra huaa futsan mafo ichapayashon shinantirofo isca huaquin, —Uhuun mafocai ua imasharatiroma. Urifi un Jesús fasi yopacoin uhuun Ifo inon ua imasharanon. Jesús ua numayamaino urificai un ahuashta itiomaran, —ishon shinantiro. Charo samamashta tsasiashu niriqui futsutiro. Nanscarifi yora mafo ichapaya samamashta natiro. ¹¹ Farin fanafo tsacaino samamashta tsasitiro. Ascashu niriqui futsutiro afanancai shara itiroma. Nanscarifi nan mafo ichapaya ahuun mafo inanmitsapaifi samamashta nariscacai amaqi cachitiro.

Ahuara chaca non finonfianton Diosin noco tapipai nonmain tanasharaquin

¹² Tsoan omitsiscafiquin tunucoianfin nanfin unimacoin itiroquin. Ascacun Upa Diosin ahuunoa yoiyoni isca huaquin, —¡Aicho! Mian nicasharafain niyoshon mian noimisi. Ascashufin natian min ufu ipatiroquin, —ishon yoini. ¹³ Tsoancai yoitiroma isca huaquin, —Un chaca huapaiyai cuscan Upa Diosin afin ua chaca huamapairan,

—ishocai yoitroma. Tsoanshtaricai Dios chaca huamatiroma. Arificai tsoa chaca huamapacunacama.

¹⁴Ascatarocon ratoranfoan chaca huapayai cuscan atohuun nua. Afin ahuun nomuranshon chaca huapayai cuscan nanscacoïn huatiroquin. ¹⁵Un mato ahuara futsa yoi. Tau huaquin nofocunun ainfo facu nanumana. Funainquimashta ahuan shaqui murannoashu yosiacutiro. Caiyaintian facu caintiro. Nanscarifi aquin tau huaquin nocon nomuranshon non ahuara chaca shinanfafaïtiro. Ascashon chipo non chaca huatiroquin. Ascatan chaca huariaicai non Dios fu rafutiroma. Nocon chacahuunoashu amaqui non ipanaca.

¹⁶Ascacun uhuun yoramishtichin mafiri paramuyamacahuun. ¹⁷Nocon Upa Diosin nai muran ifiashon nuno mai ano noco shara huashofafaini. Nantofin nantifi noco oni huashosharaniquin. Fari non oshu non fishifo non nantifi chashafoti Upa Diosin onihuani. Ahuara shara futsaforifi nantifi noco onihuashoni. Noco shara fustisi onihuashoni. Nanscarifiai fari tsacaino nocon yoshin samamashta fiananantiro. Asca Diosincain fiananapacunacama. Ascataricain ointi rananya ipanacama. Nanscasipacunaca. ¹⁸Upa Diosin noco catonni ahuun tsain iconcoïnhuunshon noco cainma futsa a cuscara shara non inon. Nonfin Jesús icoinra huaquin tau huaniquin. Ascashu Diosin nantifi onihuanifotihuunoashu non ahuun facu iyoa cuscara.

Diosin tsainfin cayacaficoïnquin nicashu nanscacoïncahuun

¹⁹Uhuun yoramishtichin un mato yoiyai cuscan nicasharacahuun. Futsan mato ahuara yoiaiton funaquima nicasharayocahuun. Tsain ichapa yoiimisi iyamacahuun. Samamashta sinayamacahuun. ²⁰Upa Diosin Furun

cuscara shara noco imapaïfiaino non sinaitocai noco imapaïyai cuscan noco imatiroma. ²¹Ascacun ahuara chaca maton nomuran man shinanmisi cuscan huafain ahuara man chaca huamisifori shatucahuun. Ascatan Diospan tsain mato nomuran man nanushon. Mato yoini cuscan nicasharacoincahuun. Man Diosin tsain nicasharashufin man afu ipasharatiro.

²²Diospan tsain nica fustiquima. Nan cununi cuscacoïn acahuun. Man nicaïiai ascayamashufin man mafiri paramuiquin. ^{23–24}Futsan ahuun fuso fuisitinin oïnfiashu samamashta oian cuscan oïntiaquimai. Nanscarafiai man Diosin tsain oïnfiashu nan oian cuscacoïn aima. Ato yononi cuscan man tapifiashucaï ascacoïanfoma. ²⁵Futsafocai ascarama. Diosin tsain shara fustisi oïnsharashu nan yoiya cuscacoïaino. Shafatifi Diosin tsain tanacoïancain ahuara futsa afanan ahuun ifo itiro. Ascashu ishara fusticoïncain ahuun ointi unimatiro.

²⁶Ascan tsoan yoiquin isca huai, —Unfi Diosin tsain nicacoïnmisiquin, —ishon anori yoiïaïqui tsain chaca yoiquin shatuamashu nanscara yorafin afiri paramutiro. ²⁷Ascafia nan facu uhuaomacoïnfo yafi ainfo funuomafo non cushusharaicai. Nan icoinra huamafoan acaïfo cuscan non huaima non ascaino Upa Dios nocoqui unimai.

Nantifi yorafohuunoa nannorifosi shinansharacahuun

2Uhuun yoramishtichin nocon Ifo Jesucriston Upa Diosin cuscaracoïn. Nanfin man icoinra huamisiquin. Ascacun yorafohuun nannorifosi shinansharacahuun. Nan man futsafori shara huamisi cuscan huafainri futsafohuun shinanchacayamacahuun. Shara huacahuun. ²Itsairaca nocofunu mafo ichapaya matofu ichanainno

anio chashna shara sahuufain sahuuti sharacapacoin sahuufain matofu ichanantiro. Ascan nantiantari nocofunu ahuuoma sahuuti chocashta sahuuashu arifi matofu ichanantiro. ³ Ascaiton nan nocofunu mafo ichapaya samamashta man yoitiro isca huaquin, —Uhuun yorashtan, nuno tsaoti shara ichananti pushu muran tsaoyohuun, —ishon man yoiaino nantianri ahuuomashta nocotiro. Ascashon man yoiquin isca huai, —Min cachiori nitiroran huayamaraquin tapa camaqui tsaohuu, —ishon man yoiquin chaca huai. ⁴ Man asca huaquicai yorafohuun nannorisi man shinainma. Ascaquin man chaca shinain. Nan yora mafo ichapaya man shara huafiaquicai yora ahuuomashta man chaca huamisi. Ascaicai mafi ranan man nannorifosi shinanonainma.

⁵ Ascacun uhuun yoramishtichin ua nicasharacapun. Un matohuun noicoishon un mato cayacafi shinan-masharapai. Yora ahuuomafohuunoa nan icoinra huamafoan shinanmisifo isca huaquin, —Nan ahuuomafocai ahuamaran, —ishon shinancani. Upa Diosincan atohuunoa anori shinainma. Nanfin yora ahuuomafo catoan Jesús icoinra huacoinonfo. Ascacun nan ahuuomafoan Upa Diosin noicoiainfoan ato yoiyoni cuscan nantifi ahuunafori atona iishquin. ⁶ Nannori Diosin yoifiano mancai ahuuomamishtifo sharacoin huamisima. Shinancapon. Nan ahuuomafoan mato chaca huamaforocon nan mafo ichapayafoan mato paramisifo. Ascashon mato curushcain ranushumufoan aton niaifocoin ano iyomisi. ⁷ Nanfoanrifi nocon Ifo Jesusqui tsain chaca huamisifoquin.

⁸ Ascan nocon Niaifoan Diospan noco yononi cuscan man ashufin man cay-

acafi isharatiroquin. Noco yononi isca huaquin, —Mafiri man noimuai cuscan huafain futsafohuunri noicoincahuun, —ishon Diospan noco yononi. ⁹ Ascafia man asca huatamarocon nan mafo ichapayafosi man shara huamisi cuscaicai nan ahuuomafo man shara huamisima. Man ascaicain Diosin yononi cuscan man aima. Ascaquifin man chaca huai. ¹⁰ Ascashon mancai shinanquin isca huatiroma, —Diosin noco yononi cuscan atirifi un nicacointiro. Asca fustishtacai un tanapaimaran, —ishon anori man shinainno yoitimacoin man itiro. Ascashu nantifi Diosin yononi cuscan man nicacasmai cafiscatiro. ¹¹ Upa Diosin yononi cuscan, —Nocofunufocan aton ahuinma fu iyamaifoanno ainfori nanscarifi aton funumafo fu itiomaran, —ishon yonofain Diosin yonoquirifi isca huani, —Tsoa rutuyamacahuun, —ishon noco yononi. ¿Ascashon maton ahuinma iyamaraiyainforifi maton funuma fu iyamafiacashon man futsa rutua nannun shara? Ma. Man futsa rutuacai Diosin noco yononi cuscan man aima. Ascashu man yoitima itiro.

¹² Diosin noco yononi cuscan noco imasharapai afanan ahua chaca noco Ifo itama non afu isharacoincainon. Non chipo Diosiqui nocoaiton noco yoishquin nonmain nicasharamisi iyamarai nonmain nicacasmamisiquin. Nannori noco yoishquin. Ascacun oinfain. Shinansharafain isharacoincahuun. ¹³ Ascashon Diosin nantifi yorafo puashoshquin. Ascan niyoshon man futsafohuun ramapaipaonimacun Diosiri matohuunri ramapaishquima. Ascan niyoshon man futsafohuun ramapaipaonicun Upa Diosin matohuunri ramapaishquin. Ascashocai mato onaintimaima. Ascatamanrocon afu ipasharatiro.

**Tsain fustisi yoicaquima nan man
yoimisi cuscacoin acahuun**

¹⁴ Uhuun yoramishtichin un mato yoisharapai. Man futsafo yoiquin isca huamisi, —Un Jesús icoinra huairan, —ishon yoifiashocai futsafo man shara huamisima ipaitsicoin man yoimisi. Un Jesús icoinra huairan ishon yoifiashu maton nomuracai fiananancoianma. ¿Nanscarafo Dios fu ipatiromun? ¹⁵⁻¹⁶ Natian iscara un mato tapimapai man tapisharanon. Itsairaca mato yorahua sahuutiromacun tushuomacuri oinquin man yoitiro isca huaquin, —¡Aicho! Uhuun yorashtan Diosin mia shara huaiquin. Sahuuti shara sahuuhuu matsinashquima. Ascatari pisharahuun. Un chipo mia shafa futsan oinshquinon. Casharatahuun, —ishon yoifiaqui yopai cuscan man inanyamaino nancai ahuama. Mancai ashosharama. ¹⁷ Nanscarifi aqui man yoiquin isca huai, —Un Jesús icoinra huairan, —ishon yoifiatan man futsa shara huayamaino acai ahuama. ¿Tsoanco mato icoinra huatiromun a man Jesús icoinra huacun?

¹⁸ Itsai raca futsan yoitiro isca huaquin, —Min Jesús icoinra huai min ahuara futsa yopaima Upa Dios fu ipashquin, —ishon yoitiro raca. Ascafia man futsafo shara huayamacun tsoancai tapitiroma man Jesús icoinra huaa. Unfin Upa Dios yonoshona cuscan nantiffain man ointiro un Jesús icoinra huacoinmainquin. ¹⁹ Nan Dios fustifin man icoinra huamisiquin. Nanfin sharaquin. Ascan yoshin chacafoanri man tapiafo Dios fusticoin. Ascashu fasi aqui ratucoincañi tari taricani.

²⁰ Man ratoran futsan icoinra huafishon Diosin yononi cuscan man ayamashucañi mancai ahuama. Ascan Diosin yononi cuscan man ayamashucañi man

icoinra huacoinnama. Tatimafafainyamacahuun. ²¹ Shinancapon. Upa Diosin nocon shuni Abraham yononi cuscacoin ani. Ascashon nicasharacoincun Diosin yoini, —¡Aicho! Un mia yoia cuscan min aa. Min fasi shararan, —ishon yoini. Diosin yononi cuscan Abraham ahuun furun Isaac rutucuan Dios inanshquin. ²² Abrahamfin Dios icoinra huafain yoia cuscan aniquin. Diosin yoini cuscan huacoinshon non tapitiro a icoinra huacoinshon. ²³ Icoinra huacoincun Upa Diosin ahuunoa yoini, —Abraham minfin sharacoinquin. Ascashu min ufu isharatiroran, —ishon yoini. Diosin Abraham yoiniri, —Abraham minfin ufu rafusharacoinmisiquin, —ishon Diosin yoini.

²⁴ Ascashon man tapitiro non icoinra huaa fustihuunoashucañi non Dios fu ipatiroma. Non icoinra huacoinfain noco yoia cuscan acoinnashu non afu ipatiro.

²⁵ Nanscarifiai nan ainfon furoma ahuun anu Rahab. Nan Israeli rafu Rahab ahuun caifoan pushurasi muran noconifo ahuu cuscaramainquin tapipaicani. Ascashu chipo Rahab ahuun pushu murancoin iquinifo. Ascacun nanton ahuun pushu muran nocon caifo rafu onuni ato ahuusca huanonfoma. Ahuun pushu muranshon ato fai futsan nichini ahuun caifo futsafoan ato fuchinonfoma. Upa Diosin Rahabhuunoari yoini, —Min ua icoinra huashon nan rafu min shara huaa. Ascacun un mia imasharairan, —ishon Upa Diosin Rahab yoini. ²⁶ Afanan un mato iscara tapimasharanon. Nocon furo yoshin nomaqui caanofin nocon caya natiroquin. Afanancai shara itiroma. Nanscarifi aquin non Diosin icoinra huafishon noco yononi cuscan non futsafo shara huayamainocai nancai ahuama. Non ascaicai non shara itiroma.

Nocon tsainhuunooa cununi cuscan

3¹⁻² Uhuun yoramishtichin un mato ahuara futsa yoinon. Maton muranfin tapimamisi fustirasi itiro. Nantifinton man non ahuara amaquiri chaca huafafainmisi. Ascacia Diospan tsain tapimamisifoan amaquiri yosicun Upa Diosin ato onaintimaquin finacoinsquin. Ascan nan ahuara chaca yoimisasi nancaifin isharacoinmisiquin. Ascashu shara fustisi itiroquin.

³ Un mato afanan ahuara futsan tapimapai. Nan caballo ahuun cunopan anushushon fichiqui rusfi chichishon cayacafi casharai canon non ninifoanfaiitiro. Caballo uhuapacoinfiacun nan ahuun anushumutinin uhuapamashtacoinfiashon nan non niniaiquiri catiro.

⁴ Shinancapon. Shashohuan uhuapafiacun ahuun chifishtati uhuapamashtafiashon nan non iyopaiyaiquiri iyotiro. Fuuhuanun shashohuan catima huafiatiro ahuun chifishtatinin nan non iyopaiyaiquiri iyotiro. ⁵ Nanscarifiai nocon ana uhuapamafiashon nocon tsainmanri non futsafo fasi chaca huatiro. Nofiri non chaca huamutiro. Ascan parito ushu uhuapamashtacoinfiano mau uhuapacoin cotiro. ⁶ Nanscarifiai nocon ana uhuapamashtacoinfia chi cuscara. Nocon tsainhuunooashu nofiri non chaca huamucointiro. Ascashuca non afanan isharacointiroma. Nocon tsainhuunshon non nantifi chacana huatiro. Yoshin chacahuunshon non ahuara chaca yoitiro futsafori omitsiscamashquin.

⁷⁻⁸ Asca yoina futsa futsatapafo yafi puiyafa non mupash cuscara non unu muran icafori non onaonma huatiro. Ascacia noco anancai tsoanshta non onaonma huatiroma. Ascashon nocon tsainman non chaca futsa futsatapafo

yoitiro. Nocon tsainfin nan rono pau cuscaraquin. Nocon tsain chacahuunshon non futsafo namatiro.

⁹⁻¹⁰ Nanhuunri nocon Ifo Upa Diosihuunooa non tsain shara yoitiro. Nantofin yorafo onihuaniquin a cuscara inonfo. Ascacia nan noco anari non futsafo tsain chaca yoimisi. Nanhuunri non tsain shara yoitiro. Ascacun uhuun yoramishtichin ascaramafinquin. ¹¹ ¿Unu rufoquinoashu tsosi afainocai unu saoya ositiramun? Ma. Ascaracai itiro. ¹² ¿Uhuun yoramishtichin non manian fanamun shopa foaitiro? Ma. Ascaracai foaitiroma. Non ahuara fanafin nanscaracoin foaitiroquin. Nanscarifiai unu rufoquinoashu afainocai sao ya afatiroma. Ascatai tsain shara yafi chaca ositiroma.

Diosin noco iconcoi shinanmatiro

¹³ Tsain futsari un mato yoinon. Nan mafi ranan man cayacafi shinanmumisi cuscan. Futsafori man ashosharamisi. Ascashon man ato ismasharatiro. Tsoa chaca huamisima nan Diosin yonoaiyai cuscan fustisi huamisi. Man ascaiton nantififain ointirofo man Dioshuunshon cayacafi shinansharacun. ¹⁴ Ascan man isharatamarocon maton nomuran fucashcoi icain futsa aya cuscan fipaifain man shinanchacafain mafi man apaiyai cuscan fustisi futsafo yonoquin. Anori shinanquin isca huayamacahuun. —Un Diosin tsain tapicoian. Un ahuun ointi cuscaracoinran, —iyamacahuun. Anori yoiquifin man futsafo paraincain maton nomuran man chaca shinain cuscan fusti huafain man ato fomanpai. Ascashufin man cacapaimisicoiñoquin.

¹⁵ Anoricai Upa Diosin mato tapimamisima. Jesús icoinra huamafoan shinanchacamisifo. Man ascashon Satanás yoshin chacapan mato amaquiri shinanchacamamisi. ¹⁶ Isca huaquin mato shinanmatiro. Futsa aya cuscan

fipaifain futsaqui shinanchacafain mafi apaiyai cuscan fustisi shinanfain futsafo matohuunoa man shinanmapai ato yonoshquin. Ascashufi man cacapaimisifoquin. Man ascaifin fasi man fochishmanantanantiroquin. Ascaquin man ato fucash huatiro chaca futsa futsatapafo huaquicai tsoan cayacafi shinantiroma.

¹⁷Ascan Upa Diosin cayacafi shara shinanmisi cuscan matori shinanmapai isca huaquin. Maton nomuran shinanshara fustifain futsafo fu shara huatanancain fochishmanantanapaitama futsafo shara huashofain futsafoan mato yoia cuscan nicasharafain futsafo shutiacufoanpayamafain futsafohuun ramapaiquin ato shara huashofafainmisi icain, nantifiton nannorisi shinansharafain ointi rananya iyamacain fomanpaimisiri itamarocon cayacafi fustisi yoimisi. ¹⁸Ascashon nannorifosi man shinainno futsafori man shinanmasharatiro isharacoinnonfo Jesús cuscara shara ishcaquin.

Icoindra huamafoan apaiyai fo cuscan noiynamacahuun

4 ¿Ahuuscain mafi ranan man fochishmanantanantiahu man sutunainmun? Maton nomuran shinanchacashufin man ascaicain. Chaca fusti fuchipai. ²Man ahuafo fuchipaifiaquicai man fitiroma. Ascashon fasi fuchipaiquin man futsa rutupaitiro fianpaiquin. Ascashu man fochishmanantanain tsain isininpaton man iquinonain. Ahuafo fipaiquin man fipaiyai cuscacai man Dios yocamisima mato inanon. ³Ascashon Dios cufifaiquin man amaquiri yocaitocai. Asca Diosin mato ahua inantiroma. Mafi man apaiyai cuscan

fustisi amupaimisi. Man ascaitocai mato ahua inantiroma.

⁴Afin mato amapaiyai cuscacai nancairocon shinantama nan mafi ranan man apaiyai cuscan fustisi man shinanmisiquin. Ascaquicai man Dios noicoianma. ¿Man tapiamamun nan icoinra huamafoan fuchipaiyai fo cuscan marifi man fuchipaya. Ascaqui man Dios noicasmamisi itiro? Asca man icoinra huamafo cuscara icashufin Diosin noicasmamisi man itiroquin. ⁵Diospan tsain cununi isca huaquin, —Uhuun Yoshin Shara un mato ya rafumaniran, —ishon cununi. ¿Man shinanmun ipaitsi noco cunushoni? Man ahua futsafo noiaiton oinquin ahuun Yoshin Shara fasi ahuun ointi isincointiro. ⁶Ascan afanan Diospan tsain noco cunushoni isca huaquin, “Ratoran futsan Upa Dios nicacasmai afin apaiyai cuscan fustisi huai nanfin cacapaimisicoquin. Ascaraquicai Diosin unimaima. Ascashon ato onaintimashqui. Ascafia nan ratoran futsan Jesús cuscara ipaicoinquifin nantonfin tapiquin fasi Jesús yopacoin isharashquin. Nanscarafahuunfin Diosin ramapaiquin ato shara huashoshquin finacoinshquin ahuun curushu ato inanshquin tanasharanonfo,”

ishon cununi.

⁷Ascacun Upa Diosin mato yoimisi cuscacoin acahuun. Nan yoshin chaca Satanás mato amapaiyai cuscan nicayamacahuun. Ascashon yoiquin isca huacahuun, —Satanás, Jesucristo uhuun Ifoquin. Umaquinoashu catahuun, —ishon yoicahuun man asca huaino matomaquinoashu ichoriscatanon. ⁸Ascatari Dios fu rafucahuun a cufifafaincahuun. Man ascaino matofu rafucacaitiro. Man chaca huamisi cuscan shatucahuun.

Ascashu afanan ointi rananya iyamacahuun. Man Dios tanafiashton nantianricai nan icoinra huamafoan acai cuscan man huatiroma. Ascaquicai man tanasharatiroma. Ascashon maton nomuran man shinanchacamisi cuscan shatucoincahuun.

⁹Man chaca huamisi cuscan shinancasmacahuun. Ascashon man chaca huamisi cuscan shinantani uaicahuun. Afanan afo shinancani shuchitamaron uaicahuun. ¹⁰Ascashon nocon Ifo Jesús yoiquin isca huacahuun, —Ifon un fasi mia chaca huamisi. Ascacun ua numahuu, —ishon yoicahuun. Man ascaiton Upa Diosin matohuun ramapaiquin maton chaca soashotiro man afu ipanon.

Futsahuunoa yoiqui chaca huayamacahuun

¹¹Uhuun yoramishtichin Diospan tsain noco yoiquin isca huani, —Noinancatan yoiti huatananyamacahuun, —ishon cununi. Man ascayamacai Diosin noco yononi cuscan man aima. Ascaquifin, —Diospan tsain amaquiriran, —ishon man yoicai. Ascashon mancai yoitiro, —Diospan tsain cayacafi iyamarai amaquiriran, —ishon yoitamaron ahuun tsain man nicacointiro. ¹²Diosin fustiton noco yonopaiyai cuscan noco cunushoni. Arus fustifi tapicoianquin tsoamain isharacoian iyamarai chaca huaquin. Nanton arus fusti tapia noco numa iyamaraimain noco omitsiscapanacafo muran potaicai. ¿Ascan ahuuscain man futsafohuunoa yoiqui chaca huamismun?

Ahuara ahuuscara afiaitocai non tapitiro

¹³Natian un mato tsain futsa yoiaton ua nicasharacahuun. Atirifain man yoimisi isca huaquin, —Na shafata

iyamarai funamanri non pushurasi futsa ari canon. Nannoshon non fari fusti finonyoicanon ahuara inanmitsashon ahuun rafanan non pui ichapa finon, —ishon man yoimisi. ¹⁴Ascafiashocai man tapiama funamanrimain ahuuscataniquin. Nan man cainitian yafi man naitian nishfo cuscara. Man oinfiaino samamashta yamafoaintiro. Nanscarifiai mancai chai nipatiroma.

¹⁵Ascacun anori shinantamaroon man shinanquin isca huatiroma, —Upa Diosin ua nimapaiyaino un niyotiro. Nantonfin ahuara apaiyai cuscan ua huamatiroquin, —ishon man yoitiro. ¹⁶Ascafia mancai ascara shinanmisima. Ascatararon man yoiquin isca huamisi, —Ufin un apaiyai cuscan un huatiroran, —ishon man shinanmisi. Ascashu man cacapaimisi. Man ascafin fasi chacacoinquin. ¹⁷Ascashon ratoran futsan Diosin amapaiyai cuscan tapifiashton futsa ashosharayamaino nantofin chaca huaiquin.

Mafo ichapayafu Santiago ato yoini ascanonfoma

5 Mafo ichapayafuun ua nicasharacahuun un mato cayacafi yoinon. Ascan natian man ahuashta yopayamafiai chipo man fasi omitsiscashquin uaiquin. ²Man ichapa aya cuscan chipo payocoi futsui. Maton sahuuti sharacapacoifo coroisifoan piquin futsashcani. ³Maton pui afanan ahuushta ahuun nuima. Man maton pui ichapacoin mucua oinquin futsan yoitiro, —Mifin min yoashicoi. Mina fusti min shinain. Ascashocai man futsafohuun ramapaimisima. Ascacun Diosin mato onaintimashqui. Maton ointi ihuucuin mui. Man ahuuscampaishquin. Man fasi ratucoin nan tapiashu chipo man omitsiscashquiran, —ishon ato yoi. Nantofin ahuun unutaniquin.

⁴Shinancapon. Mancai maton yonomamisifo inansharamisima. Man ato fuparamisi finonmafain fiifiaquin. Upa Diosin ahuamamishti atiroquin. Man ato chaca huamisi cuscan nanton oian. Fasi yonoi atsanacani piniaifoan Diosin man ato nica.

⁵Mato yonomisifo omitsisca cuscan mancai ascatarocon man niyoashu man fasi isharamisi. Ahuashtacai man yopamisima. Moipan ichapa pii shoatiro. Tapiama shoacun ifoan rututiro pinonfo. Nanscarifiai mancai niyoashu isharamisi. Unimacain ahuara apaiyai fustisi man amisi. Man tapiama ascara chaca huafiashu samamashta man nai omitsiscas futsushquin. ⁶Yora tatimamishitifiacun man ato chaca huamisi. Atohuunoa tsain chaca man huai niaifo ato achimashquin. Man ato chaca huaino ahuuscashucai afinri numatirofoma. Ahua chaca huayamafiashu nan maton tsainhuunshon man ato rutumani.

Omitsiscafiaquin tunufain Dios cuficahuun

⁷Uhuun yoramishtichin man omitsiscafiaquin tunuyocahuun nan nocon Ifo Jesús oaitian. Funayamacahuun. Naitian un mato ahuara futsa yoipai. Mau fanashon ifoan funainquimashta manasharatiro nan funusharaitian. Oi pacutian manasharatiro funushonaitian. ⁸Nanscarifi aquin manayocahuun. Nocon Ifo man oti chaimaquin. Ascacun ahuun tsain cachiquiri huacaquima tanasharacahuun.

⁹Uhuun yoramishtichin nocon Ifo man oti chaimaquin. Tapicahuun nan chacafo onaintimayoi oiquin. Ascacun futsaqui tsain chipuyamacahuun matori onaintimanonma. ¹⁰Nocon shunifoan nan nocon Ifo ahuun tsain yoimisi-foan fasi omitsiscafiaquin funatama nocon Ifohuunoa ato yoipaonifo. Nan

ipaonifo cuscan atohuun caocahuun.

¹¹Man man tapia nanfoan omitsiscafiaquin funatama tunucoipaonifo. Nanscarafofin unimatirofoquin ishon non yoimisi. Nocon shuni Jobhuunoa man man nicamisi. Fasi omitsiscafiaquin nocon Ifon iconra huacoinni. Ahuun tsainca cachiquiri huanima. Ahuun unutaqui Upa Diosin fasi shara huashoni nan funoni cuscan afanan inancoinni. Ascan non tapitiro nocon Ifon nocohuun rama- paicain nocohuun noicoi.

¹²Ascan man man tapia Upa Diosin nocohuun noiquin noco cushusharamisi. Ascan Diosin noco shinanmafafaini nan man tapicoian cuscan futsafo ismacahuun. Maton tsainhuunshon ato ismacahuun. Man futsafo matohuunoa iconra huamapaiqui isca huaquin yoiyamacahuun, —Diosin ua oiainno un mato icon yoiran, —ishon yoiyamacahuun. Mato tsain, —Ai iyamarai ma, —ishon yoicahuun. Icon fustisi yoicahuun. Man ascaiton maton tsainhuunshon man chaca huatiroma Diosin mato onaintimanonma. Ascara shinancahuun.

¹³Asca man ratoran futsan chaca finonshon Upa Dios cuficahuun. Man ratoran futsan unimaquin Dios fanainshotiro isca huaquin, —¡Aicho! Upan Diosin min shararan, —ishon fanainshocahuun. ¹⁴Nan ratoran futsa isinicaiton nan ichananmisifo aton cushumisifo cunacahuun a cufishononfo. Nocon Ifo cufishquin ichapamashta shuniyashon fumanfain nocon Ifo Jesús anuhuunshon Upa Dios cufishocahuun. ¹⁵Man iconra huacoinshon isinincaifo man cufishonaino cayasharatiro muma shara itiro. Nanton chaca huamiscun Upa Diosin a caya huafain ahuun chaca soashotiro. ¹⁶Ascacun man chaca huacusan yoinonancahuun Upa Diosin maton chaca soashonon mato caya huanon. Ratoran futsan Jesushuunoa shu isharon nanton mato Upa Dios cufis-

honaiton nicasharashquin nan cufiai cuscan ahuamamishti huashotiro.

¹⁷ Ascan nocon shuni Elías nan noco-funu noco cuscarari ipaoni. Non muai cuscarari arifi mupaoni. Ascafiashon Upa Dios fasi cuficoiainno fari rafu non fusti nushmancayan oi fuyonima. Cufinquin isca huani, —Upa Diosin uhuun yorafoan mia cachiquiri huafoquin. Ascacun oi fumariamahuu uhuun yorafoan afanan mia tanasharanonfo, —ishon cufini. Asca huano fari rafu non fusti nushmancayan oi fuyonima. ¹⁸ Ascan chipo afanan cufiaino oihuanrasi funi. Nantianri yonofa foaisharani.

^{19–20} Uhuun yoramishtichin mafin ranan Diosin tsain tanacashon futsan

Diosin tsain cachiquiri huacun afanan Jesús tanayamaiton futsan yoiquin, —Min chaca huamisi cuscan shatuhuu Jesús afanan tanasharahuu, —ishon anori man yoiaino nicashon ahuun chacafo shatucoianshu Jesusqui afanan nasotiro. Omitsiscapanacafo muran cacuana futsan numayamaino. Asca huashon ahuun chacafo cachiquiri huamacoinshon Diosin ahuun chaca rau huashotiro futsan numacun. Ascacun afanan Diosincai ahuun chaca ahuunoa shinainma manmain ahuun chaca shatumacoinshonfin. Nanti.

Santiago

Pedronun Icoinra Huafo Cunushoni

Pedronun ato tsain shara fomani

1¹⁻² Unquian Pedro un Jesucristo fu rafumisishon ua yonopaiyai cuscan un ashoshquin. Un mato cunu fomai man tapinon. Man Jesús tanaino maton mai Jerusalén anoshon mato potanifo. Ascan man maitio pashcai futsufaini. Atirifi man Ponto ano foaino atirifiri man Galacia ano foaifoanno atirifi Capadocia ano foaifoanno atirifi Asia ano foaifoanno atirifiri man Bitinia ano foni. Upa Diosin inonpacoai cuscan mato catonni ahuun facufo man inon. Jesucristo mato nashoni maton chaca mato soashoshquin ahuun Yoshin Sharahuunshon mato chaca shatufain man tanasharanon. Ascano Upa Diosin matohuun ramapaiquin maton nomuran fasi unimafafaini.

Non Diospan facufoshon non tapitiro non afu ipashqui cuscan

³ Ascacun nocon Ifo Jesucristo Apa non aicho huapanon. Upa Diosin ahuun Furun Jesús mai murannoa funimani ahuunoashu nocon nomuran fiananan huai a cuscara funasharacoin non inon. Ascan ahuunoashu non nipai aqui non nocoaitian afu ipashquin. ⁴ Ascashon Upa Diosin noco yoini cuscan noco numapacunaca non afu ipanon. Diosin ica cuscarifiai norifi non aqui nocoaitian a cuscara shara iishquin. Noco imapacuai cuscan unupacunacama icain chacapacunacama icain sharapacunaca fusti. Charofo sharashta iyofiashu chipo tsasi futsutiro. Ascan noncai charo cuscarama. Chipu noco Diosin imashquin cuscaai fianananpacunacama. Non afu isharpacunaca. ⁵ Ascan non icoinra huacun Upa Diosin ahuun curushhu-

unshon noco cushusharafafaini Jesús oaitian. Nantianri noco imashquiai cuscan nantifi noco inanshquin ahuashtacai non funoshquima.

⁶ Ascan natian niyoashu man omitsiscafiai man chipo Jesús fu ipasharashquin. Ascacun omitsiscafiai fasi unimacoincahuun. ⁷ Diosin nocohuunoa onanpai nonmain Jesús icoinra huacoinnaquin. Un mato ahuara futsa tapimapai. Cuno nan oro chi muran coashon non tapitiro nan orocoinmainquin. Nan orocoianshucai cotiroma. Nanscarifiai omitsiscafiaqui man Jesús cachiquiri huayamacun Diosin onantiro man Jesús icoinra huacoinnamainquin. Nan oro chicoinfia man Jesús icoinra huacoinna nancaifin fasi shara finacoianquin. Ascan Jesús oaitian omitsiscafiaquin man icoinra huacoinmisticun mato yoiquin isca huashquin, —¡Aicho! Min omitsiscafiai min isharamisi. Ascacun un miqiu unimacoinni. Min ufu rafusharapacushquinran, —ishon mato Jesús yoishquin.

⁸⁻⁹ Man nocon Ifo Jesús oinmisi-mafiashton man ahuun noi. Natianri man oiantaimafiashton man icoinra huacoinna. Ascashu man fasi unimacain maton ointi roama roamamisi. Ascashon man icoinra huacun Diosin mato imasharapacunaca.

¹⁰⁻¹¹ Nocon shunifoan nan inon pacoai cuscan Diosin tsain yoimisifoan ahuun Yoshin Sharahuunshon Jesushuunoa yoipaoni isca huaquin, —Nocon Numamisi nocoqui oshqui. Mato omitsiscashoshquin man ahuunoashu isharonon, —ishon cununi. Ahuunoa cunupaoni cuscan nanfoanri fasi tapipai tsoamain nocon Numamisi iishquicain ahuutiarimain oshquicain. ¹² Diospan Yoshin Sharapan ato tapimani man inonpacoai yoini nanfoan niyocashon oinyotirofoma.

Ascatamarocon afoan oinyamafiaino mancaifin oinshquiquin. Ascan nan tsain shara Jesushuunoo nantififain man non nicamisi. Upa Diosin icanoshon ahuun Yoshin Shara nichini ahuun curushhuunshon mato Jesushuunoo yoimisi. Nan man nicamisi cuscari Diospan oinmati afu nai muran icafoanri tapipaicoincani.

**Upa Diosin noco yononi non
Cristo cuscara shara inon**

¹³Ascan maton nomuran cayacafi shinansharacahuun. Jesucristo oaitian Upa Diosin mato shara huashoshquiai cuscan itisharacahuun mato yoini cuscan fiishcaquin. Ascacun ahuara futsan shinanyamacahuun. Afin mato amapaiyai cuscan fustisi shinancahuun.

¹⁴Manfin Diospan facufoquin. Ascan Upa Dios nicasharacahuun. Mato amapaiyai cuscacai man tapiyopaonima. Man chaca huapaoni cuscan afanan shinanyamacahuun.

¹⁵Ascatamarocon natian Upa Diosin mato isharamapaiyai cuscan fustisi acahuun. Nanfin shara fustiquin. Ahuacai chaca huamisima. Ascacun marifi a cuscara shara icahuun. Nan man afafainnai cuscan isharacahuun.

¹⁶Diospan tsain cununi isca huaquin, —Unfi isharamisiquin. Ascan marifi isharacahuun, —ishon Diosin yoini cuscan cununi.

¹⁷Ointiaquimayamacahuun man nocon Upa Dios cufifafainai cuscan nanton noco nantifi oinfafainni nanscarafosi. Nanscacun Diosin nanscasi huaquin nocohuun noi. Upa Diosin nan yonoshomisifo cuscan atoti inanpacushquin. Nan yonoshosharamisifosi ato paratama inanpacushquin. Ascan nan yonosharamafo funoshcani. Ascacun oinfain. Nuno mai ano niyoshon Diosquiri shinansharacahuun mato

yonomapaiyai cuscan ashocahuun funoshcaquima. Man nonfin tapiaquin non nuno mai ano ipanacama. Non chipo Diosqui nocoshquin.

¹⁸Man manfin tapiaquin nocon shunifoan noco tapimapaoni cuscacai afoan noco numapacutiroma non afanan chaca inonma. Nan pui paratamacoinfiashocai noco numatiroma non afanan chaca huanonma. Nan pui chicoinfiahu nanfori cuyoi futsushquin.

¹⁹Cristo fustitofin noco numatiroquin. A fustitocai ahua chaca huanacama. Nan chashoan facu muma sharacoin cuscara. Jesús aficoi noco nashoni ahuun imi fonihuunshon noco numashqui non afanan chaca inonma.

²⁰Upa Diosin mai oni huataima Furun Jesús catonni noco Numamisi inon. Ascafia futsafoancai tapiyopaonima natiantan Diosin mato tapimana.

²¹Cristohuunshon man Diosin icoinra huamisi. Criston naafianicun Apa Diosin funimani afu nantifiton aton niaifocoin inon. Ascan manfin Dios icoinra huafain man man tapia chipo man afu ipashquin.

²²Man non Jesús icoinra huashon ahuun tsain iconcain cununi cuscari man nicacoinmisi. Ascashu man a cuscara shara imisi man icoinra huaa futsafori noicoimisi. Fomanonantama noinainshara finacoincahuun.

²³Man chaca ipaoni cuscacai man afanan ascaima. Diospan tsainhuunshon mato fiananan huaa. Ahuun tsainhuunoashu non ipasharatiro. Ahuun tsaincai cuyopacunacama. Nocon upa futan nocon uhua noco cainfiani non chipo natiro. Ascafia Diospan tsainhuunshon noco cainma funa. Ascashu ahuunoashu non afu ipatiro.

²⁴Un mato ahuara futsa tapimapai man tapisharanon.

“Faasi tau foaisharafiashu chipo samamashta tsasitiro. Charofori

taui sharashtacoin iyofiashu chipo samamashta tsasitiro afanancai non ointiroma. Nanscarifiai nantifi yoraforicai chai nipatirofoma. Nantifi non nai futsushquin. ²⁵Ascfia nocon Ifoan ahuun tsaincai ascarama. Nocon Ifoan noco yoia cuscan nan iconcoin cuyopacunacama.”

Nan tsain shara Jesushuunoa futsafoan mato yoimisi.

2 Ascacun nantifi man chaca huamisi cuscan unucahuun. Futsafohuunoa shinanchacayamacahuun ato chaca huafain ato parayamacahuun atori fomanyamacahuun. Futsa aya cuscan fipaiquin ato noicasmafain ato yoiti huayamacahuun. Atohuunoari tsain chaca yoiyamacahuun. ²⁻³Ascatarocon Diospan tsain shara fuchipaicahuun. Facu rama caianton shoma apaitiro cuscan huaquin marifi Diospan tsain shara fuchipaicahuun. Man man mumisi nocon Ifoan noco shara huashoaiton. Ascacun mato imapaiyai cuscan fustisi tapisharacahuun.

Cristofin nan toquiri mutsisipa cuscarauin

⁴Ascacun man toquiri pushu huaino toquiri ichapa yopafain nan uhuapa shara fusti man yopai pushu mutsisipa huashquin. Atirifi uhuapamafo afuchi putsainicani. Nanscarifiai nocon Ifo Jesusfin nan toquiri uhuapa shara nia cuscarauin. Icoinra huamafoan nocon Ifo fuchipaicana shinanquin isca huacani, —Aacai ahuama. Noncai a yopaimaran, —ishon yoifiaifoan Upa Diosin nocon Ifo Jesús catonni. Fasi ahuun noiconquin. —Tsoa futsacai a cuscarama, —ishon Diosin yoini. Ascacun aqui fucahuun maton toquiri mutsisipa cuscara shara imanon.

⁵Man aqui oashu nan toquiri uhua-pama nia cuscarafu man itiro. Nan Diosin pushu huatiro cuscai. Iquisi toquiri mutsisipa uhuapa shara fia. Nanfin nocon Ifo Jesús. Apan catonquin tau huani chipo nocorifi catonni Jesús cuscara shara non inon. Ascacun Jesushu-unoashu norifi non Diospan pushu cuscara. Tsoa na pushu muran opai ishara-cointiro. Ascacun nonfin ahuun pushu anoa ahuun yonomatifoquin. Ascashon noco amapaiyai cuscan fusti non Jesushuunshon ashosharatiro. Non Diosin Furuhuunshon isharamisi. Ascacun non yonoshonai cuscan Upa Diosin nocoqui unimacacaini. ⁶Ascacun Diospan tsain cununi isca huaquin,

“¡Oincapon! Un Cristo oian arus fustifin sharacoinquin. Ascacufin un catoanquin uhuun yorafoan ato ifo inon. Afin pushu quishi toquiri mutsisipa cuscarauin. Ascacun uhuun yorafo afu isharononfo. Tsoancai Cristo icoinra huashon shinan fut-sapacunacama. Ascatarocon afu unimapacucoinnacaran,”

ishon Diosin yoini.

⁷Icon tsoan Cristo icoinra huashon ahuunoa shinantiro isca huaquin, —Tsoa futsacai Jesús cuscara sharama. Un fasi ahuun noiconran, —ishon yoitiro. Ascfia tsoan icoinra huayamaino Diospan tsain atohuunoa cunquin isca huani,

“Pushu yonomisifoan quishi toquiri uhuapa shara potaifoan pushu ifoan yoiquin isca huatiro, ‘Nan quishi toquiri fasi shara. Un fuchipai nahuun uhuun pushu shara huashquin,’ ishon yoitiro. Nanscarifi aqui nan nicayosmashunifoan Cristo potafianifo Diospan catonni ahuun yorafoan aton Ifo ipanon,”

ishon yoini. ⁸ Afanan Diosin tsain yoini cuscan huafain un maton yoi isca huaquin,

“Toquiri uhuapa fai namancaia racafiano oinsharatamacai otiscaini non pacutiro. Nanscarifi aqui tsoan nocon Ifo Jesús icoinra huacoianshma pacui cafiscashu funotiro Upa Dios icari nocopaifiai omitsiscapanacafo muran focaniran,”

ishon Diospan yoini. Diosin yonofiani Cristohuunoa nicacasmafain yoitimashu funopacunacafo. Nannori Diospan tsain yoiyoni.

⁹ Ascafia Diosin noco catonni ahuun yorafo non inon. Afin niaifocoinquin non yonoshotiro futsafori cufishoshquin Jesushuunoa ato tapimashquin. Noco a cuscara sharacoin imaino non ahuun yoracoinfo itiro. Ascashon ahuunoa futsafo yoisharashquin. Non faquish muran ica shinantsa apaoni. Ascafia afincoin noco catonni ahuun yoracoinfo non inon afu shafacafi shara ipashquin.

¹⁰ Mancai ahuashta nicayopaonima. Ascafian natian man Diospan yoracoinfo. Diosin matohuun ramapaifiaiton mancai muyopaonima. Ascafia natian Diosin matohuun ramapaiyaitofin man man mumisiquin.

Diosin yonomati sharafo icahuun nantishotapiquin

¹¹ Uhuun yoramishtichin un mato yoisharapaiyai cuscan ua nicasharacapun. Non icoinra huamafo muran ifiashucaí non atofu ipanacama. Noncai aton yoracoinfoma. Ascafia nan icoinra huafoma icaifo cuscan ayamacahuun. Mato amaqiri shinanchacamapaifiaifoa ascara shinanyamacahuun. Nanfoan maton nomuran mato chaca huamapaicani. ¹² Ascacun ato murannoashu Jesushuunoashu icoinsharacahuun. Nan man niyoano matohuunoa tsain chaca yoifiamisifo chipo Diosin

nantifi noco ichanan huaitian nanfoan tapitirofo mancai ahua chaca huatama man icoinsharamisi. Ascashon yoitiro isca huaquin, —¡Aicho! Nanfoan Dioshuunshon futsafo shara huashomisi. Ascacun Dios sharacoinran, —ishon yoishquicani.

¹³⁻¹⁴ Nocon Ifoan apaiyai cuscan nantifi niaifofoan mato yonoaiton nicasharacahuun.

Niaifocoin nicasharafain niaifo patasharinoafori nicasharacahuun. Nanfo Upa Diosin nichini chaca huamisifo onaintimatan a nicasharaifo aton yoisharanonfo.

¹⁵ Ascan futsafo fasi tatimacoinshon amaqiri shinanmisifo. Ascashocai Diospan tsain tapipaicanima. Ascan ahua tapiamafiacashon mato isca huaquin yoipaicani, —Man Jesushuunoa yoimisi cuscan amaquiricoiran, —ishon yoimisifo. Ascan Upa Diosin mato yonomapaiyai cuscan futsafo man shara huashofafainaihuunshon man ato shatumatiro.

¹⁶ Jesús fusti maton Ifocoin. Ascan ahua futsa shinantama isharacahuun. Diosin mato amapaiyai cuscan fustisi huafafaincahuun. Ascashucaí ahua futsa maton ifo itiroma. Ahua chaca huatama Diospan yonomatifo ifafaincahuun.

¹⁷ Ascacun nantifi yorafohuun shinansharacahuun. Nantifi Jesús icoinra huafo noicoicahuun. Diosihuunoa shinancahuun isca huaquin, —Un Dios noicoinquin ua yonopaiyai cuscan un nicapaicoin. Uncai yoitima ipaima ua onaintimanonma, —ishon Diosihuunoa anori shinancahuun. Mato niaifofo nicacasmaquima ato nicasharacahuun.

Cristo noco omitsiscashoni cuscan norifi non ahuunoashu omitsiscatiro

¹⁸ Yonomatifoan maton ifo nicasharacahuun mato yoiainfo cuscan ashcaquin. Ato nicacasmaquima atohuunoa shinansharacahuun.

Nan mato shara huashomisifo fusti shinancaquima. Nan mato chaca huamisifori aton ismasharacahuun, ¹⁹Man chaca huayamafiadun mato ifoan mato omitsiscamafiaino Diosihuunshon shinanquin tunucahuun. Man tunuaiton Upa Diosin matohuunoa yoisharashqui. ²⁰Ascacun man chaca huahuunshon maton ifoan mato coshaino man tunuanocai matona ahuama. Man shara huahuunoashucal man omitsiscaima. Ascacun man shara huafiadun maton ifoan mato coshaino man tunucun nocon Ifo Diosin matohuunoa shinansharashquin. ²¹Cristofin nocohuunoashu omitsiscacoinquin. Ascacun norifi non ahuunoashu omitsiscatiro. Non ahuun caotiro a cuscara shara iishquin.

²²“Ascun nantocai tosa chaca huayamafain tosa paramisima.”

²³Futsafoan roafiainfoanocai pusinima. Omitsisca huafiainfoancai ato yoiquin isca huanima, —Un mato chipo copishquiran, —ishocai yoimisima. Ascatamarocon Apahuunoa shinanquin isca huani, —Upan man min uhuunoa onancoian. Nanscarifi huaquin min ato onancoian. Ascun min ato ashquiai cuscan iconcoiran, —ishon shinanni. ²⁴Jesusfin noco ihui coyan iquinanquinoashu noco nashoniquin. Nantifi nocon chacafo amuran cuyoinanni non afanan chaca huatamarocon non a cuscara shara ipanon. Nan isi muahuunshon noco caya huamai non afu ipanon. ²⁵Ascun manfin nan chashoanfo funoa cuscarafu ipaoniquin. Ascafia natian man mato cushumisi Jesusqui nasoa mato cushufafainshquin man afu rafupacunon.

Ahuuscashumain funu fu ahuin isharatiroquin

3 Ascun nanscarifiain ainfofoan maton funufo nicasharacoicahuun. Atirifi mato funufoan Diospan tsain icoinra huayamafia ato nicasharafain ato Jesushuunshon shara huashofafaincahuun ipaishomari arifi nanto nocon Ifo icoinra huatiroquin. ²Maton funufoan mato yoiaiton nicanimacaquima nicasharafain man Jesús cuscara isharaiton oin atirifoan nocon Ifo icoinra huatirofo. ³Foaromucai tuhuuti sahuufain sahuuti sharacapacoin sahuuahuunshonca maton funu man icoinra huamatiroma.

⁴Ascatamarocon maton nomuran shinansharafain man futsafo tsain tsii huafain yoisharamisicun nanscarafu Upa Diosin fasi fuchipaicoicoin. Nanscarafu oinquin, —Nan fasi shararan, —ishon yoitirofo. —Na cuscara ainfofin ahuun ica sharacoicoinquin, —ishon Diosin ahuunoa oinquin yoitiro. ⁵Nanscara nocon shunifo ainfofoan Diosin icoinra huafain isharamisifo. Diosin ato nomuranshon shinansharaino aton funufori nicasharapaonifo. Ascashon aton funu nicasharacoianfoanno ato funufoan atohuunoa shinantirofo isca huaquin, —Uhuun ahuinin ua shara huashofafaini. Ascain fasi sharacoicoinquin, —ishon funufoan shinantirofo. ⁶Nocon shuni Abraham ahuun ahuin Sara nanscapaoni. Ascashon ahuun funu fu tsainquin isca huapaoni, —Uhuun iforan, —ishon yoipaoni. Marifi ratutama isharacain nan Sara ipaoni cuscan man shinainno ahuun facufo cuscara man itiro.

⁷Nocofunufoan marifi nanscarifiain maton ahuinshtafo fu isharacain shara huafafaincahuun. Atohuunoa shinansharacahuun. Ainfofocai nocofunu mutsisipa cuscarafoma.

Ascashon ato cushusharacahuun. Diosin mato huun ramapaiyaino man afu ipanaca. Maton shara huaa cuscari Upa Diosin maton ahuinfori nanscarafosi sharashta huashoshquin afu ipanonfo. Ascan ato shara huacahuun man Dios cufiain cuscan mato ashonon.

Man futsafo shara huafaiiton mato omitsiscamacani

⁸Ascan nan un mato yoia cuscan. Nantififain nannorisi shinansharafain futsafoan ahuara finoncun atohuun ramapaiquin noicoincuun. Shara huatanancahuun. Cacapaimisi iyamacahuun futsafohuun ramapaiquin shara huafafaincahuun. ⁹Ascan futsafoan mato chaca huafain mato roafaiiton ato copitamarocon ato shara huacahuun. Nanscara Diosin noco yononi. Non futsafo shara huaiton oinquin Upa Diosin noco fasi shara huashquin. Noco Diosin catonni noco shara huaquin. ¹⁰Diospan tsain cununi isca huaquin,

“Man isharapaiquin ahuara chacafu yoiyamafain futsafo parayamacahuun. ¹¹Ahuara chaca huaifo muran foyamacahuun mato chaca huamatirofoquin. Ascatarocon futsafo shara huafafaincahuun. Futsafo fu fasi isharapaicoincuun. Fochishmanantanancuima. Maton nomuran tsi huatanancahuun. ¹²Ascashu man isharaiton oinquin Upa Diosin matoqui fasi unimaicain mato cushusharashquin. Ascashon man ahuara yocaiton mato nicatiro. Man yocai cuscan mato ashoshquin. Ascan tsoan chaca huamiscun Upa Diosin ato nicaima ato shatumashquin,”

ishon huani.

¹³¿Non futsafo shara huamapaiyaitomun tsoan noco chaca huamatiroquin?

¹⁴Ascacia ipaishoma man isharaiton mato omitsiscamatirofofia Upa Diosin mato shara huashquin. Diospan tsain cununi isca huaquin, —Icoindra huamafo musua cuscan musuyamacahuun. Ratuyamacahuun, —ishon noco yoini.

¹⁵Ascata ma maton nomuranshon nocon Ifo yoiqui isca huacahuun, —Criston minfin uhuun Ifocoinquin. Mincai ahuashta chaca huamisi. Minfin shara fustiquin, —ishon yoicahuun. Ascata ma futsafoan mato yoiquin isca huai, —Ahuuscashocon min tapiain min Dios fu ipashquiain, —ishon mato yocaiton iquisi itisharacahuun ato tapimasharashquin. ¹⁶Ascashon ato oi noma cumasharacahuun. Ato fu fochishmanantanancuima ato nicacoinsaracahuun. Man ahuara chaca huaa cuscan man fomainno mancai futsafo Jesushuunoa cayacafi yoitroma. Ascashon man chaca huashon Dios yoiriscacahuun Jesushuunoa yoisharashcaquin. Mato chaca huafiacanashu man isharaiton oinfin rafipaitirofoquin.

¹⁷Ascan non chaca huahuunooashu non omitsiscacai sharama. Man non-main chaca huashufin nonfin omitsiscatiroquin. Ascan non shara huaashu Upa Diosin noco amapaiyai cuscan non omitsiscai nanfin sharaquin. ¹⁸Cristocai ahua chaca huamisi. Nan fustifin sharaquin. Nantififain man non chaca huamisi. Cristo ahua chaca huayamafiamisishaquin nocohuunooashu nani nocon chaca noco soashoshquin. Afanancai nanacama. Noncai afanan ahua yopapacunacama nocon chaca soashonano. Man naafiashu Apan ahuun Yoshin Sharuunooashu funini. Ascashon Apa Dios icari noco iyoshquin.

¹⁹Ascan Jesús naino ahuun Yoshin Shara nan a namisifo icano cani. Nanfo nan cunu muran ica shinantsa apaonifo. Ato ano cani ato ahuun

tsain shara yoishquin. ²⁰Ascan nan Noén shashohuan huai chain Diosin funaquima yorafo manayopaoni aton chacamain shatucaniquin ahuun tsain icoinra huashcaquin. Ascan Noén fustiton ahuun yorafo yashon nicacoinnifo. Ocho yora shashohuan muran iquinifo asashcaquima. Ascaino atirifoancai tsoanshta Dios nicapainima. Ascaino faitahuan nocoaino asai futsunifo. Cristo funiataima aton yoshin icafo muran cani ahuun tsain ato yoishquin.

²¹Noé unu faitahuaino shashohuan muran iquiashucaí asanima. Faitahuan nocofianocai Noé yafi ahuun yorafo shashohuan murannoashu asanifoma. Nanscarifiai futsan noco unu muran iquimanaino funishon non yorafo ismai Cristo Jesús noco funimani non afu ipanon. Nan unu muran non iquiainocai non yorafo ismaima noco caya non nashimana afanan choshta inonma. Ascatamarocon non ato ismai nocon chaca soashocun Cristofin noco funimaniquin noco numashqui. Ascan non afanan shinanchacatarocon non Jesushuunshon shinansharanon Dios fu ipashquin. ²²Ascan natian Criston Apa fu ica niaifocoin ipashquin. Tsoashtacai finontiroma. Ahuun oinmati afu nai muran icafo non nantifi yoshinfo non aton niaifofori nantifi ato yoiai cuscan aashcaniquin.

**Upa Diosin noco ahuun curush
inain cuscan huafain non
futsafo shara huashoshquin**

4 Criston niyoashu omitsisicapaoni. Ascacun nanton shinanni cuscan marifi nannori shinancahuun. Arifi omitsisca cuscan marifi man omitsiscatirofia ahuun curushhuunoashucaí chaca afanan mato ifo itiroma. ²Anori shinanquicai man afanan chaca shinainma Upa Diosin mato amapaiyai

cuscan fustisi man huapaitiro. ³Fari ichapacoin man man funoa Jesús icoinra huamafoan amisifo cuscan man huapaoni. Man chaca huapaiyai cuscan fustisi man huapaoni. Yamutifi monocain ayafain maton nomuran shinanchacafain maton ahuinmafo ya ipaicain ainfori aton funumafo ya ipaiyaifono paunmisicoin icain futsafo ya ichananshu atofu monoshquin mucayanan Dios noitama ahuafo futsafo man noipaoni. Nan chacafin Upa Diosin noicasmacoianquin. Ascacun afanan ascayamacahuun.

⁴Ascan nan man chaca huapaoni cuscan man shatuno matofu rafupaonifoancai ahuuscashon tapitirofoma. Ascashu matohuunoa yoiquin isca huatirofo, —¡Aira! ¿Ahuuscain afanan na yorafo no fu ichananpaicanimamun monoyanan non atofu paunpaoni? ¿Ahuuscain afanan ascapaicanimamun? —ishon yoicanashu mustairiscatirofo. Ascashon mato roatirofo. ⁵Anori shinanfiatirofo Diosifin noco niaifocoinquin. Nan muma niafo futan naafoan. Nantifiton ahuun ointaifi yoiquin isca huashquin, —Ahuuscain uhuun facu man icoinra huayamafain niyoshon man chaca huapaiyai cuscan fustisi man huamisimun, —ishon ato yoishquin. Ascashon ato onaintimacoianquin. Futsafoan yoishquin isca huaquin, —Min uhuun facu icoinra huacoinmisiquin. Ascan natian min ufu ipatiroran, —ishon ato yoishquin.

⁶Ascacun Upa Diosin ahuun tsain yoishomisifo nichini nantifi yorafoan ahuun tsain shara Jesucristohuunoa nicasharanonfo. Nan naamisifoanri niyocashon man nicayopaonifo. Nantifi man nai futsumisifo. Ascafia nan ratoran futsafoan Jesús icoinra huacun Upa Dios nia cuscan atorifi nimapacushquin afu nipanonfo.

⁷Ascacun tsain futsari un mato yoinon. Shinanapon. Nantifi manifoti man cuyoti chaima. Ascacun cayacafi shinansharacahuun. Ahua chaca shinantamarocon Upa Diosin mato shinanmapaiyai cuscan nan fusti shinacahuun. Ascashon Upa Dios cuffafaincahuun. ⁸Ascashon noinancoincahuun. Nan non noinancaifin sharacaiquin. Futsan noicoishon non ato rau huatiro noco chaca huai cuscan afanan shinanonma. ⁹Futsafo maton pushu ano nocoaiton aqui unimacai mato pushu muran iquimasharahuu. Mato nomuran aqui mutoquima.

¹⁰Ascan Upa Diosin noco ahuafo futsa futsa huaquin tapimashara cuscar nan icoinra huaa futsafori non ato shara huashofain non atorifi curafia huanon. Man ascaiton oinquin Upa Diosin ahuun yorafo noicoiain cuscan huafainri man atohuun noicoitiro. Ascacai unuyamacahuun.

¹¹Ascan ichananshon Diospan tsaincoin ato yoicahuun. Diosicoinchi yoicafisca huaquin. Ascan Diospan curushhuunshon futsafo shara huashocahuun. Ascacun nantififain Jesucristohuunshon Upa Dioshuunoa yoisharanonfo. Man ascaiton oinquin nantifi yorafoan yoitirofo isca huaquin, —¡Aicho! Upa Diosin fasi shara. Furun Jesucristohuunshon ahuamamishti huatiroran, —ishon yoishquicani. Nocon Ifo Jesucristo arus fusti shara huamisi. Nantocai ahuashta chaca huapanacama. Arus fusti ahuun curushhuunshon ahuamamishti huapanaca. Asca huapacuquicain ununacama. Nanscasi huapanaca.

**Jesús icoinra huafo omitsiscatiro.
Futsafoan ato omitsiscamamisifo**

¹²Uhuun yoramishtichin omitsiscafiai mustairiyamacahuun.

Shinanchacayamacahuun. Man tunucoiainton oinquin Upa Diosin tapitiro man Jesús tanacoian. Ascacun shinanqui isca huayamacahuun, —Ahuuscain un omitsiscaimun, —ishon anori shinanyamacahuun. ¹³Anori shinantamarocon unimacahuun. Man Cristo fu omitsiscai cafiscai. Natian marifi man mua ahuunoashu omitsiscafiashu chipo man aqui nocoaitian nan isharamisi cuscan marifi man afu ipasharapacunaca. Ascacun omitsiscafiain fasi unimacoincahuun.

¹⁴Ascan man Cristo tanacun Upa Diosin mato shara huashoin. Ascashon ahuun Yoshin Shara mato ya rafumapacushquin. Ahuunshon man mutiro Jesús matofu ica. Ascan mato roafiaifoanno unimacoincahuun. ¹⁵Ascan futsafoan chaca huamishhacaqui ato chacahuunoashu omitsiscatirofo. Ascashu rutumitsamisifo icain yomutso icain pofucoin icain ahuunoamafia futsanhuunoa ahuara yoipaimisi. Ascacanashu ato chacafihuunoashu omitsiscatirofo. Ato cuscara iyamacahuun omitsiscashcaquima.

¹⁶A man mua nocon Ifo Jesús icoinra huashu rafiymacahuun. Ascaquima. Upa Dios yoicahuun isca huaquin, —¡Aicho! Upa Diosin un min Furun Jesús ahuun yora. Ascacun nan icoinra huamafoan ua omitsiscamaifoanno un Jesushuunoashu omitsiscamisi. ¡Aicho! —ishon yoicahuun.

¹⁷Ascan nonfin Diospan yorafoquin norifi natian non omitsiscayoi. Non omitsiscaiton nocon Ifo Criston noco yoipai isca huaquin, —¿Uhuun yorash-tan ua mian noicoianmun? —ishon noco yocatiro. Ascafia natian non omitsiscafiaiton Upa Diosin tapitiro nonmain Jesús icoinra huacoinnaquin. Chipo nantifi nan maifoti cuyoaitian nan Diospan tsain Jesushuunoa nicacasmamisifo Upa Diosin ato onaintimashqui. Ascan na-

tian norifi non omitsiscayofiashu chipo nan Jesús icoinra huamafo mimacoincani omitsiscapanacafoquin. ¹⁸Diospan tsain yoini isca huaquin,

“Nan icoinra huafo isharamisifo Dios ari nocoataima omitsiscayotirofo. Ascafia Dios ari nocoashucaí afanan tsoa omitsiscapanacama. ¿Ascashon Dioshuunoa shinantama chaca huamisifo ahuuscacanimun? Nanfofin fasi omitsiscapanacafoquin,”

ishon cununi. ¹⁹Ascacun Diosin mato yonoai cuscan omitsiscafiacaquin shinanchacayamacahuun. Nanton mato onihuaniquin. Ascacun nan yoiquin isca huacahuun, —Upan Diosin min ua amapaiyai cuscan shara fustisi un huapai. Mirus fustifin min ua yonotiroquin, —ishon Dios yoicahuun. Ascashu isharafofaincahuun. Nantofin mato yoimisi cuscacoin huamisiquin.

Pedronun icoinra huafo yosisharani

5 Ascan natian ichananfo cushumisifoan un mato yosipai. Ua nicasharacapun. Ascashon maton nomuran uhuun tsain nanucoincahuun. Urifi Jesús icoinra huafo un ato cushumisi. Nocon Ifo Cristo omitsiscaiton un oinni. Chipo afanan nasoshquaitian urifi un afu isharafofaincahuun tsoan oinyomisima cuscara sharashtacoin nantifiton oinshquicani. Ascan nantifiton nocon ifon iishquin.

²Ascacun un mato yoi nan Jesús icoinra huafo ichanainno Diosin mato yononi cuscan ato cushusharacahuun. Ato Diosin tsain yoisharacahuun isharononfo. Ascashon shinanquin isca huayamacahuun, —¡Ohua! Un ahudara futsa huapaifaiquin un Diosihuunshon ato cushuiran, —ishon shinanyamacahuun. Ascatamarocon yoiquin isca huacahuun, —¡Aicho!

Diosin ua amapaiyai cuscan un ahuun yorafo cushusharairan ahuun tsain tanasharanonfo, —ishon anori man shinainno Upa Diosin matoqui unimacoinni. Ascafia maton nomuranshon man shinanquin isca huai, —Un ato cushuaihuunshon ua pui inantirofo, —ishon anori shinanyamacahuun. Pui fustihuunoa shinanyamacahuun. Ascatama Dios fasi yonoshosharapaiquin ato cushusharacahuun.

³Ascacun ichananfoan ato niaifo cuscara iyamacahuun. Ato yonoyamacahuun nan mafin man apaiyai cuscan arifi huanonfo. Ascatama ato Jesushuunshon ismasharacahuun matohuun caononfo. Man ascaino arifi Jesús cuscara inonfo. ⁴Nan nocon cushumisi-coifin nocon Ifo Jesucristoquin nan no-coaitian mato yoishquin isca huaquin, —¡Aicho! Man mai ano niyoshon ua icoinra huafo man ato cushusharamisi. Ascaino nantifi un iquinafo ya man ufu ipatiro niaifo patashari iishquin. Man ufu ipaiyai cuscacai unupacunacamaran, —ishon mato yoishquin.

⁵Nanscarifiai pushcofoan iyoafofo nicasharacahuun mato yoiainfo cuscan aashcaquin. Pushcofoan iyoafofoya shara huatanancahuun.

“Upa Diosicai cacapaimisifo cuscara tapipaima. Ascashon nan cacapaimisifo ato onaintimashqui. Ascan nan tsii huatananmisifofin shara huashoshquiquin. Nan cuscarafohuun Upa Diosin atohuun ramapaiquin ato shara huashofafainshquin,”

ishon Diospan tsain cununi. ⁶Ascacun nan Upa Diosin fustiton ahuamamishi atiro. Nanton mato amapaiyai cuscan unimacai acahuun. Shinanqui isca huacahuun, —Un Upa Dios fasi yopai. Diosinmaisicai un isharafofaincahuun, —ishon anori shinancahuun. Man as-

caiton Diosin nan apaiyaitian mato amasharashquin man afu ipanon. ⁷Ascashon matohuunoa shinanfaini mato cushusharashquin. Ascan man ahuarafo shinanchaca cuscan Upa Diosin yoicahuun maton nomuran unimamanon.

⁸Masharo fonainquin cahuancaicaiquin ahuarafo funafoanfainni piishquin. Nansarifiai nan nocon noicasmamisi yoshin chaca Satanás cahuncacaini tsoan Diosihuunoa shinanyamaifo ato chaca huamafain ato omitsiscamashquin afanan Diosihuunoa shinanonfoma. Ascacun oinfain. Ahuara chacahuunoa shinanyamacahuun. Upa Diosin mato shinanmapaiyai cuscan nan fusti shinanchahuun Satanás mato chaca huamanonma. ⁹Nan man omitsiscacai cuscan icoinra huaa futsafo manifoti anoafori omitsiscacani. Ascacun Satanás mato chaca huamapaiyaiton nicayamacahuun. Maton Ifo fustisirocon icoinra huacahuun. Ahuara chaca tunufafaincahuun.

¹⁰Ascan man omitsisca cuscan anaitiano Upa Diosin a cuscaracoin mato imasharafain ahuan curush mato inanshquin. Diosin matohuun ramapaicoin. Ascashon mato mutsismanaino nan ahuara ahuuscarafiaino man Jesús icoinra huacoinnon. Ascashon

nan fustisi man shinainton mato catonni man afu ipanon. Nannoshon nantififain ointirofo nocon Ifo Jesús sharacoicun nanrifi nantifiton ato niaifocoin. Nantianri man afu ipashquin. ¹¹Nantofin ahuamamishtifo huapanacaquin. Nan fustiton atiro cuscacai tsoa futsan huatiroma. Nanscasi huapanaca.

Ahuun unutaquin Pedronun ato yoisharani

¹²Unfi Silvanohuunoa shinansharamisiquin. Unfi nan icoinra huatiroquin Diosin amapaiyai cuscan huamasicun. Un tsain ichapama cunua maton nomuranshon man shinansharanon. Un mato cunushona cuscan Upa Diosin matohuunoa shinansharamisi. Ascan ahuara ahuuscarafiaino Dios fustihuunoa shinansharacahuun.

¹³Jesús icoinra huafo ichananmisifo murannoa Babilonia anoafoan mato yoisharafo. Uhuun facushta Marcos arifi mato yoisharapai. ¹⁴Marifi man noinantanain yoinonansharatanancahuun. Manfin Cristo yorafoquin. Ascacun maton nomuran unimacahuun. Nanti.

Pedro

Pedronun Afanan Icoinra Huafo Cunushoni

Pedronun ato yoisharani

1 Unquian Simón Pedro un mato cunu fomai. Unfi Jesucristo ahuun oinmatiquin. Un afu rafumisi. Ua nichini un futsafo ahuun tsain shara yoinon. Un mato shinain. Nocon Diosin nan nocon Numamisi Jesucristo un icoinra huaa cuscan marifi nanscarifi aquin man icoinra huamisi. Ascashon icoinra huacashon man mumisiri nan fasi shara finacoian. Diosin fasi sharacoin matori icoinra huamani. ²Ascan man Upa Dios yafi Furun Jesús nan nocon Ifo man onancoincun matohuunoa shinan-sharaquin matohuun ramapaiqui maton ointi unimamatiro.

Cristo ahuun yorafo icafo cuscan

³Jesús noco catonni a cuscara shara icain non afu ipanon. Nantofin ahua-mamishti huatiroquin. Non Jesús onancoincun non yopai cuscan ahuun curushhuunshon noco inanshquin. Ascashon noco imapaiyai cuscan non anon. ⁴Noco yoyiotiani cuscan ahuun curushhuunshon ahuaara futsafo shara-coin noco ashoshquin a cuscaracoin non inon. Ascan nan icoinra huamafoan afin chaca huapaiyai cuscan huamisifo. Ascafiacun Jesús nocori numai non aton cuscara chacafo inonma. ⁵Ascacun nan mato imapaiyai cuscan fusti ipacahuun. Icoinra huashu a cuscara sharacoin ifafaincahuun. A cuscara shara man icaino Dioshuunoashu finonmafain mato amapaiyai cuscan fustisi tapicahuun. ⁶Ascan mafi man apaiyai cuscan fusti shinancaquima ahunoashu isharafain ahuaara ahuuscarafaino tunufain Dioshuunoa fusti shinan-fafaicahuun. ⁷Ascatari nantifi yorafo

shara huafain ato oi tsii huashon ato noifafaincahuun.

⁸Man asca huafafaini nocon Ifo mimacaiquin man onancointiro. Ascashon mato amapaiyai cuscan man yonoshosharatiro. ⁹Ascafia man ascayamai nan fusho cuscara man iishquin. Mato amapaiyai cuscacai man ointiro. Ascacun man chaca huapaoni cuscan Jesús mato chaca soashonano man man ointiaquima.

¹⁰Ascacun uhuun yoramishtichin Upa Diosin mato amapaiyai cuscan nantifi acahuun. Ascashon man tapicointiro mato catonnicun ahuun yorafo man inon afu ipashquin. Ascashuca man chaca huapaoni cuscan man afanan nasopacuna-cama. ¹¹Ascan nocon Numamisi Jesucristo ahuun yorafo iquina ari marifi man nocotiro. Man nococun mato isca huashquin, —¡Aicho! Iquiyohuu. Min niyoshon uhuun tsain nicacoinmisiquin. Ascan natian min ufu isharapacuiquin, —ishon Jesús mato yoipacushquin.

¹²Nan un mato yoia cuscan man man tapicoian. Un icon yoimisi cuscan. Ascashon nantishotapiquin nanfohuunoa un mato shinanmashquin man ascapacunon. ¹³Un niyoatian nannori mato shinanmafafainshquin. Uafin nocon Ifoan yonoaquin un mato yosinon. ¹⁴Nocon Ifoan Jesucristo ua cayacaficoin tapimana un samamashta nai. Ascacun un mato nanfohuunoa nantishotapiquin shinanmai marifi man u futan nannorisi shinanon. ¹⁵Un mato yoiri mun nafiano un mato yosimisi cuscan man ointiaquimanonma.

—Cristo Diospan Furun chashapacuhuanaiton non oinniran, —ishon Pedro yoini

¹⁶Ascacun nonfin mato tapimamisi nocon Ifo Jesucristo ahua-mamishti huatiro, —Afin chipo nocoqui nasoshquiran, —ishon non mato

yoimisi. Non mato yoimisi cuscan nocofunufaoan aton nomuranshon shunipafo onihua cuscaai non mato yoimisima. Noficoi non oinmisi cuscan non mato tapimana. Upa Diosin Jesús chashamapacufoannaiton man non oinni. ¹⁷Nantianri Upa Diosin nai muranshon Furunhuunooa yoini isca huaquin, —Nanfin uhuun facucoinquin. Un ahuun noicoi. Un aqui unimacoinniran, —ishon Upa Diosin nan ahuamamishti huatiroschaquin Furunhuunooa yoini. Tsoa futsacai a cuscara sharama. Arus fustifi icoinsharamisiquin. Furun ahuu cuscara sharamainquin ishon nan machi anoshon Upa Diosin noco ismani. ¹⁸Nan machi ano norifi non afu ini. Nan machi Upa Diosin catonni nannoshon ahuun yono shara noco ismani. Nai muranshon Furunhuunooa yoiai cuscan norifi ahuun oi non nicacoinni.

¹⁹Ascan Diospan tsain yoimisifoan inonpacoai cuscan Jesushuunooa cununi cuscan natian non icoinra huaquin finacointiro. Ascacun marifi icoinra huacoincahuun. Nan tsainhuunooa shinanfafaicahuun. Natian man faquish muran ica shinantsa ain. Ascafia Jesús mato chashamashotiro nantishon tapiquin man tanasharanon. Nan yamutishon man manamisi afanan shafaitian faquish inonma. Nanscarifiai Jesús afanan nocoaitian man manai afanan faquish cuscara muran ishquima. Nantianricai afanan ahua chaca shinantama maton nomurancairocon man fasi unimai finacoinshquin. ^{20–21}Ascacun tapicahuun isca huaquin. Diospan tsain yoimisifoancai afin aton nomuranshon shinanfain cunupaonifoma. Ascatama Diospan Yoshin Sharapan ato shinanmana cuscan nannoricoin cunupaonifo. Ascashon Diosin ato yonoa cuscan cunushonifo.

Futsafoan chani fusti ato yosipaonifo

2 Ascafia nantianri futsafoan Diosihuunooa amaquiri yoipaonifo isca huaquin, —Upa Diosin noco yoia cuscan non mato yoiran, —ifiacashon parapaonifo. Nanscarifiai nan cuscara paramitsamisifoan mato muranshon yoishcani isca huaquin, —Upa Diosin mato yoipaiyai cuscan noco tapimana non mato yoinon, —ishon mato yoifiacani chanimisifo. Mato fomanpaicani. Mato amaquiri yosiaifono afanan nannorisi cayacafi man shinanonma. Ascacun un mato yosin tsoan ato tanashufin funotirofoquin omitsiscapashcaquin. Nocon Ifo Jesús ato nashoni afanan chaca aton ifo inonma. Ascafia nocon Ifoan noco tapimapaoni cuscaai icoinra huafoa. Nanfoan Jesús ifoacasmacani. Ascacun nanfo ascaifoan Upa Diosin ato onaintimariscashquin omitsiscapanonfo. ²Nanfoan fasi chacacoin ato tapimanai cuscari yora ichapafaoan ato tanashcani. Ascashon Diospan tsaincoihuunooa shinanchacatirofo. Ascacashu Diosin ato shinanmapaiyai cuscan funofo. ³Nan chanimisifoancai futsafo shara huapaicanima. Nanfofin yoashicoinfoquin. Diospan tsaincain ato tapimatamarocon aton nomuranshon amaquiri shinainfo cuscan fusti mato tapimashcani. Ascashon maton pui fianshcani. Ascatan mato parashquicani. Ascafia Diosin ato oin chaca huaifo cuscan ointiaquimashquinma. Ratoran shafata ato onaintimashqui omitsiscapanonfo.

⁴Upa Diosin ahuun oinmati afu ica atirifoan chaca huapaoni. Ascaifoancai Diosin ato rau huanima. Ascafia Diosinmaquinoashucaai tsoa raquishta ichotirofoma. Ascashon ato faquishihuan muran potani raqui

fononfoma. Nanno faquishihuan muranshon mananonfo Diosin nantifi nan Jesús icoinra huafoma onaintimaitian atorifi fuopacufoannafo muran potashquin. ⁵Nanscarifiai nan yorafo Noé niyoatian Diosin tsain nicacasmapaonifo. Ascan Noé ato yoini isca huaquin, —Dios sharacoin. Ascan maton chaca shatucahuun a cuscaran shara inonran, —ishon ato yoini. Ascafiashuca tsoan Dioshuunoa nicacasmapaonifo. Ascacun Diosin yonoo faitahuanun nantifi yorafo manifoti anofo ato cuyoni asai futsunonfo. Noé yafi ahuun yorafo siete tushunifo. Diosin ato numaino asanifoma.

⁶Nanscarifi aquin nan Sodoma yafi Gomorra ano icafoan fasi chacasi huapaonifo. Ascacun Diosin yoini, —Un ato onaintimacoinshqiran, —ishon yoini. Yoitan nai muranshon chi urumahuan potani ato coaino nai cuyononfo. Nanno chi mapo fusti ini. Nanscarifi aquicai Diosinhuunoa futsafoan shinanmisifoma. Nanscacun ato musu huapaifaino atirififain chaca shatuyamashu omitsiscapashceni.

⁷⁻⁸Ascan nan Sodoma yafi Gomorra coatima nan nocofunun Lot Diosin yononi cuscan tanacoianshu isharapaoni. Ascan nanno icafoan chaca fustisi shinanpaonifo. Ascaifoa shafatifi Lotpan ato oinni chacanisi tapiaifoa. Ascaifoanno ahuun nomuran fasi fucash mupaoni. Nocofunfoan shafatifi tsain mutsama yoifafainoaino nicai ahuun nomuran fasi ihuucoin muuni. Ascacun Diosin nan fusti numani chaca huamisifoya nanonma.

⁹Nanscarifi aqui nocon Ifoan ahuun yora sharafotisi numatiro ahuarafoan noco chaca huamapaifainnai cuscan non anonma. Ascashon nan chaca huamisifori ato onaintimashqui ahuun unutaqui ato omitsiscapanacafo

muran potashquin afanan ariashu funonfoma. ¹⁰Nan aton nomuran shinanchacamisifoan ahuara chaca fusti huapaiyaifo cuscan huamisifo. Nanfoan noco Ifo Cristo nicacasmamisifo. Ascan nan cuscara yorafo Diosin ato onaintimaquin finacoinshquin. Nan cacapaimisifoan shinanquin isca huamisifo, —Tsoancai noco yonotiroma, —ishon shinanfaimisifo. Diospan nai oinmati sharafori roafiaicai toa musutirofoma.

¹¹Asca huafiaifoanno Diospan oinmatifo nan Dios fu icafocai ato cuscarama. Nanfoanfin ato finoncoianquin. Nan cacapaimisifocai Dios oinmatifoan ato curush cuscarama. Ascafia Diospan oinmatifoancai Diosin ointaifi nan yoshin chacafoqui tsain chaca huamisifoma. ¹²Nan chaca huamisifocai Diosin nai oinmatifo cuscarama. Ahuarafohuunoa tapiamafiacanashu roanmitsapaimisifo. Nanfoanfin nan yoina pofu cuscarafokin. Nan cuscara yoinatocai shinansharatiroma. Ahuara chaca huapaiyai cuscan fusti nanscasi huafafaintiro. Nan yora chacafofin nanscarafokin. Ascacufin Diosin ato achishon namashquin omitsiscapanonfo.

¹³Nanfoanfin futsafo omitsiscamamisifoquin. Ascan Diosin copiquiri ato omitsiscamapacunaca. Shafatifi nanscara yorafoan faquishiataima chaca huapaiyaifo cuscan fusti huacani. Ascan manfin noinancoianquin ichananshon pishcaquin. Ascan nan paramitsamisifori matofu ichananfo. Jesús icoinra huacoianmafianashu mato muran iquiafo mato futan pianan mato parapaicani. Nantianri nan chaca huamisifo cuscar huacani. Nanscara fusti fasi fuchipaicani. ¹⁴Nan ratorashta ainfo ointani afu ipaitiro. Chacasi huapaifaini. Ainfoan Jesús tanasharayamashon ato chaca huamai

atofu iishquin. Atonama fuchipaimisifo. Nanscasi aifin fuyamisifoquin. Diosin nan cuscara yorafo onaintimai omitsiscapanonfo.

¹⁵ Nanfofin Balaam cuscarafokin. Balaam Beorpan furumun Dios cachiquiri huani. Pui fiishquin yorafo ato chaca huapaoni. Nan chaca huai cuscan fusti noipaoni. Nanscarafoan mato paramisifoquin. ¹⁶ Diosin yonoafin Balaam ahuun burro nan yora tsaintiro cuscan ani. Ascashon ahuun ifo yoini, —Ahuuscaquimun min ua coshaiquin, —ishon nan muropan Balaam yoini. Ascaino Balaam nan yora nison cuscaracoin ini. Fasi amaquiricoin shinanni.

¹⁷ Nanscara nocofunufocanai Diospan tsain noco tapimacoin sharama. Isca atohuunoa mato yoinon. Nanfofin pozoa nutsoa cuscarafokin. Pozo ano nocoquin nonmaincokin nan pozoa nutsofiashu non nomi shatutiroma. Nanscarifi aquin atohuunshon non Dioshuunoa tapitiroma. Coin fisopan oinquin non shinantiro, —¡Aicho! Natian oi fui. Nocon mai mutocoincun muchana huashoin nocon yonofo foai sharanon, —ishon non shinantiro. Ascan coin fiso fuuhuanquin noco finonquin nocon mai muchana huatiroma. Nanscarifiai nan yorafoan noco shinanmapai Dioshuunoa noco tapimaifiai atohuunshon non ahua tapitiroma.

¹⁸ Nan chanishunifo fasi cacapaimisifo. Ascashon yoitirofo isca huaquin, —Non tapia cuscaai tsoa futsan tapiama. Nan futsafoan atirofoma cuscafin non huatiroquin, —ishon ipaitsi yoificanashu chanimisifoquin. Futsafoan ato chacan ramashta shatufiacanashu nan paramisifoan ato yoitiro isca huaquin, —Min futsan ahuin fu ipaiyai cuscafin sharaqin. Ahuunfin min fasi unimatiroquin. Non

anoncahuun, —ishon futsan iyotiroquin futsa afanan chaca huamashquin.

¹⁹—Man ahua shara huahuunoashuca man Dios fu ipatiroma. Ascacun nan man ahua chaca huapaiyai cuscan huacahuun. Man apaiyai cuscan tsoa mato shatumatiroquin. Unimacai acahuun, —ishon ato yoifiaquin ato fasi amaquiri yosiafo. Ascafia naforicai isharamisifoma. Afiri paramucani. Nan chaca fustifi ato ifoquin. Nanfo Satanás ahuun oinmatifo. Ahuarafo iyamarai tsoaran futsa nocon ifocun non ahuun oinmati itiro.

²⁰ Tsoan nocon Ifo nan nocon Numamisi Jesucristo icoinra huashocai nan icoinra huamafoan chaca huamisifo cuscan afanan chaca huaima. Nan chacafo maquinoashu pashcatiro afanan ato ifo ishquima. Ascafia afanan ahuun chaca aqui nasaino nan ipaonima cuscara fasi chaca finacoian iishquin. ²¹ Man Jesús fu rafumisifiashu chipo man cachiquiri huashu afanan man aqui nasocasmai. Ascacun man Jesús tanayamamisifin shara icuanaquin. Nan Jesús icoinra huamafo Diosin ato onaintimashqui. Ascafia tsoan Jesús Ifopaonifiashu chipo cachiquiri huafoan ato onaintimaquin finacoinshquin.

²² Nanscarifiai nocon shunifoan iconcain Diosin tsainhuunoa cununifo isca huaquin,

“Pashnafin nan pashnacoinquin ahua futsama. Pashna nan imisi cuscan anantiro. Ascashu chaimashta cayotiro. Ascatan afanan nasocuratan ahuun anan afanan pitishotiro. Yahuarifi nan yahuacoinquin ahua futsama. Yahua nan imisi cuscan michanpan ipaitiro. Nashifiashu afanan michan ano nasotiro nannoashu afanan michanashquin,”

ishon cununifo. Nanscarifiai tsoan Diospan Yoshin Sharahuunshon ahuun ointi fiananan huataimashufin Satanás ahuun yoracoinquin. Ahuara futsa cuscarama. Ahuun chaca shatuyotirofia nan chaca huamisi cuscan afanan ahuun chacaquin nasotiro.

Nocon Ifo Jesús afanan nasoshquin

3 Uhuun yoramishtichin afanan un mato cunu foma futsai. Nan na cunun un mato shinansharama futsapai man afanan ointiaquimanonma. ²Diosin tsain yoimisi sharafo nan nocon shunifoan yoipaonifo cuscan norifi nocon Numamisi Jesús non afu rafumisicun noco yonopaoni cuscan huafain un nanfohu-unoa mato shinanmapai.

³Iquisi un mato tapimapai Jesús man oti chaimacoin. Nantianri atirifi yorafoan chaca huapaiyaifo cuscan fusti huashquicani. Nanscarafofin matogui cashu mutsamatirofoquin. ⁴Ascashion mato yoiquin isca huacani, —¿Diosin yoini cuscamun a Jesús oa raniquin? Nocon shunifo nayopaonitiancai ahuashta fianananma nanscara fustisi. Diosin mai onihuani chaincai ahuashtari fianananma. Nanscasi airan, —ishon yoishquicani. ⁵Man tapificashocai tsoan shinanpaicanima Diosin unuhuan nushmancayan mai onihuani. Ascashu unuhuansi iyopaoni. Ascafia Diosin ahuun tsainmansi unuhuan nushmancayan mai onihuariscatani.

⁶Unuhuanunri mai fupoaino nantifi yorafori asai futsunifo. ⁷Nanscarifi aquin ahuun tsainmansi nai yafi mai yoiai cuscan mucuyotiro chipo nantifi coashquin. Nantianri Jesús icoinra hua-mafo nan chaca huamisisifo Diosin ato onaintimashqui omitsiscapanonfo.

⁸Ascacun uhuun yoramishtichin ointiaquimayamacahuun man non yoimisi mil farifi fasi chaicoquin. Ascafia nan shafa fusti non yoimisi

chaimashtacoin. Ascashion non shinain cuscacai Diosin shinainma. Diosin nanscarasi nan rafu oinfafainni. ⁹Ascafia atirififoan shinancaquin isca huacani, —Nocon Ifoan yoyiotiani cuscan icataima. Ascafia man yoini cuscan finonpacucoinran, —ishon shinancani. Ascaquimarocon Diosin nocohuun ramapaicoin. Tsoacai omitsiscapanacafo muran potapaima. Funaquimafin ato mana sharamisiquin nantifiton aton chaca shatunonfo ahuun tsain nicasharashcaquin omitsiscapashcaquima.

¹⁰Ascafia nocon Ifon Jesús samamashta nocoriscai. Yomutso yamu noco pushuano nocoriscaitocai tsoan tapitiroma ahuutiacaomain nocoriscaicain. Nanscarifiai tsoancai tapiama ahuutianmain nocon Ifo nocoriscatanicain itisharafoma mustairiscatacani. Nan nocon Ifo nocoaitian achahuancoi iishquin. Nantiantan nai murannofo cooi cuyotanaino yamariscatashquin. Mairifi nantifi mai anoafori cooi cuyotanaino yamariscatashquin.

¹¹Na rama un mato yoiai cuscan nantifi ishquiai tapicashon nocon Ifo nicasharacoincahuun. Nanscara shara icahuun. Non itisharashucai non ipaoni cuscan non afanan ashquima. Afin noco imapaiyai cuscan fusti non anon. ¹²Jesús ratoran shafata nocoriscataniquin shinanfafaicahuun. Ascacun futsafo Jesushuunoa yoicahuun icoinra huanonfo aton chaca shatunonfo Jesús samamashta oiquin. Icon Jesús oaino nantifi nai muran cooi chii huancoinni fasi mushan mushancoin huai. ¹³Ascafia Diosin yoini cuscan nanfo coano nai yafi mai funa futsa oni huashquin icoinra huafo fusti nanno iishquicani. Ahuara chacacai ano itiro. Shara fustisi itiro. Ascacun nan non mana sharanoncahuun.

¹⁴Uhuun yoramishtichin man Jesús manaquin maton nomuran shinansharafafaincahuun. Ahuara chaca shinanyamacahuun. Man ascaiton Diosin mato ointiro ahuun Furunhuunoashu man sharacoin icun. Diosiqui ratuquimarocon shinanquin isca huafafaincahuun, —Upa Diosin ahuun Furunhuunshon ua noi. Unrifi un Dios noi afu rafupacushquin —ishon nannori shinancahuun. ¹⁵Ascacun ointiaquimayamacahuun. Nocon Ifo oataima funaquima non manasharanoncahuun. Non futsafo ahuunoa yoiaiton aton chaca shatucashon Jesús ifoanonfo afu ipasharashcaquin. Nan nocon yorashtan Pablon nannori Upa Diosin a tapimanicun noco cunushoni. ¹⁶Nan cunuaite ahuun cunu Pablonun nannorisi cunumisi nocon Ifo afanan oshquiai cuscan ahuunoa cununi. Non atirifi a cununi cuscacai non funa tapiyotiroma. Non fasi nan fusti shinainno Diospan Yoshin Sharahuunshon non tapitiro. Ascafia nan Diosin tsain tapiafoma shinan futsamisifoan Pablonun cununi cuscan

amaquiri yosiafo. Nanscarifiai Diosin tsain futsafori amaquiriri yosimisifo. Ascacanashu omitsiscapatiofo.

¹⁷Un mato yoia cuscan man man tapia. Ascacun oinfain marifi nan Diosin tsain nicacasmafoan mato amaquiri yosiaino man nicanonma. Man Jesús icoinra huacoinnaiton mato cushusharatiro. Ascafia nan amaquiri yosimisifo man nicaino marifi man funotiro. Ascashon man afanan amaquiri shinantiro. ¹⁸Ascataamarocon nocon Ifo Jesucristo ahuun tsain nicacoinfafaincahuun nan onanquin finacoinshcaquin. Mato shara huamapaiyai cuscan a cuscara shara ishcaquin. Maton nomuran tapisharaquin finacoinshcaquin. Nan fusti non Jesucristo yoiquin isca huatiro, —Minfin nocon Ifo. Minhuunshon fusti non ahuara shara huatiro. Mirus fustifin min sharacoinquin, —ishon natian yafi nan inonpacoai cuscan non yoipacunon. Nanscasi ipanon. Amen. Nanti.

Pedro

Juanpan Icoinra Huafo Cunushoni

Diosin tsainman noco nimapacutiro

1 Unquian, Juan, un mato cunu foma man tapinon. Jesucristohuunooa un mato tapimani. Un nicafain un oinyanan un mucuman mucoinmisi cuscan un ahuunooa mato yoi man tapinon. Ahuashita oniataima Jesús apa Dios fu iyopaoni. Upa Diosin ahuun tsain noco yoipaiyai cuscan Jesús noco tapimapaoni. Ascashon ahuunshon non Diosin tsain tapitiro noco nimapacuai. ²Apa Dios fu ifiashu nocoqui ftoni. Nanton noco nimapacutiro. Ascashon non oian cuscan un mato yoi.

³Upa Dios futan Furun Jesucristo shinainfo cuscari norifi atohuunshon non shinainmisi. Shinainfo cuscan non huai. Non atofu rafumisi. Ascashon non oian cuscan huafain non nica cuscari un mato yoi marifi nannorifosi man shinanon. Ascashu man no fu rafusharatiro. ⁴Un mato cunu foma non unimai cuscari marifi man unimanon. Non natian unimayofiai man marifi nannorifosi shinainno non fasi mimacai unimatiroquin.

Jesushuunshon chacapan afanan nocon ifo itiroma

⁵Ascan Diospan Furun yoini cuscan nicashon non mato yoi. Noco isca huani, —Farin chashainocai faquishtiroma. Nanscarifiai Diosin shara fustisi icanocai ahua chaca afu itiroman, —ishon noco yoini. ⁶Ascafia non yoiquin isca hua, —Non Diosin shinain cuscari norifi nannorifosi non shinainmisi. Non afu rafuaran, —ifiashon non chaca huashu non chania. Diosin iconquin yoimisi cuscan non aima. ⁷Ascatarocon ahuun tsain yoini cuscacoin non aafin fasi

sharacoin itiroquin. Nanton shinain cuscan norifi nannorifosi shinainshquin afu rafushquin. Non ascaiton nocon chaca noco soashotiro. Jesús Upa Diospan Furunmun ahuun imi foyanan noco nashoni nantifi nocon chaca noco soashoshquin.

⁸Ascafia non yoiquin isca hua, —Uncai chaca huama, —ifiatan non nofiri paramumisi. Jesús iconquin yoimisi cuscan nocon nomuran non nanucoianma. ⁹Ascatarocon nocon chaca non yoiaiton Upa Diosin yoini cuscan noco rau huatiro. Non chaca huamisi cuscan afanan Upa Diosin shinantiroma Furunmun noco nashoni nocon chaca soashoshquin. Upa Diosin sharacoinshon noco yoini cuscan nanscacoin huai. Nantifi nocon chaca noco soashotiro non chaca huamisima cuscara non inon. ¹⁰—Nantifi yorafoan chaca huamisiforan, —Diosin huani. Ascafia non yoiqui, —Uncai ahua chaca huamisimaran, —ishon non futsafo shinanmatiro —Diosin noco pararan, —ishon anori yoiquicai noncai ahuun tsain icoinra huacoinnama.

Criston Apa Dios nocohuunooa yoisharatiro noco onaintimanonma

2 Uhuun yora mishtichin, un mato cunushoni man oinshon ahua chaca huanonma. Ascafia ahua non chaca huacun Jesucristo apa noco yoishotiro nocon chaca soanon. Yoiquin isca huatiro, —Upa, un ato nashoniquin. Aton chaca soashohuun, —Apa huatiro. Atoncai ahua chaca huamisima. Afin shafacafi icaquin. Ascan Apa Dios noco yoishotiro nocon chaca soashonon. ²Noco nashonishaquin nocon chaca noco soashotiro. Noco fustima. Nantifi manfotihuunooashu noco nashoni nocon chaca soashoshquin.

³Ascan Jesús noco yoimisi cuscan aquin non tapitiro non afu rafui. Nan-

ton shinain cuscan non tapitiro norifi nannori shinanquin. ⁴Futsan shinanquin isca huatiro, —Un Jesús fu rafuiran, —ifiatan yoitimacoin. Ahuun tsain nicacasmai. Nan cuscara yorafin chanimisiquin. Jesús icon yoimisi cuscan ahuun nomuran nanucoianma. ⁵Ascan ratoran yoran ahuun tsain nicacoinquifin Dios noicoinquin. Ascashofin tapitiroqui afu rafucoiain. ⁶Ascan futsan shinanquin isca huai, —Un Jesús fu rafucoinran, —icafin Jesús icai cuscari arifi itiroquin.

Noco yononi cuscan tsain funa shara

⁷Ascan un mato cunushonai cuscan man man nicamisi. Jesús maton ifo iqui taunitian mato yononi man man nicamisiquin. Mato yonoa cuscan mato tapimani. ⁸Ascacia ahuun tsain tsoan nicayomisima cuscara un mato cunushoni. Noco yonoquin isca huani, —Yorafihuun noicoincahuun, —noco huani. Man ascaicai man chaca huapaoni cuscan afanan man atiroma. Jesús shafacafi ica cuscan marifi ahuunoashu man shafacafi itiro.

⁹Ascacia ratoran yoran yoiquin, —Un Jesushuunoashu shafacafi icaran, —ifiatan yora noicasmashu aacai shafacafi icama. Atoncai Diosin tsain nicacoiantaima. ¹⁰Tsoan yorafihuun noi aafin shafacafi icaquin. Oinsharaicai non pacutiroma. Nanscarifi aquin tsoan shafacafi ishoncai ahua chaca huafafaintiroma. ¹¹Ascacia ratoran futsan futsa noicasmaicai aacai shafacafi icama. Chaca huafafaini. Chaca huafafainquicai ahuun nomuran shinantiroma ahuun chaca shatushquin. Ascacia tapiama man fasi funocoian.

¹²Uhuun facumishtichin maton chaca Jesushuunshon Upa Diosin man soashona afanan afo shinanshquima. Ascacun un nannori mato cunushoni.

¹³Ahuashta oniataima Upa Dios iyopaoni.

Anifomishtichin, ahuu cuscaramain Upa Diosiquin man man tapia. Tapishon man icoinra huamisi. Ascan un matori cunushoni.

Pushcohuaifoan Satanás mato amapaiyai cuscacai man amisima Jesús tanasharashquin. Ascan un matori cunushoni.

Uhuun facufoan marifi nocon Upa Dios ahuu cuscaramainquin man man tapia. Tapishon man icoinra huai. Ascan un matori cunushoni.

¹⁴Anifomishtichin, un cunua cuscan ahua oniataima Upa Dios iyopaoni. Nanmain ahuu cuscaraquin man man tapia. Ascan un nannori mato cunushoni.

Pushcohuaifoan, Satanás mato amapaiyai cuscacai man amisima. Jesús tanasharashquin. Ascan Jesushuunoashu man mutsisipacoin. Diospan tsain maton nomuran man man nanua icoinra huafafainshcaquin.

¹⁵Ascatan ahuafoan Upa Diosimaqui noco imapaiyai fo afo noiyamacahuun. Ahuafo yora chacafoan aton nomuran shinainfo cuscan afo noiyamacahuun. Afo noiquicai man Dios noicointiroma.

¹⁶Ahuara chacafo aton ifono yorafimisi cuscan un mato tapimai. Ahuara chaca fuchipaifain ahua chaca oinquin mupaimisi icain —Un ahuarayashufin un isharaquin un futsafo finoncoian. Uncai futsafo cuscarama, —icashu cacapaimisi. Ascara chacafocai Upa Diosin noco amapaima. Ascara chacafoan yoshin chacahuunshon noco amapai. ¹⁷Ascacia ahua chacafo cuyoi futsui. Ahua chacafo yorafoan fuchipaiaifo cuscari nanfori cuyoi futsui. Asca Diosin noco

amapaiyai cuscashu nanfo Upa Dios fu ipashquicani.

Iconmisihuunoo yafi chanimisi

¹⁸ Ascan uhuun yoramishtichin un tsain futsari mato yoi man tapinon. Diosin nantifi maitio nan chaca huamisifo onaintimayoi. Man nocoti chaima. Man man nicamisiri nan nocofunun Cristo noicasmái arifi oshquin. Natianri Cristo noicasmái nococani. Ascacun non tapitiro Upa Diosin nan chaca huamisifo onaintimaitian nocoti chaima. ¹⁹ Nan yorafoan no futan Cristohuunoo nicayofiapaonishaquin noco potafo. Ascaifoan non tapitiro no futan Cristo icoindra huacoinmisima. Noco potafo. Ascaiton non tapitiro afocai no fu Cristo yorama.

²⁰ Ascafia mancai ato cuscarama. Upa Diosin ahuun Yoshin Shara matoqui nichini matofu rafupacunon. Asca ahuunshon man iconcain tapia.

²¹ Mancái icon tapiamama. Ascacucái un mato cunushonima. Ahuara icon iyamarai iconma man Diospan Yoshin Sharahuunshon tapicoian. Man tapiari nan chanimisifoancai noco icon yoitirofoma. ²² Ratofomain chanimisiquin un mato tapimai. Tsoan isca huai, —Jesuscái Cristoma. Diospan Furunmafinquin, —icafin chanimisiquin. Nanscarafoan Cristo noicasmacani. Upa Dios yafi Furun icoindra huafoma. ²³ Ascatan tsoan isca huai, —Criston Diospan Furunmaran, —icacai Upa Diosin yora itiro.

²⁴ Ascatan Jesushuunoo man nicaquin tauhuani cuscan cachiquiri huayamacahuun. Shafatifi ahuun tsain maton nomuran nanusharacahuun. Man ascafin Upa Dios yafi Furun fu man rafupacunacaquin. ²⁵ Noco yoiyotiani cuscan non afu ipasharatiroquin.

²⁶ Futsafoan mato amaquiri tapimapai. Ascan un atohuunoo mato cunushoni man tapinon. ²⁷ Ascafiaquin Upa Diosin ahuun Yoshin Shara matoqui nichini matofu rafupacunon. Natianri ahuunshon man iconcain tapia. Nan fusti non yopai noco tapimanon. Afin mato tapima cuscan shafatifi maton nomuran ahuun tsain nanuocoincahuun afu rafushquin.

²⁸ Uhuun yoramishtichin, Jesús mato tapima cuscan cachiquiri huayamacahuun. Shafatifi nicacoincahuun yoia cuscan aqui. Ascan Jesús nocoaino man aqui rafipaitiroma. Ascatamarocon ahuun ointaifi ahuara chacafo man huamisi shinanshma man Jesús fu isharatiro. ²⁹ Dios isharacoinmisi ahuashtacai chaca huamisima. Man man tapia. Tsoa isharamisi nanfin Upa Diosin imapacunacaquin ahuun facu inon. Nanri man tapia.

Diospan facufo

3 Upa Diosin nocohuun fasi noicoin. Nocohuun shinansharamisi. Ascanshon noco yoiquin isca huatiro, —Manfin uhuun facufoquin, —ishon yoitiro. ¡Aicho! Shinancapon. Iconcain nonfin Diospan facufoquin. Ascafiashon icoindra huacoinyamashon Upa Dios onanmisifoma. Ascan non Diospan facufofiacun tapiafoma. ² Uhuun yoramishtichin icon natian nonfin Diospan facufoquin. Noco chipo imai cuscan tsoan tapiataima. Ascafia Jesús oaiton oin non a cuscaracoin ishquin. Nan man non tapian. ³ Tapiashu non a cuscara sharacoin ipaitiro. Ascanshon nocon chaca non potatiro a cuscara sharacoin iishquin.

⁴ Tsoan chaca huafafainicai Diosin noco yononi cuscan aima. Noco yonoo cuscan ayamashu chacacoin iqui. ⁵ Man man tapia nocon Ifo Jesús noco cuscara nocofunuri ini nocon chaca noco

soashoshquin. Atocai chaca huamisima. Apa Diosin yonoa cuscan fustisi huapaoni. ⁶Tsoan afu rafushocai chaca huafafaintiroma. Jesushuunoa tapiama. Ahuunoa onancoiantaima.

⁷Uhuun yoramishtichin, futsafoan mato amaquiri yoipaicani nocon Ifo tanatima huaquin. Ato nicayamacahuun. Tsoan isharamisi nocon Ifon cuscara shara itiro. Noco imasharatiro a cuscara isharamisi non inon. ⁸Upa Diosin yora oni huataima yoshin chaca Satanás chaca huayopaoni. Ascan tsoan chaca huafafaini arifi Satanás ahuun yoraquin. Ascacufin Diospan Furun oniquin Satanás ahuun yono cuyoi futsunon.

⁹Upa Diosin noco nimapacunaca ahuun facufo non inon. Ascan tsoa ahuun facushocai chaca huafafaintiroma. Non ahuun yora ipaiquicai non chaca huamisi itiroma. ¹⁰Ascan ratofomain Diospan facufo iyamarai Satanás ahuun yorafoquin non tapitiro. Tsoa Diosin yoia cuscan aimacai ahuun facu itiroma. Tsoan futsafo noiamacai arifi Diospan facu itiroma.

Nantifi noinantanacahuun

¹¹Jesús ifoquin tau huashon man nicamisi isca huaquin, —Noinancahuun, —ica man man nicamisi. ¹²Caín cuscara iyamacahuun. Cainfin Satanás yora iniquin. Chipocu isharamisicun afi ascayamaquin chipocu rutuni.

¹³⁻¹⁵Non futsafo noishon non tapitiro Upa Diosin noco fiananan huua non afanan omitsiscapanaca muran catanmarocon non afu ipanon. Tsoan futsafo noiyamashu omitsiscapanacafo fu ipatiroquin. Tsoan futsa noicasmái aafin rutumitsamisi itiroquin. Man man tapia rutumitsamiscái Dios icano nocotiroma. Ascan icoinra huamafoan mato noicasmaino

mustairiyamacahuun. ¹⁶Jesucriston fasi nocohuun noiquin noco nashoni. Afi nocohuunoashu napai noco nashoni. Futsafo noicoin atohuunoashuri non natiro. ¹⁷Ascatai futsa ahuara yopacoinfaiaton non atohuun ramapaiyamashucái Upa Diosin ato noiai cuscan non ato noiama. ¹⁸Ascan uhuun yoramishtichin, futsafo noicoincahuun. Non isca huashu, —Un minhuun noiran, —ifiatan yopaifo cuscan non inanyamacái sharama. Non ato shara huacoinshon non ato noicointiro.

¹⁹Ascaquin non tapitiro Jesús iconcoin noco tapima cuscan non ai. Ascan ahuun ointaifi ratutama nocon nomuran unimatiro. ²⁰Ascafia nocon nomuran non shinanquin isca huai, —Un ahua chaca huamaran, —non ifiaiton Diosin nocon nomuran nantifi tapicoian. ²¹Ascan uhuun yoramishtichin, nocon nomuran non shinain cuscan non chaca huayamashucái Diosqui rafipaitiroma. Non aqui ranotamarocon non afu isharpai. ²²Non anori shinainfin Upa Diosin noco yonoai cuscan non aicain. Non ascaino nocoqui Upa Diosin unimatiro. Ascatan non yocai cuscan noco inantiro. ²³Noco isca huani, —Uhuun Facu Jesucristo icoinra huacahuun. Noinancahuun, —noco huani. ²⁴Ascan tsoan Upa Diosin yononi cuscashu afu rafumisi itiro. Upa Diosin ahuun Yoshin Shara nocoqui nichini. Ahuunshon non tapitiro Upa Diosin no fu icacainaiton.

Ratomun Diospan Yoshin Shara iyamarai Satanás yoshin chaca non tapitiro

4 Uhuun yoramishtichin, ratoran futsafoan mato yoiquin isca, —Un mato Diospan tsain yoiran, —ifiaquin atirifoan paramisifo. Ascaiton ato nicaschon man Diosin tsain ointiro. Aton tsain ascacoinyamaiton man tapitiro

Diospan Yoshin Sharahuunshon mato yoiama. Diosin ato yonoama. ²Ascan tsoan yoiquin isca huaquin, —Jesucristo nan Diospan Furun Apa ariashu mai ano oni nocofunucoin ishquin, —ishon mato anori yoiaiton Diospan Yoshin Sharahuunshon mato yoiaiton man tapitiro. ³Ascan tsoan mato Jesushuunoa yoiyaiyamaiton man tapitiro aacai Upa Diospan yorama. Diosihuunshon mato yoitamarocon Jesús noिकासmaifo huunoa mato yoi. Man man nicamisi nan cuscara yorafo manifoti foanfaincani. Natianri nantifi mai ano icafo ascacani. Yoshin chacapan Jesús noिकासmaquin ato yonoa.

⁴Mancai ascanma uhuun yoramishtichin. Manfin Diospan facufoquin. Diospan Yoshin Shara matofu ipanaca. Atofin Satanás finoncoianquin. Ascacun marifi ahuunshon Jesús noिकासmafoti man finoncoianquin. Nanfo Satanás ato iquina. Mato amaqiri tapimapaicani. Ascafiainfoan ato tanatamarocon Jesús tsain man nicaquin finacoian. ⁵Nanfoancai icoinra huacanima. Diosin shinain cuscacai shinancanima. Jesús icoinra huamafoan shinainfo cuscan futsafori tapimapaicani. Ascan icoinra huamafoan nannorisi shinanquin ato nicapaicaquin. ⁶Ascashon non tapitiro ratofoanmain Diospan Yoshin Sharahuunshon noco icon yoiyamaquin yoshin chachahuunshon noco parapaicain. Non tapitiro isca huaquin. Nonfin Diospan yorafoquin. Tsoan noco nicapai afin Diospan yoraquin. Ahuun Yoshin Sharahuunshon noco icon yoi. Ascan tsoan noco nicapaima aacai Diospan yorama. Yoshin chachahuunshon noco parapaitiro.

Non futsafo noicoinquin tapitirofo non Diosi fu rafumisicoin

⁷Uhuun yoramishtichin, Upa Dioshuunshon non yorafo noitiro. Ascashu non noinanoncahuun. Tsoa Diospan facuashu afu rafui. Ascanshon futsafo noicoitiro. ⁸Upa Diosin noimisiquin. Ascan tsoan Dios noiyamaquin onancoiantaima. ⁹Upa Diosin nocohuun noiquin noco ismani isca huaquin. Ahuun Furun fusti manifoannatihuunshon nichini ahuunoashu non afu nipanon. ¹⁰Mai ano nichini nocohuunoashu noco nashonon nocon chaca soashoshquin. Nan shinanquin non tapitiro Upa Diosin noco noicoinmisi. Noiaicoin futsacai ascanma. Noncai futsafo noifiai ascatiroma.

¹¹Ascan uhuun yora mishtichin, Upa Diosin noco fasi noicoin norifi non noinanoncahuun. ¹²Tsoan Upa Diosin oinyamafiamisishaquin noinanquin non tapitiro no fu ica. Non asca huafafainquin Diosin noco noiai cuscan norifi ahuunshon futsafori non noitiro. ¹³Ahuun Yoshin Shara nocoqui nichini. Ascacun non tapitiro no fu ipanaca. Ascarifiai non afu ipanaca. ¹⁴Non oinni cuscan non mato yoi. Upa Diosin Furun nichini manifoannati aton numamisi inon. ¹⁵Ascan tsoan yoiquin isca huai, —Jesusfin Diospan Furunquin, —huafin Upa Diosin afu ipanacaquin. Ascarifiai Upa Dios fu ipatiroquin.

¹⁶Ascan noco noicoiinton non mumisi. Natianri noco noiyaiton non icoinra huatiro. Diosin nantifihuun noimisiquin. Tsoan afu rafushon futsafori noicoinmisi. Ascarifiai Upa Diosin afu rafupacunaca. ¹⁷Non afu rafuashu noco amapaiyai cuscan non noinancoitiro. Ascatan non Upaqui nocoaitian non ranotiro. Noco yoi a cuscaian non ratutamarocon

non unimatiro. Nantianri Upa Diosin manifoannati ato yoishquin ratofoanmain chaca huayamaraquin nicasharamisiquin. ¹⁸Noco noiai tapiashucaí non ratutiroma. Non noiyamashu, —Upa Diosin ua onaintimairan, —icashu non ratutiro. Tsoan anori shinaincai Diosin noco noiai cuscan aima. Ascafiashu Diosin noco noiai cuscan aquin non ratu potatiro.

¹⁹Non Upa Diosihuun noiataima afincoín nocohuun noitauni. Nocohuun noiaino norifi natian non Upahuuri noicoñtiro. ²⁰Tsoan yoiqui isca huai, —Un Upa Dios noicoñran, —iflashon futsa noicoñanma. Aafin chanimisiquin. Futsa oinfiacquin noiyamashocai Diosiri oinyamaquin noicoñtiro. ²¹Upa Diosin noco isca huaqui yononi, —Ua noishon futsafori noicoñcahuun, —ishon yoini.

Non Jesús icoinra huacoinquin non ahuunshon futsafo noitiro

5—Jesús Diospan Furun. Diosin catonni nocon Numamisi inon, —tsoan icoinra huaiton Upa Diosin ato funa cuscara imatiro ahuun facufo inonfo. Ascan tsoan Upa Dios noiquin ahuun facuri noitiro. ²Ascan non Dios noishon noco yonoa cuscan aquin non tapitiro ahuun facufofori non noicoñ. ³Upa Diosin noco yoia cuscan aquin non ahuunshon Dios noicoñtiro. Noco yonoa cuscacai curushma. Upa Dios noiashu noco yonoa cuscan non unimatiro. ⁴Non Upa Diosin facushoncai ahuaara chacafoan noco shinanchacamapaiyai cuscan afoancai noco funomatiroma. Diospan Furun Jesucristo icoinra huashu ahuaarafoan noco chaca huamapaiyai cuscan non finontiro. ⁵Ahuaara chacafoan noco funomapai Diosin noco imapaiyai cuscan non anonma. Ascafia Jesucristo

Diospan Furun non icoinra huashon ahuunshon na chacafo non finontiro chaca huashquima. Nan icoinra huafoansi finontiro.

⁶Man non tapia Diospan Furun noco-funu ini. Un oinmisi cuscan un mato yoi man icoinra huacoinnon. Nan Jesús unu muran iquimamaino Upa Diosin yoini isca huaquin, —Naafin uhuun facuquin, —ishon yoini. Jesús naitianri ahuun imi foaino Apa Diosin noco tapimani nanton ahuun Furumun. Ahuun Yoshin Shara iconmisi arifi nocon nomuran yoimisi Jesús Diospan Furun.

⁷Ascan rafu non fustiton nannorisi yoiquin Jesús nocofunu nan Diospan Furuquin. ⁸Jesús unu muran iquimantian yoifain naitian ahuun imi foni cuscan tapimafain Diospan Yoshin Sharari noco yoimisi. Nannori fosi yoiquin rafu non fusti huani. ⁹Ascan yorafoan noco ahuaara yoiaiton icoinra huatan Upa Diosin noco yoiaí cuscan mima huaquin non icoinra huacointiro. Acai yora cuscarama. Aafin Dioscoñquin. Ascan ahuun Furunhuunoa noco yoiaiton non icoinra huacointiro. ¹⁰Tsoan Diospan Furun icoinra huashon Apan Diosin ahuunoa yoini cuscan ahuun nomuran icoinra huatiro. Ascafiaqui ahuun Furunhuunoa yoimisi cuscan tsoan icoinra huayamashon nanton, —Dios chaniran, —ishon yorafo shinanmapai.

¹¹Isca huaquin Upa Diosin yoini, —Uhuun facuhuunshon un mato nimapacutitoran, —ishon yoini. ¹²Tsoa Furun fu rafuafin nipanacaquin. Ascafia tsoa Furun fu rafuamacai nipatiroma.

Ahuun unutaquí ato yoisharani

¹³Jesús Diospan Furun man icoinra huaa. Ascan un mato nanfo cunushoni man nipanaca man tapinon.

¹⁴Non Upa Dios cufiai cuscan arifi asca huapaiquin noco ashontiro. Ascaino ranotama non Upa cufitiro. Noco

ashoain cuscan tapicoinshquin. ¹⁵Noco nicaiton non tapisharatiro ahuara non yoca cuscan noco ashoaiton.

¹⁶Ascan tsoan Jesús icoinra huafiashton chaca huaiton oinquin non Upa cufishotiro chaca shatunon. Ascan Upa Diosin ato numatiro nipanonfo ato imasharatiro. Ascafia futsafoan ipaitsi Jesús ifoancoinna ointsa iyofiashton chipo potacoian. Chaca shinanfafainquin Dios cachiquiri huacoinnafo. Ascarafocai tsoashtan numatiroma nipanon. Naashu omitsispacunacafo muran focani. —Ahuunoa Upa cufishocahuun, —ishoncai un mato anori yoima.

¹⁷Upa Diosin noco amapaiyai cuscan ayamashu chacacoin itiro. Nan chacafo huaifoan non Upa cufishotiro

aton chaca shatunonfo Upa Dios fu ipashquin.

¹⁸Ascan non tapia ratoranfo Upa Diosin ahuun yoracoinshocai chaca huafafaintiroma. Diospan Furunmun ato cushusharatiro nan yoshin chacanun ato achinonma chaca huamashquin.

¹⁹Man non tapiari non Diospan facufo. Nan icoinra huafoma ahuun facufoma. Manifoannati nan yoshin chaca ato iquina. ²⁰Diospan Furun oni Dios iconmisiton noco tapimanon. Ahuunoashu non Upa Dios nan iconmisi fu non ipatiro. Furunri Diosicoin no fu ipanaca. Ascan noco nimapacutiroquin.

²¹Ascano uhuun facufoan, ahuarafa Diosicoinma shinanyamacahuun. Nanti.

Juan

Juanpan Afanan Icoinra Huafo Cunushoni

Juanpan ato yoisharani

1¹⁻²Unquian, Juan, un fari ichapa icoindra huafo un aton cushumisi. Un mato cunu fomai man tapinon. Tsain icon non nicamisi cuscan nocon nomuran non nanupacunaca. Ascan nanno ichananfo Upa Diosin mato catonni urifi matohuun noicoin. Urus fustima. Jesús icoindra huaa futsanfori matohuun noicoin. ³Upa Diosin Furun Jesucristo futan iconquin nocohuun noi. Ascan noco cashman shara huafain nocohuun ramapaicain nocon nomuran shinanmashara nocon nomuran non unimacoinon.

Upa Diosin noco yononi non nantifi noicoin

⁴Upa Diosin noco yononi ahuun tsain iconcain tanasharanonfo. Atirifi Upan yononi cuscan aiton nicai un fasi unimai. ⁵Uhuun yoramishtichin, na un mato cunushonaicai tsain funama. Man Jesús icoindra huaquin tau huani cuscan man man nicamisi. Nocon Ifoan noco yoimisi cuscan un afanan mato yoi non noinanoncahuun. ⁶Noco yononi cuscan non ahuun noicain non futsafohuunri noicoinnon. Man tau huaquin nicamisi cuscan noco yononi isca huaquin, —Shafatifi non noinanoncahuun, —ishon yoini.

Ratofomain Jesucristo icoindra huai

⁷Ascan tsain futsari mato yoi. Fuparapaimitsamisi manifoannati

pashcanain futsucani, —Jesucristo nan Diospan Furun apa ariashu mai ano oni nocofunucoin ishquin, —ishoncai yoipaicanima. Ascarafoan mato fuparapaimisifo Cristo noicasmafain icafo. ⁸¡Oinfain! Atohuun caoyamacahuun. Man funotiroquin. Upa Dios yonoshofiaqui man atohuun caohuaino mato inanpaiyai cuscan man funotiroquin. Ato nicayamacahuun nantifi Upa mato inanpaiyai cuscan fishcaquin.

⁹Tsoan Cristo yoini cuscan atama futsa tanashu acai Diospan yorama. Ascan Cristo yosini cuscan nan fusti tanacoin Apa Diosin yafi Furun fu rafui. ¹⁰Tsoan Cristo tsain cayacafico yosiyamaiton maton pushu muran iquimayamacahuun. Aqui unimayamacahuun. ¹¹Maton pushu muran iquishon futsafori amaquiri yosiaino matohuunri nutiroquin.

Ahuun tsain unutaqui

¹²Un mato paratama cunushopaifain unfincoin matoqui nocopai non yoinonanon. Ascan non natian unimafiai un matoqui nocoaino fasi mimacai non unimanantanantiro.

¹³Nan pushu futsano ichananfo Upa Diosin atori catonni ahuun facufo inonfo. Nanfoanri mato yoisharapaicani. Nanti.

Juan

Juanpan Gayo Cunushoni

Juanpan Gayo tsain shara yoini

1 Uhuun yorashtan Gayon, unquian, Juan, un fari ichapa icoinra huafo un ato cushupaoni. Un mia cunu fomai min tapinon. Un mia noicoïn.

²Uhuun yorashtan un mia Upa Dios cufishona min nomuran shinansharafain min muma shara ipainon. Min ishara-painon. ³No futan Jesús icoinra huaa futsafo mia anoashu uqui nocofo. Nocoshon mihuunoa ua yoiäfo, —Gayon nocon Ifo tanacoinfafaini. Shafatifi nocon Ifoan tsain icon yoini cuscan nan-nori imisiran, —ishon mihuunoa ua yoiäfo. Nicai uhuun nomuran fasi unimai. ⁴Uhuun facufoan Jesús tanacoiäinton nicai un unimacoïnni. Ahua futsancai ua unimamaquin ascacai huatiroma.

⁵Uhuun yorashtan, un nica min icoinra huaa futsafo oinyamafiamisishaquin min ato cushufafaini. Ato cushuquin min unumisima. ⁶—Gayo noco noisharamisiran, —ishon mihuunoa ichananshon yoiäfo. ¡Aicho! Upa Diosin ato shara huapayai cuscan mirifi min ato asca huafin sharacai itiroquin. Nan yopäifo cuscan min ato inantiro fosharatanonfo.

Nan paramisifo

⁷Nanfo foanscamisifo Jesushuunoa yoifoanfafaïncani. A ahuaara yopai fi-aquicai icoinra huafoma yocänifoma.

⁸Jesús ahuun tsain iconquin yoimisifo. Ascacun non ato futan ashquin.

⁹Min icoinra huafo fu ichanan ano un mato cunu fomayamua. Ascafiashon Diótrefes ua nicacasmaquin. Aafi icoinra huafo iquinpai. Fasi cacapaimisi. ¹⁰Matoqui nocoshon man ichanan muranshon noco chaca huamisi cuscan un mato tapimashquin. Nocoahuunoa tsain chacari yoifain chaniri yoifain. Nocon yorafori matoqui nocofiacun ato iquimapaima Diosin tsain mato yoinonfo. Futsafoan ato iquimapaifaiton atorifi pota. Afanan atofu ichananonfoma.

¹¹Uhuun yorashtan, Diótrefes chaca huamisi cuscan ahuun caotamarocon ahuaara shara fustisi min huapaitiro. Tsoan shara huamisi nan Diospan yora. Ascan tsoan chaca huamisi Diosquiri shinanmisima.

¹²—Demetrio nocofunu shararan, —ishon nantifi yorafoan yoiäfo. Aafin iconmisiquin. Norifi ahuunoa non yoisharamisi. Man min tapia non icon yoimisi.

Ahuun tsain unutani

¹³⁻¹⁴Un mia paratama yoipaifiaquin un afanan mia cunushotamarocon un miqui nocopai non yoinonantanon.

¹⁵Min nomuran unimanon. Nocon yorafoan nunoshon mia yoisharapaïcani. Min icanoa uhuun yorafo ua yoishopacuhuun. Nanti.

Juan

Judaspan Icoinra Huafo Cunushoni

Judaspan ato tsain shara fomani

1 Uhuun yoramishtichin unquian Judas un mato cunu fomai. Unfin Jesucristo ahuun yonomatiquin. Un Santiago ahuun ushto. Nocon Upa Diosin matohuun noiquin mato catonni. Ascan nocon Ifo Jesucristo mato cushufafaini. ²Nocon Ifoan matohuun rama paicain maton nomuran unimamanon. Ascatari matohuun noicoinnon. Mato mima huaquin asca huanon.

Nan chanimisifo chaca hua cuscan Judas ato asca hua

³Uhuun yoramishtichin nocon Ifoan noco nashoni cuscan yafi nantianri noco imapaiyai cuscan non chipo afu ishquiai cuscahuunoari fasi nanfohuunoa mato cunushopaifiai mun nica man tsain futsa yopacoin. Ascacun un mato cunushoni man Jesucristo icoinra huai cuscan man shinanfafainon. Nannori Upa Diosin Furuhuunshon noco tapimani. Furunhuunoa noco tapimani cuscan nan fusti non yopai tanasharashquin. Ascan tsain futsa mato amaquiri yosipaiyai foan aton tsain nicatamarocon nan mato tapimamisi cuscan nan fusti icoinra huacahuun.

⁴Futsafoan mato muran noco i tau cashon man tapicuma mato fomanfo chaca huamisi fiasashon. Ascashu nanfocai Diospan yorama. A furicai imisifoma non chaca huamisi cuscan non yoiaiton Upa Diosin Furuhuunshon noco soashona non afu ipanon. Nan fusti non yopai isharashquin. Ascacia nanfoan fasi amaquiri chacacoin mato tapimapaicani. Isca huaquin mato yopai, —Man Jesús icoinra huashon man apaiyai cuscan man atiroqui.

Maton ahuinma fu icain ainfofori aton funuma fu itirofo. Ascashon ahuara chaca futsafo man huapaiyai cuscan man atiro. Non asca huaitocai Dios noco onaintimaimaran, —ishon fasi amaquiri mato yosipaicani. Nocon Ifo Jesucristo fusti nicacasmacani. Nan cuscarafokuunoa Diospan tsain cunuyoni. Ato onaintimaicoishquin.

Diosin chaca huaifo onaintimai

⁵Un natian mato cunushoni cuscan man man tapiyofianicun un afanan mato yoi futsai nan chacafokuunoa man tapinon. Nocon Ifoan nantifi nocon shunifo Egipto anoshon caimafianicun atirifiton icoinra huayamaifoan nan icoinra huafomati chipo namaqui cuyoi. ⁶Ointiaquimayamacahuun

Diospan oinmati afu nai muran icafori tau cani isharacoinyopaonifo. Ascashu Diosin ato yonoai cuscan acoinyopaonifo. Ascashi chipo Diosimaqui ipanifo. Ascacun Upa Diosin ato faquishihuan muran munushushon ato manamayoi. Ascashon chipo nantifi icoinra huafoma onaintimaitian ichanan huashon omitsiscapanacafo muran ato potashquin. ⁷Diospan oinmati a fu nai muran icafoan chaca huapaonifo cuscari Sodoma yafi Gomorra chaimashon nanscara chaca huapaonifo. Nocofunufoan aton ahuinma chotaifoanno. Ainfofoanri aton funumafo chotamapaonifo. Nocofunufori afi ranan chotanapaiyai foanno ainfon tanatama. Ascacani chacanisi tapipaonifo. Ascacun atohuunshon non tapitiro nan chaca huamisi foan omitsiscapanacafo muran focani. Nanhuunoari ointiaquimayamacahuun.

⁸Nanscarifiai nan chanimisifoan chaca fustisi huafafainceni. Ascacashu futsafo fu chaca huatananmisi icain niaifofori nicacasmafain.

Diospan nai oinmatifori roamisifo. ⁹Ascashon nai muran icafo Diospan oinmati niaifo patashari ahuun anu Miguel nantocai chaca huaifo cuscan asca huamisima. Ascashu Satanás fu fochishmanantananni Moisés naitian Satanás Miguel nitun huapaini Moisés ahuun caya mai huanonma. Ascafiacai Miguelcai nan Satanás roanima. Roatamarocon yoini isca huaquin, —Nocon Ifoan mia asca huairan, —ishon yoini. ¹⁰Ascacia nan chanimisifoan ahuarafo tapiyamacun nanfohuunoa atoqui tsain chaca huamisifo. Ascatari afi apaiyai cuscan fusti huafafainmisifo. Yoinaton shinansharatiroma cuscan. Ascacashu afiri chaca huamuafuquin omitsiscapashcaquin.

¹¹¡Ai timafin! Fasi omitsiscapashcaquin. Caín chipocurutuni. Nanfori nanscarafo. Balaam cuscarafori. Nan Balaam pui fusti shinanquin chaca huani. Nanfoanri nansca huamisifo. Coré cuscarari. Nan Coré ahuun niaifo Moisés nicacasmapaoni. Ascacufin Diosin nan namaniquin arifi nicacasmacashu nai omitsiscapashcaquin.

¹²Ascan manfin noinanshu ichananmisiquin nocon Ifohuunoa shinanfain pishcaquin. Nanfori ranotama matofu ichananfiacashon nocon Ifohuunocai shinancanima. Futsafahuunoaricai shinantama aficairocon shinanmufustiafo, —Non mato yosiquin mato cushusharatiroran, —ifiacquin tosa ahua yosisharamisifoma.

Nan coin oi maisincai mai muto muchana huatiroma fanafo foaisharonon. Mai mutoano coin choshtacuashu oi fuaino fanafo foaimasharatiro. Nanscarifiai nanfo coin oi maisi cuscarafo. Nan cushumisi ointsafiacashocai nocon Ifohuunoa tsoacai tapiafoma. Fana

ahuun tapofo ya tsucucain tsasiashu fimioma itiro. Man nai rafua cuscara. Nanscarifiai nan chanimisifoancai tsoan Jesús icoinra huamatiroma nipanonfo.

¹³Ascashu unuhuan fuchomanhuan cuscarafu ahua sharacai mainfin ano potatiroma. Fuchoquin facosh cusumun cutsispotiro. Ascashu chipo fuarasiqui futsutiro. Nanscarifiai nan chanimisifoancai ahua shara huashotiroma. Fishi pacui chashapacucahuatan faquish acuncahuatiro. Ascaitocai non afanan oinshtatiroma. Nanscarifiai nan chanimisifoan Dios cachiquiri huacashu faquishihuan muran focani. Diosin nanscarafo chipo onaintimacoinshquin omitsiscapanonfo.

¹⁴Ascan Adán nan Diosin onihuaquin tau huani. Anoashu siete facu pacuafo. Ascano ahuun unutanani ahuun anu Enoc ini. Nan Enoc nan chanimisifohuunoa inonpacoai cuscan yoiquin isca huani, —¡Oincapon! Nocon Ifo oi. Nan afu nai muran icasharafori ichapacoin afu fucani. Tsoancai ato tanan huatiroma. Nantian nantifi yorafo yoipacushquin niyoshon man amisi cuscan. ¹⁵Nantifi manifoti anofoan noco Ifoqui fucani. Ratofomain ahuun yorafo afu ipanacafo iyamarai ratofomain icoinra huayamashu omitsiscapanacafo muran focaniquin. Nan afu rafumisifomacai ahuun yorafoma. Ascan nan chaca huafoti ato yoifain niyoano Dios maisi ipaoni cuscan yoifain nantifi nan tsain chaca aqui huamisifori ato yoishquin.

¹⁶Nanfoanri tsain chipumisifo icain futsahuun ahua chaca nuutapaimisifo. Nan chaca huapaiyai cuscan fusti tanafafainmisi icain afiri yoimusharamisifo. Ascacashu cacapaimisifo icain futsahuunoa tsain shara yoiamafiacashu futsa cuncun huapaimisifo, “Ua shara huanon,” ato huamapairan, —ishon Enoc huani.

Nan icoinra huafo ato yoini isharanonfo

¹⁷ Asca huafiaifoan nocon Ifo Jesucristo fu rafumisifoan mato yoinifo cuscan ointaquimayamacahuun.

¹⁸ Ascan mato yoini isca huaquin, —Jesús oti chaima icoinra huamafoan mato cashu mutsama huapaicani. Nanfoan tanatama afi chaca huapaiyaifo cuscan fusti tanafafaincaniran, —ishon yoinifo. ¹⁹ Nan cuscara nocofunfoan mato pashcanan huapaimisifo. Ahuara chacafo fusti fuchipaicaquin. Ascarafo fucai Diospan Yoshin Shara icama.

²⁰ Asca chaca huafiacanashu. Uhuun yoramishtichin man Jesús icoinra huua cuscan Upa Diosin mato shinanmana. Ascacun ahuunshon finacaiquin tapicahuun man icoinra huahuunoashu nan cuscara shara ishcaquin. Diospan Yoshin Sharahuunshon Upa Dios cuficahuun mato imapaiyai cuscan tapishcaquin. ²¹ Jesús tanasharacahuun Upa Diosin mato noicoiain cuscan man mufafaintiro. Nocon Ifo Jesucristo nocohuun ramapaiquin non naafiacun noco nimapacuaino non afu ipanon. Ascacun funaquima manasharacahuun afu ipashcaquin.

²² Futsafoan isca huaquin shinantirofo, —Jesús ua nimapacutiro icon iyamarai iconmaran, —ishon. Nanscarafihuun ramapaicahuun.

²³ Ascan futsafohuunoa un mato yoinon isca huaquin. Ahuara non coapiyamafiaino chi muran pacuaiton

non nushfiriscatiro cononma. Nanscarifi aqui futsan chaca huafafainmisi cuscan shatuataicuma numariscahuun. Ascashon ato yoicahuun aton chaca arifi shatuyamashu chi muran iquinonfoma. Ascan futsafoanri fasi chacacoin huamisifo. Nanscarafihuunri ramapaicahuun. Ascafia oinfain marifi man ato cuscara chaca huamisi iishcaquima. Atohuun ramapaitan nan ahuarashta chaca huaifo cuscan noicasmacoincahuun.

Ahuun unutaqui Dioshuunoa yoisharani

²⁴ Ascan uhuun tsain unutaqui nocon Dioshuunoa un mato yoisharapai. Nanton mato cushusharatiro man chaca huanonma. Unimacoincain ahuun ointaifi mato imasharatiro. Nannoshocai tsoan matohuun ahua chaca nuutatiroma. Ascashu unimacoin man aqui nocoshquin. Nantofin mato nansca shara huashotiroquin.

²⁵ Nan fusti noco Dios. Nantonrifi nocon Ifo Jesucristohuunshon noco numani. Ascashon nantifi finoncoian tsoa futsacai a cuscarama. Arusu fusti niaifocoincain manifoti iquina. Ascashon ahumamishti huatiroquin. Ahuashta oni huataima nanscaracoin iyopaoni. Natian ishquiai cuscari. Nansca huapanaca. Nanscasi ipanon. Amen. Nanti.

Judas

Jesucriston Juan Oinmani Cuscan

(Apocalipsis)

Ahuara ahuuscaran ashquiai cuscan Jesucriston Juan tapimani

1 Uhuun yoramishtichin natian un mato cunu fomai man tapinon. Unquian Juan un mato cunu fomai. Upa Diosin Jesucristo yonua samamashta ahuara ahuuscaran huariscashquiai cuscan ahuun yorafo tapimashquin. Ascacun iquisi ua oinmayoa. Jesús ahuun oinmati nan nai muran ica uqui nichian. Upa Diosin ahuun yorafo tapimapaiyai cuscan ua tapimayoa. Ascacun nan ua tapimana cuscan un mato yoi. ²Upa Diosin Furun Jesucristohuunoa yoia cuscan nan iconcoin. Ascashon nan ua yoia cuscan ua oinmana cuscan huafain nantifi un cunua. ³Ascacia un cunua cuscan icataima. Inon pacoai cuscan iquisi un mato cunushona. Un cunua cuscan futsafo yoi arifi unimaino nan nicaifori iconra huafain nanfori unimashcani. Un mato cunushonai cuscan samamashta iishquin.

Juanpan Diospan yorafo siete mai futsafo aria ichananmisi ato cunu fomani

⁴⁻⁵Ascana Asia mai ano man icati pushurasi siete nan Jesús iconra huafao ichananmisifo un mato cunu fomai cuscan nicasharacahuun. Nocon Upa Diosin niyopaonishaquin natianrifi nicain nipanaca. Ahuun Yoshin Sharari afu ipamisi. Nan Upa Diosin yafi ahuun Yoshin Sharapan non Furun Jesucriston matohuun ramapaiyaino maton nomuran mato shinansharamapainonfo.

Ahuaton maton nomuran fucash huanonma. Nocon Ifo Jesucriston Diospan tsain noco yoimisi cuscan non iconra huatiro. Nan Diospan Facucoinfiacun rutunifo. Rutushon mai huafiafo Apa Diosin funimani afu ipashquin. Tsoa futsacai ascayomisima. Ascana Apafu ishon nantifi niaifofu maifoti anoafu ato iquishquin. Nanton noco noicon. Ascashu ahuun imi focain noco nashoni ahuara chaca afanan nocon ifo inonma.

⁶Ascacun ahuara chaca nocon ifo itamarocon ahuunoashu Apa Diosin ahuun yorafo man non ica. Ascashon noco yonomapaiyai cuscan non anon. Ascana non ahuun yorashon futsafori non Upa Dios cufishotiro. Nanscarafo nocon Ifo Jesucriston man noco ima. Ascacun nantifi yorafoan ahuunshon isca huaquin yoipacupainonfo, —¡Aicho! Tsoa futsacai Jesús cuscara sharama. Arus fusti nocon Ifo ipanaca. Arus fustiri nantifi yorafo ato iquipacunaca, —ishon yoipacupainonfo. ¡Amen!

⁷“Shinancapon. Nocon Ifo Jesús cooin camaqui afanan oaiton nantifi yorafo niafo futan namisifoanri oinshquicani.

Nan mastamisifoanri oinshquin. Ascashu nocoaiton nantifi manifotifain ratucaquin

yoishcani isca huaquin, ‘¡Ohuashta! Diospan Furun Jesús non chaca huamisishaquin non aqui ratucoinran,’ ishon yoishquicani. Nanscabin aashquiquin. ¡Amen!”

⁸Jesús yoiquin isca huani, —Unfin ahuara oniataima iyopaoniquin. Urifi un ipamisi. Ahuutiamain nocon mai cuyoicai urus fusti un ato yoitiro. Unfin ahuamamishti huatiroquin. Un niyopaoni cuscan un ipanacaran, —ishon nocon Ifoan yoini.

**Nocon Ifo Jesucristo
aficoin Juan oinmani**

⁹Unquian Juan un matofu Jesús ahuun yora. Ascacun man uhuun yorafo. Nantifi non icoinra huafo noco iquinashu no fu rafupacunaca. Man Jesushuunoashu omitsiscafiacquin man tunumisi. Man mumisi cuscan urifi un mumisiquin. Un Diosin tsain yoifain Jesushuonoari ato yoimisi. Ascacun aton niaifofoan ranushumuafu yonoa ua achicashon ua mai futsan ahuun anu Patmos ano ua nichinifo. Nan mai unu toomanhuan ano. ¹⁰Nanno domingo futsaino Diosin Yoshin Sharapan ua iquifain nan tapimapaiyai cuscan ua tapimashquin. Ascashon ahuara namapan cuscarahuunshon man ua ismacoian. Ascaiton ucachiorinoa tsain achacoin un nicariscatana. Nan manuti nicatsa un nica.

¹¹Ascashon ua isca huaquin yoia, —Min oiain cuscacoin futsafo cunushohuun. Nan cunu Jesús icoinra huafo ichananmisifoti ato fomahuu. Nan ichananmisifo Efeso anoafu fomafain Esmirna anoafu fomafain Pérgamo anoafu fomafain Tiatira anoafu fomafain Sardis anoafu fomafain Filadelfia anoafu fomafain Laodicea anoafu min oiain cuscacoin cunushon ato fomahuu, —ishon ua yoia.

¹²Tsoamain ufu tsainquicai nicatan ifiacuahua oinpaiquin un oian lamparina cuscara otati siete oro ointsa un oian. ¹³Nan otafo nushmancayan nocofunu ointsa nanno nia. Ahuun sahuuti ofan ofaicai sahuufain ahuun nanushumuti putacoin ahuun shochi ano nuua oshin oro ointsa faca facaitsa sahuua. ¹⁴Ahuun foo oshopacoin yoa rama furoa ointsa. Ahuun furorifi chi shahuacai ointsa. Ascan faquishfiano chi uruaino non oinsharatiro. Nanscarifiai yorafoan fomanpaiquin ahuara onupaifi-

aiton Jesús onantiro. ¹⁵Ahuun taurifi cuno faca facaitsan ointsa. Ahuun oi uhuapacoin shushan tuporo iqui nicatsa. ¹⁶Ahuun mucu mumihuuri fishi ointsa siete tsoma. Ahuun ashfan muranri nopo ocuma rafu cunocoin asuonmua ointsa. Ahuun fusorifi fari chashaquin finai ointsa. Nanscara nan nocofunu un oian.

¹⁷Nan ointani un ananman pacua nan naa shinantsai. Ascaiton ahuun mucu mumihuurishon manmainyanan ua yoiquin isca huaa, —Ratuyamahuu. Ahuara oniataima un iyopaoni. Nanscarifiai un ipanaca. Uncai unupacunacama. ¹⁸Unfi ipamisiquin. Mun nafi-anishaquin un afanan funini. Ascashu un nipanaca. Yorafo naitian urus fusti un ato numatiro. Un shafi cuscara aya. Un fupotiro omitsiscapanacafo muran fotamarocon Upa Dios icari fononfo. Ascafia ascayamaifoan un fuputiro omitsiscapanacafo muran fononfo. Unfin nipanacaquin.

¹⁹Ascacufin rama min oiain cuscan huafain chiporifi un mia oinmashquiain cuscan cunuhuu. ²⁰Ascashon natian min oian cuscan un mia yoi min tapinon. Nan fishi siete non nan lamparina siete oro ointsa nanfohuunoa un mia tapimanon. Nan fishifo un tsoma nanfofin nan ichananfo Diosin tsain ato tapimamisi cuscarafuquin. Ascan nan lamparinafo oro ointsafo nanfofin ichananti pushu ano Jesús icoinra huafo cuscarafuquin, —ishon Jesús ua yoia. Nan siete ichananti pushu anoa icoinra huafo ato tsain shara fomani.

**Jesús Efeso anoa icoinra
huafo ichananti pushu
murannoa ato yoini cuscan**

2 Ascatan Jesús ua yoiqui isca huaquin,

—Ua icoinra huafo Efeso anoa aton Diosin tsain yoimisi un yoipaiyai cuscan ua cunushoquin isca huai.

“Unquian maton Ifo Jesús un nantifi Uhuun Upa Diosin tsain yoimisifo un atofu icacaimisi ato cushusharashquin. Ascacun un mato yoipaiyai cuscan ua nicasharacahuun. ²Man imisi cuscan mun tapia. Man manfin uhuunoashu fasi yonosharamisiquin. Ahuara ahuuscarafiaino man tunucoinmisi. Yora chaca huamisifo fu man rafucasmamisi. Ascan ratoran futsan yoimisi isca huaquin, ‘Cristo ua nichian. Ascacun un mato yosinon,’ ishon mato yoiainfoan. Man yoimisi isca huaquin, ‘Non tapinon. Aton tsain non nicayonon iconmainquin,’ man huamisi. Ascashon ato nicacaquin man ato onanmisi uhuun tsain mato yositama aafin chaniaifoan.

³“Ascan uhuunoashu omitsiscafiaquin man tunucoinmisi. Mancai ua tanaquin unupaimisima. ⁴Man asca sharafiamisi un tsain futsan mato yoisharapai. Man fasi ua noiquin tauhuani cuscacai natian man ua noiquin asca huaima. Man mutoi futsui.

⁵“Man ua noiquin tau huani cuscan shinacahuun. Nanscacoïn huaquin ua noicahuun. Man noinain tauni cuscan afanan noinancoïncahuun. Chii tsoan tanama samamashta nocatiro. Nanscarifiai marifi man chi nocacuana cuscara. Ascashon man ua tanasharayamaiton oinquin tsoan afanan mato tanaima. Ascashu man ichanainno afanan tsoa matofu ichanainma. Man chaca huai cuscan shatupaiyamafain uquiri man nasopaiyamaino un matoqui oshon un mato shatumatiro. Man afanan uhuun tsainyoimisi inonma. Man ascaitocai tsoan afanan matohuunshon ua tana-paishquima. ⁶Asca huafiaquin ahuara futsan man shara huamisi. Nan Nicolaítafoan amaquiri yosiaifoan atirifiton mato muranshon tanafo nanfoan chaca huamisi cuscan un noिकासma. Un nan chaca noिकासma cuscan marifi man noिकासmai.

⁷“Ascacun man pafiquiyaquin Diosin Yoshin Sharapan nan icoinra huafo ato yoi ai cuscan nicasharacahuun. Ascacun Satanás mato chaca huamapaimisi. Ascafia tsoan uhuun curushhuunshon Satanás yafi ahuara chacafori finoncoian naantofin ua cachiquiri huata-marocun ua tanasharacoianquin. Naanfin Upa Dios icano un iquimashquiquin ufu ipasharanon,” —ishon Jesús nan icoinra huafo Efeso anoafu yoi ai.

**Jesús Esmirna ano icoinra
huafo ichananti pushu
murannoafu ato yoini cuscan**

⁸Ascatan afanan Jesús ua yoi qui isca huaa,

—Ua icoinra huafo Esmirna anoa aton Diosin tsain yoimisi un yoipaiyai cuscan ua cunushoquin isca huai. “Unquian, un maton Ifo Jesús, un mato yoisharapai man tapinon. Ahuara oniataima un iyopaoni. Urifi ipanaca. Uncai unupacunacama. Mun nafi acun Upa Diosin ua funimani. Ascashucai un afanan napanacama. Unrocon nipanaca. Ascacun un mato yoi qui isca huai.

⁹“Man omitsiscái cuscan mun tapia. Mun tapiari man ahuuoma. Man ahuuomafia un matofu icano man ua cuscara shara itiro. Ascacun un maton nomuran fupuashotiro man unimanon. Uricai mato potapacunacama. Ascano uhuun Upa Diosin ica ari nantifi un aya cuscan nanfori matona iishquin. Ascacufin man ahuuomafo ointsafia manfin ichapayaquin. Ascafia mun tapia futsafo Judio cainfianishaquin ua icoinra huafoma. Ascacufin nanfocai Diospan yorafoma. Ascashon matohuunoa tsain chaca yoimisifo. ‘Norifi non Diosin tanamisiran,’ ishon yoifiafocai iconma. Ascashu nanfoan Satanás tanacanashu ahuan yoracoinfo ica.

¹⁰“Ascano inon pacoai cuscan un mato yoiyonon. Satanás atirifi mato

cunu muran iquimashquin manmain ua cachiquiri huamainquin tapipai. Ascacun ahuutiaran man omitsiscashquiain cuscan ratuyamacahuun. Ua cachiquiri huatamarocon isca huaquin shinancahuun, ‘Ua rutufiaifoannocai un ratuima. Ua chaca huafiainfoanri un tunucointiro. Uncai uhuun Ifo potapacunacama. Ascacun uhuun Ifo un tanaqui finacoinfaini,’ ascashu man naiton un mato nimapacunaca man ufu ipanon.

¹¹“Ascacun man pafiquiyaquin Diosin Yoshin Sharapan nan icoindra huafo ato yoiai cuscan nicasharacahuun. Ascan tsoan omitsiscafiaquin ua cachiquiri huayamai nantofin Satanás uhuunshon finoncoianquin. Ascatan naashucái omitsiscapanacafo muran canacamara,” —ishon Jesús nan icoindra huafo Esmirna anofo yoia.

**Jesús Pérgamo anoa nan
icoindra huafo ichananti pushu
murannofo ato yoini cuscan**

¹² Ascatan afanan Jesús ua yoiqui isca huaa,

—Ua icoindra huafo Pérgamo anoa aton Diosin tsain yoimisi un yoipaiyai cuscan ua cunushoquin isca huai, “Unquian un maton Ifo Jesús, un mato yoisharapai man tapinon. Uhuun tsain nan noppu ocuma rafu cunocoin cuscara. Ascashon uhuun tsainmansi uhuun yorafo cushusharafain nan ua noicasmamisifo un ato onaintimatiro. ¹³Mun tapia man pushurasi Pérgamo ano ica. Nannoshori Satanás yorafo iquimisi. Ascafiaino rafitama man ua tanasharamisi. ‘Jesús uhuun Iforan,’ man ato huamisi. Nannori ua tanamisi futsan ahuun anu Antipas nanton uhuunoa ato yoifafainmisi. Ascacun nan man rutuafo. Nanscara man tapifiashocai man ua potama. Manricai ratuima. Ascashon maton no-muran man shinanquin isca huaa, ‘Nocorutufiaifoannocai nocon Ifo Jesús non

icoindra huaquin shatuimaran,’ ishon man shinanmisi.

^{14–15}“Nanscara shara. Ascafia ahuara fustirasi man chaca huamisi cuscan un mato yoi man afanan asca huanonma. Shinancapon. Ahuuscashomain Israelifo non chaca huamatiroquin ishon niaifo Balac nan nocofunu Balaam yocani. Ascaiton Balaam nan yosini. Ascacun nan Balac Israelifo chaca huamani aton ahuinma chotamafain ainfofori aton funumafoya ato imani. Ascashon nan ua icoindra huamafoan ahuara futsafo rami huacashon nocon Diosiran ishon tushu inanmisifo. Nan tushu Israelifo atofu ichanancashon nan piinifo. Nanscarifiaquin matofu ichanannmisi atirifi nan Balaam chaca yosini cuscan nanfoanri natian nansca huacani.

¹⁶“Ascacun nan Balaam ato chaca huamani cuscan marifi afanan ascayamacahuun. Ascan ratoranfoan chaca shatuyamacaiyaino un atoqui samamashta nocoriscashquin. Ascashon uhuun tsainmansi un ato onaintimashqui. Uhuun tsain nan noppu cunocoin cuscara.

¹⁷“Ascacun man pafiquiyaquin Diosin Yoshin Sharapan nan icoindra huafo ato yoiai cuscan nicasharacahuun. Ascafia Satanás mato chaca huamapai. Tsoan ua cachiquiri huatama uhuunshon Satanás finoncoian nantonfin ua tanasharacoianquin. Ascacun un cushusharashquin. Un Israelifoan aton shunifo fariña cuscara fata shara nai muranshon shafatifi un ato niriashopaoni. Nan anuquin manánran huapaonifo. Ascan tsoancai tapipaonima ahuuscashomain un ato niriashoicain. Nanscarifi aqui un nan manán futsa cuscara un ato inanshquin nancai tsoan ointiroma. Nanfohuunshon un ato shara huapanaca. Ascadari tsoan chaca huatama ua tanafafainnaiton un ato toquiri osho sharashtacoin inanshquin. Tsoa futsafo sacai nan anu onantiroma. Ascan nan

toquiri fiafin ufu ipasharatiroquin,” — ishon Jesús nan icoinra huafo Pérgamo anofo yoia.

**Jesús Tiatira anoa nan icoinra
huafo ichananti pushu
murannofo ato yoini cuscan**

¹⁸ Ascatan afanan Jesús ua yoiqui isca huaa,

—Ua icoinra huafo Tiatira anoa aton Diosin tsain yoimisi un yoipaiyai cuscan ua cunushoquin isca huai. “Unquian, un maton Ifo Jesús, un mato yoisharapai man tapinon. Uhuun furo chii shahuacai cuscara. Ascacun un mato onancoian. Uhuun tau nan cuno faca facaitsan cuscara. Ascacun un mato yoiquin isca huai. ¹⁹ Mun tapifain mun onancoian man shara huamisi cuscan. Ascashu man noinancoian. Ua icoinra huafain man ua tanacoinmisi. Uhuunshori futsafo man shara huamisi. Ascatan omitsiscafiquiri uhuunshon man tunucoinmisi. Ascacufin man ua icoinra huaquin tau huanitian man futsafo shara huamisi. Ascafia natiancaifin mima huaquin man ato shara huafafainiquin.

²⁰ “Ascashon man ato shara huamisi. Ascafia ahuara futsan man chaca huamisi cuscan un mato yoi man afanan asca huanonma. Nan ainfon Jezabel ipaoni cuscara matofu ichananmisiton yoimisi isca huaquin, ‘Unfi Diosin tsain mato yoitiroquin,’ ishon mato yoifiamisi nantocai uhuun tsaincain yoimisima. Aafin chanimisi. Ascashu nan ainfo fasi chacacoin. Mato amaquiri yoimisi. Ascafiaitocai ahuun tsain man shatumamisima. Ascashon ua yonoshomisifo paramisi aton ahuinma chotanonfo. Nanscarifi huaquin ainfofo aton funuma chotamamisi. Ascashon mato yoimisi isca huaquin, ‘Ahuara futsa non rami huanon nocon dios inon. Nan non tushu inanon. Ascano marifi man atofu ichananshon nan tushu man

pitiroan,’ ishon nan ainfoan mato chaca yoimisi.

²¹ “Ascafia nan ainfoan chaca huamisi cuscan un yoifafainmisi uamain icoinra huashon ahuun chaca shatuicai. Ascafiaicai ahuun chaca shatupaimisima. ²² Ascacufin un isininmaquin finacoinquin racashu omitsiscanon. Ascano ratoran futsafo a cuscara furomacoinshon aton chaca shatuyamaiffoan nanforifi un ato onaintimaquin finacoin omitsiscanonfo.

²³ “Ascano ahuun tanamisifori un namaquin cuyoshquin. Un asca huaiton nantifi ua icoinra huafo maifoti anofoan tapitirofo un nantifi yorafo onancoian. Ascashon aton nomuran shinainfo cuscan un onancoian. Tsoancai ahuashta ua fomantiroma. Ufimain un nantifi onancoincun. Ascacufin nan shara huamisi urifi un ato shara huashquin. Ascán ratoran futsan chaca huamisi nanrifi un onaintimashqui.

²⁴ “Uhuun yoramishti Tiatira anofoan mancai atirifiton nan ainfoan mato chaca yosipaiyai cuscan man tanamisima. Ascán nan ainfoan ahuun nomuran Satanás shinanchacamanai cuscan ahuun tanamisifo fustisi ato tapimamisi. Ascafia mancai anori tapipaimisima. Ascacun un mato yoisharapai. Ahuara futsacai un mato yonoima. ²⁵ Ascacun uhuunshon man tapimisi cuscan nanfohuun ointiaquimayamacahuun. Un mato ihuuyoaitian nanfo cachiquiri huapaiyamacahuun.

²⁶ “Tsoan Satanás finoncoinfain nan ainfoan chaca yosiai cuscan tanatama nan naitian uhuun tsain tanasharacoianshu unfu ipashquin. Ascán naanfin niaifo patashari itiroquin. Nan maifoti anofo ato iquishquin ²⁷ Ascano Upa Diosin tsain uhuunoa cununi isca huaquin, ‘Cristo maifoti anofo ato iquina. As-

can tsoan ahuun tsain shara nica-casmaiton ato onaintimashquin. Mai cuti curushcain non potaino moshi futsutiro. Noncai afanan ahuuscashon shara huatiroma. Nanscarifi aquin nan yoitimamisifo ato onaintimanaitiancai tsoashta ato numatiroma naanonfoma,' ishon uhuunoa cununi. Upa Diosin ua yononi cuscan nanscarifi huaquin un mato yonoi maifoti anofoan aton niaifo man inon. Ascashon man ato yoiai cusca-coin anonfo. ²⁸Shafaino ishtumanhuan fustiton chashaiton nantififain ointirofo. Nanscarifiai un afanan oaiton nantififain ua oinshcani. Ascano nantianrifi un ato yonoshquin afanan tsoashta chaca huatama uacairocon tanasharanonfo. Ascashu ufu isharapacunacafo. ²⁹Ascacun man pafiquiyaquin Diosin Yoshin Sharanan nan icoindra huafo ato yoiai cuscan nicasharacahuun," —ishon Jesús nan icoindra huafo Tiatira anofo yoia.

**Jesús Sardis anoa icoindra
huafo ichananti pushu
murannofo ato yoini cuscan**

3 Ascatan afanan Jesús ua yoiqui isca huaa,

—Ua icoindra huafo Sardis anoa aton Diosin tsain yoimisi un yoipaiyai cuscan ua cunushoquin isca huai. “Unquian, un maton Ifo Jesús, un mato yoisharapai man tapinon. Diosin Yoshin Shara ufu rafumisi. Ascacun nan Diosin tsain yoimisifo un iquimisi. Ascacun un mato yoi isca huaquin. Man amisi cuscan mun tapicoian. Yorafoan matohuunoa yoimisifo isca huaquin, ‘Nan Sardis anofoan Jesús icoindra huafain isharacoinmisiforan,’ ishon matohuunoa yoimisifo. Man isharamisifo ointsacun. Ascafia mancai matohuunoa yoiaifo cuscan man amisima. Mancai ua tanacoianma.

²“Ascashu man uqui ointi mutoa. Afanan ascayamacahuun. Man shinany-

opaoni cuscan nannori afanan shinanacahuun. Ascafia mun tapia Upa Diosin mato imapaiyai cuscan man ascacoiantaima. Ascashon un mato yonoa cuscan afiaquin atirifi man ascacoianma. Ascacun maton nomuran afanan shinan-sharacahuun man uhuunoa tapimisi cuscan nantifi funononma.

³“Ascacufin man uhuun tsain icoindra huafain man nicapaoni cuscan afanan nannori shinanacahuun. Man chaca huaa cuscan afanan asca huatama uaroccon tanasharacahuun. Ascan afanan man uqui nasoyamacaiyaino un matoqui samamashta nocoriscatiro mato onaintimashqui. Pushu muran icafoan tapitirofoma ahuutianmain yomutso aton pushu muran iquiriscatiroquin. Nanscarifiai mancai tapiama ahuutiaran un matoqui nocoriscatashquin mato onaintimashqui.

⁴“Ascafia matofu ichananmisifo fustirasi Sardis anofoan chaca huamisifoma. Nocon sahuuti choshtacoincun non putatiro futsa funa shara sahuushquin. Nanscarifiai atirifi man chaca shinanpaoni cuscan man potacoinshon uhuunoa fusti man shinanfafainaino un matoqui nocoaitian sahuuti oshopa sharastacoin un mato inanshquin man ufu ipanon. Ascan isharamisishaquin man unfu ipanaca ua cuscara shara iishcaquin.

⁵“Ratoran futsafori maton cuscara uhuun tsain cachiquiri huatama ua tanasharafain uhuunshon Satanás finoncoincun nanfofin unfu isharapacunacafo. Ascashu ua cuscara shara iishcani. Nanforifi un ato sahuuti oshopa sharastacoin inanshquin unfu ipanonfo. Ascan Uhuun Upa Diosin nan ua icoindra huafoti aton anufo man libro muran cunua nantififain tapinonfo unfu ipashquiaifo. Ascan nanfo fusti afu nipatirofo. Asacashocai un aton anu soapacunacama. Uhuun Upa Diosin fu-

tan ahuun oinmati afu nai muran icafoan ointaifi un ato yoishquin isca huaquin, ‘Nafotin uhuun yoracoinfoquin,’ ishon un ato yoishquin. ⁶Ascacun man pafiquiyaquin Diosin Yoshin Sharapan nan icoindra huafo ato yoi ai cuscan nicasharacahuun,” —ishon Jesús nan icoindra huafo Sardis anoaf oyoia.

**Jesús Filadelfia anoan
icoindra huafo ichananti pushu
murannoaf o ato yoini cuscan**

⁷Ascatan afanan Jesús ua yoi qui isca huua,

—Ua icoindra huafo Filadelfia anoan aton Diosin tsain yoimisi un yoi paiyai cuscan ua cunushoquin isca huai. “Unquian un maton Ifo Jesús, un mato yoisharapai man tapinon. Unfin ishara fustimisiquin. Uhuun tsainrifi iconcoin. Pushu ifo shafiya arus fusti pushu fuputiro yorafo iquimai iyamarai fupotiro futsafo iquinonfoma. Nanscarifiai maton niaifo David shafi cuscara ipaoni. Tsoa ahuun mai ano imapai iyamarai ato nitun huapaoni iquinonma. Nanscarifiai unfi David funaquin. Urus fusti un yoitiro upa Dios icano tsoa iquitiro iyamaraimain iquitiro ma. Ascacun un mia yoi isca huaquin. ⁸Man amisi cuscan mun tapicoian. Un mato yonoa cuscan man futsafo uhuunoa yoimisi. Ascacuai un mato yonoa cuscan tsoan mato shatumatiro ma. Man ascaiton futsafoan mato huafai foanno mancai uhuun tsain cachiquiri huamisima. Ua cachiquiri huatamarocon Jesús nocon Iforan man huamisi.

⁹“Futsafo arifi Judio cainfian-ishaquicai ua icoindra huafoma. Ascacan nanfocai Diospan yorama. Nanfo chanimisifo. Ascacun un ato yonoshquin mato fuoshopacufoan yoinonfo isca huaquin, ‘Icon. Diospan

Furun matohuun noicoin,’ ishon matohuunoa yoishceni. ¹⁰Ascacan omitsiscafiai un mato yonoa cuscan funaquima man tunucoinmisi. Uhuun tsain nicafain ua tanasharashori man ua cachiquiri huamisima. Ascacun chipo nantifi yorafo manifoti anoashu fasi omitsiscaifotian ratofomain Diospan ahuun yoracoinfoquin tapishceni. Ascashu nantifi icoindra huamafo omitsiscaitian un mato cushusharashquin nanfo omitsiscai cuscan man omitsiscanonma.

¹¹“Ascacun un samamashta oshquin. Ascacan man ua icoindra huua cuscan potayamacahuun. Ascatamarocon Upa Dios tanasharacahuun mato inansharapayai cuscan futsan finonma. ¹²Tsoan omitsiscafiaquin uhuun tsain cachiquiri huatama tunucoinfain ua tanasharacoinshon nantonfin Satanás finoncoianquin. Ascashufin uhuun Upa Dios icano un ato imapacusharashquin. Nannoashu raqui canacafoma.

“Ascacun un nantifi tapimashquin nanfo Uhuun Upa Diosin ahuun yorafocun. Ascashon un ato yoi quin isca huashquin, ‘Nan nuno uhuun Upa icano man no fu ipanacaran,’ un ato huashquin. Diospan yorafo Jerusalén ano ipaonifo. Asca natianrifi Upa Diosin icano ahuun anu Jerusalén funa. Chipo nan Jerusalén funa Upa Diosin icariashu nocoqui fotoshquin. Ascacan tsoan ua cachiquiri huamisima nanno ipanaca. Ascashon uhuun anu futsa tsoan nicayomisima nanrifi nan un ato anu tuqui huashoshquin. Ascashu un isharapacunaca cuscan arifi ufu isharapacunacafo.

¹³“Ascacun man pafiquiyaquin Diosin Yoshin Sharapan nan icoindra huafo ato yoi ai cuscan nicasharacahuun,” —ishon Jesús nan icoindra huafo Filadelfia anoaf oyoia.

**Jesús Laodicea anoa nan
icoinra huafo ichananti pushu
murannofo ato yoini cuscan**

¹⁴ Ascatan afanan Jesús ua yoiqui isca huaa,

—Ua icoinra huafo Laodicea anoa aton Diosin tsain yoimisi un yoipaiyai cuscan ua cunushoquin isca huai. “Unquian, un maton Ifo Jesús, un mato yoisharapai man tapinon. Upa Diosin ua amapaiyai cuscan fustisi huamishashoquin uhuun tsain un mato yoinon. Urifi nan icon fustisi un yoimisi. Ascana Upa Diosin nantifi onihuanifoti aton ni-aifofin unquin. Ascacun un mato yoiquin isca huai.

¹⁵⁻¹⁶ “Man amisi cuscan mun tapia. Ua cachiquiri huacoinyamafishon un mato amapaiyai cuscacai man fuchipaicoianma. Ascashu ichananfiaicai ichananpaitocanan man ichananma. Man fasi mutoi futsua. Ascaracai sharama. Ahuara matsisharacoin niscaquin non unimacai ayatiro. Ahuara shana shara matsinaqui non unimacai ayatiro. Ascafia ahua catsacai non unimacain ayatiroma. Catsa muquin non michotiro. Nanscarifiai atirifi yorafo nan ahua shana cuscarafu. Ua tanasharacoianfo. Ascana atirifi ahua matsi cuscarafu. Uhuun tsain tapisharataicanima. Ascacun un atohuun ramapaicoian. Ascafia mancai shana yafi matsi cuscarama. Ascara itama manfin nan ahua catsa cuscaroquin. Man uqui mutocoian. Ahuara catsa muuquin non michotiro cuscan urifi un mato nansca huai. Ascashon un mato potashquin.

¹⁷ “Ascana man yoimisi isca huaquin, ‘Diosin ua tapimapaiyai cuscan nantifi mun tapia. Uncai ahua futsa yopaimaran,’ ishon man anori shinanfiaicai mancai tapiama man chacafo huamisi. Ascacun un mato yoi. Timafin.

Ua yopafiai man fasi cacapaimisi. Diosin Yoshin Sharapan mato imapaiyai cuscacai man tapiama. Manfin ahuuoma cuscarafuquin. Man imisi cuscari mun tapia. Ascana uncai ascara fuchipaima. Ascafia un matohuuono shinain cuscacai man tapiama. Manfin nan fusho cuscarafuquin. Fushocai ahua ointiroma. Nanscarifiai man chaca huai cuscacai man tapiama. Ascashu man yora chitoria cuscarafoshocai man tapiama. Nanscarifiai ua yopafiaquicai man tapiama.

¹⁸ “Ascacun un mato yoisharapai man chaca huamisi cuscan huafain afanan chaca huaquima. Ua yocacahuun un mato tapimanon ahuuscashumain man ua cuscara shara itiroquin. Ascafia man chitoria cuscara. Ascacun un mato sahuuti sahuumasharai man afanan rafinonma. Nanscarifiaquin man chaca huamisi cuscan un shafacafi oincoian. Ascacun uhuunoashu fusti man maton nomuran fiananan huatiro ua cuscara shara iishquin. Man fusho cuscaracoinrifi imisi. Ascacun ua yocacahuun un mato cayahuamafain uhuun tsain mato tapimasharanon. Ascana oinsharafain ua tanasharashcaquin.

¹⁹ “Ascana un mato noiyamaquicai anori un mato yoicuanama. Ascafia nan un noicoianfo fusti un ato onaintimashqui chaca shatunonfo. Ascashon nanfori un ato yoisharapai ua tanasharanonfo. Ascacun man chaca shinanmisi cuscan afanan anori shinanymacahuun. Natian uhuun tsain nicacoincahuun un mato yoi cuscacoin ashcaquin. ²⁰ Shinanapon uhuun yoramishtichin. Un matofu rafupaicoian un matoqui noco. Yora pushu muran iquipaiquin iquisi pushu ifo cunatiro iquimanon. Nanscarifiai un matoqui noco mato yoiquin isca huashquin, ‘Un mifu rafupairan,’ ishon

un mato yoipacumisi. Ascano tsoan ahuun nomuranshon ua nicaquin ua yoiquin isca huai, ‘Ifon, uqui ohuu. Un mia fuchipaifain un mia yopacoinran,’ ishon yoiaino un afu rafui. Arifi ufu rafuaino.

²¹ “Ascano tsoan chaca huamisi cuscan shatufain ua tanasharacoian naanfin uhuun Upa Diosin icari ufu ipasharatiroquin. Ascafia un niaifocoin icaino nanfin niaifo patashari itiroquin. Unfin Satanás yafi yoshin chacafo finoncoianquin. Uhuun Upa Dios icariashu uhuun Upa fu un niaifocoin ica. Nanscarifiai tsoan ahuun chaca cachiquiri huafain ua tanasharacoianshu un icanoashu arifi ufu niaifo ipatiroquin. ²² Ascacun man pafiquiyaquin Diosin Yoshin Sharapan nan icoinra huafo ato yoiai cuscan nicas-haracahuun,” —ishon Jesús nan icoinra huafo Laodicea anofo yoia.

Dios icarishon ahuunoa yoisharapacunacafu

4 Ascashon nannori ua yoifain Diosin Yoshin Sharapan ahuara futsa ua oinmanaino nan namapan oian un huua. Ascashon un oian Upa Diosin icaria caincaini nan un oinyaino nan oi un nicaquin tau huua nanrifi un afanan nica. Nan manuti nicatsa achacoin. Ascano ua yoiquin isca huua, —Nuri uqui ohuu. Ahuarafo chipo ahuuscara aashquiai cuscan un mia oinmayoiran, —ishon ua yoia. ² Ua yoitapaiyaino samamashta Diosin Yoshin Sharapan ua shinanmatana. Ascashon ua iquipaiyai cuscan ua iquina. Ascatari nan oi un nica ari ua iyoa. Nanno niaifocoin tsaoti uhuapa shara un oian. Nocon Ifo Diosin tsoan.

³ Nan nocon Ifo fasi sharashtacoin iscara un oian. Toquiri rafutan aton anu jaspe yafi cornalina nan rafu sharashtacoin faca facaitsa rafu. Nan jaspe oshoshara. Ascan cornalina os-

hin chushushara. Nanscarifiai nocon Ifo sharashtacoin faca facaitsa ointsa. Nahuan fai tonan shara cuscaraton a tsoano tarati huua. ⁴ Nannori nocon Ifon tsoano veinte cuatro nocofunufu tsaoti tarati huashu tsaonifo. Nan nocofunufocoin Jesús tanamisifo. Nanfoan icoinra huafo aton cushumisi ipaoni. Sahuuti oshopa sharashta sahuufain maiti oro faca facaitsa sharashta mairafo.

⁵ Ascatan nocon Ifo tsoano canan facaiqui ointsa icain turuica nicatsari un nica. Nanscara nicaquin non tapitiro Diosin ahuamamishti huatiro. Tsoa futsacai ahuun curush cusarama. Ascatan nan Upa Diosin tsoano siete lamparina uruaiton un oian. Nanfo uruai cuscan huaquin Diosin Yoshin Sharapan nan siete icoinra huafo ichananti pushufoti murannofoan futsafo tapimafain oinmatirofo ahuu cuscaramain Diosiqui arifi tapinonfo. ⁶ Nannori un oian ununhuan ointsa tsosi sharacoin. Ascano nocon Ifoan ahuun tsaoti anori nan onihuani rafu non rafuri niafo. Furo ichapaya. Fusoqui yafi puchiuhuuri furo ichapaya.

⁷ Futsarifi masharo ointsa icaino futsa moi funu ointsa ica. Ascano futsan ahuun fusori nan nocofunun fuso ointsa icain futsari nan tutumanhuan noyai ointsa ica. ⁸⁻¹⁰ Nan cuatro putao ya seis putao ya. Nan ato putao ocuma rafu furo ichapayari. Shafatisho yafi yamutishori nan rafu non rafuri fanainquin isca fafaincani,

“Nocon Ifo Dios fasi sharacoin. Shara fustisi huapanaca. Nantofin ahuamamishti huatiroquin. Iyopaonishaqui natianri ipamisi. Ascashuri ipanacaran,”

icashu nan rafu non rafuri fanainriacani. Ascashon yoiafori isca huaquin,
“Nocon Ifon Diosin mirus fusti min nocon Ifocoin. Tsoa futsacai mia cuscara sharama. Min isharapacunaca. Ascacufin

non mia fasi noiquin aicho huai.

Min noco shara huafafaini,”

ishon nan rafu non rafuriton yoiri-
aifoanno nan icoinra huafo cushumisifo
veinte cuatrofain nocon Ifo Diosin ahuun
tsaoti camaqui tsaoo naman fuoshopacu-
foan aton maiti oro ointsa sharashta-
coan nocon Ifo tsaoo afofori nannosi hua-
cashion yoiafo isca huaquin,

“Nocon Ifo Diosin min noco maiti inan
cuscan non mia afanan nasoin. Man
min noco inanfiacun non mia fasi
noicoinquin noco maitifo non mia
afanan nasoin. Ascan mirus fustifin
min noco iquitiroquin. Min nocon
Numamisi. Ascashu mirus fusti
min nocon Ifocoin. ¹¹ Ascan minfin
isharamisiquin. Ascacun mihuunoa
fusti non yoitiro isca huaquin. Min
nocon Ifocoin. Min nocon Dios. Tsoa
futsacai mia cuscara sharama. Min
isharapacunaca. Ascacufin non mia
fasi noicoinquin. Ascan minfin min
shinanpasi ahuamamishti huatiro-
quin. Min nantifi ahuamamishti oni-
huani. Min apaiyai cuscan fusti nan-
tifi min onihuani. Ascacun minhu-
unoashu fusti nitiroforan,”

ishon nan Jesús tanamisifo veinte cuatro
yorafoan yoiafo.

**Jesús nan chashoan facu
cahuashara cuscaraton cununi
cuscahuunshon noco tapimani**

5 Ascatan afanan un oian cuscan un
mato tapimai. Nocon Ifo Diosin
ahuun tsaoti camaqui tsaoshon ahuun
mucu mumiori papel ocuma rafu cunua
sufishon tsoma. Ascashion siete tashna
huatinin tashna huaa. ² Ascashion un
oian Diosin oinmati mutsisipacoin nan
afu nai muran ica. Nantori oi ashcafinin
cunaquin isca huaa, —Na cunu non oin-
pai. Ascan chaca huamisima fustiton na
tashna huatifo fuputiro na cunu non
oinon. ¿Ascán tsoan chaca huamisima-

mun na cunu ahuun tashna huatifo noco
fupushona non oionon? —ishon oi ash-
cafinin yoia. ³ Ascafia nan nai muran-
noafo futan mai anoafo non Diosin oin-
matifo afu ifiashocai tsoashtacai cunu
fupushotiroma amuran oiononfo.

⁴ Ascacun uaiyanan un yoia, —
¡Ohuashta! Chaca huamisimacai tsoan
fuchiana na cunu noco fupushonon
amuran non oionon, —ishon un shinan.
Ascacun un fasi uairia. ⁵ Ascaiton
nan veinte cuatro icoinra huafo aton
cushumisi futsan ua yoiquin isca huaa,
—Uaiyamahuu. Oinpon. Nocon Ifo nia.
Cristo nanfin nocon niaifocoinquin.
Rato yoinacai nan masharo uhuapa
cuscara mutsisipacoinma. Nanscarifiai
Cristo Israelifoa aton niaifo
mutsisipacoin. Nanton ahuamamishti
huatiro. Tsoa futsacai a cuscarama.
Ascacun anu futsamisifo isca huaquin,
“Judápan funafo nan masharo curush
cuscaracoinforan,” huamisifo. Ascacufin
nocon yorafoan aton niaifo David
ipaoniquin. Ascan nan David ahuun
funa natian nuno Upa Dios fu ica.
Ascacun nanton nan siete tashna
huamua noco fupushotiro nan cunu non
oinon. Ascacun afanan uaiyamahuu,
—ua huaa.

⁶ Ascatan nannori chashoan
cahuashara fustifia ahuun masho
siete nantirifi ahuun furo un oian.
Rutuafu ointsafia Diospan tsaoti
ano nia ica. Nannorifi nan rafu non
rafuri Diosin onihua yafi nan veinte
cuatro icoinra huafo cushumisifoan
tarati huayacunafo. Tsoa futsacai a
cuscarama. Nanton ahuamamishti
huatiro. Diosin Furun manifoldi ano
nichian ahuun Yoshin Sharahuunshon
nantifi yorafo onancoinon. ⁷ Ascan Upa
Diosin nan cunu ahuun mucu mumiori
tsomacun nan Jesús chashoanun
facu cuscaraton man fia. ⁸ Fishon
nan rafu non rafuri Diosin onihuani

yafi nan veinte cuatro icoindra huafo cushumisifoan fuoshopacufoan manuti guitarra cuscarafu yafi tutsofo nanfoan tsofafa. Nan tutsofo oro faca facaitsa. Nanfo muran fiin otano ahuun coin tipoi ininsharayacoin. Nanscarifiai Diospan yorafoan a cufiaiton Upa Dios nan icarishon ato nicamisi.

⁹⁻¹⁰ Ascano nantianri nanfo fanainti funapan fanainquin iscafo,
“Min chaca huayamafiamisicun mia rutunifo.

Ascashu nantifi yorafo manifoti min noco nashocai min imi foni Satanás afanan nocon ifo itama Upa Diosin ahuun yorafo non inon. Ascacufin mirus fusti nan cunu Upa Diosin tsofafa min fitiroquin. Ascashon ahuun tashna huamuafu min noco fupushotiro amuran cunua cuscan noco tapimashquin.

Mihuunshon mia icoindra huafoti Diospan yorafo itirofo. Ascano nanfoanri futsafu min tsain shara ato tapimanano min ato amapaiyai cuscan anonfo. Ascacun non maifoti anofoan niaiffo patashari iishquiran,” icashu fanaincafo.

¹¹ Ascatan un oianri Diosin oinmatiffo afu nai muran icafo ichaparasicoin tsoancai ato tanan huatiroma. Nanfo fanaincaifoan oinfain un ato nica. Diosin tsaoti ano tarati huayacunafo nan Diosin onihuanu rafu non rafuri non nan Jesús icoindra huafo cushumisifo veinte cuatro naqui huayacunafo. Ascashu nanfo ya osiashu Diosin oinmatiffo fu fanaincaifoan un nica. ¹² Fasi oi ashcafinin fanaincani iscafo,
“Diospan facu Jesús chashoan cahuashara cuscara sharashtacoin man rutunifo.

Ascafia natian nantifi manifoti ato iquifain

nantifi nai murannoafoti yafi mai anoafori ahuuna iquin.

Naantofin nantifi tapicoianquin ahuun curushhuunshon ahuamamishti huatiro.

Ascacun nantifiton min sharacoinran mia huapanonfo.

Mirus fustifin min nocon Ifo iquicain.

Ascacun ¡Aicho! Min nocon Ifo ishara fustipacunacaran,”
icashu fanaincani.

¹³ Ascatafin un nica nantifi nai murannoafu fanaincaino mai anoafori fanaincaino unuhuan anoafori fanaincani iscafo,

“Upa Diosin ahuun tsaoti ano tsoa.

Furun Jesús chashoan facu cuscara sharashta nan rafu nocon Ifo ishara fustipacumisifo.

Ascacun nantifiton man sharacoinran ato huafain man fusti nocon Ifocoin ahuamamishti man huatiroman, ishon yoipacunonfo,”
icashu fanaincani.

¹⁴ Ascatan nan rafu non rafuri Diosin onihuanifoan yoiquin isca huafo, — ¡Aicho! Nanscasi ipanon. Amen, — icaifoanno nan veinte cuatro Jesús icoindra huafo cushumisifo nan Dios yafi Furun nanman fuopacufoannafo. Nanfoanrifi Upa Dios yafi Jesushuunoo yoisharafo.

Nan tashna huati siete

6 Ascatan un oian nan Jesús chashoan facu cuscaraton nan cunu tashna huamua siete tsofafa. Ascashon fusti fupua. Fupuaino un nica nan rafu non rafuri Diosin onihuanu futsan ahuun oi ashcafinin yoiai cuscan nan turuica nicatsaton yoia, — Ohuu, — yoni. ² Ascacaino caballo oshopa ua chaima nocotoshiaiton un oian. Nan caballo camaqui tsoaran piyacati tsofashu

tsaocun niaifoa maiti maimana. Man maimanano nannoashu caballo camaqui man caa. Nantorifi futsafo iquipaiyai cuscan man iquini caa. Ascaitocai tsoashta nitun huatiroma. Nantomain nantifi finoncoincun.

³Ascatan Jesús Diospan facu nan chashoan facu cuscaraton afanan nan cunu tashna huamua futsan fupua. Fupuaino un nica nan rafu non rafuri Diosin onihuani futsan afanan yoia isca huaquin, —Ohuu, —yoni. ⁴Ascaino caballo futsari oshininpa nocotoshia. Nan caballo camaqui tsaocun noppu chainipa inanfain yonoa mai ano catanon. Ascatan nocoshon maifoti ano ato shinanmana afanan unimasharatamarocon noicasmatanancanashu rutunanonfo.

⁵Ascatan Jesús chashoan facu cuscaraton afanan nan cunu tashnahuamua futsari fupua. Nan fupuaino un nica nan rafu non rafuri Diosin onihuani futsan afanan yoia isca huaquin, —Ohuu, —huaino caballo futsa fisopari nocotoshiaiton un oian. Nan caballo camaquiri tsoanra tsaoshon ahuun ihuu tananti tsoma ica. ⁶Ascaino nantianri un oi nica nan rafu non rafuri Diosin onihuani nastumai un nica yoiquin isca huaiton, —Tushu yamaicuana iishquin. Nan aya cuscafia fasi chicoin. Nocofunun shafa fusti yonoshon ahuun rafanan trigo kilo fusti fitiro ascayamarai arroz kilo rafu non fustisi fitiro. Afanan fipaifia ahuun pui tushuama ahuara futsa afanan fipanan. Ascacun shuni yafi nan fimi uva ahuun unu chacana huayamahuu, —ishon yoia.

⁷Ascano afanan Diospan facu nan chashoanun facu cuscaraton afanan nan cunu tashna huamua futsari fupuaino un nica nan rafu non rafuri Diosin onihuani futsan afanan yoiquin isca huua, —Ohuu, —huua. ⁸Ascan caballo futsa fasi pashicoin nocotoshiaiton un oian. Nan caballo camaqui futsari tsoa ahuun

anu Namamisi. Nanton yorafo namatiro. Ascashon nantori yoia isca huaquin, —Un yorafo namapairan, —huaiton Diosin yoia, —Ai. Min atiroran, —huua. Nan Namamisi cachiori futsan oa. Ahuun anu Namisifoanno ica. Ascano nan namamisihuunoashu mani futsafoya futsafo rutunancani atirifi tushuoma fonicanai naifoanno atirifi pau futsa futsatapafoan ato namaino atirifi yoinafoan ato rutua nacani. Ascashu fasi yorahuanrasi nashcani. Tsoan ato tanan huatiroma un oian.

⁹⁻¹⁰Ascatan afanan Jesús nan cunu tashna huamua futsa fupua. Fupuaino un oian nan Jesús icoinra huashu namisifo. Niyopaonifotian Diospan tsain futsafo yoifain Jesushuunoari yoifoanfainpaonifo. Ascaifoan ato rutunifo. Ascashu nanfo Jesushuunoashu nani. Natian un oian aton furo yoshinfoan Dios cufiti ano ichanancashon oi ashcafinin yoiäfo isca huaquin, —Nocon Ifo Diosin, min nantifi onancoian. Min ahuamamishti huatiro. Min isharafustimisi. Mincai ahuashta chaca huamisima. Min iconmisi. Nan mia icoinra huamafoan mai anoshon noco rutunifo. Ascacun ahuutianmun min ato onaintimaicain, —ishon yoiäfoan. ¹¹Ato yoiqui isca huaquin, —Manayocahuun. Funacaquima. Futsafo mato cuscarafori uhuunshon uhuunoa yoimisifo iishcani. Ascacun nanfo mato cuscara uhuun oinmatifo arifi iishquicani. Nanforifi uhuunshon yora chacafoan ato rutushcani. Ascan ahuun unutaqui ato rutuafono mato ano nocoshcani, —ishon nocon Ifoan ato yoia. Yoitan sahuuti osho chainipa sharashtacoin ato inan. Nanfoanmain mai ano niyoshon Upa Diosin tanasharamisicun ato inanyama.

¹²Ascatan Jesús nan chashoan facu cuscaraton afanan nan cunu tashna

huamua futsari fupuaiton un oian. Fasi curushcai mai nayanaiyaicain farin afanan chashayamaino nan sahuuti cushto fisopaton fupoa cuscara faquishcain icain oshu oshicoin imi ointsa icain. ¹³Nihuu curushpacoin nocoquin fana higuera ahuun fimi oshianfo unutaquin niriatiro. Nanscarifiai fishifo nai murannoashu mai ano pacuafo. ¹⁴Nainhuan miscoacunfoanni ointsa yamariscatanaino machihuan yafi mai toomanhuan nayanaiyaicaino futsa ano shucucaina.

¹⁵Ascaino nantifi mai anofo ratucoianfo. Manifoti aton niaifofo non niaifo patasharifo non ranushumuafoan ato niaifofo non mafo ichapayafo non yora mutsisipafu non oinmatifo non ifomaisifori nantifi ratucoianfo. Ascaino atirifi mahua quini uhuapa muran ichofo onupaicani. Atirifiri machi cuya ano ichofo toquirininhuan ananmanri onupaicani. ¹⁶⁻¹⁷Ascaino fasi fiisiyanan yoiafo isca huaquin, —¡Ohuashta! Upa Diosin nai murannoaton ahuun Furun Jesús nan chashoan facu cuscara natian nocoqui sinacoin. Ascaino non ahuuscatiromun omitsiscashquima. Tsoashtacain Diosin numatiroma noco onaintimanonma. Ascaino na machi cuyafo yafi toquirininhuan noco camaqui pacupainon Diosin noco fuchishon noco omitsisca huanonma, —ishon nan nicacasmamisifoan yoiafo.

Diosin ciento cuarenta y cuatro mil ahuun yorafo cushushquiai cuscan

7 Ascaino afanan un oian cuscan un mato tapimai. Diosin ahuun oinmati rafu non rafuri afu nai muran imisifo un oian. Futsa fari oaiquiri niaino futsari fari caiquiri nia. Ascaino futsa fari oai istafari niaino futsari fari cai istafari nia. Ascaino nihuu nishmapacufoanna. Afananricai nantifi maifoti

anoa nii puifo puri puricama. Unuhuanri afanan fuchoima pusiquima raca. ²Nan rafu non rafuri Diosin ato yonoa mai yafi unuhuan chacana huatirofo. Ascaino Diosin oinmati afu nai muran ica futsari nan fari oaiquirinoashu oaiton un oian. Nocon Upa Diosin nan nipanacaton ahuun sello ya oa. Nan Diosin yonocun ahuun yorafotihuun nutatiro nantififain tapinon Diospan ahuun yorafocun.

³Nan oquin Diosin oinmati rafu non rafuri ato oi ashcafinin yoia isca huaquin, —Manayocahuun. Diosin tanamisifo iquisi fumananqui un ato Diosin anu nutayonon nanfo Diospan yorafocun nantififain tapinonfo. Ascaino non acataima ahuara mai anofo yafi unuhuan anoafori chacana huariyamacahuun, —ishon ato yoia.

⁴Uun nica 144,000 Israelifoan aton fumananqui Diosin oinmatinon Diosin ahuun anu man ato nutan. ⁵⁻⁸Nocon shuni Israeli ahuun facufo doce furonanfacufo cainni.

Iyoaton ahuun anu Judá.

Judá cachiori Rubén.

Rubén cachiori Gad.

Gad cachiori Aser.

Aser cachiori Neftalí.

Neftalí cachiori Manasés.

Manasés cachiori Simeón.

Simeón cachiori Leví.

Leví cachiori Isacar.

Isacar cachiori Zabulón.

Zabulón cachiori José.

José cachiori chipo facucoin Benjamín.

Nan doce fustirasi pashcanain futsuashu icafo. Ascaino nan shoco futsafo anoashu caiafo aton funafo doce mil Diosin ato catonni.

Yorahuanrasifain ato sahuuti oshopa sahuufo

⁹Ascaino Upa Diosin yafi Furun nan chashoanun facu cahuanshara cuscara tsaono yorahuanrasi niafo tsoancai ato

tanan huatiroma. Nan maifoti anofo manifotifain sahuuti oshopa chainipa sahuucashon upu tsofafo. ¹⁰Nanfoan oi ashcafinin yoirafo isca huaquin, “Nocon Upa Diosin futan Furun Jesús noco nimapacuafo. Nocon Ifo Jesús nan chashoan facu cahuanshara cuscara nocohuunoashu nani nocon chaca soashoshquin non afu nipanon,”

ishon yoirafo. ¹¹⁻¹²Ascatan Nocon Ifo tsoano ahuun oinmatifo afu nai muran imisifo non Jesús tanamisifo ato cushumisifo yafi nan rafu non rafuri Diosin onihuanani nanfo nanno niafo. Ascashon ratoconun mai chachishon fuoshopacufoantian Dios yoisharaquin isca huafo, “¡Aicho! Mirus fusti min icocoin. Min isharapacumisi. Mirus fustirifi min noco imasharatiro. Min nantifi onancoian. ¡Aicho! Non yopai cuscan min noco ashomisi. Ascacun nantififain min sharacoinran mia huapanacafo. Minfin ahumamishti huatiroquin. Min nanscasi huapanaca. Nanscasi ipanon. Amen,”

ishon yoirafo.

¹³Ascacun Jesús tanamisifo aton cushumisiton futsan ua yoca isca huaquin, —¿Na yorafo sahuuti osho chainipa sahuuafu raniashu fuafomun min tapiamamun? —ishon ua yoca. ¹⁴Ascaiton un cuma, —Ma. Uncai tapiama. Minfin tapiaquin. Minfin ua yoitiroquin, —un huaiton. —Nanfo fasi omitsiscani. Ascaifoan Diospan Furun nan chashoan facu cahuanshara cuscaraton ato nashonihuunshon ato chaca soashona ato imasharanon. Nanscacun ato sahuuti oshopa shara sahumana.

¹⁵Ascashu Upa Diosin icano afu imisifo. Afu ishon nan Upa Diosin ato yonoa cuscan ashopacunacafo. Ascacun ato cushufafaini ahuaara chacafo

atoqui nocononma. ¹⁶⁻¹⁷Diospan Furun nan chashoan facu cahuanshara cuscara Upa Dios fu imisi naanfin ato cushumisi ipashquiquin. Ascanocai afanan tsoa foniyamacai nomipacunacafoma. Afananricai farin ato tsacaima. Ascashon Jesús ato iyoaino unimapunacafo. Ascacun Upa Diosin aton ointi fupuashoshquin afanan uainonfoma, —ishon yoiara.

Nan tashna huamuafu Jesús ahuun unutaqui fupua

8 Ascatan ahuaara iishquiiai cuscan ua oinmayoa. Jesús Diospan facu nan chashoanun facu cahuanshara cuscaraton cunu tashna huamua siete man fupuquin tau huayoa. Ascan natian ahuun unutaquin futsari fupuaition un oian. Diosin icano nai murannoashu nantifi media hora puusiyoafoma.

²Ascatan Diosin ahuun oinmati siete afu nai muran icafoan atoti manuti inapacua chipo ato yoiatitan chaan chaan ashquinonfo.

³Ascaino Diospan oinmati futsan paran uhuapamashta oro faca facaitsa tsomashu Upa Dios cufiti ano nia un oian. Nan paran uhuapamashtanun ahuaara inin shara coaino fia. Ascan nantifi Diospan yorafoan cufimisifo cuscan osishon Dios cufiti camaqui huaa. Nannori chaima Diosin tsoa.

⁴Ascaino nan oinmati Dios fu nai muran imisi paran uhuapamashta tsomashon ahuun coin tipoi inin shara nai muran man foa. Nanscarifiai Diospan yorafoan cufiaifo cuscan Upa Diosin nan icarishon nicatiro. ⁵Ascacun Upa Diosin man itishara huaa maifoti anofo nan icoinra huafoma ato onaintimashqui. Ascashon ahuun oinmati yonoa afanan paran uhuapamashtanun cufiti sapa muran chi fospi huanon. Fospi huatan nai muranshon mai ano man pota. Ascaino mai ano fasi curushcai turuica

achacoin nicafain canan piishicain mai nayanaiyaica.

**Oinmati afu icafoan manuti
chaan chaan acani**

⁶ Ascatan Diosin ahuun oinmati siete afu nai muran icafo atoti manuti inan itishara huafo chaan chaan ashcaquin.

⁷ Ascán futsan ahuun manuti chaan chaan acaino unu matsi tocoromishti yafi chii imia osia mai ano pacua. Ascaino mai cashcu futsa man coi cuyoa. Un tercero del maitio man coi cuyoa. Nantifi mai anoa fasifo yafi ihuifo man coi cuyoari.

⁸ Ascatan Diosin oinmati futsanri ahuun manuti chaan chaan acaino machi uhuapa chi urumanhuan ointsa Diosin nai muranshon potaino unuhuan muran pacua. Ascano unuhuan cashcu futsa imi ica. La tercera del unuhuan imi ica. ⁹ Ascaino atirifi unuhuan muran icafo man nai cuyoafo. Atirifi la tercera de shashohuanfori man coi cuyoafo.

¹⁰ Ascaino Diosin oinmati futsan arifi ahuun manuti chaan chaan acaino fishi uhuapacoin chi uruai cuscara nai murannoashu pacua. Atirifi unufo muran man pacua. Fishihuan chi uruai cuscara la tercera unufoqui man pacua. Ascashu unu tsosia sharafoquiri man pacua.

¹¹ Nan fishihuan ahuun anu mocacoinran huamisifo. Nan unu muran pacuano la tercera unu moca ica. Ascacun yora ichaparasi nan unu ayacanashu nai futsuafo.

¹² Ascatan Diosin oinmati futsan arifi ahuun manuti chaan chaan acaino farin la tercera afanan chashasharama oshuri la tercera afanan chashama. Ascaino la tercera fishifoanri afanan chashafoma. Ascashu shafata cuatro horas faquishia. Yamuri cuatro horas fasi faquishcoin.

¹³ Nanfo un oianno un oianri Diospan oinmati tutumanhuan cuscara fasi cuya noyaiton un nica. Naanton oi ashcafinin

yoiquin isca huaa, —¡Ohuashta! Diosin oinmati afu nai muran icafo rafu non fusti futsan aton manuti chaan chaan acaino mai ano icafo fasi mimacaia omitsiscashcani. Ascacun ¡Ai timafin! —ishon yoia.

9 Ascatan Diosin oinmati futsan arifi ahuun manuti chaan chaan acaino Diospan tsoara futsa nai muranshon mai ano nichian. Ascán fototan nan yoshin chacafo quininhuan faquish muran icafo ano caa. Nan quininhuan fupotiya. Ascán amurannoafocai ahuuscashu caintirofoma. Ascafia nan nai murannoa fotomana Diosin shafi inan quininhuan faquishi murannoa ato caimanon. ² Ascashon ato cainmatanaino nan mai quininhuan murannoashu coinmahuanfoya nai muran foafo. Ascaino fari chashasharayoama. Nantio nai faquishcoin iyoa. ³ Ascatan nan coinmahuan murannoashu ocutsuru cuscarafo ichaparasi mai ano nichian. Diosin ato fasi pofucuin ima inapapia cuscara inonfo.

⁴⁻⁵ Ascashon ato yonoa isca huaquin, —Mai anofo fasifo yafi fanafo non ihuifori chacana huayamacahuun. Ascán tsoan uhuun yorafoma aton fumananquiri uhuun anu nutamuafoma nanfo fusti man ato tucatiro. Ascafia ato rutuyamacahuun. Ato rututama mucu fustiti oshu man ato omitsiscahuatiroan, —ishon ato yonoa. Ascacun ato tucayoanno nan icoinra huamafo inapapia muutsa mucani fasi omitsiscafo.

⁶ Mucu fustiti oshu nanscara mucani nan icoinra huamafo tunuyamacaicani aafin napaiäfo. Ascashon yoiqui isca huafo, —¡Ohuashta! Uncai tunutiroma. Un naafin shara itiroquin, —ishon yoiäfo. Ascafia ahuuscashuca natirofoma.

⁷ Ascán natian nan ocutsurufo ahuu cuscaramainquin un mato tapimai. Caballo iquisi itishara huatirofo futsafo rutuifoshcaquin. Nanscarifiai nan ocut-

surufo nan caballo cuscara ointsafu. Ato maiti oro cuscara sharashtacoin mairafo. Aton fusorifi nan nocofunun fuso ointsafu. ⁸Aton foo ainfoan foo ointsafu ato shutarifi masharonun shuta ointsafu icain ⁹Aton shochi ano cuno ointsaton shofucumuafu ahuaratun ato tsacapaiyaino amuran iquinoma. Ascashon aton putao pua puaiquin achacoin nan caballofoan ahuun taramuti tarafaino futsafu rutunain nicatsa. ¹⁰Ascatan nantifi tsisisiyafu. Naanton yorafu chachiano isin mutiro inapapia mutsa. Ascashon ato tsisisinin yorafu omitsisca huatiro. Mucu fustiti oshu ato isinmumatiro. ¹¹Nan quinhuan faquish muran yoshin chacafo icafoan aton niafoan ahuun anu Israeli tsainman Abadón. Griego tsainmanri ahuun anu Apolión. Onicoinnin tsainman yorafu rutumisi.

¹²Ascán man chaca finonquin tau huua. Ascán nan rafu nocoataima.

¹³Ascatan Diosin oinmati afu ica futsan ahuun manuti chaan chaan acaino. Anoshon Dios cufiti acamaqui nan rafu non rafuri moi masho ointsafu oro sharashtacoin nan nushmancayanoa oi un nica. Cufimisifo ano un oi nica. ¹⁴Nan oin Diosin oinmati afu icaton manuti tsoma yoiaiton un nica isca huaquin, —Nan rafu non rafuri yoshin chacafo Upa Diosin ato munushua nan unu uhuapa ahuun anu Eufrates ano ato muputahuun fononfo, —ishon yoia. ¹⁵Nanno nan yoshin chaca rafu non rafuri afin itisharamisifo. Ascán rato hora yafi rato shafatan non rato oshu non rato farimain ato caimanaitian atirifi yora mai anoafu la tercera yorafu ato rutushcani. ¹⁶Ascashon un nica yorahuan-rasi dos cientos millones ranushumuafu caballo camaqui tsaofu futsafu rutui foshcaquin.

¹⁷Ascatan Upa Diosin ua ismani nan ranushumuafu yafi ato caballofo un oian

iscara, Nan caballo camaqui tsaofu aton shochi nan chii rucun cuscara cuno oshin shara non tonancoin non chashnanpan shofucumuafu. Ascán nan caballofoan aton mapo masharo mapo ointsafu. Aton ashfan murannoashu coin yafi chii uruaino azufre ashfacanun siquin. ¹⁸Nanfoan yora ichaparasi man namafo. La tercera manifi man ato namafo. ¹⁹Aton ashfa futan ato inan yorafu rututiro. Aton ina nan rono paupaton ina cuscarafu. Nanfoan yorafu omitsisca huafu nanonfo.

²⁰Atirificai afohuunoashu nayamafiacani aton chaca shatuafoa Upa Dios tanashcaquin. Ascátamarocon yoshin chacafo tanamisifo cuscan shatuyamafain oro iyamarai cuno oshopa sharashta non cuno futsan ahuun anu bronce non toquiri non ihuirifi ramihuafu. Ascáfia nanfoancai ahua oinyamafain nicatirofoma raquiri cahuascatirofoma, —Nan nocon Dios. Non ahuun noiran, —ishon yoimisifo cuscan shatuafoa. ²¹Ascashon chaca futsa futsatapafo huamisifo cuscan shatuafoa. Rutumitsamisifo cuscan shatuyamafain shointian cuscan shatuyamafain nocofunufo aton ahuinma fu imisifo cuscan shatuyamafain ainfori nanscarifaifono. Onumisifo cuscan shatuafoa. Ascáshu nanfo chacacoinfiashon tsoan aton chaca shatuafoa nocon Ifo Jesucristo tanasharashcaquin.

**Upa Diosin ahuun oinmatinin
nan afu ica papel uhuapama
cunua sufia tsoma**

10 Ascatan un oian Diosin ahuun oinmati afu ica futsa mutsisipacoin nai murannoashu fotoaiton. Coin camaqui fotoaiton ahuun caya un oian iscara. Maiti nanhuanfai ointsafu maia. Ahuun fuso fasi chashacoian fari ointsafu. Ahuun quishi rafu chi ointsari. ²As-

cashon papel uhuapama cunua sufia tonoshon tsoma. Ahuun tau mumiori ununhuan fumancayan paicain ahuun tau mushquiori mai ano paia. ³Ascatan oi ashcafinin cuna nan masharo uhuapaton ahuun oi nicatsa. Ascaiton nan siete turuica curushcain oi uhuapaton futsan cuma. ⁴Ascacun nan yoirafo cuscan nicashon un cunucuna. Ascafia nai ari Dios icarishon oi futsan ua yoiqui isca huaa, —Min rama nica cuscan cunuyamahuu. Aton tsain tsoa tapimayamahuu, —ishon ua yoi.

⁵⁻⁷Ascatan Diosin ahuun oinmati afu nai muran icaton mutsisipacoin unuhuan yafi mai ano paishon ahuun mucu mumiori mushainacahuan yoi isca huaquin, —Upa Diosin nipanacaton nai yafi nantifi nai muran icafo oni-huafain mai yafi mai anoafo oni-huafain ununhuan yafi unuhuan muran icafori oni-huani. Nanhuunshon un yoiquin isca huai, Upa Diosicai afanan ato manaima. Ahuun yoishomisifo tapimapaoni cuscacai futsafoan tapipaonifoma. Ascafia natian Diospan oinmati afu ica futsan ahuun unutaqui manuti chaan chaancaino ato tapimayoni cuscan nantifi nansacoinshquinran, —ishon Diosin oinmatinin ua yoi.

⁸Ascan nan oi nai murannoa un nicaton afanan ua yoi isca huaquin, —Nan Diosin oinmati afu ica unuhuan yafi mai ano nia. Nanno aqui catahuun. Ascashon nan papel sufia tonoshon tsoma fianhuun, —ishon ua yoi.

⁹Ascan cashon Diosin oinmatiqui nocoshon un yoi, —Nan papel sufia uhuapamashta ua inanhuun, —un huaiton. —Fihuu. Ascashon pihuu. Piqui min mui min ashfa muran fata sharacoin fona cuscara. Ascan man shuashon min mui min shaqui murannoashu mocacoin iquin. Ascashon min tapitiro Diosin tsain shara iconcain. Ascatare min tapitiro nan tsain yoi cuscacoin yorafo omitsiscash-

cani. Mirifi min tapiaino min fasi shinantiroran, —ishon ua yoi.

¹⁰Ascacun un papel sufia uhuapamashta fitan un pishon uhuun ashfa muran un mua fata shara fona mutsa. Ascafiacun un shuashon uhuun shaqui muran un mua mocacoin. Nanscarifiai ua yoi cuscan huafain ua isma cuscari uhuun nomuran un nanuashu un unimacoinna. Ascafia nan tsain inon pa-coai yoi cuscan yorafo omitsiscashcaini. Nan oinquin un fasi shinan. ¹¹Un asca huano afanan ua yoi, —Diosin ahuun yorafo yoiyai cuscan afanan ato yoi-huu. Ahuarrafo iishquiai cuscan yorafohuunoa yoiyai manifestihuunoa yoiyai niaifofohuunoori ato yoihuu, —ishon ua yoi.

**Nocon Ifo Jesús yorafo
yoiyai cuscan nocofunu
rafutan ato yoishquicani**

11 Ascatan tsiquiti cuscara tananti ua inan. Ascashon ua yoi isca huaquin, —Dios fu tsainti pushu ahuun chainipa yafi ahuun nashfa muranri tanantahuun. Anoshon Dios cufitiri tananfain ahuun yorafoan ahuutitomain nocon Ifo Dios noiquin fanainshocain a cufiafori ato tanan huahuu tapishquin. ²Ascashon Upa Diosin yonoa cuscan Israelimafo pushu umainti fusti nocoshcaini. Fari rafu non fusti nushmancayan Israelimafoan Jerusalén chacana huashcaini. Ascan nan Israelimafoancai Jesús icoinra huafoma ascashucaí Dios fu tsainti pushu muran tsoa iquitirofoma. Ahuun unmainti fusti fotirofo. Ascacun unmainti tananyamahuun. ³Ascacun nantianri un nocofunu rafu Jerusalén ano nichishquin. Nanno icafo un ato yoiyai cuscan nan rafutan ato yoishquicani. Fari rafunon fusti nushmancayan atohuunshon nan Jerusalén ano icafo un ato

yoishqui. Ascashon nan rafutan sahuuti chocashta sahuucashon atohuun ramapaicoinquin ato ismashcani. Uhuun curushhuunshonri ahuamamishti huashcaniran, —ishon Diosin ua yoia.

⁴Ascashon Diosin ahuun yorafo yoipaiyai cuscan nan rafutan yoimisifo. Nan rafu nii ahuun anu olivo cuscara. Nan olivo shuni ichapaya. Nanscarifi aquin nan rafutan Diospan Yoshin Shara nanuafo. Nan rafu lamparina ota cuscara. Faquishiaino lamparina otacun non shafacafi oincointiro. Nanscarifiai futsafoan nocon Ifoan tsain shara tapiyamaifoan nocon Ifoan ato yoipaiyai cuscan nan rafutan ato tapimatiro. Ascashu man itisharamisifo ahuun Ifoan tsain shara yorafo yoishcaquin. ⁵Tsoara futsan nan Diospan tsain yoimisi rafu noicasmafain chaca huapaiyaiton nan rafutan aton ashfa muranshon chii siiatanaino ato namashquin. Ascacun tsoan ato chaca huapaiyai nan yorafin naashquiquin.

⁶Ascashon Upa Diosin ato yonaino nan rafutan Diospan tsain futsafo yoiaitian aton tsainmansi yoitirofo afanan oi fuyononma. Ascatan unufo yafi ianfo non unuhuan nanfori aton tsainmansi unu fiananan huariscatiro imi inon. Asca huapaiquiri aton tsaimansi pau futsa futsatapafo yorafo fuchimatiro.

⁷Ascano Diosin ahuun yorafo yoipaiyai cuscan nan rafutan ato yoiquin anaitiano nan yoshin chaca quinhuan faquish murannoashu atoqui nocoshon ato rutupai oa. Ascashon man ato rutua. ⁸Ascatan nan rafu Jerusalén anoashu naacanashu aton caya fai ano racafo. Nannoshorifi noco Ifo mastanifo. Ascacun Jerusalén ano icafo yoitirofo nan Sodoma yafi

Egipto anoafu cuscara. Nannoshon fasi chaca huapaonifo. Dios yafi ahuun yorafo noicasmapaonifo. Asca Jerusalén anoafon nanscarafoquin. Ascacun nannoashu nan rafu naacanashu aton caya fai ano racafo.

⁹Ascacun maifoti yafi manifoti tsain futsa futsatapafo nan Jerusalén ano ichananfo nan rafutan aton caya oin-pai fuafo. Ascafia niaifofoan yonocun tsoancai aton caya mai huatiro icama. Osha rafu non fusti nushmancayan aton caya racacun oinriafo. ¹⁰Ascano nantifi yorafo fasi unimacaquin yoiafo isca huaquin, —¡Aichofain! Nan Diosin tsain yoimisi rafutan nocon omitsisca huamisifo cuscan afanan noco asca huacanimaquin, —icashu yoinanfo. Ascatan unimacaquin ahuarafa cashman afiranan inanonanfo.

¹¹Ascafiaifoanno osha rafu non fusti nushmancayan finontan Upa Diosin ato nimariscatanaino funinaca huanafu. Ascaiton oincani fasi ratuocincani fiiscani. Taritaricafo. ¹²Ascana nai muran Upa Dios icariashu fasi oi ashcafinin ato yoiaitan. Nan rafutan nicafo. Ato yoiquin isca huaiton, —Nuri fucahuun, —ato huatapaiyaino ato noicasmaifoan oiainfoanno nan rafu atomaquinoashu coin muran Upa Dios icari foafo.

¹³Fotapaiyaifoanno mai ano fasi curushcain naiyanaiyaishquin. Ascaino atirifi pushu Jerusalén anoafu maocomushquiai cuscan un oinyoa. Ascaino siete mil yorafo man naafo. Nan tushuafo fasi ratuocianfo, —Shinacapon. Upa Diosin nai muran icaton ahuamamishti huatiroan, —icashu yoinanshcani.

¹⁴Ascatan nan mai anoashu omitsiscayoi rafufiashu samamashtacoin afanan omitsiscashquin.

**Diosin ahuun oinmati a fu nai muran
imisiton ahuun unutaquin
manuti chaan chaan aca**

¹⁵ Ascaino Diosin oinmati afu ica fut-san ahuun manuti chaan chaan acaino nai muran Upa Dios icarishon oi ash-cafinin yoiafo isca huaquin,

“Natian nocon Ifo Diospan Facu nantonfin nantifi yora manifoti ato iquina. Ascashu arusu fusti aton ni-aifo unupacunacamaran,”

ishon yoiafo. ¹⁶⁻¹⁷ Ascatan nan Jesús icoinra huaa cushumisifo veinte cuatro nocofunufu aton tsaotifoqui Dios icano tsaofa. Ascashon fuoshonpacufoantan Upa Dios yoiafo isca huaquin,

“¡Aicho! Min nocon Ifo Dios min ahua-mamishti huatiro. Min curushhuunshon natian nantifi manifoti min ato iquina. Ahuashta min oni hu-ataima min iyopaonishaquin. Natianrifi min ipanaca. ¹⁸ Manifoti miqui sinamisifofia. Ascan natian mirifi min atoqui sinaquin min ato onaintimashqui. Nantianrifi mia tanamisifo min ato ahua inansharashquin. Ascashori nan min tsain yoimisifori inansharafain mia icoinra huafoti nan min ato yoia cus-cacoin amisifo inanfain ahua mafi-ashon mia tanamisifo yafi niaifo-foan mia tanamisifori nanfo min ato inanshquin. Ascashon nantifi mia tanamisifo min ato inansharashquin mifu ipanonfo. Nantianri nan yora chaca huamisifori min ato onainti-mashqui omitsiscapanacafo muran fotanonfo,”

ishon yoia.

¹⁹ Ascaino Diosin icaria Dios fu tsainti pushu fupucuaiton un oian. Nan Upa Diosin Israelifo yononi cuscan cunuacua cashon muran nanuaiton un oiainno canan facaicain nai turuica curushcoin

icain mai nayanaiyaicain unu matsi to-corofo nai murannoashu mai ano pacui.

**Ainfon yafi famanhuan cuscara nai
murannoa Juanpan oinni**

12 Ascatan afanan uhuun namapan cuscaratun ua oinmana cuscar un mato tapimai. Nai murannoa ahua tsoan oinyomisima cuscara un oian. Ain-foan ahuun saya chashacoin fari ointsa sahuuashu oshu camaqui paia ointsa. Ascatan doce fishi ointsafo ahuun maiti-huun nua maia. ² Nan ainfoan facu nan-uashu man facu isinhuaino fasi fiisca.

³ Ascatan nantianri nai murannoa ahua tsoan oinyomisima cuscara un oian. Nan Satanás yoshin chaca famanhuan cuscarafishu oshicoin siete mapoya. Ascashon ahuun mapotifi niaifoan maiti maia. Ascatarifi mucu rafuti mashoya. ⁴ Ahuun ina sharafoaino atirifi fishi nai murannoashu mai ano pacua. Nanscarifiai Upa Diosin ahuun oinmatifo Satanás atirifi ato chaca huamani. Ascan ahuaunoashu a cuscara yoshin chacafori ato imano nai muranshon Upa Diosin ato potafain mai ano ato nichini. Ascacun nannoshon nan Satanás famanhuan cuscaratun ainfo facu caiyainton cushua caintanaiton facu piishquin. ⁵ Ascashu furonafacu caian. Nan facu nantifi manifotifain aton niaifo iqui. Ato cushusharashquin tsoashta yoitima inonfoma. Ascacun Upa Diosin icano ahuun facu ihuiriscatana afu niaifo inon. ⁶ Ascacun tsoan istaipama ano Diosin nan ainfo ati shara huashoni nanno ichonon. Nan mai ano fari rafu non fusti nushmancayan Upa Diosin nan ainfo cushusharafain pimasharani ahuuscanonma.

⁷ Ascashori un mato tapimai ahua-cashomain nai muranshon nan yoshin chaca Satanás famanhuan ointsaton no-con Ifo Diosin finonpaiquin. Ascaiton

Upa Diosin ahuun oinmati afu nai muran icafoan aton niaifo ahuun anu Miguel Diosin nichian. Satanás yafi yoshin chacafo Miguel ahuun oinmatifoya potanainifo. ⁸Ascafia Miguel futan Diospan oinmatifoan Satanás yafi ahuun yoshin chacafo ato finconcoinnifo. Ascashon nai arishon ato potapacuni afanan ari inonfoma. ⁹Ascacun Miguel futan Diospan oinmatifoan ato nai muranshon mai ano potani. Nan famanhuan cuscara nan rononhuan shuni ahuun anu futsa Satanás nantifi manifoti ato parafafainmisi.

¹⁰Ascatan oi uhuapa nai murannoa un nica. Isca huaquin yoiaiton,

“Nan yoshin chaca Satanás nai muranshon man potafo. Nanton Dios ano cashon Jesús icoinra huafohuunoa tsain chaca yoi isca huaquin, ‘Mia icoinra huafoan fasi chaca huaran,’ ishon nocohuunoa shafatifi yafi yamutifiri yoifafaini. ¡Aicho! Ascafia natian Upa Diosin Satanás ahuun curush man shatumacoinna afanan nan yoshin chaca nocon ifo inonma. Ascan ahuun Facu nan nocon Numamisi Cristo afincoinnantifi man ato isma ato iquishquin. Ascacucái afanan Satanás Jesús icoinra huafoan aton ifo itiroma.

¹¹Ascacun nocon yorafoan fasi icoinra huacoinshon yoimisifo isca huaquin, ‘Nocon Ifo Jesús Diospan facu nan chashoan facu cuscara nocohuunoaashu nani nocon chaca soashoshquin,’ ishon yoifoanfafaincani. Ascashon Jesushuunoa yoimisifo cuscan yafi ahuun imi focain ato nashonihuunshon Satanás finconcointirofo afanan ato ahuusca huanonma. Ascacun yoitirofo isca huaquin, ‘Nan icoinra huamafoan noco rututirofia noncai ratuyamacai nocon Ifo Jesús

potapacunacamaran,’ ishon nan icoinra huafoan yomisifo.

¹²Ascacufin man nai muran Dios ari icafo unimacahuun. Nan icoinra huafoan Jesushuunshon man Satanás finconcoian. Ascashon Satanás nai muranshon man potafo. Ascafia nan mai ano icafoqui man nocoa. ¡Ohuashta! Mai anofo yafi unuhuan anoafori fasi omitsiscashcani. Satanás man tapia ahuutianran Jesús mai ano nocoriscashon omitsiscapanacafo muran a potashquin tsoa afanan chaca huamanonma. Nanscara man tapiashu Satanás fasi sinacoinquin nantifi manifoti ato omitsiscamapai Jesús fu ipanonfomaran,”

ishon yoia.

¹³Ascatan a mai ano potafo man tapishton Satanás shinanquin isca huaa, — Nan ainfo furonanfacu caian un mufoicai aqui nocoshon omitsiscahuashquin, — ishon shinan.

¹⁴Ascacun Diosin nan ainfo tutumanhuanun pui chainipa cuscara inan ahuun noyacaini cashu tsoan istaipama ano iyonon. Nannoshon Upa Diosin fari rafu non fusti nushmancayan cushusharayoa nan yoshin chaca rononhuan cuscara-ton ahuusca huanonma. ¹⁵Ascano nan rononhuan ahuun ashfapan unuhuan nachian fai tahuain cuscara ainfoqui nocoshon asanon. ¹⁶Ascafia Upa Diosin yonoo nan ainfoqui faitahuan nocotama mai muran man foa ainfon asanonma. ¹⁷Ascacufin Satanás famanhuan cuscara sinatapacoin ainfo yafi ahuun funafo rutupai caa. Ascashon nan Diosin yonoo cuscan amisifo yafi Jesús noco Ifoan noco nashoniran huamisifo nanfofin ainfoan ahuun facufo. Nanfo Satanás ato cuyopai caa. ¹⁸Ascan unuhuan cusumunri nan famanhuan cuscara Satanás nishon ato manai.

Unuhuan murannoashu yoina cuscara musucoin cainacahuana

13 Ascán uhuun namapan ointsa ua oinmana cuscan afanan un mato tapimai. Unuhuan cusmun un niano yoina cuscara musucoin unuhuan murannoashu cainacahuana un oian. Ahuun caya fustifiashu siete mapoya. Ascán ahuun mashori diez ya. Nan ahuun mashoti niaifoan maiti maia. Ascánshon Upa Diosiqui tsain chaca huaquin ahuun fumananfoqui cunu futsa cuscarafu nutan. ²Nan yoina cuscaraton ahuun caya masharo leopardo ointsa. Ahuun tau rafu oso masharona ointsa. Ascán ahuun ashfa masharo leonna ointsa. Ascán nan Satanás yonoa ahuun curushhuunshon nan yoina pofu cuscaraton tsoan atiroma cuscan nanto huatiro. Ascashu ahuun yorafo aton ifo itiro ato yononon.

³Ascáiton nantifi yorafo manifoti anofoan oianfo ahuun mapo futsa amaquinao rutuafu shinantsafishu man caya. Ascacun yoiáfo isca huaquin, —¡Aira! ¡Oincapon! Ahuuscashutsi ahuun mapo futsa man rutucoinfiafo natian afanan man niaran, —icashu yoinanfo. Yoiquin asca huacatan nanton yoiá cuscaquin tanafo. ⁴Ascán tanacashon yoiáfo, —¡Aicho! Satanás ahuun shinanhuunshon na yoina pofu cuscaraton tsoa futsan atiroma cuscan huatiro. Ascacun ahuunoashu nantifi yorafo yonotiro. Ascán Satanás nocon Ifocoin. Noco yoiapaiyai cuscan non nicacointiro. Nan yoina pofu cuscarari nocon Ifo. Tsoancai a finontiro. Tsoa futsacai na yoina pofu cuscarama. Tsoancai a rututirofomaran, —ishon yoiáfo.

⁵Ascashu nan yoina pofu cuscara fasi cacapaimisi ica. —Tsoa futsacai ua cuscaramaran, —ishon yoiá. Nantori Diosiqui fasi tsain chaca huamisi.

Ascáshon Satanás yonoa fari rafu non fusti nushmancayan nan yoina pofu cuscaraton nantifi yorafo ato iquina. ⁶Nantianri Dios roafain ahuunoa tsain chaca yoiáfan nan icanoahuunoa tsain chaca huafain nan icanoafoquiri tsain chaca huai. ⁷Ascán Satanashuunshon Jesús icoinra huafo mai ano icafo ato rutumashquin. Ahuunshon nantifi manifoti yafi nantifi tsain futsa futsatapafo yoisimifoan aton niaifocoin inon.

⁸Ascán nanfoan nantififain nan yoina pofu cuscara noishcani. Ascáshon yoiáfan isca huashcani, —Minfin nocon Diosiquin, —huashquicani. Ascáifoancai nocon Ifo Jesús aton anu ahuun libro muran cunuima afu nipanonfo. Mai oni huataima Jesús nantifi icoinra huanonpacoaifoan ato anufo ahuun libro muran iquisi cunuyoni afu ipanonfo. Ascashu nan chashoanun facu cuscarashu noco nashoni noco nimapacushquin.

⁹“Man pachoyaquin ua nicacahuun.

¹⁰Nan yoina pofu cuscaraton Jesús icoinra huamisi futsafo cunu muran iquimapaiquin iquimashquin. Ascán ato rutupaiquiri ato rutushquin.”

Ascáfia uhuun yoramishtichin shinanchacayamacahuun. Nan non Jesús icoinra huafoti non omitsiscáfiaquin non tunucoishquin nocon Ifo Jesús cachiquiri huashquima.

¹¹Ascátan un afanan oian yoina pofu futsa cuscara mai murannoashu caiyainton un oian. Chashoan facu cuscarafishu masho rafuya. Nan Satanás famanhuan cuscaraton ahuun tsain fasi pofocoin. Nanscarifiai nan yoina futsa cuscaraton ahuun tsain pofucoinri. ¹²Nan yoina pofu unuhuan murannoashu cain tauaton ahumamishti huafain yorafoti iquina cuscan nan yoina pofu futsari nanscara huua. Ascáshon nantifi maifoti anoá ato yonoa isca huaquin, —Nan yoina cuscara mapo ruranfo man naa-

coinfiashu afanan man nia. Nancai noco iforan nocon Diosiran huacahuun, —ishon ato yonoshquin.¹³ Ascashon ahua-mamishti tsoa atiroma cuscan ato isma. Yorafoan aton ointaifiri nai muran-noa chii pacumana.¹⁴ Satanashuunshon nanscara huariaquin yorafo man paran Diosiran huanonfo. Ascashon ato yonoa, —Nan yoina pofu cuscara noppu cunopaton man rutufiafo afanan nimisi nan ointa uhuapacoin ramihuacahuun, —ishon ato yonoa.

¹⁵ Ascashon ato yonocun Satanashu-unshon man ramihuafo nan yoina pofu cuscara ointa man shacaimana. Ascano shacaitan nan ramihuafoan tsaincoinin yoia isca huaquin, —Ua ifoacahuun. Min Diosiran ua huacahuun. Tsoan ua noicasmaquin nannori yoicasmaiton nan rutucahuun, —ishon ato yonoa.

¹⁶ Ascatan nan yoina pofu cuscara futsa nan mai murannoashu oaton yoiqui isca huaa, —Maton mucu mumiori iyamarai mato fumananqui nan yoina pofu cuscara futsa unuhuan murannoashu oaton ahuun anu iyamarai ahuun numero nantifi sellopan ato nutacahuun. Facufo nutafain iyoafofori nutafain mafo ichapaya nutafain ahuuomafo nutafain oinmatifomari nutafain oinmatifo nutacahuun. Ascán tsoashta finonmayamacahuun. Nantifi nan yoina pofu futsan ahuun anu sellopan nutacahuun matoquin, —ishon ato yonoa.¹⁷ Ascán tsoa sellopan anu nutama atocai ahuaipa fipaifiaquicai fitiroma. Ascashuri ahuaipa inan mitsatiroma ahuun rafanan tushu yafi sahuuti ahuaipa futsa yopai cuscan fiishquin.

¹⁸ Ascacun shinansharacahuun. Ratoranfoan Diosihuunshon shinansharaqui tapitirofo nan yoina

pofu cuscaraton ahuun numero tapifain ahuun anurifi tapitiro. Ascán nan yoina pofu ointsafishu nocofunucoin. Ahuun numero 666.

Jesús icoinra huafoan 144,000 fanainshocani

14 Ascatan uhuun namapan ointa ua oinmana cuscan afanan mato tapimai. Chashoan facu cuscara nan Jesús machi ahuun anu Sión ano nia un oian. Nanno 144,000 ahuun yorafo afu nia. Ahuun anu yafi Apa Diosin ahuun anuri aton fumananqui cunua.² Nantianri un nai muranno oi uhuapacoin nica. Unuhuan ponoain nicatsa nicafain turuica achacoin nicatsa. Nan oi uhuapa un nica yora ichapa fanaincani manuti ichapari manuafo. Nan manuti ahuun anu arpa guitarra cuscara.

³ Fanainti funa tsoan nicayomisima Upa Diosin ahuun ointaifi fanainshofo. Ascaifoanno nannori nan rafu non rafuri Diosin onihuani yafi Jesús icoinra huafoti cushumisifo veinte cuatrofoanri arifi nicafo. Nan 144,000 Jesús fu machi ano niafo. Ascán nanfoansi nan fanainti funa tapianfo. Jesús ato nashoni aton chaca soashoshquin Satanás afanan aton Ifo itamarocon nan aton ifocoin inon. Tsoa futsacai nan fanainti funapan atofu fanaintiroma.

⁴ Nan 144,000 yorafoan nocon Ifo Jesús nan chashoan facu cuscara tana-coinmisifo. Chaca shinantamarocon Jesushuunoa shinanfaimisifo. Afin ato numani ato nashonishaquin Apa Diosin yorafo non ahuun yorafori inon. Ato catoan ahuun yorafo icaino ato yoia cuscan anonfo. Nanfoancaiyainfoqui chaca huamisima. Jesús caiquiri afu foanfainmisifo.⁵ —Nanfoan chani yoiaran, —ishoncai tsoan atohuunoa yoitiro. Jesushuunoashu isharamisifo.

Diospan Furun yafi ahuun oinmati mucu fustiti non mucu foshca fusti a fu nai muran imisiton yoiafo cuscan

⁶ Ascatan un oian Diospan oinmati futsan afu nai muran ica fasi cuyacoin noyaino nantifi yorafo maifoti anofo tsain shara ato yoinon. Caifoti yoifain shoco futsafoti yoifain nantifi tsain futsa futsatapafo yoimisifoti yoifain manifestiri ato tsain shara yoinon. Upa Diospan tsain nipanacahuunoa ato yoia. ⁷ Oi ashcafinin ato yoia isca huaquin, — Diosquiri shinacahuun. Mato yonoa cuscan man ayamashu aqui ratucocinacahuun. Nicacoinsharacahuun. “Min sharacoin min ahuamamishti min atiro-ran,” huacahuun. Natian Diosin nantifi chacamisifo onaintimai. Nanton nai onihuafain mai onihuafain unuhuan saoya onihuafain unu tsosi sharari onihuani. Ascan a noicahuun. A yoihuu isca huaquin, “Min sharacoin min ahuamamishti atiro. Min nocon Ifon Dios shararan,” huacahuun, —ato huua.

⁸ Ascatan Diospan oinmati futsan afu nai muran ica ahuun tsain anaitishon futsan nocotoshishon isca huaquin yoia, —Nan pushurasi uhuapa ahuun anu Babilonia. Yorahuanrasi nan pushurasi uhuapa ano ica. Nan yorafoan fasi chaca huamisi. Nanfoan chaca huamisi cuscan manifestiri chaca huama. Asca huaifoan Upa Diosin ato onaintimai afanan ipanonfoma. ¡Aichofain! Diosin ato onaintima afanan pushurasi Babilonia yamairan, —ishon Diosin oinmatinin nai muran icaton yoia.

⁹⁻¹¹ Asca huatan afanan Diosin oinmati futsari nai muran icaton nocotoshishon oi ashcafinin yoia isca huaquin, —Tsoan na yoina pofu cuscara yafi ahuuna ointsa ramihua nicacoianno yoimisi isca, “Nan uhuun Dioscoinran,” ishon anori yoiquin aton mucu iyamarai aton fumananqui na

yoina pofu cuscara ahuun anu cunua Upa Diosin atoqui sinacoinshquin. Naafoanno Diosin ato fasi curushcai onaintimacoinshquin. Chi muran ato potafiagai cuyonacama. Jesús nan chashoan facu cuscara yafi ahuun oinmatifo afu nai muran icafo aton ointaifi ato omitsiscapanacafa muran potashquin. Isin muuqui unupacunacafoma. Tsoan ato numatiroma. Nan yoina pofu cuscara yafi ahuuna ointsa ramihua ifoanfo ahuun anu aton mucu iyamarai fumananqui cunua. Ascacun shafatifi yafi yamutishonri omitsiscapacoinshcani. Tsoan tunupacunacafomaran, —ishon Upa Diosin ahuun oinmati nai murannoaton yoia.

¹² Ascancunfin uhuun yoramishti maton ointi fupuima sharacahuun. Omitsiscafiaquin tunucahuun. Diosin noco yononi cuscan acahuun. Nocon Ifo Jesús cachiquiri huayamacahuun.

¹³ Ascatan un nica oi nai muran shon ua yoiaiton, —Un mia yoiai cuscan cunuhuu. Ratoranfo nocon Ifo Jesushuunoashu nai unimacoinshcaniran, —ishon ua yoia. —Ainfain. Iconfinquin. Naacanashu afanan omitsiscatirofoma. Upa Diosin ato ama cuscan acoinnafo. Nantianri unimacoinshcani. Nanfoan futsafo shara huashomisi cuscan Diosin nanfo ointiaquimamisima. Ascan Upaqui nocoifoan ato inansharashquinran, —ishon Diospan Yoshin Sharanun yoia.

¹⁴ Ascatan uhuun namapan ointsa oian cuscan afanan mato yoinon. Un oian nai coin oshopa camaqui nan Diosin catoan Jesús ointsa un oian. Niaifon maiti orocoin maifain nopu ushtia cunocoin tsoma. ¹⁵ Ascan ahuun oinmati futsan afu nai muran ica Dios icanoashu caa nocon Ifo yoishquin. —Natian man ica. Nan maifoti ano man fanafo oshian. Natian chituain-

tian. Ascan min nupu ushtia tsomatan tashtushon ichahuahuu, —huaa. Nan-nori yoifiaquin fanacoinhuunooa yoia. Diospan yorafohuunooa yoicoian isca huaquin, —Natian nantifi Jesús icoinra huafo ihuihuu Upa Dios icano ichanan-shu afu ipanacaforan, —ishon yoicoian.
¹⁶ Asca huatan nan nai coin camaqui tsaoshon ahuun nupu curushcai fu-coa. Diosin mai anoafo tashtua cuscan huaquin aton icha huashquin. Nopu-coinhuunooacai yoia ahuun tsainhu-unooa yoia. Afin yoiaitian ahuun yorafo ichanan huai.

¹⁷ Ascatan un oian Diosin oinmati fut-sari afu nai muran icanoa caa. Arifi nupu ushtia cunocoin tsoma. ¹⁸ Ascatan afanan Diosin oinmati futsari Dios cufiti anoashu caa. Nanton Diosin yonoa cus-can chihuunshon yorafo onaintimatiro. A oinmati nupu ushtia cunocoin tso-mashon oi ashcafinin yoia, —Nan fimi ahuun anu uva nantifi oshiancoin. Ascan mushtushon icha huahuu, —ishon yoia. Nanscarifiai Upa Diosin ahuun oinmati-huunshon a nicacasmamisifo ichanan huashquin.

¹⁹ Asca huatan nan oinmati ahuun nupu ushtia cunocoin tsomashon uvat-iffin shatushon prensa muran pota ahuun unu fonon. Nanscarifiai Diospan oinmat-ifo afu nai muran icaton Diosin tsain nicacasmamisifo ichanan huai. Ascan Diosin atoqui sinacoin ato onaintimai.
²⁰ Diosin icanoshon ato onaintimanama. Futsafoan ato rutushcani aton imi ichapa foshquin. Ascaran tsoan oinyomisima. Aton imi noacoin caballo fasi tusanan-coian. Ahuun chai trescientos kilometro.

Upa Diosin ahuun oinmati siete a fu nai muran imisifo afanan ato yonoa mai anoafo onaintimanon

15 Ascatan uhuun namapan ointsa un ahuaara futsan un oian. Tsoan oinyomisima cuscara nai murannooa un

oian. Oin uhuun nomuran, —iUru! —un ica. Natian un oian cuscan mato tapi-manon. Nicacahuun. Diosin yora yoit-mashunifoqui fasi sinaiquin. Ascacun ahuun oinmati siete afu icafo ato yonoa nantifi mai anoafo onaintimai omitsiscanonfo. Nan ahuun unutaqui Upa Diosin ato onaintimai. Afanancai atoqui sinaquin ato onaintimashquima.

² Un oian unuhuan pusiquima raca un-uya chi osian ointsa. Nanno yorahuan-rasi nia. Na yorafoancai yoina pofu cus-cara yafi ahuuna ointsa ramihua ahuun numero atoqui cunu nutanmisima. Nan-foan ato shuhuincoianfo. Nan unuhuan pusiquima raca unuya chi osian ointsa fumancayan maniafo. Upa Diosin atoti manuti inanpacua. Nan manuti guitarra cuscara ahuun anu arpa. ³ Aton arpa tso-macashon Diospan oinmati Moisés yafi Jesús nan chashoanun facu cahuanshara cuscara fanainmisi cuscan atorifi nan-nori fanaincani isca huaquin,
 “Ifon, mincaifin Diosiquin.

Min ahuamamishti atiro.

Min amisi cuscan sharacoin.

Tsoan futsacai atiro.

Min manifoti nantifi aton niaifocoin ipanaca.

Min shinanmisi cuscan cayacafi iconcoin.

⁴ Ifon, nantifain miqui musucaquin mia nicasharapainonfo.

Min ahuamamishti tsoan oinyomisima min atiroquin.

Nantifi yorafoti anori yoipacunonfo.

Mirus fusticai min chaca huamisima.

Nantifi manfoti miqui funonfo.

Min shara fustisi huamisi.

Nantifain oinquin isca huashquin,

“Min sharacoin. Min nocon Ifocoinran,”
 ishon mia yoishcani.

⁵ Ascatan afanan un nai muran Diosin icano oian. Ua fupushona Diosin icanocoin un oionon. ⁶ Dios ica murannoashu ahuun nai oinmati siete

nantifi chifi ichananfo. Nanfoan mai anofo onaintimai omitsiscanonfo. Sahuuti oshopa chainipa chashai sahuufain oro cuscara nonushumua sahuufo. ⁷Nan rafu non rafuri Diosin onihua futsan Diosin oinmati afu nai muran icafo siete atoti oro tutso inanca. Diosin nan nipanacaton icoira huafoa mai anofo sinacoinquin nan cuchanfo muran ahuaa chacacoin fospihuamua atoqui oceano omitsiscashani.

⁸Ascatan nantian Diosin chashaiton ahuamamishti atiro cuscan ato ismaino nan ica muran coinmahuan fospia nashfiain. Ascan mai ano nan Dios nicacasmamisifo Diosin oinmatifo afu icafoan ato onaintimai omitsiscanonfo anaitiataimanocai tsoa Dios icano iqiyotirofoma.

A nicayosma shunifo Diosin ato onaintimai omitsiscanonfo

16 Ascatan Dios icaricoian oi ashcafinin un nica. Diosin oinmatifo nan siete afu nai muran icafo ato yoia isca huaquin, —Diosin a nicacasmamisifo mai ano icafo atoqui sinaquin nan tutsofo ahuaa chacafo fospihuamua atoqui ocacahuun, —ishon ato yonoa.

²Nicacashon Diosin oinmati futsan tauhuaqui ahuun tutso nai muranshon mai ano oca. Nan yoina pofu cuscara ahuun anu aton mucu iyamarai aton fumananqui cunufo yafi afin ramihuamua ointsa ifoanfona nanfo aton yoratiso coo suyacoin fuchiriscata isincoin tunutirofoma.

³Ascatan afanan Diosin oinmati futsan ahuun tutso nai muranshon unuhuan muran oca. Ocaino unuhuan fianananriscatana nocofunu rutuano ahuun imi foa ointsa. Ascanofin nantifi nan unuhuan murannoashu nai futsufo.

⁴Ascatan afanan Diosin oinmati futsan ahuun tutso nai muranshon unufoti yafi

mai murannoashu unu afaifotiqui oca. Oceano unufoti yafi mai murannoashu unu afaifotiri fianananriscatana imi ica.

⁵⁻⁶Nantianri oinmati futsan Dios fu tsaincaiton un nica. Nan unu cushumision isca huaquin yoia,

“Upa Diosin tsoa min oni huataima min iyopaoni. Min ipaoni cuscan nantianri min nipanaca. Min shara fustisi imisi. ¡Aicho! Nantianri mia nicacasmamisifo min ato onaintimai cuscan iconcoin. Aton chaca shatucanashu min Furun Jesús Ifocoianfo non min tsain aton yoimisifori nan icoimarana huafoan ato rutufo. Ascacufin min icoira huafoa namai cuscafin iconquin. Min yorafo fasi omitsiscamamisifo ascan min nan icoimarana huafo onaintimai omitsiscanonfo. Min cayacafi iconcoin ato onaintimaran,”

ishon Diospan oinmatin yoia.

⁷Asca huashon Dios icanoa nai muran nan cufiti ano fustishosi Upa Diosin cufinmisifo anoa un futsanfo nica yoiquin isca huaifoan,

—Nocon Ifon Diosin, min nai oinmati yoia cuscan iconcoin. Mia nicayosma shunifo min ato icon cayacafi ato onaintimairan, —ishon yoiafo.

⁸Ascatan Diospan oinmati afu ica futsan Dios icarishon ahuun tutso murannoahuaa ahuaa chaca fari camaqui ocashquin. Oceano farihuunoashu yorafo coa. ⁹Farin fasi shanacoinquin yorafo coa. Coaino omitsiscafo. Man tapiamisifo Diosin ato onaintimai aton chaca shatuafoma. Dios ifoantamarocon. —Diosin noco chaca huai. Ahuun cuscamain Diosiquin. Chacacoinran, —ishon yoiafo. —Diosifin sharaquin. Nantofin ahuamamishti huatiroquin, —ishoncai tsoan anori yoipaicanima.

¹⁰ Ascatan Diosin oinmati futsan Dios icarishon ahuun tutso murannoa nan yoina pofu cuscara chacacoin yafi afu icafo ato camaqui oca. Ocano nan yoina pofu cuscara chacacoin ifofo icano faquishcoin ica. Ascan nantififain isincoin muafu tunutiroma. —Aripun, —iriafo. ¹¹—Diosin noco asca huua. Ascan nocon yorathishon coo suyacoin non isin tunutiroma. Nan nai murannoa Dios chacacoinran, —ishon yoifiashu aton chaca shatuafo.

¹² Ascatan Diosin oinmati futsan nai muranshon ahuun tutso murannoa unu uhuapa ahuun anu Eufrates amuran oca. Ocano nan Eufrates nutsoriscatana man mutocaina. Nan niaifo rafu non fusti fari oaiquirinoashu fucani. Ascan Eufrates nutsocoian aton ranushumuafu ya pocufaitirofo. ¹³ Ascano un yoshin fasi chacafo rafu non fusti fushco ointsafo un oian. Futsan famanhuan ointsa nan Satanás ahuun ashfan murannoashu caincaina futsan nan yoina pofu cuscara ahuun ashfan murannoashu caincaina futsan nan fuparapaimisiton, —Unfin Diosin tsain mato yoimisiran, —ifiashu chanimisi yoshin chaca ahuun ashfan murannoashu caincaina. ¹⁴ Nan rafu non fusti fushco ointsa yoshin chacafoan ahua tsoan oinyomisima cuscara ahua mamishti yorafo ismafo. Nantifi niaifofo manifoti ano focani ato ichanan huamai nocon Ifo Jesús ahuun yorafo rutunonfo. Nantianri nocon Diosin ahua mamishti amisiton ahuun yono ismashquin.

¹⁵ Asca huaifoan nantianri nocon Ifo Jesús noco yoipaiyai cuscan un maton yoinon. Isca huaquin yoia, —Ua nicacahuun. Yomutson tsoan tapimaima pushu muran iquinon. Samamashta pushu muran iquiriscatiro ahua onushquin. Nanscarifiai un tsoa tapimaima nan un matoqui nocoriscaitian. Un matoqui samamashta nocoriscashquin. Tsoan itisharacacaini

ua tanasharashon manasharacoian fasi unimashquin. Ascan tsoan ascata itisharayamaino un matoqui nocoriscaitian nantifi yorafoan ointirofo tsoan ua tanasharama. Ascashu fasi rafipaitiroran, —ishon yoia.

¹⁶ Nannori nocon Ifo Jesús yoifiashu nan rafu non fusti yoshin chacafoan nantifi niaifofo maifoti anofo ichanan huua Diospan yorafo rutupaquin. Ato ichanan huamai nan mai ahuun anu Israelifo tsainman Armagedón.

¹⁷ Ascatan Diospan oinmati futsan ahuun tutso nai muranshon oca. Asca huatan Diosin icarishon Upa Diosin fasi oi ashcafinin yoia, —Mun aca. Natian man anaitiaran, —ishon yoia.

¹⁸ Ascatan fasi curushcoin canan pishiriai icain ahuafo achacoinfo yafi fasi nai turuicacoin icain mai nayanaiyaiqui curushcoin. Ascacai tsoan mumisima. Nocofunu onihuaquin tau huanitian natianri mai nayanaiyaiqui ascaitocai tsoan muyomisima.

¹⁹ Ascan nan pushurasi uhuapa ahuun anu Babilonia ano nayanaiyaicaino mainhuan nantiocoin rafu non fusti toshamanhuan cainni. Maifoti anori aton pushurasifo nan mai nayanaiyaiquin maocomua. Diosin na pushurasi Babilonia anofo chaca huamisifo cuscan ointiaquimamisima. Ascan atoqui fasi sinamanhuanquin ato onaintimacoin omitsiscanonfo. ²⁰ Nantianri unu potofotin yamariscatashquin ano icafori nai futsuafu. Nantifi machifotiri yamariscatashquin. ²¹ Nantianri unu matsi tocorofo uhuapacoin aton ihuu cincuenta kilos cuana nai murannoashu yorafo fuchi pacua. Ascafia aton chaca shatutamarocon, —Diosin fasi chacacoin. Nan unu matsi tocorofo uhuapacoinun noco omitsiscamairan, —ishon yoiafo.

**Mai futsan anoafo ainfon
furoma cuscarafu**

17 Ascatan uhuun namapan ointsa ahuara ahuuscaran ariscashquiain cuscan afanan ua oinmayoa. Nan Diosin oinmati afu nai muran icafo siete tutso tsomacashon futsan ua yoia, —Nuri ohuu. Nan pushu ichaparasi unufo chaimashta anoafo fasi chacacoin. Ainfo furomacoin cuscarafu. Ascano Upa Diosin ato onaintimashquin. Oinyopon. Mia oinmanon. ²Nantifi niaifofo maifoti atofu inanmitsamisifo. Ascan atohuunoashu afori fasi chacacoin icafo. Nan ainfo furomacoin cuscarafu icafo. Ascan Diosin ato onaintimashquiain cuscan mia ismaran, —ishon ua yoia.

³Asca huashon tsoan istaipama ano Diospan Yoshin Shara ua iyoa. Nannoa un oian nan ainfon yoina pofu cuscarafu oshicoi camaquí tsoa. Nan yoina pofu ahuan yoratishton anu ichapa cunua. Nantifi nan anufo Diosqui tsain chaca cunua. Nan yoina pofu mapo siete ya. Masho mucu rafutiya. ⁴Nan ainfon saya chainipa shonan yafi oshin sahuua. Oro facafacaitsa macush cuscarafu sharashtan yafi futsan ahuan anu perla oshopa nanri sharashtacoin sahuua. Tutso oro tsoma amuran ahuarafu chacacoin. Amuran nanua cuscan yorafu ahuara chacacoin futsa futsatapafo chaca huama. Aton nomuran shinanchacamana. Paunmafain chanimisi imafain aton ahuinma chotamisifo imafain aton funuma chotamisifo imafain nanscara chacafosi ato imapacumisi. ⁵Ahuan fumananqui cunua cuscan tsoan onanmisima. Isca huaquin cunua,

BABILONIA

NAN PUSHURASI ANOAFU
TSOAN FUTSA ATO CUSCARAMA.
AINFOFO FUROMACOIN CUSCARA

YAFI NANTIFI MAI ANOAFU
CHACAMISHTIFO
ATON UHUA CUSCARARAN,

ishon cunua.

⁶Nan ainfon furoma cuscarafu Jesús icoinra huafo ichapa nan Jesús uhuun Iforan huamisifo ato rutumamisi un oian. Un na ainfo oin un mustairia. Un yoia, —¡Ajaa! Ascaran ainfon chaca un oinyomisimaran, —ishon un yoia.

⁷Un ascaino Diosin oinmati afu nai muran icaton ua yoia, —¿Ahuuscain min mustairimun? Nan ainfo yafi nan yoina pofu camaquí cahuamisi nanton siete mapoya non masho mucu rafutiya tsoan atohuunoa tapimisima. Ascan natian un mia tapimai. ⁸Nan yoina pofu min oian yoinacoinma. Afin niaifo uhuapa chacacoin. Nanscain Dios noicasmamisi. Niyopaoni. Natian niyamafishu chipo nan yoshin chacafo icanoashu cainshquin. Nannoashu cainfiacun Upa Diosin omitsiscapanacafo muran potashquin afanan anoashu canacama huaquin. Tsoan Jesús icoinra huamacai aton anu ahuan libroqui cunuama afu ipanon. Nanfoan na niaifon yoina pofu cuscarafu oincashon mustairitan, “¡Aira! ¡Oincapon! Man nafiacanashu afanan oaran,” ishon yoishquicani.

⁹Ascan tsoan ahuan nomuran Diosihuunshon cayacafi shinantiro nanton un rama cunua cuscan tapitiro. Na yoina pofuhuunoa mato yoinon ua nicasharacahuun. Ahuan mapo siete mapocointamarocon nanfohuunshon siete niaifohuunoa noco tapimai. Nanfo icano siete machifo. Nannori nan ainfo furoma cuscarafu ica. ¹⁰Mucu fustiti nan niaifofo yamai. Man nanifo. Fusti natian nia. Futsan chipo iishquin. Chipo ifishucai chai ipashquima. ¹¹Nan yoina pofu cuscarafu oshicoi un mia yoia cuscan arifi yoinacointamarocon niaifon chaca futsan. Nan iyopaoni cuscan natiancai

icama. Arifi nan siete fu ipaonifo. Chipo afanan ifiashu omitsiscapanacafo muran cai afanan anoashu canacama.

¹² Ascan nan masho mucu rafuti min oian mashocoinma. Nanfohuunshon mucu rafuti niaifofo noco ismapai. Nanfo niaifofo icataifoma. Chipo mani futsanfo mucu rafuti aton niaifofo itirofo. Na yoina pofu cuscara fu niaifo iishquicani. Ascanfiacai chai niaifo ipashquicanima. Samamashita unuriscashquin. ¹³ Ascafia unuataima nan siete niaifofo nannorisi shinamisifo. Nan nocofunun yoina pofu cuscara apaiyai cuscan nannorisi shinancani. “Min noco yonopaiyai cuscan non atiroran,” ishon nan mucu rafuti niaifofoan nan nocofunu yoina pofu cuscara yoishquicani. Afin nantifi niaifofo aton niaifocoin iishquin.

¹⁴ Ascacashon nan nocofunun yoina pofu cuscara futan nan mucu rafuti niaifofoan nocon Ifo Jesús ahuun yorafoya noicasmacani. Jesús ahuun yorafo cunani ahuun tanamisifo inonfo. Ascashon ato catoan. Nanfo ahuuscarafiaino nocon Ifon cachiquiri huamisima. A tana-coinmisifo. Nan yoina pofu cuscara nan mucu rafuti niaifofo futan Jesús chashoan facu cahuan sharashta cuscara nan nocon Ifo yafi ahuun yorafo rutumapaishcani. Rutupaiyaifoan atoro-cofin Jesús ato namashquin. Nantianri ahuun tanamisifo afu iishquicani. Nocon Ifon nantifi niaifofo uhuapafo non niaifofo patashariri aton niaifocoinshon ato iquitiro. Nocon Ifon Jesús aton Ifo-coinshon ato iquitiro. Nantifi niaifofo yafi ifoafari manifesti anofo ato iquitiro. Ascan tsoancai nocon Ifon Jesús shuhuintiroma ahuun tanamisifocai ato tsoan cuyotiroma, —ishon nan Diosin oinmati afu nai muran imisiton ua yoia.

¹⁵ Ascan afanan ua yoia isca huaquin, —Min oian nan ainfo furomacoin cuscara unu fumancayan tsoa. Nan un-

ucaí unucoinma. Nanhuunshon caifofo non yorafo non mani futsafo non tsain futsa futsatapayafo nan ainfon furomacoin fu icafo noco ismapai. ¹⁶ Nan mucu rafuti niaifofo yafi nan niaifofo yoina pofu cuscara ainfo furoma cuscara noicasmacoinshcani. Nantifi ahuuna mani fiishquin afanan ahuuomacoin iishquin. Ascan afanan tsoacai na ainfo furoma cuscara fu ipaishquima. Ascaiton nan mucu rafuti niaifofo yafi nan niaifon yoina pofu cuscara noicasmacoincaquin omitsiscamacquin chi muran ainfo furomacoin cuscara potashcani afanan inonma. ¹⁷ “Min noco yonopaiyai cuscan non atiroran,” ishon nan mucu rafuti niaifofoan niaifofo yoina pofu cuscara yoirafo. Ascafia Diosin nannorisi ato shinanmana afin apaiyai cuscan atohuunshon anon. Ascatan Diosin yoiyomisi nan anon pacoai cuscan nanscara huashquin. ¹⁸ Na ainfon furomacoin cuscara ainfocointamarocon naanfin pushurasi uhuapacoin. Nanfoan manifesti aton niaifofo iquinaran, —ishon Diospan oinmatinin afu nai muran imisiton ua yoia.

Diosin oinmatinin afu nai muran ica yoia isca huaquin, —Natian Babilonia anofo nai futsucani, —ishon yoia

18 Ascatan Diosin oinmati futsan nai murannoashu mai ano fotoaiton un oian. Upa Diosin yonoa niaifofo patashari nanton ahuamamishti atiro. Ahuunshon maifoti chashacoian. ²⁻³ Oi ashcafinin cunaquin isca huaa,

“Babilonia ano icafoan fasi chaca huamisifo. Chaca fustisi shinanmisifo. Nocofunufoan aton ahuinma chotamisifo ainfofoan aton funumari chotamamisifo. Man amisifo cuscan caifo futsanfori atohuun caofo. Ato chaca huamamisi Upa Dios tanatamarocon chaca fustisi

tananonfo. Man chaca huamisifo cuscan caifo futsafori aton niaiffoan nanscarin huaquin chaca huamisifo. Nan Babilonia ano icafoan fasi mafo ichapaya. Ascan ahua yopacaquima mai futsa anoafo aton mafo inan ahuun rafanan pui fiishcaquin. Ascano futsafoanri mafo inanmitsacashon ahuun rafanan pui finonfo. Asca huacanashu Babiloniahuunoashu afori mafo ichapaya icafo. Asca huacaquin Upa Dios shinanmisifoma.”

“Ascacufin Upa Diosin nan Babilonia anoafo fasi onaintimai afanan tsoan ano inonma. Ato namaquin cuyoshquin. Afanan ano yora itamarocon yoshin chaca futsan futsan-tapafo tsain mutsama yoifafainaifo ano icaforan,”

ishon Upa Diosin oinmatinin nan afu nai muran icaton ua yoia.

⁴⁻⁸Yoiquin asca huatanaino nai murannoashu un oi futsan nica isca huaquin,

“Babilonia ano icafoan fasi chaca huamisi finacoianfo. Nan chaca huamisifo cuscan Upa Diosin ato oinshon ointiaquimanama. Ascashon ato onaintimacoinshquin, Upa Diosin, nan Babilonia anoafo futsafo chaca huamisifo cuscan mimacoin huaquin ato onaintimahuu omitsiscanonfo. Man yoiafo isca huaquin, ‘Noncai Dios yopaima. Non ahuashta yopatiroma. Nonfin isharamisiquin. Nonfin ainfon niaifocoin isharamisi cuscara. Noncai man funu amaqui naa ainfo funuoma cuscarama. Nanscara ainfo manoi omitsiscatiro. Noncai manotamarocon non isharpacunacaran,’ ishon cacapaimisifoan yoiafo.”

“Ascan, Upa Diosin, ato fasi onaintimahuu omitsiscai tununonfoma. Icoinra huafoan ua nicasharacahuun. Upa Diosin ato samamashta onaintimacoinshquin afanan isharatamarocon atirifi namafain omitsiscamafain aton tushu cuyomashquin fonainquin naanonfo. Tsoan atiroma cuscan Upa Diosin ahuamamishti huatiro. Nanton ato onaintimai ato cooi cooi futsunonfo. Ascano Upa Diosin mato yoi isca huaquin, ‘Uhuun yoramishtichin, Babilonia anoafo cuscara iyamacahuun. Ato fu rafuyamacahuun. Ato futan chaca huayamacahuun un ato onaintimai cuscan un matori onaintimanonma,”

ishon Upa Diosin mato yoi.

⁹Ascan Babilonia coaino mai futsafoti aton niaiffoan oincani uicaquin manoshceni. Nanfoan Babiloniafo futan Upa Dios potacani chaca huanonfo. Babilonia anoafohuunshon mafo ichapa fifafo. ¹⁰Nanfo coaino oincani niaiffofo fasi ratushquicani.

“¡Ohuashta! Babiloniafoan rato caifo futsancai mato cuscarama. Man tapicoinsharafiacun samamashta Upa Diosin mato onaintimai man coi futsunon. ¡Ai timafin!”

ishon ratucoincaquin niaiffoan yoishquicani.

¹¹Nanscarifiai manifoti aton inanmitsamisifo uaishecani. —¡Ohuashta! Babilonia man coi cuyoa. Natian tsoan futsacai nocon mafo non nocon ahuara futsafo fitiroma. ¹²Nocon oro sharashtacoin fianmafain nocon torofo oshoshtacoin fianmafain nocon toquirifo faca facaitsa chicoin fianmafain nocon toquiri futsan ahuun anu perla fianmafain nocon pano futsa futsatapapo fianmafain nocon ihui inin sharashtacoin futsa futsatapapo fianmafain toquiri curushcain oshopa

sharashtacoin ahuun anu marfilhuunshon ahuarafa onihuaafain ihui chicoinhuunshon ahuarafa onihuaafain cuno ahuun anu broncehuunshon ahuarafa onihuaafain cuno futsan ahuun anu fiero-huunshon ahuarafa onihuaafain toquiri ahuun anu marmolhuunshon ahuarafa onihua nanfo afanan fianmafain.

¹³Nocon pitiri ahuun anu canela non yochi non nan fimi ahuun anu uva ahuun unu non shuni non harina roroshta non trigori fianmafain inin shara aton anu incienso yafi futsan ahuun anu mirra non inin futsafori fianmafain nocon inafon nan moifo non chashoanfo non caballofo fianmafain taramutiya fianmafain nocon oinmatifori noco afanan fiantirofoma.

¹⁴“¡Ohuashta! Babiloniafoan nan ahuarashta sharashtacoin futsa futsatapafo man fasi fuchipaimisifo afanan man fitiroma. Nantifi man aya cuscan man funocoian afanan man fipanacama. Man ahuara yopapaonima. Man acai afanan ascanacama. Nantifi matona man funoi cuyocoianran,”

ishon nan inanmitsamisifoan yoishquicani. ¹⁵Babiloniafo fasi omitsiscai nan Babilonia anoafon yamafashon aton mafo fimisifo atohuunshon mai futsa inanmitsashon pui ichapa fimisifo fasi ratucoincani. Fasi uaishecani manocaquin yoiquin isca huashcani,

¹⁶“¡Ohuashta! Rato futsafocai Babiloniafo cuscarama. Ahuun yorafa sahuuti sharashtacoin sahuumisifo. Sahuuti shonan shara non oshin shara non oro toquiri faca facaitsa chicoin non toquiri futsa ahuun anu perla sahuutihuun nua nanscara sahuuafon. ¹⁷⁻¹⁹Fasi isharafiamisishacaquin samamashtacoin nantifi man funoafon. Afanan aton pushurasi

yamai. Man coi cuyoi futsua. ¡Ohuashta!”

ishon nan inanmitsamisifoan yoishquicani. Nanscarifiai nan shashohuan ifofoan non amuran fomisifo non shashohuanun camisifo pui fiishquin afoanri fasi shinain. Babilonia coaiton chaicushon oincani manocani fasi uaicani.

“¡Ohuashta! Rato pushurasi futsancai Babilonia cuscarama. Nanno fustishon shashoan ifofoan pui ichapa fifafo. Ascanfiacanashu samamashtacoin nantifi man aya cuscan funoaforan,”

ishon shashoan yonomisifoan yoishquicani.

²⁰“Ascafiaifoanno nantifi Upa Dios icanafocan unimacahuun. Babiloniafoan Jesús icoinra huafo man omitsiscamamisifo. Ascancufin Upa Diosin ato fasi onannitimana omitsiscapanacafo. Nantifi Jesús icoinra huafoan non Jesús fu rafumisifoan non Diosin tsain inon pacoai yoisimisifoanri unimacahuun,”

—ishon yoia. ²¹Ascatan Upa Diosin ahuun oinmati afu nai muran icaton futsan mutsisipacoin toquiri uhuapacoin finifoantan unuhuan muran potaquin yoia isca huaquin,

“Un na toquiri curushcai pota cuscan nanscarifiai Upa Diosin nan pushurasi anoafon Babilonia curushcai ato onaintimashqui coi munononfo. Cuyoriscatashquin afanan tsoan oinnacama. ²²Ascan afanan Babilonia ano manutifon nan shainti non manuti futsafori pusicanima. Tsoancai afanan ato nicanacama. Yonomisi afanan ano iyamacain afanan naniainfo nicayamafain ²³afanan lamparina ano otapacunacafoma. Nocofunon ainfo fiaino unimaifoan man nicamisi.”

“Ascan afanan tsoan ascaran nicapacunacama. Babilonia anoa inanmitsamisifoan fasi tapicoincani. Nanfoan fasi ichapa fiafo. Aton shointihuunshon manifoti paramisifoquin. ²⁴Babiloniafoan Diosin tsain yoimisifo non Jesús icoinra huafo futsafori rutumamisifo. Manifoti anoa ato rutunifo,”

ishon Diospan nai oinmatinin yoia.

19 ¹⁻²Ascatan nai muran icafo ichapacoin aton oi un nica. Oi ashcafinin un ato nica isca huaquin,

“Tsoan chaca huamisi Upa Diosin ato onaintimai. Iconquin ato onaintimai. ¡Aicho! Nocon Ifon Diosin fasi sharacoin non yoipacunon. Nanton nocon chaca soashona non afu nipanon. Ahuunua fusti non yoitiro isca huaquin, ‘Min nocon Ifocoin. Tsoa futsacai mia cuscarama. Mirus fusti min sharacoinmisiran,’ ishon nantifishon yoipacunonfo. Ahuun shinanhuunshon ahumamishti huatiro. Upan Diosin Babilonia anofo atohuunua isca huaquin yoia, ‘Nan Babilonia anofo ainfo furomacoin cuscarafu. Man chaca huamisifohuun manifoti anofo ato chaca huama. Ascancufin ua Babiloniafoan fasi ua chaca huafo. Uhuun yorafori man omitsiscamacani naanonfo. Ascan un ato omitsiscamapacunacaran,”

ishon Upa Diosin yoia. ³Afanan oi ashcafinin nai murannofoan yoia isca huaquin,

“¡Aicho! Nocon Ifon fasi sharacoin non yoisharapacunon. Chaca huamisifo iconquin ato onaintimai. Ato chii urumanhuan muran potai. Nan chiecai nocapacunacamaran,”

ishon yoiafo. ⁴Ascatori Upa Diosin tsoa ano nan Jesús icoinra huafo aton

cushumisifo nan veinte cuatro nocofunufu yafi nan Diosin onihuanu rafu non rafuri anaman fuoshonpacufoantan isca huaquin yoiafo

—¡Aicho! Nanscasi ipanon. Amen. Nocon Ifon Jesús fasi sharacoin, non yoipacunon —ishon yoiafo.

⁵Ascatan Upa Dios tsoa anoa un oi futsan nica isca huaquin,

“Upa Diosin oinmatifo non niaifofanri man Diosin mato yoia cuscan nicacoinmisi. Marifi Upa Diosihuunua yoisharacahuun isca huaquin, ‘¡Aicho! Upa Diosin min fasi sharacoinran,”

huacahuun.

Jesús nan Diospan chashoan facu cahuanshara cuscara ahuun yorafo aquí ihuutiro afu fusi huanonfo

⁶Ascatan yorahuanrasi aton oi unuhuan ponoin achacoin cuscara yafi nai curushcain turuica nicatsa un nica yoiaifoan,

“Nocon Ifon Diosin tsoan atiro ma cuscan ahumamishti huatiro. Nanfin nantifain nocon Niaifocoinquin. Manifoti anoa noco iquinan. ¡Aicho! Nocon Ifon Diosin fasi sharacoin non yoipacunon.”

⁷⁻⁸“Nocofunun ainfo fiaino ainfo unimacoin itisharatiro ahuun funu fu fiainan. Nanscarifiai nocon Ifo Jesús nan chashoan cahuanshara cuscara natian ahuun yorafo afu imapacui. Ascan ahuun yorafo man itisharafo afu ipashcaquin. Ainfoan ahuun funu unimamai nashitiro. Nashishon saya funa sharashtacoin patsashon sahuutiro afu fiananshquin. Nanscarifiai ahuun yorafoan itisharashon Upa Diosin aton chaca soashonon Jesús fu ipasharanonfo. Ascacun non unimanon. Tsoa futsancai mia cuscara sharamaran non nocon Ifo huanon,”

ishon yoiäfo. Diospan yorafoan Jesushu-unshon futsafo shara huamisi. Ascan Diosin ato sahuuti sharashtacoin sahumana Jesús fu ipasharanonfo.

⁹Ascatan Diospan oinmati nan afu ica ua yoiä, —Un mia yoiäi cuscan cunuhuu isca huaquin, “Uhuun Facun Jesús chashoan facu cuscara natian nantifi ahuun yorafo ichanain afu ipashcaquin. Ascan ohuu. Uhuun Facu ahuun yorafo pimai minrifi ato futan pitiro afu ipashquin,” ishon Upa Diosin nannori yoi fasi unimatiro. Nannori Upa Diosin ahuun tsain. Ahuun tsain man icoinra huatiroran, —ishon ua yoiä.

¹⁰Ua yoiäino un anaman fuopacua, —Min sharacoinran, —ishon yoishquin. Ascafiashon ua yoiä, —Asca huayamahuu. Ua anori yoiyamahuu. Unrifi nan mi futan Jesús icoinra huafo cuscarari. Jesús mato yoiä cuscan man cachiquiri huamisima. Un matofu ahuun oinmatiri. Nan fusti non fuoshopacutiro yoishquin, “Min fasi shara. Min uhuun Iforan,” ishon min nan fusti yoitiro. Diospan tsain yoimisifoan yoiäfo cuscan unrifi un mia yoiä nancasi huaquin non Jesushuunoo non yoinon, —ua huaa.

**Cristo afanan mai ano
oshquiai cuscan yoiä**

¹¹Ascatan uhuun namapan ointsa ua oinmana cuscan afanan un mato tapimai man tapinon. Upa Diosin nai muran icanoa un oian. Fupoti fupumua pushu muran non ointiro. Nanscara Upa Diosin icari un cayacafi oian. Nanno caballo oshopa un oian. Nan caballo camaqui tsaoton ahuun anu ichapa. Ahuun anu rafuhuunoo mato yoinon. Yoiä cuscan acoinmisi. Ascan ahuun anu futsan Iconmisi. Nanton iconcoin yora chacafo onaintimai. Nan Diosin tsain nicacasmamisifo ato potashquin omitsiscapanacafo muran. ¹²Ahuun furo chi

uruai cuscara rafu. Chi uruaino faquishfiacun yoran oinsharatatiro. Nanscari-fiai nocon Ifoan yorafoti aton nomuran shinain cuscan onancoian. Niaifo maiti sharashtacoin ichapa maia. Ahuun fumananqui anu cunua. Arus fusti nan anu onan.

¹³Sahuuti chainipa sahuua. Nan sahuuti imiqui pocoa. Ahuun anu futsari Diospan Tsainran. ¹⁴Ahuun yorafo nai ariashu caballofo oshopa camaqui aton Ifo cachiori focani. Ahuun ranushumua cuscarafu. Aton sahuutifo yufan oshopa sahuuafo. Na sahuuti oshopa rama patsamua cuscarafu. ¹⁵Ahuun tsain nopu cunocoin cuscara. Ahuun tsainmansi manifoti yoitimamisifo ato onaintimai. Manifoti ato iquina ratofomain yoitimamisiqi ato curushcai onaintimaquin finacoin. Ahuun tsain nicacasmamisifocun nan Diosin ahuamamishti huatiro fasi atoqui sinacoin. Ascan Jesushuunshon ato onaintimai omitsiscapanacafo muran ato potashquin. ¹⁶Jesús ahuun anu futsan ahuun sahuuti chainipa mananquirinoa yafi maiquirinoahuun cunua isca huaa,

**NIAIFOFO MANIFOTI ATON
NIAIFOCOIN ANUFAIN IFOAFO
MANIFOTITON ATON IFOCOINRAN**
ishon cunua.

**Jesús nan yoina pofu cuscara
finoncoinyaino chii
urumanhuan muran potani**

¹⁷⁻¹⁸Ascantari un oian Diosin oinmati afu nai muran ica futsan fari tsacaino nishon oi ashcafinin puiyafu noyaiton cuna, —Fucahuun. Upan Diosin mato pimapai. Niaifocoinfo non ranushumua aton niaifocoinfo non aton niaifo patasharifo non nocofunufu mutsisipacoin non caballofo non caballo catu camaqui tsaofu non nantifi Diosin tsain nicacasmamisifoti niaifofo

non yora ahuamari nantifi Diosin ato namashquin. Ascacufin puiyafoan aton nami pi mayanshquincaniran, —ishon nan oinmatinin puiyafo yoia.

¹⁹ Ascatan un afanan nocon Ifo Jesús ahuun noicasmamisifo nan yoina pofu cuscara yafi manifoti aton niaifofo uhuun namapan ointsa un ato oian. Man ichananfoan Jesús ahuun caballo camaqui tsaocun ahuun yorafoya rutupaicani. ²⁰ Aton rututamarocon Jesús ato achia chi muran ato potashquin. Nan yoina pofu cuscara yafi nan fuparamitsamison, —Unfin Diosin tsain mato yoimisiquin, —ishon yoifiashu chanimisi. Nanton yoina pofu cuscarahuunoa tsoan atiroma cuscan Satanashuunshon huamisi. Ascan nantifi cunua yorafo nan yoina pofu cuscara ahuun anu atoqui nua. Nanfoan yoimisi isca huaquin, —Min uhuun dios. Un mia noiran, —ishon yoimisifo. Ascarafon nan yoina pofu cuscaraqui. Ascan nan paramitsamison tsoan atiroma cuscan ahuamamishti acai cuscan man oianfo. Ascaquin ato paracoian. Nan rafu nan yoina pofu cuscara yafi nan paramitsamisi niyoa Jesús ato chi urumanhuan muran pota.

²¹ Nan rafutan yora tushuafo Jesús ahuun caballo camaqui tsaoshon ahuun tsainman nopu cunocoin cuscarahuunshon ato rutumana nai futsuafo. Naafoanno puiyafo atoqui ichanancashon aton caya piqui mayafu.

Jesús Satanás achishon nusha mil fari

20 Ascatan Diospan oinmati Diosin icariashu fotoaiton un oian. Shafi cuscara tsoma. Nan yoshin chacafo quininhuan faquish muran icafoqui atoqui fupoti fupoa. Nanno Diosin oinmati fupoti ahuun shafi cuscara yafi cuno pono uhuapa cuscara tsoma. ² Tso-mashon nan famanhuan cuscara achia. Diosin mai oni huataima nan rononhuan iyopaoni. Paramitsamisicoin. Naanfin

yoshin chacacoin Satanás. Achishon cuno pononun nusha. ³ Ascashon quininhuan faquish muran pota. Potatan aqi fupocoian amuran mil fari inon afanan caifoti paranonma. Nan mil fari anaitiano cainmayoi ahuutishotama afanan mai ano cahuancacayonon.

⁴ Ascatan niaifoan tsaotifo Upa Diosin icanoa un oian. Jesús ahuun yorafo nan tsaotifo camaqui tsaofu. Jesús yonoano a futan futsafo yonoshquin. Ascashon nannori un oian nan Jesús icoinra huaa futsafo. Nanfo niyoano nan yoina pofu cuscara yafi ahuuna ointsa rami huati nanfoan ifoanmisima. —Minfin uhuun Ifo. Un mia noiran, —ishoncai yoimisifoma. Aton anu aton mucu iyamarai aton fumananqui cunumisifoma. Ascata-marocun yoimisifo isca huaquin, —Jesús fustifin nocon Ifoquin, —huamisifo. Diospan tsain fustisi tanamisifo. Ascan nan yoina pofu cuscara atoqui sinaquin ato tushtumana. Nai futsufiafo Diosin ato funimani. Funishon Jesús futan mai ano mil fari yorafoti iquina.

⁵ Nanfo funi yoi. Ascan nan mil fari anaitiano futsanfori funimashquin.

⁶ Shinancapon uhuun yoramishtichin un mato yoi ai cuscan. Nocorifi Upa Diosin noco funimaqui tau huashquin. Nocon catoan ahuun yorafo non inon. Upa Diosin yafi Criston noco yonomapaiyai cuscan non futsafohuunoa non Upa Dios cufimisi. Non Jesushuunoaashu omitsiscafiamisishaquin naashu non omitsiscapanacafo muran canacama. Ascatamarocun non Cristo icanoshon a futan futsafo iquishquin. Ascashu Jesús cuscara shara icashu non fasi unimacoinshquin.

⁷⁻⁸ Ascatan nan mil fari anaitiano Satanás quininhuan faquish murannoa afanan cainmayoshquin nan manifoti anofo parayonon. Ascatan Dios nica-casmafo manifoti ano ato ichanan huai Diospan yorafo rutumashquin. Ichanan-

foanno fasi ichaparasi. Nan Dios nica-casmafo tsoan tanan huatiroma. Aton anuquin Gog yafi Magog man huamisifo. ⁹Manifoti cunua ato ichanan huashquin Diospan yorafo icano ato cufuacufoanifo ato rutushquin. Ascafiacun Upan Diosin ahuun yorafo fasi noiquin ato numashqui. Nan yorafo Satanás ichanan huua nai muranшон ato camaqui chi urumanhuan potai nai futsunonfo.

¹⁰Ascatan nan yoshin chaca Satanás nanton yorafo fuparapaimitsamiscocin Upan Diosin chi urumanhuan muran pota. Nanno omitsiscapanaca. Nannori nan yoina pofu cuscara yafi a futan yonopaoni, —Unfin mato Dioshuunoa yoimisiquin, —ishon yoifiamisishaquin Satanashuunoa ato yoimisi. Fasi paramitsamiscocin. Nan rafu non fusti chi urumanhuan muran omitsiscapashquin. Isin muuquin unupacunacafoma.

Jesús icoinra huafoma ato onaintimashquiai cuscan

¹¹Ascatan tsaoti oshopa uhuapacoin un oian. Nanno Upa Diosin tsoan. Ahuunoashu nantifi mai anofo non nai murannoari cuyoi futsui. Ascashu nantifi yorafo nai futsui. Diosiqui onupaifiai tsoan onutiroma. ¹²Ascatan un oian nan niaifofo non yora ahuafori naacanashu Upa Diosin tsoan ano niafo. Nanno niafoanno Upa Diosin ahuun librofo fupua. Libro futsari fupua. Nan libro ahuun anu nipamisifo aton anu cunua. Nan naafoan amisi cuscan librofo muran nantifi Upa Diosin man cunua. Ascán nan chaca huapaonifo cunupacua cuscan ato ismashon iconcoincun ato onaintimacoinshquiran ishon ismatiro.

¹³Nan asafu yafi mai anoashu naamisifo nan omitsiscapanacafo muranri nantifi nan naamisifo Upa Diosin ahuun ointaifi fuafo. Nan chaca huafo cuscan atoti Upa Diosin

onaintimacua. ¹⁴Nantiffain nan Diosin tsain nicacasmamisifo Upa Diosin ato chi urumanhuan muran pota. Man naafiafoan natian ato chi urumanhuan muran pota. Nannoashu omitsiscapanacaforan ishon ato anupacua. ¹⁵Ascán nan libro ahuun anu nipamisi. Tsoa ahuun anu nan libro muran Upa Diosin cunumisima nanfo chi urumanhuan muran pota.

Nai yafi mai funacoin Upa Dios afanan oni huashquin

21 Ascán uhuun namapan ointa Upa Dios noco ashoain cuscan ua oinmana. Un oian nai yafi nai murannoafoti maifoti funacoin Diosin onihua. Nan nai yafi mai tauhuaquin onihuani yamariscatana. Nan ununhuanri yamariscatana. ²Ascán un oianri Diospan yorafoan Jesús tanasharamisifo nai murannofo Upa Dios icariashu fotocani. Nanfo icano ahuun anu Jerusalén funa. Nan Jerusalén funaya fotoashu nanno icani. Fotoaiton un oian fasi sharash-tacoin. Ainfon ahuun saya sharash-tacoin sahuua itisharashquin funu fu fianain. Nanscarifi aquin Upa Dios nan Jerusalén funa atishara huua sharash-tacoin inon. Ahuun yorafo nanno afu nipasharashcani.

³Ascán Upa Dios tsoa ano oi ashcafinin un nica. Yoia isca huaquin, —¡Aicho! Natian Upa Dios yorafo fu iishquin. Ato muran iishquin nanfo ahuun yorafo inon. Aafin aton Diosiri iishquin. ⁴Ato cushusharashquin afanan tsoa omitsiscatiroma. Atohuun ramapai tsoa uaicai ato shinanmasharatiro aton funon turuashontiro afanan shinanchacai cuscan pusitama unimanon. Ato cushuaino tsoashta afanan nayamacain manoyamacain uaiyamacain isin mucanimaran, —ishon yoia. Ahuara chacafo iyopaoni cuscaai afanan ascanacama.

⁵ Asca huatan Diosin ahuun tsaoti camaqui tsaoshon yoiquin isca huaa, — Un nantifi funa onihuiran, —ishon Dios yoia. Ascashon futsan ua yoia, —Min nicai cuscan cunuhuu nan tsain nantififain icoinra huanonfo. Iconcoin nan tsain yorafoan icoinra huatirofo, —ishon ua yoia.

⁶ Ascashon afanan Diosin ua yoia isca huaquin, —Mun aca. Natian mun yoiyoni cuscan man anaitia. Ahuara oni huataima un iyopaoni. Ahuutiamain maifoti cuyoicai urus fusti un yoitiro. Un nantifi iquina. Ufin ipamisiquin. Tsoan naaqui nomicoinquin yoitiro isca huaquin, “Unfin fasi unu yopacoincai nashquima,” ishon yoitiro. Nanscarifiai tsoa ipasharapaiquin yoitiro isca huaquin, “Un fasi numamisi yopai. Un Dios yopacoinran,” ishon anori yoiaiton un unimaquin cashmancoin nan nimapacutiro ufu nipanon. ⁷ Tsoan ua cachiquiri huatamarocon nan naitian ua tanasharacun nantonacaifin nantifi un mia yoia cuscan ahuunari iishquiquin. Naanfin un cashman inanshquin. Unfin ahuun Dios iishquin. Aafin uhuun facu iishquin.

⁸ Ascan ratoran futsan ratutan cohuiqui uhuunoashu omitsiscapayamacun ua cachiquiri huashquin uhuun tsain icoinra huayamafain chacacoin futsa futsatapafo shatucasmafain rutumitsamisi icain aton ahuinma chotamisi icain ainfofoanri aton funumafo chotamamisi icain shointi nan yoshin chacafo fu tsainmisi icain Uacai noitamarocon ahuara futsan finaquin noicoiain icain ascarafu yafi nantifi chanimisifori ufu ipatamarocon chi urumanhuan muran nan omitsiscapacunafo muran ipashcani. Anoashucai fonacafoma, —ishon Upan Dios ua yoia.

Jerusalén Funa

⁹ Ascatan Diosin oinmati afu nai muran icafo nan siete nanfoan tutso muran

ahuara chacacoin fospihuamua maifoti camaqui ocacaquin ato omitsiscamacani futsan uqui oshon ua yoiquin isca huai, —Ohuu. Un mia ahuara sharacoin ismai. Nocofunun ainfo fii cushusharashquin. Nanscarifi aquin Jesús nan chashoanun facu cahuanshara cuscaraton icoinra huafo fia ahuun yorafo inon. Ohuu. Un ato mia ismanon, —ua huaa.

^{10–11} Ascan Diospan Yoshin Sharapan ua iquinaiton Diospan nai oinmati ua machi uhuapa cuyacoin camaqui iyoa nantifi un oinnon. Jesús icoinra huafo nan Dios icanoafo aton chaca soashona nanfo nai murannoa Upa Dios icariashu fotoaifoan ua isma. Nan machi cuyacoin anoshon ua isma. Nanfo icano ahuun anu Jerusalén funa. A muran icafo Jesús tanasharamisifo. Upa Diosiri atofu ica. Nanno fasi faca facaitsa. Toquiri faca facaitsa cuscara. Fasi sharashtacoin. Nan toquiri ahuun anu jaspe tsosia shara toquiri futsan ahuun anu cristal. Faca facaitsa cuscara.

¹² Cunu cushto mutsisipan cuyacoin nan Jerusalén tarati huayacuna. Nan cunu cuyacoin doce fupotiya. Fupotiti ano Diospan oinmati afu nai muran icafo doce nia cushusharashquin. Israeli ahuun facu doce facufo aton funafori tiri futsan pashcanifo. Nan fupotifoti aton anu doce nutanfo.

¹³ Nan cunu rafu non rafuri cuyacoin iyacuna cuscan fupotiya doce fari oaiquiri rafu non fusti non fari oai istafari rafu non fusti non fari cai istafari rafu non fusti non fari caiquiriri rafu non fusti fupotiya.

¹⁴ Nan cunufo cuyacoin toquirinin-huan doce camaqui onihua. Jesús nan cashoanun facu cahua sharashta cuscara afu rafumisifo doce aton anu toquirinin-huantiqui nutan.

¹⁵ Diospan nai oinmati futsan nan unfu tsainquin tananti tsoma Jerusalén funa non ahuun cunufo cuyacoin uhuapan

non ahuun fupotiri tananshquin. Nan tananti facatahua chainipa cuscarafishu oro sharashtacoin.¹⁶ Nan Jerusalén funa ahuun cunu rafu non rafuri cuyacoin nantishon fosi. Ahuun chainipa non ahuun ashfanri nantishon rafu. Ahuun cuyari nantio fosi. Diospan nai oinmati futsan tanan dos mil dos cientos kilometros ahuun chainipa non ahuun ashfan non ahuun cuyari.¹⁷ Ahuun cunufo cuyacoin ahuun cushto sesenta y cinco metros tanan. Nan oinmatinin afu nai muran icaton yorafo tananmisi cuscari arifi metronun tanan.

¹⁸⁻²⁰ Jerusalén funa sharashtacoin. Ahuarafo amuran vidrio botica cuscara cushtocoin ocu rafu oinquin non nocotiro. Vidrio botica cuscarafishu oro. Nanhuunoa Upa Dios onihua. Ahuun cunufo cuyacoin non cushtocoinri. Toquiri ahuun anu jaspe tonan shara ahuun cuno oshin shara faca facaitsaya osian. Toquiri sapa cushtocoin futsa futsatapafo doce putsamuinia camaqui nan cunu rafu non rafuri Upa Dios onihua. Toquiri sapa fasi chainipa cushtocoin futsa futsatapafo fusti tauhuaqui fuca. Ahuun anu jaspe.

Nan jaspe tonan shara ahuun cuno oshin faca facaitsaya osian.

A fuchi toquiri sapa futsa fasi chainipa cushtocoin ahuun anu zafiro. Nan zafiro tonan sharashtacoin.

A fuchi toquiri sapa futsa fasi chainipa cushtocoin ahuun anu agata. Nan agata shonan sharashtacoin osian.

A fuchi toquiri sapa futsan chainipa cushtocoin ahuun anu esmeralda shonan sharashtacoin.

A fuchi toquiri sapa futsa chainipa cushtocoin ahuun anu onice oshin mapash sharashtacoin.

A fuchi toquiri sapa futsa chainipa cushtocoin ahuun anu cornalina oshin sharashtacoin.

A fuchi toquiri sapa futsan chainipa cushtocoin ahuun anu crisolito ahuun cuno oshin faca facaitsa cuscara sharashtacoin.

A fuchi toquiri sapa futsan chainipa cushtocoin ahuun anu berilo shonan mapash sharashtacoin.

A fuchi toquiri sapa futsan chainipa cushtocoin ahuun anu topacio chashna sharashtacoin.

A fuchi toquiri sapa futsan chainipa cushtocoin ahuun anu crisoprasa shonan yafi chashna mapash osian sharashtacoin.

A fuchi toquiri sapa futsan chainipa cushtocoin ahuun anu jacinto nanhuain ointsa mapash sharashtacoin.

A fuchi ahuun unutaquin toquiri sapa futsan chainipa cushtocoin ahuun anu amatista nanhuain ointsa sharashtacoin. Nan toquiri sapa doce sharashtacoin a fuchi cunu Upa Diosin nimainifoanni.

²¹ Nan cunu rafu non rafuri ahuun fupotifo doce perlahuunshon Diosin ato onihua. Perla toquiri cuscara osho sharashtacoin. Nan perla fustihuunnoa fupoti fusti onihua. Perla fustihuunnoari fupoti fustiri onihua. Nansca huashosi nan doce fupotifo Upa Dios onihua. Nan Jerusalén funa ahuun faitifi oro sharashtacoin onihua. Nan oro vidrio botica cuscara cushtocoin ocu rafu oinquin non nocotiro.

²² Ascan nanno Dios fu tsainti pushu yamai. Upa Dios nan ahumamishiti huatiro yafi nocon Ifo Jesús nan chashoan facu cahuan sharashta cuscara Jerusalén funa muran imisifo. Ascacufin yorafo atofu tsainpai pushu yopacanima. ²³ Nanscarifiai nanno fari yafi oshu yopacanima. Upan Dios yafi Jesús nan chashoan facu cahuan sharashta cuscara atofu ica. Upan Dios nanno ishon ato chashashona. Jesusrifi aton lamparina cuscara ato

otashona cayacafi oinsharanonfo. ²⁴Nanhuunshon chashaino manifoti nifoanfafaitirofo. Niaifofanri nan Jerusalén funa muran iquishon ahuarafa shara man aya cuscan iquimashquin.

²⁵Nanno yamuri yamai. Faquishpacunacama. Ascan ahuun fupotifo fupopacunacama. ²⁶Ascan Jerusalén funa muran manifoti anoafo iquicaquin ahuarafa shara aya cuscan amuranri iquimashcani. Aqui fasi unimacani finacoinshcani. ²⁷Ascan ahuarashta chaca amuran iquitiroma. Nan shinanchacamisifo non chaca huamisifo non paramisifori iquitirofoma. Tsoa Jesús nan chashoan facu cahuan sharashta cuscara ahuun libro muran ahuun anu cunuano nanno afu ipatiro. Nanfosi Jerusalén funa muran iquitirofo Jesús fu ipasharashcaquin.

22 ¹⁻²Ascan uhuun namapan ointsa Diosin ahuun oinmati afu ica futsan Dios icanomain ahuu cuscaraquin ua isma. Upa Dios yafi Jesús nan chashoan facu cahuan sharashta cusca tsaoa anoashu unu tsosi cristal shafacaficoín ointsa afain. Icafo nushmancayan unu afain. Nanno icafoan nan unu tsosi shara ayapaiyaitian ayatiro. Nannoashu nipanaca. Nannori fai nushmancayan ica. Unu ocama rafu nii shocoa. Nan nii ahuun fimi pipaiyaitian pitiro. Nanscarifiai Dios no fu ipacoiainno non ahuunoashu nipasharashquin. Nan nii oshutifi fimimisi. Ahuun pui tsasipacunacama ahuun shachoco funa shara ipanaca. Ahuunoashu manifoti non Dioshuunoashu muma funa shara ipanaca.

³Nanno Jerusalén funa Upa Diosin yafi Jesús no fu iishquin. Non aton yoracoinshon non ato noicoishquin. Non aton oinmati cuscara iishquin. Ato fanainsharashocun ato yoisharapacunaca. Ascan nocon mai shuni ano chaca futsa futsatapafo ipaoni cus-

cacai nan Jerusalén funa ascarama. Ahuashta chaca amuran itiroma. ⁴Nanno nocon Ifoan fuso oinfafaincani. Aton fumananqui ahuun anu nutamana. ⁵Nocon Ifon Diosin ari icafo ato shafahuashoan. Ascan afanancai lamparina yafi fari yopatirofoma. Anocai afanan yamuima. Nanscashi afu niaifo patashari ipanacafo.

Jesús oti chaima

⁶Ascatan Diospan oinmati afu nai muran icaton afanan ua yoia, —Nocon Ifon Diosin ahuun tsain yoimisifo aton no-muran tapimamisi ahuaa ahuuscaranai cuscan aton yorafo tapimashcani. Nanscarifiai natianri ahuun oinmati afu ica futsa nichian ahuaa ahuuscaran arishcashquiain cuscan ahuun icoinra huafoti tapimashquin. Nan un mia yoiai cuscan iconcain. Nantifi uhuun tsain man icoinra huatiroran, —ishon ua yoia.

⁷Yoiquin asca huatan nocon Ifo Jesús yoia isca huaquin, —Un nai murannoashu mai ano matoqui nocoriscashquin. Man min oian inon pacoai cuscan nanfo min cunushotiro. Tsoan nanfo icoinra huafain cachiquiri huayamashu unimacoin iishquiran, —ishon Jesús ua yoia. ⁸Uquian, Juan, un nanfo nicafain oian un nan Diospan oinmati afu nai muran icaton un anaman nofuomupacua nan uhuun ifocoincun ismashquin. ⁹Un asca huafiaiton ua yoia isca huaquin, —Asca huayamahuu. Urifi mia cuscara. Min non Jesús icoinra huafo non ahuun tsain yoimisifo non nantifi nan min rama cunua cuscan icoinra huafo urifi mato cuscara nocon Ifon Diosin ahuun oinmati. Ascan Upa Diosin fustisi min Ifo huatiro. Nan fusti min anaman nofuomupacucahuashotiro, —ua huua.

¹⁰Ascatan afanan ua yoia isca huaquin, —Ahuuscaran arishcashquiain cuscan min rama cunua samamashta

iishquin. Ascan min cunua cuscan onuyamahuu. Nantifi yorafo tapimahuun. ¹¹ Ascan Jesús nocoaitian nan nicacasmamisifo fasi chaca finacoinshquicani. Yora chacacoin huamisifori mimacoin chacacoin iishquin. Nan Diosin yoia cuscan huamisifori mimacoin Diosin yoia cuscan aashcani. Nan Jesús cuscara shara imisifoanri mimacoin huaquin aton Ifo tanasharashcani, —ishon Diospan oinmatinin nan afu imisifo futsan ua yoia.

¹² Ascashon Jesús afanan yoia isca huaquin, —Ua nicasharacahuun. Un matoqui samamashta nocoriscái. Nocoshon un mato yoia cuscan man huacun un mato inansharashquin. Nan shara huamisifo un ato shara huafain nan chaca huamisifo un ato onaintimacoinshquin. ¹³ Ahuarafo onihuataima un iyopaoni. Unfin ipamisiquin. Un ipashquin. Un unupacunacama. Ahuutiamain maton mai cuyoicai urus fustifin un yoitiro.

¹⁴ Jerusalén funa muran iquishon nan nii ahuun fimi pipaiquin pitiro nipashquin. Nanscarifiai Upa Dios fu icaino arus fusti mato nimapacutiro. Nan ua icoinra huafo aton chaca soashona nanfo fusti uhuun Upa Diosin ato iquimatiro nofu ipanonfo. ¹⁵ Ascan nan yora chacacoin pashna pofu cuscara iquimayamafain shointifo ya nan shointi icoinra huafo iquimayamafain nocofunun ahuun ahuinma chotamisi yafi ainfoanri ahuun funuma chotamamisi iquimayamafain rutumitsamisi iquimayamafain tsoan Dioscoinma noiquin ifoancun iquimayamafain nan chanimisifo nan chani noimisicai. Ascara yorafocai Jerusalén funa muran iquitirofoma.

¹⁶ Unquian, Jesús, uhuun oinmati nan unfu icaton miqui nichian un mia yoia cuscan ua icoinra huafo ichananti anori

min ato tapimanon. Unquian David ahuun funa. Un fishi uhuapa shafainoshta oinmisi cuscara. Nan fishi oinquin non tapitiro samamashta shafariscatiro. Nanscarifiai un otichaima tapicanashu itisharatirofo Jerusalén funa muran ufu ipanacaforan, —ishon Jesús yoia.

¹⁷ Ascano Diospan Yoshin Shara yafi Jesús ahuun yorafoanri nantifi yorafoqui isca huacani, —Jesusqui fucahuun, —yoiafoan. Tsoan nicacoiainton yoiqui isca huatiro, —Jesusqui fucahuun, —huatiro. Tsoa nomicoin unu yopai unu ano catiro ayatan ahuun nomi shatutiro. Nanscarifiai tsoan ahuun chaca shatupai Jesusqui otiro Upan Dios fu ipashquin. Ahuara inantamarocon Jesús icoinra huashu afu nipatiro.

¹⁸ Unquian, Juan, ahuuscaran arishcashquiain cuscan un mato cunushona. Un mato cunushonai cuscan cayacaficoín. Tsoan nan tsain nica natian un mato yoipacuai cuscan. Ua nicasharacahuun. Un mato cunushona cuscan tsoan afanan tsain futsa shinanfain cunucun nan libro muran omitsiscapanacafohuunoa cunua cuscan iconcain Upa Diosin nantifi nanfo omitsiscamashquin. ¹⁹ Ascantari ahuuscaran arishcashquiain cuscan un cunua tsoan nan tsain atirifi soacun Upa Diosinri ahuun anu soashquin nan ahuun libro murannoa. Ascacufin nan Jerusalén funa shara muran iquipacunonfoma. Un nan cunua cuscan nan Upan Diosin ahuarashta shara yoiyoni cuscan aya ipanaca.

²⁰ Jesús yoia cuscan nannori un mato cunushona. Nanton yoiqui isca huaa, —Icon. Un matoqui samamashta nocoriscairan, —ishon yoia. Ascaran inon. Ifon Jesús nocoqui oriscahuu. ²¹ Mancái Diospan yorafo. Ahuara ahuuscarafaino nocon Ifon Jesús matohuun noishon maton nomuran mato fupuashoin man shara inon. Nanscasi ipanon. Amen. Nanti.

Juan